

RACCOLTA


di

POESIE VENEZIANE

1845.

*Prof. J. de Francensis*

*Ma  
ca*



Scaffale

*9*

Palchetto

*III*

*15*



850.8  
G187





*Gamba, Bartolommeo*

# **RACCOLTA**

DI

## **POESIE IN DIALETTO VENEZIANO**

D' OGNI SECOLO

NUOVAMENTE ORDINATA ED ACCRESCIUTA.

---

---

**VOLUME UNICO.**

---

---



**VENEZIA,**

CO' TIPI DI GIO. CECCHINI E COMP.

---

**1845.**





21/1/28 m R K

## AI CULTORI ED AMATORI DEL DIALETTO VENEZIANO.

---

**F**u bello ed utile divisamento del chiarissimo e benemerito delle lettere, Bartolommeo Gamba, quello di raccogliere e pubblicare nell'anno 1817 le migliori opere scritte nel dialetto veneziano.

Dalla cortese e meritata accoglienza fatta allora, generalmente ed ovunque, a questa collezione preziosa, abbiám preso consiglio di eseguire la nuova Raccolta, che credemmo di comprendere in questo solo volume.

È stato nostro precipuo intendimento, ripetendo la edizione del Gamba, e di presentarla con più sicura lezione, e di renderla ricca di moltissime aggiunte di scrittori contemporanei, le quali furono tratte dal Baffo, dal Buratti, dal Bussolin, dal Cicogna, dal Foscarini e dal Nalin; dal Cumano e dal Tonelli di Feltre, dal Martignon, dallo Spranzi, dal Zanetti e dal Zilli.

Avremmo desiderato di vederci onorati da molti altri coltivatori della poesia vernacola, ma la costante loro ritrosia non fu vinta dalle nostre preghiere; ciò nondimeno ci gode l'animo di poter dire, che la presente Raccolta è superiore a quella del Gamba e per migliorata lezione, e per la nuova e varia copia delle produzioni che vi si aggiunsero. Nel dedicarla poi ai cultori, ed amatori del dialetto veneziano, non possiam dispensarci dal ripetere la bella lettera colla quale il Gamba medesimo volle dedicare la sua all'onorevole E. D. Davenport.

GLI EDITORI.

*All'onorevole signore*

## **E. D. DAVENPORT**

**BARTOLOMMEO GAMBA**

» Si troverà alquanto strano che io indirizzi a Voi, onorevole signore della Inghilterra, una Raccolta di Poesie scritte nel particolare dialetto usato in un cantone della Italia. Ma se le dediazioni si fanno o perchè gli argomenti svolti ne' libri tornano a particolare diletto di coloro a' quali si offrono, o perchè danno una pubblica testimonianza di affetto o di riverenza, niuna ve n' ha che possa essere fornita di migliori e di più giusti diritti di questa mia. Essa a Voi appartiene, dotto e perito nelle lingue e ne' dialetti italiani, a Voi raccoglitore solerte delle antiche e moderne preziosità dell'italiana letteratura, a Voi scrittore felice d'italiani versi berneschi e di novелlette venuste, a Voi poi specialmente, che per finezza d'ingegno, per eccellenza di cuore, per costante amorevolezza verso di me siete sempre presente all'animo mio.

» E siccome io ardisco confidare di avere fatto ottima scelta ne' componimenti, che mi sono proposto di dar in luce, così non potrà non esservi grato che vi renda qualche ragione e intorno al mio disegno, e intorno agli autori raccolti, onde possiate con favorevole prevenzione gustare della grazia, della forza, della eccellenza, di una perfetta poesia, abbenchè travestita sotto le umili forme di un parlare vernacolo.

» Colle illustri testimonianze dello Zeno, del Bettinelli, del Cesarotti, e di altri, mi sarebbe a buon conto facile il dimostrarvi che il veneziano dialetto sta in cima ad ogni altro d'Italia, ma non è proprio di animo gentile il ledere a' diritti delle altrui patrie predilezioni a fine di esaltare quel



solo linguaggio di cui uno mostra di essere particolare coltivatore; ed è poi giustissimo il confessare, che opere molto commendevoli nel medesimo genere contano anche le altre contrade italiane, come ne fanno prova le doviziose raccolte che sono a stampa di poesie scritte in napoletano e in milanese, e tanti leggiadri componimenti pubblicatisi ne' dialetti siciliano, bolognese, friulano, bresciano, piemontese, ec. Io mi limiterò dunque a dirvi, che le veneziane contrade hanno avuto gai componimenti ne' vari loro dialetti sin dal secolo sestodecimo, e che per esempio le *Commedie di Ruzante*, e le *Poesie di Menon, di Begoto e di Magagnò*, le une e le altre scritte in lingua rustica padovana, vengono tuttavia lette, studiate, ammirate. I cantori nel vernacolo proprio di queste lagune furono per vero dire in allora assai scarsi, e rimasero eziandio poco noti, se si eccettui un certo Alessandro Caravia, autore d'un curioso Poema intitolato il *Naspo Bizzarro*, e qualche *Canto dell'Ariosto* trasformato alla foggia veneziana. Approssimavasi alla sua fine il secolo stesso quando seppe farsi nome Andrea Calmo colle sue *Egloghe Pescatorie*, e surse contemporaneamente un veneto ingegno, Maffeo Veniero, al quale se fosse toccato in sorte di condurre una lunga vita sarebbe rimasta certamente una corona di trionfatore nel Parnaso vernacolo.

» Ora essendo prima di tutto opportuno di conoscere le nostre antiche Poesie, ad esse sole io ho consacrati due volumetti: questo primo, che, oltre a qualche componimento popolare pieno di brio, racchiude la *Guerra de' Nicolotti e Castellani dell'anno 1521*, ch'è una pittura importante di antiche e curiosissime nostre costumanze; ed il volumetto secondo, che dà un piccolo ma leggiadriissimo Canzoniere composto dal Veniero sopraccitato. Tra gli esagerati secentisti non è alcuno che lasciato ci abbia un'opera quale meriti veramente l'onore di ritornare adesso alla luce, e tanto più che non appartiene al genere lirico, mio solo scopo, un lavoro didascalico in dialetto veneziano di Marco Boschini, intitolato la *Carta del Navegar Pittoresco*.

» Era riserbato al secolo decimottavo, e a' giorni nostri correnti l'onore di produrre canti vernacoli di finissimo gusto; e quindi di autori poco è mancati di vita, e di altri tuttavia fiorenti io ho principalmente formato la mia raccolta in altri dodici volumetti. Venite al fonte, o onorevole Cavaliere, e non trepido a dirvi che vi disseterete di acque limpidissime e fresche. Nel vol. I vi occorrerà leggere le *Canzonette* di un Lamberti che hanno i vezzi di Anacreonte; nel vol. II gli *Apologhi* dello stesso autore pieni di vivacità e di sali; nel vol. III le sue *Stagioni Campestri e Cittadine* modellate sul vero, e colorite alla tizianesca; nel vol. IV cento Sonetti, i *Cavei de Nina*, del Dott. Mazzolà, che non hanno invidia della celebre *Bella Mano* di Giusto de' Conti; nel vol. V alcuni Ditirambi, fra' quali el *Vin Friularo* del dott. Pastò, che non teme il confronto del *Bacco in*

*Toscana* del dott. Redi; nel vol. VI i più spiritosi *Apologhi* del la Fontaine veneziano Francesco Gritti; nel vol. VII altro componimento dello stesso Gritti, il *Brigliadoro*, ch'è una favola brillantissima; nel vol. VIII alcune *Poesie di Pietro Buratti*, poesie vere e non rime; nel vol. IX varie *Barzellette* di Carlo Goldoni, inserite per rispetto al nome di questo veneziano grand'uomo; nel vol. X le *Poesie Satiriche* dell'Ab. Labia, che tenea fra le dita le penne di Giovenale e di Persio; nel vol. XI una Scelta di pregevolissime *Rime di vari Autori* o estinti o viventi; e nel vol. XII ed ultimo altra Scelta di quelle *Rime di vari Scrittori*, a' quali piacque di adottare uno stile basso e dimesso, onde meglio d'ogni altro servire al popolare trattenimento.

» Con i quattordici volumetti sin qui descrittivi si compie la mia serie del Parnaso Lirico del dialetto veneziano, da cui rimanendo escluse alcune opere moderne di lunga lena, giovami farvi almeno un cenno anche intorno ad esse, onde giudicare possiate sin a qual grado siasi fra noi esteso questo ramo di amena e propriamente nazionale letteratura. I due più grandi Poemi del mondo (e ciò per questa volta con buona pace del vostro divino Milton) l' *Iliade* e la *Gerusalemme* furono felicemente travolti nel veneto dialetto, il primo sotto il titolo di *Omero in Lombardia* dall'Ab. Francesco Boaretti, il secondo sotto il titolo del *Tasso alla Barcaruola* da Francesco Mondini. Voi conoscete molto bene le *Poesie Maccaroniche di Merlin Cocai*, e queste furono rivestite alla foggia veneziana per opera di certo Lodovico Pipperi, lavoro che non ha mai veduto la luce, ma che si possiede dall'egregio patrizio veneto Antonio da Ponte. Anche i leggiadri Canti di *Bertoldo*, *Bertoldino* e *Cacasseno*, scritti da vari Bolognesi, ebbero una trasformazione alla veneziana, pubblicatasi poco dopo la metà del secolo scorso; nè tra i Poemi eroi-comici va taciuto lo *Scaramuzza*, fatica onorevole di Giambattista Bada vivente. Molto esteso è eziandio il numero delle opere vernacole nella Drammaturgia, e troppo poi è stato, ed è tuttavia, quello de' componimenti erotici e libertini. Il Baffo veneziano fu poeta eccellente, e ci restano inedite molte sue opere, oltre a quelle delle quali si è fatto indegno uso con istampe alla macchia.

» Per le cose tutte sin qui esposte sembrami di avervi accennato quanto occorrere possa per conoscere alla sfuggita la valentia di alcuni ingegni fuori di questi lidi non noti. Ardisco promettermi che voi farete plauso al proponimento mio di toglierli dall'oscurità, e di raccomandarli perfino a codeste vostre illuminate contrade. Resta che per facilitarvi la piena loro intelligenza io aggiunga qualche canone grammaticale, e questo lo troverete segnato ne' pochi versi seguenti dall'Autore del *Bertoldo Veneziano* indirizzati al proto di una stamperia. Queste pochissime ottave bastano per insegnare a bene scrivere, e a bene leggere il veneziano dialetto:



Se avisa el proto de la stamparia,  
 Che dovendo stampar in venezian,  
 No se deve osservar l' ortografia,  
 Come ricerca el bel parlar toscan.  
 Do *p*, do *t*, do *r*, mal starla  
 In *Bepo*, *Fruto*, *Guera*, al dir nostran ;  
 Le s' à da radopiar in *uzzo* e in *azzo*,  
 Come *Muzzo*, *Mastruzzo*, *Giazzo* e *Brazzo*.

Anzi per no se unir col toscanismo,  
 Ma seguitar la nostra antica usanza,  
 Quel che sarla in le scolar un barbarismo,  
 Plural e singular stà in consonanza,  
*Quei ridono* diràve un da Fiorenza,  
 Qua la pratica e l' uso fa sentenza.

La parola *cussì*, con altretante,  
 Per levar ogni equivoco ai letori,  
 Chiama do' *ss*, un solo no è bastante,  
 El dirave *cusì* per i sartori ;  
*Cucito* scriverave un bon cruscante ;  
 Onde, acìò no stè a far miera d'errori,  
 Un aviso ve dago per scurtarla :  
 Se scrive in venezian come se parla.

» Gustato che avrete, o egregio Cavaliere, del banchetto che vi ho imbandito, farete in guisa di rimettervi in voglia di vedere ancora una volta la mia Venezia. Venite a risaltarla, ed io festeggerò il vostro arrivo facendo sì che dalla voce melodiosa di qualche ninfa di queste lagune possiate sentirvi ripetere le belle canzoncine di Buratti e di Lamberti. Allora con sempre maggior piacere rinnoveremo anche nel veneziano vernacolo i nostri cari colloqui lungo la riva degli Schiavoni, e fra i viali ora divenuti ombrosi di quel Giardino, che per la sua singolare collocazione voi trovavate un incanto.

» Vi rinnovo le proteste della mia verace considerazione.

## ELENCO DEGLI AUTORI

CONTENUTI NELLA PRESENTE RACCOLTA.

|  |          |  |       |
|--|----------|--|-------|
| 1. BADA GIO. BATTISTA . . . . .          | Pag. 404 | 22. <i>Lamento d' una moglie per la</i>    |       |
| 2. BAFFO GIORGIO. . . . .                | » 89     | <i>lontananza del marito.</i> Pag. 1       |       |
| 3. BARBARO ANG. MARIA . . . . .          | » 120    | 23. MARTIGNON LUIGI. . . . .               | » 457 |
| 4. BOCCHINI BARTOLAMMEO . . . . .        | » 63     | 24. MAZZOLA' GIACOMO. . . . .              | » 145 |
| 5. BRITI PAOLO . . . . .                 | » 61     | 25. NALIN CAMILLO. . . . .                 | » 468 |
| 6. BURATTI PIETRO . . . . .              | » 372    | 26. NOVELLI ANTONIO. . . . .               | » 431 |
| 7. BUSSOLIN PIETRO . . . . .             | » 433    | 27. PASTÒ LODOVICO . . . . .               | » 174 |
| 8. CACCIA <i>il padre</i> . . . . .      | » 64     | 28. POZZOBON GIOVANNI . . . . .            | » 55  |
| 9. CAVANIS MARC' ANTONIO                 |          | 29. PRIULI NICCOLÒ . . . . .               | » 476 |
| <i>Abate</i> . . . . .                   | » 438    | 30. <i>Quartine in dialetto veneziano</i>  |       |
| 10. CICOGNA ALVISE . . . . .             | » 443    | <i>del secolo XV.</i> . . . . .            | » 3   |
| 11. ——— EMMANUELE. . . . .               | » 451    | 31. QUERINI GIOVANNI. . . . .              | » 55  |
| 12. CUMANO GIUSEPPE. . . . .             | » 349    | 32. REMITA TATI ( <i>G. B. Merati</i> ) »  | 130   |
| 13. CURZOLA LAZZARO . . . . .            | » 11     | 33. <i>Rime tolte da una raccolta in-</i>  |       |
| 14. FOSCARINI VINCENZO . . . . .         | » 452    | <i>titolata la Caravana</i> . . . . .      | » 29  |
| 15. GIOVANELLI BENEDETTO. . . . .        | » 419    | 34. SALA PIETRO. . . . .                   | » 422 |
| 16. GOLDONI CARLO. . . . .               | » 68     | 35. SPRANZI MARCO. . . . .                 | » 365 |
| 17. GRITTI FRANCESCO. . . . .            | » 193    | 36. TEOZZI PIRRO ( <i>Pietro Zorzi</i> ) » | 424   |
| 18. <i>Guerra de' Castellani e Nico-</i> |          | 37. TONELLI GIOVANNI . . . . .             | » 479 |
| <i>loui</i> . . . . .                    | » 12     | 38. VENIER MAFFRO . . . . .                | » 35  |
| 19. INGEGNERI ANGELO. . . . .            | » 57     | 39. ZANETTI LUIGI . . . . .                | » 486 |
| 20. LABIA ANGELO M. . . . .              | » 94     | 40. ZILLI d. GIOVANNI . . . . .            | » 369 |
| 21. LAMBERTI ANTONIO . . . . .           | » 273    | 41. ZORZI ANG. M. . . . .                  | » 133 |

# SECOLO DECIMOTERZO.

## L A M E N T O

### PER LA LONTANANZA D'UN MARITO

#### ALLA CROCIATA IN ORIENTE.

**R**esponder voi a donna Frisa  
Che me conseia en la soa guisa,  
E dis ch'eo lasse ogni grameza  
Vezando me senza alegra;za;  
Che me mario se n'è andao,  
Ch'el me cor cum lui à portao,  
Et eo cum ti me deo confortare  
Fin ch'el starà de là dā mare.  
Zamai nōl ver a vegnire (1)  
No ai paura d'envechire,  
Chè la speranza me mantene  
Del me signor che me soveuc.  
En lui è tuto el me conforto,  
Zamai no voi altro deporto,  
Chè de lui sol zoja me nasse  
Ch'el me cor noriga e passe (2).  
El no me par ch'el sia luitano,  
Tanto m'è el so amore prusimano.  
Eo sto en la cambra, plango e pluro  
Per tema ch'el non sia seguro,  
Chè d'altro mai no ai paura;  
E la speranza m'assegura  
Ch'el de' vegnire en questo logo;  
Tuto el me planto torna en zogo,  
E i me sospiri ven en canto  
Membrandome del ben cotanto.  
Veder mia faza eo mai no quero

*Racc. Poes. Ven.*

En spleco, ch'el no fa mestero;  
Chè non ai cura d'esser bela.  
Eo men sto sola en camerela,  
E an tal ora (en) mei la sala.  
No ai que'far zo de la scala,  
Nè a balcon nè a fe(ue)stra,  
Che tro' m'è luitan la festa (3)  
Ke plu desiro a celebrare.  
Co guardo en za de verso el mare,  
Si prego Dio che guarda sia  
Del me signor, en (pagania),  
E faza sì ch'el mario meo  
Alegro e san sen torne endreo,  
E dopo vence ai Cristiani  
Che tuti vegna legri e sani.  
Che quando ai fato questo prego (4)  
Tuto el me cor roman entrego;  
Se chel m'è viso che sia degna  
Chel me signor tosto sen vegna.  
Eo no crerave altro conseio;  
El vostro è bon, ma questo è meio,  
E questo me par da tegnire,  
Nexun meu porave departire.  
Le done oldi zo che la disse (5),  
Nexuna d'ele contradisse.  
Anzo fo tegnuo tuto per bene,  
E cosa ke ben se convene,

E si la tene fè liale (6)  
 Cum bona dona e naturale;  
 Ch'ela tendè tanto el mario (7)  
 Chel so desario fu complio.  
 En verso lui mostra legrezza,  
 Lassando tuta la grameza.  
 Zamai penser no volse avere (8)  
 Se non com se poes plaxere  
 Et el a lei et ela a lui.  
 Zilusi i gera entrambi dui,  
 Mai no miga de rea' creenza.

Entrambi eran d'una sentenza;  
 Ch'i se portava tanto amore  
 Ch'i gera entrambi d'un sol core.  
 El volse zo'ch'ela volea,  
 Et ela zo ch' a lui plasea.  
 No ave mai tenzon nè ira  
 Che ben tegnese da terza a sera :  
 Questa fo bona zelosia,  
 Chel fin amor la guarda e guida (9),  
 E questa vol lo pelegrino  
 Aver da sera e da matino.



# SECOLO DECIMOQUINTO.

## QUARTINE IN DIALETTO VENEZIANO.

Inchoronato regno sopra i regni (10)  
De luniverso dove al christianismo  
In el santo batesmo  
Simel a te al mondo non se trova  
E chiaro mostri espienza e prova  
Del tuo bon operar prinzipio e mezo  
In nel prexente sezo (11)  
Più alta sei che ma fosti da prima.  
E quaxi al ziel rezenze la tua zima (12)  
E meza christianitade tuo fronde chuopre  
E ben se vede lopre  
Che ognor più brancha e piglia tuo radize.  
Tu sei nel mondo una viva fenize  
Che se renovi e mai non muti forma  
Simel la tua norma  
Me par tramutata in quel chio parlo.  
Qual Alesandro Sepione e Charlo  
Che zia segnorizo chome se trova (13)  
Tu ne vedi la prova  
Chome son ziti i lor sezi e maxone. (14)  
Chome ian fato del bon liono (15)  
Tranfigurato a Marcho evanzelista  
De chui parla mia vista  
Sempre piu brama dir che quel vero sona.  
Venixia franca del mondo chorona  
Dona del mare del pian e del monte  
Hognun in la tua fronte  
Se spechi evedera lefeto.  
Beati cholor che a te vol star suzeto  
Per che tu li tien sicuri in nel suo porto  
Poche sei conforto  
Dogni afanato che a te se ritorna.

Tute virtude in te sola se adorna  
De zentileza piena e de costumi  
Ove se vede i lumi  
Dogni scienza chi vuol esser ben chiari.  
Hognun da questa convien che impari  
Come se osserva el suo bon rezimento  
Tal: che zaschun e contento  
Asai se tien soto lei posto.  
Ma qui de seguitar son disposto  
Quanto sia el suo poder el suo governo  
E se il ver dizerno  
Costei e francha e le altre son suzete ...  
Ormai la lengua mia piu non vol che dorma  
De ricontar de lei sua fama apieno  
Se pur vien ameno  
El saper dir come mia volgia brama.  
Prima questa zita nobel chiama  
Uno suo chapo per sua prima luzo  
El qual se chiama Duze  
Riman fin che la morte li da dipilgio.  
Apresso lui el suo santo consilgio  
Secreto e presto al ben far non dorme  
Tal chel suo rede ognore  
Piu a longa e larga e piglia quel chel vole.  
Qui se presta e qui se dona e tuole  
E tal che contra lei fa resistenza  
La da la penitenzia  
E molti tien per suo fradelli e filgi.  
Beati color che siegue i suo conselgi  
Che lor e sicuri non perir sì tosto  
Pur che tutora disposto  
Sia de seguir quel che mie rime conta.



Nessun signor gia ma in superbia monta  
 Con el lion lo lida de zata (16)  
 Convien che lo la bata (17)  
 Tal che mai più non seguita tal volgia.  
 Or mai lassiamo de tal dir la folgia (18)  
 E ripilgiamo el fior che piu se gusta  
 E del bon fruto lusta (19)  
 Hogni sentito tal che ognor più bramo.  
 Io dico el vero io dico quel chio amo  
 Che Troya non fo mai sì posente  
 Ne Roma antichamente  
 Quanto e Veniexia e dezo chiaro el mostro. (20)  
 Tu signorizi in Tramontana e in Ostro  
 Garbin Grego Levante e Ponente  
 Siroco veramente  
 Vento maistro senza lei non varga. (21)  
 Pizola fosti e mo sei tanta larga (22)  
 A torno a torno el mondo se inchina  
 Tu sola sei Raina (23)  
 Sopra ogni regno nel mondo creato.  
 El gran lion un pe tien in sul prato (24)  
 Laltro nel monte el terzo in piana terra  
 El quarto al mar safera (25)  
 Per modo che la fato un largo vargo. (26)  
 Se io tazese asai sarebe in chargo  
 Ami: che de dexiri son copioxo  
 E piu volutoroxo  
 Adir quanto cuopre le sue ale.  
 Ma schomenzando al verbo prinzipale  
 Apresto lei sie la terra el castello  
 Muram Chioza e Torzello  
 E Malamocha con Buran de mare.  
 Mazorbo e fuor de porto e voio andare (27)  
 Chaurole Grado Chaodistria trovo  
 E possa qui da pruovo (28)  
 Ixola e Citanuova atorno zinti. (29)  
 Io dico ancor de luogi piu de vinti  
 Che non li anomo e son revolti al naspo (30)  
 Mulgia Piran e Raspo  
 Sotto questombra si va trastulando.  
 Dalaltra banda io von seguitando  
 Parenzo Puola fina a Polmontore  
 La sua posanza chore  
 Fina ale porte de la Schiavonia.  
 E per seguir el terzo de la dreta via  
 Belgrado trovo Zara e Sebenicho  
 E per el ver chio dico  
 Pagò con Arbe che son zonti in schiera. (31)

E schorsizando per quella Riviera  
 Castelli assa gene per la Dalmazia  
 Ancor della Chroazia  
 Molti sono posti soto laura fiamma. (32)  
 E Lalbania ancor san Marco chiama  
 Scutari con Durazo e molte terre  
 Ma el balsa li fa guerre (33)  
 E si non pensa ale fin come li vègnera fato.  
 El lion dorme e contra lui sta guato  
 Ma sel se turba con el so fiero dente  
 Li dara dure stente  
 Si che zia mai non lavera pensato.  
 O ritornando pur sul primo stato  
 Da laltra banda i dico qui ancor piui  
 Segnor son de Corfui  
 Che ixola asai richa e posente.  
 Copia de zera truovi veramente (34)  
 De seda li se vende a gran devizia (35)  
 Pero con gran letizia  
 Se puol ben trastalar chi dentro anida.  
 I marchadanti qui suo nave guida  
 Fazando de comprar un gran frachaso  
 Poi dize adio te laso  
 Fin al ritorno el qual non vede lora.  
 Verso Veniexia poi volze la prova (36)  
 Stendendo le sue vele al dolze vento  
 Hognum par che sia contento  
 Ma io ritorno a dir el conveniente.  
 Da poi chaminando verso Lorient  
 Fur del cholfo e questo chiaro se vede  
 Son lixole de crede (37)  
 Primi Modon Coron qui se truova.  
 O quanto bello e alta cosa nuova  
 Parerebe questo a chi vedese tuto  
 Non laveria creduto  
 Piu non dico ne asai ben dizerno.  
 Candia bella soto tal governo  
 Retemo Lachania con lei sa poza (38)  
 De zentileza aloza  
 Qui se ritrova su Lixola magna.  
 E schorsizando el monte e la campagna  
 Sono sezia e luogi infiniti  
 Copioxi de viti  
 Formento vin e olgio asai se trova.  
 Devizia non ne bixogna far prova  
 Quanto le richa de marchadancia  
 Ben sette zento mia (39)  
 Atorno zonze el mar e si la zircunda.

Ancor piu parlar mia volgia abonda  
In questa nasse asai grana e gotoni (40)  
E chaxi e vini boni (41)

I piu perfeti che al mondo se trova.

I marchadanti ben par che i piova  
Dexideroxi con suo choche e nave  
Per che iano ben le chiave

De quel che io vecontai e sopra dissi.

Da poi alzando con i ochi me fizi (42)

Per alto mare vargando spiazze e monte

Io vedo Negroponte

Con molti luogi ape della Turchia (43)

Napoli ancor della Romania .

Lor signoriza e son suzeti a loro

E per el dio chio adoro

Asai gene chel mio seguir non stima.

Ma se io potesse i dico con mia rima

Apono apono dechiarar el testo

Nonne soto el terresto (44)

Al mondo piu alta e magna Signoria.

Or seguitando pur linstoria mia (45)

Io ve diro della zita de terra

Che anno prexo per guerra

E tal sono soto posti per amore.

Lassiamo star molte roche e tore

Che sono nella Marcha Trevixana

Padoa e Padoana

Sono suzeti con Ville e Castelli

Ma pur vedero parte de quelli

Miran Stian ancor Campo san piero

Noal per dir el vero

De qua da Brenta elze Livenza bella. (46)

Da l'altra banda in pian e in ramella (47)

Pieve de sacho truovo e Castelcharo

E Bovolenta al paro

Sopra un bel fiume che chiama Brenta

E per far esser piu mia volgia contenta

Al bel monte me von dove truovo

Arqua e Pendize aprovo

Este me par qui senza so mura.

Monzelexe nel monte su lallura

E Montagnana al pian che e molto grassa

E tutto in questa madassa (48)

Del Padoan io trovo e piu dizerto.

E per non tegnir el bel parlar coperto

Cologna vedo e tutta Vexentina

Vizenza che domina

La magna signoria alta e posente.

Castel san piero vedo veramente

Apresso la zita apresso del monte

E per suo aque e fonte

El Bachion se chiama el fiume sparso.

De schriver qui non bexogna esser scharso

Come Verona e asai samassa e magna

El monte e la champagna

Lei signoriza con suo signoria.

El ladexe vi passa ognor per via

Qui vedi palazi qui vedi fontane

Con aque zuste e sane

Che gusta a cui de so piazzer se sazia.

Qui vedi zente,altiera pien de audazia

Posenti e ricchi de possessione

E senza piu tenzone

Le quaxi la fior de tuta la Lombardia.

Ancor la nostra a piu signoria

El vola san Marco sopra le alte tore

Fina a Chaxal maore

Ancor Brexelo con porto Legniago.

I vedo in guarda sopra el dolce lago

Esser qui possa piu duna forteza

Che sopra la sua alteza

El Vanzelista aposto le sue piante.

Asai gene castelli e tore tante

Chel non me achade nela mente adesso

Ma ritornando apresso

Ne volgio dir de uno novo Paradixo.

Veniexia e dona de Mestre e de Trevixo

De Castelfrancho e poi de Citadella

Bassan apresso de quella

Marostega, che iaze sopra il monte (49)

Alzando i ochi mei sopra el monte

Axlo me par veder e Conegiano (50)

E possa a pe del piano

Vedo el Montello e poi san Salvatore.

Apresso dello dove la piave chore

Me par chio trova un Castelnuovo

E poi un di da pruovo

La chiuza e san Vettor con la so possa.

Zonzendo a Feltre nui avemo riscosso

Della gran forza del Re Dongaria

E in nostra ballia

Remessa som la schala a Cividale.

E con so onta e con so dano e male

Tutol Freul e fato nostri servi

Ben che zia i fosse protervi

Iam conyegnuti star della dal segno.

Pero de lor parlar quaxi me sdegno  
 Ma pur te contero parte del fato  
 Tu sai che sempre el mato  
 Mai non paziza se non con suo dano (51)  
 Sopra Livenza le nostre barche vanno  
 Per terra zente darne senza falo  
 E da pe e da chavalo  
 Tal che non trepa ne non li da zuogo. (52)  
 Qui se guasta e qui se pone fuoco  
 Bombarde e veretoni par che tempesta  
 E questa son la festa  
 Che ivien fata e non se fa vezelia.  
 Chiama san Piero e chi santa Zezilia  
 Chi san Christofal forte, e chi san Zuane  
 E chi chiama el vermochane (53)  
 Diavol fradi poi chiala baron (54)  
 Li non zuova domandare pardon  
 Se non se rendi som morti del tuto  
 Nissum non li va suto (55)  
 Che non siano prexi che non pagi el schoto (56)  
 A mi par veder quaxi de boto  
 Haver abuto el bon teren furlano  
 I dicho el monte el piano  
 Sono za soto i nostri chonfalonì.  
 Ma arquanto ve vogio dir di luogi boni  
 Portogruar Sazil e Saravale  
 In terra dele spale  
 A Prata a fato dar per tal destino.  
 Maran e Munfalcon quaxi al marino  
 Vedo esser qui soto Uderzo  
 Non za chodier ne terzo (57)  
 Anzi di primi che se rexe a nui (58)  
 Civald de freul e pessier soi  
 Anchora volse mudar tal che romaxi  
 Per nostri veri ostaxi  
 Chordegnan e Porzenigo cho piu castelli.  
 Ceneda poi ne devento rebelli  
 Ora sono fati nostri servi in tuto  
 Nisum non li va suto  
 Che non chonvegna far nostro volere.  
 Ma el non chade al mio pichol sapere  
 Narrarve tutto pero fazo un salto  
 E de freul me parto  
 Chamino e vado su per el ferarexe.  
 Questa non e trufa anzi e vero palexe  
 Roigo Lendenara e Labadia  
 Soto nostra signoria  
 Sono sotomessi per far suo miore (59)

Loredo apresso el suo chon molte tore  
 Vedo ben chel dir qui non la priexia (60)  
 I ritorno a Veniexia  
 Per che ho fato zia longo chamino.  
 Sempre regrazio lalto dio devino  
 Ghe madato secondo el mio sperare  
 Or ve volgio narrare  
 Chome li posta e chome li se vive.  
 Non chredo che mai qualunque piu scrive  
 Podese contar lultima parte  
 E che feze ma charte  
 A pena poria far tanti quaderni.  
 Veniexia bella con ati moderni  
 Edificata ne landriano mare (61)  
 O quanto ben sape fare  
 I primi che penso tal maisterio  
 Certo ben vene dal zelesto imperio  
 Miracoloxamente fo ispiradi  
 I nostri antixi passadi  
 Quando in tal luogo feze lor maxone  
 Dentro alberga dogni condicione  
 Zente Todescha Italice e Lombarda  
 E se el bel dir non tarda  
 Franzexi e Borgognoni e multi Englexi.  
 Ongari e Schiavi de multi paexi  
 Tartari e Mori Albanesi e Turchi  
 Che vien con nave e burchi  
 A far suo vita e zamai non se parte.  
 Molti maistri de diverse parte  
 Puixi e Griegi ancor Ceziliani (62)  
 E multi Saraxini  
 Fin dal Chaiero par che qui ne veda.  
 E de Tuschana gran maistri de seda (63)  
 Luchexi me par quaxi tutti quanti  
 E grossi marchadanti  
 Simel mi par veder star qui fiorentini.  
 Con suo borsoni de molti fiorini  
 Suxo una piazza che dito rialto  
 Ognum se tien piu alto  
 Che melgio sa dar aqua al suo molinb.  
 Apresso anui quaxi ale confine  
 Vedo qui Milanexi e Bergamaschi  
 Piazentini e Monzaschi  
 E Zenovexi con Piamontani.  
 Qua si zonze spesso Chatellani (64)  
 Con suo nave charge de formento  
 E de diverse zente  
 Puia e Chalavria ze manda la grassa.

Chi vuol danari qui convien che passa  
 Perche le fonte de molto trexoro  
 E tanto arzeno e oro  
 Se trova qui: che par che essa de vena.  
 Da Rimano e da Fam e da Zexena (65)  
 E da Pezaro per tuta la riviera  
 Che de diversa maniera  
 Perfeti vini zonze a gran devizia.  
 Imola e Modena ancor con gran letizia  
 Furli che non li fazo tropo torto  
 Conduze al nostro porto  
 Vini che ne fa star lieti come corpi humani.  
 I vedo possa apresso Istriani  
 Con sue barchete piene de ribuole (66)  
 Puone tuor chi ne vuole (67)  
 Per lor danari asai per zusto priexio  
 Ancona e Rechanati non despriexio  
 Che son signori de boni tribiani  
 I qual ne fa star sani  
 Come oxeleti sopra le ramelle.  
 De Chandia le malvasie novelle  
 El Tiro e poi da Modon la Romania  
 Ma sia pur chi se sia  
 Che melgio dir potesse al mio parere.  
 Da Napoli me par griegi vedere  
 Plusquam perfeti e cose da signori  
 Con suo perfeti odori  
 Che ogni vil cuor sana e fa star lieto.  
 Pero de tal parlar quaxi devento  
 De tal condizion notar in folgio  
 De grasso grano et oglio  
 In questa zonze de diverse parte.  
 I nostri marinari che sano ben larte  
 Vano nella Puglia anchor nella Zezilia  
 E li fano festa e vezilia  
 Chargando le sue nave apiu non posso.  
 Chorfu chel mar mazor gel buto adosso  
 E Schutari con tuta Lalbania  
 Che nostra Signoria  
 Fano copioxi dogni mia raxone.  
 Ancor de meglio per munizione  
 Chon asai mestura e più diverse  
 Qui par che se converse  
 In tanta quantità vi zonze hognora.  
 De grano e grassa e Murlachi anchora  
 E Ceziliani e ben se vede  
 Con lixola de crede  
 Modon Coron Corfu ancor non resta.

E se ben dizerno qui se vede festa  
 Vegnir Mantoani e Modenexi  
 Ancor Veronexi  
 Con suo formai dolzi e molte frute (68)  
 Chome son chastagne e chosse sute  
 Tal che resorze dogni ben devizia  
 Pero con gran letizia  
 Possemo star nel mondo a dir el vero.  
 Nonne già charestia de pome e pere  
 Anzi iven chargi i burchi a onda a onda  
 Si che quaxi sa fonda  
 E in sul ponte son spazadi adesso.  
 Ma dime quanto nui habiamo qui presso  
 Chugumeri zeriexe e po meloni  
 Infiniti e boni  
 Angurie e zuche Bixi e Fava frescha. (69)  
 Marasche e Uerle per seguir la trescha (70)  
 Zizole grosse tante che non manca  
 Or mai la penna e stanca  
 A dir quante ne vien Chorobe e Noxe.  
 Le Fige fresche darbe ad alta voxe. (71)  
 Uva muschatella e persege da losso  
 Tal che piu dir non posso  
 Tante Noxelle freche e Armelini  
 Pere Giazuole e muschatelli fini  
 Nespole truovi quaxi a san Martino  
 Or mai de tal latino  
 Non sogno de parlar ritorno al Pesce.  
 Tanti ne vedo che de laqua esse  
 Che piano con suo redi i peschadori  
 Iem de diversi colori  
 Zamai non crederia chi non el vedesse.  
 Non so che gia contar vel potesse  
 Qui truovi Truti e grossi Sturioni  
 Molti perfeti e boni  
 Passere Rombi Sfoi e Go da late.  
 Asai gane pessi menudi da gatte  
 Non sogno de parlar de tal latini  
 Conterove i piu fini  
 Dentali grossi e bone Orade vecchie.  
 A nostra pescharia ognun se spechie  
 Qui vedi Meglie Corbi Caustelli  
 Litrigani piu belli  
 E Botoli per seguir la norma.  
 Albori e Spari de molta alta forma  
 Barboni e Schombri Suri in gran frachasso  
 Non te muover dun passo  
 Se truovi Tenche grosse e molte chiepe.

Gambari grossi Gambareli e Seppe

Anguille Fiumenalé e poi Marine

Varvulli con molte Raine

E Chape longe e Ostrege desboba. (72)

Ancor tu non vedi solamente una boba (73)

Menole tante con molte anguxigolle

Piu che non son formigolle

Tu truovi Luzi e molti pessolini.

Qual sum di fiumi qual sum marini

De tante sorte chel nonne lengua humana

Che in una setemana

Podesse za contar el suo nome aponto

De questo fato più non vene conto

E si ritorno ormai a nostra becharia

Che de la Schiavonia

Asai ne vien di suo Manzi e Moltoui.

De Istria ne vien de molti Castroni

Agnelli grossi e puo Chavreti

Non za molti perfeti

Ma pur i passa infra el ben el male.

I vedo da Castelfrancho e da Noale

De Veronexe e puo de vextentina

Da Trento e Voltolina

Vegnir la fior delle menude charne.

Oxele asai che se chiama starne (74)

Neli paludi molte se ne trova

Se voi veder la pruova

Vegnir L'inverno e vedera leffete (75).

Galine Padoane a parlar neto

De Ferarexe asai Polastre e Oche

E Pernixe son poche

E men Faxani ma pur se ne trova.

E questo e quello che ancor più zuova

Vegnir zoxo per po nuove a bondeta

Luganega infinita

E onto de porco con altre fossare

E niente de men pur se vende beff chare

Con tanto spazio che dio mixerere (76)

Non puol manzar ne bere

Da la gran pressa del populo magno.

La lengua mia de più parlar sparagno

De tal condizion chio dito tropo

Or mai voio far gropo

E ritornar ala piu bella tenzone.

Contar ve volgio della condizione (77)

Del navegar che fano le gallie

Tuti la notte el die

Per alto marc nelixola de Fialdra.

Or chanta un poco dolze mia chalandra

Costoro de grano chargi e de draperie

Vendendo per le vie

Zo per le schale io dico al suo ritorno.

I Galioti ognun de lor e adorni

Con suo devixe de piu man colori

De servi i par signori

Quando i ritorna de cotal paexe.

Altre gallie altro viazo prexe

In aque morte vano senza lagni

E con molti guadagni

Poi ritorna ne le sue maxone

Ancor de melgio per munizione

In Romania gie posto un altra muda

Che spesso convien che suda

I bacharini avanti che sia a Latana (78).

E li se ne spaza asai drapi de lana

E reveste in Piere in Perle in zoie

Non so se par foie

De persege e de more tal barati.

E chi acontadi vende e chi abarati

Chi compra de molta zera e de molta setta

E in gallia silla conventa (79)

Fin al ritorno el qual e con gran festa.

La nave della rata poi limpresta

Charga de marchadantia che lor lassa

E in questa madassa

Marona e teste par che lor conducha.

Ancor per la Soria el nostro ducha

Con el suo savio conseio a proveduto

Che le gallie in tuto

In Alesaudria vada e a Baruto

Queste do mude non vano ma sute

Che non sia charge de marchadantia

Zoe de spizaria (80)

Chanella Pevere Fusti e Cardamoni.

Noxe muschiade e Mastichi molti boni

Zenzero Beledi mechin e rosso

Chubebe e Spudio rosso

Garofoli Inzenso e Melegete.

Pevere longo e Aque Ruoxe schiete

Mira Turbiti Ambra e Schamonia

E ogni altra armonia

Me par che renasca tra quelli Pagani.

Con gran trionfo torna i nostri chapitani

Tal che in Veniexia el par chel se ritrova

Al campanon che sona

Per lalegreza che fano quella zente.

E driedo questo vedo veramente  
De molte choche andar per la Soria  
Charge de marchadantia  
Pur de Gotoni filadi e Comolezi.

Zuchari e pulvere de diversi prezii (81)  
E da Palermo par che asai ne vegna

Si che in Veniexia regna  
Dogni mal condizion vedo esser qui possa

Verso Valenza vedo esser qui mossa (82)

Un altra sorta de nave fresche e sane  
I va a chargar de lane

Poi ritorna qui come far suole.

Se me domandi ancor se vende e tuole

Ognano va e ritorna e porta

De tante merze sorta

Diretel presto se el bel dir non manchia

Da ogni parte qui se vede la branca

De marchadantie Italize e Lombardischi

E poi molti Todischi

Che nel fontego fano molti fati.

Chi a contadi vende e chi abarati

Merze per merze vende e chi a danari

Ma ben convien che impari

La Joycha chi vuol uxar in tali luogi

Li non se schrizza li non se fa zuogi (83)

Anzi sempre se vede ligar bale

Ma stu me di che vale

Un trexoro de moneda a dir el vero.

In el Rialto ognum con suo tabaro

Chi compra con dinari e poi revende

E tal chredenza prende

Per trapassar suo vita con honore.

I cambi sono atorno a tute lore

Par con la moneda Doro e Darzento

Chi ben sa zir con tempo

Chi piu nella sua chassa ne ritrova.

Za non riguarda per tempesta o piovà

Quanto piu richi piu zercha e chiama

Ognum dexira e brama

De esser uno Alessandro de posanza

La zoventu par che vegna de Franza

O de Chatelogna o de stranii paixi

Tanto sono devixi

I lor vestidi de diversa foza.

Su per le banche de rialto e in loza

I vedi star con sue vesté de setta

Che molto ben sasetta

Che par che, sia nati nelo Imperio regno.

*Racc. Poes. Ven.*

Ognum de ben vestir se stima degno

El pòvero non cognossi di mazori

Tuti me par signori

Stadi de terra o zitade o chastelli.

Con ati adorni asai politì e belli

Le done vedi andare con tal maniera

E con la frescha ziera

Che le par che le vegna dal paradixo

Le vano liete con el polito vixò

Con richi formaieti in sula spalla

le veste che non challa

Doro e de Seda e Rechami de Perle

O dio quanto piazer e da vederle

A qualche festa tal hora piu de zento

Con tanto adornamento

Che le par Raine de gran continate. (84)

Le fodre de lor veste sbardelate

Martori vedo vari e armelini

Che val tanti Fiorini

Che faria guerre a Troya se ancor fosse.

La mente che a tal dir me introdusse

Me fa ancor ricordar di nostri antixi (85)

El ne recaduto i Bixi (86)

E zanbaloti con scharlati fini.

Ognum de lor me par de paladini

Che era soto limperio del bon Charlo

Non poria mai contarlo

Quanto trionfo in questa terra regna.

Pero de laudar piu de un altra e degna

Par che iustizia serve a ognune

In una opinione

Star fermi e saldi e mai non se tramuta

E quanto e vano cholui che la refuta

Non la voler per sua dona veraze

Che sempre mete paze

Dove dischordia sente che sia.

Ognum se inchina a la tua Signoria

Costantinopoli apresso el mar maore

El suo imperadore

El alto magno Re de Trabexonda.

El gran Soldan con la sua fede immunda

Honora molto i nostri marchadanti

Per che molti conanti

Ze trova aver sotto chaxon de quelli.

Prinzipi e Duzi de Tore e Chastelli

El Re de Puglia con quel de Cezilia

Ancor quel de Sibilia

El Re de Ragona e digo in questo ballo.

El Re de Franza senza nisum fallo  
 El Re de Chrovazia con quel de Polana  
 E con la mente sana  
 Ognum honora tutti Veniexia bella.

El comun de Fiorenza renovella  
 E quel de Pixa e zenovesi ancora  
 Ben che fosse ben ora  
 Che insieme feno guerre molto forte.

Ma possa seguitando le nostre sorte  
 El signor de Lucha che nostro gran amigo  
 Asai piu che non digo  
 Obizo da Polenta e da Ravena.

I Mala testa signor de Cexena  
 Da Rimano e da Fam el signor Pandolfo  
 Dentro el nostru cholfu  
 Nonne nisum che non la tegna chara.

Da Este el bon Marchexa da Ferrara  
 Qui convien chel mio dir la voia paga  
 El signor da Gonzaga

Che Mantova possiede e reze quella  
 Molti ne vedo che ancor mia loquella  
 Non sogno de parlar per tropo tedio  
 Si che el me par remedio  
 Or mai el bel taxer de tal sermone.

Veniexia francha porta el confalone  
 Dogni Cita che Regna in christianesimo  
 Simel de questa al mondo non se trova  
 Pero de laudar de lei molto mi zuova

Mille corendo a Vintido de mazo (87)  
 Cun anni Quatrozeuto e vinti a pruvo  
 Fo compito questo dito in dodexe hore  
 Per quella che reserve ogni suo honore.





## SECOLO DECIMOSESTO.

### BARZELETTA DI LAZZARO DA CRUSOLA.

**M**i son tanto inamorao  
In dona Nina mia vesina  
Che me dà gran disciplina  
Che me vedo desperao.  
Gnao bao, bao gnao  
Mi son tanto inamorao.

\* Mi me sento tanti afani.  
(Tuti i porto per so amore!)  
Chè par proprio che sia cani  
Ch'al mi cor fazzo brusore;  
Che da tute quante l'ore  
Mi me sento passionao.  
Gnao bao, bao gnao  
Mi son tanto inamorao.

Quel so cor par proprio pezza  
De formagio marzolin.  
Ela sempre me calezza  
Come fussi fantolin.  
Quando ho abù qualche quattrin  
Ela sempre m'ha cavao.  
Gnao bao, bao gnao  
Mi son tanto inamorao.

Maladeto chi g'ha voglia  
Da intrar in amanza,  
Che mi sento tanta dogia,  
Che par ch'abia un buso in panza,  
Che par proprio che sia laua  
Che 'l mio cor ha trapassao.  
Gnao bao, bao gnao  
Mi son tanto inamorao.

Maladeto el Dio d'amor  
Che una frezza me g'hatrato,

E mi sento gran dolor  
Proprio come fussi mato!  
Maladeto si de fato  
Quando ancor mi g'ho portao.  
Gnao bao, bao gnao  
Mi son tanto inamorao.

Se no fusse per paura  
Saria forza me mazzesse  
Per sta cagna traditura  
Chè me fa tante promesse.  
Po' m'ha tolto mia braghese  
Che me vedo desperao!  
Gnao bao, bao gnao  
Mi son tanto inamorao.

No ghe posso pi cantar,  
Che me vedo tuto storno,  
Che me sento consumar  
Proprio come legna in forno.  
Maladeto sia quel zorno  
Ch'i so ochi mi he scontrao.  
Gnao bao, bao gnao  
Mi son tanto inamorao.

Ela sempre m'ha promesso  
De volermi contentar;  
Quando mi ghe vago apresso  
Ela mai no vol parlar.  
Maladeto sia so' par,  
E putana che ha egaio.  
Gnao bao, bao gnao  
Mi son tanto inamorao.

# LA GUERRA

## DE' NICOLOTTI E CASTELLANI

DELL' ANNO 1521

POEMETTO D'INCERTO AUTORE.

**O** Marte, o Baco, o fradei zurai  
D'arme e del chiuchio tuti do' paroni,  
Antici dei chiuchianti e dei sbisai,  
Sul bocal e celada in zenochioni  
Ve prego con i ochi al Ciel alzai  
Donème grazia, cari compagni,  
Che mi possa cantar le guere, i fati  
De Castelani, Canaruoli e Gnati.  
E ti de Marte Venere morosa.  
Pregalo per so' amor ch'el sia contènto  
De far questa mia impresa vitoriosa.  
No te vogio oferir oro nè arzentò,  
Che ben me trovó in sì pericolosa  
Fortuna, e ò contra mar, tempesta e vento;  
Pur spero col to agiuto el bel conforto  
De salvo intrar co la mia barca in porto.

Per certe risse antighe de mil'ani  
Ogn'ano se sol far una gran guerra  
De Nicolotti contra Castelani  
Su ponti ora de legno, ora de piera.  
A dar se vede bastonae da cani,  
E chi cazzar in aqua e chi per tera  
Con gambe rote e yisi mastruzzai,  
E qualcun de sta vita anca cavaì.

Come ve digo, siando quest'usanza  
Per mantegnir che no l'andasse in fumo  
I Castelani feva una gran smanza;  
Certi diseva: « Pota! oh me consumo,  
No vedo l'ora d'esser in sta danza  
E in t'i zufi zufar de Gnati un grumo;  
Rompergh'i denti, strupiargh'i zenochi  
Trazerli in lenza po' come ranochi. »

E cussì i Nicolotti d'altra parte  
Voleva far broeto e zeladla  
De Castelani. Tuti feva el Marte  
In Piazza, per Rialto, in Pescaria  
Mostrando aver de far la guera ogn'arte,  
Inzegno, forza, cuor e vigoria;  
Ogaun se feva bravo con parole;  
Or suso ai fati, lassèmo ste fole.

Del mille cinquecento e vinti un  
El dì del squarza-vele San Simon  
Ai Servi se reduse cadaun  
Co la so' celadina e 'l so' bastòn  
Per farse vedèr chi xe bianco o brun,  
E che nissun no se gnanca minchion,  
L'un pì de l'altro facendo el valente,  
Mostrando de stimar... bastonae? gnente.

De barche gera tuto el Canal pien;  
Per tera, su balconi, copi, altane  
Tante xe le brigae che va che vien  
Che no xe vodo per tera do' spane;  
Chi da una banda, chi da l'altra tien,  
Xe un rumor più che cento campane,  
E po' in t'un trato bassi i sta là tuti  
Pian pian digando: « Vien altro che puti? »

Qua sul Ponte dei Frati dei Servi  
I primi a saltar su xe Tota e Giagia;  
Questo d'azzal se pol dir ch'abia i nervi.  
Zaleca Gnato per darghe la bagia  
Ghe dise: « Vu saltè che parè cervi,  
Magnasseu mal cota una fortagia? »  
Tota, che à più cuor che no ga un drago,  
Dise: « Licheme el tondo quando cago. »

Risponde el Nicoloto: « El bassaneto  
 Te licherò con quèla da sie branzi,  
 Magna-pegola, sbrico da un marcheto. »  
 Giagia risponde: « Tasi tì, pia-granzi,  
 Se ti no vol aver qualche bufeto,  
 E forsi un ochio fora, se ti cianzi. »  
 « — Sagurai, vegnì suso, dise Tota,  
 E femo a do' per do' un puoco 'na bota. »

Galopa la so' celadina presto  
 S'è messo in cao senz' aspetar Zaleca,  
 Digando: « Agiola su, mi son in sesto,  
 Ch' aspetemo? che sona la ribeca?  
 De bastonae ve n'ò parechià un cesto,  
 Che ve so dir che le sarà de zeca;  
 Vò romper teste, strupiar brazzi e coli  
 A più d'un par de sti pia-caraguoli. »  
 E tut' a un tempo el vene a mezo ponte  
 In quatro salti ch'el pareva un gato,  
 Tirando col baston roversi e ponte.  
 Giagia ghe dise: « Vien ti, Folegato,  
 Che con mio fra' Galopa vago a monte.  
 Pota de Dante! mi vogio far sto pato  
 Che se in tre bote mi no te sganasso  
 De farne Frate e andare col cao basso. »

Folegato risponde: « Sier cagozzo,  
 Se' vegnì su ve darò de le gnase;  
 Co chi credeu parlar, baretta a tozzo?  
 Che vu' se' un putò e un frasca me despiase;  
 No me voria impazzar co chi è stà mozzo,  
 Da mi no gavarè mesure rase;  
 Se vegnì suso i denti e le massele  
 Ve romperò, e fursi le cervelle. »

« — Mo ti te vogio, Sior bulo da crenza,  
 Risponde Giagia: vien su che t' aspeto,  
 Che con un deo te vogio trar in lenza;  
 Camina, mato, non aver respetto  
 Se ti ti'è stao cavalier a Vicenza,  
 Che qua se vederà sti à cuor in peto;  
 Inzegno e forza co' ti mostri in zefo,  
 Vien su, sti à vogia, che te rompa el sgnefo. »

Folegato sbuffava da gran stizza  
 E presto in cao el s'è messo la celada;  
 Come serpente a mezo el Ponte el sguizza;  
 Che tuti larga ghe feva la strada:  
 « Te gratarò, digando pur, sta pizza; »  
 E Giagia soto, e tira una stocada.  
 Folegato repara, e tut' a un boto  
 Tira un mandreto e ghe dà d'un corloto;

E l' dise: « Sala da scalogne questa? »  
 E va in t' un trato a la volta del muso.  
 A questo Giagia d'un roverso pesta,  
 Che se la targa no lo alzava suso  
 Quest'altra gera più garba che agresta:  
 Onde Giagia è restà tuto confuso,  
 Perchè del corlo la dogia ghe monta,  
 E tuti cria: « Desmonta, desmonta. »

Mustachi presto per darghe soccorso  
 Revolve intorno el braccio la grignola,  
 E salta sora el Ponte co' fa un orso,  
 Criando: « Avanti tuti, agiola, agiola;  
 Pota de Baco! no ve stimo un torso,  
 Fe' conto che xe zonto pan in tola:  
 Vien Folegato, che femo una bota  
 A un per un, e po' faremo frota. »

Folegato, che xe bravo da fati,  
 No ghe risponde pur una parola,  
 Ma col silenzio che sol far i Frati  
 Col legno cigna, tira, para e mola,  
 E in t' el più belo Folegato è ai ati,  
 E dà un fendente de su la ceola  
 A Mustachi, ch'è andà in tera stornio  
 E zo del Ponte à fato un caorio.  
 Cimberle, Bio, Paton, Bao e Catachi  
 Gercola, Tari, Tatagio e Bisato  
 Murga, Burga, Cimera, Giurco e Bachi  
 A l' assalto i vien tuti in t' un ato.  
 Za i se vedea a storzersè i mustachi,  
 E in mez' al Ponte i fava un gran sbarato.  
 I Nicoloti stava con timor  
 E i Castelani ghe dava strior.

Questo vedando Sardo e Zambalao  
 Guagni, Spinazzi, Topo e Mazorana,  
 Marmeo, Gazara, Liron e Tarlao,  
 Zonfeto corse zoso d'un' altana  
 Per essere anca esso in sto marcao;  
 Digando: « Anca mi vogio de sta mana; »  
 E qua tuti s'è messo a zogolar  
 Con gran gusto de chi stava a vardar.

Roversi, ponte, montanti, fendenti,  
 Falsi, mandreti per gamba e per testa,  
 Se vedea romper teste, gambe, denti,  
 Su le celade pareva tempesta.  
 Qua se vedeva chi gera valenti,  
 E chi aveva la gamba e la man presta;  
 Chi a mezo Ponte cascava desteso,  
 Butao in lenza anca calcun de peso.

Tuti criava: « dai, dai, dai! »

No fu mai vista la più bela zufa.  
Sul Ponte gera Taco da un dei lai,  
Che ve so dir ch'el cavava la mufa  
Dai schinchi a certi sbrichi calefai,  
Dei primati che gera in sta barufa.  
Zonfeto a Tari tira d'un fendente  
Sul muso che de boca ghe va un dente.

Tari per questo no l'andava zoso,  
Ma co la vesta in cao se cazza soto,  
Propio come farave un can rabioso,  
Tanto ch'a più d'un par l'è 'l muso roto;  
De far vendeta el gera sì ansioso  
Ch'el saltò zoso dal Ponte a pie zoto,  
E tuti i so' compagni el seguitava;  
E ve so dir che le man se menava!

Gran rumor gera su la fondamenta;  
Tuti criava: « Tornè in drio, canagia; »  
In bagno ghe n'è andà fursi da trenta,  
Nè fu mai vista la più bela bagia.  
De questo Tari za no se contenta,  
Ma a vose piena, come quei che sagia:  
« Ve la farò scontar, Guati poltroni,  
Fursi con altro un di che con bastoni. »

In questo tempo Agresta, Tasso e Lilo  
In cao la meza testa se fracava,  
E per mostrar ch'i no gavesse filo  
Contra dei Castelani se afrontava.  
Certi, che fato avea come fa 'l grilo,  
Fuora del buso la testa i cavava,  
E tuti insieme per forza de legni  
Fa i Castelani tornar ai so' segnì.

Qua se sentiva tiche, tache, toche  
Su i gomii, su i schinchi, su i zenochi,  
E ve so dir che no le gera roche  
Ma legni duri come xe batochi.  
Tasso una punta tira tra le coche  
A Fiuba, ch'è saltà co' fa i ranochi,  
E tutto quanto d'angossa el suava;  
Mai no fu vista una guera sì brava!

Da ogni banda tuti stava a l'erta;  
Se vedea bulegar de legni un fasso,  
Tota in sto tempo à pià una smerta,  
E corse zo del Ponte insin a basso;  
Che ve so dir che l'è bu la so' offerta!  
No s'è mai visto cussì bel fracasso;  
I Gnati dal Ponte no podea avanzar  
Che i Castelani i feva ritirar.

Tarlao, Daco, Ziron, Moreto e Sardo,  
Bioco, Topo, Fisolo e Ganzara,  
Ciascun de questi per far el gagiardo  
S'è fatto avanti per vederla chiara;  
Sardo è stà 'l primo, e com' un liopardo  
Salta sul Ponte e cigna e tira e para,  
Talchè el pareva un lovo tra agnelli  
Dagando ai Castelani i biscotelli;

No za de quei che vende i scaletieri.  
Da l'altra banda Cimperle e Ceola,  
Ognun più d'un lion gagliardi e fieri,  
Pareva i tori quando i can se mola:  
« Incarir vogio stamegne e dopieri,  
Vegnla criando, e in t'una bota sola  
Fursi farò più de do' Mare grame;  
Vegnì, che tuti no vale do' schiame. »

La zente al sentire sti bravazzi  
Tuti ghe dava criando la smoca:  
« No fe', ve prego, cari sier caenazzi,  
Andè a strupiar dei poli drio la chioca,  
O dei stornèli che se vende in mazzi. »  
Cimperle dise: « Oh Dio, se la me chioca  
Vegnerò zoso, e a che meglio, meglio,  
Ghe ne darò fin a quei da Consegio. »

E tut' a un tempo de trar fece vista  
El legno a un certo che à tirà un petazzo.  
Spinazzi in questo salta su la lista  
Del Ponte, e dise: « No far el bravazzo;  
Chi tropo cianza poco onor aquista,  
Nicola e ti, Greheto e Caenazzo,  
Mi e Bioco, Sardo e Mazorana  
Femo una bota, e nessun no s'ingana. »

« — Mi no cercò altro, ti m'invìdi a pasto, »  
Cimperle dise; e d'un tozzo sul muso  
Dete a Spinazzi senz' altro contrasto.  
Vedendo questo, Sardo salta suso,  
E anca Spinazzi con el naso guasto,  
E no va in tanta furia un archibuso.  
A Cimperle sul cao dete una crosta  
Che al mustazzon assae caro ghe costa.

Cimperle in tera casca in zenochion,  
E se no gera Ceola che lo tene,  
Zo del Ponte l'andava a tombolon.  
« Mariol, mi te farò portar le pene,  
Dise Spinazzi, de quel mustazzon; »  
E anca Grinta a mezo 'l Ponte vene  
Con baston d'una bona misura  
Da far in prima angossa e po' paura.

Giarcola presto se fa incontro a Grinta  
 Con una punta a la volta d' i denti,  
 Po' la seconda, terza, quarta e quinta  
 Grinta tirava de mati fendenti  
 Da no saldarse più con colaquinta.  
 Taco e Ziron criava mal contenti:  
 « Femo fora sti Castelani imegolai  
 D' Albanesi e Schiavoni inzenerai. »

I Castelani, sentindo sto strior,  
 Zan Calafao, Musega e Bisato  
 Salta sul Ponte con impeto e vigor  
 Bastonae dando da orbo e da mato.  
 No se vedea chi avesse la pesor,  
 Se no che, come un vento, Folegato  
 S'è cazzà in mezo de quei Castelani  
 Menando a tuti bastonae da cani.

E in manco che no se zira un timon  
 In bagno ghe n'è andà meza dozena;  
 Chi cascava, chi a forza de baston  
 Gaveva roto el naso e chi la schena;  
 Qua se vedeva chi gera poltron,  
 E da combater chi avea forza e lena;  
 Sul Ponte gera più de tre destesi  
 Che in leto i stete po' più de do' mesi,

Sier Ranco no dormiva gnànca esso,  
 Ma ve so dir ch'el le petava fisse,  
 E se calcun se gh'acostava apresso  
 Storzer li feva ch' i pareva bisse.  
 Più d'un cao lu gavea schiopà e sesso  
 E'l so legno pareva ch'el pulisse!  
 Tanto presto el menava le zate  
 Ch' a piar sorzi nol fa gati nè gate.

In la pignata no bogie i fasioli  
 Come sul Ponte e Castelani e Gnati,  
 E anca Bragolani e Canaruoli;  
 Tutti pì destri pareva ch' i gati.  
 Garbo criava: « Su, agiola, fioli,  
 Granzo, Franca-molèna feve avanti; »  
 E tut' a un tempo corse infin da basso  
 Con Solfa e Ghiro fagando fracasso.

I Castelani se meteva in fuga  
 E i Nicoloti ghe le dava tasse.  
 Ghiro disea: « Una fogia de latuga  
 No stimo 'l mondo co son stà a le basse;  
 E cussì tut' insieme in t' una ruga  
 Su nomboli, su cope magre o grasse  
 Petava gnase, ve so dir, de cao  
 Da incarire DIALTHIA anca largao. »

Stoco, Zorzeto, Tofalo e Fracassa,  
 Ochi-dè-sepa, Giarcola e Schizzao,  
 Tutti sti sete s' a fato una massa  
 Per far de Nicoloti un mal mercao;  
 E vo so dir ch' i la tagiava grassa  
 Co le so' meze teste tuti in cao,  
 E i so' bastoni co le ponte aguzze  
 Postai sul Ponte per far searamuzze.

I Nicoloti, che no xe minchioni,  
 Massime Sete-nasi, Coca e Chiepa,  
 Sul Ponte i s' a fermà come turioni,  
 E a Coca e Scoco i dete su la crepa  
 Un fendente, digando: « Babioni,  
 Credeu d' aver a far con calche zepa?  
 Ve le faremo contar nu de sta sorte:  
 Avanti vegna chi cerca la morte. »

Musega, Giurco, Nanj, Chiechie e Seco  
 S' a fato avanti mostrandoghe el viso;  
 Ma i Nicoloti con altro che steco,  
 E vo so dir ch' i gh'assetava el griso!  
 Ma per so' meglio i s' a slargà dal seco  
 Perchè tropo sutil gera el tamiso;  
 I Nicoloti ghe dava la berta  
 Digando: « Vegnì a tior la vostra oferta,

» Che ve daremo nespole maüre.  
 No stè a vardar che l' ora sia za tarda  
 Vu altri no se' za fiol de paure;  
 Qua no se trase de schiopi o bombarda,  
 Co fa i soldai che va a piar le mure;  
 No stemo pì, che le brigae ne varda,  
 A far da befe, ma femoghen' una  
 Che sia mazenga avanti che s' imbruna. »

I Castelani stava mal de voglia  
 Perchè parechi avea i mustazzi roti,  
 Pezo che i Greghi quando soto Trogia  
 Ghe pareva restar tanti merloti,  
 I pareva apicai, scampai dal Bogia:  
 E i Nicoloti no i valea pì coti:  
 Se ben anch' essi gera maltratai  
 Pur i cianzava come papagai.

« Orsù, i diseva, mo che stemio a far?  
 Mo no volemio far un par de frote  
 Avanti ch' el sia l' ora de cenar?  
 Caminè inanzi, mo gaveu le gote? .  
 Pota! no ve se sente più a bravar;  
 Aveu i schinchi, o pur le gambe rote? »  
 E mile cianze, e i andava digando:  
 « Che no vien suso un poco el conte Orlando! »

Un Canaruol, che gera a mezo el Ponte  
 Con el so' legnosin man, la vesta al braccio,  
 Tirando verso el Ciel roversi e ponte  
 E da so' posta facendo el bravazzo,  
 Diseva: « Vegna suso calche Conte,  
 E vegna su d' i più bravi del mazzo,  
 Ch' el vogio far conosser per poltron;  
 Cernilo pur fuora da un milion. »

Quando la zente à senti sto Fumao  
 Ch' è cussi pronto a far tante bravate,  
 I scomenza a crier: « L' è aparechiao,  
 No te partir, e mena ben le zate. »  
 Murga in sto mezo avanti xe saltao,  
 E in quatro colpi (no le xe canate)  
 Fumao perse una rechia, un ochio, un dente;  
 Se se rideva no ve digo gnente!

I Nicoloti xe diventai rabiosi  
 Quand' i à visto costù col muso roto,  
 E i feva certi mustazzi grinzosi.  
 Un vecchio antico, un certo Nicoloto,  
 Se volta in drio, digando: « Cari tosi,  
 Montemo suso e rompèmo el corloto  
 A questi impegolai che siega asse,  
 E mi 'l primo sarò a darghe le tasse. »

« — Sì, sì, pota de Baco! dise Lule,  
 Femo da seno qua de sto grimardo,  
 Strupiamo questo che fa tanto el bule,  
 D'esser el primo, per mia fede, ardo;  
 Alto ghindemo, la vela s' imbule;  
 Me par più che Orlando esser gagiardo;  
 Adesso che ghe n'ò bevù un bardaco:  
 Viva Marte, Vulcan, Cupido e Baco. »

Vitorioso in sto mezo sier Murga  
 Sul Ponte feva salti trivelini,  
 Digando: « Vegni su, che qua se purga  
 Chi à in tel cao de pi sprte de vini.  
 Che femio? no vedeu ch' el tempo turga?  
 No se femo tratar da fantolini,  
 Demo up poco de spasso a ste brigae,  
 Gaveu paura de trè bastonae? »

« Varè, che da mia posta me le dago  
 In su le gambe, e no le stimo un figo.  
 Vu filè pur sotil sfo vostro spago,  
 Co modo po se fussi in calche intrigo,  
 Co de quele che ponze più che l' ago.  
 Pota! mo vegni su, fe' co ve digo,  
 E no ve fe', ve prego, pi aspetar,  
 O disè almanco, che no volè far. »

« O se no se' de vogia, o se se' strachi  
 Andè qua in t' un trato al Magazen,  
 E chiucheghene cinque o sie bardachi;  
 Mi ghe n' ò, a dirve 'l vero, un bocal pien  
 In cao, ch' el no m' à tocao i mustachi,  
 B pi che prima de chiuchiar me vien;  
 El chiaro in corpo mete forza e cuor,  
 Vegni su, Gnati, se me portè amor. »

« — Ah gali, ah gali, ghe respuose Taco;  
 No ve parti, sier Murga, aspetè un giozzo  
 Che ghe ne chiuchierè 'n altro bardaco  
 Che no ghe sarà drento aqua de pozzo.  
 Ti ti à sempre de cianze pien el sacco;  
 Dal bogia esser me possa el naso mozzo  
 Se un solo Castelan no à più busie  
 Ch' in tuti i Zaghi no ghe xe magie. »

Su per balconi, fondamente, altane,  
 Se se rideva no ve digo gnente.  
 A veder ghe xe sempre certe lane,  
 Nobili e altri che sta a dar la mente.  
 Un tal avria la boca un par de spane;  
 In questo salta su un Gnato valente  
 Digando: « A ti, sier Murga, sier fradelo,  
 Femo una bota ti e mi, presto e belo. »

Murga risponde: « Mi no te cognosso,  
 Ti no se' da mio par giurde chiopec!  
 Se no ti vol che te rompa pi d' un osso,  
 E sul mustazzo aver Salamelec. »  
 El Nicoloto: « Mi ò nome Zan Rosso,  
 El dise, e no intendo sto bilic belec; »  
 E tut' a un tempo de falso roverso  
 A Murga dete sul muso a traverso;

Digando: « Questa sarà el Turciman. »  
 Murga romase una statua de piera  
 Quand' el senti costù menar le man:  
 « Putana, el dise, da la dolce ciera!  
 Mariol, traditor, gagiofo, can,  
 Ti no te partirà da questa fiera  
 Che fracherò el naso, fufantazzo; »  
 E la so' grigna se revolze al braccio.

Zan Rosso gera in guarda de falcon,  
 E col baston stava sul ziogolar.  
 Costù de scime xe più che gioton;  
 Murga s' à fato avanti per menar  
 A Rosso su, la testa un stramazzon;  
 Rosso da banda a vodo el lassa andar,  
 E d' un mandreto ghe dè s' un garetolo  
 Che de la calza el ghe cavète el gretolo.

Se la è stà zusta no vel posso dir,  
 La è stà sentia fina in Campaniel,  
 Tuti criava: « Murga, va a dormir,  
 E fa che to' Mare porta a san Daniel  
 Una statua per farte ben guarir. »  
 Murga da stizza gera tuto fiel,  
 E la gambeta spesso alzava in erto  
 Perchè el sentiva una gran dogia certo.

I Nicoloti feva la risagna  
 Con tuti quei che tien da la so' banda,  
 I Castelan da grinta i dei se magna  
 Perchè i vedeva in testa la zirlanda  
 A un pia-cape, viso de lasagna.  
 In questo Giurco Ceola su manda  
 A dir a Murga, che per so' consegio  
 Vegnisse zoso. El vene per so' megio.

Vegnando zo l'andava zotegando  
 Co la gamba scachia e un dente in pezzi.  
 I Gnati gh'andava con strior disando:  
 « Ah, sbrichi magri, no valè sie bezzi! »  
 Chi smacava bache, e chi subiando;  
 Rosso diseva: « Vegni suso, nezzi,  
 A un per un, e do', come ve piase,  
 Se fàzza avanti chi vol de le gnase. »

Cimera, Mirco, Giurco e Galineta  
 Tari e Monèlo, Bisato e Biscoto,  
 Rizzo, Biondo, el moroso de Leneta,  
 Nico, Zanchezzo, Giarcola e Piloto,  
 Polo-del-vechio, Tanagia e Bereta,  
 Lumaga, Ton, Vetola e Birioto,  
 Sier Pan-de-megio, Fugazza e Garzante,  
 Scoco, Schiaveto, Fiuba e Zan-dal-Zante,

A pe' del Monte gera tuti questi  
 Come serpenti quel Rosso vardando  
 Esso feva sberlefi e certi sesti  
 De no curarse de nissun mostrando:  
 « A mezo el Ponte chi vol i so' resti  
 Vegna qua su, s'el fusse ben Orlando, »  
 E da so' posta el faseva el maturlo;  
 L'andava atorno al Ponte co fa un zurlo,

Menando al vento mandreti e stocae,  
 Falsi roversi, fendenti e montanti,  
 E mezi tempi con certe chiamae  
 Da chiapar tuti chi fusse ignorant,  
 Digando: « Le no xe za cortelae,  
 Vu no se' più, co geri, lionfanti,  
 Vegni un poco vu su, caro sier Giurco,  
 Ch' impararè da mi parlar da Turco.

*Racc. Poes. Ven.*

» Ziogheremo de scrimia anca do' bote,  
 Co' à fato Murga vostro Castelan;  
 Vegni, vegni, se vu le volè cote,  
 Che tuti quanti no ve stimo un pan;  
 Ve prego, femo almanco un par de frote. »  
 Giurco el vardava con viso da can,  
 E senza dir gnen' altro el salta suso  
 Con una punta a la volta del muso.

Rosso col falso la tolse sul legno;  
 Giurco, da bon gioton, ghe la scambiava.  
 Certo se Rosso no gaveva inzegno  
 Giurco co l'altra un ochio ghe cavava.  
 Tuti do', ve so dir, stava a sto segno,  
 E i Gnati tuti a gran vose criava:  
 « Rosso, mena le sgrinfe, sta in cervelo,  
 Perchè sto Giurco sì xe moscatelo. »

A la fin Giurco de tirar ghe fense  
 Un mandreto per gamba, e sto man  
 Una stocada in tel muso ghe pense  
 Ch'el no fu pì de denti mai ben san.  
 A questo muodo Giurco ghe la cense  
 E ghe tolse el bravar col so malan,  
 E Rosso in boca la man se meteva  
 Che i lavri e quatro denti roti aveva.

Coreva el sangue come fa una spina  
 Fuora de boca a sto Gnato sacente;  
 Molti ghe deva po' la romanzina  
 Digando: « Beca su quel tiente a mente;  
 Va, magna po', se ti porà, puina,  
 Panà gratà, dei sugoli o polente. »  
 Rosso coi denti roti e 'l muso guasto  
 Se n'è andà zoso senz' altro contrasto.

Giurco col legno revoltò a la testa,  
 Col so borichio in dosso de veluo,  
 Resta sul Ponte scorlando la testa,  
 Digando: « Vegna chi xe mal nassuo  
 Da mi, che vogio pagarghe la festa;  
 Or suso, agiola, fenimola ancuo.  
 Che? dubitèvi fursi de la schena?  
 Femo una frota, po anderemo a cena;

» No se femo tratar da bilibai  
 Da ste persone che qua xe reduce;  
 No vedeu a che modo i stà schizzai  
 Per veder che se demo de le frute?  
 Fè sia, voga, premi, vegni a lai,  
 Che a toгна qua se pia de bone trute,  
 De quella sorte e mesor de Rosso;  
 Vegni, se volè aver el vostro dreto,

» Pota! mo sento che me pizza i brazzi,  
 Sto légnò à voglia de star sul menar;  
 Vu no se' più, co' geri, sì brayazzi  
 Che ne volevi tuti bastonar.  
 Mo che, seu muti? è cessà quel manazzi  
 Che st'altre Feste ne solevi far?  
 Magoghe, vegnì suso, oh seu sbisai!  
 Desmissiève un poco, o indormenzai.

» Chè no ghe ne vien suso un poco quatro  
 Contra mi solo, e sia pur chi se voglia,  
 Se no me misurerò, nè sarò scaltro  
 Che mi sia el primo che diventa bogia.  
 Mi me contento deventar un altro  
 Se no i sbasisso tuti: mogia, mogia;  
 I à paura, siben, sia amazzao!  
 Ma vegnì su, vel digo da recaò.

« — *Non tantus lardo*, caro dona Rada,  
 Gnagni ghe dise, vu cianzè, ma tropo  
 Sier Giurco; voleu mo co la spada  
 Vu e mi soli destrigar sto gropo?  
 Giurco risponde: De manco no vada;  
 No vago gnanca cercando altro intopo. »  
 E presto corse per la so' squarzina,  
 E qua la zente se messe in rovina.

Co s'è visto sul Ponte le lusente  
 Tuti s'è messo in fuga per scampar.  
 Calcun criava: « Pian, no sarà gnente. »  
 Con tuto questo no i volea restar,  
 Ma l'un co l'altro se dava tal spente  
 Da far ussir el fiao, da far crepar.  
 Veste, capeli, zocoli i lassava,  
 Barche per tresso assae se n'afondava.

Un zentilomo (no so la Casà)  
 Salta sul Ponte digando: « Gioton,  
 A questo muodo d'arme sì se fa?  
 Giurco, ti à voglia de star in preson. »  
 Gnagni co la calisa gera là  
 Digando: « Se cognosse ben chi son. »  
 In fin sto zentilomo a Giurco e Gnagni  
 Li fa far pase da boni compagni.

E da recaò la zente se redusse  
 Al Ponte quando fo fata sta pase.  
 Chi cancarì ghe dava, chi giandusse:  
 « Amazzai ch'ì no s'abia me despiase,  
 Calcun diseva, vorave ch'ì fusse.  
 Strupiai del colò con cinque o sie gnase;  
 Per far i bravi i mostra le squarzine  
 E po i no darave in do' puine. »

Co'l popolo è stù tuto acomodao  
 El s'è messo a crier: « Fè un poco mostra;  
 Tornè su un poco calcun de recaò,  
 De grazia, no stè tanto su la vostra. »  
 Ma tuti steva sul so sofitaò,  
 Nissun no gera che vegnisse in giostra,  
 Se ben al Ponte ghe ne gera mile,  
 Più spessi assae che i gambari o le schile.

Galopa, Sardi, Gnagni e Zambalao,  
 Scrochi, Tartagia, Fegiora e Pachiante,  
 Morfa, Castruzzo, Slofa e Zàn-sberlao,  
 Schita, Codogno, Scalogna e Durante;  
 Da l'altra banda Monèlo e Schizzao,  
 Argana, Scogio, Tofalo e Ganzante,  
 Forca, Trombetta, Lumaga e Gregheto,  
 Biscoto, Chiechie, Bernichio e Schiaveto,

Tuti questi ghe gera a pie del Ponte  
 E tanti altri che qua no ve digo;  
 Vardandose un co l'altro ne la fronte,  
 Nissun no volea intrar in tal intrigo,  
 Ma tuti steva fermi come un monte,  
 Ognun temeva assae del so' nemigo,  
 I parziali in sto mezo i criava,  
 E con le man sbatando i subiava.

El Ponte gera neto e spazioso  
 E anca tuti ai so' loghi assetai.  
 Un Nicoloto con viso stizzoso  
 Vien su con do' altri acompagnai  
 A mezo el-Ponte, fagando el bravoso,  
 Digando: « Orsù, compimola oramai,  
 Vegnì su a tre per tre, vegna chi vegna  
 Che se gratèmo un pocheto la tegna. »

Se vardava un co l'altro i Castelani,  
 Ch' a pie del Ponte ghe ne gera cento,  
 Chi in vesta, chi in zipon, chi in dulimani;  
 Chi diseva: « Son straco, no me sento, »  
 Chi al braccio se voltava i cafetani,  
 E la celada in cao, da voglia spento  
 De far cognosser la so' forza e ingegno,  
 Ma i dubitava un pocheto del legno.

E da po' d'esser stai sul Ponte un pezzo  
 Tuti tre in spala s'è messo le veste,  
 Digando l' un a l' altro: « Andemo, nezzo,  
 Che ghe sarà del tempo st'altre Feste. »  
 In questo mezo Nico, Bio, Zanghezzo  
 Dise: « Aspetè, fin che le meze teste  
 In cao nu se metemo, e po' a fede  
 Femo do' bote infin che se ghe vede. »



« — No ve partì, aspetè, criava tuti,  
 Che gaverè scalete e de le nose. »  
 Intorno el Ponte gera mile puti  
 Che a pì poder i alzava su la ose;  
 « Aspetè, amici, che senza lauti  
 Vu balarè un baletto senza vuose,  
 A son de gnaccherar e triche trache  
 Su i schinchi, su i mustazzi e su le lache. »

Masorana, Ganzara e sier Zonfeto,  
 Tuti tre in ato de far dopio atorno,  
 Se volta in drio, digando: « Nu de leto  
 Se levassèmo suso avanti zorno  
 Per vegnir a magnar de sto confeto;  
 Ma vegni suso, che aspeteu? el corno?  
 O el Bucentoro che vegna per vu? »  
 In questo tuti tre saltava su.

Un indriò l'altro, e la vesta revolta  
 Intorno al braccio aveva tuti questi,  
 E anca in cao la celada racolta  
 A mezo el Ponte per dar i so' resti;  
 E qua Zonfeto dise: « Nico, ascolta,  
 Perché la vaga con tuti i so' sesti  
 Mi farò qua con Bio, e ti, e Ganzara  
 E sti altri do' se darà la so' tara. »

« — Che? semio in campo, da fare ste ordenanze?  
 Responde Nico; e chiofè con el legno,  
 Su i schinchi a sto Zonfeto do' naranze;  
 Che ve so dir che le gh'è lassà el segno,  
 Digando: « Nasa se le xe scoranze. »  
 Zonfo se cazza soto con desdegno  
 Per vendicarse, e tuti i altri insieme,  
 E con i legni chi stali, chi preme.

Zonfeto, de bischizzo, d'una punta  
 In mezo al fronte zonne de sier Nico;  
 A Mazorana la grinta ghe monta  
 E sul chiefali a Bio dete un bon crico;  
 In questo tuti sie insieme s'affronta  
 L'un pì de l'altro menando da sbrico;  
 S'è visto sier Ganzara d'un scalin  
 Sbrissar e andar in lenza a petolin,

Zonfeto in tera, come stà un tapeo,  
 Gera desteso, che su una caechia  
 Con un baston (che no gera d'albeo)  
 Bio gh'avea dato e anca su una rechia.  
 A farlo revegnir à bisognà aseò  
 E d'aqua fresca ben pì d'una sechia.  
 Gera restao sul Ponte Mazorana,  
 Ma ve so dir co la vita mal sana.

El saria stà pestao come tavizze  
 Se no gera Baleca, Agresta e Sardo.  
 Questi no xe da desgresar novizze  
 Perché i ressentè un poco del vecchiardo,  
 Ma, ve so dir, ch'è sa assetar pelizze  
 In dosso a chi no è più che gagiardo.  
 Questi tre salta su senza favela;  
 Tuti criava: « Oh la vol esser bela! »

Pi de vinti roversi e trenta ponte  
 Tira costori in un volzer de balchi,  
 Tanto ch'è a questi tre zoso del Ponte  
 Convien andar, menando ben i calchi.  
 Del resto: « Mi nol tegno vago a monte,  
 No voggio che la barca ti me sfalchi, »  
 Diseva Nico; perchè in veritae  
 Costù dava de mate bastonae.

In questo salta su con vigorla  
 Polo-del-vechio, Paneta e Trombete;  
 Tuta la zente fa strepito e cria,  
 Ma lori vien subito a la streta,  
 Baleca eo un mandreto buta via  
 A Polo un'ongia tuta neta neta,  
 Agresta co una punta buta in lenza  
 Sier Trombete; nè Paneta fu senza,  
 Che Sardo d'un fendente gh'avea dao  
 Sul braccio destro ch'el tegniva el legno,  
 E d'un roverso po' sora mercao  
 S'un schinco un colpo ch'el tegnisse in pegno.  
 Baleca aràve Pplo mastruzzao  
 S'el steva saldo sul Ponte al so' segno,  
 Ma zo del Ponte el se n'è andà trotando,  
 Paneta el seguitava zotegando.

Resta sul Ponte ancora sti vecchiardi  
 Za ben co de le cianze la so' parte,  
 Fagando salti, mostrando i gagiardi,  
 Niente stimando nè morte, nè Marte.  
 I Castelani diseva: « L'è tardi,  
 Saltemo suso a darghe la so' parte. »  
 La zente stava a veder chi montava  
 E qualcun in deele se levava.

Musega, Giurco, Cimberle e Gazante,  
 Zorzeto, Fiuba, Gregheto e Giarcòla,  
 Biscoto, Rizzo, Nico e Zan-dal-Zante,  
 Scoco, Schiaveto, Tofalo e Nicòla,  
 Tuti questi con cuore de diamante  
 Vien sora el Ponte; chi tira, chi mola,  
 Tuti voleva esser avanti i primi  
 Per vegnir se afrontar co quei tre grimi.

Giurco, che xe pi bizaro d'un orso,

Xe primo avanti a despeto del mondo ;  
E adosso a Sardo a la prima el xe corso  
Con un falso roverso e un dreto tondo.  
Sti altri compagni vien drio per soccorso  
Per cazzar i Gnati fin in tel profondo,  
E a Baleca, a Sardo, a sier Agresta  
I schinchi resta roti e anca la testa.

I Nicoloti gera per morir,

Da la stizza pareva ch' i crepasse ;  
I Castelani diseva de vegnir  
In fina a basso a petarghe le tasse ;  
I Nicoloti no à possù sofrir,  
E fo forza ch' in frota i s' affrontasse ;  
Come formighe sul Ponte i bogiva  
Balando d' altro son che d' arpa o piva.

Dei Gnati i primi che s' à cazzà in mezzo  
Fo Scrochi, Ranco, Tartagia e Ganzara,  
E ve so dir che nissun no xe grezo.

Qua se vedeva chi tira, chi para,  
No se podea saver chi avea el pezo,  
Che tuti avea ben la so' capara.  
Bastoni in erto se ne vedeva cento,  
Chi un ochio roto avea, chi in aqua spento.

Chi schinchi roti, chi franto gava el muso,

E più d' un par gera in tera destesi,  
Nè fo mai visto rumor più confuso.  
Su le soe tuti stè un poco sospesi,  
E po', in t' un trato, tuti salta suso  
Dandose paghe per pi de tre mesi  
In bone pacche e pusche de contai  
Con legni dreti, storti e squadrizai.

No fo mai vista sì bela barufa

Come che gera tra sti zovenazzi ;  
I se cavava, ve so dir, la mufa  
Da le celade e anca da i mustazzi.  
Tra quei che varda, chi ride, chi sbufa,  
Con musi verdi, zali e paonazzi ;  
Calcun fa per crier cussi gran boca  
Che l' una e l' altra rechia le se toca.

Piene le fondamenta, anca le case,

Altane, copi, fisolere e barche  
Per veder gera qua, che no romase  
A mala pena i morti in te le arche.  
Che tanto a tuti sta bagia ghe piase,  
Massimamente quando segni o marche  
Sul viso fato vien a qualche zaltro  
Che xe poltron, e vol mostrar el scaltro.

Come v' ò dito, da tute le bande

A mezo el Ponte ghe ne gera assai,  
Che ve so dir ch' i se le dava grande,  
E per longo e per tresso da ogni lai.  
Qua vin de Marca in tera no se spande  
Ma sangue rosso e da no guarir mai ;  
Frignocole de lira i se petava  
Che con lissia e saon no se lavava.

Mentre la frota gera sul più belo

No se podea saver chi avesse el pezo,  
E ognuno stava co l' ochio a penelo,  
E gera giusto spartio el Ponte in mezo.  
Un certo Sarasin, chiamo Mengrelo,  
Forsi con scusa da finzer el grezo,  
O ch' el diavol ghe l' abia menao,  
O pur da stizza d' esser stà legnao,

Ma, sia come se voglia, el messe man

Al so' pugnol che l' avea in tel cento,  
E in te la panza spento el l' à a Barian,  
Che se l' no gava in dosso el so' instrumento  
El no magnava in so' vita più pan ;  
Nè per questo costù gera contento,  
Da rabia ch' el gava rota una gualta  
Con stizza a tior la so' calisa el salta ;

E sgrinfala de man a un so' famegio

Che l' avea in salvo insieme col so' tapo,  
E presto in drio con un bruto pegio  
Torna, digando : « Potà! se te chiapo »  
Miedeghi no farà de ti colegio. »  
In questo le brigae con viso fiapo  
Varda, che l' Moro d' una punta infilza  
Perla, e l' ghe passa el figao e la milza.

Copi in sto mezo se vedea svolar,

Sassi, bastoni e d' arme el Ponte è pien,  
La zente via, chi podeva scampar,  
Spontoni e ronche da ogni banda vien ;  
E ve so dir che ghe gera da far!  
Chi tira, chi mola, chi traze, chi tien,  
Chi archi carga, chi cavava frezze ;  
Co sti strumenti i se feva carezze!

E tife, tofe, tafe, chiufo, chiofo,

Se sentiva pestar altro che erbete!  
Chi mola da paura peti e slofe,  
Chi tira e para, chi in guardia se mete.  
Barbon sul cao a Burba à dato un tofe  
D' una mazzoca, che come scalete  
La meza testa in cao se ghe frantuma,  
E po' tra i altri Barbon se caluma.

Co sta mazzoca sto Barbon no tresca;  
 Ma, ve so dir, ch'el daya de gran gnase!  
 El tirava roversi a la turchesca,  
 Che chi ghe ne fa prova no i ghe piase.  
 In fin pur sto Barbon dete in te l'esca,  
 Sichè infilzao in te l'amo lu romase.  
 Bernichio l'esca fu, l'amo un sponton  
 Che à passà la gargata a sto Barbon.

Giarcola a Gnagni dete d'una ronca  
 In te la panza, che pp' le buele  
 Via ghe xe stae portae in t'una conca.  
 Cimberle gavea tagiao le parèle,  
 Co un arma a do' man che rade e zonca,  
 A Sardo, e in do' pezzi le massele  
 L'avea butà a Topo co' un falso  
 Che a reparare no ghe gera valso.

Tira Ganzara una pota in trivèlo  
 A Bio in quello che voltar se volse,  
 E el l' à sbusà come se fa un crivèlo.  
 Tota schivar da Liron no se posse,  
 Che d' un pistogio el gh' à dà sul cervelo,  
 Ma la so' sorte, o no so quel che fosse  
 Fece ch' in man se gh' è voltà el pistogio,  
 Perchè altramènte el pòdea crier: *ogio*.

Gropo con un sponton ferido à Zanco,  
 Che lo à infilzà come se fa le anguile,  
 E presto el vene più che zesso bianco,  
 Sichè l' è andà a parlar co le Sibile.  
 Caligo, Tasso, Grinta, Chiopo e Ranco  
 S' à fàto avanti, digando: « Se mile  
 Fusse sti Calafai, sti Marangoni  
 Faremo veder ch' i è tuti poltroni. »

Criava a vose piena le brigae:  
 « Tirève in drio; no far; scampa; sta forte; »

Se vedeva tirar tal cortelae  
 Da far paura e meter molti a morte;  
 Ve so dir che i no dava piatonae  
 Ma bote da tagiar muragie e porte,  
 E passar corazzine e franzer zachi  
 Facendose in la vita stranii intachi.

Taco e Giarcola gera stretti insieme  
 A meza mela con spada e pugnai,  
 Nisun de questi la vita no teme,  
 E per l' onor i faràve ogni mal.  
 Ghe par esser in Ciel co le diadème  
 Quando i travasa la spada o el bocai,  
 I se tirava bote da giotoni  
 Ponte, falsi roversi e stramazzonei.

Giarcola una galia sul viso a Taco  
 Fece da cinque remi senza veja;  
 E perchè anca lu no l' andasse a maco,  
 No so come la fusse, la fu bela!  
 Sul colo a Taco ghe fece un intaco,  
 Menando de man dreta a meza mela;  
 E sì gran bota dete a sto Giarcola  
 Che per saldarla mai s' à trovà cola.

D' un fendente a Paton dete Falopa  
 In su la schena de sì fàto incastro  
 Che sete volte sie lire de stopa  
 Bisognò meter suso al primo impiastro.  
 La bota scomenzava da la copa  
 E la vegniva zoso per rigastro  
 La fina in minimezo del buelo,  
 Che mai sì dreta se fece a penelo.

Ochi-de-papa, Bioco e Caligo  
 S' à fàto avanti per acquistar fama;  
 Contro de questi è vegnù Polo-intrigo,  
 Nespola e Naspo, che cussì i se chiama;  
 Un gera zoto e l' altro mezo sbigo,  
 Ma in man a tuti ghe sta ben la lama,  
 E se no gera i sassi che pioveva  
 A far gran cosse questi se vedeva.

Sassi pioveva e copi tempestava;  
 Un copo a Naspo dète su la cruca  
 Ch' in cao la meza testa ghe fracava;  
 Ochi-de-papa gavea rota la zuca,  
 E 'l sangue rosso zo ghe pizzolava,  
 E 'l cervel fora insina per la gnuca,  
 E d' una ronca Nespola e Bioco  
 In su la cruca dète un mato croco.

De i primi Castelani, da disdoto,  
 Insieme i gera co le so' arme d' asta  
 Per dar ai Gnati e Canaruoli el troto,  
 Credando forsi ch' i fusse de pasta;  
 Ma i li à trovai più duri che 'l biscoto,  
 E da valenti qua tuti contrasta;  
 Chi avea rota la testa, o fora un balco,  
 Chi senza un deo, e chi pareva Malco.

Agùì pugnali svolava e balote,  
 Tarse, pavesi, partesane e spei  
 Andava in pezzi a muo' pignate cote.  
 Chi no menava ben le gambe e i dei  
 Una solfa cantava de tai note  
 Che i cogneva crier: *ohimeì, ohimeì*,  
 Strenzer i pugni e destirar le tire,  
 Bresuole i se tagiava de tre lire.

Co una storta meza spana larga  
 A Galo Targa à tirà d'un roverso  
 Ch'in quatro pezzi el gh'è fato la targa  
 E un braccio neto el gh'è tagià a traverso.  
 Desperao Galo a dosso sì el ghe carga  
 Per far vendeta del so' bràzzo perso,  
 Con tanta rabia el tira sì gràn trèca  
 Ch'a Targa un braccio a lài la spala spica.

Sichè i è restai d'un braccio per un zoffi,  
 Che malamente se guarisse mai,  
 Nè se pol far a lè brazzae, nè a tonfi.  
 Co' i altri brazzi i s'aveva zafai  
 D'a dolor e da grinta verdi e sgionfi;  
 E certo i s'averave anca amazzai,  
 Ma per el sangue che tutùdo' sparse  
 Da debolezza i è sta sforzai a lagarse.

Azzuffao gera Struchieto con Piga,  
 Un co la ronca; l'altro col spadon;  
 Nò xe sì zusto el compasso o la riga  
 Quanto sti do' zuogava con rason.  
 Struchieto tira d'un fendente e ciga:  
 « Repara questa se no ti è minchion; »  
 Piga ch'aveva l'occhio, el tempo, el passo,  
 Sgombra da banda, e l'spadon dà s'un sasso.

E tutt' a un tempo de la ronca un schiafo  
 Chiofe à Struchieto in mezo una ganassa,  
 Digando: « Gonzo, se a questa t'agrafo,  
 A trar de corli no ti starà massa. »  
 Struchieto ghe risponde: « Ah fio d'un zafò; »  
 E pien de grinta rodando strapassa,  
 Bote maure menando a l'osbesca,  
 E gnanca Piga no dorme, nè tresca.

Ora col cospo e ora co la lama  
 Mena e repara co l'occhio a penelo;  
 Un pareo proprio del fogo la fiamma,  
 E l'altro è presto come xe un oselo;  
 Nò se vedeva avantasò una drama,  
 Nè mai fo visto sì fato duelo;  
 E cussì stando su queste contese  
 Struchieto vien con Piga a le prese.

E tuti, l'un a lai l'altro se cazza,  
 Che la ronca e l'spedon no valea gnente,  
 Ma co le teste i se dava in la fazza,  
 E gambaruole acompagnae con spente,  
 De gran sbrisai mostrando esser de razza;  
 E tanto i gera del Canal arente,  
 Che senza ch' i se fusse gnente accorti  
 In lenza i s'è trovà tuti do' assorti.

A fondi i xe caseai come piombini,  
 Per respeto de l'arme ch' i avea indosso,  
 I nuava tuti do' quanto dolfini,  
 E per gran stizza ognun gera scomosso;  
 La vita i no stimava tre quatrini,  
 Bote i tirava senza piar riposo;  
 Che pessi o mosche no ghe dava impazzo,  
 E a vederli gera certo un gran solazzo!

Col cospo Piga à tirà d'una ponta;  
 Struchieto à volsù far da banda un passo,  
 E perchè i pie sul fango no s'afronta,  
 A slizzegoni l'è andado fin a basso.  
 De farlo fredo a Piga la ghe monta,  
 Credando forsi ch'el sie fusse un asso,  
 Ma el s'è trovà inganà perchè Struchieto  
 No l'è levà, co' l'è se pensava, dreto;

Ma tra le gambe a Piga el se cazzava  
 E co' le spale el lo levava suso,  
 Tanto ch' a fondi el se lo colegava  
 E po' coi pie ghe mastruzzava el muso,  
 Sichè el trazeva fuora sangue e bava.  
 Piga sot' aqua à messo man al fuso  
 E a Struchieto el gh'è infilzà una cossa,  
 Che per el sangue l'acqua vene rossa.

Quando Struchieto s'è senti esser ponto,  
 « Ohimè, el cria, la ponta è in tel pessedo! »  
 Che no se trova per guarirla altr' onto.  
 In questo Piga salta suso dreto  
 Digando: « Adesso faremo ben conto; »  
 E de la ronca ghe tira un mandreto,  
 Che se Struchieto no lo riparava,  
 Quest' altra el fiao de corpo ghe cavava.

Come fa i smerghi, sot' acqua i s' atufa  
 E po' de sora i vegniva imbavai;  
 Un trato Piga sot' aqua se tufa  
 Per dar a sto Struchieto angossa e guai;  
 Struchieto se n'acorze de la trufa  
 E con prestezza el se tira de lai,  
 Sichè sier Piga restava apetao  
 Co la pensata che l'aveva in tel cao.

In questo tempo sti do' gera primati  
 De gagiardezza, de cuor e de scrima;  
 Stagando in aqua i à fato certi trati  
 Da no poderse in prosa dir, nè in rima.  
 Da chiachiare no i gera, ma da fati,  
 Bravi certo da farghene gran stima;  
 Co remi e stanghe è stà metuo de mezo  
 E a so' dano xe sta de chi à buo el pezo.

Naso, Nasachio, Sete-nasj e Slefà,

A la volta del Ponte questi aranca  
Per far ch' i Castelan andasse in cofa,  
Ma per fianco ghe vien a banda zanca  
Groto, Pepola, Nano, Chiechie e Tofa  
Criando: « Gnati, tuti in carta bianca  
Ve manderemo fati in più menuzzi »  
Che a far menestra no se fa capuzzi! »

Quando sti quatro à sentio sta ciarza  
I s' à messo a trucar, co' fa i Cprieri  
Quando ch' i porta nove d'importanza;  
E questi cinque drio come levrieri  
Per conzarli in saor senza naranza,  
Criando: « Parechiè preti e dopieri »  
Da farve sepelir; stamogne e bagie,  
Ve zoneremo se ben fussi quagie. »

E scampa, e drio; e i Gnati de bon trücp  
In cosco del Pistor de Rip terao  
I se salvava, perchè snl mazzuco  
Da sti gran sbrichi no ghe fusse dao;  
Cussi de fuora, a muo' statue de stuao,  
Ognuno de essi restava apetao,  
Pur de bravade i ghe n' à dito un burchio,  
E senz' altro far i à dà volta al remurchio.

E perchè i gera de far mal in zizola,  
Tuti pieni de rabia, grinta e colera  
In verso'l Ponte in t' un grumo i calchizola.  
Chiechie mo dise: « No stimo una folera  
Sti Nicoloti »; e coi lavri el petizola.  
Nano risponde: « Se la no me tolera  
La grinta ch' in tel stomego me brondola  
De morti vogio impirghene una gondola. »

« — Vogio franzer celae e corazzine  
Diseva Groto, a sti Gnati gagiofi;  
Vogio tagiarli in pezzi a muo' puine  
Essi co le so' spade, e mi co i tofi;  
I vogio scortegar e far coltrine  
De le so' pele, e struparle co i gofi. »  
Pepolo dise: « Ascolta Nano e Chiechie,  
Femo de tuti i più gran pezzi, rechie. »

Fosa diseva: « Putana del pesse!  
No vedo l' ora a scomenzar sto balo,  
Perchè ghe vogio calar le braghesse  
A pi d' un par, e darghe un bon cavalo;  
I stimo tuti assae manco che vesse,  
Senti ti Chiechie, che no parlo in falo,  
Se s' atachèmo son tanto de vena  
Che certo ghe ne forbo una dozena. »

Chiechie risponde: « Pota de sier Dante!

No stimo tuti sti poltron i un stronzo;  
Se grandi i fusae come xe un lionfante,  
E'l colo fusse e la testà de bronzo,  
Le osse e'l resto fusse de diamante,  
Ghe farò spander de sangue un bigonno;  
Pur ch' i me vegna a lai tanto che i zofza,  
I strucolerò tuti a muo' una sponza. »

Tornando in drio i scontra Caparozolo »  
Co la spada e per targa un canestro,  
E qua tuti ghe fa d' attorno un bozzolo;  
Chi dal lai dreto, altri dal lai senestro  
Per strupiarlo e farlo andar in erozzolo.  
Costù, che gera più che gato destro,  
Tira un dreto, un roverso, un sotoman  
E sbigna fuor del cerchio salvo e san.

« Astu visto, diseva Nano a Groto,  
Che come un vento costù s' à netao?  
L' avevimo in pignata caldo e coto  
E si davanti el ne s' à desfantao!  
Mi no credea che ghe fusse ceroto  
Al fato so'; el s' à certo invodao.  
Oh se n' agrapo un altro, te prometo,  
El tagio in pezzi, e po' 'l fazzo in broeto. »

« — Pota! vorave scontrargherne cento,  
Diseva Fofa, de sti Nicoloti;  
Me parerave no restar contento  
Se no i strozzasse tuti sti merloti,  
Ma solamente in tel sentir el ventq  
De la spada i sbasisse, i resta coti. »  
Pepolo dise: « Stemo a dar la mente?  
Se se scontremo no te digo gnente. »

Cussi bravando i vegniava de tiro  
A la volta del Ponte in t' una fila,  
E in Campo santo i scontra Coca e Glinio  
Con Grongo e Solfa ch' in cao la ghe grila.  
Gropo, Franca-molena, Garbo e Biro  
A tuti le so' spade in man ghe brila.  
Quando quei cinque à squadrà sti oto  
A far sia, yoga, i à scomenzà de boto,  
Le pive presto in sacheto metando,  
E de calcagni saldandogh' el conto,  
E sti oto drio, a più poder corando;  
Al fin i tolse a dir tuti de ponto.  
Franca-molena tornava digando;  
« Almanco avesse un poco Chiechie zonto  
Che gh' averave cussi per solazzo  
Tagià una gamba, e roto in pezzi un braccio. »

Grongo, sgrignando, diseva: « In malora!  
Se ghe petava de le sgrinfe adosso  
Zuogava d'altro zuogo che a la mora,  
I scortegava tuti sin a l'osso. »

Respondea Garbo: « Co stà dalaora  
No m'averave un passo apena mosso,  
Che feva de sti zochi tante stele  
Che forsi in Ciel no ghe xe tante Stele.  
Perchè ghe dava cento fossinàe

In t' i polmoni e in te le cervelle. »  
Gropo diseva: « E mi con piatomae  
Ghe mastruzzava i denti e le massele  
Che i no magnava pi pan nè panae;  
Tagiava teste, man, gambe e parele,  
Che m'averave parso racorger fiori  
In t'un zardin a cavarme sti umori.

— Solfa? ti tasi? par che ti sii morto?  
— Se vu soli cianzè per pi de cento, »  
Responde Solfa, « e per no farve torto  
Dirò anca mi quel ch' in anema sento;  
Se poco ananzi me ne fusse acorto,  
Da intrar in Porto i no gaveva vento,  
Perchè mi ghe tagliava le gambiere  
E a casa i feva portar su le civiere. »

« — Putana de la morte repentina!  
S' i me vegniva a tagio, dise Ghiro;  
De tuti cinque feva una fassina  
E in manco che no se trà un sospiro,  
A un, a un, co' se fa una galina,  
Ghe dava al colo sì fato destiro  
Che gh'averave fato insin i fiai,  
E i averave in Canale po' slanzai. »

Ecote in questo un copo a remi, a velo,  
In t'una rechia a sier Franca-molena,  
E una frezza no mancava un pelo  
Ch' a Grongo no schiantasse in te la schena.  
Biro s'è voltà in drio, disendo: « Chi xelo  
Costù che trà? Pota de dona Lena!  
Che se l'amaco, al sangue de Diana,  
El vogio scortegar come una rana. »

In questo un sasso, schiefe, in t'una galta  
A sto sier Biro cussi a l'improvisa.  
Biro da stizza e da gran dogia salta  
Digando: « Putanazza de Marfisa!  
De le vostr'osse e sangue farò malta  
Se ve posso agrapar in qualche ghisa; »  
Alfin i gera tanto bersagliai  
Ch' i à dovudo netar via agrizzai.

« Sgombremo, Ghiro, che qua piove sassi,  
Se no volemo qualche zucolon.  
Diseva Solfa: Grotta, slonga i passi,  
Andemo a veder se ghe xe de bon  
Calche capon o figaeti grassi  
Da Panza-larga e da Zan-biliron. »  
E cussì i se ficava in certe betole  
Lasando i altri a la guerra in le petole.

No bisognava ch' i stesse pi un fregolo  
A sgombrar el paese sti gran bravi,  
Perchè l'oladà con un cerendegolo  
Cuogoli trava grossi come ravi,  
Che a repararli no ghe gera indegolo,  
Sichè a netarse i fo prudenti e savi,  
Che, se i restava a aspetar quele sorbe  
I vegniva portai a casa in corbe.

Tanagia, Lovo, Catego e Schizzao,  
Verola, Scogio, Mora e Gataluse,  
Argana, Ruspo, Buovolo e Sdentao,  
Se dodese no xe sbisai da fuse;  
I se gera tacai con Zan-sberlao  
Co le so' mele che taglia e che cuse;  
Sberlao, Figiera con Schita e Pachiante,  
Agio, Scalogna, Scavazza e Durante,

Sti oto insieme i s' aveva tirai  
In cale zo del Ponte de l'aseo  
In ordenanza ben intatarai.  
Mora, che no gaveva el cuor d'albeo,  
Contra de Schita para, tira, e dai,  
Tanto che Mora resta senza un deo.  
Agio, Scavezza, Durante e Scalogna  
Gratava a Ruspo e Buovolo la rognà.

Gataluse, Schizzao, Scogio e Tanagia  
Avanti gera con Argana e Lovo  
Co le so' arme che rade e che smagià,  
Tanto che Orlando, no credo, nè Buovo  
Fesse in so' vita sì brava bataglia,  
Per quanto scritto su l'istoria trovo;  
Zembai tre d'essi a corando ai do' Ponti  
Dal barbier i li à portai a far i conti.

Sier Pan-de-megio, Fugazza e Verzoto  
Gera a le strete con Morza e Castruzzo,  
Bufeto, Ton, Lumaga e Binoto,  
Manòli, Forca, Trombeta e Capuzzo:  
« Slarghemose, i diseva, de sto troto,  
No metèmo la vita in t' un scarnuzzo  
Per dar solazzo a chi varda la Festa;  
Che ride po de chi à rota la testa.

Gramola e Toco se ne stava in ala,  
 Co fa el nohier quando ch'el vol far vela,  
 El cuor in corpo a tuti do' ghe bala  
 Per gran voglia de far brilar la mela,  
 Ma per no se far po' chiamar in Scala  
 In vazina i lassava la cortela,  
 E da una banda i s'aveva conzai  
 A vardar quei che vegniva zembai.

Mufo, Penin, Pignata e Franzì-fava  
 Gera sul campo armai e ben atenti,  
 Frisopo contra questi sliceгава  
 E da gran grinta gretolava i denti,  
 Perchè una galia a picolon gh'andava.  
 Costù d'Adamo no stima i parenti  
 E col spadon tira un mandreto tondo  
 Che'l manda Franzì-fava a l'altro mondo.

E a Mufo con un colpo un gomio taglia,  
 Che no gh'è valsa la manega forte,  
 E tut' a un tempo d'una punta smagia  
 El zanco a sier Penin, che co la morte  
 El stete più d'un mese a far bataglia.  
 Pignata alfin, quanto ch'el puole forte  
 Tira el pugnale in la gola a Frisopo.  
 Talchè de la so' fin el zonze al gropo.

Falopa aveva in man un speo da colo,  
 E coreva costù tuto furioso  
 Per affrontarse co Zan-pesse-molo;  
 In questo sorazonze Zan-tegnoso,  
 Grasso, Scrochina, Sgrinfa, Ragno e Polo;  
 E per aidar Falopa, Frapa e Toso  
 Vegniva via saltando, co fa i tori,  
 Per tagiar gambe e brazzi come pori.

Qua se vedeva certa missianza  
 D'altro che schile, gambari e sardele!  
 I se petava d'i spei in la panza  
 Sin che ghe insiva fora le buële;  
 Da mazzar e strupiar gera so' usanza,  
 I travasava spae, spei e rodele,  
 Tirando senza squara nè compasso  
 Bote da far in pezzi Satanasso.

Ve vogio dir una cossa incredibile,  
 Che forsi la sarà tegnuu per frapa,  
 Ma per chi à fede ogni cossa è possibile.  
 Scrochina à dato d'un fendente a Frapa  
 Su la celada, e l'xe sta cussì teribile  
 Ch'in vinti pezzi aponto el ghe la schiapa,  
 E un pezzo a Sgrinfa à tagiao el naso,  
 Che mai s'intese el più bizaro caso.

*Racc. Poes. Ven.*

El resto dei pezzi, che gera disnove,  
 Pareva balote da schiopi e arcobusi,  
 Teste rompea come se fusse vove,  
 Ochi cavava; rompea denti e musì;  
 No fa tanto rumore el ton co' piove,  
 Sichè tuti i è restai mezo confusi,  
 E in fuga a scampar via tuti se messe,  
 Per timor schitolando in le braghesse.

Mai no fo visto una bota sì strania,  
 Sì stupenda, campedegà e masenga.  
 Credo che se vegnisse de Betania  
 Calche gran doto per chiarirla in renga  
 Tuti dirave, la xe una sbefania,  
 E pur fo vero, e no busia o burlenga,  
 Perchè l'ò trovà scritto de man propia  
 De Mistro Pantalon de cà Litropia.

No xe peraltro da maravegiarse  
 Se sta celada xe saltà in schiape e schiame,  
 Perchè co' l'è stà toca, propio parse  
 Quando un pan fresco se magna con fame.  
 Scrochina no menava bote scarce,  
 E la celada no gera de rame  
 Ma d'azzal cruo, temperao troppo duro,  
 Che cussì scrive el mio Dotor mauro;

El qual gavea sì gran autoritae,  
 E no averave dito una busia  
 Per quanto val l'inverno co l'istae.  
 Ma per tornar a dir l'istoria mia,  
 Gera al veder una gran crudeltae  
 De quei che gera restai per la via!  
 Chi strupiao, chi morto, e chi moriva  
 Chi cria, chi scampa, chi fuor d'acqua insiva.

Gota, Schilato, Panera e Sorzeto,  
 Scachio, Codogno, Canata e Pesoco,  
 Scardola, Carotin, Bresuola e Peto,  
 Caroba, Manto, Tartufola e Croco,  
 Zan-fastidio e Marmota e Bigoletto,  
 E po' tant' altri che qua no ve scroco,  
 Scampava in fuga da paura storni  
 Per no scurtar de la so' vita i zorni.

Zonfeto gera sentao su i scalini  
 Ch'el feva conto d'andar in Sagrao,  
 Tagià l'aveva tuti do' i ventrini,  
 Anca una sepa a traverso del cao,  
 E Giurco aveva passà i ventresini  
 Con un sponton che Tasso gh'avea dao;  
 Ochi-de-sepa gera stà sorbio  
 Da Topo, e Fiuba avea Lelo sbasio.

La sera gera quasi sul brunir  
 Quand'eco arivar cento Oficiali;  
 Chi scampa qua, chi scampa là in t'un dir  
 Che certo allora no i gaveva cali.  
 La s'è dovudo in sto mudo finir,  
 Che se questo no gera, tanti mali  
 Se feva avanti che vegnisse sera  
 Che s'incariva le stamegne e la cera.

Gera romasi co i pugni serai

Do' Castelani, un Gnato e un Canaruol;  
 Questi su tole a casa è stà portai.  
 I so'parenti se lamenta e duol,  
 Digando: « Al mondo no vegnirà mai  
 I pì valenti, diga pur chi vol!  
 Pazienza, tuto per voler è stao  
 De chi cussì bel mondo à fabricà ».

Sier Gnagni aveva una punta in la panza  
 E sul chieffali una teribil gnasa;  
 Chineta bionda gera la so' smanza;  
 S'un costrao el ghe fo portà a casa.  
 Tuti diseva: « No ghe xe speranza ».  
 La so' China pianzando el strenze e basa,  
 E dise: « Che faroi grama, desfita,  
 Senza vu, caro ben, cara mia vita ».

« China, ti perdi tuto el to' contento,  
 I solazzi, el bon tempo, i to' piaseri;  
 Chi te farà, co' sarà caldo, el vento?  
 Chi te comprerà piadene e tagieri?  
 El so' ben verso mi no gera fento,  
 El me comprava fin l'ogio, i paveri,  
 Pan, vin, legne, carbon, fito de cà;  
 Oh povereta mi, oh disgrazià!

« Oh quante volte ghe diseva, oh quante!  
 Deh, caro Gnagni, no montar sul Ponte,  
 Ti ghe n'è fato a st' ora tante e tante,  
 A pì de sete ti à insanguinà la fronte,  
 E a tanti e tanti le cervele infrante,  
 Pezo ch'el re Gradasso o Rodomonte;  
 Questa te basta, anzi che te n'avanza,  
 Perchè ogni tropo fa doler la panza.

« Ma el to' gran cuor, la to' tropa bravura,  
 L'esser de schiata, de razza sbisao,  
 El no saver cossa che sia paura,  
 E in te l' arme l'esser stà arlevao,  
 La tò tremenda e feroce natura,  
 L'amor ch' ai Nicoloti ti à portao,  
 Sarà fiera cason de la to' morte;  
 Oh stranio caso, oh tropo dura sorte!

« Sia maledeto el primo ch' à metuo  
 St' usanza traditora in sta Citae,  
 Ch' el par ch' un omo no sia ben nassue  
 Quando ch' el teme quatro bastonae!  
 Chi no monta sul Ponte xe tegnuo  
 Per poltron, per cala da le brigae;  
 Costume fiero, usanza traditora,  
 Causa ch' el fior de tuti i bravi muora! »

Cussì diseva la povera China

Pianzando a cao caveli, a strangogion.  
 Sier Gnagni a puoco a puoco se dechina  
 E va verso la morte de troton.  
 Tuti chi' l vede veramente inclina  
 Che se possa ordenar la procission.  
 I so'parenti tuti gera là  
 Chi va, chi vien, chi torna e chi stà.

El barbier anca lu xe co i so' ferì,  
 E stopa e vovi, no mancava gnente  
 Da cavar sangue, da ordenar crestieri,  
 Da confortarlo e starghe sempre arente;  
 Tuti per casa pareva levrieri  
 A far quanto bisogna prestamente,  
 E certo, vogio dir la veritae,  
 S' è visto gran pietà, gran caritae.

In sto mezo sier Gnagni pezorava,  
 E fava la vizilfa de la Festa;  
 Tuti a lu atorno, che nissun restava,  
 Con ciarle e cianze ghe rompea la testa.  
 Ognun qualcosa se ghe recordava.  
 Con voce bassa e con la ciera mesta  
 I l' pregao ch' el fesse Testamento:  
 « Or suso, Gnagni dise, son contento;

« E lasso tuta la mia massaria  
 Leto, coltra, nizioli a la mia China,  
 Con pato ch' essa, ch' è l'anema mia,  
 S' arecorde de mi sera e mattina;  
 La manopola, el zaco, e la tachla,  
 El mio pugnàl d'arzeno e la squarcina  
 A mio Cusin, el fio qua de Zan-boba;  
 Un tapo lasso a mio nezzo Caroba;

« El resto tuto che se venda vogio,  
 E dei danari che se trazerà  
 Sia fato un bon livel, che mi no sogio,  
 Ma che do' Comessarii ordinarà,  
 I quai vogio che sia Morelo e Sfogio  
 Per tuto el tempo sin ch' i viverà,  
 E a la so' morte i deva altri ordenar  
 Che la Comessaria diè governar.



« E perchè ogni fadiga vol mercede,  
 Vogio ch'essi ogn'ano debia aver  
 Per poder far conzar trezuole e tede  
 La decima del prò, com'è dover,  
 E del restante i diè con bona fede  
 Farne tre parte zuste a so' poder  
 Che debia esser og'ano dispensae,  
 In presenza de tutte le brigae,  
 « A quei tre Nicoloti che in quel ano  
 Sul Ponte i arà mostrà masor bravura  
 Contra dei Castelani, e con afano  
 Ghe arà fato più angossa e più paura;  
 E che questo se fazzà senza ingano,  
 Con bona volontae sincera e pura;  
 No vardando nè a sangue, nè a amistae,  
 Ma a chi merita più, e con realtae. »  
 Fato el so' Testamento, dà là a un'ora  
 Sier Gnagni scomenzava a borbotar;  
 China diseva: » Ohime! credo che'l mora!»  
 A puoco a puoco el non podea parlar;  
 Si fredo el gera ch'el vento da buora,  
 L'è scomenzà po' un poco a zavarar,  
 Tanto che al fin, inverso la matina,  
 Gnagni dète de corli in la schiavina.  
 De pianti s'alza allora un gran rumor,  
 La so' Chineta i caveli se tira,  
 Parenti e amici sentiva dolor,  
 Chi manazza, chi pianze e chi sospira.  
 El zorno drio, certo con gran onor,  
 L'è sta sepolho con torzi de lira,  
 Segundo che ò trovà scritto per nota,  
 E drio ghe gera de bravi una frota.  
 Ghe ne restava zembai più de trenta,  
 Tra i altri Giurco stava molto mal,  
 Che dona Morte ghe dava la spenta  
 Per portarselo via senza feral.  
 De far sto viazo mo nol se contenta  
 Per esser tropo soto Carneval.  
 Nè goder el podea nei Magazeni  
 E rosti e lessi e carateli pieni.  
 L'anema Giurco se sentiva insir,  
 Tut'i amici lo xe stai a visitar,  
 Fo subito el barbier fato vegnir  
 E con gran diligenza miedegar;  
 Poco se spera ch'el possa guarir,  
 Che a poco a poco el se vede mancar,  
 Qua sora el tuto ghe fo recordao  
 Ch'el dieba perdonar a chi gh'è da dao.

A questo Giurco subito respose:

« Mi ghe perdono, brigae benedete,  
 E s'el trovasse con i pie in le buose,  
 E con le man ligae co le manete  
 Mi no l'ofenderia; se con la vose  
 Sola podesse far le mie vendete  
 Nol voria far; anzi ve prego tuti,  
 Zoveni e vecchi, garzonati e puti,  
 « Che daspuo che la cossa sì xe fata,  
 Dio ghe perdonà a chi xe sta cagion;  
 Fè che la pàse sia tra vu refata,  
 E vivè come prima in union;  
 Feve piaser l'un co l'altro a regata,  
 Che questo è de l'amor el paragon;  
 Tanto che se stupissa le brigae  
 A veder in vu tanta caritae.  
 « No ve ostinè con dir, che i Nicoloti  
 Sia de vu più deserti o più poltroni,  
 Ch'anca tra i nostri ghe xe dei merloti;  
 E cussì d'essi che no xe minchion.  
 Tuti a la fin non semio patrioti?  
 Cressui in sti campi, ste cale e cantoni?  
 Tuti semo stampai d'osse e de carne,  
 Niente dovemo più de altri avantarne.  
 « No semio tuti de una Patria istessa,  
 Fioli de San Marco, e del so Stado?  
 Che Dio el mantegna, e fazzà pur ch'el cressa,  
 Che 'l ben ch'avemo, lu ne l'è donado;  
 Però, fioli mii, non ve reccessa  
 De far come che mi v'ò recordado:  
 Viver in pase, amarse da fradei,  
 E lassar star ste gare e sti bordei;  
 « Altro no posso dir, che sento chiaro,  
 L'anema fuora del mio corpo salpa;  
 La gripia no se tien più gente al faro. »  
 In questo el fronte un co le man ghe palpa,  
 Che de suori el ghe n'avea un caro,  
 Fredi più che no xe neve su l'Alpa;  
 E cussì Giurco con contrizion  
 Spirò sperando aver dal Ciel perdon.  
 Parechi de zembai ghe ne restava  
 Che per no aver soldi da guarir  
 In Ghetto topi e letiere impegnava.  
 Altro in Venezia no s'avea che dir,  
 Che de sta guera sì gagiarda e brava  
 Gera un solazzo talvolta sentir  
 Certi mati ostinai e parziali  
 Che adosso i se saltava co fa i gali.

Un disca : « I Castelani è pì valenti. »

Quel altro : « No, xe i Gnati e Canarnoli. »

Quel risponde : « Per la gola menti,

Che vustu meter sti pia-pessi-moli

Con quei che manzeràve azzal coi denti? »

E cussì supiando pì che foli,

Spesso qualcun con scorozoso zefo

Se rompeva la testa, anche el sberlefo.

In fin perchè l'Arsenal non patisse,

Cussì de cape e pesse in Pescaria,

E per meter la stanga a tante risse,

Da i Tribunali fo fata la cria :

« Che de far pì la guera no se ardisse

Chi corer non volea per Merzeria. »

Dal filo in pase i stete per quel'ano ;

El vero dito v'ò se no m'ingano.



# RIME

## TOLTE DA UNA RACCOLTA

INTITOLATA

### LA CARAVANA.

---

#### CONTRO CUPIDO.

Cagozzo fantolin, frasca cornua,  
Meti zoso quel arco, e tio' 'l pandol,  
Che se te zafo dal culo, o mariol,  
Te fazzo andar a traser a la stua.

Cori, va da to' Mare che te mua;  
E te meta davanti el bavaruol,  
E te coverza el corpo co l' albuol,  
Che le verole non te fazza bua.

Cara Madona Venere, metèlo  
In cuna, e fèghe le so' pape; e fè  
Ch' el vaga a traser quel arco al bordelo,

Perchè se da sì puto lo usarè  
A fare despiaser a questo, a quello,  
Co 'l vorè castigar no poderè.

#### RISPOSTA DI CUPIDO.

Te so dir, che ti m' a' ben del merloto,  
Ti xe ben a la fè de quei minchioni,  
Ti no ti vol che traza veretoni,  
E ti credi de darne un sol sberloto?

Mi te farò a la fè ben restar grotto,  
Farò sì che a man zonte in zenochioni  
Ti me domanderà mile perdoni,  
Ma de perdon no ghe sarà ceroto.

Vogio far che ti crepi da martelo,  
Da la passion de qualche bel viseto,  
E che no ti abi un' ochiada mai da elo;

Ti no sa' ben, murlon, che bote peto  
Quando son scorozzao con questo e quello;  
Ti no sa' co' so far co' me ghe meto;  
Te vòl co sto mio archeto  
E col pi tristo dei mii veretoni  
Farte cagar d' angossa in t' i calzoni.

## A CUPIDO.

Se ti credi co i lazzi e co le frezze  
Tegnirme stretto e trapassarme el cuor,  
Tì t'ingani a la fè, sier Dio d' Amor,  
Che no me infriso co ste to' straniezze.

Se ti vegnirà con basi e con dolcezze,  
E se ti me farà qualche favor,  
Son omo da cazzarme in cagaor  
Per amor to', usandome carezze.

Donca meti zoso quel arco e quel baston,  
Non cercar de piarme nè ferir,  
Che senz' arme son preso a strangoion:

Son un cert' omo che no pol sofrir  
D'esser strapazzao dal so' paron;  
La vilania non la posso patir;  
E mi no so riensir  
Co' la se fa de arme, a dire el vero,  
E me crucio e m'afano e me despero.  
Me fruo co' fa un pавero  
Con basi, con cigneti, con ochiae,  
L'inverno ò caldo, e son fresco l'istae.

## MATTINATA A CATE.

Mi no vorave za se mi podesse  
Istizzarme con ti, Cate sorela,  
Perchè ti sa' ben tì, che me recresse  
Co Donete par toe zogar de mela;  
Ma daspuo che le berte xe sì spesse,  
L'è forza che mì rompa la favela,  
L'è forza, a fede, che zuoga de tonfo  
Acìò ti veda che mi no son un zonfo.

Mi ghe n'ò soportae pì de cinquanta  
Per no vegnir a le brute del sacco,  
E ò ingiotio quella del quaranta;  
Quando ti xe andà via con quel Bubaco;  
No ò dito gnente quando che con tanta  
Descortesìa ti m'ìa impegnà el mio zaco;  
O' soportà quella d'esser bastonao  
Per amor too da un bulo strupiao.

Mi ò ingiotio per ti pì strangoioni  
(Povero mi) che non ò caveli in cao;  
Perfina ti m'ìa dà dei mustazzoni,  
Che gnanca Orlando m'averia tocao!  
Pota de mi! quanti buli, e dei boni,  
Quanti che fa i bravazzi infin in cao  
Me cede, e sì se tira da tina banda!  
E ti, fia, ti me tonfi? ah la xe granda.

Mo adesso me son messo in fantasia  
De non voler più esser strapazzao,  
Sia chi se voglia, al sangue de culia,  
Che tuti se varda quando so' istizzao;  
E ti, Cate, compissi sta lissia,  
Lassa che el mio burichio sia sugao,  
O te vegno a cazzar tal pie in la panza  
Che ghe anderà per tasta una naranza.

Una brutta squaldrina mal nassua,  
Una ladra da gali, una falia,  
Che per do' scalognete e un graso d'ua  
Agiuta le vesine a far lissia,  
E a forza de sparagno xe cressua  
In t' un poco de grama massaria,  
Con el so grandisar fora del caso  
Me fa bramar quatro carezze, un baso?

No star co mi su zonti e su novele,  
Che zioghi al tristo a darne a mì la bagia,  
Che te cognosso infin in le buele  
E de quel che ti xe so fin 'na pagia.  
Va, va a zogar sti ponti da cilele  
Con chi no sa che ti sia de sta tagia,  
O altrimenti i basi e le carezze  
Poderàve voltarse in gran straniezze.

Co' la me monta son un mal bigato,  
Grami po' in quella volta chi se cata!  
Oh se sa pur quante che ghe n'ò fato!  
Però, mia Cate, no essere sì mata,  
Che a un mio par, a un omo cussi fato  
Ti voglia mostrarte de sì mala schiata;  
Falo per el to meglio, e se per sorte  
Ti nol farà, ti sarà grama a morte.

No te fonder col dir: « Sia lode a Dio  
E son rica, e son bela, » anema mia,  
Perchè un cervel gagiardo co' xe 'l mio  
Pol farte in oto di grama e falia.  
Se vorò, chi sarà che per sto rio  
Osa passar che 'l no abia una feria?  
Oh se me salterà la moscarola  
Te lassarò co una farseta sola.

**Dì** che i to' buli mo me vegna atorno  
 Dì che i zitissa gnanca, o mariòla;  
 Che ghe ne strupiarò do' para al zorno  
 E i te vegnirà a casa su una tola.  
 No ghe sarà un can in quel contorno  
 Che osa gnanca dirme una parola,  
 E a ti, che ti no meriti ferie,  
 Tut'el to' anderà in sbiaca e in dialtè.

**Za** tempo el fato to' gera un piaser,  
 Ti geri tuta dolce e molesina,  
 Mo adesso che ti à casa in soler,  
 E che ti à do' majoliche in cusina,  
 E che ti fa comandar al forner,  
 Te par esser diventada una rezina?  
 Mo ste tante grandezze, a la fè, fia,  
 Le chiama l'Ospeal da mille mia.

**Oh** Cate, Cate, temo inanzi Avril  
 (Che te la meto longa la novela)  
 De vederte s'un ponte co un bacil,  
 Stropà co una capa da donzela,  
 Bater i denti, e filar fil sotil  
 Con quatro bronze in t'una pignatela,  
 E soto vose grama e povereta,  
 Dir: « Signori, donème una gazeta. »

**O** veramente cussì, co' se suol,  
 Te vedarò anca ti grama, meschina,  
 Ai Perdoni destesa su un storuol  
 Aver per cavazzal una fassina,  
 Con mille boletini onde te duol,  
 E crier: « Socorè sta poverina, »  
 Con un vecchio che te racomanda  
 Che dirà ai puti: « Fève da una banda. »

**Se** san Giopo, per bona fortuna,  
 Non te volesse po' acetar in Scuola,  
 Ne l'inverno te vederò a la bruna  
 Andar a comprar ogio, o mariola;  
 A trazer acqua al lume de la Luna,  
 A lavar drapi per meza ceola,  
 A far servizi a tuta una contrà  
 Per un mezo squeloto de panà;

**Tutti** i tochi, le croste e le cale  
 Ch'avanzarà in t'i armeri dei vesini  
 Ti magnerà co' se i fusse traze.  
 Questi sarà, mariola, i colombini,  
 Queste, vaca, sarà le golarie,  
 Le to' confezion de moscardini;  
 E i fondaghi po' dei caratei  
 Te parerà perfeti moscatei.

**A** vederte vestia sarà un gran spasso;  
 Ti gaverà una calza, e l'altra no,  
 Con do' zocoli vecchi, un alto, un basso,  
 E una camisa comprà da Buzò.  
 Ti gaverà po' in dosso un soto-casso  
 Con pì taconi che no à pèl un bo,  
 E in pe' de la to scufia da festa  
 Una verza te covrirà la testa.

**I** puti te dirà: « Bruta slodrona, »  
 E tuto ti farà per un sesin.  
 Quanti xe in la Mocina, e in la Liona,  
 Tutti te spazzarà per un quattrin,  
 E cussì, solenissima poltrona,  
 Spero vederte a fare un malo fin  
 A onor e gloria de quante p.....  
 Se pensa con arlassi a far sotane.

## LETTERA

DI NICO CALAFATO DALLA PRIGIONE A SUA MOGLIE.

Per no aver pena nè caramal,  
 Perchè in preson no ghe xe ste zavate,  
 Te scrivo co la ponta del pugal;  
 E sì te prego, cara la mia Cate,  
 Perchè l'amor se cognosse a sti passi,  
 Che ti vogi conzar ste papolate.  
 Faràve in sta preson pietà ai sassi!  
 Che diese che me fava de bereta,  
 Adesso i stà con mi sul farme arlassi.  
 Se ben, colona, ti la meni streta,  
 (Perchè mi so 'l to' viver sin in cao,  
 Cussì no fustu co' ti è povereta! )  
 No me lassar morir qua desperao;  
 Tra i to' drapi e i mii pochi ch'è da ti  
 Vedi de far tanto che sia cavao.  
 Sti me cavi sta volta, se mai pì  
 Fio de putana me mete in preson  
 Che possa morir schiavo del Sofì!  
 Un'altra volta co' farò custion,  
 O sarò bandizà per morte de omo,  
 O i me menerà in pezzi in camuzon.  
 Mi ghe n'ò conzà cento con un pomo,  
 E questa aponto, che no ghe pensava;  
 I te me l'à cargà da galantomio!

Vegniva a cà co la mia sepa brava,  
 E co la mia insalata capucina,  
 Con un soldo de ravani e de fava,  
 E quà, co' so' per mezzo la Mocina,  
 Fazendo de bareta al Capitelò,  
 Sento quatro da drio che me sassina.  
 Vogio in quello cazzar man al cortelo ....  
 Perchè no aveva le mie arme indosso?  
 In sta zufa la cena è andà in bordelo,  
 E vogio meter man, e sì no posso,  
 Nè abiendo altra difesa che la vose,  
 Me son messo a crier a pi non posso,  
 Credo che m'abia aldio infina el Dose:  
 Oh Cate, sti me avessi aldio a crier,  
 Ti te averessi ben fata la crose!  
 Pur no ò podesto tanto reparar  
 Ch' a mio marzo despeto so' al covertò,  
 Ma te so dir ch' i à avudo da tirar.  
 Mì, se mai più vegno al descovertò  
 Se no fazzo in t' un dì le mie vendete  
 Abime, o Cate, a tior per un deserto.  
 Nico è un cert'omo po che co 'l se mete ....  
 Basta, gnente, no vogio insir pi fora;  
 Son gonzo, sia con Dio, son da gazete.  
 Ah sorte cagna, sorte traditora!  
 Vago in leto ben spesso col pugnàl,  
 E ancuo l'aveva messo in salamora?  
 Orsù, quando el diè cascar un mal,  
 Pota de mi! no ghe val quanto inzegno  
 Ga tuti i protì mai de l' Arsenal.  
 Go pur anca mi qualche disegno,  
 E sì me lasso, oh Dio, condur in piazza  
 Senz' aver per difesa pur un legno?  
 Mare, la grinta e 'l tossego me amazza,  
 Cavame se ti vol, cavame presto,  
 Altramente el to fusto va a la mazza.  
 El to Nico, o speranza, fa del resto,  
 Prima perchè me trovo qua in sto fuogo,  
 E po per ti, che xe pezo de questo.  
 Chi sa che ti no zoghi a qualche zuogo  
 No vedando la mia ombra per casa;  
 Che calcun altro no sia intrà in mio liogo!  
 Mo chi sarà quel sbrico che te basa?  
 Nol sa certo colù che me fa torto  
 Che come descovertò qualche rasa,  
 El zorno drio de subito l'è morto?  
 El me xe tanto a mi mazzar un bravo,  
 Co' te sarave a ti magnar un storto.

Varda ben, Cate fia, chi te xe schiavo;  
 Varda chi ti à per cà, donca, ben mio,  
 Dime con tuto el cuor, Nico, te cavo;  
 Va col to caro pegno dal Zudio,  
 Ch' a ogni modo co isso, a la fè, fia,  
 Tel scuodo con dar via tanto del mio;  
 Tel scuodo al corpo de Dona Custia.  
 Senti, prova sta volta, e se te falo  
 Fame un rebufo, e dime vilania;  
 Se stago qua do' di certo me amalo,  
 Gh'è rospi, ghe xe schiavi, e altra zente,  
 E ora mai ò granceole zonte al palo.  
 Chi no ga soldi fa le male stente;  
 Mi no ghe n'ò ch' i ò spesi tuti a cena,  
 E adesso la fazzo a un fil perdente.  
 Pota de i zafi! mo i me l' à dà piena;  
 Ma basta, ah cani, ancora non so' fuora,  
 E se Nico no v' onze un dì la schena  
 Che 'l so' fin sia s' un ponte o s' una stuora.

## BIGLIETTO

DI NICO CALAFATO ALLA PERINA.

Son d'una grisa vogia, son sì fiaco  
 Come se avesse tolto medesina.  
 Da che vien, cara fia, che son sì straco?  
 Dimelo, cara suor, cara Perina;  
 So ben mi che ti sa' la mia natura;  
 Confortame, te prego, cara Nina.  
 Fame carezze, adora sta fegura;  
 Son pur colù che fa sluser la casa!  
 E infin che ti me vedi, sta segura.  
 Zafame a brazzacolo, strenzi e basa;  
 Son tuto rovinà, tiò quel zibeto;  
 Onzime el peto, e po le cegie e nasa.  
 T' ingrugni el muso? astu qualche sospeto?  
 Certo ti pensi che sia stà da Cate.  
 No barbotar; di via, parlame schieto.  
 Ti rogni sempre, ti fa' co' le gate;  
 Sto to' far te consuma, povereta ..  
 Eh tendi a viver, no far co' fa le mate.  
 Te vò trovar un dì 'na massareta  
 Che me vegnerà drio col cesto in Piazza  
 Per no lassarte star cussi soleta;

E vòì comprarte un papagò, una gazza,  
 Del basegò, una zelosia, uno specchio;  
 Alegrate mo adesso, e vien m'abbrazza.  
 No far la schiavonessa, con dir nechio,  
 Che se te meto po' le man attorno  
 Te pelo tuta sin al petenechio;  
 Ch' astu trovà, che ti crie ogni zorno,  
 Da un mese in qua, da matina a sera?  
 Mi taso pur co' cato pan in forno.  
 Vegno straco da Piazza anca gersera  
 Con menole, con ravani e salata;  
 Ti crie deboto che son stà a la gnera.  
 O credo che con mi ti fa la gata,  
 Perchè ti vedi che mi fazzo el gonzo,  
 O pur ti vol che te fazzo una nata.  
 Varda che per la rognà mi te onzo,  
 State tranquila, e tientie in cervelo  
 O non passa oto zorni che te ponzo.  
 Te fidistu forsi col dir che mi ò martelo?  
 Non sastu che per poco la me monta,  
 Che te farave de la panza un crielo?  
 El par ch' ogni mio mal voglia la zonta;  
 Varda chi me gradisse e chi m'ingrinta  
 Che tute le rebeco per la ponta.  
 Quatro ti me n' a fato; orsù a la quinta,  
 Che te despogio a mo' un san Zuan de Zugno,  
 Co' a fato Zan Fracò un dì a la Tinta.  
 Vardate co' ti vedi che m'ingrugno,  
 E tientie ben a l'erta; che co' taso  
 La vol bogier, e presto scampa un pugno;  
 E po' mi finzerò de darte un baso,  
 E cussì pien de grinta, a dreto, a storto,  
 Te porterò coi denti via el naso,  
 E co la prima Nave ch'è sul Porto  
 Farò po' vela, e trucherò in Levante;  
 E questo è 'l mio pensier, el mio conforto;  
 Che ti ti perderà el naso e l'amante.

## IMPRECAZIONI

DI NICO CALAFATO.

Daspuo che al mio dolor no gh'è ceroto  
 Bramo veder in tera ogni rovina,  
 Fogo, fame, giandusse e teremoto,  
*Racc. Poes. Ven.*

E in pe' de pan, de carne e de farina  
 Che se beva velen, se magna sassi,  
 E se dorma su pagia segalina;  
 E quei ch'è più mecanichi e più bassi  
 Signoriza i più ricchi e più potenti,  
 E tutta la roba vaga a scanzafassi.  
 Vorìa solo sentir pianti e lamenti,  
 Sospiri, zighi e tribulazion,  
 Ingani, ladronezzi e tradimenti;  
 E che per ogni buso, ogni canton,  
 No ghe fusse che sbrichi, che sassini  
 Che a bel diletto facesse custion;  
 Vorìa che tutti i Frati scapucini  
 Fesse l'amor, e che i innamorai  
 Deventasse in so' pe', tuti chietini;  
 Voràve che per tuti sti canai,  
 Per la Brenta, per l'Adese e per Sil  
 Nuasse lóvi e dragoni afamai;  
 Vorìa che la zonzhià, l'onto sotil,  
 La pulna, el formagio e le casuole  
 (Che xe pur un magnar cussì zentil!)  
 Deventasse più dure che le tole,  
 E quando po le fusse cussì dure  
 Te ne vegnisse voglia d'esse sole;  
 Vorìa veder cosse anca più scure;  
 Che le mugier comportasse ai marii  
 Ch' i se n' andasse da altre creature;  
 E acìò che tuti po' fusse avalii  
 Vorìa che le mugier fassee quintane  
 De' furianti, de' ladri e de' fali;  
 Vorìa veder regine le p . . . .  
 E che quanta onestà gà le donzele  
 Fusse tuta al bordelo in Carampane;  
 Vorìa veder tute le done bele  
 Arse e destrute, e per farla compia  
 Che le brute crepasse po anca ele;  
 Vorìa che 'l brogio fusse malatia,  
 E in pe' de le carezze e bone ciere  
 La zente se dissesse vilania;  
 Vorìa che i serpenti e che le fiere  
 Lassasse i boschi, vegnisse in sta tera,  
 E sesse nio per le nostre litiere;  
 Vorìa veder madona ogui massera,  
 Le madone sguatare in cusina,  
 Po, tute descopae co una manera;  
 Vorìa che ogni ladro de Mocina  
 Fusse el Camerlengo del Comun.  
 Perchè le cosse andasse più in rovina;

Voria che no ghe fusse l' un fia un  
 Aciò no se podesse tegnir conti,  
 E no ghe fusse credito in nissun;  
 Voria che no ghe fusse se no afronti,  
 Magnarie, trufe, intachi, garbinele,  
 Sogie e presonzion, arlassi e zonti;  
 Voria che quel che va per le buele,  
 E se purga da basso in cagaor,  
 Se voltasse a la via de le massele;  
 Voria che sta frascheta de sto Amor  
 Tresse da seno frezze e veretoni  
 Che ne passasse a tuti quanti el cuor;  
 Voria che i pie in tel cul e i mustazzoni  
 Fosse in masor domanda e in masor stima  
 Che no xe le pernisse e i pipioni;  
 Voria che la zonchià no avesse cima,  
 E chi taglia le carte a la Basseta  
 Sempre vedesse la chiamata prima;  
 Voràve ch' ogni scrigno e casseleta  
 S' avrisse senza chiave con un deo  
 Perchè i miseri avesse pì la streta;  
 Voràve che chi pesca desse in spreo,  
 E che i campi prativi e le coline  
 Deventasse in so' pe' giara e caneo;  
 Voria che i puti, e che le fantoline  
 Fesse caca per cà, pissasse in leto  
 Tute le sere e tute le matine.  
 Voràve che i pissoti de caretò  
 Tegnisse scuola e desse lezion  
 Ai omeni più bravi d' inteletò;

Voria che al Magazen e al Bastion  
 Se redusesse la civiltà,  
 Co' fa prè Bocaletto imbrigion;  
 E voràve che ogn' omo imbertonà  
 Quando ch' el scontra la so' innamorata  
 El ghe fesse una ciera scorozà;  
 E po' per penitenza che ogni ingrata,  
 Da afano e da dolor de i so' pecai,  
 La se pelasse e diventasse mata;  
 Voria che i vechi non gavesse ochiai,  
 E quei che no ga denti no catasse  
 Dal pistor se no pani biscotai;  
 Voria a chi à drapi che i se ghe tarmasse.  
 E per chi è nui che sempre fusse inverno.  
 Perchè i batesse i denti e che i crepasse;  
 Voràve che 'l dormire fusse eterno,  
 E che nessun no coversisse i ochi  
 Nome che co le pene de l' inferno;  
 Voria che in pe' de carete e de cochi  
 Se strassinasse a coa de cavallo  
 Ligai co la so' corda in tei zenochi;  
 Voria che su ogni deo nassesse un calo,  
 E per pì pena con scarpe impontie  
 Che convegnisse sempre stàr in balo,  
 Che tante baje? Che tante pazzie?  
 Voràve per un' ora comandar  
 E se in quest' ora no fesse le mie  
 Toria po' ben de pato, de crepar.





# POESIE

DI

MAFFEO VENIER.

## PROEMIO.

No ve maravegiè, sia chi se voglia,  
Che no abia usà una lengua più pontia,  
Che se Domenedio m' à dà la mia  
No vogio ch' una strania me la togia.

Sto scriver grave è un sfadigar da bogia,  
Ch' ognun ve vol tassar de longo via,  
Mi cussì scrivo la mia fantasia  
E, con licenza, incago a chi me sogia.

Sta nostra lengua sa d' ogni saor,  
Nè mè mo cerco de parlar toscan  
Dovendo per el più cantar d' Amor ;

Me vò dar gusto e no stentar da can,  
Compono per umor, no per onor,  
Che no voria pepar col mondo in man.

## LA STRAZZOSA.

### CANZONE.

Amor, vivemo tra la gata e i stizzi  
In t' una Cà a pe pian  
(E no vedo però che ti te agrizzi)  
Dove e la lume e 'l pan  
Stà tuto in t' un, la roca, i drapi e 'l vin,  
La vechia e le fassine,  
I puti e le galine,  
E mézo el cavezal soto el camin,  
Dove, tacà a un anzin  
Gh' è, in muodo de trofeo,  
La fersora, una scufia e la graela,  
La zuca da l' asèo,  
El cesto e la sportèla;  
E 'l leto fato d' alega e de stopa,  
Cussì avallo che i pulesi se intopa.  
In pe d' un papagà se arlieva un' oca,  
In pe d' un cagnoletto  
Gh' è un porcheto zentil che basa in boca,  
Vezzoso animalèto,  
Soave compagnia, dolce concerto!  
L' oca, la gata, e tuti,

La vecchia, il porco, i puti  
 Le galine, el mi' amor sot' un covertò,  
 Ma in cento parte avertò,  
 Onde la Luna e 'l Sol  
 Fa tanto pi' la casa aliègra e chiara  
 Come soto un storiol  
 Sconde Fortuna avara  
 Una zogia, una perla in le scoazze,  
 Un' estrema belezza in molte strazze.  
 El concolo del pan stropa un balcon  
 Che no ha scuri nè veri,  
 Magna in pugno ciascun co' fa el falcon  
 Senza tola o tagieri;  
 Stà la famègia intorno a la pignata  
 A aspetar che sia coto;  
 Ognun beve in t' un gotò,  
 E tuti sguazza a un bezzo de salata.  
 Vita vera e beata!  
 Un linzuol fà per sie  
 Che da un dì a l' altro è marizà dal fumo:  
 Man, teste, brazza e pie  
 Stà in t' un, tuti in t' un grumo,  
 Onde se vede un ordene a grottesche  
 De persone, de bestie e de baltresche.  
 In Casa chi xe in camera xe in sala,  
 Chi è in sala è in magazen,  
 Gh' è nome un leto in t' una sotoscala  
 Dove in brazzo al mio ben  
 Passo le note de dolcezza piene;  
 Seben la pioza e 'l vento  
 Ne vien talvolta drento  
 A rinfrescar l' amor su per le rene.  
 Note care e serene!  
 Caro liogo amoroso!  
 Beltà celeste in povera schiavina!  
 Togia un leto pomposo  
 Chi ha drento una Gabrina,  
 Chè fa in lù quel' efeto un viso d' orca  
 Che in bela cheba una gazola sporca.  
 In sta Cà benedeta e luminosa  
 Vive poveramente  
 Sta mia cara d' amor bela Strazzosa;  
 Strazzosa ricamente,  
 Chè con pi' strazze e manco drapi intorno  
 Pi' se descovre i bianchi  
 E verzèladi fianchi,  
 Com' è pi' bel co' manco nicole el zorno.  
 Abito tuto adorne

Sora perle e rubini,  
 Sora beltà che supera ciascuna!  
 Qual se fra do' camini  
 Se imbavara la Luna  
 Che luza in mezo, tal splende la fazza  
 E i razi de custia fra strazza e strazza.  
 A sta beltà ste strazze ghe bisogna,  
 Chè no se diè stroparla.  
 S' ha da covrir de drapi una carogna  
 Che stomega a vardarla,  
 Ma quella vita in st' abito resplende  
 Senza industria e senz' arte,  
 Mazenga in ogni parte,  
 Che nè lussi, nè veli el belo ofende.  
 Carne bianche e stupende  
 Al ciel nude e scoperte!  
 Per pompa de natura, poverete,  
 Andè a sto muodo avertè  
 O colo o spale o tete,  
 Chè no se taglia un guanto ov' è l' anelo  
 Se no perchè è pi' bel questo de quello.  
 Che drapi poria mai, se i fusse d' oro,  
 Covrir s' bei colori  
 Che no i fusse un leame in t' un tesoro,  
 Un fango sora i fiori?  
 Va pur cussù, chè sta umiltà te inalza;  
 Va, povereta! altiera  
 Cussù co i pie per tera,  
 Chè ti è pi' bela quanto pi' descalfa.  
 Com' el Ciel me strabalza  
 A una bellezza estrema  
 In t' una casa che no gh' è do squele!  
 Providenza suprema  
 Del Cielo e de le Stele,  
 Che xe andà a catar fuora do desperi  
 Per unir le so' strazze co i mi versi!  
 Strazze mie care, onde ho revolto el cuor,  
 Dolce strazze amorose,  
 Finestre de la grazia, occhi de amor,  
 Strazze fodrae de riose,  
 Chè se vede spontar tra lista e lista  
 Fuora da quei sbregoni  
 Quatro dea de galoni  
 Che traze lampi che me tiol la vista!  
 Fia mia, chi no te ha vista  
 Xe un omo mezo vivo;  
 Chi te vede e no muor xe un zoco morto;  
 E mi, che te descrivo,

So che te fazzo torto,  
 Che te tanso la gloria e te defraudo,  
 E te stronzo l'onor pi' che te laudo.  
 Podess' io pur, con darte la mia vita,  
 Trovar pi' lingue a usura,  
 Chè la mia sola a una beltà infinita  
 Xe piccola misura!  
 So che no digo gnente a quel che lasso,  
 Ma quel puoco che intendo  
 El mesuro, el comprendo  
 Co' se misura el Ciel con un compasso.  
 In sta bellezza passo  
 La mia vita contenta,  
 E trovo salda fede in veste rote;  
 Mi no ho chi me tormenta  
 Nè el zorno nè la note;  
 Ghe xè un voler e un'anema in do peti,  
 Cosse che ghe n' à puoehe in molti leti.  
 Cerchè, Done, d'aver laghi de pianti,  
 Refoli de sospiri,  
 E sempre avanti eserciti de amanti;  
 Formè niovi martiri,  
 Nudrive cento diavoli in t' i occhi  
 Che tenta i cuor contriti;  
 Cerchè che mile affiti  
 Ve se vegna a butar morti in zenochi:  
 Amor, sti me infenochi  
 Mai pi', frizeme alora,  
 Che te parechio la farina e l'ogio.  
 Questa è la mi' Signora,  
 La me vuol, mi la voggio;  
 No gh'è qua da arabiar nè da istizzarme;  
 Chi vuol giera d'amor se meta in arme.  
 Canzon mia repezza,  
 Sti è per sorte represa, e ti reprimi  
 Chi te reprimderà;  
 Mostra che ti la intendi,  
 E di', che sti no ha drapi de veluo,  
 Che quel ch'è Dio d'Amor va sempre nuo.

## PER UNA FANCIULLINA.

Anzoleta del Ciel senza pecà,  
 Sorelina d'Amor mia picolina,  
 Che con sì pura mente e fantolina  
 Ti à 'l Ciel dei to' zogheti inamorà;

Sia benedeto chi t' à costumà  
 Pura colomba bianca e molesina,  
 Sia benedeta quela grazietina  
 E quel caro viseto inzucherà;

Benedetti i gestini e le cianzete,  
 Che a chi le sente se ghe cava el cuor  
 Co' se fa de un melon spartido in fete.

O Mare, o Pare, o Nena, o Dio d'Amor,  
 O Stele, sieu pur sempre benedete  
 Che no ghe avè mancà d'ogni favor.

## PROTESTA DI AMORE.

V' amo, fia, quanto posso, epur no v' amo  
 Con tuto questo quanto che vorla;  
 E no posso dover co' doverla,  
 Che a quel che vu se' degna, ve disamo.

Mo chi no vorla amar misero e gramo  
 Quanto che pol bramar la fantasia?  
 M' à sì possù sta ardente voglia mia  
 Che pol pi' l' meritar, che quel che bramo.

I meriti che avè va sora el Cielo,  
 E se ghe molo drio sta voglia grama  
 La par un calalin drio d' un stornelo.

Possio restar però che mi no v' ama?  
 Anzi, cuor mio, per mio mazor flagelo  
 Quanto è manco 'l poder cresse la fiamma,

## NOTTE DI PATIMENTI

Tra la rabia, la stizza e tra 'l martelo,  
 Tra i pulesi che m' à martirizao,  
 Tra 'l caldo che m' à mezo sosegao,  
 Tra l' esserme alzà su in tel più belo,

Tra l' averme becà fin el cervelo,  
 E tra mile e più sorzi sora el cao  
 Che me roba el stopin ben impizzao,  
 E tra 'l cantar d' un strepitoso oselo,

Tra 'l vegnirme una voglia de pissar  
 E aver paura de no far romor,  
 E là star fermo a costo de crepar,

Tra 'l star col naso sora el cagaor,  
 E tra 'l longo aspetar, fin de cagar!  
 Oh che note che ò bu da imperator!

## LA FELICITÀ.

Dal nasser tuti à el cancaro che i magna,  
 Tuti à el so' propio umor da la so' sorte,  
 Chi teme, chi desidera la morte,  
 Chi ride del continuo e chi se lagna;

Chi brama dominar monte e campagna,  
 Chi seguita e chi fuge onori e Corte;  
 Chi cerca per vie drete e per vie storte  
 Che 'l so nome drio lu vivo romagna;

E fin che un no se cava un appetito  
 No l' à mai ben; e se 'l sel cava po'  
 El va col desiderio in infinito;

Gramo colù, se 'l mondo fusse so',  
 Se 'l sarà in l' ozio e in l' ingordisia fito.  
 Felici quei che un agio ghe fa pro!

## IL PERDONO.

Se da rabia, cuor mio, se da martelo  
 Digo a le volte quel che no voria,  
 L' è che vien in amor tal frenesia  
 Che volta cussì el cuor, come el cervelo.

Se no ardesse per vu, musin mio belo,  
 Se stesse ben no me lamenteria,  
 Savè ben co' volè, colona mia,  
 Se me fè deventar come un agnello.

Perdonè qualche volta al mio dolor,  
 Se me fe disperar più che no voggio,  
 Che no so mi, l' è 'l spirito d' Amor.

Dio sa se pur son gramo! e se me dogio,  
 E se me affise mortalmente el cuor  
 El vostro sdegno più che 'l mio cordogio.

## IN LODE DI MADONNA SANTINA.

## CANZONE ALLE MUSE.

O vu, che stè là suso  
 In cima del Parnaso,  
 Conzème un poco el muso  
 Dè de l' aqua al mio vaso;  
 Dème dei versi,  
 Fème tanto favor  
 Che possa del mio amor  
 Cantar le parti bele  
 Sì che ghe n' abia invidia anca le Stele.  
 Vu fè le scorozzose,  
 E sì no respondè,  
 Perchè no se' vezzose  
 E bele, come xe  
 Questa Santina.  
 La è tuta fiamma e fogo,  
 La brusa in ogni logo,  
 Ogni aspro cuor la impiaga  
 E de la mortè mia l' è sempre vaga.

Ma per farve despeto  
 La scomenzo a lodar;  
 Forsi che dal sugeto  
 Me sarà dà el cantar,  
 E farò veder  
 Còh vostro dano e scorno  
 Che 'l Sol a mezo zorno  
 No luse e scalda tanto  
 Come custia che me resolve in pianto.  
 Custia porta i caveli  
 Che i fa vergogna a l'oro,  
 Cussì aneladi e beli  
 Ch' i par un bel lavoro  
 De qualche Orese  
 Ch' abia la so' botega,  
 Co la fazzada intrega  
 E le colone piene  
 De aneli, de manini e de caene, .  
 La ga la bela fronte  
 Tuta bianca e lusente,  
 L' è d'alabastro un ponte  
 Dove monta la zente.  
 E 'l Riso e 'l Ziogo,  
 Le Grazie e i Amoreti  
 Con ben mile straleti  
 I fa guera de legni,  
 Che rapisse a mirarla i cuor più degni,  
 I ochi no xe fogo,  
 Ma xe chiari splendori  
 Che ilumina ogni liogo  
 Che aviva tutti i cuori,  
 Perchè la xe luse  
 De l' anema che informa  
 Quela legiadra fonna  
 Donada a nu dal Cielo  
 Per ralegrar ognun col so modelo.  
 Le galie (88) po xe riose  
 Cussì odorose e bele  
 Che le altre resta ascose  
 A paragon de quele;  
 E se talvolta  
 Le xe un poco più rosse,  
 Amor co le percosse  
 Da burla sì le à toche  
 Per invidiarne i basi a mile boche.  
 Quella bocà amorosa,  
 Dove che Amor gh' à messo  
 Quanta dolcezza ascosa

A' Elicona e Permesse,  
 Ela xe fata  
 De perle e de rubini,  
 E ga certi acentiri  
 In tel so rasonar  
 Che liga i cuori che no i pol scampar.  
 O boca benedeta  
 Refugio dei mii mali,  
 El mio cuor a stafeta  
 Core tra i to' corali,  
 E là felice  
 El viye alegramente  
 Seguro de la zente,  
 Lassando el corpo esangue  
 Che per colpa d' Amòr xe tuto sangue.  
 Soto la boca pende.  
 Quas' in mezo a un bel monte,  
 Fosseta che se rende  
 In mezzo a quel un fonte,  
 O veramente  
 Una grota che ascoso  
 Tien Amor scorozoso,  
 O cassa, ove liogai  
 Stà i cari sguardi che ghe vien donai.  
 Ma no vogio più dir  
 De sta bela Santina,  
 Che no se pol finir  
 Da sera a la mattina;  
 E mi son fato  
 De cigno una vil oca,  
 Nè pol questa mia bocca  
 Zamai tanto lodarla  
 Che no vegna po' dopo a defraudarla.  
 E vu, mio Sol, che in tera  
 Per sempre me fè luse,  
 No me fè tanta guera,  
 Acetè le mie scuse,  
 E credè certo  
 Che fazzo più che posso,  
 Daspò che ve cognosso,  
 Per poderve lodar  
 E sora tutte l' altre celebrar.  
 No ghe n' è de sì bele  
 Che no le para ancroie,  
 Vu se' un Sol fra le Stele,  
 Ungento a le mie dogie,  
 Per vu son fato  
 El più felice amante

Che sia da qua in Levante:  
 E ch'abia da esser mai,  
 Credendo esserve in grazia pur assai,  
 Orsù, cuor mio, ve lasso  
 E torno a le mie pene,  
 Perchè son Tizio al sasso  
 Revolto in le caene.  
 Co po ve vedo,  
 E no posso vegnir  
 Da vu a farne sentir,  
 Certo no ghe xe al mondo  
 Dolor del mio più grande e più profondo.  
 Canzon, va dal mio ben  
 E di che 'l vegna presto  
 Se no el fogo ch'ò in sen  
 In mi farà del resto;  
 Perchè mi stimo  
 Sto mondo bagatele  
 Senza de le so' Stele,  
 Che per ele son vivo  
 E senza d'ele son d'anema privo.

## IN MORTE D'UN CAGNOLETTO.

Ah povero animal, cara bestiola,  
 Mi non gavea altro ben che nel to' aspeto,  
 Morte t'è tiolto afin che per dispeto  
 Drio de ti me impicasse per la gola.

Un Can che stava sempre con mi a tola  
 E che dormiva nel mio proprio leto,  
 A' piasso a la mia Stela, al mio Pianeto  
 Che faza sta restante vita sola!

No so come l'intenso mio dolor  
 No m'abia fato che ghe mora drio.  
 Quanto al pensarlo me se spezza el cuor!

O gramo al mondo, misero Mafio,  
 Oh sorte, oh Ciel, che me podeu più tior  
 Per cavarve la sè del fato mio?

## LA PROVA D'AMORE.

Che mi abia da morir senza aver visto .  
 La causa per la qual son condanà,  
 Ch'abia da essere ogni dì mostrà  
 A deo per un gagliofio, o per un tristo?

E che senza poder mai far acquisto  
 Sora de vu d'un deo de autorità,  
 Dal fachin, dal vilan sia strapazzà  
 E che non gabia mai d'esser provisto?

Fia, le xe cosse da no star al segno,  
 E ghe n'incago a Amor in tel mustazzo  
 Se queste xe le legi del so regno.

Me voleu ben? vegnime un poco in braccio,  
 Che mi no credo più se no col pegno,  
 E bestia è quel che stenta per solazzo.

## L'INUTILE SERVITU'.

Colù che per servir crede a castia  
 Cavarghe da le man qualche favor,  
 Lu no sa se 'l canal abia saor,  
 Se la Luna sta ferma o 'l Sol va via.

Questa, che proprio xe la bizzaria,  
 La miniera dei sest e de l'umor,  
 Darà per servitù, per versi, amor?  
 La ghe darè 'l malan che Dio ghe dia.

E mi son sì balordo e sì bufon  
 Che a despeto d'ognun vago corando  
 Dove stà la disgrazia in zenochion?

E no me acorzo che viver amando  
 Sta dona se xe giusto a condizion  
 De chi per arichir vive stentando?

## L'AMANTE UNICA.

Se s'acordasse in Ciel ciascuna Stela  
De meter le so' forze ai nostri di,  
E meter tuto quel che le pol pì  
Per formar una Venere novela,

No saria mai che me piasesse quela  
Tanto co' è questa ch'ò depenta in mì;  
Mai cercaria ciò che la fusse in sì,  
So ben che in mì no la saria più bela.

No posso far sì lucido conceto,  
Che apresso al Sol che luse al mio pensier  
Ogn' altro no me para un feraletto;

No 'l posso far, e no vorìa poder,  
Fia, no credè ch' altri che 'l vostro ogeto  
Me daga maravegia nè piaser.

## IL SOGNO.

O' quel serpente de la zelosia  
Che m' à butà in le vene el so' velen,  
Che se vedo un osel sora 'l miò ben.  
Temo che infina lu mel porti via.

Amor, che vol mo darmela compia.  
Fa spesso che in insonio ela me vien,  
E me par de vederla a un altro in sen  
Nemiga sì che la scortegaria!

La me par impegnà per questo e quello,  
E chi po' xei? rivali e mii nemighi  
Che gode del so' ben, del mio martelo.

No basta che vegiando ò tanti intrighi,  
No basta che custia no ga cervello  
Che ò, per zonta, al dormir de sti castighi.

*Racc. Poes. Ven.*

## LA FAME.

Songio mì, Amor, quel servidor de dame?  
Songio mì, Amor, quel che brusava tuto?  
Songio quel mì per ti cussì riduto?  
O songio un resanà che mor da fame?

Dove xe la to' forza e le to' fiamme  
Che m' aveva sti dì sì mal conduto?  
Va, le fica in t' un pan, o in t' un persuto,  
Se ti vol che mi torna al to' reame.

Del resto fame usar tuti i to' trati,  
Fa ch' abia mile, se no basta un sguardo,  
Che mai levarò el cuor zo de sti piati.

Va pur, e meti in semola el to' dardo,  
Che per adesso son co' xe quei gati  
Che lassa el sorze per magnar el lardo.

## LETTERA A MADONNA.

## TERZINE.

Amor sia ringrazià! Magno i me' pasti,  
Dormo dies' ore avanti che me volta,  
Nè teme i me' riposi altri contrasti.  
Credo, Signora, che caghè talvolta,  
Che inanzi nol podea darmel da intender,  
Aldo chi parla, e parlo a chi me ascolta.  
Se ò da far qualche ben ghe posso atender,  
Le gambe no me porta ove xe l'uso,  
Nè go più da istizzarme o da contender,  
Nè credo a mile ingani, a mile scuse;  
Co se diè rider no me vien l'umor,  
No xe messe a coroto le mie Muse.  
Posso far a mio modo del mio cuor,  
Nè cerco tosseggar più i me' rivali,  
E a mala pena ve son servidor.

No fazzo più discorsi su i segnali,  
 Nè fazzo più comentì sora i sguardi,  
 Nè noto le mie pene e i vostri fali.  
 No me despero se ve vedo tardi,  
 E se no ve vedesse nè anca mai  
 No voria insanguinar saete e dardi.  
 No vago solo in lieghi retirai,  
 No son soto la mistra che me daga  
 O qualche sparaman o dei cavai.  
 Qualch' altra Dona adesso me par vaga,  
 Che inanzi ognuna me pareva una piaola;  
 O' averti i ochi e ò serà la piaga;  
 E no me levo, co' fava, da taola  
 Per trar un plato a un gramo cagnoletto,  
 Nè coro drio a la gata co la signaola.  
 I vostri cefi no me fa despeto,  
 No me invaghisso a celebrarve più,  
 No me sento a morir col star secreto.  
 Do bone zanze no me tira su,  
 Un brutto viso no me fa meschin,  
 Stago col mio cervelo e no con vu.  
 Co bevo no sospiro po' in tel vin,  
 Co parlo vardo in viso i Cristianì,  
 Nè tremo tuto co' ve son vicin.  
 No tegno più botoni d' ambracani,  
 No cerco più d' aver vostri colori,  
 No porto insegne più de pensier vani;  
 Nè son più fra speranze e fra timori,  
 Nè go fede de azzal, sdegni de vero,  
 Nè son rabioso in Cà coi servidori.  
 O' adesso quel che bramo e quel che spero,  
 Nè me va el desiderio in infinito,  
 Nè me dà pì martel Polo che Piero.  
 Me cavo adesso mi qualche appetito,  
 Fazzo sì che sto corpo à el so' dover,  
 Nè lezo mile volte un vostro Scrito.  
 In soma mi no provo un dispiacer,  
 E dei solazzi me dago tanti  
 Che m' avanza la carne sul tagier.  
 Musa sorela, ò dito tropo inanti,  
 Dio voglia che no menta per la gola,  
 Che sto bravar no se resolta in pianti,  
 E che me sia un pugnàl ogni parola!

## A MADONNA

CHE AMMAZZA IL PORCO.

Signora mia, vu manizè per tuto  
 Drento a sto porco infina a le buele;  
 Donca per far salsizze e mortaele  
 Vu ve degnè d' un animal sì brutto?  
 E a mi che son per vu morto e distruto  
 No m' avè mai tocà gnanca la pele?  
 Forsi che lu per quele man sì bele  
 S' à senti mai d' amor caldo un persuto?

Orsù, s' amazza el porco, e mi son morto  
 Mile volte per vu, ma ingiustamente,  
 Che lu muor a rason, mi moro a torto;

Lu tutavia vel tigni sempre arente,  
 E mi no go mai avù nissun conforto  
 De sì longo servir con tante stente!

## LA MANCANZA DI ARDIRE.

Quanto tempo s' aspeta un' alegrezza  
 Che apena l' è vegnuva che l' è partì!  
 Oì mai provà meschin d' una ricchezza  
 Che me fazza star ben intiero un di?

Volse custia, dopo tanta fierezza,  
 Al fin avere compassion de mi,  
 Ma a l' infinita mia dolcezza  
 Me manca quel che m' importava pì.

Se ghe son stà vicin perso ò l' ardir,  
 Persa presso al mio ben ogni possanza,  
 Quasi ferio che staga per morir!

Ch' òi più da far del viver che me avanza  
 Se è vegnù quel che no dovea vegnir  
 Per tagiarne a traverso ogni speranza?



## L'AMORE SENZA COMPENSO.

Oh quante volte al dì son un lion!  
 Oh quante volte al dì son un agnel!  
 Quanto m'inalzo col pensier al Ciel,  
 E po me lasso andar zo a tombolon!

Oh quante volte niego la rason  
 E fazzo l'apetito mio fradel!  
 Quanto stago in amor pocò in cervel!  
 Quando possio saver mai quel che son?

Oh quanto spesso bramo nè so che,  
 E quel co so che l'ò nol voria aver,  
 E co' ghe nè son privo ardo da sè!

Oh quanto un sguardo sforza el mio voler!  
 Quanto ò el cuor pien de miel e d'aloè,  
 E in quanto mal gh'è un poco de piacer!

## LA RISOLUZIONE.

Vu savè pur se xe do' mesi e più  
 Che vegno, a vostra istanza, ogni dì qua;  
 Vu savè pur se son innamorà  
 E s'amo Fia più bela altra che vu.

Vu savè molto ben se ve ò vogiù  
 Più ben a vu che a chi ve à generà;  
 Savè se quando m'avè comandà  
 Mi son levà de meza note su;

E adesso mo che ve domando, che  
 (E tuto quanto el zorno ve son drio)  
 Amè el vostro meschin, vu mel neghè?

Ben, za che no ve curè del fato mio,  
 E che tanti mi preghi no stimè,  
 Mi ve n'incago, e sì me cazzo in rio.

## COMPARAZIONE DI PENE IN AMORE.

Mai fica marangon tante brochete,  
 Nè barbier taglia mai tanti cavei,  
 Nè triper roversa mai tanti buci,  
 Nè scaleter fa mai tante scalete,

Nè miedego à ordinà tante ricete,  
 Nè filatorio à bu tanti rochei,  
 Nè tanti drapi à vendù mai i ebrei,  
 Nè sartor cusio mai tante stafete;

Nè pedanti dà mai tanti cavai,  
 Nè spicier fati mai tanti siropi,  
 Nè nodar scriti mai tanti strumenti,

Nè in Muran fati mai tanti orinai,  
 Nè in mile case ghe xe tanti copi  
 Quanti ò per vu, cuor mio, pene e tormenti.

## A BARBARA CONTESSA DI SALA.

## CANZONE.

Dona, pompa del Ciel unica e sola,  
 Se non ardesse per vu  
 Bisogneria picarme per la gola,  
 Za che in vu sola vedo  
 Quel ch'in tute le altre apena credo.  
 Meto pegno col Ciel, s'el mete su,  
 Ch'el no ve pol dar più,  
 E s'el volesse ben, el no poràve.  
 Che con un'altra streta el falirave.  
 Colombina d'amor, pura anzoleta,  
 Mo se vede pur che  
 Le Grazie tute tre  
 Ve zioga sul bel viso la zoeta;  
 Che mile Amori cari e pichenini  
 Ve fa sempre in t'i occhi i matazzini.  
 Dona, dolce mio fogo ondè me scoto,  
 Sol che fa parer l'altro un candeloto.

Che me faravè l'esser vegnù al mondo  
 Cq no ve avesse visto?  
 L'aver i occhi, e star in t'un profondo  
 Confinà in t'un Forte  
 Ove 'l Sol mai ne varda e el dî co 'l core!  
 La perdita è magior co' no è l'aquistò.  
 Mi sempre stago tristo  
 Senza vu, Sol, al scuro  
 Nè a fissarme in vu no me asseguro.  
 Pur quanto posso ancora vôi vardarve,  
 Che sora d'ogni altro ben  
 L'è aver la sorte in sen  
 Nel poder qualche poco contemplarve.  
 Quando abia dal ciel oro o reame  
 È un cavarme la se quando che ò fame,  
 E quanto ben pol darne ogni Pianeto  
 El daria, senza vu, per un marcheto.

El resto xe una fezza, una cala,  
 Tut'è un'avanzaura,  
 E vu sola se' il fior de drento via.  
 Per farve bela el Cielo  
 Tiolse el lambico, e fe' colar per elo  
 Quante grazie l'avea con gran fatura  
 Per man de la Natura;  
 E levà via le tare,  
 L'è empì d'esse la panza a vostra mare.  
 Quel pì che gh'è avanzà pien de difeti  
 El lo fa dispensar,  
 Cussì co' se suol far  
 La fava ogn' ano a i grammi, ai povereti.  
 El vostro esser vu sola al mondo rica  
 Fa sì ch'ogni altra è povera e mendica;  
 E questo xe el respeto chè ve adoro,  
 Che me voria far rico a sto tesoro!  
 E se nò rico, aver tanto del vostro  
 Ghe possa comparir  
 Ste carte ben rigae de bon inchiostro.  
 Voràve iluminarme  
 In vu purchè podesse arisegarme;  
 Ma la gran luce no se pol sofrir,  
 E me sento sbasir.  
 Son co' xe un orbo al fogo  
 Che no ghe vedo e sento che me sfogo!  
 Ma benedeto sia tuto 'l calor,  
 Benedeto chi 'l manda,  
 Che 'l cuor l'è per vivanda  
 Daspuò ch'el vien da cussì gran splendor!  
 Ve luse tanto l'anema da tanti

Razi, che me seguro aver davanti  
 Tute le Sinagoghè dei Ebrei  
 Carghe in ogni canton de cesendei.  
 Anema più che 'l Sol bela e vistosa  
 Che val più che no val  
 Qual se voglia ricchezza preziosa,  
 Anema a l'età nostra  
 Che un ben de paradiso insegna e mostra  
 Sarà quasi da un lucido cristal  
 Che, come da un feral,  
 Manda i so razi fuora  
 Che ilumina la zente e che inamora.  
 Là, su quei razi tuti tre s'acorda  
 Amor, e'l Ziogo, e 'l Riso,  
 E ve vien zo dal viso,  
 E va in su co' va el Turco in su la corda.  
 Spesso i tiol da quei razi e se fa frezze  
 Che ben ch' i passa el cuor i par carezze,  
 E un'armadura a bota d'archibuso  
 No i segnaria che no i ghe fesse un buso.  
 Ma tra l'altre virtù vostre infinite  
 La cortesia resplende  
 Mazor de quante se ne trova scrite.  
 E qual altra se pol  
 Meterse de chiarezza al par del Sol?  
 Benchè sto mio cervel no la comprende,  
 Ch'esso tanto l'intende  
 Co'sol far un vilan  
 Le bagatele che fa un Zaratan.  
 Ela è infinita e 'l mio pensier no tira  
 A pena mezo braccio;  
 Ma fe' conto che fazzo  
 Co fa chi tiol lontan luse de mira;  
 Ch'un fogo par de cento e più fassine  
 Una de ste candele picenine;  
 No che no sia la fiamma grande e viva.  
 Ma l'occhio, povereto, no ghe ariva.  
 Questa no lassa mai se la no strazza,  
 Questa è cola de pesse,  
 Tut'el resto è petà co la spazzza.  
 Questa sta ferma drento,  
 Stabile a furia de tempesta e vento.  
 L'altre to' frezze, Amor, chi le vedesse  
 Xe tute cane fesse;  
 Questa no ga contesa,  
 Questa se fa piasevole ogn'impresa,  
 Qual è la vostra propria acompagna  
 Da parte sì eccelente,

Da un discorso eloquente,  
 Da giudizio, da grazia, e da onestà ?  
 Oh Dona, vaso d'oro prezioso,  
 Pien de tuto quel ben che 'l Ciel tien scoso,  
 Co' vardo in quel bel viso, in quella ciera  
 O' 'l cuor in paradiso e i ochi in tera!  
 Vu m'avè fato d'una rana un cigno,  
 D'un porco un armelin,  
 Che co' vedo del fango o salto o sbigao.  
 Adesso ch'è el ritrato  
 De quel viso in t'el cuor santo e beato  
 I mii pensieri à nome per so' fin  
 El so' splendor diviu ;  
 Tuti xe in zenochion,  
 Tuti v'adora con devozion,  
 E tutti stà con maravegia intorno,  
 E dise : Se qua zo  
 S' à sto ben, qual è po'  
 Quel co' no s'abia sto bernusso intorno ?  
 Oh quanto devo a sta virtù infinita  
 Che 'l mio inzegno per ela à luse e vita!  
 Mi che son un minchion disgrazià  
 A che gloria, a che ben songio arivà ?  
 Musa, l'è tempo de tirarse in porto ;  
 Ti è in t' un mar infinito  
 Co sto batel desfìto  
 Governà da nohier sì mal acorto.  
 Te baste co sta barca sì meschina  
 Aver pizzegà i ori a la marina.  
 Stì vedi el mar che possa segurarte  
 Ti potrà un'altra volta più slargarte.

## LE BELLEZZE DI MADONNA.

Certi càvei rizzeti inanelai,  
 Negri com' un veluo negro de pelo,  
 Ornamento d' un viso cussì belo  
 Co' se possa a sto mondo veder mai ;

Un per d'ochi assassini che fa assai  
 Chi scampa via senza lassarghe el pelo,  
 Denti po', lavri e boca, e tuto quello  
 Che pol far desmissiar i indormenzai,

Ma quel che avanza el resto è certa gola,  
 Che, su la fede mia, da quel che son,  
 La val un pezzo d'oro quella sola.

E vita e drapi e disposizion  
 E grazia in ogni gesto e ogni parola  
 Che ve par d'ascoltare un Salomon,  
 No m'abiè per minchion,  
 Che vòl più presto un sguardo da custia  
 Che 'l gran tesoro de la Signoria.

## GRANDE OSSERVANZA IN AMORE.

La beltà, la virtù, la cortesia  
 Che ò visto, vita mia, nome in vu sola  
 Me tien picà talmente per la gola  
 Che ò l'anema in tel sen tuta smaria.

E perchè me se' al cuor tuta scolpia,  
 E più ficà che no xe groppo in tola,  
 Mi go perso la vose e la parola  
 Per vu propria e vera anema mia.

Un potente pensier xe stà el penelo,  
 Amor el mistro, e sasso fu 'l mio cuor,  
 E 'l saldo mio dolor duro martelo ;

E mi, che ò mo dal Ciel tanto favor,  
 E che vedo un ritrato cussì belo,  
 Onoro in la mia Stela el Dio d' Amor.

## IL LAMENTO.

Son come xe talun ch'è roto in mar,  
Che daspò una tempesta, una rovina,  
Su un pezzo de antèna o de carina  
El se mantegna vivo col nuar.

E daspò del patir e del stentar,  
Zonto a forza de brazzi a la marina,  
Vardando ben la vita soa meschina  
El se mete rabioso a biastemar;

Nò perchè l'è salvà da l'aque san,  
Ma perchè daspò aver mile tormenti  
Scorsi per guadagnar, l'è guente in man.

Cussì anca mè. Daspò aver mile stenti  
Passà per guadagnarve, assae lontan  
Me trovo da quei chiari ochi lusenti.

## IL VERO AMORE.

Come d'una cigala o una gazuola  
Resto un' oca o un aloco in un momento!  
Mi che soleva aver cianze per cento  
Sto un' ora a mendicar meza parola.

No se pol rampegar su per la gola  
Le pene, nè 'l dolor che sento drento,  
Son giusto come un putò malcontento  
Se 'l vien chiapà a ziozar dal mistro in Scola.

Cussì davanti a quella luse viva  
Milè rason che avea prima sì pronte,  
Reverenza e timor le retegniva;

Allin conversi l'una e l'altro in fonte,  
In liogo de la ose, me vegniva  
Le parole bagnae fuora dal fronte.

## LA DICHIARAZIONE.

Colona mia, per do' o tre volte sole  
Che l'altra sera m'avè tolto su  
Mi me son tanto inamorà de vu  
Che vago tuto in aqua de viole;

E per no starve a far tante parole,  
Per no starve mo a dir, che un poco più  
Son squasi morto al gran martel ch'ò abù,  
Co' fa sti inamorai che va in do' siole;

Se vu volè che sia vostro moroso,  
Son aponto per vu, son tuto gagio,  
Vu averè certo un zovene vistoso,

Un omo po', che quando vogio vagio,  
Un zovene a la fine vertudioso;  
E se vu nol credè, tiolème a tagio.

## LETTERA A MADONNA.

Questa è la quarta Letera che scrivo  
Despuò che son sortio da la Laguna,  
Nè so se infermo o san, se morto o vivo.  
E vu, freda e crudel più de la Luna,  
No respondè a le mie, no tegnì conto,  
Ma fe ziogo del tempo e de fortuna.  
Gavè rason, me cognossè ben onto  
Del vostro amor, e se' resolta forsi  
De volerme sta volta far el conto.  
Pazienza! la stà a vu; certo che i orsi  
Averia del mio mal misericordia,  
Nè voria morsegarme i cani Corsi.  
No son, come credè, forsi a Concordia,  
Ma in la bela Città deta Vicenza  
Dove no gh'è altro mal che la discordia.  
Mi son senza danari e pase, e senza  
Chi vogia aver pensier del mio gran mal,  
Senza vin in la bote e pan in crenza.

Certo sta meglio quei de l' Ospeal,  
 Che almanco ghe va el miedego ogni zorno  
 A vardarghe in la sechia e l' orinal,  
 E mi, lontan dal vostro viso adorno,  
 No trovo chi remedia a tanto ardor!  
 Paro a ponto la cenere del forno.  
 El mio mal xe ficà drento del cuor,  
 Nè 'l pol conosser altri mai che vu,  
 Causa eficiente del so gran brusor!  
 Oh Dio, no xe, no sarà mai, no fu  
 Tanto mal co xe 'l mio, nè altra bellezza  
 Che vaga co la vostra tanto in su;  
 Sicome no ghe xe tanta fierrezza  
 In quante tigre manda l' Oriente,  
 Nè in altro, co xe in mi, tanta fermezza.  
 Quando che me trovava esserve arente  
 Pareva pur che avessi compassion,  
 E che tegnissi conto de la zente;  
 Adesso che ve prego in zenochion  
 Che me mandè do righe a destuar  
 El fogo che me brustola el polmon,  
 Vu fe' la gonza, e sì ve fe' pregar,  
 Fe' vista no aver rechie e gon intender  
 De un meschin confinà l'alto crier!  
 Ma chi no à bezzì no ghe ne pol spender,  
 E chi no sa che cosa è cortesia  
 No la sa usar e no la sa comprender.  
 Ghe ne xe de sta vostra fantasia  
 De l'altre, e se le à refudà un par mio  
 Per un vilan le s' à po' trato via.  
 Vardè, che se sol dir che no è finio  
 El zorno se no a sera; e i nostri fati  
 No se dise sul viso, ma da drio.  
 Vien notai da sto mondo i nostri ati,  
 E co pensemo d'esser Salomoni  
 E d'aver fato sempre dei bei trati,  
 Restèmo svergognai come minchioni,  
 Che quel che se pensava esser coverto  
 Lo sa po' fin i coghi e i sbrodegoni.  
 Ma vòl lassar da parte sto concerto,  
 Che no voràve che 'l me discordasse  
 Tolendome el seguro per l'incerto.  
 Me voleu a vu, belissime ganasse?  
 De la Dea che me priega e che me sgrafa  
 Chi gh'è che a quel color no s'inganasse?  
 Chi poderàve star in sela o in stafa,  
 Tegnir i pie ai colpi de quei ochi?  
 No se resisteria su una zirafa!

Mi casco sempre, e se ghe n'è de tochi  
 Dai colpi de quei ochi i è cuss' ofesi  
 Che no i pol caminar se no in zenochi.  
 Ochi cari, amorosi, ò per vu spesi  
 Tanti passi al mio tempo e trato via,  
 Per contentarve, setimane e mesi!  
 Che se bon per disgrazia mo son, via  
 No doveressi tiorme a mi i favori  
 Donando ai altri quel ch'è parte mia.  
 Soporterò, lagrimerò i me' amori,  
 E canterò la mia disavventura  
 Fin che vorà che pianza i me' mazori.  
 Ma se sta ingrata, se sta sorte dura  
 Se mua mai de camisa, oh fazzo viso  
 Che se possa chiamar bona ventura!  
 Me vedarè sborir a l'improvviso  
 Dal liogo dove son sta bandizà  
 Contra giustizia, e con ben poco avviso;  
 E d'un Tartaro o un Turco più istizzà  
 Farò veder al mondo che anca mi  
 O' al naço la mostarda e in panza el fià;  
 E a quei-che adesso ride farò sì  
 Che 'l ghe corerà zoso per la gola,  
 Che 'l no ghe tornerà suso mai pi.  
 Ma perchè ancora me retrovo a scuola  
 D'Amor, no vòl bravar, ma in penitenza  
 Tior ogni desfavor, ogni parola,  
 Perchè se aquista assae co la pazienza.

## PREGI DI BELLE DONNE.

O dito, digo, dirò fin che viva  
 Che no ghe basta zoventù o grassezza  
 A voler far da seno una bellezza  
 Che no gabia a gran pezzo chi l'ariva.

El caso è chiaro assai senza che 'l scriva,  
 Che per la principal ghe vol grandezza,  
 Ghe vol quel ochio ladro che ve spezza  
 El cuor, s'el fusse ben de piera viva.

Ghe vol certo profilo e lineamento  
 Ch'abbia proporzion e nobiltà,  
 Che non so che che bulega per drento.

Vu me dirè: la grazia mo gh'è là?  
 La grazia è parte ben de gran momento,  
 Ma la xe grazia no la xe beltà;  
     No zureràve za  
 Che bona fusse anca questa sola  
 De far che me mentisse per la gola.

## LA IMBECILLITA'.

Mi, che la darà marza a un zaratan,  
 Che ò dà le romanzine che se sa,  
 Che m'è sentio no solo quei de Cà  
 Ma la zente d'intorno un mio lontan;

Che adesso mi no gabia per le man  
 Do ciance, mi meschin, mi disgrazià,  
 Che m'averia più presto imaginà  
 Che me mancasse mille volte el pan?

Questi xe de i miracoli d'Amor,  
 Deventar muto innanzi del so' ben,  
 E parer da so' posta un orator.

Se no ò parole al ben co' se convien,  
 Ve podè ben pensar co' sta 'l mio cuor,  
 Crudel, che m'avè messo el fuoco in sen!

## LA LONTANANZA.

Aveva el cuor tra l'alegrezze e 'l riso  
 Quando soleva inanzi andar de fuora,  
 E quando che tornava, in mia malora,  
 Me pareva partir dal paradiso.

Adesso mo, che son via da quel viso,  
 Che me mete sul cao la dalaora, (89)  
 Maledisso dolente el ponto e l'ora  
 Che m'è da tanto ben, gramo! diviso.

Là l'aqua me pareva de cristal,  
 I campi che ridesse, e la Natura  
 Me fesse inanzi i ochi un carneval;

Adesso torbia me par l'aqua e scura,  
 E vedo quel che vedo per mio mal  
 Senza la cara angelica figura!

## L'INVITO.

Fia mia, viseto belo, inzucherà,  
 Daspò ch'è inteso che vegnì sta sera,  
 Son vegnù belo e son muà de ciera  
 Che paro proprio un persego monda.

Sia lode a Amor, daspò che 'l mio meza,  
 La mia corte, el mio orto, e la letiera  
 Poderà dir da seno e da dovera:  
 « Si che 'l nostro paron xe fortunà. »

Vegnì in bon' ora, caro el mio conforto,  
 E caso mo che me dessi l'impianto  
 Doman sentirè a dir: « l'amigo è morto. »

El desiderio che ò de vu xe tanto,  
 Che non vegnindo me faressi torto  
 E certo restaria col cuor infranto;  
     Son de miel tuto quanto  
 Daspò che ò abù da niovo che vu, fià,  
 Ve degnarè veguir in casa mia.

## LAMENTO DI UN TORNITORE.

## OTTAVE.

Posso ben dir da seno e da dovera  
 Che in me malora passo de qua via,  
 Che cussì come in prima no ghe gera  
 Prosperitae che passasse la mia,  
 Per amor to', mecanica bandiera,  
 Paro el corbame ordlo d'una galia,  
 E se no avesse cressù un pasto al zorno  
 Pareràve una gata seca in forno.

Me luse i ochi che paro intorbiao,  
 Me cola el naso e me pizza la testa;  
 Mo, co un vol ben el vien sì desdolao!  
 Pota! sto amor mo l'è la bela festa!  
 Un Strologo m'è ben pronosticao  
 Che per Done dovèa spigar l'agresta!  
 Ma i soldi, el baticuor e l'angonia  
 Che ti me dà, xe 'l manco mal che sia.

Mi che gera uso a far la vita in giava,  
 E no veder mai Done, Dio sa quando,  
 E co vedea un che se imbertonava  
 Ghe dea da gonzo la mare d'Orlando,  
 Adesso tuti quei che me sogiava  
 Zioga co mi a la bela de remando.  
 O' sogià i altri un tempo da scaltrio,  
 E adesso ognun ride del fato mio,

M'è inamorà pensando che se fesse  
 I fati soi a star imbertonai.  
 Diseva in fra de mi: pota, se avesse  
 Una signora co' à sti' altri sbisai,  
 I Sabi co le Feste che recresse  
 Stassimo pur sul zuogolo abrassai!  
 Mo, no vagio un quattrin da che t'è abua,  
 Cussì mai no t'avessio cognossua!

Tra el sospirar, tra el farte candelieri,  
 Tra el farte brazzolari de mia man,  
 Oltra che guasto le ponte dei ferì,  
 Consumo el tempo che vadagno el pan;  
 E me n'è acorto con me dano geri  
 Che andèti da l'ebreo col cofetan:  
 Mo, che mal segno fu, porca, quel mio,  
 Quel primo di che mai t'è vista a Lio!

Racc. Poes. Ven.

Le me' camise de botana fina  
 Che me d'è fate al viazo di Stiria,  
 Per el dolor, traditora, sassina,  
 Xe tute strazze, e mai xe stae in lissia;  
 Che tra 'l suor, le lagreme e la orina  
 Che buto quando son in angonia,  
 Le xe vegnue, che se no me provedo  
 Vòi ben bater brochète co' fa fredo!

L'altra sera stagando presso al fogo  
 E magnando una sopa de frisopo  
 M'è recordà d'aver visto in t' un liogo,  
 (Lezendo un di le favole de Isopo)  
 Che una galina à fato star un cuogo,  
 (Esemplio a quei che se presume tropo)  
 Ma qua una vaca fa star un lion,  
 Che xe più estrema comparazion!

Se vago in Piazza, vago per san Basso  
 Per no passar davanti l'armamento,  
 Che daspò che son lindo no ghe passo  
 Perchè la povertà tiol l'argomento.  
 Vaga per quando avea tut' el me spasso  
 De spassizar col mio pugnàl d'arzentio!  
 Mo, chi vive da bravi e vol Signora  
 Vien a sto passo, e molto pezo ancora!

Solea la Festa con la grotolina  
 Co 'l me garzon andar a svogazzando,  
 Ora con Togni, ora con la palina  
 Passar el tempo per no star de bando;  
 Adesso mo, ogni festa de matina  
 In liogo de l'andar atorziando  
 Vegno al macel, vegno a la becaria,  
 Che cussì casa toa me par che sia.

Mi me d'è fato segnar da strigarie;  
 Madesi, tanto pì bogie el lavezo!  
 Che al to' martelo, a le calcagnarie  
 Ogni ceroto o medesina è pezo!  
 Vogio pì presto aver cento ferie  
 Che un pegio sol, che digo un? che mezo;  
 Che 'l despiaser che vien da la Signora  
 Xe pezo che pugnàl, che dalaora!

L'altro di me dioleva el lai zanco  
 (Za che bisogna che 'l me mal te conta)  
 Son corso a un Zaratan che gera in banco,  
 E d'è dito, mistro, vardè se d'è la ponta.  
 Lu m'è vardà in tel viso, e d'è dito franco:  
 Zugarò pegno, senza che desmonta,  
 Che la te dogia nasse da una fia,  
 E no da ponta, e no da malatia.

Lavaure de cao, scarpe, e laùto

Me costa un stato co sto amor novelo;  
Che per parer tilao consumo tuto  
El mio vadagno e fazzo el gavinelo;  
Mo, corde, scarpe, e lavaure buto,  
E la vita, ch'è pezo, anca al bordello;  
De sorte che consumo, le zornae  
I danari l' onor, la sanitae.

### L' INCONTENTABILITA'.

MADRIGALE.

Vedo una dona, e come cossa bela

No posso far che no ghe n' abia voglia;  
E se oltre la bellezza  
Ghe trovo gentilezza  
Tanto più fisso el desiderio in ela,  
E in mè sento un ardor ch' el par un bogia  
E sto fogo e sta doja  
Par che me cressa più  
Se un' altra à più bellezza e più virtù:  
Cussì de man in man  
S' una me piase ancuo, l' altra doman.

### AD UNA GENTILDONNA

CHE DICEVA VA DEL RESTO

MADRIGALE.

Vu m' avè vinto el cuor,

E in conseguenza l' anema e l' onor;  
Che l' anema gh' è drento  
E mi l' ò persa co l' alozamento;  
L' onor, perchè no posso  
S' un me vol far ofesa  
Far senza cuor difesa,  
E me vegno a tirar l' infamia adosso;  
E avendo perso questo  
No podè più invidiar, che no ò più resto.

### A MADONNA

CHE METTE IN BURLA IL POETA.

MADRIGALE.

Vu ridè, vu burlè

De quel che scrivo e digo  
Per farve bela più de quel che se'.  
Mi ò fatò quel che diè far un' amigo  
Che cerca de dar consolazion,  
No perchè sia sì mato e sì bufon  
Che no cognossa chiaro e a averta ciera,  
Che se' l' più brutto muso de sta tera.

### L' AMMALATO

IN DESIDERIO DI VINO.

Son amalà qua in leto, e se credesse

Dē no aver co' son san voglia de vin  
Voràve esser tegnù per un meschin,  
Per omo indegno che so' mare el fesse.

Ma se me dura queste vogie istesse,

(Che no credo d' aver altro per fin)  
Vòi beber più d' un zafo e d' un fachin,  
E se 'l mar fusse vin, me faria un pesse.

La Corte e i studi xe stà mii diletì,

Adesso xe le betole e quei chiassi  
Dove se beve, o pubblici o secreti.

Voltè, grami mortali, i occhi e i passi

Da le speranze che ve tien sugeti,  
Che 'l vin xe 'l caro ben tra tuti i spassi.



## I VOTI.

Oh Cielo! e m'inzenochio e mando fuora  
 Quei preghi più efficaci che mai posso:  
 Se fussi mai da nissun prego mosso  
 Fè caneveva un dì la mia Signora!

Che s'altra Dona mai più m'inaamora  
 Non me possa levar la sè da dosso!  
 Se ghe vegnisse ben la goba o 'l gosso  
 La me sarà una Venere un' Aurora!

Del resto, o Amor, se ben ti t'armi in cielo,  
 E che 'l farne sogeto sia 'l to fin,  
 Te ne indormo se ti me storzi un pelo;

Che i lazzi, l' arco, i strali d' oro fin,  
 I ingani, el poder, la fiamma, el zelo,  
 I paro tuti co un bocal de vin.

## IL VINO CADUTO NELL'ACQUA.

In st' aqua de purissimo cristal  
 Vedo i balassi e i lucidi rubini,  
 Fati da giozze de diversi vini,  
 Che par ch'i pianza a vederme a star mal.

In ste zogie, in ste perle oriental  
 Ghe ride mile Amori picenini,  
 Che con quei cari gesti da putini  
 Par ch' i me fazza intorno un carneval.

Porta la vista sto tributo al cuor,  
 Che al sentire sta insolita dolcezza  
 El me manda ogni spirito in amor.

Questa che, san, m' à usà tanta fiera  
 Poria ben farne atorno ogni saor  
 Che gnente curaria la so' bellezza.

## PROTESTA DI VOLER BERE.

Chi à visto un tal soldà farse chietin  
 E abandonar sto mondo traditor?  
 Cussì lasso anca mi l' arme e l' amor,  
 E me dedico tuto al Dio del vin.

Pianzo, gramo, i mii dì, pianzo anca 'l fin  
 Che m' ò proposto de virtù, de onor,  
 E se 'l beber pentio lava l' eror  
 Mi resto neto co' xe un armelin.

Mai più abandono el vin, massime el bon,  
 Mai più vani pensier m' intra in la mente,  
 Mai più m' infeta el cuore l' ambizion.

Mondo, i to beni xe da inganar la zente,  
 I e fati co' è vessighe de saon,  
 Che par sì bele e se resolve in gnente!

## PER IL RITORNO D'UN AMICO.

Quel che par senza cassa un orinal,  
 E macaroni senza onto sotil,  
 E tola parechià senza mantil,  
 E senza barbachiepi un carneval;

Quel che par senza piume un cavazzal,  
 E senza fiori e erbete e Mazo e Avril;  
 Quel che par senza manego un bail,  
 E insalata senz' ogio e senza sal;

Quel che par senza letere un Dotor,  
 Calza senza braghesse, o senza aver  
 Buso dove se caga un cagaor;

Quel che par senza scarpe un calegher,  
 Senza la so' stadiera un pesaor,  
 Senza porco o luganega un triper,  
 Son parso mi, o Corner,  
 Sti dì che son stà fuora senza vu.  
 Mo sia ringrazià Dio che siè vegnù!

## PER DOTTORATO D' UN NANO.

MADRIGALE.

Se mai ve imbaterè, Dotor egregio,  
 A arguir a qualcun drent' al Colegio  
 Parerè proprio in mezo a quella schiera  
 El ponto giusto in mezo de la Sfera,  
 Sì che vostra Ecelenza  
 Formerà el centro, e quei, circonferenza.  
 Ma ghe xe anca de più,  
 ( E qua stupisse 'l mondo )  
 No se trova un Dotor simile a vu !  
 I altri in cima o in fondo  
 Del Privilegio i à 'l nome solamente,  
 Vu, Dotor eccelente,  
 Ve podè far de quella bergamina  
 Casa con sala, camera e cucina.

## PER LO STESSO SOGGETTO.

MADRIGALE.

Dotor in sestodecimo eccelente,  
 Fato da la Natura  
 Come de bon Scrittor abbreviatura,  
 Me ralegro del grado degnamente  
 Da vu otegnudo a publico dispeto  
 De più d' un desgraziado Cortesan,  
 Che ve chiamava picoleto e nan.  
 Volendo mesurarve co la vesta  
 Tuto quel gran cervel che tegni in testa,  
 ( Ch'è pur contra el dover ) vostra Ecelenza  
 El tien magior assae de la presenza.  
 Dotore gentil e de gran mente  
 Vu campizè cussì legiadramente,  
 Come drento a un cristall mosca pià,  
 O in gran sala, se parla, un papagà.

## PER MATRIMONIO D' UN GOBBO.

Un Gobo fato a fondo de melon,  
 Più roan che no xe l'osso de Spagna,  
 Tuto difeti e tuto una magagna  
 Vol dar in nota la so' condizion.

Mi no so da che 'l vaga, o a che 'l sia bon,  
 So ben che a par de do' fachini el magna,  
 E che no fè mai cesara in campagna  
 Tanta quanta lu a taola distruzion.

Chi diavolo è stà 'l pare, e chi la nena  
 De sta cossa, no so da dove ussia,  
 Che no se sa se l'abia panza o schena ?

Mi credo che se mai la Bizaria  
 Dovesse un zorno comparir in scena  
 Che la saria el model de sta cata,  
 Che se mai per la via  
 L' incontra puti, i l' à per la Verola  
 Che i cazza spesso a viva forza a scola.  
 Se i sente la parola  
 I l' à per l' Orco afato, e sì no val  
 Darghe da intender che 'l sia un Carneval.  
 Mi so, che è un caramal  
 Che xe tuto grottesche fuora e drento  
 Che ghe poria servir per monumento,  
 O proprio alozamento;  
 Tanto l' è storto in fati e in la presenza,  
 In parlar, in giudizio e in la conscienza.  
 Chi cerca penitenza  
 Dar a una dona, ghe lo meta apresso  
 Che 'l la farà morir quel zorno istesso ;  
 Cussì bruto in eccesso  
 Lo à impastà, falando, la Natura  
 Che de far un ridicolo avea cura.  
 No so, co no procura  
 Qualche gran zaratan d' averlo in cesto  
 Per poder po crier : « Signorà, questo  
 È un mostro disonesto  
 Perché l' è mostruoso in ogni parte,  
 Nè un altro ghe ne xe descrito in carte;  
 Mi no credo che l' arte

Podesse giusto e vivo mai retrarlo.  
E cussì come l'è rappresentarlo. »

    Mi credo, che mostrarlo

El se poria lontan, e dar a intender  
Che 'l sia la cossa che se brama veder,

    E rara oltre ogni creder ;

Tante forme se vede in lu costrute  
Che imagnarle no se pol mai tute.

    L'è utile a le pute

Che no volè che staga a far l'amor  
Mostrarghe spesso questo bel umor,

    Che per darve saor

Del so inteletto, el s'è andà a innamorar  
In la più bela Dea che sia in tel mar.

## LE DISGRAZIE DEI POETI.

### CAPITOLO.

Canto de vu, Poeti povereti,

    Vegno da ti, strazzosa Poesia,

    Rapezzà de Canzon e de Soneti,

Che adesso, grama, no ti è più vestia

    Se qualche zaratan, qualche bufon

    No te straveste de furfanteria.

Ben è pazzia le to' riputazion !

    Adesso ogni plebeo se fa Poeta,

    Ma bon, più che da versi, da baston.

Grama, magra, afamà, nua, povereta,

    Mo qual è quel to' arlevo che podesse

    Per to mezo imborsare una gazeta ?

Co' se vede un per strada a magnar lesse

    No se ghe dà sì presto su dei ochi,

    Che i dise: Costù à versì in le braghesse.

Tuti, grami ! i à balconi in su i zenochi,

    E tuti à certe cape sì pelae

    Che le xe trabucheli da peochi.

I à infin le ciere tanto consumae

    Che i par de quele aneme che al fogo

    Soto de na da Dio vien condanae.

Tiogo de pato entrar in vostro liogo

    Se ognun de vu, Poeti no tolessi

    Far una metamorfose in t'un cuogo.

Oh Dio, se avessi grazia che podessi

    Aver pan per Soneti e per Canzon,

    Sì, che d'è e note ve sfadigheressi !

So ben che troveressi invenzion

    De meter i Forneri anch' eli in Cielo

    In pe' d'un' Orsa, un Toro o un Scarpion.

Nè se sentiria tanti e questo e quello

    Parla se no de la passion d'amor,

    Ch' a tut' el mondo à roto mo el cervelo.

Quanti sospiri che ve vien dal cuor

    Soto coverta de amorose fiamme

    Che va a camin francese dal Pistor !

Se avè un pezzo de pan o de salame,

    Se sentì altra pena maledeta

    Tiogo mi in vostro pe' morir da fame.

Simile a la gazuola xe el Poeta ;

    Co no l' à sopra in te la magnaora

    La se mete a cantar la girometa.

Cussì canta el Poeta co' vien l' ora

    De disnar, e nol trova pan in tola :

    « Che si dirà di questa mia Signora ? »

E scomenza a dolerse a ogni parola

    D'aver pene e tormenti senza fin ;

    Niente de manco el mal xe tuto in gola !

Chi no sa che 'l Poeta è un po' divin ?

    Chi no sa che maggior divinità

    No gh'è de viver senza pan e vin ?

Oh animale meschin e disgrazià,

    Fradel de la miseria e de i amari,

    Nassuo da Amor e da la Povertà !

De ciascun d'essi se ne trova chiari

    Che no viva in miseria eternamente ;

    Che no stà insieme la virtù e i danari.

Ma resto de parlar de st'altra zente,

    Che no me vòì slargar tanto da l'osso.

    Che intriga el fil do' gemi ch'ò in la mente ;

E torno da recaò dove m'ò mosso,

    Se ben, Poeti, a star tropo con vu

    Me podesse atacar la fame adosso.

Perchè meter Apollo a star là su

    Con una lira in man ? No gera megio

    Imortalar un osto, e no colù ?

La fame forsi v' à leva el conségio,

    Che no podè sperar nessun agiuto

    De trovarve ai bisogni un pan de megio !

Oh Poeta fantastico e destruto,

    Oh Poesia meschina e dolorosa

    Nassua nemiga a la fortuna in tuto !

Oh misera folla calamitosa !  
 Qual è quello che t'abia seguità  
 Ch'abia un marcheto da pagar chi 'l tosa?  
 E quanto un più perfeto xe mai stà  
 In sta misera arte e più valente  
 Tanto più l'è stà anca disgrazià.  
 Chi xe stà 'l più meschin o 'l più dolente  
 De Omero? e qual più bravo e più perfeto?  
 Argo e Micene e Troja se ne sente;  
 Pur no gh'è stà nessun che più sugeto  
 Fusse a la povertà, ch'elo nassè  
 A la riva d' un fiume, el povereto!  
 Lu che de tuti è sta principe e re,  
 Lu xe sta grandò, epur nol cognosseva  
 Qual fusse da un Pistor un pan da tre  
 Quando l'è restà orbo no l'aveva  
 Da tegnir pur un puto ch'el menasse,  
 Nè a mala pena el can che 'l conduseva.  
 Benchè al morir Vergilio refudasse  
 Un' opera sì rara e cussi eleta,  
 ( Chi tra i Latini fu che l'arivasse? )  
 Tutavia el verso ne la dise schietta:  
 « Il Mantovan che di par seco giostra, »  
 Cioè che Omero e lù l'è menà streta.

E 'l Petrarca tra nu, che ne dimostra,  
 Co fa le ore el razo d' un relógio,  
 Ogni ecclenza de la lengua nostra,  
 Con tutta la corona de cerfogio  
 No à possù otegnir mai d'essere prete  
 Stentando per studiar un poco d' ogio.  
 Plauto, che à provà pur d' aver ste strete.  
 Vedendo che ai Poeti ghe avanzava  
 Fuora in berlina i dei da le scarpete,  
 Xe andà a star co un Pistor, e là menava  
 Tut' el zorno la mola, e componeva  
 Quel poco tempo po che ghe restava,  
 E qual se voglia altr' arte no 'l podeva  
 Trovar ch' el podesse un po' refar  
 De quanto la Poesia la ghe toleva.  
 Tanti altri gh' è ch' a volerli recordar  
 A un per un no mel comporterà  
 Quel poco tempo ch' ò da dispensar,  
 In soma tuti quei ch' à seguità  
 Strazzosa, miserabil, la Poesia,  
 Daspò tanti diluvii, al fin la i fa  
 Cascar morti da fame per la via.



# SECOLO DECIMOSSETTIMO.

## CANZONE

DI

GIOVANNI QUERINI QU.<sup>ra</sup> VICENZO.

**D**aspuò che 'l rasonar tropo avahio  
T'ha parso un puoco rio, dirò coverto,  
Benchè credo per certo esser inteso.  
Tal no se vol fidar del fato mio,  
Che averà i puti drio; chè un cao sempr' erto  
E sempre scoperto ha puoco peso.  
Quel che stà teso teso, ha el nuodo in cima;  
Chi vol star sempre a prima e andar col Zonto  
Perde i so' soldi apunto. Se sta rima  
Par fata senza lima  
Atendi al senso e faghene bon conto.  
Legno che sia ben onto amorza el fuoco;  
El miel chiama le mosche, e i mati i puti;  
Chi vol star sora tuti  
Spesso se truova in tel più basso liogo.

Par che parla da ziogo, e digo el vero.  
Andar dal pomo al pero, e senza nose  
Voler tute le vose, ha del ventoso.  
Dove posso me lozo, e si no spero  
O 'l monte de san Piero, o l'esser Dose,  
Chè m' ho fato la crose e dormo zoso.  
No stago pò pensoso, chè so chiaro  
Che chi no g' ha danaro in ogni caso  
Vien menà per el naso, e un mal reparo

Xe a dir: Mio pare avaro  
Ha tre chiave sul scrigno. Ve le baso  
Cento veste de raso; e in ste contrae  
Trenta case de stazio, e a le verdure  
Quatro mile chiesure,  
Ve par cogionarie da dir de istae?  
Un pien de veritae, pien de schietezza  
Sente gran alerezza e gran contento,  
Ma chi xe pien de vento ha le gran dogie;  
Chi spende povertà per gran ricchezza,  
Pazzia per saviezza, ha el nuodo drento  
E de fuora el depento, e se ha le sogie.  
Chi seguita le fogie e lassa el fruto  
Spesso riman al suto, e chi se sgionfa  
Resta de spade a ronfa. El fin fa el tuto.

Mi no so che costruto  
Abia un che no g' ha pan, dir ch' el trionfa.  
Una vessiga sgionfa fa gran schiopo  
Con quel so vento, e daspuò resta gneinte;  
Cussì fa quella zente  
Che per cogionarie se tien da tropo.  
Tal vol desfar el gropo ch' el lo intriga;  
E tal fuze la briga che lo trova;  
Tal cerca roba niova e la tiol marza.

Per tuto ghe xe intopo, e chi sta in riga  
 Ha la fortuna amiga, e se renuova  
 Co la zafata a pruova e co la squarza;  
 Ma chi la brava e squarza e no g'ha el muodo  
 Navega per el vuodo, e sul più belo  
 Denota el so cervelo che no ha del sodo.

Fica pur ben un chiodo  
 Avanti che ti buti zo el martelo,  
 E mostrame un modelo, e case e campi,  
 Chè altrimenti no credo, e ogni parola  
 Che ti rasoni svola  
 Senza fermarse, come el vento e i lampi.  
 No so perchè ti scampi; e povereto  
 Ti è pur senza un marcheto! Che pazzia  
 Xe sta to fantasia de far el grandò?  
 Se Dio vol che te inciampi in tre Zaneti  
 O quatro schieti schieti, i te faria  
 Andar per quella via che andete Orlando.

Tiente un puoco a stagando co la testa,  
 Tuo' via spesso la cresta, e varda basso,  
 Nè te tor spasso de chi ha trista vèsta;  
 Questa xe la via, questa  
 De fuzir da ogni burla e da ogni arlasso,  
 Ma l'andar a compasso e schivar tuti  
 Che no sia monsignori, e vardar alto,  
 Faria in tre zoti un salto  
 Sta to grandezza far la festa ai puti.  
 Atendi ben ai fruti, e lassa el resto,  
 E intendi ben el testo: Chi se infrasca  
 Zogiosi no g'ha in tasca altro che fumo.

Semo adesso reduti a un certo sesto  
 Dove che presto presto l'omo casca  
 Quando l'ha de la frasca; e me presumo  
 De dir rason a grumo, e de insegnarte,  
 Senza durar trop'arte, a la carlona  
 E da bona persona, alfin salvarte;  
 Ch'el scriver tante carte  
 Co' tante bizzarie no me consona.  
 Te digo a la fè bona, e come amico,  
 Per pura caritae, lassa da banda  
 Sta vanità sì granda,  
 Altramente te vedo in gran intrigo.

Sapi, che al tempo antigo, e al tempo d'oro  
 Inanzi el bucintoro, inanzi i frati,  
 Inanzi dei scarlati e cremesini,  
 No ghe gera Re Rigo, e Duca Moro,  
 Papa, nè concistoro, nè prelati,  
 Nè monsignori, abati, nè chietini,  
 Ma spiriti divini, a chi acque e giande  
 Gera dolce vertudi, senza arzenti,  
 Nè sofitali i depenti, o case grande  
 Dove se spende e spande;  
 Ogni omo gera aliegro, e no mancava  
 Quelo che bisognava a viver sani.

Pur che l'omo sia sano, el puoco basta,  
 Ma el mato, che contrasta  
 Co la natura, ha i so' disegni vani.



# POESIE

DI

ANGELO INGEGNERI.

IN LODE

DI BIANCA CAPPELLO

DUCHESSA DI TOSCANA.

CANZONE.

Donca dal mio cantar

Ogni beltà più strana e più lontana  
Averà tuto quel che 'l pol mai dar,  
E sta pena vilana

Non vorà almanco un pochetin lodar  
Tanta bellezza e cortesla paesana?

Musa Veneziana,  
La bate qua la reputazion :

E Modòna e Corezo

E mile volte pezo

Va gloriose de le to' Canzon,

E l'onor de Venezia e de Fiorenza,

Anzi del mondo, ghe ne starà senza ?

Su, su, che te convien

Meter del bon ; nò che ghe sia fadiga,

Ch' assae respande 'l Sol quando è seren,

Ma perchè no se diga

Che solamente riussimo ben

Con qualche sugetin de hassa liga.

Qua no gh'acade miga

Tropi colori, nè tropa poesia ;

S' à da dir pan al pan,

Lodar i ochi e le man

*Racc. Poes. Ven.*

Per quel ch' i è in fato senza dir busla ;  
Che s' i ochi ardesse, o le man fusse neve  
Questa e quella bellezza saria breve.

Dona bela e real,

Rica de tut' i beni de fortuna,

Più rica assae de quei che assae più val,

E richissima d' una

Parte ch' avanza ogn' altro don mortal

Senza la qual no val grazia nessuna ;

Più reveria d' ogn' una,

Abondante d' amici e servidori

Tuti agiutai da vu ;

Che se pol bramar più

Che d' ogn' intorno aver devoti cuori,

E che faccia ogn' un d' essi quanto 'l sa ?

Tanto 'l diè sempre più quanto più 'l dà.

Quela rara bellezza,

Tuta fata per man de la Natura

Sen' agiuto nè d' acqua nè de pezza,

Pol comparir segura

In ogni paragon ; che de certezza

Ogn' altra perderà la so' ventura.

Vita fata a mesure,

F azzza proporzionà, chiara e ridente,  
 Ochi vaghi, amorosi,  
 Lavri rossi e vistosi,  
 Boca tuta zentil, dov' ogni dente  
 Val assae più de bianchezza lu solo  
 Che quel bel fil de perle ch' avè al colo.

Tante zogie, tant' oro,  
 Tanti drapi de sea, tanti ducati,  
 Tante delizie, e alfin tanto tesoro  
 Che renderia beati  
 Cento par mii, quand' anca ognun de loro  
 Se strapazzasse zo rasi e scarlati;  
 Tuti no ghe xe ati,  
 Ma a vu ghe ne xe sta larga la sorte,  
 A vu che aidè i pupili  
 E i spiriti zentili,  
 E suph a le disgrazie de la sorte.  
 Qualch' un el sa che senza 'l favor vostro  
 Saria de la Fortuna al mondo un mostro.

Seno, valor, inzegno,  
 Destrezza, gran maniere, alto pensier,  
 Modesta voglia e merito d' un regno,  
 Sì prudente parer  
 Che no gh'ariva ognun miga a quel segno,  
 E sia pur Savio Grando o Consegiar;  
 Infinito piaser  
 De giovar con efeti e con parole;  
 Passar de vigilanza  
 Chi ve fa qualche istanza;  
 Vertù, grazie e creanze al mondo sole;  
 Quest' è altr' oro, altre zogie, e queste stesse,  
 Spendè quanto volè, sempre le cresse.

De i amici ò dito e digo,  
 Che quest' è un capital che i passa tuti,  
 Che val più ch' un tesoro un bon amigo.  
 Quanti avè mai conduti  
 In gran felicità, fuora d' intrigo!  
 Altri avè in dolce servitù reduti.  
 Oh benedeti fruti  
 De virtù e de fortuna zonte insieme!  
 Oh de tanto contento  
 Soave condimento,  
 Vive belezze, a mio giudizio, estreme!  
 Ma che giudizio è 'l mio in tanta impresa?  
 Deh acetè 'l cuor se 'l dir ve fesse ofesa.

Mare del Dio d' Amor,  
 Superba ancora de l' alta sentenza  
 Ch' à dà el Pastor Trojan in to' favor,

Te prego, abi pazienza,  
 Che no me move invidia del to' onor,  
 E molto manco altra malevolenza.  
 Se fusse in to' presenza,  
 E che ghe fusse anch' Elena in persotia,  
 Lu che t' à donà 'l pomo.  
 A far da galant' omo,  
 El ghen faria do' parte, e la più bona  
 Saria de st' altra Dea che digo mi,  
 Nassua in mar pur, ma ben dopo de ti.

E se per oferir  
 S' avesse da coromper el giudizio,  
 Co ti à inamorà un l' è finì el dir;  
 Questa pol far l' ofizio  
 De Giannon e de Palade, in fornir  
 La zente de ricchezza e de giudizio.  
 Del terzo benefizio,  
 Che speta a ti, no vòl dir se non questo:  
 Paris, gramo, meschin,  
 Tì 'l mandi peregrin  
 Cercando Amor che se à da tior in presto.  
 Questa à belezza in ca sì pelegrina  
 Che faria parer dolce ogni rovina,

Canzon, sta vita è un loto  
 Con poche grazie e de le bianche assai!  
 Mile se ne lamenta  
 Per un che se contenta,  
 Ma no gh'è stà sì rica grazia mai!  
 A tute l' altre qualche cossa manca,  
 Qua stà tute le grazie in t' una BIANCA.



## CASO OCCORSO AD UNO SPAGNUOLO

## COLL'AMICA.

L'è ben, a dir el vero, un brutto caso!  
 Dar a una zentildona un pizzegon!  
 Ma gnanc'ela no ga tropo del bon  
 A petar po d' un zocolo sul naso!

Pur se l' ofeso xe 'l Spagnuol, mi taso,  
 E l' ò per cortesissima azion.  
 Perchè quella galante Nazion  
 Stimarà sto favor magior d' un baso.

Done, fe' pur de sti bei colpi spesso;  
 No digo de lassarve pizzegar,  
 Ma favor! quei che ve vien d' apresso;

Pur distinguè, perchè no xe da dar  
 A tuti quei che serve un premio istesso,  
 E l' importanza sta ne l' aplicar.  
 Un ve torà a secar,  
 Sempre tanto sfazzà quanto merloto;  
 A lu ghe sta ben un ichese o un sberloto.  
 Un altro tropo doto  
 Farà l'amor, ma ziogherà lontan.  
 Questo è pagà con un baso de man;  
 Ma un savio cortesan,  
 Che salva 'l so appetito e 'l vostro onor,  
 L' assassinè se no ghe donè el cuor.  
 Mi tuto ò per favor;  
 Feme ben, ve ringrazio, e mal, ve scuso,  
 Ma no me de' dei zocoli in tel muso.

## LA INDISCREZIONE.

Chi à visto per la strada qualche can  
 Ch' à un osso in boca e un altro in tera apresso,  
 Rosegar questo, e quel guardar sì spesso  
 Che ghe par che 'l ghe scampa da le man.

Tegna mente, de' grazia, a un mio paesan;  
 ( Che no vòì farghe el nome per adesso )  
 Ch' à Mugier e Morosa, e a un tempo stesso  
 Gode una e a l' altra no sta un deo lontan.

El fa nè più nè manco come quello,  
 Che se 'l vede nissun farseghe arente  
 Ragrinza i denti e roгна e rizza el pelo.

Ma un dì vegnirà un tanto valente  
 Che se gh'acosterà sì che 'l martelo,  
 E 'l redurà de l' una e l'altra in gnente;  
 Ch' un can tropo insolente  
 Perde po' l' osso che l' aveva in boca  
 Per far che l' altro un altro can nol toca;  
 E al fin resterà un' oca  
 Tanto del primo, quanto del secondo,  
 Cussì la vè se se vol tuto el mondo.

## IN OCCASIONE

## DELLA GUERRA DI CIPRO

## CONTRO


## GLI OTTOMANI.

*Canzone ad Amore.*

Se ti è vero Signor  
 De Cipro, come fio  
 De Venere regina descazzà  
 Perchè lassistu, Amor,  
 Ch' un nemigo de Dio  
 T' abia tolto el to' regno e rovinà;  
 Perchè no vastu là  
 • Con i so' innamorai?  
 Lassa star l' altra zente,  
 Menaghe solamente  
 Tre o quatro mile grami desperai,  
 Che se ti fa cussì  
 Ti recuperi Cipro el primo dì.  
 Meti insieme un' armada,

Che quando ti t' inègni  
 Ti sa' pur fabricar nave e gale!  
 Senz' altra lanza o spada  
 Un solo dei to' legni  
 È bon da conquistar sete Turchie.  
 Co le man e coi pie  
 Te vegnirà a agiutar  
 Fin i poveri pessi;  
 Che ti pol sora essi,  
 Sora le Ninfe e sora 'l Dio del mar;  
 Quantunque za deboto  
 Sultan Selim t' à fato cagar soto.  
 Se to' Mare è nassua  
 In mar (co' se rasona),  
 Ti no pol dubitar de cosa alcuna.  
 Se ben l'è descazua,  
 La sarà almanco bona  
 De farte navegar senza fortuna;  
 E po' el Sol e la Luna  
 Con tuti i elementi  
 Te torà a favorir;  
 Ch' i te sol obedir,  
 Che a ti obedisse tuti quanti i venti;  
 Che co l'amor i toca  
 No i xe boni più d' avrir la boca.  
 Forsi che ti à fadiga,  
 Per andar ben armà,

De butar tut' el mondo soto sora?  
 Eh se sa senza che 'l diga  
 Che un solo inamorà  
 Tira in qua in là do mille fresse a l' ora.  
 L' artiglieria laora  
 Con spessissimi tiri;  
 El tirar el fià in suso  
 Serve per archibuso,  
 E xe tante bombarde i so' sospiri.  
 L' à po' la corda e 'l fogo  
 Che dura sempre e ch' arde in ogni logo.  
 Resolvite, de grazia,  
 Resolvite in t' un trato,  
 E va de longo alegramente via;  
 Ma, fame un'altra grazia,  
 Che sia tra nu sto pato:  
 Se ti pii Famagosta e Nicosia  
 Dàle a la Signoria (go)  
 Con tut' el so paese,  
 Omeni, done e 'l resto.  
 Tuti (come xe onesto)  
 Sarà po' toi; ti ghe farà le spese,  
 Che chi à l'amor intorno  
 Vive d' Amor con do' marcheti al zorno.  
 Chi sa, Canzon, ch' Amor no sia d' acorde  
 Co 'l Turco, che se vede  
 Ch' i è canì tuti do' privi de fede.



# CANZONETTA

51

P A O L O   B R I T I .

Son risolto, son risolto, Signora,  
Za che fè, za che fè sì la granda,  
De tirarme da banda.  
Per fin che in borsa gh'è sta del danaro  
Mi ho fato el corivo, el polaco, el bizaro;  
Ma adesso che manca l'ariento  
Del tempo mal speso a me costo me pento  
A me costo me pento.

Podessè, podessè domandarme  
Da che vien, da che vien ste parole,  
Con el dir, le xe fole.  
Mi no ve burlo, ma digo da seno,  
Sapiè ch'ogni cossa col tempo vien meno,  
Anca mi gera rico e potente  
Ma adesso per vu no me trovo più gnente  
No me trovo più gnente.

In quel primo in quel primo mio fumo  
Mi stimava, stimava i zechini  
Co' se fa i bagatini,  
Mi, boni polastri, galine e caponi,  
Lamprede, branzini, variòli, sturioni;  
Ma adesso son tanto grameto  
Che stago tre dì che no magno un paneto  
Che no magno un paneto.

E chi è causa, chi è causa, Signora,  
Se le care, le care dolcezze  
De le vostre belezze,  
Con ati, con gesti, con scherzi vezzosi,  
Con mile lusinghe, con sguardi amorosi  
Me incitava a servirve ad ogn' ora?  
Ma adesso m'acorzo che son in malora  
Che son in malora.

Preparève, preparève a trovarve  
Dei morosi, morosi più cari  
Ch'abia roba e danari.  
Perfin c'ho podesto portarla cimada,  
Portar el zancheto, manopola e spada  
Son stà forte per tuti i cantoni;  
Adesso no ho bezzi, son re del minchioni  
Son re dei minchioni.

Mi no posso, no posso durarghe  
A una spesa, a una spesa sì grossa,  
Trovè pur un che possa.  
Vu sempre a la tola volè bon vedèlo,  
Bon lessò, bon rostò, bon vin moscadèlo,  
La me borsa no pol far ste spese,  
Mi bisogna che vaga in altro paese  
In altro paese.

Me n' ho acorto, n' ho acorto gier sera  
 Che me davi, me davi del grosso  
 Perchè più mi no posso.  
 Co 'l cesto no porta dei boni boconi  
 Gh'è storti mustazzi, gh'è bruti grugnoni.  
 Nò, nò, no voi far più sta vita  
 Xe passado el martel, la me pena è finita  
 La me pena è finita.

I danari, i danari xe spesi,  
 No gh'è più, no gh'è più vestimenti,  
 No gh'è più adornamenti.  
 Mo vaga per quando portava ormesini,  
 Capoti de raso, veludi ben fini!  
 Mi adesso son senza ducati  
 Che paro per strada el gastaldo dei mati  
 El gastaldo dei mati.

Debitor, debitor son a tuti;  
 El dolor, el dolor, la mia dogia  
 Xe d'andar in Carcogia.  
 Se vago per piazza camino con tema,  
 Sto cuor fuor del corpo me salta me trema,  
 Tal ch'è megio che sona de arpa  
 Che fazza el fagoto, che bata la scarpa  
 Che bata la scarpa.

Dève pur, dève pur dei solazzi  
 Co l' andar, co l' andar in barcheta,  
 Col sonar de spineta;  
 E a forza de gusti, de soni e de canti  
 Cerchè de tirar in la rede i amanti,  
 Che per mi no gh'è canti nè soni,  
 Son costreto a scampar dai balconi  
 A scampar dai balconi.

E se dòna, se dòna del mondo  
 A sto passo, a sto passo me tira  
 Che per ela sospira,  
 Voi tior sentenza de perder un ochio,  
 Una man, una spala, una gamba, un zenochio;  
 Son scotà, son scotà da sto fuoco,  
 Chi vol andar soto ghe lasso el mio liogo  
 Ghe lasso el mio liogo.

E con questo, con questo Signora,  
 Col cantar, col cantar mi ve lasso,  
 Caminando de passo.  
 Dève bon tempo coi vostri corivi,  
 Pelèghe la borsa per fin che i xe vivi,  
 Che per mi no val più le graziete  
 Renonzio a ogni cosa; è fenì le gazete  
 È fenì le gazete.



# CANZONETTA SATIRICA

DI

BARTOLOMMEO BOCCHINI

DETTO ZAN MUZZINA.

## A ZAGNO BARBIERO.

No posso far de manco,  
Zà che m'avè stordio  
Con quel tetarme tuto el dì da drio,  
De no chiapar intanto  
La pena e 'l calamar per darve vanto.  
Dirò a la bela prima  
De le vostre fatezze  
Per megio destrigarve le-belezze!  
È con la Musa lesta  
Darò principio a bisegarve in testa.  
Vu se', per quanto sento,  
Filosofo, Organista,  
Musico, Balarin, bravo Contista,  
Poeta in prosa e in rima,  
Bel furfanton e ziogador de scrima.  
Gran cosa, che un par vostro  
No possa mai dir vero!  
E tegna dur frapando un ano intiero  
Senza trovar la zufa  
D'un che ve rompa el muso e ve scabufa!  
Vu chiamè pur a ogn' ora  
Con ste vostre frapade  
Diese megiar lontan le bastonade;

Ch'altro no v'assegura,  
« Che la fortuna che dei pazzi ha cura. »  
In quanto a mi, no posso  
Con vu più star a seguo,  
Chè in vostro paragon sembro de legno.  
E perdo anca in presenza  
El cervel, la dotrina e la pazienza.  
Vu fè, da bel inzegno,  
Bel om, bel piè, bel viso,  
E ceder no volè gnanca a Narciso;  
Anzi, che in pè del fonte  
Sora d'un càntar ve spechiè la fronte.  
No stè donca più a dirme  
Che se' nassuo d'un Grande,  
Vu che un braccio mostrè da sbater giande;  
Tanto al bifolco inclina  
La vostra stela iniqua e malandrina!  
Barbier da tre quatrini,  
Vilan pien de falope,  
Andè a tosar pagiari, a rader'fiope,  
E se 'l rasor ve scapa  
Esercitè la man fra vanga e zapa.

# L' IPOCRISIA

SATIRA

D E L P. C A C I A.

---

*Le donne, i cavalier, l'armi, e gli amori*  
Canti l'Ariosto, e la so' Armida el Tasso;  
Venero tuti, e reverente lasso

A i poeti de l'Arno i primi onori.  
Cedo l'eburnea cetra e l'arco d'oro  
A chi à savesto immortalar Adoni.  
Me basta un canachion pien de taconi  
E un ramo de sambugo per aloro.

Stufo de segujtar vena amorosa  
No trato più d'Amor che passa el guanto,  
Che m' à fato ingiotir più legno santo  
Che no se basa in Coro a la Certosa.

Go un relogio da neve in t' una spala,  
Un altro da siroco in la zontura,  
Osservazion cavae da la natura,  
Pronostici crudeli che mai fala!

Done, mai più ve lodo, e no me chiapo  
Se questa xe la chiusa dei Soneti:  
Renonzio l' arme ai vostri moroseti,  
Seguito Giovenal, e son da capo.

Musa, me svegia un celebre motivo  
Che meteràve spìrito a un aloco,  
Che pizzega el tavan stupido e gnoco  
Nato senza comare in tel cortivo.

Per assalir un morbo velenoso  
Rabia, forza e valor vago cercando,  
So che l' impresa e che l' assunto è grandò,  
Co' è quel del Tonsi Agostinian famoso.

Quest' è l'Ipocrisia, morbo e contagio  
Che dei quaranta di chiama la piovà,  
Peste cussì nefanda che no giova  
L'aseo, la ruta, l'osmarin, nè l'agio.

Questa xe quela birba impertinente  
Che senza respetar Bole o Censure  
Con sacrilego pie rompe Clausure,  
Frequenta i Chiostri e fa danar la zente;

Gramegna maledeta, amara e salsa,  
Tossego a la virtù, solferè al Cielo,  
Sceleratezza in maschera de zelo  
Che bate in fazza a Dio moneda falsa.

A criolar, Signor, con diligenza  
El formento che dà l'Ipocrisia,  
M' insegna la moral filosofia  
Che pagia resta el fito e la semenza.

Oh quanti Farisei che soto el scorzo  
D' un' indegna pietà move a deliri!  
No so dove ch' i trova quei sospiri  
Che basta mezo a destuar un torzo.

In Chiesa i bate el peto a colpi fieri,  
Che quatro un bacalà buta in bocconi,  
Qualcun par un fachin, ma de quei boni  
Che liga e pesta pevere ai spezieri.

Se caminando i vede Cristi o Crose  
D' un infinito Amor sacratio inesto,  
I canta in primo ton, *propitius esto*;  
Ma dei falseti el Ciel no scolta l'ose.

Un tal veste a l'usanza del Cigogna  
 Co le scarpe de bruna e un capelazzo  
 Che pol servir d'ombrela in Canalazzo  
 A quei che pesca cievoli da tognà.  
 El ferariol xe fato a la Spagnola  
 Con un zipon de sagie più desmesse,  
 El porta po le cingie a le braghese,  
 E qualche par xe fate a cichignola.  
 Un tronco par el colo da far calmi,  
 Storto come le suste dei lucheti,  
 Fiamengo xe el colar, e i manegheti  
 I par quei d'un Rabin che spiega i Salmi.  
 Questo xe quel che loda l'astinenza,  
 Predica familiar dei bachetoni,  
 Ma el gode un seminario de caponi  
 Che studia de ingrassar la penitenza.  
 El dise tutto el mal del Bonacina  
 Che de la colazione defende l'uso,  
 E se 'l podesse el macherave el muso  
 Al Diana che ne sera la cucina.  
 Un pasto quando el zuna el fa in Castelo,  
 Ma un pasto che vol dir quatro disnari,  
 E che pol impenir diese boari  
 Stufi de solfisar: *va là, morèlo.*  
 No trovo in tuta l'arte dei Tentori.  
 Mistri che tenza ben come i Chietini,  
 Parlo de quei birbanti soprafini  
 Che roba a la virtù nome e colori.  
 Talun, coto al reverbero de un viso,  
 Vien via col *delectasti me in factura*,  
 E unindo al Creatore la creatura  
 Fa regola del tre col Paradiso.  
 Certi, in Cale remote (e questa è bruta!)  
 Medita più finestre che misteri,  
 E mentre i finze d'osservar piteri,  
 I varda le caselle a qualche puta.  
 Molti, che par i Maghi de Pilato,  
 D'amor no i sa capir qual sia la rede,  
 Ma in cale del Carbon spesso i se vede  
 A far l'aniversario al celibato.  
 Altri dise, ch' al senso i par de piera,  
 E con Giuseppe Casto i s' incorona;  
 Ma se i lassa el tabaro a la Parona,  
 I tira per el busto la Massera.  
 No se pol dir i sentimenti sodi  
 E l'aversion che i mostra per gabarne!  
 Ma se ghe vien qualche bocon de carne,  
 I la sa cusinar in cento modi.

Racc. Poes. Ven.

I ruza come l'onda apresso al Molo  
 Se qualchedun a Strà spesso li manda,  
 Ma ga rason la birba veneranda,  
 Perchè l'Ipocrisia no lassa el Dolo!  
 Talun va in certe Case cussi fate  
 A predicar miracoli de testa,  
 E se la nena i cata poco lesta  
 I ghe sporze segreti da far late.  
 I pia le Camariere co i Sermoni  
 Circa le obligazion del proprio stato,  
 E qualche aloca impara dal beato  
 Tegnir a man la roba dei Paroni.  
 Chi porta un Agnus-Deo, chi una Croseta,  
 Chi un Santo al fantolin, chi a siora Mare,  
 Favori che va in testa de sior Pare,  
 E scandaliza i puti anca in seleta.  
 Chi segna la solana su i casini,  
 Chi agiuta a indopionar le cosse sante,  
 Acìò vicin al sen l'occhio furfante  
 Goda la caponera e i colombini.  
 E questi è quei che vanta esser de giazzo?  
 Oh chi podesse aver le crepe fate  
 In ocasion de romperse pignate,  
 Che bel monte faria de bon terazzo!  
 Se i vede qualche Venere barona,  
 D'un lascivo penel pazzia che toca,  
 Mi credo che ghe vegna l'acqua in boca  
 Bastante a rinfrescar Piazza Naona.  
 I loda col disegno la figura,  
 La proporzion, la mina, el viso, el peto,  
 E un' estasi che vien da impuro afeto,  
 Onora più de l'arte la Natura.  
 Dopo la sbabazzada a panza piena,  
 De l'Ipocrita fin massima infame,  
 I dise, che l'autor merita fiamme,  
 E che ricerca l'opera ugual pena;  
 Malan che Dio ghe dia! quest'è un schiamazzo  
 Da farse a prima vista dei colori,  
 E no sfogar el zelo da Censori  
 Forsi dopo d'aver la copia a sguazzo.  
 Chi vol sentir a mormorar con frase  
 Ascolti de l'Ipocrita i Sermoni,  
 Consideri el parlar dei Bachetoni,  
 Cigale de Pluton che mai no tase.  
 I à certe bizzarie che toca l'osso,  
 E presto i fa d'un Santo un Anticristo,  
 Nè forfè, nè sartori el mondo à visto  
 Che sapia tagiar megio i pani adosso.

I dise: « Quela è un viso da sforzada,  
 Quel altro vive a spale de l' amiga,  
 Quel tal xe pien de bezz e nol sfadiga,  
 Qualche zio de man serve d' entrada;  
 » A Momola ghe piase le marende;  
 Lugrezia fa una vita cortesana  
 E so Mario la crede una Susana,  
 Ma l' ga rason perchè do' vechi spende;  
 » Quel povero novizzo è un soranelo  
 Ma presto el sarà bon da tacar soto,  
 La femena è d' un genio troppo roto,  
 Xe un Petener compare de l' anelo;  
 » Peraltro una bel indole ghe vedo,  
 La confessa el Piovan; ma ste cavale  
 Acusa i scapuzzoni de la Cale  
 Ma quei del Sotoportego, no credo.  
 » Ghe pratica per casa do' Francesi  
 Col brio de la Nazion tuta dolcezza,  
 Capaci de inflapir ogni belezza  
 Con qualche idropisia de nove mesi.  
 » Polonia se diletta de piteri,  
 Ma quel che dona i fiori vorà el fruto,  
 E se de le so man la fa de tuto  
 Ve lo pol dir chi gode i lavorieri.  
 » Ogni zorno, che piova o che tempesta,  
 La visita un bon sior persona dota  
 Che paga ben i merli de la cota,  
 E meglio la pedana de la vesta;  
 » Per devertir el scandalo sumario  
 Se dise, che l' è Munega acetada,  
 E che fratanto un Prete de contrada  
 • Ghe spiega su le rubriche el Breviario.  
 » Diga però la birba veneranda,  
 Che ste Congregazion in certi siti  
 No le pol esser mai dei Sacri Riti,  
 Che tuto sol finir in Propaganda.  
 » Marieta è piena d' oro e de zechini,  
 Perle, zogle, mantò, busti e carpete,  
 Che se la vol un zorno far gazete  
 No basta una tribù de Giacudini;  
 » Senza gratificar qualche divoto  
 El diavolo no comoda i so' altari,  
 E certi paramenti singolari  
 Vol dir: la grazia è fata, e sciolto el voto,  
 » Betina xe più soda e più raccolta  
 Dopo quela disgrazia sì famosa  
 De perder a una festa morbinosa  
 L' onor e la manizza in t' una volta.

» So nezza, innamorada coi latini,  
 Se fa insegnar da un Frate concordanze,  
 Ma zureria che avanti le vacanze  
 La sa i futuri misti coi supini.  
 » La fia del Masteler vedo in sconquasso  
 Confusa dal maron e da le dogie,  
 Cussì dopo che molti à messo a mogie  
 O crepa el cerchio, o va el mastelo in fasso.  
 » So' pare, che xe un omo de quei tondi,  
 Pensa de remediare co la pavèra,  
 Ma la sfesa ripiego più no spera  
 Se le doghe davanti a roto i fondi. »  
 Musa, basta cussì per dar un sagio  
 De sti basa-pilèle che à l' inzegno  
 Esposto sempre al colpo, al tiro, al segno,  
 Come xe i morteri da bersaglio.  
 Se vede sgangolir più d' un pupilo  
 A far sopra redoto col so' pianto,  
 E chi à magnà l' entrata se fa un Santo  
 Che pianze tuto el dì da cocodrilo.  
 No tira più la Vedova el livello,  
 Xe perso col Nodaro l' Istromento,  
 E sior Compare tira sie per cento  
 Pagando un bezzo d' ogio al Capitelo.  
 Per racontar le farberie segrete  
 Ghe vol altro che un pan de sete mesi!  
 Quest' è la carità dei Calabresi  
 Robar i manzi e dar i corni al Prete.  
 Ghe vol altro che un Vesparo da Morto  
 A spiegazzar l' usura d' un contrato!  
 Pol esser; ma nol crede gnanca un mato  
 Ch' abia coscienza dretta un colo storto.  
 L' ingano sti furfanti chiama zelo,  
 Sussiego el fasto, e passatempo l' ira,  
 La rognà, sensual sangue che zira,  
 E la furfanteria, voler del Cielo.  
 De l' Ipocrita infame, iniquo e tristo  
 Questa xe l' empietà, questi xe i modi,  
 Quest' è la so' moral: basar i chiodi  
 E renovar le piaghe a Gesù Cristo.  
 Mio Dio, mio Redentor, Monarca eterno,  
 Sta razza fa conosser l' impegno  
 D' andar a ca del diavolo co inzegno,  
 Piombar con bon esempio ne l' Inferno!  
 Signor, a seguir la vostra frase,  
 Deboto no gh' è peggiore che basta  
 Da travestir i lovi che le guasta  
 E mete in confusion pastori e case.



Va machiando l'onor dei vostri Altari  
 Sta' fezza abominevole d'abisso  
 Che a tanti ve fa pianzer crocefisso  
 Con lagreme ateiste e da corsari.

Le più sagre funzion questa profana;  
 Ogni liogo è teatro dei strapazzi,  
 E Case e Chiostrì e Betole e Palazzi,  
 Sia la Corte Ecclesiastica o Profana.

Quel Chietin mai no leva la portiera  
 Senza qualche Orazion giaculatoria,  
 Ma tuto quanto el filo de l'istoria  
 Lo inaspa una pension ch'el santo spera.

In la Scuola infernal dei gabamondi  
 Osservo de le femene a montagne,  
 Che Fuste desarmae da le magagne  
 Xe piene d'erba e cape soto i fondi.

Una finze vision degne de riso,  
 Un'altra vede un Anzolo in altana  
 Che strapianta lusverde e mazorana,  
 E molte fa babao col Paradiso.

Taluna, dal Mario cargà de bote,  
 Santifica el brusor e l'acidente  
 Col dir, a chi ricerca la inocente,  
 Che la bastona i diavoli la note.

Certe visita Cristi e le Madone  
 E finze de zunar el martì e 'l zioba;  
 Chi fa tre passi a l'ora e se fa goba;  
 Chi tira zo un Altar, chi le colone.

Altre ga un rosarion ch'ogni stracolo  
 Fa scantinar un fasso de madagie;  
 A l'ochio le par quei da l'antigagie,  
 Al son mi le dirla Birbe da nolo.

Molte portae da pizza religiosa  
 Va basando pianete ai Sacerdoti,  
 E dona soldi ai zaghì più devoti,  
 Sforzo baron de carità pelosa.

Diverse tien Breviario longo e breve  
 E ghe ne dise in tuto una fazzada,

Al Ciel le dà, a ogni riga, qualche ochiada  
 Come fa l'oche o l'anare che beve.

Fra tante solenissime Priore  
 Se trova qualche puta de capriccio  
 Che mostra devozion, e l'è artificio  
 Per andar in gattezzo a tute l'ore.

Xe modesto el vestìr, devoto el passo,  
 Gravissimo el parlar, pien de dotrine,  
 Le par tante novizze Capucine,  
 Ma tuto à fin de far d'ogn'erba fasso.

D'amor la credenziera tien coverta  
 Un velo atorno al busto sui cordoni,  
 Ma tante sera in portego i balconi  
 E brama che la porta resta averta.

Taluna finze l'estasi de Chiara,  
 I gusti de Teresa, el cuor, le brame,  
 Sacrilega invenzion d'anema infame  
 Che studia colpe e danazion impame.

Le sospira, ma un viso xe el motivo;  
 Le pianze, ma l'è un torto del Moroso;  
 Le prega, ma 'l fervor domanda un Sposo;  
 E tuta l'Orazion xe in genitivo.

In conclusion l'Ipocrisia, confesso,  
 Xe un'empia enormità de chi no crede,  
 Sonifero infernal contra la Fede,  
 Velen per ogni età, persona e sesso.

Orsù, benchè sia vasto l'argomento,  
 Musa, remeti pur le pive in sacco,  
 La Predica xe al fin, l'inzeppo è straco,  
 No andar in Sagrestia, nè per Convento.

Vostra sia pur, Signor, l'anema pura  
 Che v'ama, adora e serve con schietezza,  
 E a chi ve sporze un cuor tuto dopiezza  
 Ghe vegna anca el malano in sepoltura.

Benedeto sia pur l'omo onorato  
 Che dopo la sbrissada maliziosa  
 Vien a conti con Dio, paga la nosa,  
 E fa saltar l'Esercito beato.





# SECOLO DECIMOTTAVO.

---

## SCHERZI POETICI

DI

CARLO GOLDONI.

---

### I PROGETTI DI MATRIMONIO.

SONETTO.

De maridarne m'è saltà el caprizio ;  
Go diversi partii, ma vòl pensar.  
Una vechia faria da vomitar,  
La zovene sarla senza giudizio,

La bela piaserà a Sempronio a Tizio,  
Con una brutta no me vòl tacar,  
Pretenderà una rica comandar,  
Me manda una pitoca in precipizio,

La nobile sarà superba e altiera,  
Asena l'ordenaria e l'ignorante,  
E la Dona sapiente una braghiera.

Donca chi ogio da tor tra quale tante  
Che proposte me vien ? Questa è la vera :  
Vòl mandarle in malora tute quante.

### IL MONDONUOVO

OTTAVE

PER VESTIZIONE

### DI UNA MONACA BALBI.

Un certo Pasqualin vecchio onorato,  
Di casa Balbi servitore antico.  
Gondoliere dal tempo un po' fiaccato  
Ma bene in gamba, e del buon vino amico,  
Mentre era al Zante il suo padrone andato,  
(Sendo dell'ozio capital nemico)  
Sovente andava con allegre ciglia  
Del Cavaliere a visitar la figlia.

Stava la nobil giovane rinchiusa  
Nel Chiostro delle Vergini famoso,  
Dove restar dovea, siccome si usa,  
Finchè umano scegliesse o divin Sposo.  
La brama nel suo cuor tenea socchiusa  
Per disvelarla al genitor pietoso ;  
Ma il perspicace gondolier canuto,  
Ch'ella Monaca andava ha preveduto.

E mentre anch' egli il suo signore aspetta  
 Che ritorni alla patria dal Levante.  
 Per divertir la santa giovanetta  
 E le amabili sue compagne sante,  
 Forma un' industriosa macchinetta,  
 Che mostra all' occhio maraviglie tante,  
 Ed in virtù degli ottici cristalli  
 Anche le mosche fa parer cavalli.

Di tai lavori ne veggiam sovente  
 Moltiplicar dagl' inventori in Piazza,  
 E quand' è il carnovale corre la gente  
 Ad essi intorno, e per vederli impazza.  
 Suonar tamburi e schiamazzar si sente,  
 E con un soldo si trastulla e guazza  
 E si vedon battaglie e ambasciadori,  
 E regate e regine e imperatori.

Queste macchine, dette volgarmente  
 Il *Mondonovo*, mostran dell' ingegno,  
 E il bravo Pasqualin, ch' uomo è di mente;  
 Una farne ancor ei preso ha l' impegno.  
 Un giorno il galantuom segretamente  
 Di veder l' opra sua mi fece degno  
 In cantina, noi due soli soletti,  
 Fra barili, fra tazze e boccaletti.

« Questo' (disse il buon uom) questo, paron,  
 Xe un laurier che ò fatto de mattina,  
 Per far un puoco de conversazion  
 In Parlatorio co la Paroncina.  
 Ma perchè go piaser de parer bon  
 Voràve che ghe dessi un' ochiadina,  
 E co avè visto, che disessi un puoco  
 Se merito del bravo o de l' aloco. »

Sì, caro Pasqualin, ben volentieri  
 Lo vedrò (gli rispondo), e di buon cuore  
 Vi dirò schiettamente i miei pensieri,  
 Perchè vorrei che vi faceste onore.  
 Prende un fiasco alla mano e due bicchieri,  
 E presentami un vin d' aureo colore,  
 Dicendo: « Questo qua, Paron mio caro,  
 Da la tosse el defende e dal cataro.

» E vòl che tra de nu sel cocolemo  
 Fina l' ultima giozza, e allegramente,  
 Da Sanzuane, voi che se godemo,  
 Basta che mia mugier no sapia gnente.  
 A la salute del Paron, bevemo:  
 Benedeto sto vin dolce e recente. »  
 Prima ch' l' avessi il mio bicchier vuotato  
 Tutto il fiasco da sè si è tracannato.

Bevuto il suo caffè da me si parte  
 E si accosta alla macchina quadrata;  
 Separa alcuni fili e li comparte,  
 Ed apre un finestrin sulla facciata;  
 Io m'accosto a guardar da quella parte,  
 E veggio una distanza smisurata,  
 E parmi di sentir di qua e di là  
 Il tamburo suonar tarapatà.

E sento a dir dal bravo Pasqualin:  
 « Vederano da la prima veduta  
 Amor, che xe vestio da fantolin  
 Al trotolo zioyar con una puta;  
 Ma ela, che no gh' àno sto morbin,  
 Se tira da una banda, e no se buta.  
 Amor ghe dise: Premi, vita mia,  
 E la puta stalisce, e fuze via.

» E vederano abiti e diamanti,  
 E un monte de ducati e de zechini,  
 E vederano i cavalieri amanti  
 Che fano i ganimedi e i paregini,  
 E questi sono tuti quanti incanti  
 Che fano a la dongela i diavolini;  
 Vederano che lei si fa la croce,  
 E tuti quanti scampa via veloce.

» Osservano, signor, da quella banda  
 Se forma un belitissimo bancheto;  
 D' ogni grazia de Dio, d' ogni vivanda  
 Ghe parechiano el megio e 'l più perfeto.  
 Dise quel camerier: se la comanda,  
 Questo è vin de Vicenza neto è schieto;  
 Quando el vin de Vicenza e recusato,  
 Bisogna dir che la sia santa afato.

» Vardano sta dongela benedìa  
 Che desprezia sto mondo, e no ghe bada.  
 Vardano che deboto scampa via.  
 Tiritopete zò: Dov'ela andada?  
 Vardano che la tola xe sparia.  
 Osserverano la scena scambiada.  
 Notano la prestezza. In t' un momento  
 Vardano che la puta xe in Convento.

» Osservano el famoso monistier  
 Che sono de le Vergini chiamao,  
 Dove sta zentildona con piaser  
 S' à arlevà, e xe tornada da recaò.  
 Notano la grandezza e 'l bel veder  
 Da quel gran orto che va fin là in cao.  
 Vardano quelle Cele e 'l Refetorio,  
 E la Chjesa e la Porta e 'l Parlatorio.

» Tuto xe belonazzo, ma i m' a dito  
 Che una Caneva gh' è superbonazza  
 Dove che ghe xe drento de pulito,  
 Boca che vustu, e che in tel vin se sguazza,  
 Osserva adesso el Campaniel fornito  
 Da pute che se gode e se sbabazza.  
 Osservano lassuso quele do,  
 Che din don din, din don, fa campanò.

» Fano gran festa perchè son tornata  
 La compagna che avevano smaria,  
 Come giusto el pastor quando à trovata  
 La piegorela ch' era andata via.  
 Vedano più de tute consolata  
 La Pasqualiga ch' è so amia, zia,  
 Munega veramente religiosa,  
 Dama de tuto ponto e vertudiosa. »

Confesso che un piacer sì raro e strano  
 Ogni maggior divertimento avanza.  
 Bello è sentir col barbaro toscano  
 L' idiota Venezian far mescolanza ;  
 Bellissimo è il goder di mano in mano  
 Piantata una solenne sconcordanza,  
 E sentir a chiamar la vergin pia :  
*La piegoreta che gera smaria.*

Mosse i fili il buon vecchio, e a dir riprese :

« Vardano adesso de le cosse tante.  
 Se cambiano la scena, e quel paese  
 Che vederano è l' Isola del Zante,  
 Vardano là quel Cavalier cortese  
 Mandà da la Republica in Levante.  
 Vestio de rosso, oh come ch' el par bon  
 Zelenza Nicoletto mio paron !

» Vederano là suso in quel Castello  
 De di, de note so Zelenza atento,  
 E vederano la giustizia e 'l zelo,  
 Come l' à sostenudo el Regimento.  
 Vardano i Gregghi che confessa in elo  
 Gran saver, gran dolcezza e gran talento.  
 Vardano adesso quando ch' el va via  
 Come pianzono tuti in compagnia.

» L' Isola se desfanta, e vederano  
 La città de Venezia e 'l Lazareto.  
 Vardano quante gondole che vano  
 A darghe el ben tornaio con vero afeto.  
 Adesso a quel balcon osserverano  
 Pasqualin presentarse con respeto,  
 E sconzurarło ch' el lo torna a tor  
 In gondola a servir fina ch' el muor.

» Vardano el Cavalier che ghe respose :  
 So che un dì te piaseva a butar su.  
 Vardano Pasqualin che ghe propose :  
 Zelenza benedia, no bevo più. »  
 Indi rivolto a me : « Non go più ose, »  
 Disseme, « e seguitar non posso più  
 A mostrarve, paron, el Mondonovo  
 Se no me torno a rinfrescar da niovo. »

E in così dir prendendo un boccaletto,  
 Cava la spina ad un barile alzato,  
 E l' empie, e si ristora il poveretto,  
 E al solito lo bee tutto in un fiato,  
 Questo non si può dir vizio o difetto,  
 È la necessità che l' ha spronato.  
 Ei patisce una sete aspra, bestiale,  
 E l' acqua non gli piace e gli fa male.

Dopo un breve ristoro a dir ritorna :

« Vedarò, vederano, osserverano  
 De casa Balbi la famegia adorna.  
 Tutti a lodar no basteràve un ano !  
 Quela dama, che fa, che va, che torna,  
 Che opera sempre e ferma mai no stano,  
 La xe Zelenza Beta mia parona,  
 Che tra le done merita corona.

» Oh che bona mugier ! mo co' amorosa  
 Che la xe per i fioi, per la so casa  
 Qualche volta co mi la xe stizzosa,  
 Ma se la ga rason convien che tasa.  
 Angarana la xe, stirpe famosa,  
 E la zente da ben xe persuasa,  
 Che sta nobil Famegia e de bon cuor  
*Merita ogni grandezza, ogni splendor.*

» Vardano là quel Puto zentilomo  
 Che à messo vesta, Zelenza Tomaso,  
 El xe zovene assae ma el ga de l'omo,  
 D' ogni fior de bontà lui sono el vaso ;  
 Belo, garbato e dolce co' fa un pomo ;  
 Che sa, che intende, che non parla a caso,  
 E che a Consiglio se farano onore,  
 E darano alegranza al Genitore.

» Vardano i altri cinque so fradeli,  
 (Missier Domenedio li benediga !)  
 Osservano l' amor che tra de eli  
 Fa che la pase sia de tuti amiga.  
 Per grazia del Signor no i xe de quel  
 Che fa sussuro e le famegie intriga,  
 Che nassa desunion no gh'è pericolo ;  
 Tutti boni dal grandio fina al picolo.

» Sier Orazio, che ga disisset'ani,  
 Xe el più bon puto che ghe sia a sto mondo;  
 L'ama la quiete e nol se tol afani,  
 Casalìn, facendin, lesto e giocondo.  
 Anca sier Marco, che ga manco ani,  
 Xe un puto de bon genio e de bon fondo,  
 E che col tempo mostrerà anca elo,  
 Che àno bon intendachio e bon cervelo. »

Suonar odo in un tratto una trombetta,  
 E sparir veggio la goduta scena,  
 E un' ampia Chiesa nella macchinetta  
 Veggio apparir di popolo ripiena,  
 Mi sorprende, mi piace, e mi diletta  
 D'un palco musical la vista amena,  
 Io dico a Pasqualin: Bravo davvero,  
 Lodo l'esecuzion, lodo il pensiero.

Veggio da un lato una gentil damina,  
 E sento il vecchiarèl che si ragiona:  
 « Osservano Zelenza Contarina  
 Che un anzolo la par proprio in persona  
 Vardano con che grazia la camina;  
 Tuti la varda, tuti la minzona;  
 Ecola inzenochiada da una banda,  
 E i Preti che ghe canta Messa granda.

» Osservano a sonar viole e violini,  
 Osservano i sberlefi dei cantanti,  
 E vardano quei cari motesini  
 Dei zendaeti che se fica avanti.  
 Vardano per la Chiesa i lecardini  
 Che ga paura de imbratarse i vanti,  
 Vardano la Parona che compida,  
 Le zentildone al Parlatorio invida.

» Vardano adesso el Parlatorio pien  
 De dame e cavalieri a marteletto,  
 E l' rinfresco badial che va e che vien  
 Dove tanti golosi fa bancheto.  
 Vardano adesso Pasqualin che tien  
 Anca elo in manina el so sorbeto;  
 No miga de naranza o de limon  
 Ma de sugo de ua sincero e bon.

» Vardano quel scrocone che à bevù  
 Sete sorbetti e cinque chicolate.  
 In quel cantone osservano colù  
 Che à impenio le scarsole, e se la bate.  
 Queste ch'è qua, per dirla tra de nu.  
 Se ghe dise de posta baronate,  
 Se el fusse vin compatiria l' usanza;  
 Ma impenirise de aqua? oh che increanza!

Tira un nuovo spaghetti, e si tramuta  
 La scena, e grida il bravo Pasqualin:  
 « Osserverano l' ultima veduta,  
 De la Fonzione vederano el fin.  
 Vardano adesso che a la santa Puta  
 Ghe tagiano i cavei, no per morbin,  
 Ma col Tasso dirò: *Perchè le indegne  
 Sprezza di serviù misere insegna.*

» Osservano che adesso i la despogia  
 Dei abiti de sea, d' oro e d' arzenzo.  
 Vardano adesso che sta cara zogia  
 Da Munega se mete el vestimento.  
 Benedeta da Dio! de bona voglia  
 La saluda i parenti, e la va dreanto,  
 Dove la ga da star fin che la muor- . . .  
 Oh Dio! no posso più me crepa el cuor. »

Sento che più non parla; alzo lo sguardo,  
 Curioso di saper se avea finito,  
 E veggio lagrimante il pio vecchiaro,  
 E che il pianto il parlar gli avea impedito.  
 Dicogli: come? un uom forte e gagliardo  
 Per sì poco si perde ed è avvilito?  
 'Morta non è l' amabile donzella,  
 Ma vive in Dio più vigorosa e bella.

Balbettando risponde il gondoliere,  
 Interrotto dal pianto e dal singhiozzo:  
 « Ah sior sì, ste rason xe sante e vere  
 Ma no le basta a consolarme un giozzo,  
 E ste lagreme mie le xe sincere,  
 E vogio per dolor farghene un pozzo,  
 Perchè xe vero che l'è viva e sana,  
 Ma per sempre da nu la sta lontana.

» E dasseno, paron, me vien la stizza  
 Co penso che l'è andata in monistier.  
 Se l'avesse volsuo farse novizza.  
 Chi sa che mi no fusse el so provier?  
 Che gnancora no son vecchio panizza,  
 E so far, co va fato, el mio mistier,  
 E in t' un groppo a mostrar la mia bravara,  
 Quando son a dezun no go paura,

» Ma pazienza per mi, che a mantegnirme  
 Fin che vivò el paron ga da pensar;  
 Ma de pianzer, per dia, no so tegnirme  
 Co penso che sta Puta à da penar;  
 Che no basta, sior no, che i vegna a dirme:  
 L' à da esser contenta e giubilar.  
 Dal mondo al monistier gh'è differenza,  
 L' à da far sacrifici e penitenza.

» Croo, ceta, orazion e disciplina,  
 Obedienza, fadighe e povertà;  
 Oh povera Zelenza Contarina!  
 La me despiase e la me fa peccà;  
 Propriamente me sento stamattina  
 El cuor, co se sol dir, tanto ingropà  
 Che se no togo un poco di ristoro  
 Da la desperazion sento che muoro. »

E in così dir ritorna al barilotto,  
 E beve, e si conforta il vecchierello.  
 Vuol ch'io pur beva, e mi offerisce il gotto,  
 Soggiungendo che il vin fa buon cervello.  
 Lo ringrazio di core; e poi di botto  
 Lo procuro istruir sopra di quello  
 Che non intende, o no conosce, o crede,  
 Col lume del Vangelo e della Fede.

Voi (dico) Pasqualin, voi, gondoliere,  
 Non avete con metodo studiato,  
 Ma la macchina vostra dà a vedere  
 Che una talpa, un babbeo non siete nato:  
 Dunque mi proverò farvi sapere,  
 Che dal vostro pensier siete ingannato,  
 Se vi pensate che la padroncina  
 Più felice non sia d'una regina.

Figuratevi pur che fosse sposa  
 D'un ricco cavalier, bello e garbato,  
 E che a lei non mancasse alcuna cosa  
 Per rendere invidiabile il suo stato;  
 Credete voi che qualche spina ascosa  
 Non avesse a provar del mondo ingrato?  
 Voi siete servitor ma, lo sapete,  
 E i sposi d'oggi li conoscete.

Corre oggi giorno una moderna usanza  
 Che chiamasi servir semplicemente,  
 Ma questa servitù talor si avvanza  
 E diviene un po' troppo confidente.  
 Se la sposa si adatta in consonanza,  
 Suol far anch'essa mormorar la gente;  
 E se all'uso comun non aderisce,  
 Soffre, piange, si lagna e ci patisce.

Dato ch'ella incontrasse un matrimonio  
 Con vera pace e col timor di Dio,  
 Di cui si può vedere un testimonio  
 Fra la vostra padrona e il padron mio,  
 Dove della discordia il rio demonio,  
 Nè il geloso martel giammai s'udìo,  
 Non crediate che avesse il cuor giocondo,  
 Che un vero ben non può godersi al mondo.

Racc. Poes. Ven.

Se non sapete di filosofia,  
 Filosofo vi faccio in un momento.  
 Perchè felice in questa vita un sia,  
 Basta che del suo stato ei sia contento;  
 E tal felicità credo si dia  
 Più facile fra i muri d'un Convento;  
 Perchè dall'occasione nascon le voglie,  
 E mancando il poter crescon le doglie,  
 Ma teologo ancora i' voglio farvi,  
 Giacchè avete buon senno e buon cervello.  
 Pasqualin caro, posso assicurarvi  
 Che l'amore di Dio fa tutto bello.  
 Se poteste voi pure immonacarvi,  
 Credetemi, vel giuro da fratello,  
 Che ripieno ancor voi d'amor divino  
 Sareste un altro, e lascereste il vino.

Tenero Pasqualin si batte il petto,  
 Dice: *Mea culpa*, e mostrasi pentito  
 D'aver detto finor quello che ha detto  
 Del santo monistero, inavvertito.  
 Cerco d'incoraggiare il poveretto.  
 E dicogli: su via vediam finito  
 Della macchina vostra il bel lavoro,  
 Che, a dir la verità, vale un tesoro.

Ei dice: « Vederano la dongela  
 Co le muneghe aliegra in compagnia,  
 E che tute ghe dicono sorela,  
 E la togono in mese e vano via.  
 Vardano che la va in te la so ceta,  
 E per adesso l'opera è fenìa.  
 Prego che chi la vede no la sprezza:  
 Pace con questo, sanità e alegrezza. »  
 Replico al gondolier: L'arte e l'ingegno  
 Della macchina vostra io lodo e approvo;  
 E non mi par della damina indegno  
 Questo vostro bizzarro Mondonovo:  
 Anzi adesso con voi prendo l'impegno,  
 (Se stanco un giorno di compor mi trovo)  
 Che andiamo per il mondo voi ed io,  
 Mostrando in piazza il Mondonovo. Addio.

## LA CONZATESTA

DIALOGO

PE GLI SPONSALI ZEN-LOREDAN.

*Lugrezia Conzatesta, Pasqueta Trafeghina,  
e Chechina so fia.*

LUGR. Pute, via, vegnì qua; sentève zo;  
Xe sonà terza; no gavè sentio?  
Fe' su ste scufie; destrighève, e po  
Tolè su le cascade e deghe drio.  
Drento d'ancuo s'à da fenir, se no  
No se va a casa co no xe fenlo,  
Cate, lavè sti merli, e vu Betina,  
Agiutème a fornir sta mantelina.  
Presto e ben se se pol, perchè savè  
Sti laorieri chi me li à ordenai.  
Sior Anzola Scachla la cognossè;  
La xe una dona che no tase mai,  
Sempre con ela da crial ghe xe:  
O che i merli ghe par mal destirai,  
O che i ponti xe longhi; el xe un imbrogio  
Co ste done sotile co fa l'ogio.

Vegnirà adessadesso sior Compare;  
Beveremo el caffè, marendereemo;  
Ma col xe qua no me sechè la mare,  
No stè a tirar le rechie co parlemo;  
El xe un ometo che me fa da pare,  
Sarà dies' ani che se cognossemo,  
Malizia tra de nu no gh'è mai stà,  
Ma volemo parlar con libertà.

Senti che i bate. Vardè vu Anzoleta:  
Se el xe elo, tirè. Tolè Chechina,  
Ve consegno sti' aghi, oe Lisabeta,  
Tolè ste azze, e fe quella pietina ....  
Oh vardè, chi xe qua? Sioria, Pasqueta.  
Che bon vento ve mena sta matina?

PASQ. Dixè fia mia, gaveu da laorar?

LUGR. Poco; sentève zo. PASQ. V'ò da parlar.

LUGR. Pute, cavèghe quel zandà da testa.

PASQ. No n'importa, lassè che vago via,  
Quel che ò da dir ve lo dirò a la presta:  
Gh'è una bona ocasion per vu, fia mia.  
So andata ancuo, perchè doman xe festa,  
A comprar de la roba in Marzaria,  
E a parlar ò sentio de un noviziado  
Tra do nobili case, e d'alto grado.

Subito vu me se' vegnua in pensier,  
Questo el sarave un bocconcin da re.  
LUGR. Via da brava portème del laorier,  
Una man lava l'altra, za el savè;  
Mi, grama puta, fazzo sto mistier,  
Perchè son sola, e intrae no ghe ne xe.  
E bisogna che cerca le ocasion,  
Per mantegnirme con reputazion.

PASQ. Ma za che se' una zovene valente,  
Ve dovaresti maridar; xe ora.

LUGR. Zito, tassè che quèle pute sente ....  
Frascone, tendè a vù; laorè in bon' ora.  
Vardè là che petazze! co gh'è zente  
Le vol star a ascoltar, no le laora.  
Adessadesso togo la bacheta ....

Sti novizzi chi xei? disè Pasqueta.

PASQ. I è do novizzi da la sorte uniti,  
Ma con amor, credemèlo, i se tol.  
La puta è de Ca Zen dai Gesuiti,  
Casa antiga, fia mia, casa che pol.  
Una puta che à meriti infeniti,  
Savia, bela, brillante co fa el Sol;  
Domenego (el novizzo) Loredan,  
Zovene, zentilomo Venezian.

LUGR. Grazia, virtù, bellezza e nobiltà  
Le xe cosse che piase e che fa onor;  
Ma per mè ve dirò la verità,  
I bezzì è quelli che me sta sul cuor.  
A l'ordine la puta i meterà  
Da par soo, che vol dir con del splendor;  
Se i me tolesse mi per laorar,  
Bona zornada spereria de far.

PASQ. Certo che se i ve dà la comission  
De proveder i merli che ghe vol,  
Podè chiapar la vostra provision  
Da chi li vende, e po da chi li tol  
Se dà da inteder che gh'è un'ocasion  
De fora via che vantazar se pol,  
I se paga de manco, e quel de più  
Se spartisse da amighe tra de nu.



LUGR. Me fe' da rider co sti avvertimenti.

No son gonza, sorela, e lo savè.

Ma via no se perdemo in complimenti.

PASQ. Aspetto la mia puta. LUGR. Se savè,

Per le nozze farai do fornimenti?

PASQ. Certo do fornimenti, e fursi tre;

Zentilomeni i xe che pol, che sa,

Che no fa torto a la so nobiltà.

Savè che mi cognosso tuti quanti;

Se pratico, se so, se me n' intendo,

De i Loredani no se va più avanti,

I ga a Venezia un parentà stupendo;

I à avà dei Senatori tanti e tanti ....

LUGR. Ste cosse che xe qua mi no le intendo,

Co no i spende da mi, co no vadagno,

Co ste grandezze cara sia, no magno.

PASQ. Ma ste grandezze, lo savè, xe quele,

Che i povereti fa magnar de più.

Co se marida de ste prime Stele

Da sperar ghe xe sempre anca per nu.

No i ghe farave tante cosse bele,

No i spenderave tanto, cara vu,

Se sta novizza che servir podè,

No fusse de quel sangue che la xe.

O' sentio cosse de sta Casa Zen,

Che per Diana de dia fa inamorar.

Dosi, Procuratori .... e sarà ben

Mil' ani che i se sente a menzonar;

De sta casazza tuto el mondo è pien,

I s' à visto le armade a comandar,

Che omeni! che teste! i so mazori

Fina in Persia xe stadi ambascadori.

LUGR. Vu mo come saveu tutte ste cosse?

PASQ. Le so che ma l' à dito un galantomio,

Servitor de sta casa che cognosce

Qnel benedeto caro zentilomo,

Pare de la novizza. Su le mosse

El xe per andar via sto pover omo;

E avanti de partir, l' ò sentio mi

De i so boni paroni a dir cussì:

Za che la sorte me fa andar lontan

Per qualche mese da Venezia mia;

Za che a Mantova per genio, e po a Milan

Amicizia me chiama e cortesia,

E co sti Sposi se darà la man

Presente el mio destin no vol che sia,

Col cuor; dove sarò, col mio respeto

Per lori pregherò Dio benedeto,

Che li renda felici, e che se unissa,

Co la man, co la fede el genio, el cuor,

Ch' el piasser de quel di mai no fenissa,

Ma ch' el diventa sempre più mazor;

Ch' el Signor li conserva e benedissa,

E ghe conceda i fruti de l' amor

Per colmar la famegia de' contenti,

Per gloria de la patria e de i parenti.

LUGR. Caspita parlè ben, siora Pasqueta!

Ste bele cose chi ve l' à insegnæ?

PASQ. Le ò sentie a dir ste cose dal Poeta,

Mi go bona memoria, e le ò imparæ.

LUGR. Laoren, frascone, o togio la bacheta?

Vardèle là, ste misere, incantæ.

PASQ. Chi no s' incanteria, cara Lugrezia?

Sti novizzi à incantà meza Venezia.

LUGR. Animo deghe drio; via da valente,

Fenimo avanti sera sto laorier,

Chi no fa presto no vadagna gnente,

Non gh' è più da far ben in sto mistier!

Ogni dì per Venezia a dir se sente:

Xe pien de. Conzateste ogni Sestier,

E po per sparagnar quatro gazete,

Tute fa scufie e tute fa stolete.

Se in ste ocasion co un poco de giudizio

No se se fa la ponga, la va mal;

Cara Pasqueta co sto spozalizio

Go speranza che femo carneval;

Inventerò ben mi col mio caprizio

De le galanterie che poco val;

Per farme pagar ben za so l' usanza;

Basta dir, che la moda xe de Franza;

Basta che i primi merli sia perfeti,

E me contento de far su e su;

I segondi più tondi e più lascheti

Farò che i sia per vadagnar de più.

Anca nu femo i nostri negoziati,

Za quei che compra se riporta a nu;

E se ai marcanti demo del vadagno,

Li podèmo comprar con del sparagno.

La scufia co le coe ghe vol seguro

Le cascade a tre man, e 'l petoral;

Se qualche quarta sparagnar procuro,

Se la tegno per mi, no ghe xe mal;

Za de ste cose chi no sa xe a scuro,

E co se taglia ghe ne va de mal;

Anca nu femo come fa i sartori:

La bandiera de merlo co fa lori.

PASQ. I bate ; xe mia fia. LUGA. Pute tirè ....

Vardè colà che sta col muso in sen ;

Goba, se fe cussi deventerè ;

Suso la testa. La me fa un velen !

PASQ. Zito, cara Lugresia, no criè,  
Che xe qua la mia puta, e spero ben.

LUGA. No le vol obedir co no se cria :

Oe ! Chechina, bondi. PASQ. Bondi, fia mia.

CHEC. Patone. PASQ. Cara fia, ti è molto rossa !

CHEC. O' tanto taminà ! LUGA. Cossa vol dir

Che la xe granda, e par che no la possa

Le parole gnancora proferir ?

PASQ. Povereta, la ga la lengua grossa,

La xe mal sana, e no la pol tachir.

E cussi, vita mia, cossa t'ài dito ?

CHEC. I m' à dito tussì .... LUGA. Mo via, pulito.

CHEC. I m' à dito tussì .... petè ò trovaio

Tior Tantolo, fadelo de la Muta ....

E el m' à dito tussì .... te daretao,

L' à parlao ta matina to la puta.

E tante bele tosse i d' à mandao.

E te la roba la de fata tuta,

E el m' à dito tussì .... te antuo o doman ....

Tome, te dise ? ... i de darà la man.

LUGA. Cossa diavolo disela ? PASQ. Ho capio.

Cara Lugrezia, se' desfortunada ;

A dir da mio Compare l' à sentio

Che la roba xe fata e xe mandada ;

Che ancuo o doman tuto sarà fenio,

Che so Zelenza sarà maridada ;

Mi l' ò capia che la vol dir cussi.

No xe vero Chechina ? CHEC. Tiora ti.

LUGA. Per cossa me vegniù donca a parlar

Fora de tempo, e fora de rason ?

PASQ. Cara vu no me ste a rimproverar.

Gradi el bon cuor e la bona intenzion.

Quelo che no s' à fato se pol far.

El vadagno, fia mia, xe sempre bon.

La Sposa adesso no podè servir ;

Fursi la servirè per l' avegnir.

Credeu che quando la sarà sposada

No la comprerà più merli e stolette ?

Quando la roba xe un tantin fruada,

Se desfa, se renova e se remete,

Abiè pazienza, sarà consolada,

E ghe faremo de le faturete.

Preghemo Dio che la conserva in ton.

LUGA. Me despiase aver perso sta ocasion.

CHEC. Oe, tiora mare, la noviza ò vito.

To bela te la xe ! Tì in velità.

E po anta tior Tantolo m' à dito,

Te la xe bona, te no se ne dà.

PASQ. Lo so anca mi ; la sa parlar pulito :

E 'l retrato la xe de la bontà ;

La ga su quel visin do riose bele,

E do ochi la ga che par do Stele.

Quel poeta del qual mi v' ò parlà ;

Che xe de Casa Zen bon servitor,

Qualche volta con ela el s' à trovà,

E d' esserghè vesin l' à avù l' onor.

D' averla cognossuda el m' à contà

Piena de gentilezza e de bon cuor :

Spiritosa, modesta, e non altiera,

Piena de bone granie e Dama vera.

E se savessi cossa che el m' à dito

De so Zelenza Padre e del Fradelo,

Virtuoso, zentil, savio, pulito,

Amà da tuti, e benedio dal Cielo !

E so Zelenza Madre porta scritto

In fronte el cuor pien d' un eroico zelo.

Tante el me n' à contà de sta famegia

Che a sentirle la xe una maravegia.

LUGA. Più che me ne disè, cara sorela.

Più me fe vegnir vogia de obedirla.

PASQ. Una Dama zentil, graziosa e bela,

Tuti gaverà vogia de servirla.

LUGA. Se arivo un zorno a laorar per ela,

Certo vòl far de tuto de gradirla.

E l' onor de servirla è tanto grando,

Che la vogio servir anca de bando.

PASQ. Checa, Lugrezia, vegni via con mi.

LUGA. Dove voleu menarme ? PASQ. Voi che an-

A basarghe la man. CHEC. Oh tiora ti. (demo

LUGA. Nu altre de sto onor degne no semo :

PASQ. La xe bona con tuti che mai pi,

E sta grazia anca nu la gaveremo.

CHEC. E anta da marendan la ne darà.

LUGA. Tì parli che ti par un papagà.

PASQ. No la mortifichè, povera grama ;

Parleu pulito ? ringraziè el Signor.

Andèmo tute a reverir sta Dama,

E come che se pol, femose onor.

LUGA. Mi certamente ghe dirò la brama,

Che ò de servirla, e lo dirò de cuor.

CHEC. E mi vodo tantarghe una tanzon.

PASQ. Disela schieta, che pararè bon.

CACCH. *Novizeta bela bela,  
Tome riosa e tome stela,  
Prega el ciel, bela spozina,  
Te la zera e la matina  
El novizo zia ton vu,  
E zempre de più  
Ve voglia del ben.  
Tarega te el tuor ve bagola in zen.  
Dopo un an, te zìè stada  
Tol novizo tompanada,  
Prego el Ciel, vizeto belo,  
Te 'l ve dona un bel putelo,  
Te tonsola el vostro tuor,  
Mo te bel' onor  
Te vu d' averè,  
Quando la mama d' un maschio zarè !*

## CAPITOLO

PER VESTIZIONE

## DI UNA MONACA VENDRAMIN.

## AL FRATELLO DELLA SPOSA

PROPRIETARIO DEL TEATRO DI SAN LUCA.

In sti set' ani, che con mio contento  
Servo Ca Vendramin, averò scritto  
Per Muneghe o Novizze più de cento,  
E tra de mi più de una volta ò dito :  
Quando Ca Vendramin farà fonzion,  
Bisogna far qualcosa de pulito.  
Oltre el piasser, ghe xe l' obligazion,  
E per grazia e per lege e per afeto ;  
So Zelenza Francesco è mio Paron.

E ela, Sier Alvise Benedeto,  
So che la ga per mi tanto buon cuor  
Che l' ocasion de ringraziarla aspeto.  
El caso xe vegnù. Nostro Signor  
A' chiamà la Sorela al monestier ;  
Questo el tempo saria de farne onor.  
Ma sul ponto de far el mio dover,  
Vien la freve terzana a disturbarne,  
E go altro, per dirla, in tel pensier.  
Vien el medego al leto a visitarne ;  
Vago in suòri al nome de la china,  
Ma a la fin son costreto a rassegnarme.  
Oh Sier Apolo bisogna che m' inchina !  
Fin che togo el remedio i vol che tasa ;  
E mi ascolto e obedisso a testa china ;  
Ma credela, Zelenza, che me piasa  
De star in ozio ? no, da servitor.  
Anzi ò gusto de far, co stago in casa.  
E adesso proprio me fa mal al cuor  
El dover star in sta ocasion de bando ;  
Ma qualche libertà me voglio tor.  
Togo la pena in man de quando in quando,  
Me sero drento che nissun me veda,  
E qualcosa vòl far de contrabando.  
Sto Vestiario no so quando el suceda,  
Ma se adesso no fazzo, st' altro mese  
Al Teatro bisogna che proveda.  
Che se in ogni fonzion de sto paese  
Spendèrò i zorni ne le rimè e i canti,  
A la famegia no farò le spese.  
Donca, Zelenza, come ò dito avanti,  
Qualcosseta farò, cussì de sbalzo,  
E un pochetto a la volta anderò avanti.  
Per solito in compor poco me alzo,  
Ma adesso piuchè mai starò basseto,  
Che la testa va via se gnente incalzo,  
Inventarme voria qualche sugeto  
Con qualche novità, che a la Sorela  
De profito servisse e de diletto.  
Uua Comedia no saria per ela ;  
Ma pur da le Comedie se recava  
Qualche senso moral, bon per la Cela.  
Co gera in leto ruminando andava  
Tra de mi le Comedie che ò composto  
Per la so' Compagnia famosa e brava.  
E de la stampa l' ordine disposto  
Me svegiava in pensier qualche argomento,  
Che no me par dal monestier discosto.

L' onestà, per esempio, del bel talento  
 De la SPOSA PERSIANA, e el bon costume,  
 Non sarà da sprezzarse in t' un Convento.  
 Se tanto fa de la Natura el lume,  
 Quanto à dà far de più chi à abù la sorte  
 De conosser del cielo el vero Nume?  
 Se FATIMA è costante al so consorte,  
 Quanto Maria Lugrezia al sacro Sposo  
 Sarà sposa fedel fin a la morte!  
 Che bruta bestia xe un MARIO ZELOSO!  
 Pezo, se d' AVARIZIA el vil difeto  
 Più secante lo rende e tormentoso.  
 Un esempio sì rio con più diletto  
 Fa le pute scampar dal matrimonio,  
 \* Corendo in braccio de Dio benedeto.  
 A cosa serve un rico patrimonio!  
 Che val el dominar, el devertirse,  
 Se in te le case penetra el demonio?  
 Per non aver un zorno da pentirse,  
 Sta zentildona piena de virtù  
 Col santuario l' à volesto unirse.  
 Chi conversa col mondo in zoventù  
 Aquista tanti pregiudizi e tanti,  
 Che in vecchiezza impazzisse ancora più,  
 Fenà l' età de cultivar i amanti,  
 Vol deventar la dona leterata,  
 Professori tratando e diletanti;  
 Ma perchè per sto far no la xe nata,  
 La se rende ridicola a la zente  
 Come fa la mia VEDOA INFATUATA.  
 Xe da lodar sta Vergine prudente  
 Che ai santi studi del divin Vangelo  
 Applica con profitto el cuor, la mente.  
 De zoventù no ghe n' importa un pelo:  
 L' anema è sempre bela, in ogni stato,  
 Sempre la piase e la xe cara al Cielo.  
 Se lecito ghe fusse in tel so stato  
 Lèzer quacossa per divertimento,  
 El FILOSOFO INGLESE no xe ingrato.  
 De quando in quando qualche sentimento  
 La troveria d' una moral cristiana,  
 Che daria compiasenza al so talento.  
 D' una filosofia discreta e sana  
 Se compiasse e diletta un cuor devoto,  
 E xe scala del Ciel la scienza umana.  
 E la luse e i colori e el tempo e el moto  
 E l' ordine dei Cieli e de le sfere  
 El supremo poter de Dio fa noto.

Basta che nelle scienze lusinghiere  
 No se perda la mente, e no s' impegna  
 Ne le dispute odiose giornaliere.  
 La toga esempio da la savia e degna  
 Dama che l' à arleveda e messa al mondo;  
 Madre amorosa che a le mare insegna.  
 Su st' argomento nobile e fecondo  
 D' una MADRE AMOROSA ò dà a la luse  
 Una Comedia nel tomo secondo.  
 Se no l' avesse le Comedie escluse,  
 La sentiria sta santa Munegheta  
 Fin dove al mondo la passion conduse,  
 E la diria: Sia tanto benedetta  
 La mia cela, el mio leto, el mio breviario.  
 E la mia povertà santa e negleta.  
 I fioli buta mal per ordinario,  
 E co i xe boni cossa se vadagna?  
 Quanto xe megio el viver solitario!  
 Qualchedun crederà che una cucagna  
 Sia la città, l' autuno, el carneval;  
 E el passar ai so tempi a la campagna;  
 Ma tuto el ben xe framischià col mal:  
 Voler e no poder xe cossa dura,  
 E la critica è resa universal,  
 Ai nostri zorni la vilegiatura  
 Xe ridota un incomodo, un intrigo,  
 Dove a la libertà se dà pastura.  
 Una prova real de quel che digo.  
 Mostra quella BAILANTE CAMERIERA,  
 Fata al contrario del costume antico.  
 Pur tropo ai nostri zorni una massera  
 Dà dei tristi consegi a le parone,  
 E se dise brillante una ciarliera;  
 E i vecchi incapriciai de ste frascone  
 I rovina la casa e la famegia,  
 E el bagolo i se fa de le persone.  
 Sti vecchi co l' età no i se consegia,  
 I pensa a tuto, fora che a la morte,  
 E al mio VECCHIO BIZARO i se somegia,  
 I à sempre caminà per strade storte,  
 E incalidi nel vizio e nel diletto  
 I trova chiuse a la rason le porte,  
 E torno a dir quel che a principio ò deto,  
 Bisogna usarse in zoventù a far ben  
 Per aver in vecchiezza un cuor perfeto.  
 El mio FESTIN xe veramente pien  
 De quei gusti che core ai nostri dì,  
 Gusti che soto el miel sconde el velen;

E da certe lezion me par a mi  
 Se possa dir: Vardè cossa xe el mondo!  
 Quanta zente va a perderse cussì!  
 Ma argomento più caro e più giocondo  
 Per Muneghe sarìa la PERUVIANA,  
 Ch'è una puta da ben del novo mondo.  
 Nata sta puta in religion pagana,  
 Con sentimenti de bontà sincera,  
 Dio l'ha condota a deventar cristiana.  
 Dio, per tuti salvar, disceso è in tera,  
 Inspira in tuti de la grazia i doni;  
 Felice chi l'ascolta e crede e spera!  
 Quando xe i sentimenti onesti e boni,  
 Quando al diletto la moral xe unita,  
 Pol le Comedie deventar Sermoni.  
 E una puta, che sia de santa vita,  
 Lezer pol qualche volta per sorar  
 Una Comedia onestamente scritta.  
 Anca el mio TASSO un'opera me par  
 Non indegna de un anema ben fata,  
 Vedendo in quella la virtù trionfar.  
 E la passion che nel Poeta anata,  
 E l'agita e lo tra for de cervelo,  
 Per debolezza de natura ingrata;  
 Fa parer sempre più felice e belo  
 El retiro dal mondo; e anca mi imparo,  
 Che a ogni studio preval quel del Vangelo.  
 El secolo de beni è troppo avaro,  
 Troppo la tera de viziosi è piena,  
 E el mio RAGIRATOR lo mostra chiaro.  
 Sta tal Comedia rapresenta in scena  
 L'esempio de le teste soprafine  
 Che al precipizio tanta zente mena;  
 E compatindo le anime meschine,  
 Trova motivo de consolazion  
 Che scampa da ste razze malandrine:  
 Dopo de l'ubidienza e l'orazion,  
 Lezer la poderave una sceneta,  
 Se chi comanda ghe dà permission:  
 Fa megio assae chi lezer se diletta,  
 De quele che sta là senza far gnente,  
 O in Parlatorio tuto el dì se peta.  
 L'istoria per le Muneghe è decante;  
 E el mio TERENCE de l'istoria antiga  
 Una parte contien passabilmente.  
 Ma sta damina de l'onesto amiga,  
 Ne la BONA FAMEGIA avrìa più gusto,  
 E la la lezeria senza fadiga;

Anzi ghe pareria de veder giusto  
 Quella famegia dove la xe nata,  
 Dove regna la paze, el vero e el giusto.  
 Zelenza madre (la diria) ritratta  
 Vedo, o Zelenza Padre e i mi Fradeli,  
 E la nobile mia casa onorata,  
 Dove se arleva i fioi, co i xe puteli,  
 Con santissimi onesti sentimenti  
 A la patria divoti e a Dio fedeli;  
 Tuti a l'onor de la famegia intenti  
 Nemici de la zente indegna e trista,  
 Schivando le pazzie dei MALCONTENTI.  
 In sta tal mia Comedia ò messo in vista  
 L'ambizion de chi fa quel che no pol,  
 E el disonor che per tal via se aquista.  
 O' fato veder chiaro come el Sol,  
 De la zente superba el precepizio,  
 E so de certo che a qualcun ghe diol.  
 Ma in casa Vendramin no gh'è sto vizio;  
 Tuti xe boni, tuti xe discreti,  
 E fin la servitù ga bon giudizio.  
 Zente in casa no i tien con quei difeti,  
 Che in te le mie MASSEAR ò colorio,  
 Piene de vizj e piene de grileti.  
 So Zelenza Francesco savio e pio  
 Vol che la servitù se toga spasso,  
 Ma onestamente e col timor di Dio.  
 Quando i paroni fa baldoria e chiasso,  
 Anca a la servitù, per consueto,  
 Par che sia tuti i zorni el zioba grasso.  
 Oh quanti ghe ne xe che per diletto  
 Se vol redur de la miseria al fondo,  
 Dando ai magnoni e ai discoli riceto!  
 Quanti imitando el CAVALIER GIOCONDO  
 Le intrae consuma, e po se fa burlar  
 Senza acquistarse un merito a sto mondo!  
 Chi è nato Cavalier s'ha da tratar  
 Da par soo, che vol dir con nobiltà  
 Ma senza vanità, senza strafar;  
 L'onesta economia con proprietà  
 Fa che in te le ocasion de farse onor  
 No se vede intacar le facultà;  
 E un padre de famegia e diretor,  
 Quando nol buta via superfluamente,  
 Per la casa el dimostra un vero amor.  
 Quel che ò dito fin qua xe suficiente  
 Su i quatro tomi; vegniremo al quinto  
 E qualcosa dirò sumariamente.

IACANA IN JULFA xe d'un fiero instinto;  
 El caratere suo non à che far  
 Con chi de l'umiltà gode el recinto;  
 Ma un'anema da ben se pol spechiar  
 Ne la miseria de una dona altiera,  
 Che da passion se lassa dominar.  
 E voltandose a Dio, che è la so sfera,  
 Dir: Signor, ve ringrazio de buon cuor  
 Che m'avè tolto per la strada vera;  
 E innamorada del Celeste amor,  
 L'anema sento da quel stral difesa  
 De l'ingrato Cupido e traditor.  
 Per quanto al mondo sia la dona intesa  
 A far del ben e a viver saviamente,  
 Xe più seguro el monestier, la chiesa.  
 Al secolo se trova de la zente  
 Che se vanta de viver esemplar,  
 Ma se converte maliziosamente.  
 DONE DE CASA soa se sol chiamar  
 Certe done che vive retirae,  
 Che fa i fati de casa e sa laorar;  
 E po le impiega meze le zornae  
 Co le serve, le amighe e col compare  
 Sora el prossimo a dar de le tagiae?  
 E le trata i marii, ste sogie care,  
 Con imperio, con ira e con despetto,  
 E le putèle impara da le mare?  
 Tuti quanti a sto mondo à el so defeto,  
 Ma el se corege, basta che ghe sia  
 Qualchedun che dia lume a l'inteleto.  
 Chi vol trovar de la virtù la via,  
 Chi brama de saver quel che va fato,  
 Vaga a la scuola de san Zacaria.  
 Là drento al sangue nobile purgato  
 L'esperienza se unisse, e el bon talento  
 Pute per arlevar per ogni stato.  
 Chi inclina a la dolcezza del Convento,  
 E chi a felicitar qualche famegia,  
 In ogni condizion riesse un portento.  
 Là no se ingana, là no se consegna;  
 L'ispirazion se atende del Signor,  
 E quel che piase a Dio se favoregia.  
 Tender insidie d'una puta al cuor  
 Le xe cosse da DONE DE CAMPELO,  
 No da dame de grado e de splendor.  
 Naturalmente son cascà bel belo  
 S'è altra Comedia a nominar a caso;  
 Ma l'argomento no xe troppo belo.

Co lo ò fata qualcun gh'è dà de naso;  
 E tuti quei che lezerà i mi tomi  
 No li cousegio farghene gran caso.  
 Che solamente nel sentir i nomi:  
 CATE PANCHIANA, PASQUA POLEGANA,  
 La par Comedia da butarghe i pomi.  
 Per altro, un tempo, a la nazione romana  
 Ste tai Comedie, dete Tabernarie,  
 Dava sodisfazion più che mezana.  
 E sentir criticar zente ordenarie  
 Gode la nobiltà, più che sentir  
 Certe cossete al so piaser contrarie.  
 Per esempio qualcosa ò inteso a dir  
 De la VILLEGIATURA, perchè in quella  
 Qualche sogeto s'è sentio a ferir.  
 No i à dito: l'è bruta o la xe bela;  
 I à dito: no sta ben de publicar  
 Certi costumi a son de campanella.  
 Zelenza mio paron, voi terminar;  
 Quel che ò fato a san Luca, e xe stampà  
 Go volesto a la presta recordar.  
 Perchè, se el Confessor l'acorderà,  
 Tra le Comedie mie la scielga quella  
 Che a l'onesto piacer più se confà;  
 E senza che me strussia e decervela  
 Coi versi a devertir la Sorelina,  
 Una Comedia sarà bona e bela.  
 Con so licenza vago a tor la china.

## AMOR VENDICATO

POEMETTO

PER GLI SPONSALI

GIOVANELLI E BONFADINI

Canto nel colto Venezian linguagio,  
 Canto i sdegni d'Amor e le vendete,  
 Musa, no t'avilir, fate coraggio,  
 Se d'Apolo el favor te lo permete;  
 E se un qualche Cantor de quei de Magio  
 Disesse, che el xe un stil da canzonete,  
 Dighe che in Venezian tradur s'è visto:  
 » L'arme pietose e el glorioso acquisto.

L'argomento sarà del mio Poema

La *VENDITA D'AMOR*, dolce vendeta  
Che fa talvolta che se amania e frema;  
Ma finalmente comoda, diletta.  
Seguitando per altro el mio sistema  
Dirò la verità semplice e schietta,  
Adornando soltanto un fato vero,  
» Che à mosso a sdegno il faretrato arciero.

Gera in quella stagion che più confina  
Con l'inverno vicin che con l'istà,  
Che le note se slonga e i dì declina,  
E se spopola quasi ogni città.  
Bela stagion per chi a la Cazza inclina,  
Che oselami se trova in quantità,  
E chi ga la passion d'andar a trar  
In sta bela stagion se pol sfogar.

Tra i amatori de sto bel diletto,  
Che se strussia per spasso e se sfadiga,  
Sier Piero Bonfadini è el più perfeto  
Cazzador, tirador de prima riga.  
Credo che da Diana el sia proteto,  
La casta Dea dei cazzadori amiga,  
E l'argomento mio xe ben fondà,  
Perchè una bota no l'ha mai falà.

Questo xe un Cavalier d'un bel talento,  
D'onorati costumi e onesto cuor,  
D'otimo equilibrà temperamento,  
Schiavo del so dover, mai de l'Amor;  
A sostener nei Tribunali attento  
La giustizia, la lege e el proprio onor,  
Onde a la Quarantia pien de conceto,  
A pieni voti l'ha el Consegio eletto.

Dai gravi pesi, dal tremendo ofizio,  
Che decide de roba e vita e morte,  
El so caro solievo è l'esercizio  
De trar in terra le pernise morte.  
Povere bestie! Per qual colpa o vizio  
'Ale mo da incontrar sì trista sorte?  
Come un giudice mai dei più clementi  
Porlo sacrificar tanti innocenti?

Ma questo xe un poetico voveto,  
Nè Pitagora gh'intra un bagatin,  
Che per l'omo à creà Dio benedeto  
Pessi, oseli, animali, e el pan e el vin.  
El xe un rosto prezioso e da bancheto  
El fasan, la pernise e el francolin,  
E sto bon Zentilomo se sfadiga  
Per donarli a l'amigo, o a qualche amiga.

*Racc. Poes. Ven.*

Gera donca in quel tempo espressamente  
Destinò de la Cazza al dolce invido,  
Quando che xe nascù quel accidente  
Che à fato tanto inviperir Cupido.  
Caso da far maravegiar la zente.  
Che famoso anderà de lido in lido,  
'E farà risaltar d'Amor l'impegno,  
Fiero vendicator, ma con inzeugno.

So Zelenza Priuli, so Zerman,  
Lo precede a la Cazza, e el Bonfadini  
Spera d'andarghe drio de bel doman,  
E el provide la polvere e i balini.  
El se ne acorze, e ghe fa festa el can;  
El parechia el so schiopo e i so assalini,  
El va in leto a bon ora, e el se prepara  
Levar su la matina a l'alba chiara.

Lo chiama, i lo svegia, i ghe dà aviso,  
Ch'el tempo è belo, e i barcarioi xe pronti.  
El salta suso, e tuto alegro ia vise  
D'esser là a la tal ora el fa i so conti.  
El se mete i stivali, e a l'improvviso  
Capita un contadin che vien dai monti;  
Ma una letera el fa comover tuto;  
E tal giera de quella el contenuto;

« Zerman, ve prego per l'amor de Dio  
No me vegni a trovar in sta zornada,  
Anzi ve aviso, de tornar in drio  
Se ve trovasse el contadin per strada.  
Sapiè, che a favorir l'albergo mio  
La madre xe vegnù de mia Cugnada  
Co la Puta sortia de monestier,  
Onde, amigo, savè qual sia el dover.

» L'eticheta savè, savè l'usanza;  
Dove gh'è de ste Pute, no se va:  
Fursi fra tante l'unica osservanza  
Che fina el dì d'ancuo s'ha conservà.  
Onde vol la rason, vol la creanza  
Che ve fassa saver sta novità;  
E co va via sta Dama benedeta  
Vegni da mi che le pernise aspetta. »

Xe restà el Bonfadini, come resta  
Un pover omo imatonio da un ton;  
El se voleva butar via la testa,  
Ma in cambio l'ha butà el so baston.  
Cospeto! (el dise) che rason xe questa  
Che abia a sacrificar la mia passion  
A sta Dama, a sta Puta? *Ah prego Dio,*  
*Che no la possa mai trovar mario.*

A sto orendo sconzuro, a sta tremenda  
 Imprecazion gera presente Amor.  
 El se sdegna, el se irita, e el vol l'emenda  
 Pari a la colpa, e el ghe minaccia el cuor.  
 Vien Diana in difesa, e che s'offenda  
 No permete per questo un cazzador,  
 E se impizza tra lori un' aspra guera  
 Pezo che tra la Franza e l'Inghiltera,

Dise Cupido a la Triforme Dea :

Saveu chi sia quella beltà ch'è offesa ;  
 La xe tal che a Minerva e a Citerea,  
 E a Palade faria scorno e contesa.  
 El più bel fior d'ogni più vaga idea,  
 No d'ambizion, ma de modestia acesa ;  
 E ardisse pregar Dio st'omo iracondo  
 Che sì rara beltà se perda al mondo ?

Nata la xe da nobil sangue, e el fato

A cressù de la madre i primi onori ;  
 Ga el romano Pastor, Pastor beato,  
 Colmai de gloria i Barbarighi alori.  
 Sospira ognun, che xe in sta patria nato.  
 Meritar la so grazia e i so favori ;  
 E costù, bestemiando, ardisse dir :  
*Che mario no la possa conseguir ?*

La Giovaneli, la vezzosa Orseta

Gloria de l'Adria, onor de sto paese,  
 Bela, savia, prudente e vezzoseta  
 (Grazie che a pochi dona el Ciel cortese)  
 Quela che un zorno al regno mio sogeta  
 Coronerà le mie famose imprese,  
 Quela, ingrato, bramar senza Consorte ?  
 Solamente el pensier xe reo de morte.

Sì, vendeta, vendeta, a l'arme, a l'arme :

Con cento dardi vòl ferir quel peto,  
 Vogio farlo penar per vendicarme,  
 Vogio farlo languir senza diletto ;  
 A le lagreme soe sordo vòl farme  
 E lo vogio in caena a so despetto,  
 E ghe vogio insegnar a pregar Dio  
 Che le Pute no possa aver Mario.

Alto, (dise la Dea) no fe', Cupido,

Da putelo qual se', no fe sto chiasso.  
 De le vostre bulae mi me ne rido,  
 Ve manderò coi vostri dardi a spasso.  
 Piero voressi rovinar ? me fido ;  
 Mi lo defendo e in abandon nol lasso,  
 El vostr' arco no ga forza che basta,  
 Quando impugno per lu lo scudo e l'asta.

Prima de manazzar, come che fe,

Prima de dirghe tanta vilania,  
 Informève, frascon, prima chi el xe  
 E no parlè, se no save chi el sia.  
 Sto degno Cavalier che maltratè  
 Xe pien de bone grazie e cortesia,  
 E se l'è dito alfin quel che l'è dito,  
 No me par mo che el sia sto gran delito.

Prima de tuto l'è parlà per sdegno,

Per un moto violento de natura,  
 E un primo moto de perdon xe degno,  
 E ogni lege lo salva e lo assecura.  
 El ga tuto el dover, tuto l'impegno  
 Per sta Damina, el lo protesta e zura ;  
 Perchè, el savè, Zelenza Loredana,  
 Sorela de sta Puta, è so Zermana.

Nol l'è mai vista e i meriti nol sa

Che la rende famosa e singolar  
 Ma con ogni rispetto e civiltà  
 Co le Dame l'è avezzo a conversar,  
 El confesso anca mi, l'è trasportà  
 Una bile improvvisa a bestemiari ;  
 Ma quando una passion domina e toca,  
 Tuto quel se sol dir che vien in boca

Moderè, moderè sta tropa ardenza,

E a sto bon Cavalier portè rispetto ;  
 El ga tanto saver, tanta prudenza  
 Che indegno stral no pol ferir quel peto ;  
 Basta dir, che el xe fio de so Zelenza  
 Andriana Dolfin, che xe in conceto  
 D'esser, per tante virtù bele e rare,  
 L'esempio de la Dame illustri e chiare.

Ride Amor dei manazzi, e a far vendeta

Contra de l'insultante el se parechia.  
 Alza l'asta Diana, e el tempo aspeta,  
 E ghe vol portar via neta una rechia.  
 Schiva el colpo Cupido, e una saeta  
 Co l'arco el vol tirar ruzene e vechia ;  
 Salta fora Imeneo : fermève, el cria :  
 Ascoltème, no fe', la causa è mia.

So dei sdegni el motivo e la contesa ;

Tuti do, tuti do gavè rason,  
 Giusta xe la vendeta e la difesa ;  
 Ma se posso, fenir vòl sta custion,  
 Per remediari, per resarcir l'ofesa  
 Basta che el Cavalier chiedo perdon,  
 Che una Dama che ga bellezza e brio,  
 Gnanca per questo perderà mario.



No (risponde Cupido) no me basta;  
 Vogio almanco ch' el prèva un d' i mi strali.  
 Sì (replica Imeneo) chi tel contrasta?  
 Questo sempre el mazor no xe dei mali.  
 Dise la scaltra Dea che in pugno à l' asta:  
 No xe i dardi d' Amor per tuti uguali;  
 El ghe n' à dei crudeli; el so disegno  
 Xe de volerlo inamarar per sdegno.

Brava (dise Imeneo) brava, v' intendo.  
 E voltandose a Amor: caro fratello,  
 El sozonze, da ti mi no pretendo.  
 Chi ti sii calpestà da questo e quello,  
 Quel nobil cuor ti pol ferir, volendo,  
 Ferissi pur, ma son qua mi per elo;  
 Vogio ch' el dardo sia degno de ti,  
 Degno del Cavalier, degno de mi.

E po, el seguita a dir: caro compagno  
 De le mie bele memorande imprese,  
 No saria per nu altri un bel vadagno,  
 Un piaser no saria de sto paese  
 Che cascasse la mosca in boca al ragno,  
 Che nostro fusse el Cavalier cortese?  
 E no te basteria per vendicarte  
 Che vegnisse Sier Piero a suplicarte?

Sentime, caro ti, se sta Damina,  
 Che l' à fato per rabia bestemiar,  
 Con qualche vezzo o qualche parolina  
 Col to mezo lo fasce inamarar,  
 Non la saria vendeta soprafinà,  
 Che te faria dal popolo stimar?  
 E s' el vegnisse a domandar pietà,  
 No se dirave: Amor s' à vendicà?

Squasi (risponde Amor) squasi diria,  
 Sior sì, ch' el vegna: Salta su Diana:  
 Fursi fursi anca a mi me quadreria;  
 Ma no saveu l' usanza Veneziana?  
 Qua una puta se tien con gelosia,  
 La se fa star dai zoveni lontana;  
 Quando che no se vede una signora,  
 Chi diavolo voleu che s' inamora?

Dise el bravo Imeneo: Madona sì,  
 So l' usanza; la lodo, e la sta ben;  
 Ma su sto fato lassè far a mi;  
 Mi so quel che ghe vol, quel che convien.  
 Donca restemo tra de nu cussi;  
 Sospendè finchè torno ogni velen;  
 In ste cosse ch' è qua, se fa e se tase.  
 Saremo amici, e torneremo in pase.

Morsegandose el deo, parte Cupido,  
 La dea ride disendo: oh povereto!  
 Amor va a saetar de lido in lido,  
 Se retira quel' altra in t' un boschetto.  
 E frtanto Imeneo costante e fido  
 Va sta facenda a manizar secreto;  
 Ai parenti, ai amici el parla in rechia,  
 E a proposte, e a risposte el se parechia.

Se conclude el Contrato, e quando sente  
 El Bonfadini a nominar sta Puta,  
 L' orida imprecazion ghe vien in mente,  
 El resta storno e co la lengua muta.  
 E el dise tra de lu: Mo che accidente!  
 Se stupiria chi la sapesse tuta!  
 E nol sa, che da Amor l' è sta sentio,  
 E che farghe el voria pagar el fio.

Nol risponde de no; perchè se trata  
 De una Famegia che lu stima e onora,  
 E cussi facilmente no se cata  
 De sti boni partii, nè qua, nè fora.  
 No se pol retirar parola data,  
 Ma cussi a orbon nol ghe vol ben gnancora,  
 E no ghe basta a Amor ch' el sia ligà,  
 Coto el vol che el se veda e brustolà.

Se ricorda Imeneo del preso impegno,  
 E ghe preme l' onor del camerada.  
 L' à scielto con decoro e con inzegno,  
 Perchè insieme i se trova, una zornada.  
 Ah! col l' à vista, Amor xe arivà al segno.  
 Ah! el s' à dà sto boccon de cusinada  
 Che a casa imatonio, co l' è tornà,  
 El criava per strada: Amor pietà.

Amor col l' à sentio, secondo usanza,  
 S' à sgionfà da putelo e insuperbio.  
 Presto, el dise, domanda perdonanza.  
 Risponde el Cavalier: Sì, son pentito:  
 Cossa sarave de la mia speranza  
 Se sta Puta no avesse a tor mario?  
 Caro Amor, mio tesoro, e mia colona,  
 Le stramberie d' un cazzador perdona.

Vendicativo e rigoroso Amor,  
 Nò (risponde al meschin) vòl per to pena,  
 Che ti te struzi e desconissi el cuor,  
 Te vòl tegnir senza pietà in caena.  
 Sente la Dea pietosa el so rigor:  
 Son qua (la dise) in so difesa; e apena  
 Amor la vede a comparir, s' istizza,  
 E una noya contesa, oimè, s' impizza.

Ma vien a tempo el mediator cortese,  
 Alegro in viso, e co la face in man,  
 A monte a monte (el cria) sdegni e contese,  
 Via, fe pase fradei, dove la man.  
 Amor, ti sa che le più bele imprese  
 Senza de mi ti tentaresti in van ;  
 Se ti vol che te sia compagno e amigo,  
 Ti à da far anca ti quel che te digo.

Ferissi el cor de la vezzosa Orseta ;  
 Come quello de Piero è za ferio.  
 Basta per onor too, per to vendeta  
 Ch'el domanda perdon, ch'el sia pentio :  
 Da ti, da mi, tuta Venezia aspetta  
 Col reciproco amor veder compio  
 Sto matrimonio, che fin ora ò fato  
 Solo mi col manizo e col contrato.

Prega el novizzo, e le preghiere impiega  
 La pacifica Dea. S' impietosisse  
 Amor istesso e 'l so favor nol nega,  
 E a la bela Damina el cor ferisse.  
 Se buta el Cavalier su la carega,  
 Ghe bogie el sangue, e per amor languisse  
 E la Puta se sente el cor ferio,  
 E la cria, povereta : oh Dio, oh Dio !

Viva, viva l' Amor vendicativo.  
 O soave vendeta ! O dolce pase !  
 Come che so mi la depenzo e scrivo,  
 Che de meglio no posso, e me despiase.  
 Prego Dio che l' Amor costante e vivo  
 Renda el fruto bramà da ste do Case !  
 Zelenza Vidiman, mi v' ò servio  
 E a Zelenza Lugrezia el Canto invio.

## CANZONE

DI CORNELIA BARBARO GRITTI

E RISPOSTA

DI CARLO GOLDONI

PER LA VESTIZIONE

DI SUOR ANGELA MARIA RENIER.

AURISBE TARSENSE (\*) A POLISSENO FEGEJO.

Sta volta ve go in trapola,  
 De qua no me scampè ;  
 Fora le vostre chiacole,  
 Fe presto e respondè.  
 A Parma no se' in Opera,  
 Se' qua, se' fresco e san ;  
 Se ve trovasse in degole  
 Ve manderia lontan.

(\*) Questa Dama di non ordinari talenti soleva essere in Venezia dai forestieri più segnalati visitata e riverita. Fu dal celebre Frugoni ideologgiata in molti suoi componimenti. Diede la vita a Francesco Gritti, del cui valore singolare nella poesia vernacola si vedranno i saggi nella presente Raccolta. Scrisse Sonetti e canzoni anche nella toscana favella, e piacemi di riportare a questo luogo un suo Sonetto il cui argomento è l'esame di se medesima allo specchio.

Non mente no il cristall. Mi albeggia il crine ;  
 E le guance di rose, e il palpitante  
 Niveo ricolmo sen, le coralline  
 Labbra vermiglie or non mi porge inante.

Non mente no il cristall. Rapido alfine  
 L' undecimo varch' io lustro pesante ;  
 E le robuste membra al suolo or chine  
 Mi rammentan la tomba, e non l'amante !

Alte destai vivide fiamme in petto,  
 Che il cieco arcier dalle fallaci scorte  
 Giammai mi offerse un moribondo affetto !  
 Ah passano nell' oblio per sempre assorto  
 Fole di gioventude ! al grande oggetto  
 Solo or si pensi ; e qual sarà ? la Morte.

El tema xe novissimo,  
 So ch'el ve piasserà.  
 Per una che va Munega  
 Aveu mai più cantà?  
 M'aspeto che responderme  
 Vogliè strenzendo i denti :  
*Semo a le cosse solite,*  
*Coi soliti argomenti ;*  
*Sempre ghe vol sta sonica ?*  
*Sempre s' à da cantar ?*  
*Per Sposalizj e Muneghe*  
*M' di da decervelar ?*  
 Sior sì, bisogna subito  
 Tior la chitara in man,  
 Sonarghela e cantarghela  
 Almanco in Venezian.  
 Sta volta, torno a dirvèlo,  
 El caso è diferente,  
 Sta Puta che me stimola  
 La xe una mia parente.  
 Questo xe 'l primo debito ;  
 Ma a dirla tra de nu,  
 Me stimola e me obliga  
 Qualche rason de più.  
 La xe sta santa zovene  
 Fia de Daniel Renier.  
 Oh doveressi intenderme,  
 Se' omo del mistier :  
 Savè chi 'l xe in Republica,  
 Savè quel che l' à fato.  
 Se no l' avessi in pratica,  
 Ve fazzo el so ritrato :  
 El ga una mente lucida,  
 Un inteletto pronto,  
 Che tuto rende facile,  
 Che presto ariva al ponto ;  
 El sa le cosse serie  
 Tratar con precision,  
 E po grazioso e lepidò  
 El xe in conversazion ;  
 Amigo sincerissimo,  
 De cuor e de bon fondo,  
 Che cerca, che desidera  
 Far ben a tuto 'l mondo ;  
 Temperamento fervido  
 Che parla e che par bon,  
 Che va talvolta in colera,  
 Ma mai senza rason ;

L' à scomenzà da zovene  
 A vederghè pocheto,  
 Ma a i ochi, che xe deboli,  
 Suplisse l' inteletto.  
 A comandar giustissimo  
 Prontissimo al dover,  
 In casa soa filosofo,  
 E sempre cavalier.  
 Fato el ritrato in piccolo,  
 Più a sguazzo che a pastela,  
 A va ve lasso el merito  
 De insoenar la tela.  
 Del Padre co l' imagine  
 Piena de fantasia  
 Se me presenta al spirito  
 Le lode de la Fia.  
 So che la xe assae zovene,  
 So che la xe assae bela,  
 So che la ga del merito,  
 Ma la lo sconde in Cela ;  
 Le zogie, i merli, i abiti  
 Richi no la i vol più,  
 La li à portai pochissimo,  
 La ne li lassa a nu ;  
 A nu povere femene,  
 Che al mondo andèmo drio  
 Co la caena indomita  
 Dei fioli e del mario ;  
 Semo servie da i omeni  
 Un poco in zoventù,  
 Co passa l' età zovene  
 Nissun ne varda più !  
 Quanto xe megio el bavaro  
 In vece del topè !  
 Quanto val più la tonega  
 Dei cerchi e l' andriè !  
 Studièmo a farse un abito  
 Rosso, celeste o bianco ;  
 Per el vestir le Muneghe  
 Le ga un pensier de manco.  
 Ma basta. A vu sior Arcade,  
 Lodè sta mia zermana,  
 Che vol le carne tenere  
 Coverserse de lana ;  
 Ma no fe miga el comico,  
 Come che solè far,  
 No vegni via con critiche  
 Che no le ga da intrar ;

No stessi a dir che un spirito  
 Ghe xe che va per tuto,  
 Ch' anca in tel pano ruvido  
 Se vede el belo e 'l brutto;  
 Perchè tra quele Vergini,  
 Vestite de penitenza,  
 El megio no xe l' abito,  
 Ma 'l cuor che ga prudenza.  
 Lassèmo star ste frotole,  
 Salvèle per la scena,  
 No manca sul proposito  
 Materia per la vena.  
 Saltè fora con spirito,  
 Vòi adesso che cantemo;  
 No me cantè spropositi,  
 Savè dove che semo ....  
 Sì ben .... son contentissima  
 La novità xe bela ....  
 La xe una cosa insolita ....  
 Dirò un' Indovinela.  
*Mi so che ghe xe un albero*  
*Piantà in t' un bel zardin,*  
*Che sul ramo medesimo*  
*Ga un pomo e un limonciu.*  
 L' aveu sentia? spieghemela:  
 L' albero è cognossù.  
 I spiriti a capitolò;  
 Sior Polisseno, a vu.

## RISPOSTA AD AURISBE

DI

## POLISSENO FEGEJO.

Aurisbe, Aurisbe, el diavolo!  
 Ve torna a stuzzegàr;  
 Volè, tropo onorandome,  
 Farme precipitar.  
 M' avè tocà in tel debole;  
 Co' m' avè dito in prima  
 Che a un novo tema avevimo  
 Da esercitar la rima;

De novità son avido,  
 Le cerco in ogni fonte,  
 E ò per le cosse insolite  
 Rime felici e pronte;  
 Ma inteso de le Muneghe  
 El solito argomento,  
 M' ò sentio per le vissere  
 El sangue in movimento.  
 Come un bamin che spasema  
 Vedendo el buzzolà  
 El sente dal reobarbaro  
 El dolce amaregià.  
 Ma po megio inoltrandome,  
 Lezendò i vostri versi,  
 O' dito: anca in sto genere  
 I casi xe diversi.  
 M' à consolà moltissimo,  
 Vero cussi e ben fatto  
 D' un Cavalier che venero  
 El nobile ritrato;  
 Ma se m' avè dà el carico  
 D' averlo da insoazar,  
 So le mie forze e dubito  
 L' imagine guastar;  
 Pur de la tela al margine  
 Farò un breve contorno,  
 Una soaza semplice  
 Metendoghe d' intorno.  
 El Cavalier magnanimo  
 Protege i leterati  
 Col spirito, co l' animo,  
 Col cuor dei Mecenati;  
 Nè amante de le letere  
 L' è sol per complimento,  
 Ma el stima le bel' opere  
 Per genio e per talento.  
 De le virtù de l' anema  
 Conossitor perfetto  
 Co la costanza el supera  
 Ogni più vivo afeto,  
 Onde del cuor medesimo  
 Stacandose una parte  
 A Dio, che la desidera,  
 La dona e la comparte;  
 A Dio el fa el sacrificio,  
 Padre in amor contento ....  
 Son qua, son sul proposito;  
 Vegnimo a l' argomento.

Canto, Aurisbe, con giubilo  
 La Vergine Prudente  
 Che piena xe de meriti,  
 Che xe vostra parente;  
 Canto la Sposa amabile,  
 Che forme à sì legiadre;  
 Xe ogeto dei mii cantici  
 La Fia d'un sì gran Padre!  
 Quella che 'l mondo misero  
 Cognosse e lo detesta,  
 Che in Paradiso ai Anzoli  
 Moltiplica la festa.  
 In età fresca e tenera,  
 Adorna de bellezza,  
 La sprezza i propri comodi,  
 La lassa ogni ricchezza;  
 La scambia in una tonega  
 Le veste più pompose,  
 La preferisse a ogni abito  
 Le lane religiose;  
 La sa, la sa la pratica  
 Del mondo adulator;  
 La sa che xe nei omeni  
 Volubile l'amor;  
 E savia e costantissima  
 De cuor, come de mente,  
 Un Sposo la desidera  
 Che l'ami eternamente.  
 In tante e tante femene  
 La vede el pregiudizio  
 De tuti quei disordini  
 Che genera el caprizio;  
 Dei quai co' passa el termine  
 D'un breve godimento,  
 No resta che i rimproveri,  
 La smania e 'l pentimento.  
 Beltà del sesso fragile  
 Xe un fior de Primavera,  
 Che la mattina è in credito,  
 Che se tra via la sera!  
 E se talvolta el spirito  
 Supera la beltà,  
 Pochi cognosse el merito,  
 Tuti va drio a l'età;  
 Ma se vardèmo a l'anema,  
 Questo xe quel bel fior  
 Che anca in età decrepita  
 Spira soave odor;

No per el mondo stolido,  
 No per el mondo rio,  
 Ma per le sante Vergini  
 Che se reposa in Dio.  
 Ve par che sia stil comico,  
 Indegno del Convento  
 Quel che me infama el spirito  
 Sul nobile argomento?  
 Anzi me par che al metodo,  
 Fora del mio costume,  
 Estro m'acenda insolito,  
 E che m'assista un Nume!  
 El Venezian vernacolo,  
 Col qual parlo e rispondo,  
 De sentimenti enfatici  
 Xe carico e fecondo,  
 Podendo la dolcissima  
 Facondia Veneziana  
 Con el vigor dei termini  
 Far fronte a la Toscana.  
 Son un Poeta scenico,  
 Ma so nel tempo istesso  
 Dar a virtù el so merito,  
 E far giustizia al sesso.  
 Tornèmo in Parlatorio,  
 Contèmo a la sorela  
 Per ralegrarghe el spirito  
 La vostra Indovinela!  
 Co la virtù poetica  
 Mi spiegherò el mistero;  
 So anca mi un fatidico  
 Interprete del vero.  
 Indovinela è un termine  
 Bassissimo e volgar,  
 Ma el vostro xe un enigma  
 Dificile a spiegar:  
 Mi so che ghe xe un albero  
 Piantà in t'un bel zardin;  
 Che sul ramo medesimo  
 Ga un pomo e un limoncin.  
 Sento che 'l Dio d'Anfrisia  
 M'acende el cuor in peto,  
 Che me soleva e ilumina  
 La mente e l'inteleto.  
 Sì, sì, la pianta fertile  
 Che strolegar m'à fato  
 Xe el Cavalier medesimo,  
 Aurisbe, del ritratto.

El bel seren de l' Adria,  
 D' eroi zardin fecondo,  
 Xe la felice Patria  
 Che l' à prodoto al mondo ;  
 E i fruti de do specie,  
 El limoncin e 'l pomo,  
 Xe do sorele amabili,  
 Prole d' un à grand' ome ;  
 Una è la santa Manega,  
 Elota per la Celsa,  
 L' altra la cara e tenera  
 Dokcissima Isabela.

Una, pomo odorifero  
 De santo amor fecondo,  
 L' altra d' amor frutifero,  
 Sugoso per el mondo.  
 Al ben del Matrimonio  
 Gh' è qualche mal congiunto,  
 E 'l limoncin subacido  
 Spiega le nozze in ponto,  
 La spiegazion difficile  
 Xe un sforzo de l' inzegno,  
 Che se perdona al strologo  
 Se no l' à dà in tel segno.



# POESIE

DI

GIORGIO BAFFO.

## MADRIGALE

ALLE DONNE.

Poder senz' altri afani  
Passar con vu i so ani  
Saria 'na bela cosa  
O sesso traditor.  
Ma a forza de matezzi  
O de pensar a beszi,  
Avè rovinà tuto,  
No se pol far l' amor.

## CANZONE

AI DEPUTATI PERCHÈ FACCIANO LA REGATA AL DUCA  
D'YORK VENUTO A VENEZIA.

Sento a dir, che no se fa  
La regata in sto paese  
In un tempo che ghe qua  
Più d' un principe e marchese.  
In un tempo che ghe un duca,  
Che nol fa vita privata,  
Che se diga, struca, struca  
No i ga fato la regata.  
*Racc. Poes. Ven.*

Dopo, che i ga speso tanto  
In festini e laute cene,  
Quando che per tuto quanto  
Se pol veder de ste scene :  
E la cosa strepitosa,  
Che no ghè, se no a Venezia,  
Che per tuto xe famosa,  
Ch' ogni principe l' aprezia,  
Questa qua no s' ha da far  
In cussi bel' ocasion !  
E che s' abia da contar  
Me despiase sta rason.  
Che i parenti a chiare note  
De sti quatro deputai  
No volendo far peote,  
Che se diga, i xe spiantai ;  
O che pur bona amicizia  
Fra de lori no ghe sia,  
E se diga l' è avarizia  
Per no dir spilorzeria  
No voria per tuto l' oro  
Fuora andasse ti sentori ;  
Perchè certo el so decoro  
Perderave sti signori.  
Mi consegio chi ha l' onor  
Sto Gran Duca de servir,  
Ch' i altri staga nel so oror,  
Ma de lori no far dir,

Perchè 'l Mondo, se no falo,  
 Dirà, questo xe un pretesto  
 Per cavar se da sto balo,  
 E no far, che vada 'l resto.  
 Se fa veder, che se fa  
 Tuto quello, che se pol,  
 Che se i altri no ghe sta  
 La so testa no ghe diol.  
 La regata xe una cossa  
 De natura so assae bela,  
 Sempre è megio far qualcossa,  
 Che butarla in calesela.  
 Tanto più quando se vede,  
 Che sto Duca ghe n' ha voglia :  
 Che lu stà quà su sta fede,  
 Che per questo nol se anogia.  
 Se de tori in te la piazza  
 I ga fato quela festa,  
 Per dar spasso a la plebazzà  
 No i farà per lu po questa?  
 Questa quà, che 'l puol zirar,  
 Come ho dito, tuto l' mondo,  
 Mai nè mai el puol trovar  
 Un piaser el più giocondo.  
 Col mio cuor afetuoso  
 Digo ad ogni Deputato  
 A sto Duca generoso  
 Feghe veder el regato (91).

## SONETTO

CONTRO LA SFORTUNA DE' POETI.

Poeti, ve lagnè continuamente,  
 Che per quanto che fè dei bei soneti,  
 Tanto e tanto sè sempre povereti.  
 Che per quelli gnissun mai ve dà gnente ;

Gavè rason, a dirla veramente  
 L'è un mistier budelà quel dei poeti,  
 No se magna che aplausi ; e do paneti  
 Per mile versi no ve dà la zente.

Ma pezo ancora xe la sorte mia,  
 Che, se me meto a far qualche soneto  
 Per divertir la nobil compagnia,

No solo i me dà gnente, povereto,  
 Ma quel che stimo, che desoravia  
 I me va becolando el mio sacheto.

## MADRIGALE.

SI SPREZZA QUEL CHE SI DESIDERA.

Nemighe dei omeni,  
 Per genio crudeli,  
 Superbe, infedeli  
 Le done se chiama  
 Nè tase gnissun ;  
 E pur co sti radeghi  
 Chi è quel che no ama  
 Che no l' inamora ;  
 Che drio no ghe cora ?  
 Disemene un.

## MADRIGALE.

MODO DI FAR VENDETTA.

Chi vuol far del so nemigo  
 Un' asprissima vendeta  
 Mi gh' insegno una riceta  
 Che de più nol puol trovar ;  
 El lo meni in una casa,  
 Dove el veda un muso belo,  
 Che ghe superi el cervello  
 E lo fazza inamorar.

## SONETTO.

LODA IL RE DI PRUSSIA, E LA NOBIL DONNA DOLFIN.

In Cielo Marte e Amor s' hà messo al ponto  
 De far ognun de lori ' na fatura,  
 Che sia l' onor de tuta la natura,  
 Nè ghe sia chi ghe possa far confronto.



Marte de far un Omo ha fato conto,  
 Ma d' una temprà cùssì forte e dura,  
 Ch' al fredo el staga saldo e a la caldura,  
 E sempre 'l sia al combater presto e pronto.

Amor ha dito, e mi farò 'na dona  
 Che sempre co la parla e co la tase,  
 La delizia la sia d' ogni persona.

Questi qua xe quei do ch' al mondo piase :  
 Saveu ch' i xe ? za 'l nome soo rissona,  
 El Prusso in guera, e la Dolfina in pase.

## SONETTO.

CI VUOLE L' AIUTO DIVINO PER SALVARSI.

So, che chi ha fato mi senza de mi  
 No me vuol mi senza de mi salvar ;  
 Cossa donca de mi posso sperar,  
 Quando no fazzo ben più de cussì?

Quelo, che fazzo ancuo, fazzo ogni dì,  
 E fazzo quello che no devo far,  
 E, per quanto vorave in drio tornar,  
 Mi continuo sto viazo sempre pi.

Se l' tempo e la razon forza no gà  
 De far sì, che mi supera sta giostra,  
 Qual altra forza mai trionferà ?

Signor, a la mia mente che se prostra,  
 Fe veder, che mi sia tuto cambià,  
 E che l' è stada tuta gloria vostra (92).

## MADRIGALE

CONTRO CUPIDO.

Se Amor xe fio d' un Dio  
 L' è 'l Dio de le ricchezze  
 E de le povertà.

Dal Pare l' ha portà  
 La furia del coraggio  
 I voli dei pensieri,  
 Le prodigalità,  
 La fede impertinente  
 Che l' fonda nel so merito,  
 L' opinion ridicola  
 Che 'l ga de la so forza,  
 El pazzo desiderio  
 D' esser lu sempre 'l primo,  
 E tute quele smanie  
 De la so autorità.

Da so Mare el gà el vizio  
 De sempre dimandar  
 Con importunità ;  
 Quela timidità,  
 Co la qual qualche volta  
 No 'l sa dimandar più ;  
 Quela, disposizion  
 Che 'l gà a la servitù  
 E quel timor continuo,  
 Che no 'l sa perder mai  
 De esser disprezzà.

## AL QUERINI

## RELEGATO IN UN CASTELLO

## SONETTO I.

Querini, de la to sorte tirana  
 No te lagnar ; pensa che cazzà fuora  
 Xe stà Camilo e Ciceron ancora  
 Da quella gran Republica Romana.

A ste vicende la virtù più sana  
 Xè sta sempre sogeta, e giust' allora,  
 Che sè più in alto, e che più ognun v'adora,  
 L' invidia ve precipita e ve scana,

S' ha visto questo in tanti gran paesi,  
 Temistocle, e Milziade, poverazzi,  
 I xe stai relegai dai Ateniesi,

No tanto col destin de sti gramazzi,  
 Ma consoleve in questo, che sti pesi  
 No i suol veguir adosso ai visde ....

## SULLO STESSO ARGOMENTO.

## SONETTO II.

Quel grand' Omo, quel spirito elevato,  
 Quel genio cussì puro e cussì belo  
 El xe messo, e serà drento un castelo,  
 Nè gnissun puol saver più del so stato.

Ma potenza de Dio! Coss' halo fato  
 Ch' i l' à tratà cussì, com' un ribelo,  
 No i puol tocarlo in tel onor d' un pelo,  
 Che l' Omo non ghe giera più onorato.

I gà tiolto col meterlo là drento  
 E fama e libertà, cossa de più  
 Ghe podeveli tior in t' un momento ?

Ma i fizza pur quello ch' i vuol de là,  
 Ch' i lo fizza morir anca de stento,  
 Ma mai no i ghe tiorà la so virtù.

## SULLO STESSO ARGOMENTO.

## SONETTO III.

Chi dise, che xe scritto per dies' ani,  
 Chi per do, chi per cinque, e chi per mesi,  
 Posibile che tuti sia scortesi,  
 Nè ghe sia chi me cava de sti afani !

Ghe chi dise : in sta Banca i xe più umani,  
 I lo soleverà da tanti pesi.  
 I Coretori i xe tuti cortesi  
 I vorà risarcirlo dai so dani.

Altri dise : credèlo, me dà 'l cuor  
 Che 'l Tribunal lo chiamerà de quà ;  
 E chi, intrometerà un Avogador,

Tuti in suma, che presto 'l vegnerà,  
 E che 'l sarà rimesso nel so onor,  
 Ma infratanto el mio ben a morte va.

## PER LA LIBERAZIONE DEL MEDESIMO.

## QUERINI

## SONETTO IV.

Come, se dopo una gran longa piova  
 Vien fuora 'l Sol a rischiarar el cielo,  
 De quel, ch' 'l giera, el par assae più belo,  
 E par, che più 'l ne piasa, e più 'l ne giova ;

Cussì al Querini dopo una gran prova  
 De la so soferenza in t' un castelo  
 El par che con un spirito novelo  
 Cosse più bele e niove ancuo 'l ne muova.

Ma come chi xe in perto più no sente  
 La gran paura ch' ha soferito in mar,  
 Vede quel, che xe stà, nè vuol dir gnente,

Cussì lu del passà nol vuol parlar,  
 E 'l manda anca i so amici quietamente,  
 S' i ghe ne parla, a farse budelar.

## SULLA MOLLEZZA DEI VENEZIANI.

## SONETTO.

Estinguendo se v' à tanti riconi,  
 E cresce sempre più la povertà,  
 Le gran teste mancando se ne v' à,  
 E no resta de qua se no i minchioni.

Se de quei tanti gran politiconi  
 Qualche residuo ancora xe restà  
 I minchioni xe in tanta quantità,  
 Che i supera quei pochi, che xe boni.

No se pensa ch' al' ozio, al lusso, al zioigo,  
 E i libri che se studia su la sera,  
 Xe 'l mazzo de le carte o quel del cuogo.

Deboto no ghè più zente da guera,  
 E, se ghe n' è, questi no ha visto 'l fuoco,  
 Come puorla durar in sta maniera ?

## QUESITO (93).

## SONETTO.

Avendo i Tripolini roto el pato  
 Coi Veneziani d'una pase vera,  
 Per risarcir l'onor de la bandiera  
 Con zelo un Savio ga parlà in senato.

Un' eloquente disputa el ga fato,  
 Ch' ha comosso quei Padri in quela sera  
 Tanto, che ai Tripolini de far guera  
 In quel momento el gran Decreto è nato.

Un bravo Comandante i ha scielto in freta ;  
 Questo cola so bela direzion  
 Ha sogetà sta zente maledeta.

Chi à più merito cerco in ste do azion,  
 Se 'l Savio che ha proposto la vendeta  
 O quello, ch' à eseguito la comission?

## RICERCA DELLE DONNE.

Co semo gonzi  
 No ve piaseмо,  
 Co no ghe semo  
 Vu v' instizzè.  
 Disème un poco :  
 Qual xe la regola  
 De star con vu ?  
 Sariela fursi  
 D' esser aloco  
 Co' volè poco?  
 E d' esser omo  
 In quel momento  
 Che volè più?

## IL BELLO DURA POCO.

Per ordinario  
 No è ben che dura  
 Quel che in natura  
 Ne par beltà.  
 Perderse in bruto  
 Suol la bellezza,  
 Come ricchezza  
 Va in povertà.



# POESIE

DI

ANGELO MARIA LABIA.

---

## SONETTI.

### DEDICAZIONE

A MONSIGNOR GRADENIGO

VESCOVO DI CENEDA.

Da vu, che se' tra i omeni più doti,  
E tra la zente più discreta e onesta,  
Perchè in sti dì ve sollevè la testa  
Vien la mia Musa con sti so' stramboti,

No la saria so' colpa, ma del Loti  
Se una temerità la fusse questa ;  
Sì ben che nè mordace, nè inonesta  
No la ga el mal del Bafo, nè del Doti.

Compatila, ve prego, Monsignor,  
Dèghe la pastoral benedizion  
Se la vedessi mai dar in furor ;

Perchè, protesto, tuta la so passion  
No l'è causada che dal tropo amor  
A la so Patria e a la so Religion.

### L'AMORE. DELL' AUTORE

ALLA PATRIA.

Mi no son nè chietin, nè son rebèlo,  
Mi son un citadin apassionà  
Per veder che da qualche tempo in quà  
La povera mia Patria va in sfasselo.

Mi no dirò de questo nè de quello,  
Ma ve prego d' usarme carità  
Se qualche volta andasse troppo in là  
Perchè anca el gran dolor tiol el cervelo.

Per poderme cavar de sugezion  
O' pensà de parlar nel mio dialeto  
Perchè el daga più forza a l' espression ;

Che no ghe vol nè crusca nè fioreto  
A un citadin che in dir la so' opinion  
No ga che Dio e che san Marco in peto.

## GIUSTIFICAZIONE DEL POETA.

Ghe gera un gran poeta in sta cità  
 Che d' altro mai nol s' à sentio a cantar  
 Che de cosse da far scandalisar  
 In sin l' omo più roto e relaxà.

E ( quel ch' è pezo ) tra le oscenità  
 Che 'l capriccio brutal sol inventar  
 El ghe soleva spesso framischià  
 Quel che più in Religion xe venerà ;

Epur tuti el lodava, e tuti drio  
 I ghe coreva come tanti mati,  
 Nè nessun contro lu gnanca à citio.

E perchè mi me move ( e pur i è fati ! )  
 Me move Patria, Religion e Dio,  
 Tuti vol dir ? no me ne so dar pati.

## SULLE INNOVAZIONI CONTRO I FRATI.

Mi ancora tuto pien son de spavento  
 E da la testa a i pie racapricià  
 Co me recordo quel che xe stampà  
 Su 'la Scritura d' Oza, se no mento ;

Perchè sol per aver l' Arca, in cemento  
 De roversarse in tera, sostentà,  
 L' è stà da Dio sul 'fato sentenzià,  
 E l' è cascà là morto sul momento.

Ma se Dio no à volesto in lu scusar  
 Un trasporto de zelo, che quel santo  
 Deposito gh' à fato profanar,

Cossa sarà ( se tanto me dà tanto )  
 De chi tien per vaghezza de mal far  
 L' Arca e i Leviti tra l' infamia e 'l pianto ?

## LA MODA CORRENTE.

Conzier da furie, mate spiritaè,  
 Cavei sul muso sempre sparpagnai,  
 Colo nuo afato e in colo ben spalae,  
 E do peti mostrar sempre spacai ;

Un tagio sul bustin da relaxsae,  
 Sporto in fora da drio come i tolai,  
 Cotole e veste curte e curte assae,  
 E sfiamesanti veli sui cendai ;

Calza bianca e mulete e gran cordele,  
 Puzae con languidezza sul Servente,  
 Caminar da pitoche o Buranele ;

Ochio lascivo in ziro e seducente,  
 Sedizioso el parlar, sia brute o bele,  
 Questa in le Done xe moda corente.

## AI RIFORMATORI

## CONTRO LE NUOVE REGOLAZIONI.

Cossa diavolo feu regolazion  
 Sora le Messe e su le Fraterie,  
 Da far scandalezar l' aneme pie,  
 Quasi che no gavessi religion ?

Eh via, tiolè per man con più rason  
 Sta libertà, sto lusso, ste angarie  
 Ste trupe, sto arsenal, ste mercanzie,  
 Che pur troppo le xe in desolazion !

Da ogni banda nu semo circondai  
 E per tera e per mar da questi e quei  
 De nu, tuti e po tuti, desgustai ;

E romperse volèmo nu i cervel  
 Su cosse che no val i so pecai ?  
 Voleu che ve la diga ? oh semo bei ?

## SULLO STESSO ARGOMENTO.

In ste tante sì gran regolazion,  
Che sento publicar de trato in trato,  
Me par che tato sia molto mal fato,  
Secondo la mia debole opinion.

Co riverenza a la Deputazion,  
Là drento no gh'è Massima de Stato,  
No gh'è el publico ben, no-gh'è el privato  
E, quel ch'è pezo, no gh'è Religion.

Mi v'accordo che abbiè tuto el poder  
De far che i Frati staga in disciplina,  
E al bisogno valerve del so aver;

Ma, pofar Dio! co la carnificina!  
L'è l'istesso che aver in tel missier  
La Lege de Natura e la Divina.

## SUPPLICA DEI PRETI

AL NUOVO PATRIARCA DI VENEZIA.

Tuti i poveri Preti Veneziani,  
In Sinodo ridoti al Magazen,  
Al so novo Prelato i propri afani  
D'esponer con modestia i stima ben:

Monsignor, nu in ancuo stemo da cani,  
Nui come Giobi colegai sul fen,  
Perchè la Messa in sti presenti ani  
No basta a le buele a farghe el pien:

Se parlava de cresserne la tassa,  
E darne almanco la paga dei Sbirì,  
Ma s' à po dito, ch' anca questa è massa;

Cavène donca vu da sti martiri,  
E no fe' che l'amor vostro ne lassa  
Viver più tempo in gemiti e sospiri;  
O fenì sti deliri  
Col farne come Santi venerar  
Martorizai da fame su l'Altar.

## SULLO SQUALLORE DI VENEZIA.

*Al Lustrissimo Sior ... con un Vascelo,*  
Una volta diseva la mansion;  
Adesso: *A So Zelenza co un Ceston*  
*E un per de Caponere in t' un batelo.*

Con manco scienza, ma con più cervelo  
Alora, oh se pareva assae più bon!  
Gera i palazzi le so abitazion,  
Le xe adesso casete da bordelo;

Tuti i mercanti gera in Marzaria:  
De lane, d' ori, arzenti, merli e sede  
La Città tuta rica e ben fornìa;

Ancuo ste cosse più no le se vede;  
È vero; ma la testa xe guarìa  
Da tuti i pregiudizj de la Fede,  
Adesso sol se crede.  
Dai copi in suso, per Russò e Volter;  
Dai copi in zo, per tanti che à da aver.

## SUGLI SPIRITI FORTI.

» Miracoli! .... eh le xe cogionarie;  
Eh ste cosse in natura no se dà;  
El mondo adesso è tropo ilumina  
Per cavar se dai ochi ste scarpie;

» Le xe impostare, le xe birbarie  
De Preti e Frati che s' à imaginà,  
Per guadagnar sora ste falsità,  
Le Aneme, i Santi, i Cristi e le Marie;

» Basta ben che credèmo in quel de sora,  
E anca qua ghe sarìa da dubitar  
Perchè no gh' è chi l' abia visto ancora. »

Questo (se mi no falo) xe el pensar  
De sti Spiriti Forti; e po' in malora  
I zura quello che no i pol provar;  
Perchè i vol sostentar  
L' onor de so mugier e de so mare,  
Incerti de i so fioli e de so pare.

## SOPRA UN ORDINE DI CHIUDERE

## LE BOTTEGHE DA CAFFÈ.

Co volè sto paese reformar  
 No avè da scomenzar da le boteghe,  
 Per suscitarve contra tante sbreghe  
 Che no ve saverè dove salvar;

Quando che vogiè l'aque rincassar,  
 E rimeter i grani in le so' teghe  
 A le cosse massizze ben badeghe,  
 E ste buscare tute lassè andar.

Xe andà in disuso l' abito patrizio,  
 Le Dame a forza de gran pizegoni  
 De negro no le ga che quel servizio;

Ziogo e lusso spuar ne fa i polmoni,  
 La Religion xe andada in precipizio;  
 E i Cafè fe' serar? oh che c....!

## IN OCCASIONE D'INCENDIO

## DEL TEATRO DI SAN BENEDETTO.

Al veder sto Paese contristà  
 Per un Teatro tuto incenerio  
 Se diria, che Messer Domenedio  
 Con qualche gran flagelo l' à tocà.

Chi pianze el capital che l' à impiegà,  
 Chi el so palco depento e chi el fornio,  
 Le Dame el dominò belo e guarnio,  
 E chi le Feste che più no le se fa.

Per un Teatro sta desperazion,  
 Fato de legno e ch' el va su in t' un mese?  
 E po', senza mostrar conturbazion!

Con la rovina de più Chiostri e Chiese  
 Se vede in rischio e Stato e Religion?  
 Mi, per Dio, che no intendo sto Paese.

Racc. Poes. Ven.

## SULLA TASSA

## DETTA I CAMPADEGHI.

Ghe xe chi no pol far la costruzion  
 Del come vegna spesso decretà  
 Campadeghi da i Savj, co se sa  
 Che anch' eli à da pagar sta imposizion.

Xe de fede in la nostra Religion,  
 Che i tre Re Magi Erode i à cogionà,  
 Quando *per aliam viam* Dio gh' à ispirà  
 Che i ritornasse ne le so' region.

Se questo xe un articolo de fede,  
 Quelo, per Dio, no xe una bagatèla  
 Che in fato de Campadeghi se vede:

I Savj, co i li paga, i la fa bela,  
 Perchè *per aliam viam* sempre succede  
 Che i se li fa tornar in la scarsela.

## CHI XELO?

Un che no ga nessuna Religion:  
 Che 'l publico no stima, nè 'l privato:  
 Un che no ga altra *Massima de Stato*  
 Che 'l so proprio interesse e l' ambizion;

Un che la so' propria condizion  
 Nol ghe la cederia a un Potentato,  
 Un che ghe vol imponer al Senato  
 Come sel fusse lu solo el Paron.

Nol nomino; ma mi no so veder  
 Che a un omo de sta sorte ghe sia dà  
 In Republica ancuo sto gran poder.

Forse per manco in la latina età,  
 Mi credo che za ognun possa saver  
 Quel che a Cesare un dì la gh' à costà.

## PER L'APERTURA DELLE SCUOLE

A' GESUITI.

Che bela cossa nel quondam Gesù,  
Dove che ancuo s'è fato l'apertura  
Dei Studj da la gran Magistratura  
De le Man-morte per la zovenù!

A le porte soldai per far star su,  
Deputazion in publica figura,  
Professori che *in pondere et mensura*  
I pol esser oto onze o poco più.

Messa a Capela con Pontifical,  
Prolusion che no s'è capio un stranuo,  
Un rinfresco, cussì, nè ben nè mal.

Ghe xe chi vol che tuto vaga in bruo,  
E che sta aspetativa universal  
E la scomenza e la finissa ancuo.

## IL BAFFO CHE PARLA

DAL MONDO DI LA'.

Fer aver scritto mi certe Poesie  
Che Omeni e Done s'è scandalizà,  
E che à fato ch'el culo m'è scotà,  
E paga el fio de tante porcarie,

Ascriver in favor son obligà  
De la Santa Fede e de le Fraterie.  
Za ch'una è andata, e l'altre xe spedie,  
Per quel che se descòre anca de qua.

Le gran cosse se conta qua in sto logo!  
Tuti cria, tuti pianze e tuti ciga  
Perchè l'aque sechè che stua sto fogo!

Pari, mare, fradei, zermani, amiga,  
Qual el fin sarà un zorno de sto zogo  
Vol, da parte de Dio, che mi ve diga.  
Che bela rima in *iga*  
Che gaveria tra tante che ò fat' uso!  
Ma no la posso dir perchè me bruso.

## PER SOLENNITA' STRAORDINARIA

NEL GIORNO DELLA SENSEA DELL' ANNO 1775.

Oh che Sensea! oh che Sensea! oh che cosazze!  
Oh che parechi! oh che gran novità!  
In sta ocasion veramente in sta Città  
L'oro e l'arzeno va per le scoazze!

Che Galie! che Sciambechi! che Galiazze  
Drio la Publica Regia Maestà!  
Che Peote in livrea! che infinità  
De barcolame de tute le razze!

Che lusso in ogni grado de persone!  
Che Teatri in bersò! che simetria  
De Piazza! Oh che Regata! oh che Bissone!

Che Popolo! che gran Foresteria!  
Che Canal! che Tragheti! oh Dio, che Done!  
Epur no so el perchè, mi pianzeria.

## PER VENDITA FATTA DALL' AGIONTO

DI PISSIDI E CALICI.

A Padoa in man de Gregghi le Certose;  
San Nicolò del Lido xe un Quartier;  
Più d'una Chiesa e più d'un Monastier  
I deventerà un dì, Dio sa! che cose.

Le Sagrestie più rare e preziose  
Dal Strazzariol o in man del Tapezzier;  
E su i Bancheti e dal Luganegher  
Tute le Librarie rare e famose.

Oro, arzeno, laton laorado e schieto  
Gnanca a peso l'Agionto l'ha vendù,  
E sin l'ultimo armer xe restà neto.

E quela che po xe da B .....  
I Vasi Sacri .... indovinè mo? in Gheto.  
Oh al cospeto de Dio no gh'è de più.



## I QUATTRO NOVISSIMI.

Spiriti forti, che avè superà  
A forza de studiar la sugezion  
Ne la qual sol tegnir la Religion  
Con vera tiranìa l'umanità;

Za che vu n' avè istruto e illuminà,  
Che sia una solenissima invenzion  
Sto Giudizio, sto Cielo, sto Pluton,  
E una chimera pur sta Eternità;

Za che sti tre Novissimi più fede  
No i ga presso de vu, nè i ga altra sorte  
Che presso dei c . . . che ghe crede,

Mi no ve stimo de una testa forte  
S' anca per favoloso no se vede  
El Novissimo quarto de la Morte .

## SOPRA UN DECRETO DI SOPPRESSIONE

DEI PADRI DI S. FRANCESCO DE PAOLA.

Per far che l' ogio vegna a bon mercà  
I l' à tanto zirada e razirada,  
Che so Zelenze al fin gh' è l' à catada,  
Ma Dio sa quando la principierà !

Intanto a trentado' el se venderà,  
Che za la povertà xe rassegnada  
A viver de speranza, acostumada  
Sin da quel dì ch' el Loto à scomenzà !

Com' i à visto che in tante Religion  
Una ghe n' è composta de Fradeli  
Che vive d' ogio per Costituzione,

Per no scazzarli via come rebeli,  
I à decretà, che per consumazion  
Da so posta se stue sti cesendeli.  
Oh, per Dio, semo beli :  
I leva el Frate, i lassa star l' Ebreo,  
I pensa a l' ogio, e semo za in asco,

PER LE

## INNOVAZIONI DELLE MANI-MORTE.

Tiolème de che Seta che volè,  
Turco, Ebreo, Luteran o Calvinista,  
Catolico, Zentil, Grego, Ateista,  
O tra le tante molte che ghe xe,

Se retamente m' esaminerè,  
Un vero Citadin Republichista,  
Ch' altro no ga per punto mai de vista  
Che la so Patria, in mi vu trovarè .

Come tale mi provo ad evidenza,  
Che in Politica pezo no se dà  
Ch' al popolo scemarghe la credenza;

Anzichè, xe de necessità  
La superstizion in sta licenza  
A la legislativa Podestà.

## CONTRO TRE CORRETTORI PATRIZI.

Do gran fati se leze in la Scritura  
Che quando nu credèmo, i fa tremar !  
D' un Faraon somerso in mezo al mar,  
D' un Antioco che ai vermi è stà pastura.

Prova, che Dio con peso e con misura  
L' omo castiga a norma del mal far,  
Nè su questo se pol filosofar;  
Principio el xe de lege e de natura.

Uno, el popolo eletto l' à scarnà  
A forza de fadighe e d' estorsion;  
E l' altro el Santo Tempio l' à spogià.

Co l' è cussì, feghe l' aplicazion;  
E dopo dedusè qual el sarà  
El fin che farà el R . . . el D . . . el T . . . !

## INGORDIGIA DEI BENI DELLA CHIESA

DELL' AGIONTO ALLE RIFORME.

Un odio sempre più vedo che germina  
 Contro i Ministri ancuo del Cristianesimo,  
 Che de boto convien che me determinà  
 A richiamar le idee del Gentilesimo.

Se buta zo le Chiese, se destermiaa  
 I sacri aredi, e per sto fin medesimo  
 Se cerca tuto perchè i Frati termina  
 Avanti de tocar l' otocentesimo.

Se magna el ben de Chiesa come crostoli  
 Per no far i simioti de quel secolo  
 Che i donava le tere ai boni Apostoli.

La Cassa *Opere Pie* sempre s' intavola;  
 Dise ai Frati l' Agionto: *tuto becolo*,  
 Che sta Cassa xe un nome, xe una favola.

## PER PARTE PRESA SU LE POMPE.

Se pensa a riformar solo el privato;  
 Nè del publico al ben se pensa ancora,  
 Quasichè la salute de sto Stato  
 Dipenda da qualcun che va in malora!

Mi che son citadin, seben privato,  
 Nè che alcun Magistrato el cul me onora,  
 Un arecordo dar vogio al Senato,  
 Perchè con un Decreto el le avalora.

A le barche pensè, pensè ai ferali?  
 Al color negro, ai schieti vestimenti.  
 Per far parer le done, funerali?

Dar bisogna al massizzo e ai fondamenti:  
 Dando cariche a certi tali e quali  
 Farghe cavar bisogna prima i denti,  
 Ma, per Dio, steghe atenti;  
 Co le zenzive à fato el sora osso  
 Anca cussi se magna a pi non posso.

## INNO DI GEREMIA

A VENEZIA.

Cità, che dopo che ti xe, ti è stada  
 Asilo e sede de la Religion,  
 E per questo da tute le Nazion  
 Ti geri benedeta e respetada;

Ti, che da Dio ti geri destinada  
 Tera promessa e vaso d' elezion,  
 E sin a la final consumazion  
 Ti geri in la so' morte preservada;

Dove xelo el splendor dei Magistrati?  
 Dove el bel virginal candido zio,  
 L' onor de le Matrone e de i Primati?

Dove el costume sì innocente e pio?  
 Dove xelo el valor dei to Antenati?  
 Dove xela la Fede, e dove è Dio?

LAMENTO

DELL' EVANGELISTA S. MARCO.

Davanti al trono augusto de l' Altissimo  
 L' Evangelista Marco è stà cità  
 Per render conto de quel che se fa  
 Nel Veneto Dominio Serenissimo.

Comparso al primo ceno obedientissimo,  
 Apena Rafael l' à interrogà,  
 Sul so Vangelio dopo aver zurà,  
 L' à dito: *Mi no ghe ne so gnentissimo*;

So ben che m' averia da lamentar,  
 Ch' i m' à contracambià sta protezion  
 In modo da redurme a questuare

Dopo averme pelà tuto el Lion,  
 E fato sto mio Libro spegazzar;  
 I me rosega adesso anca el carton.

## AL SENATO

Se podesse tornar qua sora tera  
 Quei vostri sì gloriosi antecessori  
 Che col sangue e con i so' sudori  
 De la Fede i xe stai scudo e bariera;

Vedendo sfigurà da quel che 'l gera  
 L' Evangelio in sti dì dai sucessori,  
 I vederia che soto bei colori  
 Diretamente a Dio se ghe la guera;

E se da l' urna se podesse alzar  
 Co la superba fronte l' Eresia,  
 Ve sentiressi forse a rinfazzar :

Che s' ela con più colpi l' à feria;  
 Vu, per voler la madre risanar,  
 Col manto de pietà l' avè finia.

## LE VERÈ CAUSE DELLE MORTI

## IMPROVVISE.

Se va studiando con gran atenzion  
 Del morir che se fa improvvisamente  
 La causa, e vien credudo francamente  
 Che 'l bogia sia el tabaco poco bon;

Mi mo, che penso assae diversamente,  
 Digo, *in capite libri*: la rason  
 Che a Venezia se va zo col brenton  
 Un' altra la xe, e assae chiara e patentè.

Peste, Peste, de la più fina e bona,  
 Che infeta l' aria del nostro Paese ,  
 Che destruze ogni sesso, ogni persona.

Per le strade, in le case, e per le chiese  
 Convulsa par questa o quella Dona,  
 Ma impetada la xe, l' à el mal francese.

## IL MAL COSTUME NELLE DONNE.

Considerando sta depravazion  
 Del costume in ste Done, e sta impudenza  
 Degenerada in publica licenza,  
 Con smaco e disonor de la Nazion;

Mi squasi che saria de la opinion  
 De la nota Pitagorica sentenza,  
 (Se no credesse ofender la credenza  
 De la nostra Cristiana Religion),

Mi crederia che l' aneme de quele  
 Che in altre età, esalae dal so leame;  
 Le à figurà vestie da putanele,

Per onorar el so mestier infame  
 Le se fusse introdotte in certe Stele  
 Per tornar qua fra nu Signore e Dame.

## SULLE

## REGOLAZIONI DELLE FRATERIE.

Se no s' avesse tanto lassà andar  
 Le legi e 'l bon costume in t' un canton,  
 Nè tanti libri pieni d' infezion  
 S' avesse lassà lezer e stampar;

Se s' avesse studià de rafrenar  
 La libertà ne le Conversazion  
 Tra i do sessi, che le generazion  
 Xe arivadi a confondere e machiar,

Diria, ch' el Cielo solo v' à ispirà  
 De regular ancuo la Frateria,  
 Senza tiorghè però quel che la ga;

Ma sto meter la man in Sacrestia  
 E 'l resto lassar corer sin che 'l va;  
 No so da dovè el vegna, e cosa el sia.

## L' USO DEL TABACCO.

Semo, a no se burlar, gran vis de c...  
 A creder che 'l tabaco sia rason  
 Per la qual se va zoso a tombolon,  
 Quando femo de nu tanti strapazzi.

No che 'l tabaco no fa convulsion,  
 Ma le fa i nostri vizii e pecadazzi;  
 Che ne reduce in fregole, gramazzi.  
 Senza poder sperar da Dio perdon,

Le Donete; le betole; el zogar;  
 El far l' amor in Chiesa; el gran bordelo  
 Fato de tanti Frati; el biastemar;

Le massime imparae da Machiavelo;  
 No creder gnente; el star sul cogionar;  
 Queste le cause xe de sto flagelo.

## I MERITI DI UN RAGIONATO.

Cossa diavolo xelo sto Rodela,  
 Che dopo aver fallo in so' zovetù,  
 In tanto gran conceto l'è vegnù  
 Che nissun ghe pol star gnanca a copela?

La cabala el la ga giusto in scarsela  
 Per farghene quel zio go ch' el vol lu;  
 Ma per descogionarse de costù  
 Mi sì che so quala saria la bela!

Tuti ciga ch' el se meritaria  
 Sto gran Ministro che ghe dessi imbarco  
 Tra i condanadi sora una Galia,

Ma mi, che più d' ogni altro ghe rimarco  
 Le so' gran qualità, lo manderia  
 In mezo a le colone de san Marco.

## A UN VENDITORE DI VASI SACRI.

Quel *Mane*, *Thecel*, *Fares*, che segnà  
 Xe sul muro de l' empio Baldassar,  
 Co da Daniel mel fazzo interpretar  
 Sento che l'è la pena al so pecà,

Per aver tolto al Tempio e profanà  
 I Vasi, che soleva adoperar  
 I Sacerdoti nel sacrificar  
 Le Vitime in le so' solenità,

Se la so' danazion scritta colù  
 Sora quella muraglia lu el s' à visto  
 Perchè drento in quei Vasi l' à bevù,

E ti, de Baldassar drudo più tristo,  
 In fronte ti la ga, che ti à vendù  
 Quei dove, Omo e Dio, stà Gesù Cristo.

## IL PROCURATOR TRON.

Dé tuto quello che da poco in qua  
 Se sente nel Pregadi a decretar  
 Sora el Comercio, sora el Militar,  
 Sul Decimà e sul Redecimà,

Su l' Arsenal, su la Università,  
 Su le Man-morte, e su d' ogni altro afar,  
 O interno o esterno, sia de tera o mar,  
 Con grave intaco de la Libertà;

No gh' è altra causa fisica o moral,  
 No politica, no legislazion,  
 No penuria de ben, timor de mal,

No massima de Stato, o Religion,  
 Ma causa d' ogni efeto micidial  
 No xe se no: *Cussì comanda el Tron*.

## IL CHINETI CORRIERE DELLA REPUBBLICA

## ALLE PORTE DEL PARADISO.

A le porte arivà del Paradiso  
 El Chineti co le Regolazion ;  
 E coi Decreti de la Sopression ,  
 A Piero i ghe n' à dato subito aviso .

Col cortelo che a Malco ga reciso  
 La rechia , e co le chiave del Porton  
 Piero xe capità ; ma dal balcon  
 El Corier l' à vardà subito in viso ,

Co l' à visto ch' el ga un san Marco in peto ,  
 L' à dito : *Chi comanda qua de sora*  
*A Veneziani no ghe dà riceto ;*

*Ghe n' e scampà qualcun drento a bon' ora*  
*Ma adesso che i gavemo in gran sospeto*  
*S' à da veder qua suso el primo ancora.*

## PER LA

## SOSPENSIONE DI UN DUODO MINISTRO

## E LA SOSTITUZIONE DI UN VARUTI

## NELL' AMMINISTRAZIONE ALLE MANI-MORTE.

Mi za me la figuro , e me la ideo  
 Da dove sia vegnù st' umor fantastico  
 De desfar co sta furia el Duodo Ebreo ,  
 E tuti quei ministri del Catastico.

Uno che peritava a menadeo  
 Ogni fondo , ogni ben de l' Ecclesiastico ;  
 Che in te le carte el ghe trovava el neo  
 Perchè più presto se vegnisse al mastico ;

Dai diese Savj vien tuto sto fogo :  
 Per far magnar da un altro i desfa el Duodo  
 E del ben de la Chiesa se fa zogo.

Povera roba che va tuta in brodo !  
 No volè che l' Ebreo gabia più logo ,  
 E sperè che Varuti bata sodo ?  
 Figurevè se lodo ,  
 Se acordo che sia ben , se ve ringrazio !  
 Un afamà sostituirme a un sazio !

## CONTRO

## UN FAMOSO STOCCHIZZANTE.

Oh quanti , oh quanti ghe n' ò visto mai  
 Per man del Boja su la forza in Piazza ,  
 Oh quanti ghe n' ò visto de sta razza ,  
 Dopo tagià la testa , desquartai !

Oh quanti a la Berlina condanai  
 Tior su pomade e vituperj in fazza !  
 Quanti per poco più d' una lirazza  
 Ghe n' ò visto in Gallia , dopo frustai !

Ma za che in sto paese ogni assassin  
 Incontra o presto o tardi el so castigo ,  
 Cossa feu del famoso sior Santin ?

Che scanandove fioi, mugier , amigo ,  
 Sudito , Forestier , e Citadin  
 Almanco almanco nol mandè a Cerigo ?

## SULLA SPADINA

## CHE PORTAVANO IN TESTA LE DONNE.

Come Rinaldo un dì da Montalban ,  
 E quel famoso Cavalier de Brava ,  
 Orlando , per el mondo in cerca i andava  
 D' imprese sora del poder uman ,

E con Fusbesta e Durlindana in man  
 I eserciti più forti i sbaragiava ,  
 E tutto quel che se ghe attraversava  
 In pochi colpi i reduseva al pian ;

Cussì ste nòstre Done invelenade ;  
 Nove Amazoni piene de valor ,  
 Co le se sente certe morsegade ,

Senza rispetto a rizzo , a nastro , a fior ,  
 Le mena intorno quele acute spade  
 Sin che le à vinto , e che 'l peochio muor ,

## ARRINGA AL SENATO

SUL DECRETO

## DI ABOLIZIONE DEI FRATI

DELL' ANNO 1767.

*Proemio.*

Nè deguo mi saria del Patriziato,  
Ne tra vu, Padri Augusti, de sentar,  
Se ancuo no me movesse a declamar  
Contra Decreti rovinosi al Stato.

Riguardo no ghe xe, nè fin privato  
Che seduga a taser o a pur parlar,  
No son qua per i Frati a perorar,  
Che no son nè Terziario nè Avvocato ;

Solo da Citadin vero e zelante  
Sto sì grave argomento tratarò  
A tre cose nocivo e repugnante :

A la Rason de Stato, e 'l mostrerò ;  
Dopo, a le Legi statutarie e sante :  
Terzo, a l'Arti e al Comercio ; e 'l proverò.

Nè me destacherò  
Da quella Parte del sessanta sete  
Che tut' altro la intende e la comète ;  
Nè, se 'l me se permette,  
Da la gran Religion, che xe quel perno  
Sora el qual se razira un bon Governo.

Ah! se nel vostro interno,  
Padri Coscriti, ancora compassion  
Sentì per la Republica, atenzion ;  
E za che una rason  
Qua ne conduse tuti, e uniti semo,  
Su sto vonto importante scomenzemo.

## I.

Prima d' entrar ne la materia, son  
In una indispensabile e precisa  
Necessità de domandar perdon,  
Se portando anca mi quella divisa  
Scolpida in fronte, e impressa nel mio peto,  
Che da sta stola no à da andar divisa,  
Ardisso comparir ancuo al cospeto  
De questo ecellentissimo Senato  
Per tratar d'un gravissimo sogeto,  
Che vol sui mii principj e sul mio dato,  
Che abia a Vostre Zelenze a domandar  
Cossa le intende per *Razon de Stato*.  
Mi no son qua a far pompa, nè a vantare  
L'erudizion de quei che à lassà scritti  
I moltissimi modi de pensar  
Sul gran ponto dei Publici Diritti,  
E che i Principi ancuo tuti à impegnà  
A publicar tanti diversi Editi.  
A mi par che i confini abia passà  
La Republica sola nel Politico  
Fra tuti quei de la Cristianità ;  
Nè se diga che mi sia metafisico,  
E in ste materie tropo rigorista  
Se nel so' centro ancuo la guardo e critico ;  
Che essendo afato compilada e mista,  
A formarghene idea corispondente  
Ponderarla convien per ogni vista.  
Se dise tuto el dì comunemente :  
*Massima*, o sia *Rason de Stato* ; e questo  
Xe quello che dal volgo ognor se sente ;  
El qual, senza curarsene del resto,  
De le sì vaste idee de sta parola  
Nol ga la tessitura nè l'inesto.  
Quelo che me conforta e me consola  
Xe che parlo a maestri del mestier  
Da ognun dei quali posso prender scola.  
Pur tropo mi conosso che 'l poder  
Da mi solo no go nel gran cimento  
Al fin che me propono de otener ;  
Ma pur in mi gh'è un tal presentimento  
Ch'el Ciel me fizza strada ai vostri cuori,  
Che son pien de lusinga e d'ardimento.  
Mi no vaghegio premj, aplausi, onori ;  
Sòla d'un Citadin degna mercede  
Xe el ben de la so' Patria e i so' sudori.

Sto sàgro, augusto logo, ove risiede  
 La Libertà, un non so che m'infonde  
 Più d'ogni altro, d'ardir, de zelo e fede,  
 Che ricercando ne le più profonde  
 Caligini del Caso, o sia Destin,  
 Trovo che l'omo spesso se confonda  
 Tra la combinazion, che pol divin  
 Voler unire in pena d'una tal  
 Qual pretesa d'alzarse oltre el confin  
 Prescrito ai sensi; e ne vien che preval  
 Quel eror che a le Cause secondarie  
 Tutto s'atribuisse el ben e 'l mal;  
 E da qua nasce quele tante varie  
 Mutazion danose de pareri  
 A le massime e legi statutarie.  
 Su sti principj cussì sodi e veri  
 E sì ben radicadi in sto Consesso,  
 De sviluparghe tuti i mii pensieri  
 Vostre Zelenze me permèta adesso.

## II.

Per defenir la *Massima de Stato*  
 Convien prima de tuto intender ben  
 Cosa sia Suditanza e Principato.  
 L'idea de Suditanza in nu la vien  
 Mossa da quella tal popolazion  
 Che volontaria la se impone un fren  
 De Statuti e de Legi, e in streta union,  
 Soto un solo o più capi regolada,  
 La forma da so' posta una Nazion;  
 E da quel' altra idea xe in mi svegiada  
 De chi à la soma de le Legi in man  
 Con giusta economia depositada;  
 Che dove no gh'è un despota o un tiran,  
 Tanto al Sovran el popolo è sogeto  
 Quanto a le Legi è sudito el Sovran.  
 Da sto principio natural e schieto  
 Chiaramente s'afazza el gran mistero  
 De la *Rason de Stato* a l'inteleto.  
*Rason de Stato* xe quel fermo e vero  
 Nodo che unisse in forma inseparabile  
 L'interesse a la gloria de l'Impero;  
 Dal che per deduzion certa inegabile  
 Soda felicità ghe ne deriva  
 Al vassalagio, e sicurezza stabile,  
 Da massima sì grande e cussì viva,  
 E che passada in nu d'età in età  
 Racc. Poes. Ven.

La regnava in Senato e la fioriva,  
 Con sorpresa d'ognun da poco in qua,  
 E con privato e con publico dano  
 (Nè saveria el perchè) s'è declinà  
 E quello che radopia in mi l'afano  
 Xe, che nu semo oppressi da un sopor  
 Che no ne lassa andar fora d'ingano.  
 Ah che la Religion senza rossor,  
 In quel che se consulta e se decreta,  
 La sia tolta de mira, me fa oror!  
 E che a mente serena e a mente quieta  
 Ogni publico afar tratar se possa  
 Che direto no sia verso la meta?  
 Questa xe stada quel' orenda scossa  
 Che Republiche, Stati, Imperi, Regni  
 A' roversa ne la più fonda fossa.  
 Pur tropo ghe n'avevo certi i segni  
 Dai rimasugli e dai grandiosi avanzi,  
 Tutti memorie dei Divini sdegni!  
 Favola no la xe, no i xe romanzi,  
 Parla la Sacra e la Profana Storia ....  
 Ma che serve che più m'inoltra e avanzi?  
 Richiamando ste cose a la memoria,  
 O imagini de calda fantasia,  
 O artifizj i credè d'arte Oratoria;  
 Donca perchè con ordene el ve sia  
 Posto in chiaro sto afar, a parte a parte  
 Feghimo un poco su la notomia,  
 E procedendo, al lume de le carte  
 Confronteremo, per intender meglio,  
 Sti ultimi Decreti co la Parte.  
 Se domanda se nel Mazor Consejio  
 L'intiera podestà de la Republica  
 Risieda, se dal Sovran Colegio  
 Tute le Legi là se forma e publica?  
 Dopo de che, perchè de le Man-morte  
 S'è volùdo alterar la mente publica?  
 Mi no andarò per vie indirete e storte  
 Oponendome a ste mostruose e nove  
 Regolazion; chè drento de ste Porte  
 Xe un delito el mentir. Vegno a le prove.

## III.

Me acordele un principio, che 'l Senato  
 Ne la soa natural autorità  
 Sia del Mazor Consejio un Delegato?  
 Quando che questo me vegna acordà

Le doverà in apresso anca acordar  
 Quello che in conseguenza ghe ne va .  
 Le fazzo grazia de no se scordar  
 Sto articolo de fede ; e quanto prima  
 Le vederà dove mi vago a dar .  
 Ma perchè ne la mente se ghe imprima ,  
 In sta causa che trato , la rason ,  
 Le me permetterà che mi me esprima  
 Senza riguardi e senza sugezion .  
 È stà in st' ultima parte stanchegiada  
 Tuta la Causa su la Religion .  
 A passo a passo mi me farò strada  
 A farghe veder e tocar con man  
 Che la *Rason de Stato* è vulnerada .  
 Le prego : co la Parte del Sovran  
 Mazor Consegio del mille tresento  
 E trenta tre , tiolendo da lontan  
 L' epoca in sta materia , el pensamiento  
 Xe nato d' impedir che l' Ecclesiastico  
 Nol facesse mazor avanzamento :  
 E in quel incontro è stà ordinà un Catastico  
 De beni possedudi in campi e case  
 Dal Clero secolar e dal Monastico .  
 Tuti allora con quiete e santa pase  
 S' à rassegnà al Decreto del Comun ,  
 Fondà su sto principio e su sta base :  
*Che d' allora in avanti mai nessun*  
*Logo Pio più posseder no podesse ;*  
*E succedendo el caso , che qualcun*  
*Dei fondi ghe lassasse , i se vendesse*  
*Drento quel tempo dal Comun prescritto ,*  
*E in sen Publico el soldo se metesse .*  
 Andèmo avanti . Con un altro Editto ,  
 Del mille cinquecento trenta sie ,  
 Pur dal Mazor Consegio xe stà dito  
 Su sto particular d' Opere Pie :  
*Che da la Podestà Legislativa ,*  
*Per impedir che no prendesse pie*  
*Quel abuso che 'l laico spogia e priva*  
*De le so' facoltà , che xe la fonte*  
*Del Principato la più pura e viva ,*  
*Per le vie risolute e le più pronte ,*  
*Senza mai ralentar forza o comando ,*  
*Che a sto nemigo se facesse fronte .*  
 Ma come se anderiele imaginando ,  
 Interpreti de allora del Pregadi ,  
 Sta nova Prescrizion , sto novo Bando ,  
 Che i Beni a sto Decreto sogetadi

Fusser vendudi , e che i Contrafacenti  
 Del ricavà i dovesse esser privati ?  
 Passèmo adesso a quei provvedimenti  
 Del mille seicento e cinque presi ,  
 Poco più , poco men corrispondenti .  
 Questi , no essendo nel so' senso intesi ,  
 Roma ga fato su varj Processi  
 Come se l' Eresia li avesse estesi ;  
 Epur i gera con quei modi istessi  
 De pensar , e a ben ben esaminarli ,  
 Co le stesse parole squasi espressi .  
 Sti tre Decreti doverò incontrarli  
 Co la letura ; perchè preme tropo  
 Con quest' ultima Parte confrontarli .  
 Qua ghe xe tuto de la Causa el gropo ,  
 Ma gropo che a snodarlo go paura !  
 Che ghe voria per no trovar intopo  
 D' Alessandro la spada e la bravura  
 Ah che a sto passo mi me perdo e tremo ?  
 Qua in vista dei Diritti de Natura  
 Del Principe e de Dio parlar ? .. Provèmo .

## IV

Vostre Zelenze le ga tuto in vista  
 Quello che in la Scritura se contien  
 Del Segretario , e del so Computista (93) ,  
 Le ga la Lege , le ga tuto el pien  
 Del calcolo , le ga i suggerimenti :  
 Ma no le se ne acorze del velen ?  
 Su tuto ghe farèmo i so comentì ,  
 E vederèmo un poco se al confronto  
 Rege sta pianta su i so fondamenti .  
 Ele me vede qua disposto e pronto  
 A smentir con tre Capi de converso  
 Stù gran sforzi d' inzeño . Onde a bon conto  
 Principio da le Legi , dove imerso  
 Ghe xe talmente sto sior Segretario (94)  
 Come se ognuna avesse un stil diverso .  
 Ma mi , che no ghe trovo sto divario ,  
 M' ataco a le do sole principali (95)  
 Su sto afar emanade in tempo vario ;  
 Perchè come i più gran fiumi reali ,  
 Scorendo gonfi , nu vedèmo spesso  
 Che se va diramando in più canali ,  
 Cussi da ste do Legi che gh' ò espresso  
 Molte ghe ne xe nate e diramade  
 Che 'l spirito le ga tute l' istesso .



Per no tegnerle donca incomodade  
 Superfluamente, de ste do dirò,  
 E del Decreto (96) le sarà informade,  
 De la sessanta sete parlerò;  
 Le imagina che l'ultima mi intendo  
 Sora la qual la Causa tratarò.  
 Co gh'ò da dir el ver, mi no comprendo  
 Come ste Legi s'abia adulterà  
 Co sti Decreti che se va facendo.  
 Se un' ochiada, a la prima, le darà,  
 A quella Parte del mile tresento  
 E trenta tre, ele ben le vederà  
 Che in tuto quel che se contien là drento  
 Altro no se vol mai significar  
 Che una Riforma o sia Regolamento;  
 Perchè se la vorèmo esaminar  
 Su i Loghi Pii, la fa sta restrizion:  
*Che in Rialto e in Città mai più acquistàr*  
*No i possa; e gh'è de più sta prescrizion:*  
*Che quel ch' ereditasse, in ani diese*  
*L'abia da vender senza alterazion.*  
 Co sora questa no ghe xe contese,  
 Ne l'altra cinquecento trenta sie  
 Tute ste cose le ghe xe comprese.  
 Dopo, perchè più no prendesse pie,  
 Anca tuto el Dogado la interdise  
 Ad ogni istituzion d' Opere Pie:  
*E venduti (a majuscole e precise*  
*Note) li Fondi venienti da Legati*  
*Dopo ani do, la vol, nè più la dise.*  
 Vostre Zelenze adesso da sti dati  
 Le dirà, se ghe vegna in conseguenza  
 Desfar la Religion, spogiar i Frati?  
 Ma prima che le fazzo sta Sentenza,  
 Le lassa che ghe diga tuto el resto,  
 Perchè le abia l'intiera conoscenza  
 De quello che più importa; che xe questo:

## V

Dopo quele do' Legi del Sovran  
 Consegio, e altre d' un egual tenor,  
 (Che de passaggio mi torò per man)  
 Se ghe ne fa in Pregai con mio stupor  
 Del mile siecento cinque ussir  
 Una, come dal so Legislator.  
 Caro sior Segretario, compatir  
 Me dovè, se voria la spiegazion

De quello che no arivo a ben capir.  
 Vorìa che me disessi la rason  
 Perchè in Senato, e no in Consegio, allora  
 Sia stada fata sta Legislazion?  
 Quando el Consegio tute le altre ancora  
 L'aveva fato; questa come mai  
 Dal Senato in quel dì saltela fora?  
 O che l'aveva facoltà el Pregai  
 De far sta Lege, o no. Fora de qua  
 No gh'anderè senza incontrar dei guai.  
 Diseu de no? Con qual autorità  
 Donca l' a 'l fata? Me diseu de sì?  
 Donca me provare sta facoltà  
 Quando el l' à ayuda, e provare da chi;  
 Perchè, sentime ben, dove che ariva  
 Tuta la forza e quel che intendo mi:  
 Pianto un principio. La Legislativa  
 Podestà la risiede nel Comun,  
 Secondo la Real Costitutiva  
 Forma de sto Governo; onde nissun  
 Membro pol arrogarse quel poder  
 Del qual el gode sol co l'è in comun.  
 Prevedo che dirè, che ò da saver  
 Che un subalterno in via de Delegato  
 In qualche caso el Dritto el pol aver  
 Che de natura xe del Principato;  
 E che tra le altre l' uso de sta vesta  
 Xe in Consegio de Diese e nel Senatø.  
 Ve l' accordo; ma co la vostra testa  
 No me poderè in fazzo sostentar  
 Che donca sia la conseguenza questa:  
 Che 'l delegante quando el vien a dar  
 Al Delegato el so dritto, in parte  
 El se voglia de questo desfogiar  
 In modo che formar Statuto o Parte  
 (Che dir Legislazion sarà lo stesso)  
 Tanto del Corpo el sia che de la Parte.  
 Ma vogio che ve sia tuto concesso;  
 Sentì ben, mi v' accordo ch' el podesse  
 Far sta Lege el Senato; e no comesso  
 Dal Comun, ma da sè; cioè, che l' avesse  
 In sè l'autorità de so' natura,  
 Senza che dal Comun el dipendesse.  
 Ma con tuta la vostra gran Scrittura,  
 Quando vogiè risolverme sto obieto  
 No so se vu farè bona figura:  
 El gius legislativo l'è un perfeto  
 Dritto Sovran che pol liberamente

Far ogni Lege, nè l'è mai costreto  
 A render conto de la propria mente;  
*Aqui* el Senato in quel famoso Bando  
 L'ha pronunzià legislativamente;  
 Donca ne vien, che sto Diritto usando,  
 Sto gius Legislativo in lu resides.  
 Co 'l silogismo è in forma, ve domando  
 Qual diferenza in prima che se vede  
 Tra el Senato e 'l Consegio? e po voria  
 Saver da vu da dove che procede  
 Che rivolto el Senato ancuo el se sia  
 Al Mazor Serenissimo Consegio  
 Per poder despogiar la Fraterla?  
 Perchè ricorer a l' Augusto Segio  
 Del Prencipato a consultar l' oracolo  
 Co la medema idea e col vanegio  
 De voler meter man nel Tabernacolo,  
 Onde, alterando el sentimento vero  
 A le Legi, pretender el miracolo  
 De preservar unito, ileso e intiero  
 Un felice e sicuro vassalagio  
 A l' interesse e gloria de l' Impero;  
 Che xe quel lume e cussì vivo raggio  
 De la *Rason de Stato*, che conduse  
 El Prencipato al publico vantagio?  
 Queste le chiamo idee vaste e confuse  
 De chi pur troppo adopera gran forza  
 Perchè le sia tra nu sparse e difuse;  
 Ma l' argomento qua me se rinforza.

## VI.

In t' un secolo tanto depravà  
 (Pur troppo ghe n' avemo l' esperienza  
 Da dove el nostro mal xe derivà!)  
 Una moderna e libertina scienza,  
 Insidiosa molto a la Religion,  
 Xe causa de sta trista conseguenza!  
 Questa à portà la gran revolucion  
 Nei cuori umani, e da qua aponto è nato  
 Che in libertà s' à messo le passion.  
 Questa à sposà le Legi e 'l Prencipato,  
 E ga oscurà quel astro tutelar,  
 Scorta sicura a la *Rason de Stato*;  
 A l' interesse alfin particular  
 L'ha possudo nel cuor dei Citadini  
 Quel ch' è publico ben sacrificar.  
 Da qua vien che i lontani e che i vicini

No ga più verso nu quella riserva  
 Che li tegneva drento i so confini.  
 Ogni dì più s' indebolisse e snerva  
 El Patrimonio publico; e l' Erario  
 Apena in la opinion el se conserva;  
 E gh' è sta bagatela de divario  
 Da quello che nu gerimo, e che semo  
 Per un pensar sì stravagante e vario,  
 Che quando de sto passo seguitemo  
 Ancora per un poco, go paura ....  
 Solo a pensarghe inorridisso e tremo!  
 A sta lugubre e tragica pitura,  
 Che no xe idea de fantasia scaldada  
 Da insolita comossa interna cura,  
 La Sapienza dei Savj, iluminada  
 Dal spirito divin d' un Consultor, (97)  
 (Ch' el sa savudo per segreta strada)  
 Che se sa mantegnir l' aura e 'l favor  
 Anca adesso, siben de qua lontan,  
 De più d' un so Patron e Protetor;  
 E getada da quel vento Furlan,  
 Che l' à in sto Segretario e Computista  
 Tanto supià ch' el ga menà la man,  
 I siori Savj, replico, a la vista  
 D' una situazion sì dolorosa  
 Che ogni bon Citadin move e ratrìsta,  
 Tra le Consulte i à pensà una cosa  
 Che sarà de gran massimo provento,  
 Non men che a la Republica gloriosa.  
 Prima però de dar l' ecitamento  
 A la Parte importante, a sto miracolo  
 I à previsto col so antivedimento,  
 Che bisognava consultar l' oracolo  
 De la Sovranità sora de tuto,  
 Per poder tior de mezo quel ostacolo  
 Che s' oponeva a conseguir el fruto  
 De le machinazion e dei raziri  
 Dei quai no gh' è chi dir se possa istruto.  
 Pur senza frase e senza tanti ziri  
 Mi ghe dirò (le prego, le me ascolti)  
 Dove sto afar el tenda e dove el miri.  
 Come i vedeva i ordini sconvolti  
 Per loro colpa da l' economia,  
 E sempre più i bisogni e grandi e molti;  
 I à medità ne la so fantasia  
 De bisegar de niovo in le Man-morte  
 Per poder despogiar la Fraterla;  
 E dubitando che vegnindo estorte

A forza le sostanze de le Chiese  
Regolari, per vie indirete e storte  
I poteva incontrar de le contese,  
E che in quel Decreto specialmente (98)  
I gera afato spogi de difese;  
I à tanto strologà, che finalmente  
Con un tacon assae pezo del sbrego,  
Cosa ai fato? Le me staga atente,  
E le la sentirà bela! Le prego,

## VII.

Stabilido dai Savj el gran progeto,  
Parto e disegno de l'ecelsa mente  
D' un riguardevolissimo sogeto.  
La prima cosa a la qual seriamente  
I ga pensà, la xe stada de tior  
Via quel impedimento dritamente,  
El qual poteva fomentar l'umor,  
In modo che insorgendo qualchedun  
Ferocemente el se vegnisse a opor;  
E i temeva a rason che nel Comun  
Comparisse a segnar l'Intromission  
Un dei tre Avogadori de Comun;  
Perchè i saveva (che no gh'è quistion)  
Che in pregiudizio de la Podestà  
Legislativa no gh'è prescrizione.  
Dopo aver za in Consulta concretà  
E formà tra de lori el so disegno,  
Per dessiparne co sta novità,  
Con arte la più fina e con inzeño  
(Direto solo da quel bel talento  
Che ga la soversion per meta e segno)  
Al Senato i ga dà l'ecitamento  
Perchè se decretasse a dirittura  
La destruzion e l'anichilamento  
Dei Regolari; e perchè più sicura  
I podesse piantar la prima pietra  
I à sugerido una Magistratura  
La qual avesse la podestà intiera,  
Senza esser a nessun assogetada,  
De far man bassa e de calar visiera;  
E tanta autorità ghe fusse dada  
Che, con nostro rossor, nei nostri Anan  
La fosse Dittatura un dì chiamata.  
In conseguenza tre dei principali  
Senatori, a covrir sto Magistrato  
In merito e virtù tuti tre uguali,

Subito xe sta eleti dal Senato  
Perchè i dovesse sora de sto afar  
Prender notizia da per tuto el Stato:  
E un Segretario i ga pensà de far  
Che tra i so pari più se distinguesse  
Nel saver ste materie scriturar;  
E voludo i à de più, che pur i avesse  
A so disposizion un Computista  
Che i necessarj calcoli facesse.  
Fra tuti quelli che i gaveva in vista  
Al Franceschi à tocà la bela sorte  
E al Rizzi d' esser soli messi in lista.  
El primo in Religion spirito forte,  
E l' altro in realizzar bravo e famoso  
Le partide più false e le più accorte.  
Per riuscir in st' impegno laborioso  
Ognun de loro se ga messo drio  
A laorar note e di senza riposo;  
Perchè operando con fin giusto e pio  
De poder otener degna mercede  
I sperava dal Prencipe e da Dio!  
Anime rete, che con zelo e fede  
Avè sudà per el publico ben,  
El gran merito vostro chi nol vede?  
Mi deboto dirò quel che contien  
St' opera cussì granda e sì famosa,  
E de vu dirò ben quel che conven.  
Mi sarò quel che ghe farò la glosa  
Acìò la gran fadiga che avè fato  
La se tramandi ai posterì gloriosa!  
E de vu do' mi farò quel ritratto  
Che messo in la so' vera prospettiva  
Ognun resterà pago e sodisfatto;  
Che cercarò un' immagine sì viva  
De la semplicità più natural  
Che de vu do' la sia la più espressiva;  
In soma incontrarò l' Original  
De sti do' gran Ministri sì valenti  
Che à savudo scoprir un capital  
Richissimo de Chiese e de Conventi  
Per compier l' estermínio e la rovina  
De la Città e del Stato, e trar proventi  
Con arte maliziosa e sopraffina,  
Per saziar cussì el lusso, e ancora el vizio  
De la famegia, e de la Concubina  
Che se mantien a spese del so Ofizio,  
E col privato e col publico dano,  
E de la Religion col pregiudizio.

Eh le me scusi, se qua mi m'afano  
 Più del solito a vista de la sola  
 Vergognosa ragion del nostro ingano.  
 Mi no go impedimento ne la gola,  
 Che la strada dal cuor sin a la boca  
 In libertà me lassa la parola;  
 Che 'l gran dolor che l'anema me toca  
 Fa che a quel che mi sento e che mi vedo  
 L'espression su i mi labri le me fioca;  
 E se el fervor, onde a nissun mi cedo,  
 Nol fusse rafrenà da quel riflesso  
 Che modera i trasporti, mi prevedo  
 Che trabocar el me faria in l' eccesso  
 De scordarme che parlo da sto logo  
 Davanti a un rispetabile Consesso,  
 In fizza al qual el più innocente sfogo  
 Interpretà el saria per grave colpa  
 Da chi de la rason scotendo el giogo  
 E Patria e Religion svissera e spolpa.

## VIII.

Ma no perdèmo el filo, perchè adesso  
 Su sta Scritura tanto decantada (99)  
 Nu ghe faremo un poco de processo.  
 St'opera finalmente terminada,  
 Compida finalmente sta Scritura,  
 I l' a Vostre Zelenze presentada  
 Col farghene in Senato la letura;  
 Ma le prego con più de riflession  
 Un' altra volta ben le la matura.  
 Co ghe vogiamo far osservazion  
 Ghe vederemo in quella un aparato  
 Sul so principio pien de delusion,  
 Col qual se vol che per *Ragion de Stato*  
 S'abia da meter man ne le Man-morte  
 Per interesse publico e privato,  
 Quando per strade anzi indirete e storte  
 Se cerca solo fora de scazzar  
 Le *Massime de Stato* da ste Porte.  
 Le senta come mi ghel vòl provar.  
 (Parlemo de le Legi su le quali  
 S' à voluto el Franceschi dilatar.)  
 Queste tiolte in complesso le xe tali  
 Che anzi le vol che sia perpetua  
 Muneghe, Fraterie, Preti e Ospedali.  
 Quele Legi che lu l' à epilogà,  
 Vostre Zelenze pol tocar con man

Ch' altro efeto che questo no le fa.  
 Le tioga su le Legi del Sovran  
 Mazor Consegio del mile duesto.  
 Za che le vol che andemo sì lontan,  
 E le me diga, se ghe sia là drento  
 Altro significato mai de quello  
 Ch' è de Riforma e de Regolamento?  
 No v' aspetè da mi, caro fradelo,  
 Che stracar el Pregai voglia sta sera,  
 E che me voglia romper el cervelo  
 Tiolendo suso sta Scritura intiera  
 Per comentar parola per parola;  
 Che co andassimo drio de sta carriera  
 Non basterave una zornada sola.  
 Con pochissime cose mi me sbrigo,  
 E le parole mi ve fermo in gola.  
 Sentime ben come che mi v' intrigo:  
 Fra sta gran quantità che avè compresa  
 Voria che me disessi, caro amigo,  
 Dove che interpretada, e non intesa  
 Sia a modo vostro la publica mente  
 Su sta materia lunga e sì contesa;  
 E se se possa intender schietamente  
 Restrizion, sopression, e sora tuto  
 Se sia stà decretà sovranamente  
 Che i Frati s' abia da spogiar de tuto,  
 E che privai i sia de quei possessi  
 Che sin ora in sto Stato è stai per tuto  
 El corso de più secoli concessi,  
 Riconossudi e confermadi, o sia  
 Da più Decreti chiaramente espressi  
 Del Consegio e Senato; questi in via  
 Deliberativa, quei in Statutaria,  
 E in Giudiziaria da la Quarantia.  
 Sto scrittor el se dà tanta gran aria  
 D' interpretar el spirito e la forza  
 De le Legi; ma, per Dio, el savaria!  
 Le senta come qua me se rinforza  
 Sto ponto che mi trato de converso;  
 Che s' el pol desmentirlo ch' el se sforza!  
 Voria saver da vu, se sia diverso  
 El senso d' una Lege che riforma,  
 Da quella Lege che per ogni verso  
 Anichilada vol l' intiera forma  
 D' un Corpo, in modo che mai più aparissa  
 De quel nessun vestigio e nessun' orma?  
 Sto divario in la mente le sel fissa,  
 Nè ghe vorà sforzo d' inzegno o d' arte

Perchè Vostre Zelenze se stupissa  
 Deboto a la letura de ste Carte (100),  
 Chiamade a giudicar, se sia adempida  
 La Sovrana intenzion de ste tre Parte.  
 Perchè co' questa no' la sia eseguida,  
 Se la *Rason de Stato* se conservi  
 Nel so intiero vigor, ele decida.  
 Ma se a le Legi no se ghe preservi  
 El spirito e la forza, ed ad alterarghe  
 El senso, che se voglia che se snervi  
 La *Massima de Stato*, ò da provarghe.

## IX.

Ma prima a sto de più. Co sta Scritura,  
 Scortà dai Savj, el novo Magistrato  
 De le Man-morte destinà a la cura,  
 El s'è presentà subito al Senato  
 Aciochè in conseguenza decretà  
 Fusse sto afar per ben de tuto el Stato.  
 In undese Capitoli segnà  
 Xe stà el Decreto de Regolazion  
 Che in quel dì el Pregai à balotà (101)  
 Dopo de che per la so aprovazion  
 L'è stà portà al Consegio, dove preso  
 (Le noti per la so' aprovazion l'è stà (102).  
 Questo xe 'l primo caso che mi ò inteso  
 Dove cussì a la cieca sia deciso  
 D'un afar drento al qual gh'è xe compreso  
 Tuto quello che xe de più preciso  
 In un Governo, e gh'è de più vital  
 In modo che nol pol andar diviso ....  
 Me spiego .... El gius divin e 'l natural.  
 E tuto questo per tegnir segreto  
 A la Sovrana Autorità el mortal  
 Orendo colpo, a dirghèla in concreto,  
 Che da un Secolo e mezzo e più in Pregai  
 Su sto afar gh'è stà dà con quel Decreto.  
 E questa xe l' origine dei guai  
 Tra quali involta la Libertà publica  
 La pol tremar de no sortir più mai,  
 Co la Sovranità de la Republica  
 No la sostegna, salvo quel Editto  
 Che sol forma le Legi e che le publica.  
 Questo xe quel arcano che gh'è dito,  
 Quel nodo, quel mistero sì l'è questo  
 Che mi per rischiarar resto in sto sito.  
 Siben che so che riuscirò molesto

Su sto tema a qualcun de sto Consesso  
 A tempo e logo pur ghe dirò el resto.  
 Sto tal regolamento che gh'è espresso  
 Su i Loghi Pii e sora le Man-morte,  
 Dai Savj machinà drento el Recesso  
 De quele a ogni altro impenetrabil porte,  
 Drento le quali un despotismo ingiusto  
 Tra indegne intollerabili ritorte  
 Tien incepà cussì sto Ceto Augusto,  
 In altri tempi tra più gravi cure  
 Ne le massime soe fermo e robusto;  
 Che le cose più serie e più madure,  
 O tra privati avari fini involte  
 Le cambia le sostanze è le figure,  
 O le marcisse in un casson sepolte  
 Con gran dano del Stato, e con sorpresa  
 De le Nazon più illuminade e colte;  
 Sta tal Regolazion, replico, presa  
 E dal Comun laudada, Dio volesse  
 Ch'anca la fusse a norma de l'estesa  
 Eseguida a puntin, nè succedesse  
 Sto scandalo in Republica sì novo  
 Che tutt'altro a l'oposto se facesse!  
 Che da qualunque banda che me trovo  
 Vedo una delusion chiara e patente.  
 In tuto quel ch'è fato mi ghe trovo,  
 Che 'l Consegio e 'l Senato apertamente  
 Xe stà inganà; e sora de sto ponto  
 Una prova le ga troppo evidente.  
 Cos'è sto novo Ofizio de un *Agionto*  
 Che da so posta ereto Dittator  
 Al somo del poter se vede zonto?  
 Che furente con smaco e disonor  
 Del Consegio e Senato, a so capricio  
 De le Legi el se fa conculcator?  
 E che abusando del concesso ofizio,  
 Confuso el manda el sacro col profan  
 Tuto indistintamente al precipizio?  
 Che con un despotismo da tiran,  
 E drento i Tempj e sora i Sacerdoti  
 A tuto impunemente el mete man?  
 Che adulterando l'intenzion dei voti,  
 Dei gran nostri proavi in sin la gloria  
 El cerca de oscurar nei pronipoti?  
 Ma se no perderò da la memoria  
 El filo de la tela che mi ordisso,  
 Le sentirà in progresso de sta istoria  
 Quel, che a solo pensarlo iacrilisso!

Perchè le conseguenze gravi tropo  
De sto geloso afar vedo e capisso,  
E qua vien tuto della causa el gropo.

## X.

Perchè Vostre Zelenze no sospeti  
Che qua mi voglia con un sforzo d' arte  
Ne la so mente intringarghene i ogeti,  
Ne la letura adesso de ste carte  
Le se provi (le prego) d' acordar  
Se ghe riussisse mai st' ultima Parte  
Con quello che i ga fato decretar (103),  
E de trovarghe l' interpretazion  
Che sto novo san Paulo ghe vol dar.  
Che no so come la Deputazion  
La s' abia da sta Parte destacà  
Ne l' intender la so' Regolazion,  
Nè come i siori Savj abia segnà  
Decreti oposti al senso lateral  
De la legislativa Podestà;  
Nè come ch' el Pregai; dov' è una tal  
Massima de costanza e robustezza,  
A se steso in sto afar el sia sta ugual.  
E qua ghe dirò, che gh' è tal sicurezza  
Del colpo che à da farghe la letura  
De sta Parte, che sin l' avedutezza  
No ariva a darghe una tentura  
Del contenuto perchè la ghe arivi  
Ne la so vera natural figura.  
E acì Vostre Zelenze no le ascrivi  
A spirito de partido el mio fervor  
D' usar colori tropo forti e vivi,  
Le ghe ne sentirà tuto el tenor  
E le rileverà la differenza  
Tra sto Interprete e tra 'l Legislator.  
Ghe darèmo però la preferenza  
A quel opera, parto d' una testa  
Piena d' erudizion e de gran scienza, (104)  
Dove sconta ghe xe soto la vesta  
D' un finto zelo e d' un publico ben,  
Un' insidia e una fraude manifesta;  
E mi de trato in trato drento in sen  
Co la più rigorosa anotomia  
Ghe descoverzirò tuto el velen.  
Dopo perchè con ordine ghe sia  
Provà da la Scritura quel che ò dito!  
Acì no sia convinto de busia,

Le sentirà quel che xe stà prescritto  
De voler tra le altre dal Supremo  
Mazor Consegio; e le averà l' Editto  
Del Senato, sul qual nu doveremo  
Farghe i so' gran riflessi e 'l so comento;  
Perchè cussì el mistero intenderemo  
De quel Decreto del mile siecento  
E cinque, confermà dal Serenissimo  
Mazor Consegio, apunto nel momento  
A la *Rason de Stato* fatalissimo.  
Che colta l' ocasion pel gran rilasso  
Nel qual vivemo in questo corotissimo  
Secolo, pervenudi semo al passo  
De trascurar el Publico e 'l Privato,  
Perchè pur tropo incorsi nel trapasso  
De far crolar le *Massime de Stato*  
Da quel perno nel qual tuta s' agira  
L' inocenza e l' onor del Prencipato. (105)  
Mi qua no voglio adesso tor de mira  
El sentimento oposto intieramente  
Che a sta Lege se ghe strassina e tira;  
Nè voglio dir come diametralmente  
Sia oposti i so' Decreti su sto ponto  
A l' intenzion de la publica Mente;  
No vò l' imputazion d' averghe sconto  
(Cossa che la saria poco plausibile)  
Un sol termine; opur d' averghe azonto.  
Sta Parte la xe tropo intelligibile  
Perchè a ele no gh' abia da riussir  
Sta tal Regolazion assae sensibile.  
A Parte leta, aspeto de smentir  
Chi sostien che la voglia dir cussì  
Come i ghe l' à ben fato comparir;  
In quel senso mi intendo, che in quel di  
Con vero detestabile artificio  
Tramà e promosso (no vò dir da chi)  
A' fato che 'l Senato a precipizio  
Formi su varj Capi senza esame,  
Mandadi tuti a mazzo, un sol giudizio.  
Come el ponto d' arazzo in seda e stame  
El ne presenta a l' ochio dal so dreto  
Omeni, fiori, fruti, erbe e bestiame,  
E cose altre diverse in vago aspeto,  
Che dal roverso le ne sol parer  
Tute deformità, tute difeto,  
Cussì in sta Lege le ghe pol veder,  
Che nel so' senso, co la sia spiegada,  
Gh' è equità, previdenza, e gh' è saver;

Ma quando che la vegna adulterada,  
Come in fati la vien da sti Decreti ...:  
Ma perche megio le se persuada  
Andèmo a la letura . Le se acquieti .

## XI.

A ela, sior Segretario mio Legista,  
La daga mo de man a sta Scritura  
Che vogio che ghe demo una revista,  
Per mi farò un gran sforzo de natura,  
(Del che peraltro no me comprometo)  
Se taserò durante la Scritura;  
Ma dopo terminada, Circospeto  
Sior Piero, sentirè come me cavo  
Col senso de ste Legi dal spaghetto.  
Donca, sior Segretario, via da bravo,  
Adesso vederèmo chi de nu  
Ga la busca nei ochi e chi ga 'l travo;  
Ghe n'ò vogia che mi no posso più ...  
La leza forte: *La conservazion* (106)  
*De le sostanze* ... sia, la diga sù.  
*Del corpo laico* ... in la propagazion  
*E in l'alimento de la prole*. Tutto  
El so pensier xe in la generazion!  
Sàle cossa ch'el vol là che sia el fruto  
De sto gran aparato ch'el ghe fa?  
Ch'el nervo de sto Stato sia destrutto.  
Vostre Zelenze ben lo vederà  
Sì, le lo vederà, ma sàle come?  
Come do e do fa quatro dimostrà.  
Con sta Scritura el se farà un gran nome,  
Le sentirà in sto calcolo sto Sior  
Che fuora el vegnirà con rome e tome;  
Ma le suplico adesso, per amor  
De Dio, sto primo punto de ascoltar  
Perchè l'è quello che me sta più a cuor.  
Le faccia grazia qua d' esaminar  
Come tute ste Legi mai se possa  
A modo de sta testa interpretar,  
Senza dar un gran urto e una gran scossa  
A quella soda interna polizia  
Che tuta afato xe diretta e mossa  
Da quella gran Massima, che sia,  
Base d' ogni Governo e Prencipato,  
Architetà con giusta simetria,  
El legame tra 'l Pubblico e 'l Privato,  
Dal qual per conseguenza ne deriva  
*Racc. Poes. Ven.*

El ben de tuto el Corpo, o sia del Stato.  
E a sta Massima mai no se ghe ariva  
Quando no se mantegna intata e ileasa  
La sacra Podestà Legislativa,  
Che in sè sola ga union, e ga compresa  
La forza de le Legi, ne le quali  
La trova el so sòstegno e la difesa.  
Da ste espression sì schiette e leterali  
Ghe pol nasser equivoci? ma questi  
Xe i termini alegorici o reali?  
Mi no ghe vegnirò via con pretesti,  
Nè ghe baraterò quel sentimento  
Che ste Legi rachiude nei so' testi.  
In ste Legi no gh'è no el pensamento  
De la propagazion, che no le tende  
Che a una Riforma o sia Regolamento.  
Viva Dio, che o el volgar le no lo intende,  
O co de Sopression e de Riforma  
Un dopio senso se ghe dà, se ofende  
Con tropo ardità temeraria forma  
L' oracolo de la Publica mente  
Che a sè stesso l'è sol regola e norma;  
E col dise de queste, el se ne mente.  
Ma, perchè el cerca de tirarle in rede,  
Sora sto ponto le ghe staga atente!  
Contè su .... e *regolate*, qua le vede  
Che per Massima ferma, ugal, costante  
Lu vol regolazion. Co 'l me concede  
Ste investiture, oltre le tante e tante  
Espression de sta Lege in sto proposito,  
No ghe par che la sia prova bastante?  
*Tenuti di pagar gravezze. Hoc posito*,  
Caro sior Piero, ve domando adesso:  
Come mai sosteneu sto gran sproposito,  
Che se possa otener un fin istesso  
Da do' diametralmente estremi oposti, (107)  
Come intendè parlar co sto Processò?  
Lu ne supone qua tuti disposti  
A creder le falope ch'el ne impianta  
Co sti maliziosi contraposti.  
S' acorzele a sto passo qual e quanta  
Arte ghe sia per inganarle? Àmigo,  
Sapiè che trovarè in nu altrettanta  
Acortezza per evitar l'intrigo  
Che vu ne andè tramando, e quanto prima  
Sentirè su sto punto quel che digo.  
Avanti ... Sto scrittor qua el se sublima (108)  
Con una erudizion, che a mio parer

Ga da far come el magio co la lima.  
 Eh! vu se' ancora grezo in sto mestier!  
 Ghe vol altro che dar una tirada  
 De Legi per far pompa de saver!  
 Tuta roba da esser spegazzada;  
 Vu ve fevi più onor se no vantevi  
 Tuta sta gran dotrina stirachiada.  
 Oh che gran bei riflessi! No védevi  
 Che co l' andar cussi tanto vagando  
 De Lege in Lege al fin vu ve imbrogevi?  
 Le senta come qua el va amplificando  
 Ste cose, che a dir poco una ventina  
 De volte el sarà andà drio replicando.  
 Nu ghe ne avemo in sin a domatina  
 De sta Legenda .... Co sta so' gran testa  
 Me par ch' el voga de trasto in sentina!  
 Stimo con che franchezza che l' inesta  
 Cabale sora cabale! No vedo l' ora  
 Ghe le sia sollevade .... Oh questa  
 L' è roba nova, tanto che mi credo  
 Che nessun in passà l' abia mai dita,  
 E col dise de queste mi ghe cedo.  
 Dove àlo mai trovà sta roba scritta,  
 Che per Dio, Montegnaco in le so' carte  
 No l' aveva cussi fritta e rifrita!  
 Ma lezemo do' sole sole Carte (109).

## XII.

Finalmente arivai semo a veder  
 El giro de più secoli, e a sentir (110)  
 Sta gran compilazion senza poder  
 Gnancora co la mente ben capir  
 Quel ch' el vogia provar co sta gran serie  
 De Legi, che su tute el vòl smentir.  
 Seben tanto versado in ste materie,  
 Lu de ste Legi a modo soo d' intender  
 El ghe ne fa un amasso, una congerie,  
 Quasi ch' el vogia, per dir cussi, pretender  
 D' imponerghe al Senato, con impegno  
 Che da le so' opinion l' abia a dipender;  
 Perchè tuto el so sforzo, el so disegno  
 Xe de cambiarghe el spirito e la forza,  
 Che mi de farghe confessar m' impegno;  
 Che per quanto ch' el tenta e ch' el se sforza  
 De combater la Massima in contrario,  
 Più co le so' rason el me rinforza.  
 Vòrle sentir adesso sto Aversario

Come vòl da so posta ch' el se intriga?  
 Le permetta che leza el Segretario ....  
 Le bada a ste do Legi, e le me diga (111)  
 Se per poder intender sta quistion  
 Ghe vogia metafisica o fadiga?  
 Ma de tuta sta gran compilazion,  
 O sia de data vechia o sia de nova,  
 Torò su solo la Legislazion.  
 Le altre no le m' importa: nè le giova  
 Co tuto quello che in ste do' xe scritto;  
 O el se regola in altre, o el se rinova.  
 Nè serve quel che prima xe sta dito ....  
 Le senta donca in carte otantatre  
 Quel che dise el Comun con quel so Edito  
 Sin dal mile tresento trenta tre,  
 (E le me daga torto, se le vol,  
 Che son za rassegnà): *Conciossiaché*  
*Quando el ben publico patisse* .... Pol  
 Parlar più schieto de cussi sta Parte  
 Co 'l senso leteral no se ghe tiol?  
 Le la esamina tuta a parte a parte,  
 E le staga a sentir quel che la dise  
 Con natural semplicità, senz' arte,  
 Qua l' efeto xe sol, che la interdise  
 De tegnir più in Rialto, e in la Città  
 Alcune possession, e con precise  
 Note la parla; e lu gh' à barata  
 El sentimento in modo che destrutto  
 El vol quel che la Lege à reformà.  
*Potrà lassar* .... Questa xe donca tuto  
 L' ogeto de sta Parte, se volèmo  
 Andarla esaminando ben per tuto!  
 Quando questo dialeto nu intendèmo  
 No gh' è da dubitar. *Del Testator*  
*O donator inter vivos* .... replicando  
*Del Testator*, pensele, o del dator  
*Inter vivos*? Per Dio, l' è parlar schieto,  
 Sora de che niente ghe xe da opor.  
 Ma za che d' acordarme l' è costreto  
 Ch' altro senso no gh' è che 'l leteral  
 Al qual s' abia da star e andar sogeto;  
 Con tuta la so' boria magistral,  
 Quando ch' el sia de corpo e mente san,  
 E l' abia la potenza natural,  
 Voria ch' el me disesse, se per man  
 D' altri sta Lege mai sia stà segnada  
 Che dal Comun, che xe 'l Corpo Sovran  
 De sto Governo, e se ghe sia stà dada



In alcune ocasion mai al Senato  
 Sta podestà, che sol xe riservada  
 A quel Corpo che forma el Prencipato,  
 Senza che se vegnisse a sconcertar  
 L' armonia de le Parti de sto Stato ?  
 Sior Piero, m'averè da perdonar  
 Se doverè sentirme troppo spesso  
 Sta medesima cosa a replicar.  
 No l'è mia debolezza, vel confesso,  
 Ma forse una sofistica premura  
 Che nel Giudice el ponto resti impresso ;  
 E molto più co l'è d' una natura  
 Che rachiudendo in sè el più sugoso  
 De tuta la materia chi el trascura  
 Perde el più sostanzial e 'l più nervoso.  
 Ma perchè su sto afar d' Opere Pie  
 Me preme che nessun resti dubbioso,  
 Le prego adesso, in Carte otantasic.

## XIII.

Le senta mo quel ch' el Mazor Consegio ;  
 Cioè la Legislativa Podestà,  
 L'ordena dopo dal Sovran so' segio,  
 Senza che niente mai sia derogà (112)  
 A quel che in altra soa Legislazion  
 Che adesso mi gh'ò leto, l'è emanà ?  
 Le prego a renovar la so' atenzion  
 Perchè me preme assae ch' ognun sia istruto  
 Su quel che xe de pochi a cognizion.  
 El Franceschi scomenza a far el muso brutto !  
*Nel mille cinquecento trenta sie,*  
*Via, ai trentaun de decembre,* per dir tuto.  
 Sul Consegio .... cioè : *Opere Pie* ....  
 Le prego, le rifleta a sti ani diese !  
 Qua cavè dai occhi le scarpe  
 Sior Piero, o disè pur che no avè intese  
 Espression cussì chiare e convenienti  
 Che no le amète dubj nè contese.  
 A sto *Dogado* .... Le ghe staga atenti,  
 Perchè su sto *Dogado* mi in apresso  
 Farghe ghe doverò bravi comentì,  
*Et cetera* .... E qua quel ch' in apresso  
 Vien de sta Parte ghe farò veder  
 Che l'è a tenor de quel che gh'ò promesso  
 De provarghe. Bisogna o ben saver  
 Intender el volgar de sto Latin,  
 O pur bisogna certo straveder

Per sostentar che qua un diverso fin  
 Abia avudo el Consegio co sta Parte,  
 Che, a mio parer, la stà drento al confin  
 De la prima, perchè in tute ste Carte  
 Ele ben sentirà, che preservadi  
 El vol i Loghi Pii, nè el se departe  
 Da sta Massima ; e che sol regoladi  
 El vol i abusi che anca sin d' alora  
 De quando in quando gera contempladi.  
 Qua ghe voràve tempo più d' un' ora  
 Per contentar sta Partè, ma ghe basti  
 Do' cose sole esaminar per ora ;  
 La prima xe ( e qua no gh'è contrasti )  
 Ch' el Comun sempre preservar l' intende  
 I Loghi Pii, e che per quanto vasti  
 Sia st' impegnì, che i vol, o che i pretende  
 Cambiar in distruzion una Riforma  
 No i sa quel che i se diga ; perchè tende  
 Sta Parte solo a stabilir la forma  
 Dei Loghi Pii, senza stacarse mai  
 Da quella prima regola o sia norma  
 Che prima ai Diese Savj, e po al Pregai  
 Xe stà racomandà, acìd su questa  
 I stia in farla eseguir sempre piantai.  
 Quello che in sto ponto anca me resta  
 De dir, el dirò dopo terminada  
 La letura co l' ordine che in testa  
 M'ò proposto, perchè no sia alterada  
 Sta materia cussì vasta e gelosa,  
 E tuta la ghe sia delucidada.  
 Adesso vegno a la seconda cosa  
 Che gh'ò acenà, se le se l' arecorda  
 Su sto *Dogado* ghe vòl far la glosa.  
 Co sto gran Consultor no se la scorda  
 Vorà saver cosa che l'è mai dito  
 Quando che l'è sentio tocar sta corda.  
 Qua le prego de unir el primo Editto  
 Del Comun col secondo che gh'ò leto  
 Per veder come in questi do' sta scritto.  
 Nel primo solamente el s'è ristreto  
 Ne la Cità e in Rialto, e in sto secondo  
 L'è voludo el *Dogado* anca interdeto.  
 Lè ghe bisega un poco sin al fondo  
 De sta Parte, e le veda, se ghe par  
 Sto ponto del *Dogado* s' el sia tondo.  
 Su sto ponto no gh'è da dubitar,  
 Per quanto intendo debolmente, quando  
 No se yogia nel torbido pescar.

Voràve anca saver chi à dà 'l comando  
 Che in Rialto e in Cità fosse proibii  
 Sti aquisti e sti possessi, e chi à dà 'l bando  
 Del Dogado in sta Parte ai Loghi Pii;  
 Cioè chi mai sia stà quello ch' à proibido  
 Che da nove possessi i sia investii?  
 A convincerme in questo mi lo sfido,  
 Perchè a fronte de la se' testa e scienza;  
 E vasta cognizion, mi me ne rido.  
 Co le intende sto ponto, de presenza  
 Le vederà chi sia el Legislator,  
 E chi dà su ste cose la sentenza:  
 Solo el Mazor Consegio xe l' Autor  
 De ste do' Legi, nel qual sol risiede  
 Tuto el so gran poter nel so' vigor.  
 Mi so che sto prencipio el me concede,  
 Perchè se 'l pretendesse qua d' esporse,  
 Diria, che no 'l intende o che 'l stravede;  
 Nè ch' el me staga a meter pur in forse  
 Sto ponto in un Governo Aristocratico,  
 Perchè segno saria, che no l' à corse  
 Le Legi del diverso sistematico  
 Ordene dei Governi, e co 'l confonde  
 Le parti con el tuto l' è un fanatico.  
 Ma senza che in questo me difonda,  
 A quel Decreto del mile seicento  
 E cinque, adesso un poco lu risponda;  
 E de perder sta causa son contento!

## XIV.

Mi no ghe lezo Fiabe nè Gazete,  
 Ghe lezo cose che al so' Giudicato  
 Mi ghe assogeto a carte otanta sete.  
 Questo xe el gran Decreto del Senato  
 Cel qual ne l' ano mile seicento  
 E cinque l' à proibido per tuto el Stato  
 Qualunque sorte de possedimento  
 Che o per aquisto entrasse in le Man-morte  
 Per Donazion, o sia per Testamento.  
 Mi no so come fora de ste Porte (113)  
 Possa esser nata sta Legislazion,  
 Quando che i gran contrasti co la Corte  
 De Roma, allora in gran fermentazion,  
 No avesse tratenudo i Citadini  
 Dal proromper in gran tumultuazion,  
 Con pericoli esterni ed intestini  
 Contro un' autorità che gera andada

Fuora dei naturali so' confini.  
 A sto Decreto demoghe un' ochiada,  
 E ghe prometo che le sentirà  
 Cosa che mai le se saria aspetada!  
 E sale quando le rimarcherà  
 El mal che ghe xe drento de sto Editto?  
 Quando ch' ele lo confronterà  
 Con quel che nei do' primi xe stà scritto  
 Dal Comun. E qua el gran Consultor  
 Ch' el vegna via con quello che l' à scritto!  
 Le senta mo adesso quale sia el tenor  
 De sto Decreto ... Via, sior Segretario,  
 Fin che lezè mi taso. Fève onor ...  
 Co gh' è da dir el vero mi zavario  
 Sorà de sto Decreto che no intendo,  
 Nè posso rilevar sto formulario.  
 Le toleri, le prego, se m' estendo  
 Un poco tropo sora de sta Carta  
 Per spiegarghe come la comprendo.  
 Vostre Zelenze no le se disparta  
 Da le do' prime Legi che gh' è leto  
 Co le voglia che questa ghe la scarta,  
 Mi ghe domando a sto bel umoreto  
 Come 'l voglia piantarme st' eresia  
 Con tuto el so gran sforzo d' inteletto:  
 Vorìa ch' el me disesse, dove stia  
 El gius, o sia el poter legislativo  
 In sto Governo d' Aristocrazia?  
 Sto gius l' è un gius afato privativo  
 Che nel Mazor Consegio sol risiede  
 Per massima e prencipio decisivo.  
 Quando Vostre Zelenze me concede  
 Sto ponto (al qual mai ghe sarà nessun  
 Che se ghe possa oponer) e le vede  
 Che ogni Lege che fuora del Comun  
 Vegnisse fata, mai sovranamente  
 No la poderia mai aver alcun  
 Valor, perchè el saria infalibilmente  
 Un snervarghe le forze a quel oracolo  
 Col qual se spiega la publica mente,  
 Quando, a dirghela schieta, l' è un miracolo  
 Che s' à provà de far i Savj, quando  
 A bon ora i s' à acorto de l' ostacolo  
 Del qual ghe n' è dà un ceno: ma, parlando  
 De sto Decreto, me sarà permesso  
 De andarlo un poco megio esaminando.  
 Come mai se pol dar che sia stà espresso  
 Sto Decreto, che adesso le à sentio

Con quella frase e con quel modo istesso  
 Che saria stada espressa, a parer mio,  
 Una Legislazion del Corpo intiero  
 De la Sovranità? Ma, santo Dio!  
 Vorle veder come che digo el vero?  
 Le me permeta che mi tioga suso  
 Sta Carta un'altra volta, e po mi spero  
 De persuaderle. Cosa xe sto abuso  
 Ch' el Gius Legislativo o sia Imperante  
 Sia da quel zorno in qua sempre confuso  
 Tra 'l Delegato e 'l stesso Delegante?  
 Le sofra, mi le prego, che su questo  
 Ghe diga quello che xe più importante;  
 Donca, Sior Segretario, via mo presto,  
 Lezeme un'altra volta sto Decreto,  
 Perchè mi vogio comentarne el resto  
 Per poder po' svelar tutto el segreto.

## XV.

*Essendo stato altre volte provisto  
 Intorno a le alienazion, de  
 Beni laici.* Dimando: co avè visto  
 La data in sto Decreto, chi mai xe  
 Quello che à decretà? El Legislator  
 De sta Lege chi xelo? Nol savè?  
 Un omo come vu, un Consultor,  
 Dei primi se pol dir ch' ancuo sia in grido,  
 No sa chi de sta Lege sia l'autor?  
 Vel dirò mi, ma dopo mi ve sfido  
 A smentirme, che no me fe paura  
 Con tuto che vu ubiè tanto partito.  
 In Pregai xe stà fata sta Scritura,  
 Nò nel Mazor Consegio; ma tiremo  
 De longo, seguitemo la letura.  
 Se le permète, vò che se fermemo  
 Su ste parole: *Per tuto el Stato  
 Nostro.* Quando che ben esaminemo  
 Ste tre parole in boca del Senato,  
 Mi no so dir, se ben le ghe convegna  
 In via de Subalterno e Delegato;  
 Vostre Zelenze za no le se sdegna  
 Se libero ghe parlo, e se ghe digo  
 Quello che l' Aristocrazia m'insegna;  
 Perchè per andar fora de sto intrigo,  
 Che sto gran Consultor ne va tramando,  
 Le senta come presto mi me sbrigo:  
 Quando el Mazor Consegio à dà 'l comando

Che in Rialto e in Città fusse proibii  
 I novi acquisti che de quando in quando  
 Podeva andar facendo i Loghi Pii,  
 E co la Podestà Legislativa  
 Sti acquisti nel Dogado i s' à bandii,  
 Come se dà, che sta facoltativa  
 Nel Delegato al par del Delegante  
 La se estenda, nè la se circoscriva  
 A tenor de le savie e sacrosante  
 Vostre Costituzion, che limitadi  
 Vol i confini in le diverse e tante  
 Materie demandade anca al Pregadi?  
 Ma de sto abuso ghe dirò in progresso  
 Come el sia andà crescendo a gradi a gradi.  
*L'anderà Parte ....* Caro vechio, adesso  
 Fermève per un poco, perchè qua,  
 A dirla, gh'ò da far qualche riflesso.  
 Manco mal che in sta Parte se ghe fa  
 Sta gran basa al Paron de la Republica,  
 A la legislativa Podestà,  
 A l'oracol de la mente publica,  
 Da la qual solo ne pol derivar  
 Tute le Legi che se forma e publica;  
 Qua se dise, che *senza derogar*  
*A le Parti in sta materia prese ....*  
 Cosa disela mo? cosa ghe par  
 De ste espression? Come se dà che intese  
 I Avogadori i le abia e no intromesse  
 Per dover del so ofizio apena estese?  
 Dopo de tute ste bele promesse  
 Prego Vostre Zelenze star atente  
 A ste parole qua de soto espresse,  
 Come se quel de sora fusse niente:  
*Che senza derogar ....*, Sta bagatela!  
*A le altre Parti prese a la presente*  
*Non repugnanti*, et cetera. Ela bela?  
 E ch' el Mazor Consegio strenza i denti  
 Se anche le Legi soe se ghe scancela!  
 E che 'l sospenda i so' risentimenti  
 Se la so' autorità xe vulnerada  
 In tempi assae dai primi differenti!  
 Ma sta Lege, che vedo qua citada  
 Del mile cinquecento trenta sie  
 Xe dal Mazor Consegio publicada  
 A solo ogeto che l' Opere Pie  
 No le arivasse a un tropo ingrandimento,  
 E anca al Dogado la ga tolto el pie.  
 Vorìa saver per mio amaestramento

Come el Franceschi possa mai de mai  
 Meterghe a fronte sto comandamento,  
 Cioè sto gran Decreto del Pregai,  
 Senza che ne risenta un grave smaco  
 Dal qual ne nasseria pur mille guai  
 Al gius Sovran ; ma per serarghe el sacco  
 Senza ch' el filo a l' ordimento rompa  
 Le stia a sentir dove che mi l' ataco ;  
 E lasso, se 'l ga cuor, ch' el m' interrompa.

## XVI.

Qua bisogna che mi gh' apra una scena  
 La più lugubre, lagrimosa e trista  
 Che mente possa imaginar apena !  
 Che in Republica mai l' ugal fu vista  
 Nel vastissimo giro de le età  
 Onde Dio vol che ancora la sussista ;  
 Che mai nè pur xe stada vista là  
 Dove sin da l' abisso l' eresia  
 Contro la Chiesa la s' à scatenà.  
 Nè d' oratoria l' è, nè de poesia  
 Un artificio questo, o un ritrovato  
 Di una faconda calda fantasia,  
 Ma l' è più tosto a la *Razon de Stato*  
 Un colpo che la manda in sovversion  
 Con ecidio total del Principato.  
 Chi me darà la voce e l' espression  
 Adatade a sto tragico sogeto  
 Per poderghe far ben la descrizion ?  
 Come unirò la libertà al rispetto,  
 I riguardi al carattere sincero,  
 La politica al dir libero e schietto ?  
 Ma, viva Dio, che vogio dirghe el vero  
 E dirghelo ghel vogio schietto e neto  
 Perchè de niente temo e niente spero,  
 Col progetto del gran Regolamento  
 De doverse eseguir su le Man-morte,  
 Dopo un longo e maturo pensamento  
 L' à credudo poder far cambiar sorte  
 A le publiche cose e a le private  
 Riaprendoghe al bon ordine le porte,  
 Perche *Seniores, et in dignitate*  
*Costituti*, e tra questi i più sapienti.  
 Direti dal poder del so Primate (114)  
 I à fato i so disegni su i Conventi,  
 Sora le Chiese e sora i sacri aredi  
 Al servizio de Dio solo inservienti.  
 No le creda che esageri e che cecidi,

Ghe digo che la prima cosa è stada  
 Darghe a Santi e a Madone i so' congedi.  
 Le se prova ele de dar un' occhiada  
 In prima attorno questa Dominante  
 Da sto progetto meza sfigurada.  
 Le zira per un poco tute quante  
 Le Contrade, e le cerca ogni Sestier,  
 I Canali, le Strade, e tante e tante  
 Strade dove sia Chiesa e Monastier,  
 E le diga, se alcuna ghe ne resta  
 Imune, salva, ilesa da veder.  
 Le scora col pensier cussì a la presta,  
 La Tera-ferma ; le scora più Contadi  
 D' istruzion privi. Adesso le se aresta.  
 Le veda un poco come sia tratadi  
 I Frati ne la mensa, nel vestiario,  
 E come in ogi i sia consideradi !  
 Le diga, se in sto dì ghe sia divario  
 Tra una persona sacra e un servitor,  
 Che forse assae più l' à de salario ;  
 E po' (quelo che più me fa stupor)  
 L' è el veder che se fa tanto strapazzo  
 Ugualmente del doto e del signor,  
 E che i se meta tuti quanti a mazzo  
 Sino i patrizj stessì co i plebei,  
 Che no gà, per cussì dir, gnanca el pagiazzo ;  
 E come i fusse aponto tanti rei  
 I se trata con tale e tanta asprezza  
 Co scandolo d' Eretici e d' Ebrei.  
 Epur la magior parte gera avezza,  
 Prima de farse Frati, in le so' case  
 A viver con decenza e morbidezza !  
 Ma quel che sora tuto me despiase,  
 L' è veder che sia stada messa man  
 In quello ch' è fondamento e base  
 D' ogni Governo, o sia d' ogni Republica ;  
 Democratico overo Aristocratico,  
 Anarchico, o sia Despota o Sovran !  
 Mi ghe confesso el vero ; resto estatico  
 Che per uno che assae de lu presume,  
 Per un che a tuti i segni xe un fanatico,  
 Lassèmo che s' estingua in nu quel lume  
 Che ne serve de scorta e de veicolo  
 A la *Razon de Stato* e al bon costume ;  
 E che sia esposto a un prossimo pericolo  
 El publico interesse, e 'l nostro nome  
 Da l' estere Nazion messo in ridicolo ;  
 E ghe sarà chi me dimanda el come ?

## XVII.

Prima che a sta dimanda ghe risponda  
 Le prego accompagnarne sin al Lido,  
 (Xa che me xe propizio el vento e l'onda),  
 Dove me par che su la spiaggia un grido  
 Tuto a l' intorno assordi e Cielo e Mar  
 De zente priva de soccorso e nido.  
 Questa, le se la pol imaginar,  
 Questa xe quella tal popolazione  
 Che ogni dì se soleva alimentar  
 Da una nobile, insigne Religion,  
 Che a setecento e più de quel Distreto, (115)  
 Mossi da religiosa compassion,  
 La ghe somministrava, oltre el paneto,  
 La carne, el riso, el sal, el vin, le legna,  
 L'ogio, i medicinali, el soldo, el leto,  
 E a compimento d'opera sì degna  
 A tanti e tanti l' abito e 'l mantelo;  
 Ma senza che qua passi la rassega  
 Con tropa digression a tuto quello  
 Che i aveva per i so' sostentamenti,  
 I gaveva l'ajuto (e qua m'apelo)  
 A ognuno ch'abia veri sentimenti  
 De Religion) sta zente pur gaveva  
 La Cristiana istruzion e i Sacramenti,  
 Che ne la vera strada li meteva  
 D'esser fedeli a Dio e al Prencipato:  
 E tuto questo ancora succedeva  
 In ogni altra Provincia de lo Stato,  
 Come in progresso ghe farò veder,  
 Con interesse publico e privato.  
 San Nicolò del Lido monastier  
 Cussì famoso un tempo e cussì antigo,  
 Convertido le 'l veda in un Quartier  
 De Soldai (co mio rossor el digo);  
 Epur l'è quel dove la Maestà Publica  
 Dopo l'union tra 'l Papa e Federigo  
 Co l'interposizion de la Republica  
 A rinovar su l' aqua el gius real  
 Le va el dì de la Sensa in forma publica,  
 Con tal pompa e aparato trionfal,  
 Che mai nè i Greci nè i Romani Fasti  
 I à visto in tute le so' età l'ugual.  
 Al Senato ripeterge me basti,  
 Che Domenego Dose Contarini  
 Quei sacri Chiostri, or profanadi e guasti,

Circa al mile e sessanta, o in quei confini  
 (Epoca che credeva rispetada!)  
 L' à fato eriger ai Benedetini.  
 Ora seguendo l' intrapresa strada  
 Anca per poco, a San Giorgio Magior  
 A la sfugita demoghe un'ochiada.  
 Questo xe restà salvo in tuto, fuor  
 Che i Monaci xe stai messi a dozena  
 A un tanto a testa, come fa el Trator;  
 E l' Abate, che se vedeva apena  
 Ne le funzion e ne i pontificali,  
 Col cambiamento de sta nova scena  
 L' à da tegnir quaderni e mensuali  
 Per render conto a la Cassa Civanzi  
 De le rendite tute e capitali;  
 Perchè tuti i residui e tuti i avanzi  
 I vaga, dove Dio lo sa ...  
 E de sto passo progredindo inanzi  
 L' istesso pur i à fato, e i farà  
 De tuti i Monisteri Cassinensi  
 Che ancora xe restadi via de qua.  
 Vostre Zelenze qua le me dispensi  
 Che con ordine diga quel che resta,  
 Perchè per quanto che ghe studj e pensi  
 Sta materia me xe cussì molesta  
 Che sistemar no posso co la mente  
 Le multiplici idee che ne la testa  
 Racolte aveva preventivamente;  
 Che tanti xe i ogeti dolorosi e tristi!  
 Per farghene el svilupo chiaramente  
 Le me seguiti ancora e le me assisti;  
 E se succederà che ai moti, al volto  
 Veda che le se scuota o le se atristi,  
 Prova sarà che mi nel segno ò colto.

*L' Autore di più non scrisse.*

# POESIE

DELL' ABATE

## ANGELO MARIA BARBARO.

---

### RITRATTO DELL'AUTORE.

#### SONETTO.

Sordo e mez' orbo, con sie denti in boca,  
Con un muso da strissimo patho,  
Da l'omo trascurà, scordà da Dio,  
Senza una Dona che me svegia o toca;

In una casa, anzi in una bicoca,  
Fornia da leterato e da sbasio,  
Co una massera da butar in Rio  
Che 'l salario a magnar ciga e taroca,

Co una Messa da prete Calabrese,  
Co un Patrimonio mezo rovinà,  
Co una pension de tre ducati al mese,

Con un pare che pochi me ne dà,  
Con un Papa in furor co sto paese,  
Questo è il mio stato : oh sielo b...

#### NOVELLA.

Un Povereto co la barba longa  
Una volta xe andà  
A pregar un Barbier per carità  
Ch'el ghe fazza la barba.  
El Barbier con dispetto  
Ga dito al Povereto :

*Sentève su quel scagno  
Che farò sto vadagno.  
Po el ga dito al Garzon :  
Tira fora quel strazzo de fazziol,  
Dame un fèro ordenario,  
Dante el cain, quello che xe pontà,  
E' dame quel saon che xe avanzà.  
Sto gran anemalazzo  
L' à presto insaonà,  
L' à prencipià a radarlo,  
Overo a scortegarlo.  
In quel ponto se sente su la strada  
Un Can a gola averta  
Che cigava cain.  
Un galantomo che gera in botega .  
Coss' è, l' à dito, cossa ga quel Can ?  
Alora el Povereto  
El dise : Ghe scometo  
Che a quel Can un Barbier cortese e pia  
Ghe fa la barba per amor de Dio.*

#### AD UNA SIGNORA

NEL DÌ DI MEZZA QUABESIMA.

Signora, andè in Campagna  
Scondève in Teraferma,  
Oh Dio! no stè a Venezia,  
Tropo, tropo se' in vista,  
O almanco retirève su una Lista.

El nunzio ve riceve,  
 El Nunzio xe zentil e assae bonomo,  
 El ve tien, el ve guarda  
 Co 'l sa la vostra colpa  
 E 'l pericolo somo.  
 Se in Venezia vu stè,  
 No no, no la scampè,  
 Ve lo aviso; e predigo,  
 (No disè che sia un strambo o pur un sbrega)  
 El popolo in tal di ve ferma e siega.

## AI CORRETTORI DELLA REPUBBLICA.

Se tornasse a sto mondo  
 E Licurgo e Solon,  
 E tuti i sete Savj de la Grecia  
 I resteria a la fè tanti cocali  
 Volendo riformar ancuo Venezia!  
 L'è andata sta Città;  
 Sta Republica alfin  
 Più de tute à durà.  
 Co l'abito xe vecchio  
 Nol se rinova più,  
 D'una velada se fa camisiola,  
 De questa le braghesse,  
 (E in braghesse, perdla, semo ridotti!)  
 E quando le xe rote  
 Se mete dei taconi,  
 Se dà bei dei pontini  
 Per no mostrar el cul e i balotini.  
 De più no se pol far,  
 Dio solo xe capace de crear.  
 Co i vizj à sotomesso le virtù  
 No gh'è rimedio più.  
 La gola, el lusso, la lussuria e l'ozio  
 Trionfa in sta Venezia,  
 E a coragerla ben l'è una facezia.  
 Peraltro se volè, Legislatori  
 Zelanti per la Patria,  
 Se volè, mi ve dago  
 Un ricordo sicuro ma violento  
 Da farve sgargar, cavar i occhi.  
 Ecolo in bota qua:  
 Chiapè, tegnì, sarè la Dona in casa,  
 La Dona, sì, la Dona,  
 La Dona à rebaltà  
 Le legi e le virtù de sta Città.

*Racc. Poes. Ven.*

## IL CONCIERE DI TESTA.

El concier de la Dona  
 Ogni momento el cambia;  
 Parigi ne dà el ton  
 Per topè, per bandete e per cignon.  
 Quel concier feminil  
 Xe vario; ma el viril,  
 Quello del Cavalier e del Mario  
 No va avanti nè indrio;  
 L'è costante, l'è quello,  
 L'è quello che savè,  
 L'è quello alfin, l'è quello de Moisé.

AL PREVOSTO DI SORISOLE

## DON ANTONIO RUBBI

VENUTO IN CREDITO DI FAR MIRACOLI.

O Don Antonio Rubi, Taumaturgo  
 De Bergamo, agiutè  
 Un Sordo che qua gh'è;  
 Un Sordo cussi sordo, e tanto sordo  
 Ch'ogni fedel creatura  
 Che con lu parla rischia una rotura.

Da Sorisol voltève in ver Venezia,  
 Benedi, ma de cuor,  
 Sto Sordo secator,  
 Fe'ch'el buta a la fin via la trombata,  
 Liberè sta Città  
 Da tanta maledeta sordità.

Canzon, overo *Oremus*,  
 Va là, va dal Prevosto,  
 Va ti, perchè sto Sordo  
 No ga bezzi da far tanta gran strada;  
 E quando ti è arivada,  
 Con un cuor pien de speranza e ingordo  
 Racomandaghe ben, ben ben, sto Sordo.

PER I MUSSATI

## ELETTI NOBILI VENEZIANI

SONETTO.

Oh siestu maledeti sti Mussati !  
 Butève là sul leto un pochettin,  
 Apena chiapè sono, eco el violin,  
 E po' la becadina su i cossati.

Sul muso, su la schena, senza pati  
 I ve salta, e i ve torna con morbin;  
 Ve dè dei sculazzoni da sassin;  
 Se falè el colpo, i torna co sti ati.

Coverève pur quanto che volè,  
 Che se no i pol far altro i beca i pani  
 E i ve ruza aciò el sono vu perdè ;

Ma da qua avanti, stimo, che a sti cani  
 Bisognerà che le ferie basè ;  
 Zentilomini i è fati Veneziani !

NOVELLA.

Dal so Piovan xe andata un dì una Puta  
 Viciua a farse sposa  
 Aciò el ghe diga la Messa de Maria.  
 El Piovan gh'è risposto : *A pian, sta cosa ;*  
*Qua bisogna parlarme schietamente*  
*Come se fussi al Confessor presente,*  
*Se vu se' Puta*  
*La Madonna vè agiuta,*  
*Ma se Puta no se'*  
*Drento l' ano crepè ;*  
*Perchè po no suceda sta Tragedia*  
*De la gran Madalena*  
*Co la Messa in ancuo se ghe remedia ;*  
*Parlè senza raziri . . .*  
 La Puta qua ga trato dei sospiri ;  
 E po l' à dito : *Sior Piovan la diga . . .*  
*La diga pur la Messa . . .*  
*La Messa ... de Maria. Oh Dio, che pena !*  
*Ma con un poco de la Madalena.*

PER L' ESTREMA MALATTIA.

## DEL PROCURATOR CALBO

Un Grego, vero citadin d' Atene,  
 Benemerito assae de la so' Patria,  
 In fin de la so' età  
 Da savio el s' à tirà  
 A finir la so' vita  
 In t' un Casin de l' Atica campagna,  
 Aspetando da forte al fin la morte.  
 Dopo diversi ani  
 D' una vita beata, un mal de peto  
 L' à ridoto moriente. Intorno al leto  
 Un dì l' aveva i Grandi de la Grecia,  
 ( Come che qua in Venezia  
 Ga la Camera piena  
 Dei talenti bronzini aristocratici  
 Un nostro Senator  
 Quando el sbotega, el mor,  
 Ma un Senator de quelli,  
 De quelli che un dì à fato  
 Gran barufe in Senato,  
 E che à parlà set' ore in un Pregai,  
 Guadagnandose in Patria un' opinion  
 De Demostene, Aristide, o Focion )  
 Ora sto Grego invito  
 L' à dito : *Zito zito,*  
*Coleghi, amici cari,*  
*Moro, ma prima ve lasso un Ricordo :*  
*Moro contento e del mio fin son pago*  
*Se scolpir lo farè ne l' Areopago.*  
*El Ricordo xe questo :*  
 « Quando che una Repubblica  
 » Sta ben quanto che basta  
 » No ghe tetè in tel cul che la se guasta. »

## SOPRA IL FAMOSO BALLERINO PICH

ALL' AMICO LIARCA.

Quando Roma pensava  
 A un Mimo, a un Saltador, a un Istrion  
 Roma allora l' andava a tombolon,  
 E l' Impero in tochi, in pezzi, in stele.  
 Venezia ancuo a le Stele



Fanatica sublima el caro Pich.  
Caro Liarca mio, nu femo crich !

## STORIA

TRATTA DA PLUTARCO.

Sta matina mi ò leto  
Sul celebre Plutarco  
Una cosa che vedo  
Imitada in gran parte  
Sul stato de S. Marco.  
Lu dise, che Caton,  
Omo severo, Senator giustissimo,  
A' imprestà la mugier publicamente  
Al Senator Ortensio, el qual smaniava  
De aver fioli da un fonte  
Degno de la Republica Romana,  
De aver dei Fabii, dei Scipioni, e Regoli,  
E no, come tra nu, certi petegoli.  
Da qualche tempo in qua  
In parte s' à introdoto  
Sto esempio in stà Cità.  
Se fa de le imprestanze,  
O piuttosto dei stochi e de le usure.  
Perchè po' i fioli resta, o tristi, o boni  
Ai Siori Ortensi no, bensì ai Catoni.

## ALL'AMICO LIARCA.

Nel vastissimo Impero de la China,  
Dove Legislator xe stà Confucio,  
Questo à fato una Lege  
Che in gran parte corege  
Quel maledeto vizio che à la Dona  
De presto o tardi far  
I corni ne l' amar,  
La vol, che quando una  
Sia rea d' infedeltà  
Subito a questa el naso sia taglià.  
Se una tal Lege ancora  
Fusse agionta al Statuto Venezian,  
Disème, Liarca mio, fra tante e tante  
Che sente o finge, ma che sempre ostenta  
Le calde de l' amor gran smanie e pizze,  
Quante e quante saria le nostre schizze ?

## IL MAL COSTUME IN VENEZIA

SONETTO.

Sordo come che son ziro e spassiso  
Osservando el moral de sta Venezia.  
Più ch 'l spirito vedo assae l' inezia ;  
Più che saviezza vedo chiasso e riso ;

Vedo l' omo d' onor squalido e sbriso ;  
Vedo el doto giazà più de la Svezia ;  
Vedo patria e virtù tuto in facezia ;  
Vedo Caton, ma lo vedo deriso ;

Vedo qualche Lugrezia che consola ;  
Vedo Livia e Pompea sempre afolada :  
E vedo quella col bel Silvio sola ;

Vedo arti e comercio zo de strada ;  
Vedo lusso, superbia, ozio e gola ....  
Ah ! Venezia d' un dì dov' estu andada ?

## SULLE REGOLAZIONI DELLE FRATERIE

SONETTO.

Co i fioli de Giacobe, el seme eleto,  
In la Tera i xe entrai de promission,  
Alora Giosuè la soa porzion  
A ognun el ga assegnà su quel distreto.

El solo Levi, per Divin preceto,  
No l' è sta amesso in quella division,  
Perchè lu ( scomenzando insin da Aron )  
Al sacro Ministero el gera eleto.

Quanto a Levi, el Signor à comandà,  
Che 'l Sacerdozio viva de l' Altar,  
Za che a servir l' Altar l' è stà chiamà.

Levi mo ancuro più no volendo star  
A quella lege che 'l Signor ga dà.  
I so fradeli el gera drio a spogiar ;  
E se Dio, che sa far,  
Qua no mandava quatro Giosuè  
In tuto lu dirave : *Ora pro me.*

PER LA PRIMA COMPARSA

## AL BROGLIO NELL' ANNO 1779

DI DUE PATRIZI GIAMMARIA BALBI MUSSA

E GIULIO ANTONIO MUSSATI.

Oh co' bela, oh co' bela  
 Combinazion propizia !  
 Un Mussato e una Mussa  
 In t' un istesso dì  
 'A messo tuti do' veste patrizia !  
 Chi ride e se sganazza,  
 Chi fa bordelo in piazza,  
 Altri vol che malsana  
 Sta Dama Serenissima vechieta  
 Tioga el late per questo de Musseta ;  
 Ma mi, che ò bon giudizio,  
 Vedo 'l caso propizio  
 De un' epoca gloriosa,  
 Come quel de la Vaca  
 Ch' è stà cambià in Europa belicosa ;  
 E come, dando 'l late  
 A Romolo ed a Remo  
 Una Lova selvadega  
 Xe nassua la Republica Romana.  
 Cussi un Musso e una Mussa  
 Sempre più soderà  
 Sta Republica nostra Veneziana.

## AI CAVALIERI SERVENTI

APOLOGO.

Plinio el Vechio raconta  
 Che in Etiopia se trova  
 Un gran bel Oselon,  
 De pene tuto rosso  
 E per questo el se chiama *Porfirion*  
 El dise, che st' Oselo  
 Abia la proprietà  
 De viver quanto dura  
 De le Done la rara fedeltà.  
 Quando Sposo in Etiopia uno se fa  
 El compra un *Porfirion*,  
 E 'l lo sera in t' un chebon,  
 El ghe dà da magnar a crepa panza,  
 E fin a tanto che vivo el lo vede  
 Da la Mugier cucà lu nol se crede ;

Ma se morto el lo trova,  
 El scana la Mugier, e a causa de l' Oselo  
 Perfida e la dichiara e da bordelo.

Plinio dise de più :

Ch' in Etiopia anca el Cavalier Servente  
 Se compra un *Porfirion*,  
 E sin che vivo el xe, lu serve e ama  
 La bela Etiope soa graziosa dama ;  
 Ma se morto el lo vede,  
 L' impianta la Signora  
 E l' inchioda el *Porfirion*  
 De la Dama infedel soto el balcon.  
 Oh Damine !  
 Oh Damone !  
 Oh quanti *Porfirioni*  
 Che gaveressi ancuo soto i balconi !

## IN MORTE DEL PROCURATOR TRON.

Uno dei gran portenti  
 Che se pol dir del Tron  
 Xe 'l dir, che l' xe stà *Savio*  
 E *Savio* senza denti.  
 Donca con gran razon  
 Pianzèlo, o Citadini, e doti e gnocchi,  
 Che *Savj*, senza denti ghe n' è pochi.

## AL RIDOTTO DI VENEZIA

SONETTO.

Ridoto ! Tempio de Fortuna e Amor,  
 Dove l' Omo che vanta la razon  
 Va a tributar ( opresso de ilusion )  
 Oro, salute, vita, quiete, onor.  
 Dal tempo e da l' uman continuo eror.  
 Da la social viziosa convulsion  
 Ti geri per crolar, Tempio epulon,  
 Ma 'l vizio xe che te sostenta ognor.  
 Ti è tornà più superbo ; Amor e Sorte  
 Ti à visto a l' are ; su quel' are ognora  
 Quante vittime, oh Dio, spiranti e morte !  
 Ma 'l Patriotismo che respira ancora,  
 Ma la Virtù, del Vizio assae più forte,  
 Te manda alfin Domenega in malora.  
 Venezia applaude a st' ora :  
 Oh assae più de Solon, Licurgo, e Romolo  
 Do Alvise, un Piero, un Lodovico, un  
 ( Momolo ! (116)

## LAMENTO DELLE VENEZIANE

CONTRO LA PARTE DE' CORRETTORI ALLE POMPE.

Ste Done xe in orgasmo, in confusion,  
 Le ga un piplo grandissimo  
 D' una reformation  
 Da la testa al fianchetto,  
 Dai pie sin al cignon.  
 Una stramba m' à dito :  
 « Una Parte de pompe ?  
 » Anca sta Parte qua ne seca e rompe ?  
 » La barbarie d' un dì torna in Città ;  
 » La go co' sti vechiazzi,  
 » Coi Catoni severi,  
 » Coi Fabi balonèri  
 » Che ne voria corète,  
 » Desmesse, convertie, anacorete.  
 » I ne voria ridur e far tornar  
 » In rede, co l' ovata, e forse in zocoli ;  
 » I voria torne i cocoli,  
 » Sti Cavalieri bei tanto serventi  
 » Che per nu tira l' anema coi denti,  
 » Po' i ne voria bruser i Santi Padri  
 » Elvezio, Montesquieu, Voltaire, Rousseau,  
 » L' *Academie des Dames*,  
 » E Ninon de Lenclos ;  
 » I ne voria per fin  
 » Fiscar anca el Casin,  
 » Quel sito, oh Dio, ridoto al Ròcombol  
 » Dove se disè e fa quel che se pol !  
 » I finirà po' col volerne in casa,  
 » Anzi anzi in cusina  
 » Co la lume da ogio  
 » A cuser canevasse,  
 » A taconar le veste e i gabanoni  
 » A sti novi Licurghi, a sti Soloni ;  
 » E alora el sior Mario,  
 » Tornà alfin tiranèto,  
 » Obligarne vorà fin al lucheto.  
 » Oh Omo prepotente,  
 » Estu nato da nu  
 » Per nostra schiavitù ?  
 » Ah la Dona meschina  
 » La se fa el so Neron come Agripina !  
 Cussi la m' à parlà sta temeraria,  
 Ma quel ch' à da morir prima savaria.

## RISPOSTA

## AL LAMENTO DELLE VENEZIANE.

Done, no ve dè pena:  
 No ve metè in spavento  
 Se fusse anca per vu zonto el momento  
 De meterve in caena,  
 O, a megio dir, de meter la cavezza  
 A tanta tracotanza e sfrenatezza.  
 No ve ramarichè,  
 El mal no sarà grande  
 Come che vel pensè.  
 Se sa che dei Catoni,  
 Dei Fabi, dei Licurghi e dei Soloni  
 Xe passà el tempo, e che 'l mondo moderno  
 Se ride de quei mati e se fa scherno.  
 Ancuo se vol che ben vestii se vaga,  
 Sempre serae no se ve vol in casa,  
 Molto manco in cusina  
 A cuser canevasse,  
 A taconar vestidi e gabanoni ;  
 Un pensar saria questo da minchioni.  
 El mondo tuto ve vorà carète,  
 No convertie, desmesse e anacorete,  
 Come senza razon andè esclamando ;  
 No abiè timor de questo,  
 A idee sì strambe dè un perpetuo bando,  
 Quel che da nu se vol xe ben tut' altro ?  
 Metève in atenzion, e ve protesto  
 De dirve el con e 'l ron tuto desteso  
 Acìo no possiè dir che no avè inteso.  
 Da vu altre se brama, che dai fianchi  
 Ve sia stacà i Serventi,  
 Perchè semo po' stanchi  
 De veder la Città piena a martelo  
 De marii cornisai, b.... contenti ;  
 Se vol troncà el bordelo  
 Dei vostri *Rendez-Vous*,  
 Nè che i se fassa più.  
 Xe savio el mondo e nol vol più sofrir  
 Che una galanteria sia el vituperio,  
 E un vezzo de la moda l'adulterio,  
 Cossa ve par, carine ?  
 Cosa me saveu dir ?  
 Qua lucheti no gh'è, no gh'è tirani,  
 Nè se vol che stè in casa retirae

E sempre condanae  
 A laorar e a mastegar corone, .  
 Basta che più no fe le b.....e.  
 Che i patrimonj no butè in sconquasso  
 Coi bertoni, col ziogo e in darve spasso,  
 Che de più no iritè la Tera e 'l Cielo  
 Perchè abiamo a provar qualche flagelo.

## MADRIGALE

PER LA VENUTA IN VENEZIA

## DI SUA MAESTA' CESAREA

E DELLE AA. II. GLI ARCIDUCHI FRATELLI.

O Venezia, garetolo d'Italia,  
 A razon ti è superba  
 Perchè in sen ti ti ga  
 Tre Altezze, ma reali,  
 E un Imperial Maestà!  
 Xe vero che sti quatro  
 Del Loronese Austriaco illustre sangue  
 I xe incogniti, e sconti  
 Col titolo de Conti,  
 Ma sta Contea xe tanto trasparente  
 Che ognun vede 'l real, no l' aparente.  
 I viasa come 'l Sol  
 Da drio a una nuvoleta,  
 Ma come quello sempre  
 Se rileva al splendor,  
 Cussi questi se mostra al mondo e a nu  
 Co la gran dignità, co le virtù.  
 Li vedo a ochio neto,  
 E i capisso assae più co l' inteletto;  
 E se beato son  
 A vederli soltanto,  
 Se podesse sentirli ..... oh Dio che incanto!  
 Allora, amico mio, te lo protesto  
 Beatissimo saria più de *Pio Sesto*.

## LA MATRONA D' EFESO

NOVELLA

GIÀ SCRITTA DA PETRONIO ARBITRO.

*Dame, e vu che le Dame stimè tanto.  
 Per niente no badè a sta istorièla.  
 Petronio un di l' à scritta (oh Dio che incanto!)  
 Mi l'ò tradota, ma lontan da quella  
 L'ò fata in Venezian col stil de Santo  
 Pagozzi; d' elu ridè, o pur strazzèla;  
 Ma dirò, e vel protesto, che se dà  
 Pur tropo in certe Dame sta onestà.*

Una ghe gera a un tempo in Efeso  
 Tanto nota per fama d' onestà,  
 Che tute quante le mugier, le vedoe  
 De la Cità e dei lioghi vicini  
 A procession le andava a visitar  
 Sta Dama onesta, sto specchio, sto portento,  
 Sto onor, sta, gloria, sta virtù del sesso.  
 A sta Dama de tanta castità  
 Ghe xe morto el Mario. Oh Dio che afano!  
 Un Mario, gran Mario de zorno e note,  
 Un mario Senator, un *Pater Patriae*.  
 Sta Dama, apena vedoa, desperada,  
 No la s' à contentà de seguitar  
 El funeral come s' usava in Grecia.  
 Con i cavei in t' i occhi e sgrendenada  
 E col pestarse l' un e l' altro peto,  
 Le coste, i fianchi, i zenochi, i pie,  
 Ela à volesto ancora ( oh gran amor! )  
 Serarse in sepoltura col Mario;  
 E là tut' el dì e la note destirada  
 Sul morto la pianzeva el caro vivo.  
 I so' parenti e quei de so' Mario,  
 (El primo sangue de quella Cità,  
 Ma sangue de lanzeta e latesin )  
 I amighi tuti de le do' gran case,  
 E fina i servi mossi a compassion,  
 Tuti à tentà levarghe el genio mato  
 De morir col Mario sepolta viva.  
 Ma tuto in van! Infina i Senatori,  
 I Terzi Loghi, i Zugagadi, i Cotimi

Per distorla xe andai, e andai de bando.  
 Sto gran esempio de l' amor del toro  
 A' comosso ogni cuor più duro e fiero;  
 Tanto più che passà gera do' di  
 Che quella Dama zoso de la gola  
 No avea mandà un sculiereto d' aqua,  
 Nè un biscotin, nè gnanca un pignoleto.  
 A fianco de sta Dama squinternada  
 Ghe gera sempre la so' Cameriera  
 Che pianzeva, zigava e se strazzava  
 Anch' ela el petarler, la cotoleta.  
 De trato in trato sta serva sbasia  
 Mocava el lume co 'l gavea la bronza,  
 E quando el gera povereto d' ogio,  
 L' ogio ghe remeteve, a ciò sto lume  
 Continuo e vivo fusse in quel Sepolcro.  
 Sta novità, sto caso cussì raro  
 Gera l' istoria d' ogni casa e bozzolo,  
 E ognun diseve che mai più s' è visto  
 In Mugier tanto amor, tanta onestà.  
 In quei zorni xe nato per comando  
 Dei Signori de Note al Criminal!  
 Che do' Sassini s' à impicà, e messe  
 Le Forche in vicinanza del Sepolcro  
 Dove stava serai come marmote  
 El morto Senator, la Vedoia in pianto,  
 E la Serva co l' ogio e la mocheta.  
 Un Soldado de guardia xe stà messo  
 In sentinela là da so' Zelenae  
 Acì i parenti de quei do' Picai  
 No i veguisse a robar i do' cadaveri  
 Per dar fine ai corpi e a l' ignominia.  
 Sto Soldado, pien d' ozio e de tristezza,  
 Spazzisava su e zo co la so' pipa  
 Quando a caso l' à visto, e restà atonito,  
 Un lume in t' un Sepolcro, e po' l' à inteso  
 Sospiri e pianti de persone vive.  
 Pien de curiosità, de compassion,  
 ( Proprietà de Natura ) l' à volesto  
 Presto saver chi mai ghe gera drento.  
 A basso el s' à calà, e a pena vista  
 Una Dona bellissima in quel liogo  
 Lu xe restà un omo incoallo.  
 In prima, per eror de fantasia,  
 El l' à credesta un' ombra, una fantasma,  
 Un mazzariol, un spirito-foleto;  
 Ma dopo, incoraggio, co' l' à osservà  
 Un corpo morto destirà per tera

E quella Dona viva in largo pianto  
 Col viso sgragnà tuto da l' ongie,  
 Col peto sbafarà, e tuta quanta  
 Sbonigolada da la testa a i pie,  
 Allora l' à caplo e l' à deciso,  
 Che la causa de tuto quel afano  
 Gera la morte d' un caro Mario.  
 Presto, presto el Soldado de buon cuor  
 L' è corso fora e l' è andà a tor el cesto  
 De la so' cena e l' è tornà là drento.  
 Subito l' à tentà in bona forma  
 De redur quella Dama e quella Serva  
 A lassar el dolor e a refiziarse  
 Con un poco de pan; ma più impegnà  
 Gera el Soldado verso de la Dama,  
 ( Cognossuda per Dama, e de che pegola!  
 Al viso, a l' andriè, al portamento )  
 Cussì lu gh' à parlà umanamente  
 E pien de carità! *Dama, gran Dama,*  
*Lassè l' afano, la tristezza, el pianto*  
*Per el morto Mario; perchè ve zuro*  
*Sul mio fusil e su sta spada ancora*  
*Che niente giova e mai no gioverà*  
*Le lagrime, i singiozzi, i cighi, i urli,*  
*I pugni in sen e l' ongie in le baise*  
*De chi vive per l' aneme dei morti;*  
*E po' sapiè carissima mia Dama,*  
*Che la morte xe certa per chi vive,*  
*Che la morte xe el fin de tuto quanto*  
*E che 'l sepolcro xe l' ultima camera.*  
*Via, metè in pase el cuor, e metè in orden*  
*El cervelo, gran Dama.* In sta maniera  
 Gh' à parlà quel Soldà tanto pietoso,  
 E tuto lu gh' à dito quel che pol  
 Illuminar la mente rebaltada  
 Dei mati Vivi per i Morti sordi.  
 Ma sta gran Dama, che consolazion  
 No voleva sentir d' alcuna sorte,  
 Più indaviolata e inferocia che mai  
 Contro se stessa, s' à strazzà d' attorno  
 L' andriè vedovil, e po' sta furia  
 S' à despiantà el cignon e le bandete  
 E sul muso al Mario tuto à butà.  
 De coragio no s' à perso el Soldado  
 Gnanca per questo, e l' è tornà a l' assalto;  
 E con discorsi teneri e patetici  
 El s' à tanto insinuà a poco a poco  
 In tel cuor, in tel anema a la Dama,

Che al fin in pase la s'ha messo. Allora  
 El Soldà l'ha pregada e sconzurada,  
 Per la gran Diana protettrice d'Efeso,  
 Per la Dea de le caste, de le sante,  
 De le sculazza-banchi e basa-pile,  
 De magnar qualche cosa, e no morir  
 Da fame e da dolor in t' un Sepolcro  
 Zovene, bela, viva e spiritosa.  
 La Cameriera xe stada la prima  
 Che vinta da la grazia e dal bon sesto  
 E da l' arte oratoria del Soldà,  
 Ma sora tuto da l' orenda fame,  
 A bevù un po' de vin, e ha magnà un pan.  
 Cussi rinvigorida e sustanziada  
 La panza, tuti do' i se gh' ha messo  
 In zenochio davanti a la Matrona  
 Che aboriva el magnar quanto la vita;  
 E cussi quella Serva gh' ha parla:  
*Cosa ve servirà, cara Parona,  
 Cara Zelenza, morir qua de stento,  
 E viva sepelirve avanti el tempo?  
 Tuti sti vostri pianti e ste gran smanie  
 No le serve, el vedè, no le val niente  
 Al cadavero e a l' anema del morto.  
 Credè, Zelenza, lassè andar st' eror  
 De pianzer un Mario che spuzza a vento,  
 E godemo, Parona, el gran piacer  
 D' esser zovene ancora e vive al mondo,  
 Sto corpo aponto qua destato in terra,  
 Sto cadavero pien de vermi e marza,  
 Questo ne fa conosser che dovemo  
 Anzi tegnir più conto de la vita,  
 E de tuti i piaceri de l' età.  
 Finimola, Zelenza, via magnèmo  
 Tiolè sto pan, sto toco de salà  
 Che ve dà sto Soldà pien de buon cuor;  
 Magnè sta carne, via, bevè sto vin,  
 E quando che se' in gambe, andemo fora,  
 Per carità ve prego e ve sconzuro,  
 Da st' orido Sepolcro e spuzzolento  
 Perché resister no se pol mai tropo  
 Co' se trata de vita, e po' a la forza  
 De la gran verità sempre se cede.  
 Cussi la Dama, indebolia da fame,  
 E iluminada da tanti riflessi  
 De la Serva e Soldà gran oratori,  
 S' ha risolto al fin d' averzere la boca  
 E lassarse da quelli imboconar*

Come una gaza o un fantolin da tete.  
 La ga fato in principio un po' de smorfie,  
 Propie d' ogni gran Dama e naturali.  
 L' ha butà fora; l' ha cigà: *No voggio,  
 Lassème, voi morir a boca suta.*  
*Oh povero Mario! oh gran Mario!*  
 E po l' ha magnà come una lova  
 Tuta quanta la cena a quel Soldà,  
 Miserabile cena! Ma ogni cosa,  
 Anca ordinaria e insulsa, xe gustosa  
 Co gh' è de quella maledeta e fiera  
 Fame rabiosa. El seguito dirò . . .  
 Oh Dio, cosa dirò! oh Dio, che cosa!  
 Dirò quello che ognun lo sa per prova;  
 Dirò che quando se xe sazj e pieni  
 Se sente un certo no so che, un certo  
 Sgrissamento in tel sangue e ne le vene.  
 Basta . . . me son spiegà tuto abastanza.  
 Onde el Soldà, che ghe ne sa de Done,  
 Se no Dame, ma pur la Dama è Dona;  
 Vista la bela che voltava al Cielo,  
 Come che fa le menole, i bei occhi  
 Per sostanza del cibo e de natura,  
 Subito senza darghe alcun respiro,  
 El gh' ha chiapà una man, el l' ha strucada;  
 Quela gran Dama, quella perla,  
 Quela Stela, quel Sol de l' onestà  
 Xe restà vinta dal Soldado esperto  
 Con tutte le lusinghe e coi bei modi  
 Dei quali el s' ha servio per obligarla  
 A viver, a magnar, a più no pianzer.  
 Sta casta Dama, sta Matrona d' Efeso  
 Co la coa de l' ochieto languideto,  
 La nova godendose in te l' anema  
 Belezza e bona grazia de quel omo  
 Ben fato in schena e largo in te le spale,  
 Pien de vita e de brio e ardir che infiamma,  
 La gera là là per andar zo  
 Col Brenton, co la Brenta e le Brentèle.  
 La Serva ancora (che le Serve agiuta  
 Sempre la barca e sempre anca el batèlo)  
 In favor del Soldà se manizava,  
 E ghe diseja: *Via da sto omo  
 Cognossemo la vita tute do;  
 Oh via, molèghe; e po' cara Zelenza,  
 Ve seu forsi scordada i gran solazzi,  
 I piaceri col quondam Senator?  
 Molèghe, o mi squaquero tuto,*

*E dirò fora che de sta gran dama  
Un Soldadello à riportà vittoria.  
I novi amanti xe restai a le strete  
In onta al morto senator mario.  
In tuta quella note e nei do zorni  
Seguenti ancora i è stà serai là drento,  
E quanti xe vegnui per veder vivo  
Quel specchio d' onestà limpido e puro,  
Tuti à credesto che la gran matrona  
Morta la fusse per dolor e fame.  
Za el povero Soldado infatuà  
E incantà da l' amor de la so bela  
Gera fora de lu. El so gran spasso  
Cresseva sempre più stando là sconto ;  
Spasso grandò, ma grandò, perchè mai  
No gh'è nissun ch' el pensa e se figura  
Che un Soldado, guardian de un per de forche,  
Goda le bone grazie de una dama.  
Cussì in amor difficoltà e cautela,  
E ogeto inaspetà nobile e chiaro  
Ingrandisse ogni gusto, e po in amor  
La fantasia fa più de la realtà  
Scaldar la testa e 'l cuor e i sentimenti.*

*Sto felice Soldà, sto glorioso,  
Solamente de note, lu lassava  
La dona sconta drento in quel sepolcro,  
E in Efeso l' andava presto presto  
A comprar da magnar, boca che vustu,  
Spendendo del so prencipe la paga  
In amor drio le dame in sepoltura.  
Ma la fortuna fa cambiar aspeto  
Tuto zorno a le cose ; e l' omo alegro  
La matina, la sera el bate l' oca.  
Oh Dio, cossa xe nato ? un caso orendo ;  
I parenti d' un morto xe vegnui,  
E i à portà via el Picà e i l' à sepolto.  
El Soldà s' à lassà cussì gabar  
Per tropo snanararse in quella dama  
A tute l' ore senza far la guardia.  
Ma nol saveva, che la dama spesso  
Fa andar la testa atorzio a chi ghe tende,  
E fa spesso scordar i so doveri  
A la toga, a la spada, al colarìn.  
Quando el Soldà visto à la forza voda,  
Sò morto, l' à cigà ; morto, e finio.  
Subito desparà l' è corso, e tuto  
El gran caso a la dama lu ghe conta,  
Disendoghe : « No posso viver più,*

*Racc. Poes. Ven.*

*» Dama, mi son seguro de morir  
» Doman per man del bogia in vista a vu,  
» E quà sarò picà per quel Picà  
» Portà via dai parenti e sepollo ;  
» Onde, in sto ponto, con sta spada, è megio  
» Che quà me passa el cuor, e che finissa  
» Senza infamia la vita, e che castiga  
» Adesso el falo mio senza del bogia.  
» Su, cara dama, su, cara matrona,  
» Per pietà deme un sito, deme un buso  
» Vicin al senator vostro mario ;  
» Sì, sì, gran dama, sì, anema mia,  
» Se avè pietà de mi e amor in peto,  
» E se grata me sè per tanti spasemi  
» E per la morte che me dago adesso  
» Per amor vostro e mio, via presto presto  
» Prepareme una fossa, e disponeve  
» A pianzer col mario anca el moroso  
» Che la vita v' à dà per tuti i versi.*

*« La Dama, piena de pietà e vergogna,  
La s' à messo a cigar : « Ah povereta,  
» Ah quante volte mai goi da morir !  
» No, no, sorte crudel, no sofrirò  
» De do cari la perdita in t' un dì,  
» E in l' un sepolcro tuti do sti cari . . .  
» No, no , . . più tosto . . Oh . . che s' impichi  
» Quel morto che no sente afano e bota :  
» Che no go cuor de vederte a picar  
» Caro el mio vivo, caro el mie Soldà,  
» Soldà de sto castelo e de sta piazza,  
» Tiò su, caro, sto morto, porta via  
» Sto morto, e su la forza va e lo taca,  
» E salvite, ben mio, viscere mie,  
» Salvite in vita per la to matrona,  
» Per la to Dama salvite. In sta forma  
» S' ingana la Giustizia, Efeso e 'l Mondo.*

*Apena la ga dito ste parole  
Ch' el Soldado e la serva à tiolto in spala  
El povero mario, el senator,  
L' ogeto dei gran pianti e de la fame ;  
E intrepida e insensibile la dama,  
La matrona, l' onesta, la fedel,  
La gh' à slongà anca ela una manina,  
E in tre su quella forza i l' à tacà.  
Eco de l' afflita matrona l' onestà !*

## SONETTI DIECI

DI

### T A T I R E M I T A .

---

#### IL VERO BARCAJUOLO VENEZIANO.

Intender l' aqua, viver a zornada,  
Voga destesa senza spesseggar,  
In tel streto del rio no se ligar,  
Per no far gropo dar la so siada ;

Coi omeni d' onor far camerada ;  
Ai tressi curte, tuti saludar,  
Star su la defensiva, e no bravar  
Senza rason per no far mai bulada ;

Tratar ben la mugler, dei fiol grandoti  
No far che la dotrina sia el batèlo,  
Esser secreto e no far zo merloti ;

Che no diventa el magazen tinèlo ;  
Nè cassa el ghetto, nè sansughe i loti,  
Questo xe 'l vero barcarìol. Cerchèlo !

#### LA CONVENIENZA.

La natura no manca, manco mi ;  
El mondo no se mua, mi m' ò muà ;  
Tuto finisce ; el senso cariolà  
Esclama, per no dir : no posso pi.

La xe, l' è stada, e la sarà cussì  
Da dopo che sto mondo xe creà ;  
El zovene de tuto godarà,  
El vechio rusarà la note e 'l dì ;

La moda, che se mua, la torna ancora  
Dopo fata la so circolazion ;  
Gh' è 'l rico perchè gh' è chi va in malora.

Maravegiarse d' ogni mutazion,  
Criticar sempre, no star quieto un' ora,  
La me par da misantropo c. . . .



## L' UMANITA'.

Tuto me fa tremar ; basta un sorzeto  
 Che se fazza sentir, no dormo più ;  
 Al morto, al ton, a l' urto, a l' oh, a l' uh  
 Palpita el cuor, e se me sera el peto,

Che giova aver assae leto e riletto,  
 Se in pratica po va col culo in su  
 Le acquistade nozion ? Le serve a nu  
 De solo filosofico diletto.

Misera umanità ! Altro ghe vol  
 Che stoiche, che academiche bravure,  
 Chiamar quiete el morir, feral el Sol !

Co semo al ponto, ste nostre colture,  
 Che tanto quà se stima e che ne pol,  
 Ne fa più porchi de le altre creature.

## IL VENEZIANO ALLA CAMPAGNA.

El Venezian quando in campagna el va  
 L' à bagagio per tute le stagion,  
 El passa la laguna col barcon,  
 Co l' è a tera l' è tuto consolà.

Avanti che la cubia sia tacà  
 El paga ; el basa, el cria, e in confusion  
 A caro prezzo el vol far provision  
 De tuto quel ch' el vede e quel ch' el sa.

El marchia come che i ghe dasse drio,  
 Nol vede l' ora a casa de arivar ;  
 E co l' ariva el gusto xe finio.

El disna, e se nol trova da zogar,  
 Dopo aver spassizà, fumà, dormio,  
 El sbadagia, e nol sa cossa più far.

## IL POETA.

Me seca molto certi laureati  
 Co i se mete a parlar de la poesia.  
 Chi dise : Per un bezzo la daria,  
 Che i versi de parole xe barati ;

Chi dise : L' è un mistier da zovenati ;  
 Chi me dise : L' è un tempo butà via ;  
 Chi : La xe solenissima pazzia,  
 Che xe i poeti tuti quanti mati.

Chi la fa de le scienze la corona,  
 Mare de l' estro e del divin furor,  
 Domatrice dei barbari, o patrona.

Mi digo : Xe el poeta un ligador ;  
 Se la zogia xe falsa el ve cordona,  
 Se la xe bona el ghe cresce el valor.

## LA MODESTIA.

Saver, e superar quela passion  
 De voler che se sapia che se sa,  
 Xe una virtù che pochi doti ga  
 Perchè la sepelisce l' ambizion.

Astio, possesso, invidia, presunzion,  
 Par i carioli de l' illuminà,  
 Che ghe va rosegando l' umiltà,  
 E con quela el conceto e l' opinion.

Nobiltà con coltura e tere e bezzi  
 Xe un gran brillante d' aqua bela e fondo ;  
 Sola, xe un crestalon, ma tuto in pezzi.

Senza modestia un spirito profondo  
 Scuode, in vece d' onori, odj e disprezzi  
 Con quela l' è stimà da tuto el mondo.

## LA TESTA VUOTA.

Voler componer con la testa voda  
*Xe voler travasar col fiasco sbuso,*  
 Voler parlar col musariol al muso,  
 Senza drapo voler tagio a la moda ;

Senza carne voler grassa la broda,  
 Senza scala voler andar dessuso,  
 Voler impirar l' ago senza buso,  
 Voler ficiar el chiodo in te la croda.

Me ne rido de quei che me dise :  
*Basta voler per poder far de tuto ;*  
 Co no gh'è fasci no se fa cenise,

Co no gh'è l' anemal no gh'è persuto ;  
 Albero no se dà senza raise :  
 Co no gh'è intrada se se trova al suto.

## IL VERO REGALO.

La puina smalzada del pastor,  
 Tagio de lai sutilo del becher,  
 El figà in ponto del luganegher,  
 Se i regalasse e ghe vedesse el cuor,

I stimo più dei doni del signor,  
 Anca ch'el ve donasse el so deser ;  
 Chè la diventa paga del mistier  
 Co 'l ve tiol per virtuoso o per dotor.

Al regalo no xe la qualità,  
 Xe la maniera, l' ocasion, el fin,  
 L' animo grandò che prezzo ghe dà.

Quatro vovi che dona un centadin  
*Assae più val* ( co no l'è interessà )  
 De un anelo de qualche palatin.

## IL VERO DOVERE.

Sto rustego ghe zelo, sto strambazzo  
 Che no insegna la strada co 'l la sa ?  
 Che nol lassa tior lume co 'l la ga ?  
 Che a chi xe per cascar no sporze el braccio?

Che consegnar no voglia quel gramazzo  
 Col pol, che lo sconzura e xe intrigà ?  
 Che l' aqua a chi ga sè abia negà ?  
 Che per la vista tior alza el palazzo?

Tuto quello che senza pregiudizio  
 Se pol comunicar, mi stimarò  
 Ch'è sia dover piuttosto che servizio.

Se a le romane istorie crederò :  
 Che gera el più teribile suplicio  
 Interdir l' aqua e 'l fogo 've dirò.

## L' AFFETTAZIONE.

Gh'è dei omeni adesso a la toleta  
 Con manteche, con stuchj, con peneli,  
 Con ferì in fogo da scotar caveli,  
 Che polvere se dà co la moreta.

Li burla più de qualche femeneta,  
 Tiolendoli per musicci o puteli :  
 E la lo sa che quando no gh'è peli  
 No ghe xe mai virilità perfeta.

No voggio l' omo tanto efeminà,  
 Nè ch'el me spuzza da salvadeghin ;  
 Ma el decoro viril sia conservà.

Se chi recita, se anca Trufaldin,  
 Studia de no dar segni d' afetà,  
 Tanto manco li dàa el citadin.

# POESIE

DI

MARCA NTONIO ZORZI.

---

## EPIGRAMMI.

### I.

Se fusse una dona  
  ( Che 'l ciel me perdona )  
El primo zeloso  
Saria butà zoso  
Da qualche balcon.  
Da sti maledeti  
  Se strupia i diletì,  
  Se guasta a l' estremo  
  La megio che abiamo  
  De tante passion.

### II.

El cuor me dise  
  Che go un rival,  
  Ma no ghe credo  
  Nè ben nè mal ;  
  No xe prudenza  
  Crederghe a lu.  
Lu, per esempio,  
  Me dise spesso,  
  Che dovaressi  
  Amarme adesso ;  
  E pur per questo  
  M'ameu mo vu ?

### III.

Soportè che parla schieto.  
  Qualche volta, bel museto,  
  Tante smanie no avaressi  
  Se i rossori ve vedessi  
  Che ve fazzo comparir.  
A l'uscir de la mia ose  
  Vu parè de gigli e rose ;  
  Quei ochieti se v'infiamma  
  Sia da sdegno o sia da brama ;  
  E mi so quel che i sa dir.

### IV.

Se fa presto a dirve bela  
  Perchè abiè a tegnirve in bon ;  
  Ma mi stimo  
  Quel che primo  
  Podarà dirve anca bona,  
  E a le prove arivarà.  
Per no esser mai minchion  
  Faria mi sta cognizion.  
  Per le vostre glorie intiere  
  Torna conto aver per vere  
  La bellezza e la bontà.

## V.

Certe finezze  
 Che tuti veda  
 No val un soldo  
 D'una in confronto  
 Che nissun veda;  
 E quel ch'è sconto  
 Xe vero amor.

Una brisiola  
 Piutosto togo  
 Che una cusina  
 De fumo e fogo,  
 Che no me sazio  
 De solo odor.

## VI.

Mi son giusto de puina  
 Che ogni poco me rovina.  
 Ochi, cavei, colori,  
 Tuto me par tesori,  
 E unite a mile a mile  
 Sento le tentazion.  
 M'incanta le bianche,  
 Me acende le more,  
 Son sempre l'istesso  
 A tute le ore;  
 Pulite e pitoche  
 Per mi tuto è bon.

## VII.

Xe ben che i omeni  
 No sapia tuto;  
 Più dolce è 'l fruto  
 D'un ignorante  
 Credulo amor.

Chi tropo cerca  
 Tropo anca trova;  
 Chi no vol prova  
 Ga el privilegio  
 D'un dolce eror.

## VIII.

Bele parole!  
 Co le xe sofe,

Nina, tegnivele,  
 Manco che chiacolo  
 Più gusto go.  
 Urtème, dème,  
 Paremo mati,  
 Ma che i sia fati;  
 Che co le chiacole  
 No me fe zo.

## IX.

Col vien, tolèlo  
 Come se 'l Cielo  
 Ve lo mandasse;  
 Che da là un poco  
 Nol ghe xe più.  
 In un mumento  
 Se cambia el vento.  
 Favor de dona  
 Xe come l'onda  
 Che ora va zoso  
 Ora va su.

## X.

Le vol aver un muso  
 Che se ghe mora suso,  
 Le vol che tuto sia  
 Belezza e legiadria.  
 E po .... le man, a casa,  
 E po .... tegnirne in fren.  
 Chi pol senza esser mati  
 Acetar mai sti pati?  
 Diseghelo a dei legni  
 Che i toga de sti impegni,  
 Opur no andè cercando  
 Che se ve vogià ben.

## XI.

El diavolo non è bruto  
 Mai tanto quanto el par,  
 A no se desparar  
 Un zorno nasce el caso  
 Che no s'avea sperà.  
 Le done se compiasse  
 Del credito de fiere,  
 Ma le vol anca el gusto

De no durarghe sempre  
Co le se l' à formà.

## XII.

Sentirse pieni  
De afeti e moti  
Tuti tereni,  
E dover fingere  
Che 'l proprio mal  
Sia solo impulso  
Spiritual,  
Quest' è 'l tormento  
De amar persone  
De qualità.  
Chi è mai sì strani  
Nel so interesse?  
Tra i gati e i cani  
Ognun se sgaola,  
Se sbaglia ognun.  
Nè 'l so bisogno  
Sconde nissun,  
Tuti el socore  
Co una grandissima  
Sincerità.

## XIII.

No è sempre vero  
Quel che ve par :  
L' ochio xe un giudice  
Che in più d' un caso  
Xe stà inganà.  
Come che burla  
Certe belezze  
Co andè vicin,  
Ve burla ancora  
Certe saviezze  
Che avè stimà.

## XIV.

Quela saviezza  
Che vantè tanto  
No ghe xe un' anema  
Che me la nomina ;  
De quei che parla  
Con mi de vu.


I me domanda  
Ben, se sè bela,  
Ben, se sè zovene,  
E co ghel digo  
I xe contenti  
Nè i vol de più.

## CANZONETTA.

Tuti va in colera  
Che sè crudeli,  
El mondo mormora  
Che sè infedeli,  
Ognun ve biasima,  
Ve acusa ognun  
Chi de volubili,  
Chi de superbe,  
Chi ve mortifica  
Da dure e acerbe,  
E senza radeghi  
No gh' è nissun.  
Se sè difficili  
Ne fà dispeto,  
Se troppo facili  
Perdè el conceto,  
No gh' è giustizia,  
No gh' è perdon.  
Chi sente i omeni :  
La dona è dano,  
I saria anzoli  
Senza sto afano,  
Vu d' ogni vizio  
Sè l' occasion.  
Donete amabili,  
Lassè che i diga,  
Vedo che 'l diavolo  
Però i castiga,  
E che i ve spasema  
Atorno ognun,  
Sto gran discredito  
Però no i sana,  
Tute ste smanie  
No li alontana,  
Con tuto st' odio  
No stè a dezun.  
Ah chi ve carica  
De tante acuse  
Da sè medesimi

Vol far le scuse  
 E 'l proprio biasimo  
 Giustificar.  
 Se vu sè cocole,  
 Se sè amorose,  
 Se sè inganevoli,  
 Se sè ambiziose,  
 Coasa ga i omeni  
 Da no acusar ?  
 Vorìa anzi vederli  
 Co sti fracassi,  
 Se vu altre femene  
 Vu li tentassi  
 Con quele smorfie  
 Che femo a vu.  
 Credeu che 'l vincerli  
 Saria un gran fato?  
 Che assae difficile  
 Saria el contrato,  
 E insuperabile  
 La so virtù ?  
 Vardè co pessimi  
 Ch' i è da so posta,

Nissun li stuzzega,  
 Nissun se acosta,  
 I è lori el diavolo  
 Che va a tentar.  
 Vu sè dolcissime,  
 Vu le tentae,  
 E po a sti satiri  
 Ghe par assae  
 Se vu sè docili,  
 Se andè a mancar ?  
 Ma per mi dubito  
 Che el mondo andasse  
 ( Se la modestia  
 Vostra maucasse )  
 In precipizio  
 Senza più fren ;  
 E che abiè el merito  
 Che nu no andemo  
 Come le bestie  
 A un visio estremo,  
 Che un certo spirito  
 Vostro tration.



# POESIE

DI

GIOVANNI POZZOBON

DETTO

SCHIESON DA TREVISO.

## DIFFICOLTA'

DELLO SCRIVERE IN VERNACOLO.

El par che sto mio stil facile el sia,  
E che scriva le rime come che  
Le me vien su la pena. La falè  
Se credè questo; sè anzi in eresia,

Che ghe xe el so difficile per dia ;  
Molto più assae de quel che suponè.  
Proveve mo anca vu; e vedarè  
Se verità mi digo opur busia ;

E se mo sto mio verso è natural,  
Andante, e che no par gnente pensà,  
Provo molta fadiga a farlo tal.

A far facile la difficoltà  
Bisogna aver in zuca un po' de sal,  
E lo giudica quei che ghe ne sà.

*Racc. Poes. Ven.*

## UN SOGNO.

Cara Catina mia, son insognà  
Una cossa che a dirla me vergogno,  
Son insognà ( ma al fin l'è sta po un sogno)  
Che mi con vu me gera maridà.

Ma l'uno e l'altro gera desparà  
Per aver fato sto grosso codogno.  
Da una banda gavevimo el bisogno,  
E da quel' altra la necessità.

Scontenti, malinconici, afamai,  
Ogni dì sempre più l'andava mal;  
Mocolavimo come renegai.

E senza bezzi e senza capital,  
Pieni de cuche, de miserie e guai  
Alfin semo redoti a l'ospeal.  
Se sto sogno bestial  
El se verificasse, che nol so,  
Staessimo pur freschi tuti do !

## LA DICHIARAZIONE.

Che bisogno ghe xe de simular?  
V' amo, Cate, nol nego. È forsi mal  
Amar come che va? Se deve amar  
Con purità e con amor cordial.

Vardeve da un ingrato e disleal,  
Da un che v' ama solo per burlar;  
De un amor inocente e amor leal  
No se se deve gnente vergognar.

Se v' amo? no lo nego; e de di in di  
El mio amor va crescendo sempre più;  
Ma fazzo Dio quel che xe destinà.

Mi temo molto, o Cate, in verità,  
Temo che vu, oh Dio! no fè per mi,  
O, per dir meglio, mi no sia per vu.

## LA RITROSIA.

Voleu saver perchè, Cate careta,  
Tanto me dè in tel genio e me piase?  
Oh ve lo dirò mi, se nol savè;  
Sol perchè savè far la ritroseta.

Quel mostrarve modesta e sdegnoseta,  
Quel sprezzar quel che forsi più bramè,  
Quel saver dir: *Sfazzà no me tochè*,  
Cosse tute le xe che assae me aleta.

Se una puta vansar vol qualche cosa  
Sora un bon zovenoto inamorà;  
No ghe xe meglio che far la ritrosa:

Ma quando po che a sguazzo la se trà,  
Nè sa, nè la vol far la vergognosa,  
Zo dei calcagni al moroso la va.  
Questa xe verità:

La vostra mercanzia no val un bezzo;  
Ma col negarla la fè star in prezzo.

## INVETTIVA CONTRO LE DONNE.

Volubili, incostanti, menzognere,  
Interessade, vane, sospetose,  
Chiacarone, ustinae, lusinghiere,  
Impazienti, sprezzanti, maliziose,

Aroganti, implacabili, severe;  
Inganevoli, astute, puntigliose,  
Incorrigibili, tenaci, fiere,  
Importune, superbe, dispetose;

Che no ga per nissun fede nè amor,  
De cervelo lisier come xe un' oca,  
E d' ogni nostro mal vera cagion.

Cussi contra le done un gran dotor  
Esclamando l' andava a piena boca;  
E ghe respondea l' eco: *Oh che c . . . !*

## LA SCELTA DELLA MOGLIE.

El maridarse in una che sia bela,  
A chi nol sa, la par consolazion,  
Ma chi del mondo sa qualche novela  
I tien diferentissima opinion.

In fati a una muger come una stela  
Da mile ghe vien fato osservazion;  
E ancuo sofri sta cossa e diman quela,  
L' è po facile a dar qualche sbrisson;

Però vu, amigo mio caro, che sè  
Per entrar presto drento de sta scuola.  
Vardè ben, caro vu, come che fè.

Bela, sior no, ma una prudente fiola,  
Onesta e savia vogio che trovè:  
Che questo è quello che v' à da far gola.  
La belezza la svola,  
E chi cerca beltà senza virtù  
Cerca un lazzo che 'l pica e guente più.



## PER SPOSALIZIO.

Diga pur chi vol dir, che 'l sia un intrigo  
 El maridarse, che, a schieto parlarve,  
 Legiadra zentildona, mi ve digo,  
 Che olimamente ben fè a maridarve ;

Anzi ve lodo, anzi ve benedigo ;  
 E se podesse voria imortalarve ;  
 ( Compati l' espression ) parlo da amigo,  
 Spero che no avarè grama a chiamarve ;

E se mi no me son mai maridà,  
 Più d' una volta à portà el caso, che  
 Del minchion per la testa me son dà.

È vero che nel matrimonio gh' è  
 Contese, disunion, contrarietà,  
 Ma tute schiopetade alfin no l' è ;  
 E po lo vedare  
 Col fato vu, che a deventar consorte  
 Se ghe ne prova un poco d' ogni sorte.

## DISGRAZIE DEI MARITATI.

Se tuto quel che se razira in mente  
 Un povero ragazzo inamorà  
 Sul fior de la passion fervida, ardente,  
 El succedesse co l' è maridà ;

Che val a dir ( per dirla brevemente )  
 Gioje, delizie, pase, fedeltà,  
 Mo allora el maridarse certamente  
 La sarave una gran felicità !

Ma che ? spesso intravien nel matrimonio  
 Giusto de quel che no se pensa mai ;  
 Disgrazie, malatie, torti, dispeti ;

E allora in mezzo a tante beghe e guai,  
 E la so coa metendoghe el demonio,  
 L' è un viver da sassini maledeti ;  
 Onde sia benedeti,  
 Chi no s' intriga, che a la fin dir sento,  
 Che la muger xe a l' omo un gran tormento.

## RACCOMANDAZIONE DEL MUSEO DELL' AUTORE

## AL P. MANDELLI.

Degno padre prior, quando che vu  
 No m' agiutè, son mezo desparà,  
 El mio museo da l' ano scorso in qua  
 De pochissimo gnente el xe cressù.

E le medagie costa qua da nu,  
 E mi spender no posso, son spiantà ;  
 Go bensì el cuor e go la volontà,  
 Ma me manca de quel che importa più.

Però con discrezion, come convien,  
 Ve ne domando quatro civilmente  
 De quele che da vu dopie se tien.

Mi adesso ò trato el sasso destramente ;  
 Se 'l colpo me va fato, ben con ben,  
 E se no, riputemo no sia gnente ;  
 Ma so infalibilmente  
 Che o poche o trope men vorè donar,  
 Che 'l solito è de vu no farve star.

## PER LA MORTE D' UN FIGLIUOLO

## DELL' AUTORE.

Me xe morto un putin ! morte sassina  
 In pochissimi dì me l' à robà  
 Ai diese zugno de l' ano passà  
 Da una tosse ustinada e malandrina.

Se m' à portà via el cuor sta creaturina,  
 Se ò pianto la mia parte e sospirà,  
 Lasso che chi xe tenero papà,  
 Senza che mi ghel diga, l' indovina,

Ma rifletendo a le disposizion  
 De l' eterna infalibile sapienza,  
 E che una vale de miseria è questa,

Ai decreti del ciel sbassà ò la testa,  
 Me son armà de santa soferenza,  
 E ò dito : Signor mio, vu sè el paron ;  
 E cussì ne le afizion  
 Altro conforto no se trova alfin  
 Che rassegnarse al gran voler divin.

## EPIGRAMMI.

I. *Il consulto.*

Sior Schieson, un consulto. A un certo tal  
 Certi no so che bezzi mi ò da dar ;  
 Son povaromo, i fati mii va mal ;  
 Come posso mo far a no pagar ?  
*Fèla a la granda, amigo, prometè,*  
*E a la promessa po no ghe atendè.*

II. *L' amor proprio.*

Co una tosa se vede dar 'na óchiada  
 Da qualche zerbinoto paregin,  
 Subito crede vegnir domandada,  
 E la camisa no ghe sta al martin :  
 Ma s' anca el sior schieson fusse una tosa  
 El crederla anca lu l' istessa cosa.

III. *Il vecchio innamorato.*

Con un piè in te la fossa Crasitèò,  
 E con el viso tuto incresponà,  
 Fa ancora a più poder el cicisbèò,  
 Povero cuco, ti me fa pecà !  
 Amor ( e questo è schiesonian aviso )  
 No gabia in cuor chi no lo ga in tel viso ;

IV. *Il debitore.*

Se maravegia un tal, perchè a passar  
 Mai nol me vede per contrada bassa :  
*Ma no ti sa, minchion, che là ò da dar,*  
*E dove s' à da dar mai no se passa ?*  
 Un debitor sta fiera pena el ga  
 De no poder zirar con libertà.

V. *La mercanzia esibita.*

Va in cerca un tal de vender mercanzia,  
 Epur nol trova chi ghe daga un bezzo,  
 No aver pressa, minchion, de darla via,  
 Che ad esibirla se ghe tiol el prezzo ;  
 Se fa come le done : la se nega,  
 Che alora po d' averla ognuno prega.

VI. *La fortuna.*

Quando la sorte no se ga contraria  
 El so anca mi che se par omenoni ;  
 Ma quando, come a mi, la xe avversaria  
 Se vien giusto stimai tanti talponi.  
 Quanti ghe n' è che perchè i è poveromini  
 No i vien gnanca credesti galantomini !

VII. *Il buon esempio.*

Se 'l pare tuto 'l zorno alegramente  
 Tripudia a l' osteria, zoga, scialacqua,  
 E chiapa le so bale bravamente,  
 Cossa voleu ch 'l fio beva de l' acqua ?  
 Per educar de sesto fioli e fiole  
 Bon esempio ghe vol e no parole.

VIII. *Il guercio e il gobbo.*

Un sguerzo una matina s' à incontrà  
 In t' un gobo, e cussi el lo ga burlà :  
*Ti è ben cargo a bon' ora sta matina.*  
 El gobo gh' à risposto : *posfardina,*  
*Bisogna che a bon' ora sia per certo*  
*Perchè ti no ti ga che un scuro avertò.*

IX. *Vanto d' una moglie.*

Una muger la se vantava un dì  
 Che i ghe disea minchion a so marì.  
 Un' altra gh' à risposto : *Oh cara amiga,*  
*Tasè che a farlo tal no gh' è fadiga.*

X. *Morte d' una moglie.*

La consorte d' un tal se sepoliva,  
 E so mario cantava ch' el rapiva.  
 Gh' è sta dito ch' el tasa, che nol par  
 Bon in sto dì tanto alegro a cantar.  
 Oh bela, l' à risposto, *se ai mü di*  
*Tanta alegrezza no ò mai provà mi ?*  
 Se fusse maridà, quando la mia  
 Morisse, mi per certo cantaria.

XI. *La moglie affogata.*

S' avea in t' un fiume una muger negà,  
 El mario, poverazzo, desparà  
 El l' andava pescando atentamente  
 A contraria de l' acqua del torente.  
 Ghè xe stà domandà: *perchè cussì?*  
 E lù a risposto: *El perchè lo so ben mi.*  
*Viva l' à sempre fato a la roversa,*  
*Morta, no l' avarà l' usanza persa;*  
*Ond' è più facil che la trova in uso,*  
*Za che de contrariarme l' avea l' uso.*

XII. *Il millantatore.*

Un tal se dava vanto, e sì 'l disea;  
 Che tute drio le done ghe corea,  
 Gh' è stà risposto: *Oh questa po se sa*  
*Che drio 'l pezo le done sempre va.*

XIII. *Peso della moglie.*

Da borasca in pericol se trovava  
 Una nave che gran pesi portava.  
 El pilota à ordinà che ognun dovesse  
 Trar via 'l peso più grandò che l' avesse.  
 Uno de quei che avea là so muger  
 De butarla in tel mar fava pensier.  
 Ghe xe stà domandà: *Perchè cussì?*  
 -- *Perchè l' è 'l più gran peso che go mi.*

XIV. *Virtù senza denari.*

Certo che sì, che a ben pensarghe su  
 La più belà ricchezza è la virtù!  
 Epur apresso el mondo un omo povero;  
 Per virtuoso ch' el sia, l' è sempre un rovero

XV. *Le donne.*

Chi de le nostre done dise mal  
 El comete un eror molto bestial:  
 Se 'l cielo è vago per le vive stele,  
 Lo xe anca el mondo per le done bele.

XVI. *Il vestito immodesto.*

Quando una casa coverta no xe,  
 La mostra de poder star poco in piè.  
 Cussì la dona che scoverta vada  
 Par che la voglia far qualche cascada.

XVII. *L' imprudenza punita.*

Una dona burlava un certo puto  
 Che gera moro: *Ti è un gran corvo brutto!*  
 E questo che xe qua placidamente  
 Gh' à risposto cussì a sta imprudente:  
*I corvi core drio a ogni carogna;*  
*Che ve vardè da mi donca bisogna;*

XVIII. *Rimedio contro l' amore.*

Da certa zoventù de prima età  
 A un filosofo gh' è stà dimandà,  
 Quale sia quel rimedio che più val  
 Per far guarir quei che d' amor ga mal:  
 E lù à risposto: che la fame sola  
 Xe 'l rimedio che fa che amor ghe mola;  
 E in fati, pofardio, co se ga fame  
 Se ga altro in mente che d' amor le brame.

XIX. *Storia di Rodope.*

Rodope, fia de Dario, fè amazzar  
 La propria nena che l' à bùa a later,  
 Solamente perchè la ghe criava  
 Che a maridarse no la se curava.  
 Ai nostri zorni, oh quante fie de Dario  
 Faria mazzar le nene a l' incontrario!

XX. *Fragilità della bellezza.*

Vedeu sta bruta vechia che xe qua?  
 A i so di la ga molti inamorà,  
 E adesso che la xe canù a grima  
 No la trova nissun che più la stima:  
 Done bele, tolè esempio da questa,  
 E moderè quel fumo che avè in testa:  
 Va la bellezza come che va el lampo,  
 E, vechie, no ve resta apena el stampo.

XXI. *Arguta risposta.*

Un certo paesan gavea un caval  
 Longo e magro che pareva un feral.  
 Un ghe domanda : *a quanto al braccio*  
*Vendaressi sto vostro cavallazzo ?*  
 E lu, alzando la coda con disprezzo :  
*Entrà in botega che farò bon prezzo.*

XXII. *Risposta d' un guercio.*

Un certo tal che un ochio sol gavea,  
 Ma che de furbarie ghe ne savea,  
 Con un ch' i aveva tuti do à scommesso,  
 Chi de loro ghe vede più da presso.  
*Per diana, dise el sguerso, ò venzo mi ;*  
*E vustu veder se la xe cussi ?*  
*Mi do ten vedo con un ochio sol,*  
*E ti con do vederme un sol ti pol.*

XXIII. *La moglie collerica.*

Quando che la muger sussura in casa,  
 Acìò che la sé quieta e che la tasa  
 El rimedio xe questo d' esperienza :  
 O corer via, o armarse de pazienza.  
 Chi à giudizio mai fissa un' opinion  
 Con chi no xe capace de rason.

XXIV. *Un debitore.*

Gh'è un debitor che se vol lamentar,  
 Che quaresema longa assae ghe par.  
 Ch' el paga a pasqua chi pagar el deve,  
 E la ghe parará anca tropo breve.

XXV. *Un amante avaro.*

Un avaro a una tal l' amor facea,  
 E con parole amare el la ponzèa ;  
 E po el se ne dolea sto bel umor,  
 Che no l' avea fortuna a far l' amor.  
 Se fortuna in amor volè trovar  
 Ve bisogna una cossa, amigo, far ;  
 La seradura che a la borsa avè  
 Su la boca convien che ve metè.  
 Amor vol splendidezza e cortesia,  
 E no vol avarizia e vilania.

## CINGARESCA.

## L' ASTROLOGO.

Fermeve, viso d' oro,  
 Fermeve, bela puta,  
 Che ve contempla tuta  
 Un pochetin ;  
 Vedo che avè un sestin  
 E de la grazia tanta,  
 Grazia che proprio incanta  
 E liga i cuori ;  
 No xe da far stupori,  
 Come faria un sofista,  
 Se cussi a prima vista  
 Me piase ;  
 Bisogna che sapiè,  
 E chi nol sa che quele  
 Cosse ch' è rare e bele,  
 A tuti piase ?  
 Benedete le case  
 Che ga de ste zogiète  
 De ste care cossete  
 Come vu ;  
 Più che ve vardo, e più  
 Ve scovro un trato degno,  
 Ch' al certo passa el segno  
 E che no è in uso.  
 Oh caro quel bel muso,  
 Cari quei bei ochieti,  
 Che sieli benedeti  
 Dove i varda !  
 Quela ganassa sguarda,  
 Quel fronte rilusente,  
 Quela boca ridente  
 E singolar !  
 Me piase el vostro far,  
 Me piase el vostro sesto,  
 Un far ch' à del modesto  
 E del furbeto .  
 Un cuor vu gavè in peto  
 Che a la fisionomia  
 Xe tuto cortesia  
 E senza orgoglio.

Mi strolegar ve voglio,  
 Se vu volè però,  
 E ogni cossa dirò  
     Che sarà vera.  
 Animo, bela ciera,  
 Animo via, pian pian,  
 Dè qua, demè la man,  
     E ben slarghela.  
 Che cara puta belà,  
 Vu me vardè e ridè,  
 E forsi no credè  
     Che mi indovina?  
 Oh che man molesina,  
 Rotondeta, palpabile;  
 Oh che manina amabile  
     Ch'è questa!  
 Sta lineà manifesta  
 Che gavè un far grazioso,  
 Un far che xe amoroso  
     Verso ognun,  
 No avè difeto alcun,  
 Ma sè tuta bontà,  
 Co un cuor che a la pietà  
     Molto l' inclina.  
 In fin da picolina  
 Spirevi grazia e' amor,  
 E ve lassava el cuor  
     Chi ve vedea.  
 E quanto in vu crescea  
 I ani, crescea ancora  
 Quel trato che inamora  
     E che avè adesso.  
 So che sè stada spesso  
 Da più d' uno bramada;  
 Tanto vu sè stimada,  
     Mia careta!  
 Sapiè, Nina diletta,  
 Che gh'è un zoveneto  
 Che scolpia in mezzo al peto  
     Lu ve tien.  
 Se a questo vorè ben,  
 Nè a altri badarè,  
 Credelo, passerà  
     Bona fortuna.  
 Molto poche, o nissuna,  
 Gaa un far giudizioso  
 E d' un solo moroso  
     Xe contente;

Ma vu, che sè prudente,  
 E ch' avè un cuor de late,  
 No sarè de ste mate  
     Gazarae,  
 Che alfin resta burlae  
 Col far l' amor a tanti,  
 E in ultima i so amanti  
     Po se stufa;  
 Onde le fa la mufa,  
 E stà ligade al palo,  
 Che ognuno ghe fa 'l balo  
     De l' impianto.  
 La costanza xe el vanto  
 Che una puta aver deve;  
 Donca vu regoleve,  
     E siè costante;  
 No stè badar a tante  
 Promesse che fa i puti,  
 Perchè promete tuti  
     E pochi tende.  
 Chi d' amor se n' intende  
 E sa quanto ch' el possa,  
 No casca in te la fossa  
     Facilmente.  
 Ve prego, tegnì a mente  
 El mio parlar sincero,  
 Che mi ve digo el vero,  
     E vere cose.  
 Quando de farse spose  
 Certune à fissà el chiodo  
 Le vol far a so modo  
     In ogni via;  
 E per quanto ghe cria  
 Le mare e i pari, oibò,  
 No le se tol no zo  
     Dal so pensier;  
 A deventar muger,  
 Le crede ste meschiue  
 De deventar regine.  
     Oh poverazze!  
 Tante pessime razze  
 Gh'è d' omeni a sto mondo  
 Che no gh'è fin nè fondo  
     A dirle tute.  
 Quante povere pute  
 Le incontra in dei marii  
 Che i se chiama pentii,  
     E de che sorte!

E a la grama.consorte  
 I te ghe volta quello,  
 E i cerca del bordelo  
     In altra parte.  
 Con altre i fa le carte,  
 Se ben i è maridai,  
 E la muger sta in guai,  
     Sospiri e pianti.  
 Oh quanti mai, oh quanti,  
 La note i le carezza,  
 E 'l di co indiscretezza  
     I le strapazza!  
 Quanti avari de razza  
 Per no spenderghe e farghe  
 I lassaria mostrarghe  
     In fin el Q!  
 E qualche turlulu  
 Che gelosia po ga,  
 Sempre ghe sta tacà  
     Soto le cotole.  
 Queste no le xe frotole :  
 Perchè vò che sapiè,  
 Che de tristi ghe n'è  
     Più che de boni.  
 Le incontra in dei baroni  
 Che ghe magna le dote,  
 Che ghe dà de le bote  
     E le maltrata ;  
 Ora i ghe dise : mata,  
 Ora i la maledise,  
 Ora bruta i ghe dise,  
     E qualcoss'altro.  
 Tropo contrato scaltro  
 Adesso è 'l maridarse ;  
 Va a gara d' oselarse  
     Sposa e sposo.  
 Quel tal xe fio pietoso,  
 Xe fio savio e modesto,  
 Xe sparagnin, xe onesto  
     E ritirado,  
 Ma dopo maridado  
 Ecolo un scavezzon

Discolo e tripudion  
     Fora dei modi.  
 Quel' altro è uno dei sodi,  
 No à pratiche cative,  
 Mezzo chietin el vive,  
     Oh che bontà !  
 Ma dopo acompaguà  
 L'è un vero magazen  
 De vizj colmo e pien,  
     E trista cola ;  
 E la povera fiola,  
 Se no l'è rassegnada,  
 Cussì mal intrigada,  
     L'è in galia.  
 Donca, mia bela fia,  
 Vu che gavè giudizio  
 No fè mai per caprizio.  
     Sto gran passo.  
 Quante per puro spasso  
 Ghe n'è che s'accompagna.  
 E po dopo le magna  
     El pan pentì !  
 Vu no farè cussì ;  
 Al ciel racomandevè,  
 E in tuto rimeteve,  
     Al so voler ;  
 Sì, se volè goder  
 Contenta contentissima  
 Na vita felicissima  
     E beata.  
 Dona, puta garbata,  
 E degna d' ogni ben,  
 Penseghe suso ben  
     Che v'ò avisà.  
 Sto passo che xe qua,  
 Onde no scapuzzar,  
 Certo convien pensar  
     Prima de farlo.  
 Orsù, altro no parlo,  
 Capi, se avè cervelo ;  
 Caro quel muso belo,  
     A rivederse.



# I CAVEI DE NINA

## SONETTI CENTO

DI

GIACOMO MAZZOLA.

---

### I.

Aneme grame, cuori inamorai,  
Che pur troppo tantissimi sarè  
Al brutto passo che son mi, se mai  
A lezer sti soneti ve imbatè;

Quel che ò patlo de strazzacuori e guai  
Per amor de una coa co sentirè,  
So ben che da pietà mossi e tocai  
Me darè fede e me compianzarè.

Nè esaminando qual sia bei, quai bruti,  
La passion e 'l dolor scusando in mi,  
Ghe donarè compatimento a tuti.

Chi scrive adolorà no bada a franze;  
E po no serve dir de più, che chi  
Vien dal morto sa come che se pianze.

*Racc. Poes. Ven.*

### II.

Quel dì che soto quele piante ombrose  
Lezeva, e alzando i ochi a l'improvviso  
T'ò vista in compagnia de quele spose,  
Oh de quanto per mi à quel dì deciso!

I to ochieti, i to lavri, el sen, el viso,  
Stele, corai i m' à parso, e neve e rose,  
T'ò credesta cascà dal paradiso,  
Ma pur in cuor no m'ò sentio gran cose.

Ma co ò visto, ah! co ò visto i to cavei  
Biondi, che i par deposta oro filà,  
E quei del sol fa parer manco bei,

M'ò sentlo, Nina, allora proprio toco,  
M'è saltà caldo e freddo, ò sospirà,  
So restà in soma inamorà patoco.

## III.

Quel dì che la natura benedia  
 Dopo un longo pensar e ripensar,  
 Alfin la s' à risolto de impastar  
 El belo del qual Nina xe vestia,

Come per far un' opera compia  
 La ghe fava su un studio singolar,  
 I Dei del ciel la stava là a vardar  
 A boca averta tuti atorno via.

Altro no ghe mancava che i cavei,  
 Quando dal gran laorier natura straca  
 Volta via, e impianta là fatura e Dei.

Se afana el sol, no 'l pol tegnir se più,  
 El se spianta i so ragi, e 'l ghe li taca;  
 E questo xe che i sluse come lu.

## IV.

Su do spale che par, cossa fradei?  
 Mi no so cossa dir, de neve fate,  
 Veder do drezze sparpagnae, desfate,  
 Dei più longhi biondissimi cavei;

E veder tuto semenà de quei,  
 Ingrespai suso da le ariete mate,  
 Anca un bel fronte bianco come 'l late  
 Nome alora monzuo dai caviei;

Zonzèghe un viso che richiama e aleta,  
 Zonzèghe 'l cuor che bagola e scantina,  
 Amor zonzèghe che de mazo teta;

E po no ve lassè vegnir su i caldi?  
 E po de trasto no saltè in sentina?  
 E po per baco podarè star saldi?

## V.

La povera afamada celegheta  
 De megio da lontan visto un muchieto  
 La svola per becarsene un graneto,  
 E in tel becarlo al vischio la se peta;

Sentindose le zate obligà e streta,  
 La sbate l' ale, la tra suso el peto,  
 La se inzegna, e la tenta co un svoletto  
 De salvarse la vita, meschineta;

No riuscindoghe in fondo de far gnente,  
 Se mete a pispolar, e la contrada  
 Rebombar dei so zemiti se sente:

Ti, Nina, ti è quel muchio de granei,  
 Mi son la celegheta sfortunada,  
 E quel vischio fatal xe i to cavei.

## VI.

Quei cavei biondi co quel brio baron  
 Parte desfati, o in coa da drio portai,  
 E parte per el fronte sparpagnai,  
 Go sempre avanti a l' imaginazion.

Per quei perso ò 'l giudizio e la rason;  
 Quei soli i ladri del mio cuor xe stai,  
 D' amor per quei son tornà ai primi guai,  
 Per quei da novo presoniero son.

Inchiodà quella coa go ne la mente,  
 Me par che tuto in coa se me trasforma,  
 E sempre e sempre, coa, te go presente.

Cavei vedo co magno, sempre quei  
 Go al fianco co camino, e benchè dorma  
 De quei me insogno. Oh dio! cavei, cavei!



## VII.

Vaga a Venezia subito a dretura  
 Chi vol aver motivo de stupor,  
 E veder vol cossa sa far natura  
 Co in impegno la xe de farse onor.

Venezia solo de sta gran ventura  
 Xe stà degna, e la à bu sto gran favor;  
 Là ghe xe la più bela so fatura,  
 La magior prova del so gran valor.

El vedarà una drezza de cavei  
 D' undese quarte, dei più fini e biondi,  
 Dei più rizzi, più folti e dei più bei.

E scometo per sbrio l' istessa testa,  
 Che no se pol trovar per tuti i mondi  
 Cossa più bela e rara più de questa.

## VIII.

La biondina sdrajà s' un canapè  
 De erbesine e de fiori semenà  
 Co una man ombra ai ochi la se fa,  
 L' altra al bel viso de sostegno xe.

La drezza se ghe gera dezzolà,  
 E l' aria dei cavei fava gilè;  
 Mi stava a contemplarla . . . che non è  
 Svola amor, e pian pian da drio el ghe va.

I cavei sparpagnai tra le so man  
 Prima el rancura, e 'l li fa in drezza, e lu  
 De la so binda el ghe fa po un galau:

Partio lu, vago a veder per stupor,  
 E in quel galan ghe vedo scritto su:  
*Oe oe, no me tocchè, che son d' Amor.*

## IX.

Gnente gnente che a quela drezza fisso  
 Col pensier staga ( che lontan lo tegno  
 Più che mai posso ) tanto me ghe impegno,  
 E tanto me ghe cazzo e me investisso,

Che subito me perdo e intenerisso,  
 De un milion de colori in bota vegno,  
 Se torna a spalancar senza ritegno  
 La mia gran piaga, e spasemo e sbazisso.

Ti ti 'l pol dir, Amor, che ti ga el vizio  
 Drio al cesto de volerme sempre star  
 Anca co' vago a far fin quel servizio;

Dilo ti, quante volte ti m' à visto,  
 Pensando a quela drezza, sospirar,  
 Le lagreme cascarme e vegnir tristo.

## X.

Gera nata fra Venere e Cupido,  
 No ve dirò per cossa, una barufa,  
 Inviperia so mare smania e sbrufa,  
 E 'l fio ghe rispondea nana che rido:

*Senti se mai più in ciel, la dise, o in Gnido*  
*Ti torni, oh! te voi sbater ben la musa.*  
 Risponde lu: *Eh per questo no go fufa,*  
*Loghi no me ne manca, me confido.*

— *Va pur baron, va razza maledeta,*  
 La ghe replica; e lu: *vardè se vago;*  
 E in testa el svola de la mia Nineta.

*Qua, più che in Gnido volentiera stago,*  
*Quèsta, el dise, sarà la mia caseta,*  
*Peteve 'l vostro ciel, che ve lo dago.*

## XI.

Se scampà da Tìton la bela aurora  
 Per el ciel semenando va a cestei  
 Le riuse e i zegi, tuto el mondo alora  
 Se consola, e a cantar scomenza i osei.

Se in primavera va la cara flora  
 Zirando per i campi i ochietti bei,  
 L' erbesine e i fioreti sponta fora,  
 E core a pascolar piegore e agnei.

Se 'l sol i raggi soi mostra e destende,  
 Se incolorisce el ciel, la tera e 'l mar,  
 Tuto belo se fa, tuto risplende :

Ma se Nina i cavei spiega, i se vede  
 Più assae che 'l sol, che flora e l'alba a far,  
 E l'alba e flora e 'l sol tuto ghe cede.

## XII.

» Erano i capei d' oro a l'aura sparsi,  
 » Che 'n mille dolci nodi gli avvolgea,  
 » I, che l' esca amorosa al petto avea,  
 » Qual meraviglia se di subit' arsi?

Petrarca, un tempo, mi no te 'l credea,  
 Ma po co quei anca a mi me xe comparsi  
 De Nina, tanto rari i me xe parsi,  
 Che destacarghe i ochi no podea;

E come ti per quei de la Laureta,  
 Anca mi restà son arso e desfato  
 In quel gran dì per quei de la Nineta :

Cussì, Petrarca, un poco me consolo;  
 Che se al mio i ghe disesse un genio mato;  
 Podarò almanco dir : ma no son solo.

## XIII.

Chi mai se l' avarave imaginada  
 Che mi dovesse ne la prima volta  
 Che ò visto quela bela drezza sciolta  
 Bruscar sto boconzin de innamorada ?

Col so deeto amor me l' à mostrada,  
 E mi inocentemente in mau l' ò tolta,  
 E in quel che la vardava, el can se volta,  
 E in cuor me cazza, oh Dio ! la gran stocada.

Cussì finzendo placida bonazza  
 El mar cordona i corti barcarioi,  
 E nei scogi la barca po el ghe strazza.

Scampè da amor, no credè ai scherzi soi,  
 E in mi spechiève, zoventù matazza,  
 Che co manco el credea go dà nei chioi.

## XIV.

E nua le spale, e sgrendenà el topè  
 D' amor la bela mare disperà,  
 So fio pianzendo la cercava, che  
 Da molti dì ghe gera via scampà.

Mi che go un cuor che pochi ghe ne xe,  
 Pensè, se la me fava, oh Dio ! pecà ;  
 Me son messo a cercarlo ; indovinè ?  
 Infìn ghe son riussio, ghe l' ò catà.

El se gera andà a scondersè colù  
 Tra le drezze de Nina, e là cussì  
 El se la sbabazzava che mai più.

Volea chiaparlo per 'na man. Sentì  
 Cossa mo che me fa 'l becofotù ?  
 No me galo tirà drento anca mi !

## XV.

Co la volpe ga fame la se va  
 Co la panza su un scogio a colegar;  
 E quieta quieta ( varda furbità ! )  
 La coa la fa ne l' acqua zogolar ;

La crede 'l granzo roba da magnar,  
 Core, e in quei peli el resta incatigià ;  
 Fora la coa xe lesta ela a cavar,  
 E brinca el granzo che ghe xe tacà.

Più furbo de la volpe el crudo amor  
 Se serve de l' istesso tradimento,  
 E de ti, o coa, per far botin d' un cuor.

Lu el se sconde, e 'l te fa zogolar ti,  
 Ghe core el cuor, se ghe incatigia drento;  
 Amor lo chiapa, e, gramo cuor, bondi.

## XVI.

Grami fiori ! me fà proprio pecà  
 A vederye ridenti star cussì  
 In mezzo a quei cavei, cavei che a mi  
 L' anema e 'l cuor deboto i m' à brusà.

Ah ! scampè, fiori, scampè via de là,  
 Se volè aver de vita almanco un dì,  
 Se no là ve arsirè, ve incenerì,  
 Che là gh' è 'l fogo, e mi lo go provà.

Piutosto el sen a farghe belo andè,  
 Che ve prometo e zuro, che là mo  
 E seguri e freschissimi starè ;

Se par dal tropo giazzo, che ghe xe  
 Sconto in quel cuor, a pezo rischio po  
 De restar impetrij no ve catè.

## XVII.

Disè, se Die v' ajuta, pastorei,  
 Per sto bosco sarave mai passada  
 La mia Nina, el mio ben ? Che pena ! oimei !  
 No la cato, e al tanto l' ò cercada !

Sentì ... do stele xe i so ochieti bei,  
 La ga el visin che 'l par riose e zonchiada,  
 E una coa de longhissimi cavei  
 Biondi e strabiondi al vento sparpagnada.

Se la incontressi mai, senti, diseghe,  
 Che da per tuto vago d' ela in trazza,  
 E che la certo le zornade intreghe ;

Che la chiamo, che pianzo, che imatisso,  
 Che no so gnanca più quel che me fazzo,  
 E che la cora che d' amor sganghisso.

## XVIII.

O trovà Nina d' amarezza piena  
 Drento un camarineto solitario  
 In t' un diroto pianto straordinario  
 Coi cavei per le spale in susto e in pena.

La me pareà deposta Madalena,  
 Dio perdonème, ( vedo che zavarìo,  
 Che 'l paragon xe massa temerario )  
 Ai vostri pie del fariseo a la cena,

Pianzea con ela amor, e anca la tristo  
 El gera e mesto, e quela è stà la sola  
 Volta che amor a pianzer xe stà visto.

Voleva domandarghe la rason,  
 Ma el dolor m' à ingropà la voce in gola;  
 E a pianzer anca mi tacà me son.

## XIX.

No ti te pol pensar, Nineta mia,  
 La pena che me dà quei ventesei,  
 Che se te cazza sempre nei cavei  
 E ghe zira e svolazza atorno via.

No miga che me daga zelosia  
 Quei matazzi insolenti de putei.  
 Ma ghe n'è de baroni anca fra quei,  
 E tremar me fa el caso de Orizia.

Co quel zogatolar, desmestegarse,  
 I podarave, (come mi da mato)  
 No i ga el so bon giudizio, innamorarse;

E strascinar te po ne le so grote,  
 Come un dì de Orizia boriu ga fato;  
 E allora, Nina mia, felice note.

## XX

*Dove xe amor? Me dise un dì Nineta,*  
*— Sta to domanda me fà ben stupor,*  
*Rispondo mi: per tuto ghe xe amor,*  
*Nè gh'è cosa che a lu no sia sogetu,*

*Lu de l'alba montà su la careta*  
*El di el ne mena, e l'fa che 'l nasce e 'l mor;*  
*Lu co l'acque e coi pesci al mar el cor,*  
*Lu co le bestie e i osei fa smissionseta.*

*Buta le piante? Lu butar le fa,*  
*Lu dà ai zegie a le riose el bianco e 'l sguardo*  
*I fiori sa da bon? el xe 'l so fià.*

*Ma far veder co el vol la so grandezza,*  
*E tirar cuori soto el so stendardo,*  
*Alora el vien po a star su là to drezza.*

## XXI.

Un gran dì che 'l xe stà per mi quel dì,  
 Che in t' un sardin t'ò vista indormenzà  
 Co quella grazia amabile cussì  
 S' un canapè de fiori ricamà!

Un' aria dolce i bei cavei de ti,  
 Che oro i pareva quel dì nato e spuà,  
 Andava sventolando, e parso a mi  
 M' à de sentirti a dir: Amor sta qua.

In quel dì ò sentìo al cuor un no so che,  
 Che no 'l so dir; ma che co mi però  
 Partio el s' à allora, e co mi ancora el xe;

E sempre da quel dì presentìo go  
 Quei cavei, quel zardin, quel canapè,  
 Nè da la mente cazzar via li so.

## XXII.

Vaga dove so andar 'na drezza bionda  
 E 'l crudo amor per tuto me compagna,  
 Nè ghe xe grota nè ghe xe montagna,  
 Che da lori me salva o che me sconda.

Infina ai leti (117), dove moribonda  
 L'umanità bochiza, ansa e se lagna,  
 E del suor tuti i cuscini bagna,  
 Che dal fronte giazzà zoso ghe gronda,

Me vien drio sti do barbari tirani,  
 E un sempre più crudel, l'altro più forte,  
 I me radopia al cuor le piaghe e i afani.

E no ghe fa paura, ah l'è un gran dir!  
 Quei parecchi teribili de morte,  
 Che fa tuti, per sbrio, tanto stremir.

## XXIII.

Sgionfete pur, crudel, come un balon,  
 Va altiera pur de la to bela coa,  
 E d'averme al cervelo un rebalton  
 Fato dar, sguazza pur, gongola e noa!

In t' una vaga rioda anca el paon  
 Ambizioso stargando va la soa,  
 Ma eo el se varda i pie, la so ambizion,  
 La so superbia in bota zo ghe croa.

Al to barbaro cuor, nio de rigor,  
 Daghe anca ti un'ochiada, Nina avara,  
 E te passerà tuto quel umor;

Se come ti ga bela e senza tara  
 La coa, ti ti gavessi belo el cuor,  
 Mo quanto, oh! Dio, che ti saressi rara!

## XXIV.

Vederte da la testa sin al fianco,  
 E da là de le cotole a orovia  
 Caminarte cavei, che 'l sol xe manco  
 E lustro e biondo senza dir busia;

Mile anei zogolarde sul sen bianco,  
 E ai ochi e a le ganasce farte ombria,  
 Ah! chi se pol tegnir de sbalzo, franco,  
 De squasi no pecar de idolatria?

Mi certo, co te vardo fisso fisso,  
 Ti me par un miracolo, e anca più,  
 E coi ochi te bevo e te ingiotisso;

E zonzo a dir, che 'l più zentil zogièlo  
 De ti la tera no la ga mai bu,  
 Nè gnente se dà al mondo de più belo.

## XXV.

Scomenza a desgiazarse ogni paluo,  
 Nina, nè l'acqua xe più tanto pegra,  
 Ogni alboro de fogie spogio e nuo  
 Torna za a farse verde e se ralegra.

Ogni campo, ogni pra par un velùo,  
 Ogni razza de bestie e osei xe alegra,  
 Tuto bagola e ride al dì d' ancuo,  
 E mi, mi solo go l' anema negra.

Per mi solo no torna primavera,  
 Mi solo in mezzo a tante so alegrezze  
 Sospiro e smanio da mattina a sera;

Nè certo lassarò de respirar,  
 Se co la vista ti de le to drezze  
 Sto cuor no ti me vien a consolar.

## XXVI.

Sapi Nina che un omo come mi  
 Gera quel fior che vien chiamà Narciso,  
 Anzi fio de Liriope e de Cefiso,  
 Ma belo, ma superbo come ti.

Costù tornando da la cazza un dì,  
 Specchiandose in t' un fonte, a l' improvviso  
 Tanto a lu istesso piasso ga el so viso,  
 E innamorà in lu istesso el s' à cussi,

Che 'l xe spirà su quela riva, oimei!  
 Miseramente da eccessivo amor,  
 E trasformà in quel fior lo ga po i Dei.

Ah! Nina mia; te parlo qua de cuor,  
 Ti ga tanta superbia in quei cavei....  
 Varda, ehe no se veda un altro fior.

## XXVII

Su la testa de Nina amor unio  
 Se gera in lega coi so fradeleti,  
 Tuti co l' arco in man armà e lestio,  
 Che a vardarli i pareva tanti turcheti.

Parte, co fa le celeghe in tel nio,  
 Stava quachi e imboscai fra i so rizzeti,  
 Parte fava la ronda tuti brio,  
 Tendea parte a spiar de quei toseti.

Amor, dei altri come assae più grando,  
 Tuto in mezzo a la coa revoltò e sconto  
 Tegniva la bacheta del comando:

Mi i me aspetava, e co i m' à visto in pronto  
 Tuti m' àtrato, e son restà, passando,  
 Da per tuto ferio, da tuti ponto.

## XXVIII.

Co destende el so vel la negra note  
 Dorme fra le caene el presonier,  
 Dorme soto una pianta el pegorer,  
 E 'l pelegrin sui sassi o su le mote ;

Repossa i condanai ne le galiote,  
 Repossa in alto mar el mariner,  
 Repossa in mezzo a l' arme anca el guerier,  
 E fin le bestie e i osei per ciese e grote.

Tuti la note dorme e se reposa,  
 Tuti la brama, e mi anzi co la vien,  
 Causa vu drezze e amor, me vien l' angossa ;

Che invece de dormir e repossarme  
 Le intierissime note me convien  
 Vegiar, sbasir, smaniar, zemer, smissiarne.

## XXIX.

Co dal mar po del sol sponfa el caretò,  
 E tuti col dormir xe reficiài,  
 Torna alegre le bestie ai campi e ai prai,  
 E 'l barcariol contento al so treghetto,

Svelto el guerier de Marte al tananai  
 Torna, e lesto el vilan torna al vanghetto,  
 E mi torno da novo a mio dispeto  
 Ai strazzacuori, a le amarezze, ai guai.

Passa anca el dì, e 'l me par longo cent' ani,  
 Torna la note, e a tacar soto torno  
 E pensieri e tormenti e susti e afani.

Passo da zornì amari a note triste,  
 E questa è la mia vita e note e zorno  
 Da quel dì, bele drezze, che v' ò viste.

## XXX.

Vien, Aracne superba, vien mo qua  
 Ti, che la gran Minerva de sfidar  
 A chi sapesse megio ricamar  
 Ti à bu el cuor e la gran temerità ;

Ti, che d' esser sta vinta e suparà  
 No bastandote, a tesser e filar  
 Per dispeto te vedo a seguitar  
 Ancora, benchè in ragno trasformà ;

Vien, che veder te vogio in confusion,  
 E da novo avilir la to albasia,  
 La to superbia e la to ustinazion :

A ti, te sfido, tirime dei fili,  
 Se ti è capace, che più finì i sia  
 Dei cavei de la Nina e più sutili !

## XXXI.

Quei soli che ama pol imaginarse  
 Che pena xe lassar un caro ogeto ;  
 Su quel punto fatal del destacarse  
 No me volea più star l' anima in peto.

A' scomenzà anca Nina a smorta farse,  
 E dopo qualche caldo sospireto  
 La s' à messo, pianzendo, a lamentarse  
 Del cativo destin del nostro afeto.

Che non è, la tra fora de scarsela  
 La so forfeta, e la se taglia via  
 De cavei 'na drezzola intiera e bela.

Tiò, la me dise co una gran passion,  
 Porteli adosso per memoria mia.  
 Oh parole ! oh regalo ! oh division !

## XXXII.

Ah ! quei cavei co quel comando espresso  
 No m' avessistu, Nina, mai donà !  
 Ah ! mi gramazzo in quel mumento istesso  
 No me li avessio al colo mai tacà !

Me par d' aver atorno de mi adesso  
 Quela fatal camisa insanguinà  
 Che Dejanira, fata zo da Nesso,  
 A Ercole per vendeta ga mandà.

Un certo ardor pestifero, rabbioso  
 I m' à impizzà nel sangue e ne l' interno  
 Che temo, come lu, vegnir furioso.

No me conosso più ; no me discerno,  
 Ora no go de ben, fà de riposo,  
 Ah ! Nina, regalà ti m' à un inferno !

*Racc. Poes. Ven.*

## XXXIII.

Co togo in man quel mazzo de cavei,  
 Che ti m' à, Nina, nel partir lassà,  
 E che mi tegno tanto conservà,  
 Me casca zo le lagreme a mastei.

E perchè, cigo, perchè ingiusti Dei  
 Gaveu barbaramente soportà,  
 Che da sti ochi culia mè sia robà,  
 Che m' à dà sti tesori e sti zogie ?

Dopo lo desfo, e soravia ghe lasso  
 Piover sti ochi che mai se saziarave,  
 E me ghe incanto come un zoco e un sasso,

Po li sugo e li torno a far in mazzo,  
 Li baso e i torno a meter soto chiave ;  
 E sta funzion, Nina, ogni dì la fazzo,

## XXXIV.

Cossa me val lontan star anca un mio  
 Dai to cavei che 'l cuor me liga e strenze,  
 Se da so posta el cuor inlescà spenze  
 I pensieri a tegnirghe sempre drio ?

Se ogni ogeto che vardo, amor, oh Dio !  
 Subito del color soo me lo intenze ?  
 Se da per tuto el can me li depenze,  
 E al vivo li figura a l' ochio mio ?

Tuto tuto me par quei to cavei,  
 A quei tuto me tira e me strascina,  
 Quei vedo e cato in tuto, e tuto in quei ;

E cussi tuto per magior mia pena  
 O darente, o lontan che te sia, Nina,  
 A bacilar e a sospirar me mena.

## XXXV.

Scolta mo in rechia : Sapi, Nina mia ...  
 Oe pian, che nissun senta : Sapi, che ...  
 Ma varda ben no dirlo, guanca se  
 I fasse de ti, cara, becaria ;

Sapi .... Go pena a dirlo infin per dia  
 A ti, che so che dona che ti xe.  
 Sapi .... Nina ! Possibil ? Varda ve,  
 A ti el digo, e a qualunque no 'l diria ;

Sapi in soma, che quei to cavei d' oro  
 Xe qualche tempo ( varda che delito ! )  
 Che come cosse sante mi li adoro :

Se 'l sapesse qualcun, gramo mai mi !  
 Oe, per amor de Dio te prego, zito,  
 Che no lo sapia altri che amor, mi e ti.

## XXXVI.

A quella d'oro vivo vera massa,  
 Che parte del bel viso a Nina sconde,  
 Che i zefireti sventola e confonde,  
 Dove drento amor gongola e se spassa,

E a quele, che la Nina andar se lassa  
 Zo per le spale, drezze soe strabionde,  
 Ora solae, ora sciolte e vagabonde,  
 Co quel disprezzo che ogni grazia passa,

No son mi solo che se gnente fermi  
 I ochi ghe tegna vaga in bruo de viola,  
 Nè 'l solo son che se ghe mova i vermi ;

Che no ghe xe nissun che ghe le veda,  
 E che no peca subito de gola,  
 E che 'l so cuor de sbalzo no ghe ceda.

## XXXVII.

Un cavel porporin che in testa avea  
 El potente re Niso de Megara,  
 Del destin dei so stati decidea,  
 Ma so fia Scila ghe l' à fata amara.

Per Minosse d' amor tanto la ardea,  
 Che no la ga badà sta cagna avara  
 In t' una note che 'l papà dormea  
 De pelarghelo da la cavegiara.

Che dipendea da quel fatal cavelo  
 L' ecidio de quel regno, o pur la sorte,  
 Richezza e pase, o povertà e flagelo.

Ah ! che anca mi provo un destin ugual  
 A quello de Megara, e vita o morte  
 Le me dipende da un cavel fatal !

## XXXVIII.

Me magnarave dal velen che go,  
 Sentì, sentì quanto son stà minchion:  
 Trovo Amor, che dormia drento a un machion,  
 Pian pian ghe salto adosso, el zufo e po

Ghe digo : *Eh no gh' è scampo qua baron ;*  
*Ti m' è cascà in le sgrinfè ! Adesso mo*  
*Tiòme in bota dal cuor sta coa, se no*  
*Te mazzo al corpo ... al sangue.... al cospeton.*

Son qua, el ciga, pietà, si son qua, el cria,  
 Pianze, me fa promesse d' ogni sorte ;  
 Bambin, ghe credo, el molo, e 'l svola via ;

E svolando el me dise : *Eh, cordonazzo,*  
*Far quel serviziò no te pol che Morte.*  
 Ah ! che se 'l cuor più subito el mazzo !



## XXXIX.

Tanto go bu in amor sempre a provar,  
M'ò catà cussì sempre mal contento,  
Che avea fato el più gran proponimento,  
Anzi fina zurà, de mai più amar.

Me pareva no poder mai più cascar,  
Ma el proposito infin, ma el zramento,  
In t' un fiat, in t' un supio, in t' un mumento,  
In bota i xe andà a farse sacagnar.

Che 'l veder una drezza, un giozzo, un colo,  
Zuramenti strazzar, sbregar propositi,  
Inamorarme l'è stà un punto solo :

Dirà qualcun: *Cussì casca i minchioni ;*  
*Chi sta in guardia no fa de sti spropositi ;*  
Ah ! che de nu no semo mai paroni !

## XL.

Go sentio dir che 'l spirito foletto  
Per el più se inamora dei cavei,  
E che 'l va in cerca dei più longhi e bei,  
Mosso da un certo natural diletto ;

E che 'l ghe chiapa un cussì mato afeto,  
E che talmente 'l se incatigia in quei,  
Che no val tante volte l' agnusdei  
A cazzarghelo via quel maledeto.

Mi somegio a colù tanto in natura,  
Che d' esser un foletto in carne umana,  
Per dia, che squasi squasi go paura.

Anca mi in dei cavei son morto e spanto,  
E gnanca a mi, per far che me slontana,  
Gnente à mai valso, e pur go fato tanto !

## XLI.

Quel Cesare che tanto s' à distinto  
Coi so trionfi e i scriti soi felici,  
Ma po da Bruto crudelmente estinto,  
Fato specchio dei principi infelici,

Per dar le nove a Roma, ma in sucinto,  
D' aver fato zornada coi nemici,  
E spiegar quanto presto el gavea vinto,  
Cussì el ga scritto: *veni, vidi, vici.*

Poco su poco zo cussì anca mi  
A sto ogeto e a sto fin a quei rispondo,  
Che vol saver come m' ò perso in ti.

*Veni* in zardin per mia fatalità,  
*Vidi* una coa che 'l sol xe manco biondo,  
Ma inuò el *Vici*, che *vinto* so restà.

## XLII.

Come co sbalzà fora erbe e fioreti,  
E à dà logo l' inverno ingritollo,  
I osei se vede, sbandonà el so nio,  
Saltando alegri andar per i rameti.

Scampà da Cipro un schiapo de amoreti  
Per i cavei de Nina (che per sbrio  
Oro i pareva quel dì nome forbio)  
Scherzar go visto e far mille zogheti.

Quel va, quel vien, dei rizzi fra le grespe  
Quei se incatigia, quei se sbassa e sconde,  
Questi ghe svola a torno come brespe,

Chi canta, chi matiza e fa cavriole;  
A ste scene, a ste viste, a ste baraonde  
Oh Dio che 'l cuor me andava in bruo de viole !

## XLIII.

Se conosce che in far i to cavei  
 Tuto el so inzegno ga impiegà natura,  
 E in fati i xe un lavoro, una fatura,  
 Che inzucai fa restar omeni e Dei.

E se vede deposta che là in quei  
 La ga slargà la man a desmisura,  
 Perchè mo in fati senza cargadura  
 Nè i più longhi s'è visto, nè i più bei ;

Ma in farte 'l cuor, parte che assae più impegna  
 E de un uso più nobile, ah Nineta,  
 La xe stà molto co ti avara e tegna!

Quanto la s'avarìa fato più onor  
 Se nei cavei la fusse andà più streta,  
 E un pochetin più larga in farte 'l cuor.

## XLIV.

Scampanando a brena averta sbigotio,  
 Persa la guera, el perfido Assalon,  
 L'è restà incatigià (voler de Dio!)  
 Co la coa ne le rame de un pianton.

Gioabo mo, che ghe la dava drio,  
 Vedendolo restà là a picolon,  
 Ghe xe andà adosso in furia, e inviperio  
 El gh'è sbusà la panza col sponton.

A colù ghe xe stà la propria coa  
 La so morte, e a mi poco diferente,  
 Nina, la morte mia sarà la toa.

Xe egual el caso e la fatalità,  
 Ma mi, e 'l posso zurar, son innocente,  
 Che Assalon se l'aveva merità.

## XLV.

Netuno, perso anca elo un dì el giudizio,  
 Incotio ne la povera Medusa,  
 Nel tempio de Minerva a la refusa,  
 Senza rispetto el ga fato el servizio.

Sto sacrilegio in tanto precipizio  
 Fa andar la Dea che tuto la ricusa,  
 De Netuno no val preghiera o scusa,  
 E la vol condanarlo a un gran suplizio.

I cavei ghe fa bisse deventar,  
 E che de chi le varda sia l'acquisto  
 Ch' i abia in bota de sasso da restar.

Dei cavei de sta grama al fatal bisto,  
 Nina, anca i toi ben posso somegiar,  
 Perchè so restà un sasso co i go visto.

## XLVI.

Senti, Mingardi, (118) de che voi pregarte :  
 Depenzime la Nina e i so cavei ;  
 Varda che tuto semenà senz' arte  
 La gabia el fronte de rizzeti e anei.

Una drezza da drio d' undese quarte  
 Fa che ghe casca zo de longhi e bei,  
 E che, zogatolando, da una parte  
 Gh' in porta un pinzo in sen i ventesei.

Cerca el biondo più bel per sto lavoro,  
 Se no gh' in fusse mai, se no s' in dà,  
 E ti deposta dopara de l' ovo.

Po faghe sta iscrizion : *Questi che è qua  
 Xe quei cavei de Nina, anzi el tesoro,  
 Che fa deventar mato Mazzolà.*

## XLVII.

Credemelo, morosi, amor xe mato,  
 Mato e baron, e 'l provo co l' efeto,  
 Chi el lo fa innamorar in t' un rizzeto,  
 Ch' in t' una boca, chi in t' un sen intato,

Chi in do occhi, o in do cegie, o in t' un bel trato  
 Chi in t' un pie, o in t' una man, chi in t' un  
 E mi, ridè, sto mato maledeto (naseto)  
 Innamorar in t' una coa el m' à fato.

E co el me pol catar sto buzaevia  
 El me cazza in ti occhi quella coa,  
 El me varda, e po el ride, e 'l volta via.

Mi go una stizza co quel bardasson,  
 Che se 'l posso becar in vita soa  
 No l' à bu el più potente stramuson.

## XLVIII.

No stè a fidarve, corè via, fradei,  
 Che xe ben fortunà chi pol scampar,  
 No ve lassè da Nina inzinganar  
 A dar 'na pura ochiada ai so cavei.

Quel so biondo, quel grespo, i rizzi, i anei,  
 No i xe no quel che ai vostri occhi i ve par,  
 Credelo a mi, che 'l m' à tocà a provar,  
 I xe foghi, i xe stizzi boni e bei.

Tuto xe bampe, ardor, fiamme, colori,  
 Che impizza e brusa senza compassion,  
 Che distrugge e consuma anime e cuori;

E se no basta a farve scampar via,  
 Sapiè che in mezzo a quel grant ogaron  
 La go catà in amor sempre impetria.

## XLIX.

No per veder fra 'l strepito marzial  
 De canoni e de bombe a la marina  
 El trionfo magnifico naval  
 Che ancuo ti fa bela del mar regina;

No per veder la toa regia ducal,  
 Che ancuo dà idea de la maestà latina,  
 O 'l potente richissimo arsenal  
 De la to libertà guardia divina;

Ma per veder in pompa anca Nineta  
 Andar drio scorsizando al Bucintoro  
 Bela e superba in qualche gondoleta,

E farne parer tuto una facezia  
 A fronte dei so rari cavei d' oro,  
 Per questo esser vorave ancno a Venezia.

## L.

Se a sta drezza, cressua per tormentarme,  
 El di iutiero pensando e peno e ranco,  
 La me lassasse, co xe note almanco,  
 Qualche per d' ore quieto riposarme;

Ma o che smanio, o che tendo a remenarme  
 Ora sul braccio dreto, ora sul zanco,  
 O che se dormo, tac, a muso franco  
 La coa de sbalzo i soni a disturbarme.

Quante volte de lagreme bombà  
 Tuto ò catà el cussin! Oh Dio co spesso  
 In ato de cigar m' ò desmissià!

Per sbrio, che co me meto a far riflesso.  
 Al mio stato, e a sta coa senza pietà,  
 Pecà proprio me fazzo mi a mi stesso.

## LI.

Xe tanto mai che penso per trovar  
 Se ghe fusse qualcosa su sto mondo,  
 Che dei cavei de Nina al raro biondo  
 Col so color podesse somegiar.

Lassa pur far a mi a fantasticar,  
 E a farghe proprio su studio profondo,  
 E pur co tuto questo, no me scondo,  
 Mi no ghe l'ò savesta mai catar.

Me par ogni confronto assae lontan,  
 Vedo che l'oro e l'ambra no ghe pol,  
 Nè ga guente a che far pagia e zafran ;

Vago più avanti, e a paragon ghe meto  
 I luminosi e bei raggi del sol,  
 E anca quei me par che i sia pocheto.

## LII.

La lana d'oro de quel bel molton  
 Che un dì à podesto meter al gran ponto  
 Tanti principi greci co Giason  
 De navegar i primi l'Elesponto ;

La piovà d'oro che à covertò e sconto  
 Giove nel torse la sodisfazion  
 Co Danae, nonostante 'l gran afronto  
 D'averghela serà in t'una preson ;

L'acqua d'oro del Gange, i pomi d'oro,  
 E de Cidipe e de Atalanta : e quei  
 Custodi del dragon come un tesoro ;

Tuto questo xe apena una figura  
 Del color raro dei to bei cavei,  
 Un' idea scarsa e flossa, un' ombra pura.

## LIII.

Se Mida, quel notissimo minchion  
 Che à pregà Baco per el so malan  
 Che tuto quel che 'l toca ( oh avaro can ! )  
 Ghe diventasse d'oro in t'un supion,

Come l' a bu la gran sodisfazion  
 Infina de scambiarse in oro el pan,  
 Tocà i cavei el t'avesse co le man,  
 Deventai i saria in bota de oro bon.

Credistu mo però, co tuto che  
 I fusse d'oro bon, che tanto bei,  
 Che tanto rari i fusse come i xe ?

No : questo xe 'l so bel, la rarità,  
 Che i par oro, e 'l xe 'l biondo dei cavei,  
 Che i xe cavei, ma i par oro filà.

## LIV.

Co se vede cavei desparechiai,  
 Butai zo per le spale e per el muso,  
 Senza manteca, senza polver suso,  
 Se ghe dise cavei da spiritai ;

Ma i toi, Nina, quantunque sgrendenai,  
 Ingrintai, trati là tuti in confuso,  
 Come che de portarli ti ga l'uso  
 I par sempre beloni più che mai.

E come che i xe bei de so natura,  
 Giusto quela tal qual trascuratezza,  
 Quel disordine e quela sprezzatura

Fa veder quanta xe la so bellezza,  
 E senza agiuti d'arte, o càrgadnra  
 Fa spicar tanto più la so biondezza.

## LV.

La bela grazia che à buo el Zapi un di  
De poder veder el museo d' amor,  
S' à degnà amor de farmela anca a mi,  
E so restà de sasso per stupor,

Quanto dise aver visto quel autor  
Xe tuto tuto vero, siori sì,  
E tuto quel che 'l conta e che 'l discor,  
Lo go catà, e 'l go visto, e 'l xe cussi.

Na sola cossa go trovà de più ;  
E xe una nichia tuta tempesta  
De brili e perle co un gran specchio su :

*Cossa à da starghe, amor? gh' ò domandà :  
-- Quela gran drezza, m' à ri-posto lu,  
Che tanto onor a tuti do ne fa.*

## LVI.

Da quei cavei che, benchè bei, sassina,  
Da dove vive bronze e bampe fioca,  
De insidie e tradimenti nido e mina,  
Da dove amor le so saete scoca,

Cava via quella pura colombina  
Che quel ramo d' olivo porta in boca.  
Se pol mo dar malizia, arte più fina,  
Per trapolar la grama zente gnoca?

L' olivo e la colomba, che xe un pegno  
De bela pase, come a quei cavei  
Se pol confar, se i m' à ferio a sto segno?

Cruda Nina, piuttosto frèzze, spei  
Impianteghe de guera in contrasegno,  
Rede, stili, caene e trabuchei.

## LVII.

Vedo in quel camarin, dove a conzar  
Ti te va, Nina, un gropo de amoreti  
Svolar, che 'l par un schiapo de oseleti,  
E fra mi digo : cossa vai mo a far?

Intro, e li vedo persi a rancurar,  
Atenti che mai più, fin i pezzeti  
Dei biondissimi to bei caveleti,  
Che sparpagnai per tera i sa catar ;

E po, invece de corde, armar de quei  
Vedo ognun el so archeto per ferir  
Chi ghe capita, e farghene sbrinfei.

Mi che ò provà el valor dei to cavei  
Go credesto deposta de morir  
Da la paura de quei beconei.

## LVIII.

In quel che un bocoleto destacava  
Un di la Nina da un roser vien ponta  
In t' un deeto de una man da un' ava,  
Che per suzzarlo se ghe gera sconta.

Co la ga ben sentio che ghe brusava,  
Inver mi, *ohi ! ohi !* cigando, la cor pronta,  
E mentre 'l deo de lagreme la lava,  
Del becon e de l' ava la me conta.

*Ma quel, la dise, che stupir me fa  
'Xe questo, che culia co la so coa,  
E no col besevegio m' à becà.*

*Che maravegie ! gh' ò rìsposto mi ;  
No ti m' à becà el cuor ti cola toa ?  
No ti me 'l bechi tuto el santo di ?*

## LIX.

No che genio no 'l xe, nè simpatia  
 Sto gran trasporto, sta passion che sento,  
 No, no xe natural sto gran tormento;  
 Per mi la go per una strigaria.

Certo qualche vecchiezza maledia,  
 Qualcosa in quella coa ga ficà drento,  
 No ve dirò se sughi o pur unguento,  
 Ma certo qualche gran ribaldaria.

In tel darghe la sola prima ochiada,  
 M'ò sentio strascinar a innamorarme:  
 Eh sì che za la gera faturada!

E se la xe cussì, cossa òi da farne?  
 Chi mai me insegna per pietà la strada  
 Da sto strighezzo, o Dio! per liberarme?

## LX.

Berenice, per quanto go sentio,  
 A la mare d'amor s'avea invodà,  
 Se vincitor tornava so mario,  
 De tagiarse la coa tanto stimà.

Otenuda la grazia, el zorno drio  
 A desfar el so voto essendo andà,  
 A l'altar de la dea tuto fornio  
 I so rari cavei la ga tacà.

El dì dopo no s'è trovà più coa...  
 Bela per sbrio! Credeu che no capissa?  
 Venere se la ga zontà a la soa.

Vardite, Nina mia, tientela fissa,  
 Che no ghe fazza voglia anca la toa,  
 Che fa el solo timor che sgangolissa.

## LXI.

Per solevarme el cuor, per respirar  
 In salvo e soto un cielo più seren,  
 Dove Apolo e le muse se tratien  
 Me vago qualche volta a rampegar.

Spassizo quei boschetti, e per sorar  
 Canto, quando più pianzer me convien,  
 E co quele ragazze, o mal o ben,  
 Me provo anca la boca de strazzar.

Ma però fuma e frize la ferìa,  
 Ma i tormenti però no me sbandona,  
 Ma no me lassa la malinconia;

Che vien fina lassù a perseguitarne  
 Una coa temeraria, bardassona,  
 E gnanca in quei sagrai posso salvarme.

## LXII.

Cavei, che 'l sapia mi, lengua no ga;  
 Pur ga i toi de parlarme la virtù,  
 E mi i sento, e i capisso, e contar su  
 Te vogio i discorseti che i me fa.

Al cuor disendo tuto el dì i me va:  
 Cossa sa far Idio vardelo in nui,  
 Che per farte svolar in braccio a lu,  
 In sta testa per questo el n'è impiantà;

Nu podemo deposta darte man,  
 Se ti à giudizio e ti ne sa capir,  
 A trarte de sta tera dal paltan.

Anca el resto voria farte sentir,  
 Ma le xe cosse che ogni lavro uman  
 La via no càta de tornarle a dir.

## LXIII.

Quanti lezendo ste composizion ;  
Dove espressa la minima se vede  
Parte de la mia barbara passion,  
No sa proprio ridurse a darne fede !

Chi le chiama un caprizio e un' invenzion,  
Chi dise che 'l probabile le ecede,  
Chi da mato me trata o da cordon,  
Chi tanto rari sti cavei no crede.

Se me stimè capace de mentir,  
Andè prima e vardè quei fili d' oro,  
E po sto cuor, e po sapieme dir.

Dirè allora, che poco è quel che ò scritto,  
Che la materia supara el lavoro,  
Che so da compatir se me son frito.

## LXIV.

Come in virtù dei soli so cavei,  
Che le forze ghe dava e le fierezze,  
Sanson ga fato quele gran prodezze  
Del tempio, del porton, dei Filistei,

Cussi in virtù de le so sole drezze,  
No del so viso o dei so ochietti bai,  
M' à vinto Nina, e adesso in pianti e oimei  
Me tien sepolto vivo e in amarezze.

Ma po tosar co s' à lassà el minchion,  
De forze e fià no gh' è restà baveta,  
Da guente in soma no 'l xe stà più bon.

Squasi vorave farghe anca a Nineta  
Quel che ga fato Dalila a Sanson ;  
Ma oh ! quanto pianzaria po sta vendeta !

*Racc. Poes. Ven.*

## LXV.

Se a forza de fiabete e 'de invenzion,  
De ladreture e astronomica destrezza,  
Tra le stae del ciel ficar la drezza  
De Berenice ga savà Conon.

Ah ! perchè anca mi mai no songio bon  
De far la toa saltar in tanta altezza,  
Che per la sorprendente so belezza  
De pretenderlo ga ben più rason ?

Certo e sicuro, Nina mia, sarave,  
Che ogni pianeta, che qualunque stela  
El so posto lassù ghe cedareve ;

E che manco lusente e manco bela  
Quela de Berenice pararave  
A la comparsa de sta coa novela.

## LXVI.

Cazzime fra quei poveri giazai,  
Dove 'l gran fredo i mari inzepa e ingoa,  
Metime fra quei grami cusinal,  
Dove l' ardente sol più scota e broa ;

Fame 'l più disperà fra i disperai,  
Opur che fra i zechini sguazza e noa,  
Succeda quel che pol succeder mai,  
Mi mai me scordarò de la to coa.

Ti vedarà coi lovi insieme i agnei  
Pascolar, e col gato el can zogar,  
Per aria i pesci, e andar per acqua i osei

Dal cielo fiocar so la neve mora,  
Bagnar el fogo, e 'l sol l' acqua sugar,  
Prima che me la scorda, e no la adora.

## LXVII.

Ingordi marineri e negozianti,  
 Che per oro andè a farve sacagnar  
 Fin a l' Indie e al Perù senza stimar  
 Pericoli e suori, Dio sa quanti!

A rischio de restar tra scogi franti,  
 Che in la so panza ve ingiotissa el mar,  
 Da orche e balene farve mastruzzar,  
 Come se sente a dir de tanti e tanti;

No andè no là in quei grebani a cazzarve,  
 Corè da la mià Nina, che natura  
 Ghe n' à regalà tanto da saziarve:

E confessar lassarò dopo a vu,  
 Se come quel che à in testa sta creatura;  
 Ghe n' à gnanca, per sbrio, l' Indie e 'l Perù.

## LXVIII.

Zentili ventesei, placide ariete,  
 Che dolcemente insieme zogolando,  
 Del ciel per i canali andè nuando  
 Co quele lisierissime penete;

Se andarve tra le drezze morbidete  
 E i cavei grespi del mio ben cazzando  
 Xe 'l vostro gusto e bagolo più grandò,  
 E far là scondarijole e furlanete;

Quel invidioso crudo *Dove-seu*,  
 Che indrio ve tien, nè lassa che passò,  
 Ma come, come in pase el soporteu?

El me tol anca a mi la dolce vista...  
 Ah! cazzè fora quanto fiù gavè,  
 E quel cagnon supielo via per crista.

## LXIX.

Quel oro che a indorar ti à doparà  
 Sti cavei che 'l mio cuor tien a caena,  
 Ma da quala miniera e da che vena,  
 Natura, el gastu mai tolto e scavà?

Gavaressistu forsi destilà  
 L' ambre, i zafrani e del Perù l' arena?  
 Ma quel biondo no xe cossa terena,  
 E solo in ciel ti 'l pol aver catà!

E come gastu mai dà quel gagiardo  
 Lustro e splendor, natura benedeta,  
 Che sti ochi me imbarbagia co li vardo?

Ah! sicuro una parte dei so bèi  
 Ragi ti à robà al sol, e po a Nineta  
 Ti ghe li à messi in testa per cavei!

## LXX.

Dove 'l pra xe più verde e più fiorio,  
 E dove xe più folta l' erbesina  
 Se sconde 'l bisso tuto irizzolio,  
 E guai chi 'l zapa, e chi se ghe avvicina!

Co l' arte istessa amor frasca, muzzina,  
 Per no esser visto a far de nu desio,  
 In mezzo a la to chioma folta e fina  
 Sta sconto e quachio zo come un conio.

Gramo quel cuor che varda quei cavei!  
 Te lo sbasisse amor a l' improvviso.  
 E ghe ne fa, come del mio, mazzei.

Ve sia de specchio la mia sorte acerba,  
 Cuori incauti, e acetè sto bon aviso:  
*Latet, vardeve ben, anguis in herba.*



## LXXI.

O d' Egitto piramide famose,  
 O gran sepolcro da Artemisia alzá,  
 O bel tempio da Erostrato brusà,  
 O del re Ciro case deliziose,

O muragie de Menfi portentose,  
 O colosso del sol sproposità,  
 O simulacro a Giove dedicà,  
 Del mondo rarità maravegiöse!

Vu sete sole fin adesso, è vero,  
 Per tanti e tanti secoli, le cegie  
 Gavè fato inarcar al mondo intiero;

Ma chi vede sta coa, la chiamà ancuo  
 La maravegia de le maravegie,  
 E no i ve conta più gnanca un stranuo.

## LXXII.

Nina, dal caldo no se pol più star,  
 Se va tuti in suor, son sobogio.  
 Vustu che in bateleto andemo a Lio  
 A chiapar aria un poco e respirar?

Andemo. Oh quante mai che à da restar  
 Le fie del mar vedendote, ben mio!  
 Sbalzarà fora tute a gara, e un nio  
 Le te vegnerà tute atorno a far.

Ele che à fato tanta amirazion  
 Per l' onde soe mai prima navegae  
 Vedendo el velo d' oro de Giasen,

Pensa, vedendo i to cavei, che assae  
 Più de quello xe biondi e par più bon,  
 Se le ga da restar maravegiæ!

## LXXIII.

Sior no che Ovidio nò xe un busiaron,  
 Nè gnanca Plauto, come i vien stimà:  
 Pur tropo dei cavei fadai se dà,  
 E no le xe, sior no, fiabe o invenzion:

Sarà, che la muger d' Anfitrion  
 A Pterelao ghe n' abia uno tagià,  
 Sarà, che Sila per amor cavà  
 Ghe n' abia un altro a Niso de scondori:

El sarà stà pur tropo, e adesso el creò,  
 Benchè stentasse a crederghè anca mi,  
 Che a miera in testa a Nina ghe ne vèdo:

Che per averli apena un dì vardai,  
 Fazzo vite da can fin da quel dì.  
 Vardè se no se dà cavei fadai!

## LXXIV.

Che sempre a quei cavei, crudo pensier,  
 Ti m' abi, e a quella coa da strascinar?  
 Che far no ti me fazzi altro mistier?  
 Che no ti te ghe possi destacar?

Fusse da dir, che là qualche piacer,  
 Qualche solievo ti me fa catar!  
 Ma invece, oh Dio, de farse più lisier,  
 Più greve anzi diventa el mio penar!

Pensier, che ti m' à tanto desconio,  
 Lassime aver un pochettin de pase,  
 Te lo domando per l' amor de Dio.

Menime dove più te par e piase,  
 Te vegnarò contento sempre drio,  
 Ma là no, perchè là son su le brase.

## LXXV.

Come che fa la sompia pavegiola  
In quele gran caldane de l'istà,  
Che se la vede mai lume ispiassà  
Atorno in bota la ghe core e svola,

E ghe fa quella bampa tanto gola,  
E tanto mai darente la ghe va,  
Che un' aleta, o un penia resta scotà,  
E ne guanca per questo la ghe mola;

La va, la vien, la noga atorno via,  
E aira, e dai, la torna a darghe drento,  
E infin po la ghe resta inceneria;

L'istesso fazzo mi, te lo confesso,  
Atorno a la to drezza, onde argomento  
Che anca el mio fin un dì sarà l'istesso.

## LXXVI.

Cossa xe amor? Un caro fantolin,  
Tuto graziete, un dio fra i dei el maggior,  
El ristoro del mondo, un don divin,  
De le delizie e dei piaceri el fior;

De tuti i cuori el refrigerio, e infin  
El somio d'ogni ben, anzi el saor....  
Questo xe amor? Questo? Oh poter de din!  
Oh! no, ve 'l dirò mi cosa xe amor.

Un suplizio, un martirio, un crucio, un can;  
Una vil frasca, un disonor dei dei,  
'Na furia, un sanguinario, un fier tiran,

Un furor, un velen, un che à savesto  
Tirarme co una drezza de cavei  
Sempre a morir vivendo: amor xe questo.

## LXXVII.

Certe burlete co me vien in mente  
Fate, e non poche no, per farse strada  
A dar in libertà qualche sorada  
Zo in tera dal gran Giove onipotente;

E quella po de Danae specialmente,  
Che dal pare ispaurio, benchè inchiovada  
In t'una tore, el ghe la ga ficada  
Trasformà in piovà d'oro astutamente;

Un gran dubio me nasce in cuor, Nineta,  
Che dei toi cavei biondi el bel tesoro  
Esser possa qualche altra so burleta.

De fato, se da move el re dei Dei  
Volesse trasformarse in piovà d'oro,  
Che oro più bel de quel dei to cavei?

## LXXVIII.

Ogni animal de la difesa soa  
Xe sta fermò, co l'esser Dio ga dà,  
Chi peada, chi sgulisa, e chi se snoa,  
E chi ongie, o sgrinfe, o corni, o denti ga;

Chi core o salta, chi svolazza, o moa,  
A l'omo de giudizio el ga dà un fià,  
(E mi anca lo go perso a causa toa)  
E a la dona belezza el ga donà.

Bel color quella à bu, questa occhi bei,  
Chi bel sen, chi bel lavro de coral,  
E ti? e ti quei bellissimi cavei.

E ti, ingrata, a sta schienza de favor  
Ti te ne servi nome a far del mal,  
Come ti à fato co sto gramo cuor.

## LXXIX.

Nineta bela da mi tanto amà  
 Quei to biondi cavei desfime fora,  
 No me far più penar, lassa che un fià  
 Sti occhi se desfama e se ristora.

Quela nuvola d'oro sparpagnà  
 Su quele carne, oh Dio! che ve inamora!  
 Oh spettacolo! oh scena che al cuor va,  
 E me lo buta tuto soto sora!

Ah! loga, loga via quei cavei biondi,  
 Che no posso star saldo a sta batuda,  
 Basta, Nineta, basta, scondi, scondi.

Ah! che i xe tropo bei! Tropo el diletto  
 Xe che sente sto cuor! Vardime, cruda,  
 No ghe resisto più, vago in broeto.

## LXXX.

Co morirò, che tropo za durar  
 No posso a sta gran furia de flagei,  
 Se de un' orsa latà no t'è i caviei,  
 O pena, o compassion ti à da provar;

Se mai ti ti arivessi a despianar  
 Anca un solo dei to biondi cavei,  
 Te suplico, e no bramo altri trofei,  
 Famelò sul sepolcro conzagnar.

E po faghe da qualche omo pietoso  
 Scriver soto cussì: *Boni viandanti,*  
*HAC IACET un povero moroso;*

*Una coa l'è mazsà, la pietà vostra  
 Suplica el gramo d'un pio REQUIE, e avanti  
 De dirghe: Oh che minchion! vardè sta mostra.*

## LXXXI.

Bisogna ai frati infin darghe rason,  
 Se tanto i bate saldo, e tanto i ciga,  
 Se a consegnarne tanto i se sfadiga,  
 Che schivemo la prossima ocasion.

Benchè no se ghe fazzà riflession,  
 Questa xe la magior nostra nemiga,  
 E facilmente ne la colpa antiga  
 La ne fa recascar de rebalton.

In mi steso la provo chiara e schieta;  
 La causa che m'è fato scapuzzar  
 Xe sta aver visto i to cavei, Nineta;

E ogni qual volta mi li torno a ochiar,  
 Ecola la ocasion stramaledeta;  
 Per cussì dir me torno a inamarar.

## LXXXII.

Bel veder Nina che in zardin spassiza  
 E al sol dei cavei sciolti pompa fa,  
 Che movendose par che i ghe lampiza:  
 Tanto cresce quel bel lustro che i ga!

Par la so testa un campo a mezzo istà  
 Che tuto pien de spighe al sol biondiza,  
 Che se d'arieta gh'è una bava, un fià,  
 De posta come 'l mar par che le ondiza,

Ma più bel veder quel che mi go visto,  
 Tante volte l'istesso sol restar,  
 E in fazzà stramurtirseghe e confonderse,

E come vinto vergognoso e tristo,  
 A paragon per no poderghè star,  
 Fra le nuvole in pressa andar a sconderse.

## LXXXIII.

Mi no so cossa dir, xe qualche zorno  
 Che la testa me par un molinelo,  
 Me par aver in peto el Mongibelo,  
 La carne infin me sbregaria d' atorno.

No son più del mio umor, no penso un corno  
 Nè a beber nè a magnar, e za a bel belo,  
 Questa la vedarè, perdo el cervelo;  
 Tropo cambia me sento, e tropo storno.

Se me nascesse mai sto caso grande,  
 E me 'l volessi, amici, riscatar,  
 Come 'l pietoso Astolfo quel d' Orlando;

De catarlo su in ciel no ve aspetè;  
 Senza ipogrifo e senza gran viagiàr  
 Fra le drezze de Nina el trovarè.

## LXXXIV.

Trasportà dal pensier, che sempre tristo  
 No pol za partorir che bruti intrighi,  
 Me son catà, nè certo go stravisto,  
 De l' Inferno tra i oridi castighi.

Gran Dio, che tananai! Gran Dio, che misto  
 De lamenti, de pianti, de urli e cigghi!  
 Furie, diavoli, strighe, orchì go visto,  
 De solfor sbampolae, fumi, calighi.

Vistq un loghèto come xe una stir,  
 Go domandà: « Chi à da vegnirghe a star?  
 -- Unà superba se no la se mua. »

A sta risposta cussì brusca e acerba  
 Per ti m' ò sentio, Nina, el cuor tremar,  
 Che quela coa te fa tanto superba.

## LXXXV.

Fra vu xe stà dove la prima volta,  
 Cari boscheti, vaghi montesei,  
 Gò visto quela bionda drezza sciolta,  
 Straluser e ondizzar quei bei cavei;

Fra vu xe stà dove me xe stà tolta  
 Del cuor la pase, dove zorni bei  
 Go fenio de gustar, dove rivolta  
 Se xe ogni mia alegrezza in piangistei.

Boscheti, montesei, che alora geri  
 L' idolo mio, che me parevi tanti  
 Nii de delizie, fonti de piaceri,

Senza Nina me par, oh Dio, che tuti  
 Me fè rechiamo al sangiotar e ai pianti,  
 E che siè diventai deformi e bruti.

## LXXXVI.

Per menar via Despina in compagnia  
 Del so fido Ruger, da quel castelo  
 Dove che i la tegniva custodia,  
 Lirina s' à pensà un ripiego belo.

Fato de la so drezza un cordoncèlo  
 Da poder po servirsene de bria,  
 La l' à ispirà nel beco al gran oselo  
 Rufanon de la striga Arjmodia;

Imbria su cussì co quela coa,  
 La ga fato po far co gran stupor  
 Tuto quel che saltà gh' è in testa soa.

Quel che Lirina de l' oselo à fato,  
 Adesso co la toa de mi el fa amor,  
 Che m' ò lassà ispirar proprio da mato.

## LXXXVII.

Là do e tre volte bona antichità,  
 : Priva dei lumi che gavemo nu,  
 Orba e superstiziosa che mai più,  
 Che diavolezzi che la ga adorà!

A sassi e piante altari la ga alzà,  
 Pianeti e bestie infin incensi à bu,  
 Cussi che po pensandoghe ben su  
 Anca Tulio s'avea descordonà.

Se in quei tempi la Nina comparìa,  
 I ghe adorava certo la so chioma,  
 E l'gera squasi manco mal per dia.

E forsi a gloria dei so bei cavei  
 Se vedarave ancora in Grecia o in Roma,  
 Circhi, guglie, obelischì, archi e trofeti.

## LXXXVIII.

Proprio su l' Azio mar 'na certa croda  
 Da un monte de Leucadia sporze in fora,  
 Che chi se buta zo, invece che'l mora,  
 D'ogni amor se desmentega e se svoda.

E lontàn gnanca da de là mezz'ora  
 Gh'è un flumeselo, che chi al sol se invoda,  
 E in quel' acqua tre volte a luna voda  
 Soto e sora va e vien, se desnamora.

Ga provà el flumeselo Deucalion,  
 Sato la croda, e gh'è passà ogni ardor,  
 Quel Pira s' à scordà, questa Faon.

Se credesse anca mi poder rivar  
 Sta coa a scordarme, e cazzar via sto amor  
 Mi sto viazeto lo voràve far.

## LXXXIX.

Per guarir dal più fisso e saldo afeto  
 Sugerisce Nason, mestro d'amor,  
 De studiar se gh'è gnente de imperfeto  
 In quella parte che ne tra più el euor.

Sarà un ano per dia, che mi a sto ogeto  
 Studio e contemplo col più gran rigor  
 De catar fora pur qualche difeto  
 In sta coa che me tien schiavo d'amor.

Cossa oi vanzà? Che a forza de studiar  
 Go scaturio de l'altre qualità,  
 Che sempre più m' à fato inamorar.

De meglio da insegnar co no ti ga,  
 Caro Nason, ti te pol giusto andar  
 A farte ben . . . Ti ti me intendi za.

## XC.

Sentio che tute al campo za scavezze  
 Gera dei archi le corde, o rosegà,  
 Nè i marii sgiaventar podea più frezze  
 Per salvar la romana libertà;

Senza riguardi a dessipar belezze,  
 Le muger generose, disperà,  
 Tute zo intiere s' à tosa le drezze,  
 E fate in corde le ghe l' à mandà.

De quele drezze è stà tuta la gloria,  
 Tuta prodezza, e tuta virtù soa  
 Se i romani à cantà quella vittoria.

E se anca Nina l' arco al Dio d'amor  
 No la gavesse armà co la so coa,  
 Forsi de mi no el gera vincitor.

## XCI.

Senti, Nina, che sogno traditor :  
 Za dormiva, ma d' esser me pareva  
 In certi loghi che no ghe n' ò idea,  
 E in quel che i vardo comparisce amor.

Ti te pol figurar el mio stupor ;  
 La to coa el gavea in man, o la pareva,  
 Tanto la gera longa, e la sbandea  
 Tanto come la toa lustro e splendor.

Ghe vago incontro alegro che mai più,  
 E co son per basarla e torla in mau,  
 Lu core via, e mi coro drio de lu.

E cori e cori, infin mi son cascà,  
 E dal colpo e dal rider de quel can  
 Me son col fiel sui lavri desmissià.

## XCII.

Quel zorno me sovien, che ti è vegnua  
 In mascara co mi da povareta,  
 Co quella ciera palida e svegnua,  
 Tuta sbrindoli el busto e la carpeta.

Quanto incontrava quella to grazietta!  
 Quel bel fareto, quel andar da pua!  
 E quei to bei cavei, quanto, Nineta,  
 Pareva bon sparsi su la carne nua!

E, oh quanti che in quel zorno ò sentio mi,  
 De dirte invece: « El cielo ve proveda, »  
 O farte carità, dirte cussi:

« Scondève, mascareta, i cavei d' oro  
 Se povara volè che se ve creda.  
 Andè cercando, e ne mostrè un tesoro? »

## XCIII.

Quei cavei foli e quelle inanella,  
 E sora ogni uman creder, drezze bionde,  
 Xe un lamberinto, e amor senza pietà  
 Ga messo trabuchèi, buse profonde;

I so anei xe le volte intortigià,  
 Che intriga e sempre più la porta sconde;  
 E 'l grespo xe le strade incatigia,  
 Che ve fa andar più a torzio e ve confonde.

Gramo chi gh' intra per la so malora  
 O no vogiando, opur per tradimento!  
 Che no 'l se spera de tornar più fora.

No gh'è gemi d' Ariana che lo scorta;  
 Fatalmente el mio cuor ghe xe intrà drento,  
 E per scampar no l' à catà più porta.

## XCIV.

Su le to drezze in stil serio elegante  
 Ti vol, Nina, che canta rime novè?  
 Strussiarò, ma de bando; nonostante  
 Vogio ubidirte, e varda: a mi, a le prove:

Sciolto in aurato nembo il sommo Giove,  
 Onde fruir la mal celata amante,  
 Contende, o donna, invan con quel che piove  
 Vivo fulgor dalle tue trecce sante;

Invan occhio mortal, e invan agogna  
 La macra invidia co l' artiglio aguzzo...  
 A ti! qua no me vien la rima in ognà.

Credime in soma son da compatir,  
 No 'l xe 'l mio natural, casco, scapuzzo,  
 E no te posso, Nina mia, servir.

## XCV.

Cossa credistu, di, note invidiosa,  
 Che perchè ti vien tuta inuolia,  
 Tuta coverta, tuta tenebrosa,  
 Senza gnanca una stela in compagnia,

Che lassarò de andar da la morosa?  
 Che vorò de mi farghe carestia?  
 Che starà in strope st' anima golosa?  
 Cascasse 'l mondo, vogio andar, perdia.

De no poderla veder no go pena,  
 Che me basta per vederla el lusor  
 Che sul balcon coi so cavel la mena.

Lusor che xe del too molto più forte  
 Quando serena ti fa el bel' umor,  
 E de stele un milion te fa la corte.

## XCVI.

De le barbare Belidi i crivei,  
 La roda del sacrilego Ission,  
 L'oselo che da Tizio va a bocon,  
 E de Tantalo l'acqua e i pomi bei;

Tuti i castighi infin, tuti i mazzei,  
 Che zo a l' inferno prova ogni baron,  
 L' inferno istesso, senza adulazion,  
 Me par proprio robetè da putei.

Zogatoli i me par, minchionarie,  
 Confrontà co l' inferno che go drento,  
 Coi mii tormenti, co le pene mie.

Crudo inferno in mi avertò da una drezza  
 Bela sì, ma crudel, e che un mumento  
 No me lassa de pase e contentezza.

*Racc. Poes. Ven.*

## XCVII.

In tel so zendaleto stropà su,  
 Per goder megio la so libertà,  
 A Nina un zorno in testa gh'è vegnù  
 De spassizar co mi per la cità.

Tuti che caminava drio de nu,  
 E i ghe vedeva fora del zendà  
 De coa avanzarghe un braccio e mezzo e più,  
 I restava, perdia, morti, incantà.

Chi diseva: *Gran coa, che quella xe!*  
*Varda co bionda!* chi diseva: e chi:  
*Quela sì xe una coa degna de re!*

Mi che sentiva tuti a dir cussì,  
 Se 'l cuor se me sgionfava in sen pensè!  
 Oh gera per andar fora de mi!

## XCVIII.

Eh che no serve no che ti te scondi,  
 Che ti fazzi baosete e ziravolta;  
 Eh, cara, te conosso a la coa sciolta,  
 A quei rizzeti, ai caveleti biondi.

Benchè ti tol le tracie, e ti confondi  
 In quele strigarie cussì revolta,  
 Che drento ti ghe par squasi sepolta,  
 El cuor à sentio l' usma, e xe andà al fondi.

Come mai vustu che no te conossa?  
 Tropo quei to cavei m'è restà impressi,  
 Nè gh'è cavei che somegiar ghe possa;

E ò dito tra de mi: *Cavei, cavei,*  
*Se no fussi de Nina no saressi*  
*Nè cussì longhi, nè a sto segno bei!*

22

## XCIX.

Che i to cavei m'ha incaenà su, e ben streto,  
 Ti 'l conosci anca ti, per questo nua  
 De compassion, per quanto pena e sua,  
 De bagolo te servo e de zoghetto.

Ma el tempo che a nissun porta rispetto  
 Passa, e passando tuto el cambia e 'l mua,  
 E ti te vedarà tuta canua  
 Deventar presto a marzo to dispeto.

Umile e mansueta allora ti  
 Ti vegnarà a cercar quela pietà  
 Che adesso cerco, e ti ti neghi a mi;

E mi superbo e altiero te dirò  
 Senza gnanca vardarte: *Xe passà*  
*Quel tempo Enea che Dido a te pensò.*

## C.

Per acquistarme forsi gloria un dì,  
 Nina, sti versi no i go scriti, no:  
 Ma de far restar solo tentà go  
 Eterne al mondo le to drezze e ti.

Quanto ò podesto ò certo fato mi,  
 Se ghe sia po riussio mi no 'l dirò;  
 Gradissi almanco el tentativo, e po  
 No me resta a bramar più de cussi

E d' averme anca massa guadagnà,  
 E più che no me merito otegnù,  
 Te zuro, Nina, che me pararà,

Se, lezendoli, mossa da pietà  
 Ti arivi a dir 'na volta, e gnente più:  
*Ti ga molto per mi meschin penà.*

## EPISTOLA A LIDIA (119).

Lidia no star a credere  
 Che in tuto l' universo  
 Ghe sia felice un' anima,  
 Perchè l'è tempo perso.

Ricerca pur, esamina  
 Le condizion i stati,  
 Osserva richi, poveri,  
 Muneghe, preti, e frati:  
 Chi ga el livelo piccolo,  
 Chi povera la cura,  
 Chi scarsa la limosina,  
 Chi streta la clausura.

Chi l' avarizia domina,  
 Chi 'l fasto e l' albasia,  
 Chi invidia, gola, colera,  
 E tuti la pazzia.

Nè credere che i filosofi  
 Sia a meglio condizion,  
 Che la virtù i sa fingere,  
 Ma i sente l' ambizion.

Anzi se go da dirtela,  
 Secondo el mio pensar,  
 Lori vol esser l' idolo,  
 E la virtù l' altar.

Osserva là Diogene  
 Co la so bote arente  
 Che afeta d' esser povero,  
 Per viver da indolente.

E 'l rigido Zenocrate  
 Dirastu che sta ben,  
 Se de la vita el balsemo  
 L' a convertio in velen?

Forsi Epicuro incredulo  
 Merita la to stima?  
 Ah! quel to franco ridere  
 Dise de no a la prima.

Cossa te par de Socrate,  
 Che ne la Grecia tuta  
 L' è andà a cercar la femena  
 La più cativa e brutta?

Forsi da sto filosofo  
 Te par che sarà giusto  
 De tor la vera regola  
 Per viver de bon gusto?



Per altro cossa credistu.  
 Che 'l vincer dei nemici  
 L'esser al mondo celebri  
 Ne possa far felici ?  
 Domandighelo a Cesare,  
 Dimandighe a Scipion,  
 A Alessandro dimandilo,  
 Dimandighe a Caton.  
 A Omero, Esiodo, Pindaro,  
 Virgilio, Ovidio, Orazio,  
 E a tanti che a contarteli  
 Se ne faria un prefazio.  
 Tuti te dirà unanimi  
 Che solo xe beato  
 Quel omo che sa vivere  
 Contento del so stato.  
 Beato chi dal strepito  
 De star lontan procura,  
 E i zorni vede scorere  
 In sen de la natura.  
 Con forza irresistibile  
 Natura parla sciolta,  
 E che sia vero, Lidia,  
 Vustu sentir ? ascolta :  
 Nina gera un' amabile  
 Bonissima putela,  
 E quel che xe rarissimo,  
 Semplice quanto bela.  
 Savia, modesta, docile,  
 Ridente, ma somessa,  
 Che se podea depenzerla  
 Per l'innocenza istessa.  
 Ma i soi, secondo el solito,  
 Per riflessione divote,  
 Voleva farla munega  
 Per sparagnar la dote.  
 Per questo in età tenera  
 I l'ha messa educanda  
 Soto de la degnissima  
 Suor Claudia veneranda.  
 Suor Claudia gera el simbolo  
 De la claustral modestia,  
 Che solo veder omeni  
 La fava andar in bestia.  
 Nè l'ortolan medesimo  
 Podea andarghe davanti  
 Se nol gaveva cotola,  
 Capelo in testa e guanti,

Sogeta a andar in colera  
 Per ipocondria interna,  
 E a bastonar le muneghe  
 Per carità fraterna.  
 Per altro nel so ufizio  
 Poche d'egual ghe gera:  
 Tre volte l'è sta sindica,  
 E quatro canceliera.  
 Soto sta degna munega  
 Nina facea esercizio  
 De ricamar, de cusere  
 E de cantar l'ufizio  
 Atenta a messa e a vesparo,  
 Co l'abadessa canta,  
 Col messal, col turibolo,  
 E a darghe l'acqua santa.  
 Se el vescovo va in visita  
 No ghè la so compagna,  
 Che co una grazia d'anzolo  
 Ghe porta el pandespagna.  
 Ognun per un miracolo  
 L'amira e ghe dà lode,  
 Penseve se suor Claudia  
 Va in estasi e se gode.  
 Nina però ne l'animo  
 Un no so che sentia,  
 Un certo mal de spirito,  
 Una malinconia.  
 Spesso la resta immobile  
 Co la camina l'orto,  
 Ghe casca qualche lagrema  
 Che pur ghe dà conforto.  
 La dise, se me esamino  
 Gnente no me tormenta,  
 So sana, fresca, zovene,  
 Ma pur no so contenta.  
 Mo cossa mai pol essere  
 Che me fa star cussi,  
 Che tuto me fa insipido ?  
 Ah ! no so gnanca mi.  
 Gera za arivà el termine  
 Che i soi gavea deciso  
 De consacrà la vitima  
 Al santo paradiso.  
 So siora mare a vederla  
 Un zorno va in persona,  
 E in modo lusinghevole  
 Sta antifona ghe intona :

Fia mia, tuti dal nascere  
 Vegnimo destinai  
 A viver miserabili  
 E a pianzer dei pecai,  
 El mondo xe un patibolo,  
 Un scogio, un mar profondo,  
 Un laberinto, un vortice :  
 Oh fia ! gran cossa è el mondo,  
 No parlo dei pericoli,  
 Che massima a le pute  
 Pur tropo pol succederghè  
 Per quanto le sia brute.  
 Pericoli nei circoli  
 Pericoli nel zogo,  
 Nel conversar pericoli,  
 Pericoli ogni logo.  
 Chi xe cascà da zovene  
 Da vechie ga l' infamia ;  
 Se a mi no ti vol crederlo,  
 Dimandighe a sior' amia.  
 Cossa diseu suor Claudia ?  
 Quante no se ne sente ?  
 E rispondea suor Claudia ?  
 La parla santamente.  
 Quando mi gera zovene  
 Ste cosse no se usava :  
 Cossa diseu, suor Claudia ?  
 Suor Claudia dise : brava.  
 Ai nostri tempi, viscere,  
 Se usava un' altra via,  
 E rispondea suor Claudia :  
 Brava in coscienza mia.  
 Nissun saveva fingere,  
 Parlava ognun sincero :  
 Cossa disen, suor Claudia ?  
 Suor Claudia dise : è vero.  
 Adesso galantomeni  
 No gh' è se no de nome :  
 Cossa diseu, suor Claudia ?  
 Suor Claudia dise : e come !  
 Beati chi pol scioglierse  
 Da sto tremendo intrigo :  
 E rispondea suor Claudia :  
 Brava ! anca mi ghel digo.  
 Beati quei che al secolo  
 Ghe sa voltar le spale,  
 Per non aver da pianzere,  
 In *lacrymarum vale*.

Felici chi pol vivere  
 In sti beati muri !  
 Qua dai mondani stimoli  
 Se pol ben star sicuri,  
 E za che el ciel determina  
 Per ti sta bela sorte,  
 Fia mia, col cuor, co l' anima  
 Basa ste sante porte.  
 Nineta felicissima  
 Qua drento eternamente ....  
 Nina ? ... Nineta ? ... Ah viscere ! ....  
 Ti caschi in accidente ?  
 Presto, suor Claudia, spirito ....  
 Acqua, cordial, aseo ....  
 Moleghe el busto subito ....  
 Soleghe stretto un deo.  
 Suor Giacomina, suor Anzola,  
 Suor Laura, suor Eleta ....  
 Presto corè a soccorrere  
 La povera Nineta.  
 Suor Prospera, suor Placida  
 Corè co l' acqua fresca ....  
 Oh ! che ste done stolidè  
 No sa quel che le pesca.  
 Vardè che passa el medico,  
 Che l' va da la priora :  
 Presto chiamelo subito  
 Avanti che la mora ....  
 El sior dottor Persemolo  
 Ch' el par el vechio Anchise,  
 Le man prima se sfregola,  
 Ghe tasta el polso, e l' dise :  
 Signora ... ghè pericolo,  
 E ghe dirò che l' mal  
 Nasce .... da certa glandula  
 Chiamada ... *pineal*.  
 Perchè sicome el spirito ...  
 Col sangue se fermenta ....  
 Per mezzo nervi ... e muscoli,  
 E fluidi ... ah, no ... le senta.  
 Sicome el sangue fervido ....  
 Se unisce ne l' aorta ....  
 Ma no ... se el sangue circola  
 Prova che no l' è morta.  
 Per altro ghe pol nascere ....  
 Un ristagno de vasi,  
 Che in greco nu altri medic, i  
 Se sol chiamarghe *stasi*.

Cussì describe Ipcrate  
 Al capitolo quinto ....  
 Da bravo per far pratica  
 Tastela sior Giacinto.  
 Giacinto gera un zovene  
 Scolarò de talento,  
 Che in compagnia per solito  
 Andava anca in convento.  
 Più volte nele visite  
 Nineta l'avea visto,  
 Ma, sempre contro l'ordine  
 Del confessor fra Sisto,  
 Che ghe taroca e predica:  
 Fia mia, nel vostro interno  
 Altro no avè da imprimerve  
 Che paradiso e inferno.

Apena el braccio morbido  
 Coi dei Giacinto toca,  
 Nina un sospiro languido  
 Manda, e un oimè, de boca,  
 Disendo: mama amabile  
 Se volè viva Nina,  
 Fe che lu sia el mio medico,  
 E la mia medicina ....  
 Quel che sia nato in seguito  
 La istoria no dichiara.  
 Lidia rifleti, medita,  
 E se ti pol impara;  
 Impara per to regola  
 Co Nina in testimonio,  
 Che d'ogni ben l'immagine  
 Xe el santo matrimonio.



# POESIE

DI

L O D O V I C O P A S T Ò.

---

LE

## SMANIE DE NINETA

I N M O R T E D E L E S B I N .

*Versi Ditirambici.*

Lesbin, lesbin, tetè,  
Caro! vien qua da mi, vien qua, lesbin ....  
Mo via, Lesbin .... oimè!  
Cossa che gabia ancuo sto bestiolin?  
No l'ò visto mai più cussì svogià ....  
Voleu veder? ... senz' altro el xe amalà.  
E come, le mie viscere!  
'Vardè se 'l cuor ghe palpita!  
Se i so lavreti tremola ....  
Che ochieto turbio e languido ....  
Che pelo dreto e ruvido ....  
Che convulsion .... che spasemo!  
Oe, Checo .... Toni .... Giacomo ....  
Gran servitori perfidi!  
Seu tuti a ca del diamberne? ....

Mo via, malegnasissimo!  
Destrighite, sassin!  
Va là, cori dal medico,  
Dighe che 'l vegna subito  
Che xe amalà Lesbin.  
Intanto ti, Catina,  
Sbati quel stramazeto  
Per farghe el so cuzzeto,  
E dopo va in cucina  
E scanighe un capon,  
Ma varda che 'l sia bon,  
Da farghe del ristoro.  
Te pago un cordon d'oro.  
Se 'l mio Lesbin no mor ....  
-- Mo bravò, ma da seno, el mio dotor!  
Dotor mio la gran disgrazia!  
S' à amalà sto cagnoletto,  
E pur tropo me l' aspeto,  
Che sta volta el morirà ....  
Feghe pur quel che ve comoda,  
Ordineghe a larga ciera;  
Ma nol dura fin sta sera ....  
No, credemelo, dotor ....  
Mo che mana? .... che riobarbaro? ....  
Che gialpa, mo che sena?

Droghe tute che velenà,  
 Che Lesbin no le pol tor ....  
 Cossa xe mo sto clistier ?  
 Voleu dir un servizial ? ...  
 Me faressi vegnir mal  
 Co sti termini da catedra!  
 Olà Toni dal spizier  
 Che 'l te daga sto decoto ....  
 Via, camina, xestu zoto ?  
 Cate, portime el schizzeto ....  
 Gran marmota ! el picoleto ....  
 Quelo, quello, brutto sesto !  
 Ma, protesto, la gran tosse !  
 El gran mal che 'l ga in tel peto !  
 Povereto ....  
 Povereto ....  
 Lesbineto ....  
 Vita mia le gran angosse !  
 Malegnaso spizier ! quanto mai stako  
 A far quel pochetin de decozion ?  
 Checo; cori, va là, movite, palo !  
 Dighe che 'l se destriga quel poltron.  
 Zito, che Toni è quà ...  
 Presto, per carità !  
 Catina, el servizial.  
 Dotor, no ghe fè mal,  
 Meteghene pocheto,  
 Meteghelo adasiato ...  
 -- Sta quieto, vita mia,  
 Che 'l mal te andarà via ...  
 -- Mo bravo ! me contento,  
 Dotor vu se un portento !  
 Co presto, co pulito !  
 Chi l' avaria mai dito ?  
 Oh povera bestiola !  
 Senz' altro el mal ghe mola ....  
 Nol vedo più a missiarse,  
 Nol sento più a lagnarse ;  
 Voi darghe giusto un baso ....  
 Perdia ! .... ghe saria caso !  
 Oh dio che bruti sesti !  
 Catina .... Toni, presti ....  
 Mo via, agiutelo, oh dio !  
 Dotor, per carità !  
 Caro Lesbin, cuor mio,  
 Caro mio dolce amor ....  
 Ah ! che no gh'è più tempo,  
 El mio Lesbin xe morto ...

L'è morto .... sì, l'è morto,  
 L'è morto, sì, dottor.  
 Ah sorte crudelissima !  
 Che colpo xe mai questo !  
 Catina, Toni, presto,  
 Presto che me vien mal ....  
 Cossa .... cossa .... cossa feu !  
 Dove dove lo porten ?  
 Lo voi qua,  
 Lo voi qua ...  
 Olà, puti, abiè giudizio,  
 Che ancuo nasce un precipizio ...  
 Ah ! Lesbin, Lesbin, Lesbin ...  
 Ah ! dottor, dottor sassin ! ....  
 Che prudenza ? .... che rason ? ...  
 Che quietarme ? come mai ?  
 Ah lassè che sto balcon  
 Daga fin a tanti guai ....  
 Via, molè ....  
 Via, molè ....  
 Via, molème .... via, lassè ....  
 Via, molème, maledeto !  
 Borgia can del mio cagneto !  
 Signor sì, l' avè copà ....  
 Ah scusème ....  
 Perdonème ....  
 Compatime, per pietà !  
 No son mi,  
 No son mi,  
 Stè certissimo, dottor,  
 No son mi, xe 'l mio dolor,  
 Che me fa parlar cussi ....  
 Ah sorte crudelissima !  
 Che colpo xe mai questo !  
 Catina, Toni, presto,  
 Presto che me vien mal ....  
 Tegni, tegnime, oh dio !  
 Tegni, tegni, dottor :  
 Lesbin, Lesbin, cuor mio,  
 Mio dol .... mio dol .... ce amor.

## PER UNA CAGNUOLA VECCHIA.

## CANZONE.

Ariana, Ariana, co te vedo, oh dio!  
 Me crepa el cuor in sen,  
 Resto da compassion quasi sbasio!  
 Dove xe andà quel ben,  
 Che ti godevi un dì? povera grama!  
 Ridota s' una strada  
 Da tuti abandonada,  
 No gh'è più chi te varda, chi te brama;  
 Arlevada da dama,  
 Ti ghe supiavi suso ai pastizzeti,  
 E ancuo ti fa le have sui zaleti.

Avezzada a dormir s' un canapè  
 Coerto de persiana,  
 Dove se podaria sentar un re,  
 Ancuo ti fa la nana  
 O su la pagia, o s' un bocon de stiora,  
 In scuderia, in rimessa;  
 O soto la barchessa,  
 E tante tante le gran note ancora  
 Te toca star defora  
 Sul nuo teren coerto de fredura,  
 Perchè no gh'è nissun che te rancura.

Ah! dove è mai quel bravo servitor,  
 Vincenzo dove xelo,  
 Che te tegniva bela quanto un fior?  
 Ti perdi tuto el pelo,  
 Petene no gh'è più, no gh'è bruschin,  
 No gh'è più servitori,  
 Ti sa da mile odori,  
 T'incensi tuto el mondo da freschin ....  
 Malegnaso el destin,  
 Che t'à ridoto d'una bela puta  
 In t'una carogneta che ributa!

Se ti geri un tantin de mal umor,  
 Se un'ongia te doleva,  
 Se impeniva el palazzo de rumor,  
 Subito se coreva  
 A cercar del to mal la medicina;  
 E ancuo, che no gh'è cani  
 Che gabia i to malani,  
 No gh'è più chi te daga un'ochiadina ....  
 Povera bestiolina,

Te sarave passà mai per la testa  
 De perder tanto ben cussi a la presta?  
 Ti geri la delizia del paron,  
 La dama te adorava,  
 E guai a chi t'avesse dà un urton!  
 Tuti te carezzava,  
 Ti geri più stimada d'una zogia,  
 Tuti te gera drio  
 Come la mare al fio,  
 E ancuo no ghe xe un can che più te vogia,  
 Tuti te manda al bogia  
 In compagnia de tuta la to razza,  
 Nè gh'è chi no te oltragia e te strapazza.  
 Che colpa xe la toa? coss' astu fato,  
 Povera disgraziada?  
 Gnente, se dise, sior, ma gnente afato;  
 Vechia son diventada,  
 Piena de dogie e piena de schinele;  
 Questi xe i mi pecai ....  
 Co se xe vechie, guai!  
 Parlo co vu altre done fresche e bele;  
 Godeve pur sorele,  
 Tegnive in bon; ma vegnerà quel dì  
 Che incontrarè la sorte che go mi.

## CANZONETTE.

## I.

Cara Nina, vien qua che te varda ....  
 No t'ò visto mai più tanto bela,  
 Ti xe bianca, ti è grassa, ti è sguarda;  
 Ti xe in soma una rosa, una stela.  
 Mo che drezze più bionde de l'oro:  
 Mo che cegie, mo che archi d'amor!  
 Mo che ochieto, co vivo, co moro!  
 Che bei lavri che brusa ogni cuor!  
 Che dentini del late più bianchi!  
 Che brazzoti, che man, che penin!  
 Mo che colo, che peto, che fianchi!  
 Che grazieta, che brio, che sestin!  
 A le curte, el to esterno xe belo,  
 Ma el to cuor, cara Nina, xe un can;  
 Ti ga un cuor che ga tanto de pelo,  
 Ti ga un cuor indiscreto, inuman.

Ti ga un cuor che no sente pietà  
 De chi tanto te stima e t'adora,  
 De chi tanto te xe innamorà,  
 Che no manca che 'l spira, ch'el mora.  
 Ma la morte per mi saria un miel  
 Se lassasse sto mondo per ti,  
 Perchè forsi in alora, crudel!  
 Ti traessi un sospiro per mi.

## II.

Quando m' insonio  
 De quella bela,  
 De quel' amabile  
 Ortolanela  
 Che vende bocoli,  
 Latughe e brocoli,  
 La trovo docile,  
 La trovo amiga,  
 Par che la spasema,  
 Che la me diga :  
 Per ti soletto  
 Mi sento afeto,  
 E tuta fervida,  
 Tuta tremante,  
 Che la me cocola  
 In quel istante  
 Co certa grazia  
 Che mai no sazia ;  
 Ma quando Fosforo  
 Ne porta el zorno,  
 E che solecito  
 Ghe coro intorno,  
 L' ortolanela  
 No xe più quella.

## III.

No gh'è gnente de più amabile  
 De ti, cara mia Nineta,  
 Ti xe piena de grazietta,  
 Ti xe bela quanto un fior ;  
 No gh'è gnente de più tenero,  
 Cara Nina, del to cuor.

Racc. Poes. Ven.

Ti xe colta, ti xe savia,  
 Ti è impastada de talento,  
 No ti è dona, ti è un portento,  
 Ma de quei che fa stupor ;  
 No gh'è gnente de più fervido,  
 Cara Nina, del to cuor.  
 Ti xe ti la bela gnognola  
 A Minerva tanto afeta,  
 Ti è la sola mia diletta,  
 Ti xe l' unico mio amor ;  
 No gh'è gnente de più candido,  
 Cara Nina, del to cuor.

## CHI A' TEMPO NO ASPETA TEMPO

## APOLOGO.

Un povero vilan,  
 Vedendo che un ricon del so paese  
 Andava ogni qual tratto  
 Per consegì in mezzà d' un avvocato,  
 El dise fra de lu :  
 Che i sia gnanca i consegì che fa richi ?  
 Vo' provar anca mi, voggio un consegio,  
 S' anca lu me costasse el bon e 'l megio.  
 El va donca a la presta  
 Co do grossi dindioni  
 Da un avvocato, ma de quei de testa,  
 Che visti quei bestioni  
 Ghe dise al bon vechieto :  
 Cossa voleu da mi ?  
 El contadin risponde : un consegieto.  
 Un consegio volè ?  
 Soggiunge l' avvocato, e ben .... parlè.  
 Ma, continua el vilan, voggio un consegio,  
 No so po dirve qualo,  
 Ma quel che a vu ve par ...  
 Demelo, via, ch'è vostro sto regalo.  
 -- Son qua, ve servo in bota,  
 Risponde l' avvocato al bon marmota :  
*Chi à tempo vita mia no aspetta tempo.*  
 E in sto mentre el ghe leva da le man  
 I do dindioni al povero vilan,  
 Che tanto lo ringrazia, e volta via  
 Tuto pien de contento e d' alegrìa ;

E arivà a casa el varda el so formento  
 Che no gera ben fato in quel mumento,  
 Ma nonostante lu lo fa tagliar,  
 E i so fioli se taca a biastemar.  
 No i biastema per altro el zorno drio.  
 Che casca un tempeston, ne varda Dio!  
 Anzi i conferma tuti tre d'acordo,  
 Che chi trascura el tempo xe un balordo.

## I TRE SPIANTAI.

## APOLOGO.

Essendo un dì al passeggio in compagnia  
 Un conte, un avvocato e un zogelier,  
 El conte salta su: corpo de dia!  
 Son sempre al can co tuto el gran miq'aver  
 L'avvocato soggiunge: vita mia,  
 Semo compagni; e sì, mi go un mistier  
 Da tesorar; e dise el terzo ancora:  
 Più che guadagno più vago in malora.  
 Cossa che sia sta roba po nol so;  
 Ma qua gh'è sconto certo qualche intrigo,  
 Più che laoro manco mi ghe n'ò,  
 Go manco bezzi più che me sfadigo;  
 Saveu mo, puti, cossa che farò?  
 Quello che consegia'mà un bon amigo:  
 Me portarò doman da fra Vidal,  
 Che per consegi no se dà l'ugual.  
 El conte e l'avvocato salta su:  
 Amigo caro, no ne abandonar,  
 Permeti che vegnimo là anca nu  
 Per veder che 'l ne possa consolar.  
 Andemo in bota, el ghe risponde lu;  
 E tuti tre i se taca a caminar,  
 E in manco d'un'oreta i xe in quel sito  
 Dove ga el so tugurio l'eremito.  
 I bate; e lu risponde: Chi va là?  
 Amici boni, i dise tuti tre:  
 Chi diamberne mai seu? per carità,  
 Soggiunge el frate, presto via, parlè;  
 In breve d'ogni cossa el xe informà,  
 E 'l ghe risponde come sentirè  
 In enigma, perchè cussì l'usava  
 Parlar co tuti quei che 'l conseggiava.

Pronunzia donca el bon servodedio:  
*Per vu sior zogelier ghe vol un legno;*  
 E voltà à l'avvocato: *e a vu, ben mio,*  
*Manco chiacole digo, e più contegno;*  
*E vu, caro el mio sior conte sbasio,*  
*Leveve su a bonora, e ve mantegno*  
*Che se fe talequal sè fortunai,*  
*V'ò dito tuto quanto, adio spiantai.*

El conte, el zogelier e l'avvocato,  
 Senza più bater beco i volta via,  
 Disendo tuti tre: mo che fratao!  
 Mo che tratar xe el soo, sangue de dia!  
 Che bela cossa mai gavemio fato  
 A far cussì a penini quattro mia?  
*Manco chiacole, legno, su a bonora....*  
 Cossa vol dir sta roba in so malora?

Ma l'avvocato a forza de pensar  
 A'capio ch'el remito xe un portento;  
 In renga lu, no fava che sbragiar,  
 Saltando sempre fora d'argomento;  
 Per cossa mo? per no voler studiar;  
 Ma come el gera un omo de talento,  
 El s'è messo a la via, e in t'un sol mese  
 L'è diventà dei primi del paese.

El conte prova alzarse una matina  
 Sul far del zorno, e averto el so balcon  
 El vede vegnir zo da la cucina  
 El cogo co un bellissimo capon,  
 El camerier co un galo e una galina,  
 E 'l so lachè co un fiasco de vin bon;  
 El li sorprende, e 'l ciga sul mumento:  
 Intendo del bon frate l'argomento!

Anca el nostro gramazzo zogelier  
 A' capio che 'l remito xe un omoto.  
 Per disgrazia el gaveva una muger,  
 Che tuto el dì mandava roba in gheto;  
 Ma fa ancuo, fa doman un tal mistier,  
 Perdia! che se n'è acorto el bon cucheto;  
 E doparando a gradi un bravo legno  
 El l'ha messa a la fin sul bon contegno.

Saveu quanti ghe n'è de tale quali  
 Che xe pitochi e che no i sa perchè,  
 Che ga la testa simile ai cocali,  
 Che se fida de quanti che ghe xe?  
 Che tardi se ne acorze dei so mali,  
 E tardi i va cigando: oh dio! oimè!  
 Ma rimedio no gh'è per el so mal,  
 Perchè più no se trova un fra Vidal.



## EL VIN FRIULARO.

DI TIRANBO.

Fra tante bele cosse

Che natura al mortal dispensa e dona,

La prima, la magior, la più ecelente,

Che no la cede a gnente,

E che superba va per ogni logo,

Perchè tuti la vol, tuti la brama,

Onorada da tuti

Qual celeste regalo soprafin,

Ch' l' cuor uman consola,

Son certo, nè m' ingano, la xe 'l vin :

Sì, xe 'l vin quel dolce netare,

Che consola, che diletta,

Quela zogia predileta,

Che brillante fa ogni cuor.

Lu xe 'l fonte d' ogni giubilo,

De la pase e l' armonia ;

Ogni mal lu para via,

Lu bandisce ogni timor.

Ma fra i vini el più stimabile,

El più bon, el più perfeto

Xe sto caro vin amabile,

Sto friularo benedeto (120)

Lu ga i gusti più stupendi,

Tuti i odori sontuosi ;

No ga vini el Benintendi (121)

Del friularo più preziosi.

Viva sempre la memoria

Del famoso Giulio Cesare,

Ghe à portà sto vin in Udine

Da paesi lontanissimi :

Vin che dopo molti secoli

Trasportà da man benefica

In sto nostro clima docile,

In sta tera cussì fertile,

Xe riussio, secondo mi,

El più bon dei nostri di.

Su via donca alegramente

Tuti toga el goto in man,

E bevemo fin doman

De sto vin cussì ecelente,

Su via tuti alegramente;

Vegna in qua bozze e bozzoni,

Ingistare e botiglioni,

Canevete e bariloti,

Zuche, fiaschi, scuele e goti ;

Vegna pur sechi e mastei,

Vegna bote e caratei,

Damigiane e madalene

De friularo tute piene,

E bevemo,

E tminchemo,

Tracanemo

Sto bel sangue vegetabile ,

Sto prezioso oro potabile.

Benedeto :

Che diletto,

Che piacer ! mo che gran gusto

Che mi provo co te gusto !

Co te gusto, caro ben,

D' alerezza mi son pien ;

Co te bevo mi me sento

Tuto giubilo e contento.

Guai se fusse una dona . . . pofardia !

Digo la verità, no conto frotole,

Per beber de sto vin mi ghe daria

La scufia, el busto, el capotin, le cotole.

Bastonà,

Sculazzà,

Morsegà

Da una vechia senza un dente,

Più rabiosa d' un serpente

Sia colù che no 'l ghe piase,

E la pase e 'l dolce giubilo

Vaga fora dal so cuor ;

Ma indorà

Carezzà,

Cocolà

Da una cara gnognoleta

'De sto amigo amiga streta

Sia colù, che sempre coto

Da la sera a la mattina

Xe più duro del biscoto

Xe più negro d' una tina,

Sia colù, che ghe ne ingiote

In t' un ano diese bote.

Diese bote ! xe anca poco,

O' parlà cussì da aloco ;

Mi le bevo in manco assae.

Se vedessi che trincae

E po, gnente, steme atenti

Se volè restar contenti.

Za 'l friularo xe 'l più bon,  
 E lu solo porta el vanto ;  
 Ma, benchè el me piase tanto,  
 In mancanza de sto vin  
 No rifiuto el bon corbin,  
 El gropelo . . .  
 Ma bel belo,  
 Co no 'l xe più che dolzon.  
 La roba dolce me fa mal de stomego,  
 La me sgionfa el bonigolo,  
 La me desmissia i flatì,  
 Me par de aver in panza cento gati.  
 Son pezo de le femene,  
 De le ragazze isteriche,  
 Son debole de stomego,  
 De fibra cussì languida,  
 Che un pero, un pomo, un persego,  
 Un figo, mezza nespola  
 Me fa vegnir el spasemo,  
 El biro, le vertigini,  
 Col resto dei so diambèrni,  
 Nè trovo altro rimedio  
 A tuti sti disordini,  
 Che un fiasco de sto vin benedetissimo,  
 Che me rimete in stato perfetissimo.

Imparè, done mie care,  
 A conosser sto liquor,  
 E no siè più tanto avarè  
 A lodarlo e farghe onor.  
 Savè pur a quanti incomodi  
 Zorno e note andè sogete :  
 Convulsion stramaledete,  
 Cento spezie de dolori,  
 Svanimenti, bati cuori,  
 Stomegane, e . . . che soi mi?  
 De sti mali in sto bocai  
 Gh'è 'l rimedio general ;  
 Gh'è 'l cordial el più potente,  
 Gh'è la droga più valente,  
 La più rara decozion,  
 La più scielta confezion,  
 L' elisir el più divin . . .  
 A le curte, gh'è sto vin.  
 Mo no xelo un gusto mato  
 A svodar sti bozzoncini?  
 Via de qua sti gotesini,  
 Sti cosseti da moscato :  
 Questa è roba da amalai ;

Mi per mi no i toco mai,  
 Bevo sempre col bocai,  
 E mai mal, e mai dolori . . .  
 Sì signori, domandelo,  
 Sempre belo come un fior  
 Me mantegno,  
 Me sostegno  
 Tuto spirito e vigor.  
 Cossa feu che no bevè ?  
 Si alafè che vago in colera !  
 Via, sentilo co prezioso,  
 Co odoroso !  
 No gh'è gente che ghe possa ;  
 Anca el cipro xe gustoso,  
 Ma el me fa la lengua grossa.  
 Bevè pur la malvasia,  
 Mi la go per porcaria.  
 El xe assae megio del perfeto scopulo,  
 Del alicante, del moscato fin,  
 Del samo, del braganze, d' ogni vin.  
 Lo digo francamente *coram populo* :  
 Lu xe 'l re de tuti i vini,  
 Dei liquori soprafini.  
 Via de qua montepulciano :  
 Che se 'l beva tuto Baco,  
 El xe giusto el so macaco  
 Del friularo che ga un ano.  
 Che canarie ! che tocai !  
 No i val gnanca i so pecai.  
 I me fa vegnir la rognà  
 Co i me nomina el borgogna,  
 El reno, el palma, el visnà,  
 El sanremo, el ratafià,  
 El clareto, el sanloran,  
 El maderà, el frontignan,  
 El . . . diavolo, che i strangola !  
 Buteli in te la zangola.  
 Andaria po zo dei bazari  
 Co i vien via co 'l so vermute :  
 No gh'è roba più antipatica,  
 Più contraria a la salute.  
 Questo, questo xe quel balsemo,  
 Che fortifica ogni stomego,  
 Che fa far la dieta ai medici,  
 E falir le spiziarie  
 Co le so potachiarie . . .  
 Ma tasè, che gh'è un rimedio,  
 Che non posso disprezzarvelo,

Questo xe 'l cremor de tartaro.  
 Mi per-altro mai nol doparo;  
 Ma sapiè, che sior domenego,  
 El mio caro cuginadin,  
 M' à zurà perdio bachissimo  
 Che 'l xe un sal cavà dal vin.  
 Oe disè, quel vin negron  
 Xelo fursi del stradon ? (122)  
 Sì per dia ! l' è lu, l' è lu;  
 Sielo tanto ben vegnù !  
 Xe cent' ani che l' aspeto . . .  
 Benedeto,  
 Benedeto,  
 Benedeto  
 Ti, e la mama che t' à fato !  
 Mi son mato per sto vin:  
 Coresin, vien qua, vien qua ....  
 Sì, caro, sì,  
 Sì, fra ti e mi  
 Feghimo un prindese  
 Stracordialissimo,  
 A l' umanissima  
 Veneratissima  
 Parona amabile.  
 Iustre dona (123), onor del vostro sesso,  
 D' ogni grazia e virtù gentil modelo,  
 Ve sia propizio el ciel, quel-cielo istesso  
 Che v' à donà quel cuor che è tanto belo,  
 Quel ciel che a vu soleta v' à concesso  
 El più caro adorabile putelo,  
 Quel ciel .... ma, oh Dio! bisognaria dir tanto  
 Che mai se finiria: bevemo intanto.  
 Su via bevemolo,  
 E a son de piferi,  
 Trombete e flauti,  
 Tamburi e timpani,  
 Chitare e cimbani,  
 Lironi e gnacare,  
 Su via onoremolo,  
 Imortalemolo,  
 E pieni de alerezza e de morbin  
 Cighemo tuti: eviva sto bon vin.  
 Viva, viva i mii Paroni,  
 Cavalieri splendidiissimi,  
 E i Parenti nobilissimi  
 De sta Casa ecelentissima;  
 Ma i xe tanti, e tanto i meriti,  
 Che fra lori e i so gran meriti,

Se volesse nominarveli  
 Restaria senza polmoni:  
 Viva tuti i mii Paroni.  
 Viva, viva i veneziani,  
 I mii cari patrioti,  
 Grandi e piccoli,  
 Vechi e zoveni,  
 Done e omeni,  
 Zentilomeni,  
 Galantomeni (124),  
 Poveromeni,  
 Castelani e nicoloti (125),  
 Viva tuti i veneziani,  
 I mii cari patrioti.  
 Via de qua malinconia,  
 Bruta striga, va pur via:  
 Se me casca adosso el mondo  
 Mi, fradei, no me confondo;  
 E co un goto de sto vin  
 Sfido el diamberne e 'l destin.  
 Co sto vin xe puro e mero,  
 Col xe fato a tempo giusto,  
 El riesce tanto fiero,  
 Cussì negro e pien de gusto;  
 Che co 'l bevo vago in estasi,  
 E me sento tuto tuto  
 Bisegar, ma depertuto,  
 Da quel so potente spirito,  
 Che a le volte infin m' ispirito.  
 A Bagnoli, a Bagnoli, carissimi,  
 Da sto vin che fa tanti miracoli,  
 A Bagnoli, poeti fredissimi,  
 Se volè deventar tanti oracoli.  
 Qua gh' è 'l monte, gh' è 'l fonte, gh' è Apolo,  
 Gh' è 'l liquor, gh' è le muse, gh' è l'estro,  
 Sto bon vin, sto bon vin lu xe 'l solo,  
 Che ai bravazzi pol far da maestro,  
 A Bagnoli, a Bagnoli v' aspeto  
 Da sta fiamma che infiamma ogni peto.  
 Vegna, vegna anca i più fervidi,  
 Vegna i cigni canorissimi,  
 I poetoni, i primi doti,  
 Anca vu, sior Cesaroti;  
 Che a sta fonte  
 No sdegni de acostarse el Pindemonte.  
 Me dirè mo a cossa far,  
 Se savè cussì cantar?  
 A tastar sto bon liquor,

A impenirve del so ardor,  
 A compor una Bacheide  
 Più sublime de l' Eneide.  
 Che se ancuo i ve crede Omero  
 Vivo e vero,  
 Co in sto Pindo vu sarè,  
 E che indosso gavarè  
 No chitare, no lironi,  
 Ma do grossi e bei fiasconi,  
 Uno in panza e l' altro al colo,  
 Sarè alora el vero Apolo.  
 Pare Bepo, (126) pare sana,  
 Via, mainè quela tartana,  
 Voltè bordo, e vegni a tera,  
 Ma vegni col vostro Baco,  
 Che za credo stufo e straco  
 De far guera in mezzo al mar :  
 Via, vegnìlo a ristorar.  
 Varenta vu che al son de sto bocal  
 Ghe torna tuti i spiriti a capitol,  
 E dopo aver bevuo tre quatro sessole  
 De sto vinon che 'l centopezzi imbalsema,  
 El ghe reniova un prendese badial  
 Al vostro abate Costa inanzolao,  
 Che anca da mi de cuor xe saludao ...  
 Cossa xe? corte bandia!  
 No voi guente, portè via ....  
 Pan de spagna? dio me libera!  
 No dasseno, paroncina,  
 No magno gnanca late de galina.  
 Pintosto se la vol, tratandose de ela,  
 Buto via el goto, e bevo co la scuela.  
 La gran rabia che mi provo  
 Co m' incontro in quei magnoni,  
 Che destermia i caponi,  
 Le dindiete e i colombini,  
 E che sorbe come un vovo  
 I bodini,  
 I tortioni e le rosae,  
 E po dopo ste magnaie,  
 Au mai visto i oseleti ?  
 Sti lovoni  
 Sfondradoni  
 Beve el vin cussì a sorseti.  
 Vedeu mi? con un crostin  
 Sugo un sechio de sto vin,  
 De sta cara perla d' oro,  
 De sto brodo da ristoro.

Ghe darave de le scopole  
 A quei cani  
 De vilani  
 Che ghe missia drento l'acqua.  
 Maledeto el vin acquatico,  
 E i sassini che lo inacqua!  
 Mi lo vogio sempre puro,  
 Sempre grosso, sempre duro,  
 Che 'l se taglia col cortelo :  
 Co 'l xe cussì mi svodo el caratelo.  
 L' acqua, come savè, marcisce i pali,  
 La porta mile dani a la salute,  
 La fa che chi la beve vegna zali,  
 Che meta suso panza anca le pute.  
 Va pur via,  
 Zogia mia,  
 Va dal caro Pisaneli,  
 Va pur da mio compare Boniceli.  
 Se languisse,  
 Se sbasisse  
 Da la sè,  
 Vu mi là no me vedè,  
 No ghe meto suso el naso,  
 Le go in odio no gh' è caso ....  
 Cossa? le acque medicate!  
 Siori sì, giusto a proposito  
 Per lavarse le culate.  
 Bevè pur l' acqua de Cila,  
 De Nocera, de la vila,  
 De la Brandola, del Sasso  
 Se volè andar tuti a spasso,  
 Bevè quela a Recoaro,  
 Quela .... quela .... quela, un corno :  
 Me fe andar la testa a torno.  
 Bevè questo, questo, questo  
 Sto friularo,  
 Marmotoni,  
 Ve daria dei pizzegoni.  
 Su, da bravi, alegramente :  
 Tuti toga el goto in man,  
 E bevemo fin doman  
 De sto vin cussì ecelente :  
 Su via tuti alegramente.  
 Vaga pur l' amor al diavolo,  
 Che son stufo de quel piavolo.  
 Oh donete, mie carete,  
 Madamine sveltoline,  
 Zogie bele, furbarele,

Studiè pur quanto volè  
 Che mai più no me cucè.  
 Ridè,  
 Cantè,  
 Balè,  
 Pianzè,  
 Sustè,  
 Smanìè,  
 Mai più, mai più, mai più no me cucè.  
 Andè pur dai vostri amanti  
 Spasimanti, deliranti,  
 Da quei cari polastroni  
 Semplizzoni, balordoni,  
 Che per mi go bu 'l bisogno ....  
 Co ghe penso me vergogno.  
*M'è mè vu madam? -- Ui,*  
*Ui, mon ser, ze mur pur vu.*  
 Domandeme un poco a mi  
 Sior cucheto de *monsù*.  
 Viva, viva la mia Nina  
 Frescolina,  
 Tondolina.  
 Viva, viva quel bochin  
 Stretolin,  
 Quel lavreto cremesin,  
 Restaressi  
 Stupiressi  
 Se vedessi  
 Quanto ben me vol custia.  
 Ma chi xe sta cara fia?  
 Che curiose! le gran femene!  
 Una bela damigiana,  
 Che co mi fa sempre nana.  
 Che ricchezze!  
 Che grandezze!  
 Mo che onori!  
 Via caveve, cari siori,  
 Queste xe minchionarie:  
 No ghe dago un gotesin  
 De sto vin  
 Per disdoto monarchie.  
 Quanto è bela la virtù!  
 Sì, no è vero, cari vu!  
 No gh'è i pezo dei virtuosi;  
 I ga tuti i mali cronici,  
 I xe tuti malinconici,  
 Panzarini,  
 Del color dei canarini;

E per causa de sti incomodi  
 I riesce fastidiosi,  
 Dispetosi,  
 Taroconi,  
 Litigoni,  
 Tuti tuti malsestoni;  
 Vedeu mi, che mai no studio  
 Che su 'l libro del bocal,  
 Se so rosso come un gambaro,  
 Se co tuti so genial?  
 Via da bravi tremo su:  
 Gran piacer che dà costù!  
 Che comedie?  
 Che tragedie?  
 Che spettacoli?  
 Che festini?  
 Che casini?  
 Che delizie?  
 Che Brenta? (127) che Stra? (128)  
 Che Padoa? che Pra? .... (129)  
 Alto qua.  
 So anca mi che 'l xe magnifico,  
 E che Padoa ga rason  
 De tegnirise tanto in bon.  
 Viva pur el gran talento,  
 El bel genio,  
 Che à dà moto a quel portento (130);  
 Ma a parlarve schieto e neto,  
 Anca el Pra ga el so difeto.  
 Sì signori,  
 Sì signori,  
 Ghe voleva dei fiasconi,  
 Dei pistonni,  
 Dei piloni  
 Tuti pieni de sto vin,  
 Ben disposti fra le statue  
 Come i vasi d'un giardin.  
 Diese bote per canton  
 Messe in forma de piramide,  
 Che formasse quatro guglie  
 Superbissime,  
 Modernissime,  
 E in t' el mezzo un gran tinazzo  
 De l' altezza d' un palazzo,  
 Che portasse un stendardon,  
 Dove fusse scritto a pegola  
 Co carateri da fabrica:  
 Vegna qua chi vol vin bon

Pofardia, che bel spettacolo !  
 Sentiressi del gran strepito,  
 Che farave un mar de popolo  
 Co i so eviva festosissimi ,  
 Vedaressi del concorso ,  
 Altrochè Fantini e Corso !  
 Deme deme quel fiascon :  
 El me par sempre più bon . . .  
 Oh, cospeto, l'ò svodà !  
 Vegna un altro, vegna in qua,  
 Vegna, vegna . . . maledeti !  
 Anca qua portè i fogiet ?  
 I me fa vegnir i grizzoli ;  
 No gh'è i soldi più strupiai ;  
 No i discore che de guai,  
 Che de bombe e de canonì,  
 Che de morti e de ferii . . .  
 Vostro dano, i mii minchioni ;  
 No i me cuca minga mi.  
 Andè pur, andè a la guera,  
 Fève pur tagiar a pezzi,  
 Che mi salvo el centopezzi  
 A l'onor de sta bandiera.  
 Qua cervele,  
 Là buele,  
 Gambe e brazzi va a le stele ,  
 Canonae,  
 Schiopetae,  
 Sabolae . . .  
 Mi no voi ste baronae.  
 Vedeu là quel caratelo ?  
 Quello xe 'l mio colonelo ;  
 Quele zuche e quei bocai ?  
 Quei xe tuti i mii ofical ;  
 Quele tazze e quei fiaschetti ?  
 Le mie spade e i mii moschetti.  
 Nè per mi ghe xe botin  
 Più prezioso de sto vin.  
 Vardelo,  
 Naselo,  
 Gustelo  
 Provelo d'inverno, d'istà,  
 Bevelo scaldà,  
 Bevelo giazà,  
 Che sempre el trovarè una rarità.  
 Dolce amigo, vien qua dame un baso . . .  
 Mo che odor che rapisce ogni naso !  
 Che cimoza che l'ochio consola ;

Mo che godi col toca la gola !  
 Altrochè ciocolata e caffè,  
 Che sorbeti, che ponchi, che tè !  
 No gh'è gnente che sia più perfeto,  
 Che me daga più gusto e diletto.  
 Sto fiaschetto xe un intrigo ;  
 Quela zuca, caro amigo . . .  
 Cossa feu ?  
 Cossa diavolo me deu !  
 No v'è dito el bariloto ? . . . !  
 Sì per crispo, che 'l xe coto !  
 Tanto fa che vaga mi . . .  
 Pofardia ? chi l'è svodà ?  
 Zito, zito che ò falà ;  
 El xe pien, incoconà.  
 Panza mia, no te far star,  
 Che l'avemo da svodar :  
 Su per un,  
 Su per do,  
 Su per tre,  
 Su su ve,  
 Bravo su,  
 Su, su, su . . .  
 Maledeta camisiola . . .  
 Mola, mola,  
 Tagia, mola,  
 Che 'l me vien su per la gola . . .  
 Ah natura tropo stitica,  
 Perchè farme un solo stomego,  
 Un gargato cussì piccolo ?  
 Mo perchè, perchè no farmene  
 Diese almanco, almanco quindese,  
 Longhi e larghi come l'adese,  
 Per trincar come un diluvio ;  
 Tracagnar come un demonio,  
 Impenirme come un diavolo  
 De sto vin saporitissimo,  
 Squisitissimo,  
 Arcistupendonazzissimo ?  
 Ma, cospeto, xe un gran caldo !  
 Uh ! che caldo, caldo, caldo !  
 Che siroco ! vita mia,  
 Va pur là, va via, va via,  
 Bevarò deho-bo-boto :  
 Dove xe 'l mio bariloto ?  
 Saldi, sali, casco, casco . . .  
 Ve sugheu tuto quel fiasco ?  
 Dè qua anca a mi,

Che go una sè! ...  
 Butè, butè,  
 Svodè, impeni,  
 Cussi, cussi ...  
 No più, no più.  
 Tolelo vu ....  
 Dè qua, dè qua,  
 Per carità!  
 Che go el palà  
 Seco, brusà.  
 Voi trincar come un todesco  
 De sto vin stupendo e fresco  
 Fin che vivo e che go già,  
 Fin che in panza me nè sta.  
*Star tais ? far trinch, trinch.*  
*Star home de Ghermaine ?*  
*Zu trinch, trinch vaihe*  
*Se calantome star,*  
*Zu trinch, trinch, trinch,*  
*Melie cusse no provar.*  
*Trinchèn, trinchèn de pone friulach ;*  
*Cent mile pocal, nù imbriach.*  
 Ola .... o ....  
 Ola .... o ....  
 Ola, oe, no toco tera !  
 Vago, svolo, vago in aria,  
 Presto, presto, sera, sera,  
 Sera, sera quei balconi,  
 Che no vaga cussi a svolo,  
 Cussi solo,  
 Fra le nuvole,  
 Dove nasce i lampi e i toni  
 Sera, sera ...  
 Fra le nuvole ....  
 Lampi e toni! ....  
 Cussi solo ....  
 Sera, sera ....  
 Cussi a svolo ....  
 Quei balconi ....  
 Vegna vin, per carità,  
 Che la testa via me va.  
 Gnente, gnente,  
 Alegramente :  
 Ogni mal me xe passà.  
 Benedeto sto bon vin,  
 Che consola el coressin !  
*Vreman tre bon !*  
*Alon, alon,*  
*Racc. Poes. Ven.*

*Alon, monsù,*  
*Che fet vu,*  
 Che no bevè  
*A la santè*  
 De tuti nu  
*Alon, bevon, trincon, finchè crepon.*  
 Oimè! cossa mai xe?  
 Vardè, vardè, vardè,  
 La sala s'è imbrigià!  
 La va de qua e de là! ....  
 Camina anca i taolini,  
 I quadri e i careghini! ....  
 Agiuto. agiuto, agiuto,  
 Vardè, camina tuto!  
 O dio, o dio, o dio;  
 El mondo xe fenio!  
 Per mi digo de sì ....  
 Tegnù, tegnù, tegnù ....  
 Tegnime, cari vu,  
 No posso star più su ....  
 La tera tremola!  
 I travi bagola!  
 Iveri scricola!  
 I muri screcola!  
 Tuto precipita!  
 Porteme in caneva.

## LA POLENTA.

## SCHERZO DITIRAMBICO.

Ben venuti, ben venuti,  
 Via, da bravi, le se senta,  
 Le se comoda qua tuti  
 Che xe ora de polenta.  
 Disnaremo qua in cusina;  
 Za le vede che zogiolo,  
 Co mi go la polentina  
 Questo è sempre 'l mio tinelo.  
 Ma le prego un mumentin.  
 Oe, Tonin, fala in fete  
 Sutilete,  
 E impenissi la licarda ....  
 Varda, varda,  
 Che quel stizzo fa del fumo ....  
 Sì, per dia, che me consumo

A insegnarghe a ste marmote!  
 Quele quaghe no xe cote,  
 Quela bampa no laora ....  
 La me 'l creda, siora Dora,  
 I me fa deventar mato! ....  
 Parè via de qua sto gato;  
 Sul fogher no voggio intrighi;  
 Onzè ben quei becafighi;  
 Tirè zo quele brisiole  
 Deme in qua le cazzariole ....  
 Mo che odori che consola!  
 Portè in tola, portè in tola ....  
 Cossa fastu? per pietà! ...  
 Fame dir de le resie!  
 Te l'ò dito, ti lo sa  
 Che no voggio scalcarie ...  
 Tropa roba? cossa disele!  
 No le vede? semo in quindese;  
 E po gnente, mi soletto,  
 Ptoleto come son,  
 A contarghela da amico,  
 Più d'un terzo la destrigo.  
 Co ghe xe sta bela zogia  
 Mi devento un parassito,  
 E po mando el rosto, el frito  
 E i piateli tuti al bogia.  
 La me piase dura e tenera,  
 In fersora e su la grela,  
 In pastizzo, in la paela,  
 Coi sponzioli, coi fongheti,  
 Col porcel, coi oseleti,  
 Co le tenche, coi bisati,  
 Co le anguele per i gati,  
 Co le schile, coi marsioni,  
 Coi so bravi coepetoni;  
 E po insoma in tuti i modi  
 La polenta xe 'l mio godi.  
 Co camino per Venezia,  
 E che trovo per le strade  
 Quei che vende polentina  
 A un soldeto a la fetina,  
 Che i me diga pur: no cade,  
 Che mi spendo el mio boreto,  
 La gazeta, e infina el traro,  
 E belbelo, belbeletto,  
 Soto l'ala del tabaro  
 Me la vago musegando,  
 Rosegando

A bocca sconta  
 Cussì calda, cussì onta.  
 Ola, digo, comareta,  
 No tegni la boca streta,  
 Fe i boconi un fià più grossi,  
 Che za qua no ghe xe gssi,  
 Questo è late ben colà,  
 Dove arento go butà  
 El bisogno de farina  
 Tamisada fina, fina;  
 E po a forza de missiarla,  
 De menarla  
 Sora el fogo,  
 Come fa ogni bravo cogo,  
 L'ò tirada una rosada,  
 E sculierì l'ò cavada;  
 Go butà po 'suso el zucaro,  
 El butiro e la canela:  
 Comareta, via magnela!  
 Comareta, via, magnela,  
 Che voi farve tondolina,  
 Grassa come un becafigo.  
 Perdoneme se vel digo:  
 Vu sè stada sempre bela;  
 Ma un pocheto magretina.  
 No vedè ste furlanote,  
 Che papote  
 Che le ga;  
 Che montagne! .... che arie fine!  
 Quele xe le polentine  
 Che al pajès le ga magnà.  
 Sto pastizzo xe un oracolo!  
 Che botiro perfetissimo!  
 Mo che ottime tartufole!  
 Che fongheti gentilissimi!  
 Che polenta ben passada!  
 La par proprio una sfogiada.  
 Vegna i coghi co tuti i so sguatari  
 A imparar da sto muso de mamara  
 A formar el pastizzo più nobile,  
 Cussì raro e gustoso che 'l simile  
 No i lo trova se i studia tre secoli;  
 Se la mente e 'l cervello i se stempara  
 No i lo trova, son certo, certissimo,  
 Per dio baco! bacon! baconissimo!  
 Digo, Tonin,  
 No te voi là  
 Cussì impalà,



Cussì incantà,  
 Via, sveltolin,  
 Dame del vin...  
 De questo nò.  
 Oibò, oibò,  
 Voi del friularo,  
 Ma de quel bon,  
 Voi del mio carb  
 Vin del stradon.  
 Mo, vardè quel dotoron  
 Che no fa che sprotonar,  
 E gnancora el vol magnar.  
 Via, caveve, slimegoso,  
 Stomegoso,  
 Andè in camera a studiar;  
 Ma co tuto el vostro studio  
 Sarè sempre un bel talpon ...  
 Sì, fradelo,  
 Sì, credelo,  
 Stè certissimo  
 Senza i feri del mistier  
 Buta mal ogni laurier.  
 La polenta xe quel fero,  
 Quel bravissimo istrumento  
 Che la mente, che 'l talento  
 Fa che sempre diga el vero.  
 La xe un cibo lisierissimo,  
 El più semplice, el più bon,  
 Che fa pronta digestion,  
 Che fa un chilo perfetissimo.  
 Dasto chilo, che xe un late,  
 Che se mua po dopo in sangue,  
 Nasce un sangue, un altro late,  
 Che porta po da le arterie  
 Al cervelo, e ai altri visceri,  
 El li rende in conclusion  
 Facilissimi,  
 Valentissimi  
 A far tute le funzion.  
 Ola, amico, cossa feu?  
 Cossa diamberne gaven  
 Che no fe che sbadgiar? ...  
 Povareto... se pol dar!  
 La polenta ve fa sono?  
 La ve fa malinconia?  
 Andè in leto, caro nono,  
 Che la testa ve va via.  
 Cossa mai saria de mi,

Che la magno a tute l' ore?  
 Ma lo diga ste signore  
 Se de note fazzo di,  
 Se son sempre d' un umor ...  
 Cossa disela, bonior? ...  
 La polenta xe ordinaria?  
 Oe, lighelo che 'l savaria.  
 No la sa che le gran dame  
 Par infin morte da fame  
 Co le vede la polenta? ...  
 No la rida, la me senta:  
 Mi le vedo in palco a l' opera,  
 E a le cene dei casini  
 A magnarla tanto in furia,  
 Sia in pastizzo, o in bocconcini,  
 Che par, e ghe lo zuro ben persbrio,  
 Che no le veda mai grazia de Dio.  
 Ma no voi più batolar,  
 Vogio un poco respirar,  
 Voi quietarme che so straco ...  
 Maledetto sto macaco!  
 La polenta inlanguidisse?  
 La fiachisse,  
 La sbasisse?  
 Te becasse cento bisse!  
 No ti sa che i terazzeri,  
 I mureri,  
 I fachini,  
 I tasini,  
 Quei che dopera le sieghe,  
 Quei che conza le careghe,  
 Quei che ciga *tagialèi*  
 Co i xe vechi i par putei?  
 I xe svelti come spade,  
 I camina per le strade  
 Che i consola chi li vede,  
 E sì, posso dirte in fede,  
 Che sti siori se diletta  
 De polenta schieta e neta  
 Ma 'l friularo xe senio.  
 Porta, porta, caro fio,  
 Vegna, vegna fiaschi a furia;  
 E ogni fiasco strapienissimo.  
 Che za qua no gh'è penuria  
 De sto vin prelibatissimo.  
 Oh, cospeto, che miracoli!  
 Mo che caro sior Chechin?  
 No la sa se ghe l'ò dito?

Se no falo l'ò anca scrito,  
 Che son mato per ste vin ....  
 Varda roba! varda! varda!  
 La mostarda?  
 Mo che quagie! mo che tordi!  
 Mo che odor! lo sente i sordi.  
 Che polenta! co ben frità!  
 La me dà proprio la vita.  
 Via, comare, destrighemola,  
 Che, per diana, la lo merita ....  
 Ah! gavè dolor de denti?  
 Malegnasi! i xe sti venti,  
 Fredo e caldo che se chiapa;  
 Ma son qua cò un bel rimedio ....  
 Quello sì, che se la slapa!  
 Recordeve anca de nu ....  
 Sì, comare, son da vu ....  
 Son qua subito .... cospeto!  
 Se i ve dol ficheve in leto,  
 E mandè a chiamar el medico ....  
 Varda, vè, se la va in colera ....  
 No me provo più a burlarla,  
 Ghe ne magno un' altra feta,  
 Ghe ne sugo una bozzeta,  
 E po vegno a consolarla ....  
 Via, son qua, la se tasenta,  
 Sì, signora, la polenta,  
 La polenta xe 'l secondo  
 Valentissimo rimedio  
 Che distruge, che destermina  
 Ogni mal, benchè profondo;  
 Che 'l sia interno,  
 Che 'l sia esterno,  
 Che 'l sia acuto, che 'l sia cronico,  
 Che l'umor sia malinconico,  
 Sia bilioso,  
 Sanguinoso,  
 Pituitoso,  
 Scrofoloso ..  
 Stradelà de diavoloso,  
 La polenta, la polenta,  
 Sì, signora, la polenta  
 Xe un rimedio che 'l più raro  
 No ghe xe dopo el friularo.  
 Se ve dol i denti in boca  
 Una feta apena cota  
 Aplichela  
 Cussì calda a la mascela;

Fè l'istesso in qualche dogia  
 Che ve dà un dolor da bogia,  
 Sia pleuritica o seiatica,  
 E ve parlo ben per pratica.  
 Se per caso studiè l'etica,  
 No stè a tor brodi de vipara,  
 De gagiandra, nè de gambaro,  
 Nè tanti altri diavolezzi  
 Che distruge vita e bezzi.  
 A bon ora ogni matina  
 Feve far la polentina,  
 E magnela a scota deo,  
 Se crepè me tagio un deo.  
 Se gavè .... ma cossa è stà? ....  
 Gran secac! che i vegna qua ....  
 Oh cospeto! benedeta,  
 Sì dasseno, una cassetta  
 De farina bergamasca  
 Che me arriva da Somasca.  
 Digo ben che la go cara ....  
 Oe, vardè che cossa rara!  
 Che color! che bel zalon!  
 Me vien fina tentazion ....  
 Cossa distu, panza mia? ....  
 Ah, no, no; metela via,  
 La faremo un altro di ....  
 Mo 'l gran omo che son mi!  
 No me teguo, no gh'è caso,  
 La go sempre seto el naso ....  
 Ei! tornemela a portar ....  
 Anca ti ti vol parlar? ....  
 Troppo tardi? .... varda mato,  
 Fazzo farla qua in t' un trato.  
 Catina, via, Catina,  
 Tamisa in quel albol  
 Sta bela zalolina:  
 Ma varda che 'l granziol  
 No resta in tela semola  
 Che 'l vaga tuto zo ....  
 Puro fioreto? oibò,  
 La riesce tropo slimega,  
 E smorta de color.  
 Ma cossa fa quel sior  
 La solo in quel canton? ....  
 To zo quel caldieron,  
 Tachilo a la caena,  
 Mo via, gran Madalena,  
 Va là daghe una man ....

Ve, zoghistu cœ can ?  
 Mo caro stu putin ! ..  
 Destrighite, sassin !  
 Fa fogo che la bogia ....  
 Caveve, cara zogia,  
 No me vegnì in t' i pi ...  
 Ma, digo, pofardì !  
 Quel' acqua va per sora ....  
 Xe ora, sì, xe ora,  
 Xe ora, sì cocal !  
 Parechime del sal ...  
 Destrighite, Catina,  
 Vien qua co la farina ...  
 Basta : va ben cussì ...  
 Va ben, te 'l digo mi,  
 Co la xe tropo dura ...  
 La buta ruspia e scura,  
 E piena de monari ...  
 Alegri, fioli cari,  
 No stemo qua a vardarla,  
 Xe ora de menarla.  
 Via, presto, femene,  
 In qua la mescola ...  
 Da bravo, Giacomo,  
 Da bravo, daghela,  
 Da bravo, petighe  
 De cuor, de viscere,  
 Da bravo, menila  
 Co tuta l' anima ...  
 Adasio, adasio,  
 Che la se brustola !  
 Presto, destachila,  
 E ben unissila  
 Co la to spatola  
 Qua su la cenere ...  
 La va benissimo ;  
 Via, presto, deghimo  
 Un fià de fogo,  
 E rebaltemola ...  
 Mo bravo, cogo !  
 Largo, largo, feghe strada  
 A sta nobile matrona  
 Che da tuti xe aderada,  
 A sta bela polentona  
 Schieta neta e natural,  
 De farina, de acqua e sal ;  
 Senza ontume,  
 Nè grassume,

Senza odor da brustolin,  
 Senza un fià de pignatin,  
 Nome fata e rebaltada :  
 Largo, largo, feghe strada.  
 Oe, Catina, sona el cimbano,  
 E ti, Giacomo, compagnila  
 Co la mescola e la spatola,  
 Za ti sa sonar le gnacare,  
 Che ghe femo onor al merito  
 Veramente imparegiabile  
 De sta nobile regina  
 D' ogni piato de cucina.  
 Qua del filo siora Bortola,  
 Che voi farla tuta in fete :  
 Mi per mi ghe ne voi sete,  
 Oto, diese, e po .... chi sa ?  
 Fermi un poco, cari vu,  
 Che ghe vogio pensar su ...  
 Fermi, digo, pofarsbrio !  
 Lassè star de pizzegarla,  
 Che ò pensà de maridarla  
 Ma chi mai sarà el so sposo ?  
 Via, ragazze indovinelo ...  
 No dasseno, el xe più belo ...  
 Mile volte più grazioso ...  
 No 'l trovè gnanca in cent' ani,  
 Ma ve levo da sti afani :  
 « Lu xe 'l re de tuti i vini,  
 Dei liquori soprafini. »  
 Oe, digo, Giacomo,  
 Oe, quella piadena,  
 Presto, impenissila  
 De sutilissime  
 Fetine, e fregole  
 De sta bellissima  
 Polenta vergine,  
 E po maridila  
 Co un bocalon  
 Del mio carissimo  
 Prelibatissimo  
 Vin del stradon.  
 Su via, puti, alegramente,  
 Che cantemo unitamente :  
 Viva Bergamo e Bagnoli  
 Che produse un per de fioli  
 Che xe un per de rarità.  
 Che polenta ! mo che vin !  
 Che topazzo ? che rubin ?

De più belo no se dà  
 Cospetazzo del demonio!  
 Che stupendo matrimonio!  
 Mo che sopa xe mai questa  
 Fata su cussi a la presta?  
 Oh! se baco, quel bravon,  
 Quel potente tracanon  
 Che à distruto tuto el vin  
 Del famoso canevin  
 Del Granduca de Toscana,  
 Fusse qua co la so Ariana;  
 E col resto del so seguito,  
 Son sicuro, sicurissimo,  
 Che 'l dirave pien de giubilo:  
 Bravo, bravo, bravo, zovene!  
 Va pur là che ti ga el merito  
 D'esser stà ti el primo e l'unico  
 Inventor fortunatissimo  
 De sta ama bile sopeta  
 Che consola, che diletta.  
 Catineta,  
 Comareta,  
 Riosa, Bortola, Lucieta,  
 Via, sorele, tute qua  
 A sentir sta rarità ....  
 Cussi poco, coresin?  
 No lateu quel fantolin?  
 Impenive ben la panza;  
 No gh'è gnente, assicurevelo,  
 Gnente al mondo che la supera  
 Per far late in abbondanza.  
 Ola, digo, bela fia,  
 Me sè molto ingritolia!  
 De novembre gavè fredo? ....  
 Oh ve vedo, sì, ve vedo!  
 Ma no trèmo minga mi:  
 Via, careta, fe cussi.  
 Vegna pur tuti i aquiloni,  
 Le più fiere  
 Levantere,  
 Vegna el fredo dei Laponi,  
 Co go in panza sto broetin  
 Mi devento un paladin,  
 Mai no tremo, mai no suo,  
 Se anca fusse squasi nuo.  
 Se sta sopa mai va avanti,  
 Se se mete tuti quanti  
 A magnarla come i risi,

Nu vedemo tuti sbrisi.  
 I sartori, i pelizzeri,  
 Rovinai tuti i marzeri,  
 No se fabrica più pani  
 Nè da Schio, nè padoani,  
 Mai più bati, nè londrine,  
 Nè fanele, nè schiavine,  
 Vien i fassi a vinti al traro,  
 Le manizze va in t' i gatoli;  
 No se lassa zo le ventole  
 Gnanca el mese de genaro.  
 Toni, porta del friularo,  
 Che la sposa xe qua sola,  
 Presto vin, che la consola;  
 Co la xe cussi soleta  
 La xe mada, careta ....  
 Pofardin de ... de dia!  
 La gran testa xe la mia!  
 Sì, per crispo, che so mato!  
 Cossa diamberne goi fato  
 A no dar ... sta sposina,  
 A sta bela ... tintina  
 Anca un poco de servente  
 Che ghe staga sempre arente?  
 No gh'è dama, nè contessa,  
 Citadina, o mercantessa,  
 Benestante, o boteghiera,  
 In ancuo la cameriera  
 La massera,  
 La calera,  
 Fin la sposa del scoazzar  
 Ga 'l so bravo cavalier.  
 E sta nobile regina  
 D'ogni piato de cusina  
 Starà sola a muso suto? ....  
 No la tegno, no da puto.  
 Son qua mi,  
 Son qua mi,  
 Uè, madam, madam, uè,  
 Sarò el vostro cavalier  
 Pien de stima e de dover;  
 Cavalier minga de quei  
 Che vol far co tute i bei,  
 Che sospira, che delira,  
 Che per tute mor e spasema,  
 E i le ga po tute in cesto  
 Co i ga bu quel che i à volesto...  
 No, no, no,

No, no, no,  
 Sempre quello mi sarò,  
 E per ti, e per to mario,  
 Sì, ben mio,  
 Te parlo schieto  
 Anca lu xe 'l mio diletto.  
 Cussì el mondo vedarà  
 Che xe vero che se dà  
 In amor la bela fiamma  
 Che platonica se chiama ....  
 Eh, caveve, maledeti!  
 Che bochini da zàleti! ...  
 No permeto gnente afato ....  
 Sì, son mato!  
 Oh! fradei, no ghe xe caso,  
 Qua nissun ghe mete el naso,  
 Sta sopeta è tuta mia ....  
 No, no vogio gnanca femene,  
 Che le vaga tute al diamberne,  
 No voi darghe gelosia.  
 Vien qua, cara, vien da mi,  
 Che ti è ti,  
 Ti soleta  
 La mia bela gnognoleta,  
 Sì, mio cuor,  
 Ti xe l'unico mio amor; •  
 Vienme in sen,  
 Che te vogio tanto ben ....  
 Mo che union, mo che sopa adorabile!  
 Che elisir xe mai questo, che balsemo!  
 Mo che ambrosia celeste, che netare!  
 Mo che gusto stupendonazzissimo!  
 Mo che gusto xe quel che lo supera?  
 Mi per mi no lo trovo certissimo,  
 Mo che gusto stupendonazzissimo!  
 Mo perchè no songio Dedalo,  
 Che voria svolar in bota  
 Co una bela piadenota  
 De sta sopa sul Parnaso?  
 Ah! sì, sì, son persuaso,  
 Che se Apolo lo gustasse,  
 E del so potente spirito  
 Tuto tuto el se invasasse,  
 El dirave; adio, Castalia,  
 Dopo tanti e tanti secoli  
 Te abandono, e vago là  
 Dove gh'è sta rarità.  
 No 'l sarave un gusto nobile

A veder la cusineta  
 De sta piccola caseta  
 El gran Piudo diventada?  
 Vegnarave a piena strada  
 I poeti da ogni logo  
 A infiamarse de sto fogo;  
 Quei fornè sarave el monte,  
 E sta piadena el bel fonte;  
 El cavalo? ... la mia gata,  
 E l'orchestra? la burata;  
 E quel bon cantor divin  
 Co le muse in compagnia  
 Cantaria,  
 Sonaria, soto el camin.  
 Vardè! vardè! vardè  
 Che bel color che go,  
 E megio lo farò,  
 E megio lo farò.  
 Me sento, sì me sento  
 In fior de zoventù:  
 Se me volè contento  
 Dè qua che struca su.  
 Mo, cara, mo bela!  
 Mo bela, mo cara!  
 Mo bona! .... mo rara! ....  
 Mo rara! .... mo bona!  
 Ti xe stupendona!  
 Ti xe sempre quela.  
 Mo cara, mo bela!  
 Mo bela, mo cara, ! ....  
 Tasi là, che ti è un cocal!  
 Sta sopeta me fa mal  
 Perchè stago in alegria?  
 Uh, che testa descusia!  
 Porta, porta, in to malora! ....  
 Porta ancora, porta ancora,  
 No te far cussì pregar,  
 Che te pustu innamorar! ....  
 Mo bravon, mo bravo assae!  
 Bravo assae!  
 Bravo assae!  
 Voi sorbirla in do strucae ....  
 No, ti disi? .... no, perchè?  
 Varda, ve ....  
 Varda, ve ....  
 Varda, varda, caro ti ....  
 Songio mi, o no songio mi? ....  
 Saldi, saldi, che m'ingosso;

No la po ....  
 No la po ....  
 No la posso mandar zo ....  
 Ti l' à fata molto dura !  
 Pofardia ! gastu paura  
 Che ghe trova tropo gusto ? ....  
 Destrighemose, bel fusto,  
 Svoda qua quel bocalon ....  
 Oh cussì la va benon !  
 Ma benon, benon, benon,  
 Ah ! fradeli diletissimi,  
 Che sposini molto fervidi !  
 Se sentissi in t' el mio stomego  
 Che carezze che i se fa ;  
 Mo che salti, mo che tombole,  
 Mo che urtoni che i me dà !  
 Sì, careti, sì, godevela ....  
 El gran gusto che go mi !  
 Ah magari seguitasseli  
 Zorno e note a far cussì !

Madamina

Carina,  
 Belina,  
 Via che balemo,  
 Via che saltemo,  
 Che se godemo  
 Fin domatina,

Puti, sonè,  
 So.... so.... sonè,  
 Che canto mi,  
 Mi, mi, mi, mi.  
 E nio, e nio, e nio,  
 S' à maridà Matio,  
 E nio .... e nio .... e na ....  
 E .... na ... e .... na ...  
 Alto là,  
 Alto là,  
 Alto, digo, pofardia !  
 Che la testa me va via  
 Co sti soni  
 Dei cordoni ....  
 Vardè qua ...  
 Vardè qua ...  
 Son in tera destirà !  
 Deme man, toleme su ....  
 Su, su, su ....  
 Su, su, su ....  
 Mo co storno... mo co fiaco !  
 No capisso, per dio baco !  
 No me posso sostentar ...  
 Eh torneme a colegar,  
 E andè tuti via de qua,  
 Che sarà quel che sarà.



# POESIE

DI

FRANCESCO GRITTI.

## APOLOGHI.

### LA VERITÀ E LA FAVOLA. (131)

Stufa de star in pozzo,  
Nua come Dio l' à fata,  
La verità s' à messo un dì a viagiàr.  
Ustinada a voler per tanto tempo  
Viver là dentro, e respirar quel' aria  
Soteranea, mal sana, e no magnar  
Che sanguete e lumaghe,  
La gaveva cambià ciera e fatezze,  
La pareva a dretura  
Un scheletro scampà da sepoltura.  
Trovandola per strada  
Zoveni e vecchi se la fava a gambe ;  
Oe, no ghe gera un' anima  
Che ghe sporzesse un strazzo de gonela,  
O un per de scarpe rote ;  
Nissun ga dito mai : vegnì sorela,  
Magnè un bocon, fermeve qua sta note.  
Gh'è passà un dì vicin per accidente  
La favola, che giusto andava al fresco,  
Ma vestìa ! .... sì, minchioni !

*Racc. Poes. Ven.*

Nastri, merli, penachi da zechin  
Ghe fava su la testa un baldachin ;  
E un andriè da gala  
Co manegone larghe e coa prolissa,  
Sparso de fiori d' oro,  
De perle, de brillanti,  
Col sol da drio, co la luna davanti,  
Ghe decorava tuta la persona,  
Che la pareva proprio una bissona ;  
Tuta roba za falsa,  
Ma d' un brio, d' un splendor  
Da lassarghe su i occhi. Co la vede  
Quela mumia col sesso in confidenza,  
Co la la riconosce,  
La fa tre passi indrio per la sorpresa :  
« Ti ti xe mia sorela, verità ?  
Senza camisa ? Cossa fastu là ? »  
La ghe risponde : — « Ti lo vedi ben ;  
Son qua che me impetrisso, e sarà un' ora  
Che domando a chi passa  
Una strazza, un fenil, tanto che possa  
Coverzerme e dormir : tuti me scampa,  
Fazzo a tuti paura. Ma l'è chiara ;

Co le done xe vechie le à finio  
 Fina d'esser più prossimo,  
 E grazia granda se i ghe dise adio. » —  
 — « Ti per altro ti xè  
 Più zovene de mi (132) »  
 (Torna a dirghe la favola) epur tuti,  
 No fazzo per lodarme, me riceve  
 In casa, me carezza, e so tratada  
 Per tuto da signora .... ma sorela!  
 Perché te vien mo in testa de mostrar ....  
 De diana! Almanco tor  
 Do foge de figher .... nua per la strada?  
 Petite i to talenti.  
 Dove gastu el giudizio? Oh basta, senti:  
 Femo negozio insieme ... vien mo qua,  
 Fichite drentò, involzite  
 Nel mio manto real, e a passi eguali  
 Caminemo d'acordo. Per el tagio  
 De le scarsete, o fora per le maneghe,  
 De quando in quando ti à da far baossete;  
 I filosofi, i savi  
 Che fin adesso m'è voltà le spale,  
 Vedendo che la favola  
 No xe che 'l scorzo de la verità,  
 A brazza averte i me riceverà:  
 E ti stessa dai richi e dai putei,  
 Soliti co i te vede a scampar via,  
 Ti sarà ben acolta in grazia mia.  
 Cussi servindo al gusto de ciascun  
 Divideremo el fruto,  
 Mi dei matezzi, ti de la rasón,  
 Passeremo per tuto,  
 E faremo, sorela, un figuron.

#### L'AVA CHE BECA.

Bela, zovene, galante,  
 Leterata, ogni matina  
 La marchesa Belaspina  
 Core subito a taolin.  
 Là mo a caso ghe xe un specchio,  
 E con lu, da quella via,  
 La fa scuola de magia  
 Ai so ochi, al so bochin.

Mentre un di cussi la studia,  
 Vien un'ava da de fora,  
 Che tornava giusto allora  
 Da la fabrica del miel.  
 La la sente, la la vede ....  
 Spaventada, povereta!  
 La trà un cigo: « Agiuto, Beta,  
 Presto, Brigida, Michiel! »  
 « Corè tuti; ghè qua un mostro  
 Co le ale, co la bava .... »  
 Tutti core: ma za l'ava  
 Ga un lavreto, oh Dio, beca.  
 La marchesa casca morta,  
 Per no dir in svanimento;  
 Beta lesta come el vento  
 S'è quel'empia za cucà.  
 La voleva là schizzarla, •  
 Vendicar la so parona,  
 Ma la birba in man ghe intona  
 In bemol un dolce: Oimè!  
 « Mi ò credesto (chi sa a quante  
 Che sta burla ogui di toca)  
 Quei bei lavri, quella boca,  
 Do rosete in t'un bochè;  
 « Me pareva .... » a ste parole  
 La marchesa se destira,  
 L'avre i ochi, la sospira,  
 E la dise: « no schizzar; »  
 « No me dol po minga tanto;  
 La feria xe assae lisiera;  
 Poverazza! l'è sincera,  
 Lassa, Beta, lassa andar. »  
 Se la lode piase ai savi,  
 Figureve po a le done!  
 Le voleu cortesi e bone?  
 Carezzete, adulazion.  
 Tra l'incenso e la manteca  
 No ghe ponze più la barba ....  
 Mo la fragola xe garba? ....  
 Fora zucaro panon.



## EL CINGANO.

L' altro dî in mascara  
 Son in piazzeta,  
 E vedo un bozzolo  
 A la lozzeta.  
 Sora tre tavole  
 Sui cavaleti  
 Montava un cingano  
 In manegheti ;  
 L' aveva a latere  
 Èl so simioto,  
 Tre o quatro scatole  
 Col so ceroto,  
 E unguenti e balsemi  
 Per la matrice,  
 E do mandragole  
 Co tre fenice.  
 Mi, che i spropositi  
 Pago a contanti,  
 Secondo el solito  
 Me fico avanti.  
 Dopo el preambolo  
 Za consueto,  
 Vedo ch' el furega  
 In t' un sacheto,  
 El cava un rodolo  
 De bozzetine,  
 Che 'l basa in estasi  
 Come divine;  
 Po el dise al publico  
 Proprio cussì ;  
 No gh' è una virgola  
 Che sia de mi.  
 « Vengano, veggano,  
 Nobil signori,  
 Gravi filosofi,  
 Dotti, dottori ;  
 Voi metalurgici  
 Drappelli invitti,  
 Voi della idraulica  
 Padri coscritti ;  
 Vengano, ammirino  
 Con riverenza  
 Il capo d' opera ]  
 Della sapienza.

Corrano, spiegghino  
 L' arcano eccelso,  
 Ignoto a Ipocrate,  
 E a Paracelso :  
 Quest' è una polvere  
 Bis-magistrale,  
 Rimedio mistico  
 Per ogni male ;  
 Ella dà ai stupidi  
 Senno e valore,  
 Ai più colpevoli  
 Fama di onore.  
 A le fredde Ecube  
 Caldi galanti,  
 Ai flosci Nestori  
 Tenere amanti,  
 Ai pazzi il premio  
 Della saviezza,  
 A le Tisifoni  
 Dà la bellezza ;  
 Con questa polvere,  
 Chi usar ne sa,  
 Ha fregi, titoli  
 E sanità :  
 Da Roma al Messico,  
 Dal Cairo al Dolo,  
 Pregato a lagrime,  
 La vendo io solo ;  
 Pur viva l' Adria !  
 Qui ne fo sciallo,  
 E per un tallero  
 Ve la regalo. »  
 Fenia la predica  
 Tuti va via,  
 Perchè de talari  
 Gh' è carestia ;  
 A mi mo el recipe  
 De le bozzete  
 Me pol i ghe colego  
 Diese lirete ;  
 Curioso esaminò  
 La mia spesona,  
 E quei del bozzolo  
 Za me sbufona.  
 Svodo la polvere ...  
 Tantin zaleta ...  
 Pazienza .... tripolo ...  
 O pur fayeta ....

Ma in quello in gondola  
Da la Zueca  
Vien Belicopulo,  
Mastro de Zeca;  
E mi va e mostreghe  
Quel spolverin ...  
La gera polvere  
D' oro, ma fin!  
Me l' à quel zingano  
Ficada in man.  
Oh che satirico  
De zarlantan!

EL COLOMBO E 'L BARBAGIAN.

Tormentà dal mal dei calcoli  
Gera a morte un Barbagian,  
El sustava tra le natole,  
Biastemando come un can:  
« Tutti i osei ga el cor de porfido,  
I m' à tnti abandonà,  
Son qua solo, senza un mocolo,  
Moribondo, desparà. »  
Sti lamenti, sti rimproveri  
Va a ferir un colombin,  
Che se spulesa i garetoli  
Su la gorna là vicin.  
El colombo tra i volatili  
Xe 'l più tenero, el più bon:  
Chi a l' amor xe più sensibile  
Sente più la compassion.  
Sgambetando là el se furega  
Dove el geme note e di:  
« Via, bon vecchio, deve animo,  
Consoleve, so qua mi. »  
« (Povareto l' è un cadavero!)  
Voleu gnente? gaveu sè?  
Quanto xe che xe sta el medico?  
Cossa diselo? parlè ... »  
« Chi ve assiste? Cossa vedio!  
I ve lassa sgangolir;  
Qua no gh' è nè miel, nè zucaro,  
No gh' è un vovo da sorbir. »  
« No gavè un nevodo? un zenero? ...  
Xeli soto el peruchier?  
Perdoneme ... mi strasecolo!  
Dove xe vostra muger? — »

« — Che muger! » risponde in colera  
Al Colombo l' amalà,  
« Obligato a le so grazie!  
Sè un bel tomo in verità. »  
« Sì, doveva una petegola  
Una mata sposar su,  
Per aver in dote el titolo  
De corneta, de cucù? »  
« Mantegnir quatro sie discoli,  
Che ogni zorno in tel so cuor  
Gavaria cantà l' esequie  
Al so caro genitor? »  
« Solevarli dai so debiti,  
Cocolar la bisca in sen,  
E aver po per gratitudine  
Un regalo de velen? »  
« No go fioli, no go zeneri,  
Mugier, corni ... no ghe n' d'!  
Che nevodi? senza vederli  
Spero in Dio che morirò. — »  
« — Me parè ben malinconico!  
De parenti se stè mal,  
Gh' è i amici. L' amicizia  
Per i asliti xe un cordial: »  
« Sarà forsi mezzo secolo  
Che sti copi frequentè,  
Podè averghene ... co un subio  
Ve ne capita do tre. — »  
« — Bò pison, (133) vegniu dal Messico?  
(Ghe risponde el Barbagian)  
« No savè che amici e tossego  
Xe sta sempre tuto un pan? »  
« No i vol altro che i so comodi,  
I ve cambia el tu col mi,  
I ve insidia, i ve calania,  
I ve lacera ogni dì. — »  
« — Ma me par quasi impossibile  
« (Torna a dirghe el Colombin) »  
Che no abiè con un volatile  
Fato almanco un beverin. — »  
« — Co sti furbi, co sti perfidi  
Mai me son domesticà,  
A le curte, son misantropo,  
Nè so mai d' aver amà. — »  
« — Mo minchioni! vecchio tangaro,  
No te so mo cossa far,  
Crepa, schiata, tiò sto mocolo,  
E va a farte ... soterar.

## EL MARCHESE MERLITON. (134).

Biasioto Garzignol  
 Paesan povero e acorto,  
 (Do piante mo, che sol  
 Nascer vicine in orto)  
 Giardinier mal pagà  
 Del sior conte Balena,  
 Fava in strada sto istà  
 La solita so cena.  
 Ve la podè pensar :  
 Do fete de polenta,  
 Una renga in andar,  
 Bevanda d' acqua tenta.  
 De sto pasto real,  
 Tra do fioi afamai,  
 Gnente andava de mal.  
 Fregole in tera? mai!  
 « Pare, ca mi un bocon!  
 Pate, ca mi, a ghin vogio!  
 E Pasqua dal cason :  
 Biasio, toli de l' ogio.  
 Ringrazio Dio, a la fè  
 De no averme dà fioli.  
 Come faravio in tre  
 A spartir do fasioli?  
 Ma in ciel gh' è 'l protetor  
 Anca mo dei vilani.  
 Biasioto gà un umor  
 Che mazza dogie e afani;  
 E tormentelo pur,  
 Caveghe fina i denti,  
 Nol podarè ridur  
 Nè a pianti, nè a lamenti;  
 Anzi lu, come lu,  
 Parlando dei so mali,  
 Ga proprio la virtù  
 De caminar su i cali.  
 Vogio dir, de scherzar  
 Fin co la so disgrazia,  
 E de satirizar  
 Anca co qualche grazia;  
 Perché l' aveva mo  
 De quando in quando leto,  
 Minga Bel, nè Russò,  
 Cussì qualche libreto ...

Tornava zo pian pian  
 Verso la so bicoca  
 El senator Balan  
 Col curadenti in boca,  
 Chiochetto, scalmanà,  
 Dal palazzo del conte,  
 Mareselando un fià,  
 Sugandose la fronte.  
 Co l' è a Biasio vicin  
 « Oh! qua (*'l dise*) se magna ...  
 L' è stà un pranzo divin! ...  
 Eviva la cucagna!  
 Sto conte conta ben! ...  
 Minchioni! un signorazzo!  
 E che corte ch' el tien!  
 Xe una regia el palazzo!  
 Spechi ... cussì ... un mier;  
 Un mar de arzentaria ...  
 El pol da cavalier  
 Esser anca una spia!  
 Chi sa? ... Ma tuto bon!  
 Trute? da qua a là in cao ...  
 E quel *vò-de-muton*  
 Impastà col cacao!  
 Botiglie? cento e più ...  
 Anzi mi solo ... oe ... saldi ...  
 Me n' è almanco bevù ...  
 E quei gelati caldi?  
 Tre fia sie nove, e tre ...  
 Co le dame? in quaranta.  
 Ma se burlemio? eh  
 Da magnar ... per otanta!  
 M' è un dì anca mi tratà,  
 (E so come che parlo )  
 Me recordo a Lonà  
 Co xe passà 'l re Carlo,  
 M' è magnà in quel afar  
 Quel orto a la Zueca  
 Che m' è fato imprestar ...  
 Qua ghe voria la zeca! ...  
 Oh! Biasioto ... anemal ...  
 Zò 'l capelo ... creanza,  
 Vien qua ... via no gh' è mal ...  
 Tiò una presa de Franza ...  
 No, asenasso, cussì ...  
 Fosseta! ... Oh là ... ma questo  
 L' è butà via co ti ...  
 E quel visnà? Da resto

« Dilo ti, Garzignol,  
 Quei consuma un tesoro!  
 Ti è al servizio del sol,  
 Ti à da esser tuto d'oro!  
 « Giudizio vèh! voi dir  
 Tol'ben le to misure ...  
 Avanti de morir ...  
 Pensa a le to creature ... »  
 « Ma ti è nato un vilan;  
 No te scaldar la testa,  
 Suna le boneman;  
 Che ogni dì no xe festa  
 Lighela al cuor.

BIAS. — Studiarò, za paron,  
 De meter a profito la lizion,  
 (*Risponde Biasio*) ma sunarle tute,  
 Tute le boneman?  
 Oh! no me impegno minga, da cristian.  
 Perchè, sala, che slepa,  
 Se in vint' ani che servo  
 No me fusse andà mai gnente de mal,  
 Che slepa gavarìa de capital?  
 Ardiria squasi dir degna de ela,  
 Poco su poco zo!

BAL. Podarave anca darse: perchè no?  
 Go mo curiosità ... da cavalier ...  
 Aspetta ... voi sentarme un poco al fresco  
 Qua su sta banca; tirite là indrio,  
 Che za go bona rechia ...  
 Tuti tre, tuti tre,  
 Che spuzzè da vilani che impetè.  
 Di su mo, via.

BIAS. La principia a bon conto  
 Ch'el mio paron (no fazzo per lodarme)  
 Me dà ogni zorno del bondissioria.  
 Ma propriamente co de l'ironia ...

BAL. *Cortesia* ti vol dir: scioco! *ironia!*  
 Poh, questa po la stimo e no la stimo.  
 Gera giusto in collegio a san Ciprian  
 (Me lo ricordo come fusse adesso)  
 Co xe vegnù a trovarne  
 Monsignor Scopazzon, zio de za madre,  
 E 'l me diseva. *Ricordeve sior ...*  
 (Perchè alora no gera senator!) »  
 Cife circum circa i omeni xe omeni,  
 E salvo i ranghi e 'l sangue,  
 Fina i paesani istessi  
 Xe squasi tuto prossimo. « a la larga.

T'ò saludà anca mi, sèguita pur!

BIAS. S'el me vede co 'l passa, per esempio,  
 Sto strazzo ancora de capelo in testa  
 El me buta in scondon per da drio via  
 Giusto quella monea, che se ghe dise  
 Peada, se no falo.  
 Scherzo cortese e scaltro,  
 Per dir — « Tol su, va là, totene un altro.

BAL. Ma o peada o monea, parlemo schieto,  
 In quanto a la peada  
 Ti te la pol aver ben meritada;  
 Ma la monea? Siben per altro, che  
 Un rico, fato senza saver come,  
 Senza saver perchè, buta via i bezzi,  
 Che i ghe dise peada ... aspetta un poco ...  
 Squasi scometeria che pileada  
 Ti à inteso dir, zucon, che xe una spezie  
 De matapan, o de ducato d'oro,  
 Che val disdoto e sedese,  
 Fato bater dal dose Monegario  
 Giusto in quei tempi che Pipin re Goto  
 Stava assediando Brondolo ...  
 Che rapresenta la consulta negra  
 In bareton a bigoli, col moto  
*Gens pileata sumus*

« Squasi per dir a quel novo Porsena:  
*Semò in bareta, e ve aspetemo a cena.*  
 « Perchè *pileo pileos* in lingua dota  
 Significa, capissistu? bareta:  
 E per questo i la chiama *pileada*  
 Quela monea, martufol e no *peada*.  
 Da cavalier resto anca mi de sasso,  
 Come dopo quaranta o cinquant' ani  
 Che no lezo una carta, possa ancora  
 Ricordarme ... Ma za le cosse patrie  
 In ca Balan le xe fideicomisse  
 Da tre secoli, e più! Viva san Marco,  
 Ogio mo indovinà?

BIAS. Me par de sì ..  
 Ma un povero paesan, no sala? ..

BAL. Donca  
 Confessa che ti è un aseno! Di su ...

BIAS. A proposito d'aseno, celenza,  
 Se ricordela quel del sior abate,  
 Maestro del paron?

BAL. Se lo ricordo!  
 El m'è fato portar co una scalzada,  
 L'ano passà, quindese zorni intieri

La gamba al colo ... infassada voi dir !  
 Eco, che a star col lovo  
 Se impara a urlar. Sproposito anca mi  
 Per colpa toa !

BIAS. Oh ! tropo onor, celénza !

L' aseno, donca, vinti zorni fa  
 Gera ancora qua in grassa. Za la sa  
 Che da un ano a sta parte  
 Per tuto el teritorio  
 S' à introdoto l' usanza forestiera  
 De ingrassar i somari come i porchi  
 Per po magnarli. E in fati se la vol,  
 Tegnindoghene un pezzo in sal tre di  
 L' è un bocon da dotor in verità.

BAL. Vardè fin dove ariva el lusso ! ma ...

BIAS. A caso, o forse (come se sol dir)  
 Perchè spesso i bei spiriti se incontra,  
 S' à butà un zorno in leto,  
 Amalai tuti do, l' aseno e 'l prete ;  
 Se ga spiegà la gota a tuti do,  
 A tuti do la ghe xe andada al peto :  
 E co l' agiuto d' un medico solo  
 In quatro di la morte, che li ochiava,  
 S' à becà i do colombi co una fava.  
 Erede dei cadaveri intestati,  
 De l' abate e de l' aseno, el paron  
 A' fato sepelir pomposamente  
 El so maestro, per riconoscenza  
 De quello ch' el gaveva un di insegnà,  
 E che lu per modestia à lassà là ;  
 Ma la senta el caprizio ... ( generoso  
 Za, se la vol ... ) l' ha fato che in scondon  
 El nonzolo ghe porta via la chierrega,  
 Per donarmela a mi ! perchè ? cussì,  
 Forsi perchè ghe rispondeva messa.  
 Mi me l' ò in bota messa : ecola qua ;  
 E la porto di e note veramente,  
 Perchè po, a dirla, no la pesa gnente.  
 Ma no se pol negar che nol sia un trato ...

BAL. Cossa me vastu chierregando mato ?

Me fastu el spiritoso ?  
 Tra stò caldo, el disnar e i to strambezi,  
 Da cavalier, deboto  
 El cervelo me zira come un trotolo.  
 Coss' à 'l fato de l' aseno el paron ?  
 Di su, te intendarò per discrezion  
 BIAS. El ghe n' à fato far dodese tagi,  
 Un più belo de l' altro, e 'l s' à tegnù

El più grosso per lu ! Mi mo ò credesto  
 Ch' el sior conte Balena  
 Mandasse in bota a regalar el resto  
 A sti signori qua in vilegiatura :  
 Ma bisogna mo dir, che le balene  
 S' abia da inamarar dei garzignoli,  
 Perchè ogni volta ch' el paron m' à visto,  
 Dai ancuo, dai doman ; adesso un toco,  
 Un altro pezzo d' aseno deboto ....  
 A chi l' alo po dà ? tuto a Biasioto.  
 E ghe n' ò un pezzo in conza, che se mai  
 La se degnasse .... Go tanti doveri !  
 Capisso che l' è tropa confidenza ...  
 Ma ghel dago de cuor, sala, Celenza ?

BAL. Da cavalier che no ti disi mal ...

No ghe n' ò più magnà .... portilo pur ;  
 Metighe arente dodese limoni,  
 Un bel mazzo de sparesi, che vogio  
 Farte proprio sentir el mio vin piccolo ....  
 Ti farà riverenza a mia muger ...

BIAS. Grazie, celenza ! ma i limoni e i sparesi

El paron l' ha mandai za sul marcà,  
 Solita carità ! l' aseno po ...  
 Ghel portarò doman,  
 La fazza conto averselo magnà,  
 E quella todescota,  
 Che ghe recita in leto da muger ? ...  
 Vogio dir la parona : in verità,  
 Per lodarme no go boca che basta.  
 E sì, la varda, grazia Dio, l' è un forno ....  
 Quand' è stà ? ... l' altro zorno  
 L' ò pregada imprestarme un quartarol  
 D' orzo nostran : in bota,  
 Per no lassarme sgangolir de smania,  
 La me n' ha fato dar dal so lachè  
 Una carga de quello de Germania,  
 Qua su le spale, che ga i grani grossi  
 Proprio cussì ! ( me dol ancora i ossi ;  
 Son mezzo sfracassà ! )  
 E la indovina ? la me l' à donà ;  
 E po no basta minga ...  
 No passa di che a Pasqua, o a mia sorcla,  
 Cavandose 'l bocon proprio de boca,  
 No la ghe daga, co la xe de vogia,  
 Ora un pezzo de vaca, ora de trogia !

BAL. Adasio, sior ! da cavalier, me par ...

BIAS. La senta pur, co i vien, dopo disnar,  
 A sorar in giardin,

Mi za i me trova là  
 Strussia, sgobà, afamà! No i dise minga  
*Tiò sto paneto e magna,*  
 Come faria qualche bifolco, oibò!  
 I vol vederme là chioco, imbriago,  
 Perchè a mi, che no togo che graneta ....  
*Biasioto a ti .... fosseta ....*  
 E i me fa tor per forza  
 Una bela presona de rapè  
 Che me buta 'l cervelo sul topè;  
 E mile cortesie,  
 Tute za su sto gusto,  
 Che me fa in cao del mese  
 Sparagnar meze, se no più, le spese.  
 Fin stamatina, perchè gera festa,  
 L'è dà ai mii tosi un mustazzon a testa!  
 In soma i mii paroni,  
 Ghe lo zuro qua a pie  
 Da povero, onorato giardinier,  
 (E se fusse a cavallo,  
 Tanto ghel zuraria da cavalier)  
 I spande grazie per tanto de foro,  
 E i sa far pompa dei so cuori d'oro ....  
 Una per tute, qua,  
 Qua no va atorno rosto,  
 Qua no bogie pignata  
 Se no quando se trata  
 De far bancheto a cavalieri, a dame;  
 Qua, a le curte, no magna  
 Che quei che no ga fame,  
 Fata sempre la debita ecezion  
 Per Vocelenza .... vegno ... za paron. »  
 E squadrando ghe là una riverenza,  
 Biasioto per la vigna,  
 Co i so tosi, ridendo, se la sbrigna.  
 El senator Balan gnognolo, storno,  
 Ghe pensa su un pocheto,  
 Ghe varda un pezzo drio co l'ochiaieto,  
 Po se mete a sbragiar: « re d(i) furbazz!,  
 Te farò, sastu, scavezzer i brazzi. »  
 Se biscola a zig-zag, e va pian pian  
 A beber do caffè dal sior piovàn.

## I DO LIONI.

Su l'arene deserte de l'Africa;  
 Dove el sol de la tera fa cenere,  
 Verso un' arida croda de porfido,  
 Tormentai da una sè che li sofega,  
 A vint' ore, nel cuor de l'istà,  
 S'è do enormi lioni incontrà.  
 Là dal dì ch'è andà in aria Cartagine  
 No gh'è gnanca più l'ombra d'un albero,  
 Là no piove, rusceli no mormora,  
 E do sole o tre volte per secolo,  
 Fra quei sassi per puro morbin,  
 Qualche Naiade ha fato pissin.  
 Ma quel dì con insolito tremito  
 De la croda sconvolte le viscere,  
 De poc' acqua s'è avertò un deposito,  
 Che scampando la tenta de scondersè.  
 Quei lioni che acorti i se n'è,  
 Sbalza, svola, a stuarse la sè.  
 I podega, se i aveva giudizio,  
 Rinfrescarse in fraterna l'esofago,  
 Ma superbia invidiosa li rosega,  
 E i se varda, e i se brontola, burberi,  
 Con un rantego unissono a do:  
*Mi voi beber .... mi solo, e ti no.*  
 Za le schizze ghe sbufa, ghe zutola,  
 Va le coe stafilandoghe i nomboli,  
 Le mascele i spalanca sanguivore;  
 E le sgrinfe i desguanta sbregghiferè,  
 I se cufola, i sguinza, i dà su ...  
 Se sperè separarli, andè vu.  
 I se aventa, i stramazza, i se sapega,  
 I se sgrafa, i se struca, i se mastega,  
 Denti a denti s'incrosa, se strotola,  
 Fioca i peli, la bava ghe sgiozzola,  
 D'urli rauchi e stonae da violon  
 I concerta un dueto a Pluton.  
 Quei rugiti de rabia in baritono  
 Va su in aria, in le grotte se furega  
 E le fiere, i volatili, i retili,  
 Spaventai da quel' orida musica,  
 No se sogna fermarse a vardar,  
 Svola, serpe e se torna a intanar.

Nova stizza li ponze, li stuzzega,  
 Più feroci i lioni se lacera;  
 A' durà quella zufa teribile  
 Più de quele de Achile con Ettore,  
 Perchè Venere, Marte e Netun  
 No i ga tolto el partio de nissun.  
 Tanti sforzi ogni forza ghe anichila,  
 Su le gambe che trema i se biscola.  
 Ansa i fianchi, dal sgrugno ai garetoli  
 Sangue vivo ghe spruzza, ghe pissola;  
 liesta in tera, tra bava e suor,  
 Denti e sgrinfe, trofei del furor.  
 Trabaland, sbrissando i se rampega  
 Da quel' acqua a cercar refrigerio:  
 Ma che? mentre a la barba dei posteri  
 Stava i mati strazzandose i *didimi*,  
 S'è quel' acqua a so logo incassà ....  
 El sol gh' arde el respiro .... i mor là.

## L'AVA E 'L PAVEGIO.

Za l'aurora per i campi  
 Dà la cazza al lusariol;  
 Za da l'onde tra i so lampi,  
 Scampa e ride el novo sol.  
 Dise a l' ave la regina:  
 « Pute care, adio, bon pro!  
 Che fragranza a la colina!  
 A reverderse a filò. »  
 Va la fola industriosa  
 Sora i gigli, su i gimè,  
 E chi al timo e chi a la rosa,  
 Come andemo nu al caffè.  
 Ma nu spesso, povereti,  
 Rei veleni a sorsegiar,  
 Senza spesa nè sospeti  
 Ela 'l netare a chiuchiar.  
 Stava giusto un'ava un zorno  
 S' un garofolo in zardin,  
 Supeghandoghe d' intorno  
 A sorseti el coresin.  
 Su quat' ale tricolori  
 Un pavegio *bel espi*  
*Racc. Poes. Ven.*

Passa in quel che a mile fiori  
 Dà de naso tuto 'l dì.  
 El la vede far bancheto  
 Sul garofolo co 'l va,  
 E co 'l torna dal boschetto  
 El la trova ancora là:  
 « Ma bisogna (el dise), cara,  
 Che siè proprio de bon cuor,  
 Che costanza! l'è ben rara!  
 Chiuchiar sempre sempre un fior!  
 Parè un' ostrega incrostada  
 Su la croda in mezzo al mar,  
 Che no sa trovar la strada  
 De poderse destacar. —  
 — Bel emblema dei galanti,  
 ( La risponde ) avè rason;  
 L'ava e l'ostrega costanti  
 Ze un perfeto paragon;  
 Questa e quella serve atente  
 Al so nobile destin,  
 E chi è nato a no far guente  
 Nasa fiori per morbin. »  
 Ste delizie podè averle  
 Vu che ozioso ve fa 'l ciel,  
 Ma da l'ostrega el vol perle;  
 E da mi la cera e el miel.

## EL TIMO E L'EDERA.

Diseva al timo l' edera  
 Su l' alba sta mattina:  
 « Povera piantesina,  
 Più che te vardo, viscere,  
 Più ti me fa pecà;  
 Ti, e to fradelo ditamo,  
 Ve alzè una quarta apena,  
 Destirè pur la schena,  
 Ma galinete pepole,  
 Dovè cufarve là;  
 Almanco mi, col rovere,  
 Pianta diletta a Giove,  
 Vado, saveu fin dove?  
 A stafilar le nuvole  
 Che sporca el viso al ciel. —

— Vero, lassù vedendote  
 Corer a torte 'l primo,  
 Vero (risponde 'l timo)  
 Stava sul cuor l'invidia  
 Per travasarme 'l fiel;  
 Ma megio esaminandome,  
 Go dito: me vergogno;  
 Mi no go alfin bisogno  
 De tor in prestio crozzole,  
 So star in pie cussi;  
 Za quando nasce l'edera  
 Dai roveri lontana,  
 In cao la settimana  
 Ghe dise timo e ditamo:  
*Schiaio, pepola, bon di.*

### L'ASENO E MI.

I sta mo ben insieme!  
 Grazie, ma za, credeme,  
 L'aseno in pien xe un discolo.  
 El zorno sempre in visita,  
 La sera el va, el se furega  
 Per tuti i club de spirito,  
 Sempre la note a cotole:  
 Stalo mo assae co mi?  
 El mondo, amici, va de mal in pezo;  
 Oltre le prove che ga tuti mi  
 Ghe n'ò un'altra, che par una fredura,  
 Ma che me fa una rabia maledeta.  
 E sau cossa? La smania dei curiosi,  
 Che no xe mai contenti  
 Se no i ve conta fin in boca i denti.  
 Ve saltava una volta per la testa  
 Qualche caprizio, qualche bizaria,  
 De quele che la moda o 'l pregiudizio  
 V'obliga sconder per ipocrisia?  
 Per esempio, el bisogno che gavè  
 De renderve in secreto la giustizia  
 Che l'invidia dei omeni ve nega?  
 Spassizzando, o sentà su la carega,  
 Senza timor de incommode sorprese,  
 Percchè tuti badava ai fati soi,  
 Podevi chiaccherar da vostra posta,

E confortar l'amor proprio a bon pato:  
 Al più col rischio de passar per mato.  
 Ma proveve mo adesso .... Si! minchioni!  
 Mezza dozzena almanco de bufoni  
 Ve sta a le coste, e spia  
 Tuto quel che dirè de bona fede  
 Suponendove solo,  
 Copia parole, ochiade, pantomime,  
 Fugigna suso in pressa la gazzeta,  
 E manda i fati vostri per stafeta ....  
 Pezo! da Esopo in qua  
 Le bestie no gaveva più parlà.  
 Sì mo, in anima mia, che i moralisti,  
 Che predica al deserto, e za prevede  
 Che presto o tardi à da cascarghe l'ugola,  
 Per aver pronto el so lacheto in coa  
 Che porta la parola in vece soa,  
 D'acordo coi poeti, à za tagià  
 El fileto a le bestie da recaò.  
 El gato, in conseguenza, à lassà el gnao,  
 L'oseleto el cicù,  
 No ruze più el lion,  
 No ragia più el somaro;  
 Quelo perioda come Ciceron,  
 Questo fa versi come Anibal Caro.  
 E cussi, su l'esempio dei pedanti  
 Che gh'à insegnà, va a cazza anca le bestie  
 Dei secreti de l'omo:  
 E l'aseno, el cavalo, el manzo, el can,  
 I volatili, i pesci,  
 E fin tra questi, el scombrow de paluo  
 (Che no sarà mai bon coto, nè cruo)  
 Porta e svoda qua e là  
 La satirica batola moral,  
 E gode a spese nostre el carneval.  
 E, a proposito d'aseni, aveu visto  
 Quela steppa de rechie? zogaria  
 Quel che volè, ch'el diavolo, che i porta,  
 Ghe l'è mo espressamente consegnae  
 Per far ai zentilomeni la spia.  
 Ne i xe minga romanzi, nè fiabete!  
 Un de sti siori da la bela rechia  
 Me l'è mo fata a mi l'ano passà ....  
 Quanti mo semio qua? quatro e tre sete ....  
 Tuti za amici, e spero  
 Che no vorà nissun .... gnanca per sogno ....  
 Ve la conto, siben che me vergogno.  
 Gerimo ancora in lugio,



Dopo esser sta fin mezza note a Parloa,  
 In compagnia de dona Ilaria .... Come ?  
 No ve la recorde ? la spagnoleta,  
 Rica, brillante, leterata, bela,  
 Che me l' à po ficada, e xe spària  
 Col padre Geremia ? ... Ben : giusto quella.  
 Tornà in vila, da mi, ma senza sono,  
 In vece, com' el solito,  
 De butarme sul leto,  
 M'ò messo a spassizzar su e zo soletto,  
 Assorto nel pensier de dona Ilaria  
 Per un *alé* del mio castelo in aria.  
 In casa fava un caldo ....  
 L'aseno del gastaldo  
 Pelando el coego me vegniva drio ;  
 No gaveva badà. Spontava el di,  
 E a mezza voce diseva cussì :  
 Graziadio, no ghè più equivoci :  
 Dona Ilaria xe mo mia !  
 Ma mi stimo la pazzia,  
 E 'l coragio de quei tangari  
 Dé voler lotar co mi ....  
 Figurarse ! un matematico !  
 Bela vè ! perchè l' è inglese ? ....  
 E quel sior .... da che paese  
 Xelo ? ah sì, da la Martinica ;  
 El martin lo go anca mi !  
 Mercanton ! po za ! da nespole !  
 Ih ! co i ga cento zechini  
 I se crede mo .... arlechini.  
 Sangue puro ghe vol, spirito,  
 E po 'l muso che go mi ! ....  
 E quel padre canta vesperi ?  
 Per mostrar la bela pele,  
 Tegnir pronte le scarsele ..  
 La mosina mo d' Ilaria,  
 Padricelo, xe per mi.  
 Ma gh'è 'l conte, che sa ben la musica,  
 Le bele arti .... Nè bele, nè brute  
 Xe le arti. Le perora tute  
 Ch' i artesani le impari per mi !  
 No go nei, nè voi machie : intendemose ;  
 Mi go tanto de corno su l' arma !  
 Se me l' à rosegà qualche tarma,  
 No son morto, lo cambiarò mi.  
*Ti, ti è stà democratico .... Bon !*  
 E che colpa ghe n' ogio mo mi,  
 Se 'l governo col so spegazzon

A' volesto sporcarme anca mi ?  
*Eh ! ti geri municipalista ! ....*  
 Ah ! perchè no i v' à messo in la lista,  
 Volè 'l *gius*, el mio caro ignorante,  
 De spazzarme qua e là per birbante ?  
 Cedo 'l posto, e quel *gius* lo voi mi !  
*Ma i to ani ?* Che ani ? soi Nestore ?  
 Graziadio son ancora un bel omo ....  
 Bei riflessi ! me strussielà el pomo ?  
 Go diritto de tormelo mi !  
 Po Ilaria ga del spirito :  
 No la xe minga un oca ;  
 Gh'è vegnù l' acqua in boca  
 Savendo chi so mi !  
 Quand' è stà ? zioba o venere ?  
 No, no, sabo passà,  
 La me contava in pra,  
 Che la gaveva a Cadice  
 Lete za tute l' opere  
 Cho ò scritto e stampà mi !  
*E in primis la comedia*  
*De l' acqua alta, celebre*  
 Anca per quella cabala,  
 Che m' à obligà a fischiamela  
 Per prudenza anca mi.  
 E po le mie tragedie  
 Gustavo, Amleto, Merope,  
 E Nemur e Adelaide,  
 E cossa scgio mi !  
 El mio *romanzo istorico*  
 L' al sa tuto a memoria.  
 In so confronto el *Candido*  
 De Volter ghe fa nausea.  
 Lo so ben anca mi !  
 La canta la mia nitida  
 Parafrasi del *tempio*  
*De Gnido e le tue fulgide*  
*Pupille* ... con un' enfasi !  
 Che m' à incantà anca mi.  
 Cossa che la se cocola  
 Quele otave satiriche  
 Ai Visentini ! un diavolo !  
 La ghe lo pesca el spirito ...,  
 E se ghe n' è 'l so mi !  
 E le mie favole ?  
 Par impossibile :  
 No la sa silaba  
 Za del vernacolo,

E pur ! parleghene,  
 La xe fanatica.  
 E gli *Anni miei* ?  
 Su per i dei.  
 Ma sora tuto po,  
 La mia *Pulcela* :  
*Oh Dio ! co bela* !  
 La ciga ... mata !  
 E vien quei stolidi  
 A far regata  
 Con chi ? co mi.  
 A sto passo me volto  
 Per far un altro ziro, e indovinè-mo ?  
 Me vedo in fizza l' aseno,  
 Che co la so creanza de famegia  
 Me gera vegnù drio per ascoltarne.  
 El me sera la strada,  
 Struppiandome con una riverenza,  
 E po con un' ochiada  
 Da sincopa porcina  
 Spalanca el so bochin da colombina,  
 E me dise cussi,  
 Ma tal e qual, a mi :

« Servo umilissimo — de vo celenza,  
 La scusi in grazia — la confidenza,  
 Ma mi no posso mo, — proprio in conscienza  
 Tegnir più in stomego — cussi in semenza  
 La mia indelebile — riconoscenza.  
 E vada i critici — a dirla ai pìavoli  
 Ch' el far l' elogio — da se medesimo  
 Xe 'l più ridicolo — de tuti i yizi  
 Che sporca i omeni. — L' è 'l più magnanimo  
 Dei benefizi — che i fizza al prossimo  
 Che sta ascoltandoli — e lo so mi !  
 Avilio più del solito,  
 Da quel disprezzo gotico  
 Che se sol far dei aseni,  
 Stava sguazzando a lagreme  
 Qua per l' orto el parsemolo ;  
*Che vita miserabile* ;  
 Diseva tra de mi  
 Vostra celenza capita :  
 Ghe rassegnò el mio ossequio ...  
 La me ga in quel servizio ...  
 Pazienza, so el mio debito :  
 Mortificà la seguito.  
 Co semo là a quel rovere,  
 Sentio che la va in estasi,

E che in stil ditirambico  
 La va via componendose  
 El so bel panegirico,  
 Gnente de più omogeneo  
 Ai bipedi e ai quadrupedi,  
 Slongo le rechie, e avido  
 Me chiuchio con delizia  
 El *colt* dei so meriti !  
 Ma coi mi confrontandoli,  
 Me par che *Piero d' Abano*  
 Co la so verga magica  
 Me cambi el fiel in zucaro,  
 El mal umor in balsemo,  
 E vado tanto in gringola,  
 Che a poco a poco dubito  
 Fin chi sia l' omo, o l' aseno,  
 Se vo celenza, o mi !

Per domar el disprezzo dei omeni  
 Basta, digo, un' illustre prosapia ?  
 Basta render giustizia al so spirito ?  
 Cocolarse ? Capirse 'l più amabile ?  
 So a cavallo. Chi mai xe più nobile ?  
 Chi più doto, poeta, o filosofo ?  
 Chi al bel sesso più caro de mi ?

Perchè, la suplico : — vorla la nascita ?  
 Son qua co l' alboro, — eco 'l mio stipite.  
*In primis*, l' aseno — ch' a portà 'l mentore  
 De Baco a l' Indie — e in alto vedela ?  
 E in alto mi  
 La metempsicosi — m' a dà Pitagora,  
 Le metamorfosi — Mida, Apulejo,  
 E po una serie — innumerabile  
 D' aseni eroici — de tuti i ordinì,  
 E in alto, mi !

Taso l' energica mussa fatidica  
 Che al gran Balamio co le so chiacole  
 Ga fato el pifaro scondere in manega,  
 Che benemerita ai primogeniti  
 Ga infuso el spirito  
 Che godo mi !

E andemo a l' ultimo, ch' è più a proposito !  
 Se lo ricordela l' aseno energico  
 Che co la galica  
 Famos' amazone ( che vo celenza  
 Rendarà celebre, anca in Italia )  
 Ga bu comercio d' altro che letere ?  
 Da quello apunto in reta linea mo  
 Discendo mi !

Ma passemo a un altro articolo.

Tuti sa se son filosofo

De la seta più difficile.

Mi son l' Ercole dei stoici!

Impropri e catorigole

Xe sinonimi per mi!

Sfido scurie, legni, cogoli;

Se Zenon gera insensibile,

Croda e porfido son mi.

E poeta? altro che Pindaro!

Lu stonando metri esotici

Scialaquava un mar de silabe,

Mi co un solo verso armonico

Rompo l' aria, sbrego l' etere,

E l' *I*, e l' *O* me basta a mi!

Se son doto? legi e codici

Xe zogatoli per mi!

E po, curte ... chi vol titoli

In concorso a le academie

No se fazza ombra del merito,

Marchi franco, cora a torseli

S' el somegia un poco a mi. »

Xestu mo amabile?

« Oh! qua po interogo

La so sinderesi

Ecelentissima.

La pol za dirmelo

Senza metafore,

No passa un' anima ...

Nei so coloqui

Antiplatonici

Co dona Ilaria

No pagaravola

Cinquanta talari

Per esser mi?

Nascita, ciera, spirito

Par che ne voglia simili:

E pur me resta un dubbio ...

Ma podemo risolverlo

In statura mo i aseni

Porli lotar coi omeni?

La me fazza una grazia:

Cara ela misuremose:

Vedemo chi se supera,

Se vo celenza, o mi.

Ma prima toleri quella meliflua

Boca benefica, che m' à l' ambrosia

Sbrutà su l' anima, un sfogo ingenuo

De gratitudine, un dolce servido

Baso col bocolo anca da mi! »

E drezzà su le do zampe da drio

Coi ochi lustrì e un gesto

Tut' altro che modesto,

Mel vedo in perpendicolo d' intorno

In ato de saltarme a brazza colo.

Oe, me l' ò fata a gambe, e da quel zorno

Me morsego la lengua co son solo.

Contela se volè ... ma za capì ...

Senza mai dir che la sia nata a mi!

### EL LION E 'L MOSSATO

Spassizzava gravemente

Un lion de casa vecchia

Un mossaio ghe va arente,

E ghe dise in t' una rechia:

« Ghe siroco sfondradon!

Uf! che caldo, za paron! »

Con un cefo da Megera

Ghe risponde so celenza:

« Escremento de la tera,

Chi t' à dà sta confidenza?

Vil inseto! ... Chi è de là? ...

Cazzè via costù de qua. »

St' impropri, oh Dio! al mossaio

Fa vegnir mo su la stizza.

El ghe dise: Xestu mato?

A mi ingiurie! dime, schizza? ...

Se me meto ... sapi ben,

Che ogni bissa à 'l so velen:

Gastu boria, di, per quella

Celeghera sgrendenada?

Ti me mostri la mascela,

Po le sgrinfe? ... l' è falada;

Da volatile d' onor

Te go giusto ... ma de cuor.

Varda el toro ... xelo grandò?

I so cornì no ghe giova

Se lo vago tormentando,

El me cerca ... nol me trova.

Fa el to conto ... come? ... no?

Ben ... mio dano! provarò »

Dito questo, beca e via;

E po torna, beca e svola;

El ghe fa una becaria

Dal bonigolo a la gola ;  
 Per le rechie el ghe va su ;  
 Beca e sbrigna ... nol gh'è più.  
 El ghe sbalza dai zenochi  
 Al barbuzzo, a le zenzive :  
 El ghe ponze el naso, i ochi  
 E le parti sensitive  
 Fin per farlo disperar  
 Ghe va el sfinter a becar.  
 El lion, che ga presenti  
 Tanti eroi de casa soa ;  
 Che formai crede i viventi  
 Per tegnirghe su la coa ;  
 No se volta, marchia a pian,  
 Sta con aria da sultan :  
 Ma sentindo che i beconi,  
 A la barba dei antenati,  
 Lo criela, *mo, minchioni*,  
 Tra lu el dise, « *questi è fai!* »  
 El scomenza a pian pianin  
 A far scurzi da arlechin.  
 Per finir po quela scena  
 Manda al diavolo el sussiego,  
 Co la coa sferza la schena,  
 Co le sgrinfe se fa un sbrego ;  
 Fica i denti dove el pol,  
 E so dano se ghe dol ;  
 Nè podendo mai cucarlo,  
 Se ghe svegia un tal rabiezzo  
 Ch'el fa cosse da ligarlo.  
 El mossato ride un pezzo,  
 E po el canta in do-re-mi :  
*Te l'ò dito, schizza? a ti ...*  
 Fato el trilo, beca e via ;  
 Ma scorendo la campagna  
 El dà drento a una scarpia  
 E un ragneto se lo magna.  
 Cussì avemo do lizion  
 Dal mossato e dal lion.

### LA LODOLA E LA TORTORA.

Là tra i campi a la Fosseta,  
 Una bela lodoleta,  
 O in delassore, o in bemi  
 Cantuzzava tuto el dì.

La trilava con un gusto !  
 La intonava cussì giusto !  
 No gh'è un pelo da zontar ;  
 Oe ... la gera da magnar.  
 Ma in pochissima distanza  
 Una tortora de Franza  
 Fava intanto, cèn ardor,  
 Saveu cosa mo? l' amor.  
 Graziadio tortore e done  
 Xe stae sempre fedelone  
 Qua da l' Alpi ; ma de là ?  
 Eh ! le ga la fedeltà ...  
 Co le nasce in quei paesi,  
 Sempre afabili e cortesi  
 Le dà basi, e *rendé vu*  
 Fina al cuco e al pelachiu.  
 Questa in fati, agosto o magio  
 Ghe n' ha vinti sul so fagio  
 Tuto el dì per el coin  
 Che ghe stuzzega el morbin.  
 La carezza per averli  
 Pronti sempre tordi e merli :  
 La la zira cussì ben,  
 Che contenti la li tien.  
 Se ghe manca questo o quello,  
 La ga pronto el terz' oselo  
 De riserva sul figher,  
 Che ghe fa da cavalier.  
 Qualche volta mo i se stufa,  
 I taroca, i fa barufa,  
 Nè finisce la question  
 Che i ghe dà qualche becon.  
 Ma la lodola tranquila  
 Varda, ride, canta, trila ;  
 Tenta intanto, se la pol,  
 De imitar el russignol.  
 Giera squasi un' ora e mezza,  
 Che su l' orlo d' una tezza  
 La cantava : *che furò ?*  
*Euridice dove andrò ?*  
 Mal apena la taseva,  
 I cainegri rispondeva  
 In coreto a quattro, a tre :  
*Euridice, oh Dio! non c' è !*  
 Ma la tortora, che alora  
 Stava giusto là dessora  
 A le strete co un fasan,  
 « Eh, *la dise*, che bacan !

O' d' aver, l'è proprio bela !  
 Sempre drio mo la capela ?  
 E a la lodola : » Ma scer,  
 Ne sorie vu un peu vu t r ?

Che ve vegna la pivla !  
 Cant  sempre ! mo de  ia !  
 Tuto quanto el santo di  
 Cici-cic , cici-c .

Dove xe i vostri morosi ?

I mumenti xe preziosi,  
 No la torna minga pi   
 Saveu, fia, la zoven t .

Eh ! da brava su, co sesto  
 F  l' amor e felo presto ;  
 Val pi , cara, un baso o d ,  
 Che una risma de rond . —

— *Me Madam*, la ghe risponde,  
 Sto discorso me confonde,  
 No la vogio contradir,  
 Sar  el baso un elisir.

Vita mia, cuor mio, raise !  
*Je me pam !* Co la lo dise  
 Sar  un zucaro panon  
 Per i oseli del *bon ton*.

Ma mi vivo a la carlona :  
 No go sesto, no son bona ;  
*Je me san d' avoir un cheur*,  
*C' an scantan ! s'   mon boncur*.

Po m' ha dito una calandra,  
 Che   viaz , che vien da Fiandra,  
 Giusto gari, l  tra el fen,  
 Che quel dolce xe un velen.

Che l' amor fa tanti dani,  
 Ch' el ne scurta fina i ani ;  
 Ch' el ne sbrega in pezzi el cuor,  
 Che l'   in soma un traditor.

Ste opinion, cuss , in contrasto  
 Mi a deciderle no basto,  
 E per tema de falar  
 Canto, e seguito a cantar ;

Po, no sala ? i gusti varia ;  
 Ela ecetera „... e mi un' aria.  
*Less -ma xant  a mon es*  
*Ma bel dam e c-l-en vu bes*.

Spiritosa ! seria, seria,  
 Dise l' altra : — *Che miseria !*  
*Xant  donc, xant  mam-zel*,  
 E la spica un svolo in ciel.

El fasan ghe sbrissa drio,  
 I se sconde, i va a far nio  
 N  s'   visto po mai pi   
 Quela tortora a dar su.

L'   zir  la Trevisana,  
 L'   passada in Padoana,  
 In Polesene, in Friul  
 Co la coa tacada al cul :

Vogio dir co i so galanti  
 Che tre al zorno tuti quanti  
 S'   godesto el so *antr ien*  
 A do bechi col so ben.

Ma chi viaza su le piume,  
 Sia mo istinto sia costume,  
 Spesso senza volont   
 Torna l  dove l'   st .

Cuss  un di, dies' ani dopo,  
 Nel sentir sbar r un schiopo  
 L  pochissimo lontan  
 La s'   tolto zo de man.

E tra i campi a la Fosseta  
 Xe la tortora costreta,  
 Da la fufa del fusil,  
 De salvarse in t' un fenil.

L  mo giusto in quel mumento  
 Puf, un refolo de vento  
 Buta .... chi mo ? indovin  ;  
 Quela lodola a la f .

Veramente in cao dies' ani,  
 E qua e l  gh'   dei malani,  
 Ma no intendo dir perci ,  
 Che i sia eguali in tute d .

Le fatezze xe sparie ;  
 Le xe a muso do' scarpie ;  
 Ma la lodola, sior si,  
 La ga ancora .... me cap  ...,

L' ochio vivo, el penin lesto,  
 Le so alete, qualche resto  
 De quel certo no so che,  
 Che xe bon fin che ghe n'  .

Ma la tortora gramazza  
 Xe a dretura una scoazza,  
 Goba, strupia : un ospeal  
 No ga in cuzzo la so equal.

Le se varda fisse, fisse,  
 Incant e come le bisse ;  
 Le voria pur saludar :  
 Ma ghe par e no ghe par.

Pur la lodola cortese  
 A la tortora francese  
 Dise alfin : — « ah, Dieu merci !  
 Ma scer dam vus et issi  
 Giusto gieri ho cercà d' ela,  
 Sala a chi mo ? a so sorela.  
 El non plu n' an savè rien.  
 Come stala ? stala ben ?  
 Vardè come el tempo svola !  
 Me par gieri quando sola  
 Con quel so *monsù pison*  
 Ga chiapà le convulsion.  
 Se ricordela quel zorno  
 Co à dà suso quel cotorno ?  
 Che scenon sora el pomer  
 Con quel merlo forestier ?  
*Mè a propo Madam !* la scusa ....  
 Dove xeli ; son confusa  
 De trovarla qua cussì  
*Vo galan, vo bonsami ?* —  
 — *Ah, ma scer !* ah cara fia !  
 La risponde : l'è finia.  
*Chi refusere de pleurs*  
*Vis a vi de me malheurs ?*  
 Son qua strapia, tuta un grumo.  
 Gusti, amici, tuto in fumo ?  
 I m' à tuti abandonà  
 Me dol tuto: fina là ....  
 Go un tumor qua su sta spala,  
 Go do bruschi soto un' ala,  
*X' è la gal, x' è le bubon,*  
*E xè crass voalà 'l pumon.*  
 Voleu 'l resto ? senti el pezo.  
 Crederessi mo ? anca in mezo  
 Ste delizie m' arde el cuor  
 El vesuvio de l' amor ;  
 E a le curte, no gh'è ozelo  
 Che se mova, o bruto, o belo,  
 Che col vedo svolar su ....  
 Ah ! .... *coman vu portè vu ?*  
 — Mi, madam, matina e sera  
 Son ancora quel che gera,  
 Una zuca senza sal,  
 Ma no stago minga mal,  
 Perchè, vedela, è ben vero  
 Che no go più el beco intiero ;  
 Za el s' aveva da fruar ....  
 Ma el me serve a becolar.

Xe ben vero che me manca  
 Qualche pena a l' ala zanca ,  
 Nè me rischio da sto april  
 Svolar più sul campanil.  
 Ma svolatolo, me tegno  
 Oe per altro mi me inzegno ....  
 Dormo ancora sala po  
 Su quel rovere là zo.  
 Quel che un poco me ratrista  
 Xe che, oimè, perdo la vista,  
 Ma distinguo ancora ben  
 Tuti i osei che va e che vien.  
 Me fa pur malinconia  
 Che da un mese so irochia,  
 E co fazzo cici-ci,  
*Ah madam :* no son più mi.  
 Ma per altro cussì vecchia  
 Graziadio go bona rechia,  
 E co canta el russignol  
 So beata. Chi me pol ? »

#### KAKALOR E KINKA'.

El prencipe Kinkà, l' ereditario,  
 Del vastissimo impero de la China,  
 Spassizzava in un parco solitario  
 Col so mentore al fianco in bagolina,  
 E la noia, che ai grandi el tafanario  
 Xe solita incandir a la perlina,  
 Secava, come la sol far coi-picoli,  
 A so altezza imperial ambo i testicoli.  
 Ministro in parte de st' operazion  
 Gera el mentore istesso Kakalor,  
 El qual con serie indefesse lizion  
 Ghe insegnava el mistier de imperator.  
 Che, come el nostro, à da esser savio e bon  
 E magnanimo e intrepido se ocor ;  
 Perchè po in fondo el prò de ste virtù  
 Parlè mo schieto chi lo gode ? nu.  
 Mentre Kinkà con aulica decenza  
 Va sbadagiando, un russignol a svolo  
 Se fica là tra i carpani, e scomenza  
 A gorghegiarse un delizioso a solo.  
 In estasi .. ma, avezzo a la violenza,  
 Kinkà ciga : *chiapelo*. El russignolo

A la minacia de la prigionia  
 Sbalza a caval d' un zefireto e via.  
 In colera so Altezza — « Vegni qua,  
 ( El dise a Kakalor ) via, sior maestro,  
 Spieghe me mo sta singolarità.  
 L'oseleto el più amabile, el più destro,  
 Compositor de sol-do-re-mi-fa,  
 Scampa, se sconde in bosco: elo un bel estro?  
 E po me vien i celegati a gropi  
 Fin su la regia a rovinarme i copi!  
 → Signor, risponde all' imperial infante  
 Severo Kakalor, dovè imparar,  
 Che mentre se va el scioco e l' ignorante  
 Al so simile franchi a presentar  
 L'omo grandò se sconde: ma el regnante  
 Che felici i so popoli vol far,  
 Nol minacia; lo cerca, lo carezza ....  
 Se torna el russignol, creanza, Altezza. »

## EL TESORO.

Bakan, Peken, Tonthun,  
 Tartari e amici del siccento e un,  
 Mossi da la pia brama  
 De basar el bonigolo al gran Lama,  
 Viazava tuti tre  
 A pie per le montagne del Tibè.  
 Un dì, mentre che i vol  
 Salvar le zuche da l'ardor del sol,  
 Soto d' un castagner  
 I trova a pie de l' alboro un forzier,  
 Ch' l' abia portà là  
 No vel dirò: sò ch' el gera un casnà  
 D' un imenso valor;  
 No ga forsi altrettanto el gran signor!  
 Averti i trova drento ....  
 (Lassemo andar le sie mile tresento  
 Pezze d' oro chinesi,  
 E un sacco de monea de quei paesi)  
 Do borsone de pele  
 De sta pegola .... piene .... bagatele! ....  
 Saveu de cosa? una  
 De perle a vovo de color de luna;  
 E l'altra de brillanti .... ma .... cussi ....  
 Quatro cambia la note in mezzodì!

Racc. Poes. Ven.

Ve lasso imaginar  
 L' estasi, la sorpresa ... Che saltar!  
 I pianze, i ride; in fati  
 Per la consolazion i è squasi mati.  
 In division leal  
 Se tol ognun la terza parte egual,  
 E impenie le bissache,  
 I canta a coro: eviva pur le mache!  
 El sol no i scota più,  
 Carghi, ma alegri, i seguita a andar su.  
 Po, camina, camina,  
 Sgobai dal peso, a mezzo la colina  
 I se ferma; e Peken  
 Dise: « fradei qua ghe vol biava, o fen.  
 Drento de sto machion  
 Chiapemo fìa, magnemo quà un bocon;  
 Bevemoghene un goto,  
 E dopo de aver fato un pisoloto ...  
 — Za el gran Lama no scampa:  
 — El libro è bon, ma i ga falà la stampa, »  
 Dise allora Bakan,  
 « Perchè, fradei, no gh' è più vin, nè pan. —  
 — Pol ben andar qualcun  
 De nu là zo, ghe risponde Tonthun,  
 Quel castelo a man zanca  
 Ne darà tuto quello che ne manca.  
 I trà el toco, e la sorte  
 Manda Peken più zovene, più forte.  
 Calando zo a la vale  
 Co la bissaca piena su le spale,  
 Che nol se fida de lassar là su,  
 Cussi intanto Peken dise tra lù:  
 « Sì, so rico, graziaadio,  
 Quel che porto tuto è mio.  
 Ma no xela una pazzia  
 De viazar in compagnia?  
 Tì à dovesto far tre parte!  
 Mi no so mo cosa farte ....  
 A to dano .... ma per altro  
 Posso ancora .... perchè no ....  
 Go sta fiasca .... compraro, ...  
 Del vin dolce, e mezzo vin,  
 Mezzo tosego, ma fin ....  
 Me li bruso come stizzi  
 Sti mii cari e fidi amici.  
 Ghe dirò, che là al castelo  
 Mi ò disnà come un porcelo ....  
 La mia parte ghe la pago.

Fazzo un poco l'imbriago ;  
 Fazzo finta de dormir ....  
 E co i vedo a sgangolir  
 Rambo tuto, tute mi ....  
 Me la sbrigno avanti di ....  
 L'amicizia ? .... pregiudizio ....  
 El gran Lama ? .... in quel servizio. »  
 Ma intanto che Peken  
 Ghe provide el disnar, missia el velen,  
 Stravacai soto un rovere pian pian  
 Se diseva cussì Tonthun, Bakan.  
 « Varda mo là che diavolo  
 De pazzia, de sproposito !  
 Torse co nu quel stolido,  
 Farlo co nu viazar ?  
 No n' à mo bisognà  
 Perder un terzo, e più ?  
 E un terzo del casnà  
 L'ha da goder colù ?  
 Ma, dime, no saressimo  
 Veramente do pampani,  
 Se, col vien, no savessimo  
 Farghelo là spuar ?  
 El too xelo guà ? (135)  
 Varda el mio ... col vien su  
 Destiremolo là ....  
 Spartiremo tra nu .... »  
 Torna l'amigo su per la colina,  
 I se ghe slanza adosso, i lo sassina.  
 I magna, i beve muti ;  
 Fa el so efeto el velen in sie minuti.  
 Mor Bakan, mor Tonthun,  
 E 'l tesoro a chi restelo ? a nissun.

## I DO RUSCELI.

Verso quei tempi torbidi, famosi  
 Per le imprese de Thomas-Koulican,  
 In Persia Pantalon dei Bisognosi,  
 Onorato mercante venezian,  
 Filosofo de quei proprio sugosi,  
 Che la natura fa co le so man,  
 Dissecà el so negozio, da trent' ani  
 Fava vita in campagna tra i vilani.

El s' aveva comprà cento campeti  
 Co un palazzin che xe una maravegia,  
 El ga boaria, galine, oche, porcheti  
 Col so can da pagiaro che li vegia :  
 Bon pan, bon vin, e tuti i comodeti,  
 Che ocure a far star ben una famegia  
 Senza etichete che ve seca i bisi ;  
 No gh'è forsi altrettanto ai campi elisi.  
 Lo aveva fatq so muger Pandora.  
 Pare de do zemeli e d' una puta :  
 Ma el di che à bisognà po che la mora,  
 Pensando che Rosaura no xe bruta,  
 Che Pantalon no ghe pol star de sora  
 Per vardarla in utroque, voi dir tuta ;  
 La bona mare se l' à tolta in slita  
 Per compagna de viazo a l' altra vita.  
 L' era dunque restà coi do zemeli,  
 Lelio e Florindo, che per so tormento  
 Gera mo *circumcirca* do storneli ;  
 Minga che no i gavesse del talento,  
 Che sin nel vovo i ghe trovava i peli ;  
 Ma dei vovi un per l' altro i ghe n' ha cento,  
 E i va d' accordo in questo che la sorte,  
 Per farli grandi, li aspetava in Corte.  
 Za i se vede la Persia in zenochion,  
 E za i ga la Sultana per morosa,  
 Coghi, lachè, gianizzeri al pòrton,  
 E fin quatro cavaì color de rosa.  
 Sentindo sti strambezi Pantalon,  
 Poverazzo ! la note nol riposa ;  
 Che 'l vorave i so fioi lassar felici  
 Nè ghe fa bon augurio sti caprici.  
 Lu, fin dal di che el gera stà in mezzà  
 Zovene de negozio in Rugagiufa,  
 Titoli, onori, sfarzo, autorità,  
 El li credeva, che soi mi ? qua trufa,  
 E po el meteva la felicità  
 Ne la moderazion che la harufa  
 Previen che la rason deve far spesso  
 Co qualche vizio che ghe insidia el sesso.  
 « Oh, el dise un di, Lelio, vien qua, Florindo  
 Vien qua anca ti, ste atenti tti do.  
 Mi, fioi, come vedè, vago morindo,  
 Mel dise quel che go, quel che no go ;  
 Podaria comandarve, ma prescindo  
 Da la mia autorità, perchè za so,  
 Che co 'l pare xe vecchio i fioi pensa,  
 Che l' abia fato un per de ziri in sensa.



Donca andè pur, ve benedissa el Cielo ;  
 Ma prima che parti, ve voi contar  
 Una fiaba, che par fata a penelo  
 Per chi sta ben, e no ghe vol mo star.  
 Me l' ha dita mio pare Stefanelo,  
 Che no gera un capon. Stela a ascoltar ;  
 E se no avè per logica una piavola  
 Sgarugievene el senso. Eco la favola.

» Una volta da le viscere  
 D' una florida colina  
 Xe sta visto, là a la China,  
 Do rusceli scaturir.

» L' onda pura i sgorga unanimi  
 Per un facile declivio,  
 Ma ghe mostra presto un bivio  
 Destin vario da seguir.

» Prai, vignete, boschi ombriferi,  
 Un li chiama a fecondar ;  
 L' altro al ciel per tubi idraulici  
 Geme limpide a vibrar.

» Un dei do rusceli in gringola  
 Sdegna in bota i fiori e l' erbe,  
 Vol portar l' acque superbe  
 A la regia de Pechin.

» L' altro invece, noto d' indole  
 Più modesta e più tranquila,  
 Score lento per la vila ;  
 D' ogni campò fa un giardin.

« Qua 'l ristora verze e brocoli,  
 Là el va i bisi a rinfrescar,  
 Qua 'l conforta peri e persegghi,  
 Là fa i sparesi spontar.

» Va Lucieta sul so margine  
 Fiori a scielgerse la festa,  
 La se i punta su la testa  
 Consultande quel crestal ;

» Ghe va adosso col so credito  
 Momoletto dal bel naso,  
 La ghe paga el pro co un baso,  
 Lu ghe dona el capital.

» Fa quel dopio verde pascolo  
 Manzi e piegore ingrassar,  
 De qua Biasio sona el pifaro,  
 Sentì Pasqua là a cantar.

» Su le rive amene e fertili  
 De quel placido ruscelo  
 Fa i vilani el garanghelo  
 Va le femene a filò.

» Tosi e tose qua se biscola,  
 De là i zoga a maria-orba,  
 Quel se sconde in t' una corba ;  
 St' altro trota ; e tunfe, zo.

» Per quel chiaro umor diafano  
 Che fa i cogoli brilar,  
 Luzzi e trùte sguinza e bagola,  
 Va le anguille a serpeggiar.

» Xe alfin tanti i benefici  
 Che fa ai campi quel bel rio,  
 Che i vilani el crede un dio,  
 E i lo adora in zenochion.

» Che se mai gh' è chi l' intorbia,  
 Chi stornar ghe vol el corso,  
 Gh' è chi 'l fa balar da orso  
 Soto ai colpi d' un baston.

» Cussì 'l resto-d' acque limpide,  
 Che in tributo el porta al mar ;  
 Dolci ancora come el zucaro  
 Va i sturioni a consolar.

» Ma tornemo a so fradelo,  
 A quel mato de ruscelo,  
 Che la boria  
 Crede gloria,  
 Che se imagina a Pekin  
 De cambiarse l' acqua in vin.

» No ga apena la colina,  
 Quel mozzina,  
 Abandonà ;  
 L' è stà apena ne la vale,  
 Che a le spale  
 Gh' è saltà

Ortolani, giardinieri,  
 Coghi, sguateri, e stafieri,  
 Favoriti e parassiti,  
 Tuto el treno numeroso  
 Del superbo, del fastoso  
 Mandarin Kekakalà,  
 La probosside, voi dir,  
 El visir

De so maestà.  
 I ghe cambia leto e sponda ;  
 I ghe incalza adosso l' onda,  
 I lo sera  
 Soto tera  
 I ghe fa zirar le grote  
 Dove el di dorme la note ;  
 E per gatoli e calete,

Fate a bissa, strete strete,  
 I lo torna a cazzar su ;  
 Ma ruscelo no l'è più.  
 » L'è là statua in porcelena,  
 Qua a man dreta l'è un putin  
 Che ne l'ato de far nana  
 Lassa andar el so pissin ;  
 « L'è un Confucio in barba d'oro  
 Che fa inchini e riverenze,  
 E da questo e da quel foro  
 Sbrufa liquide sentenze :  
 » L'è 'l gran-Lama che co un scovolo  
 Sguazza i preti del Tibè :  
 L'è un stafier co la so cogoma,  
 Che ve spande adosso el tè.  
 » Là a man zanca l'è un soldà  
 Col so schiopo ben cargà,  
 Che za tira el bagagiol,  
 E schizzeta luna e sol.  
 » L'è un santòn che versa lagreme  
 Per eccesso de dolor  
 Sul destin dei galantomeni,  
 Sul sepolcro de l'onor ;  
 « L'è un monarca che scialacqua,  
 Che dà via per gnente l'acqua ;  
 L'è una dama che recama  
 A perlete, a l'arabesca  
 Ponto in aria d'acqua fresca.  
 » Fato piòva cristalina,  
 Larga conca alabastrina.  
 Lo raccoglie in t' un bersò ;  
 E 'l visir dal bel veder  
 Conta i zoghi per piacer.  
*Belo (l' dise) ... e un trenta dò.*  
 » St' onor donca no xe raro !  
 Ma pur deve quel ruscelo  
 Fin sto belo  
 Pagar caro ;  
 Quela vasca  
 Soto el peto  
 Dove el casca ga un buseto  
 Co la storta  
 Che lo porta  
 Zorno e note  
 In t' una bote  
 Che lo svoda per la spina  
 Su la scafa de cusina.  
 Cussì dopo d' esser stà,

A vangae desbatizà,  
 Dopo aver ben recità  
 Da gran Lama, da soldà,  
 Da damina, da putin,  
 E da zane e buratin,  
 Strupio, storto, snombolà,  
 Cossa s' alo guadagnà ?  
 D' esser beco e bastonà ;  
 De lavar fin che ghe n' è  
 Piatì e squele, e po el *privè*  
 Del visir Kèkakalà. »  
 De sta fiaba, che termina cussì,  
 Florindo la moral l' è sgarugià.  
 Tranquilo in vila l' è finio i so dì ;  
 Ma Lelio, più bizzaro o più ustinà,  
 Xe andà a brilar in corte del Sofì,  
 E l' è stà per equivoco impalà.  
 Mi digo ch' el destin dei do zemeli  
 Se l' è intesa co quello dei rusceli.

## LA FENICE.

Chi dise per voglia,  
 Cussì, de viazar ;  
 Chi dise per boria  
 De farse ammirar.  
 La bela Fenice  
 L' Arabia felice  
 Scorendo in tre dì,  
 De bel mezzodì,  
 S' à un zorno trovà ...  
 Sau dove-mo ? ... a Strà.  
 Baucando per aria,  
 Soleta, a pian pian,  
 L' andava su a Padoa.  
 Savè, che a sta man,  
 Pisani-Moreta  
 Ga un bosco Stracheta,  
 La dise : *Sior si,*  
*Fermiamoci qui !*  
 E un carpano ochià  
 La se ga sentà.  
 La fama, petegola  
 Per genio e mistier,  
 L' à fato ai volatili  
 In bota saver.

Cigando in francese  
 La score 'l paese :  
 « Oasò mes ami  
 La ren et issi ! »  
 La lengua i la sa ;  
 S' à tuti afolà.  
 El ramo d' un alboro  
 Se afita un zechin ;  
 L' impresa de l' arzere  
 L' à tolta Manfrin ;  
 I oseli se schiera  
 A miera coi miera  
 Co i coli cussi,  
 Che i par tanti I,  
 Col beco impirà,  
 Co l' ochio incantà.  
 Vardandola atonito  
 Diseva 'l paon :  
 « Va al diavolo, invidia,  
 Cedemo, Giunon !  
 Quei ochi ? xe stele !  
 Le penè ? cande !  
 Che sol ? no, per di ...  
 Quel beco fa 'l di ...  
 Quel zufo indorà  
 L' à Giove spuà !  
 — Fenice, de l' iride  
 Sorela magior,  
 Di, quel che te sfiamèga  
 Xe 'l fogo, o color ? »  
 Aplaude, fa eco  
 Co tanto de beco,  
 Col faleloli,  
 Col ciricì,  
 Oseli de qua,  
 Oseli de là ;  
 Ma quando po in musica  
 Soave, gentil,  
 La modula un : *grazie*  
 La par un april !  
 El russignol stesso  
 « Ah ! (*dise*) 'l confesso,  
 Son vinto ! senti  
 Che trilo in bemi !  
 Che bel elafà  
 Son proprio copà !  
 — Belezza adorabile,  
 Celeste virtù,

Va là che ti meriti  
 Dè no morir più ! »  
 I oseli ciga in fola,  
 Co tanto de gola :  
 « Che morte ? menti ...  
 La torna pipì  
 Sul rogo impizzà,  
 Le celeghe 'l sa ! »  
 Ma in mezzo a sto aplauso  
 Che xe general,  
 Sospira la tortora,  
 Ingenua, leal.  
 Se acorze, e smanioso  
 Ghe dise 'l so sposo :  
 « Ti susti, bibì ?  
 La invidistu, di ?  
 Perchè stastu là  
 Col beco cascà ? »  
 Risponde al rimprovero  
 La tortora : « oibò !  
 Pensava che ... ( viscere ...  
 Invidia ? mi no )  
 Che de la so razza  
 L' è sola, gramazza !  
 Che almanco po mi  
 So sempre co ti ! ...  
 No minga per ... ma ...  
 No fala pecà ? »  
 Quel merito in isola  
 Che spesso invidiè,  
 Ve cava le lagreme,  
 Se lo esaminè.  
 Tra i beni gh' è quei  
 Ch' è meglio, fradei,  
 Averli a *demi*.  
 No so se capi  
 El gusto che ga  
 Chi gode a metà.

## EL RÈ DE COPE.

Mamalù quarto, illustre re de cope,  
 Spassizzava in campagna incognito :  
 E gratandose in testa : « oh le xe trope  
 Trope strussie, el diseva : oibò, oibò !  
 I ga un bel dir ! eh lo sa ben chi 'l prova ;  
 L'è proprio una galia da pope a prova !  
 No credo che ghe sia sora la tera  
 Un omo contrarià come son mi.  
 Mi voi la pase, e i me fa far la guera ;  
 No voria meter nove imposte .... eh sì !  
 Le nave in tochi, l'arsenal in pezzi,  
 I soldai senza scarpe, e ghe vol bezzi.  
 Podessio almanco veder schieta e neta  
 La verità ; saver come la xe  
 Per regolarme ! oh giusto ! maledeta  
 Quela che so ! busie quante volè  
 Eco go fato radopiar la paga,  
 Son un Tito, un Trajan ! e che la vaga.  
 El popolo cussì magna i sculieri,  
 E a mi la compassion me strazza el cuor ;  
 Chiamo ogni dì a capitolo i pensieri,  
 Studio la note come un traditor,  
 E col mio scetro in man, per quanto fazzo,  
 Resto a dretura un vis.... resto un pagiazzo. »  
 Mentre el pianze la propria e la sventura  
 Del bel regno de cope Mamalù  
 Buta l'occhio sui campi, e la pianura  
 El vede sparsa de cinquanta al più  
 Tra bechi magri e piegore scachie,  
 Sporche, pelae, che no pol star in pie.  
 Core qua e là el pastor, ora drio al beco  
 Che drento al bosco se voria ficar,  
 Ora a tor su un agnelo seco, seco,  
 Che xe cascà, che no se pol più alzar,  
 Mentre, sie passi indrio, drento d' un fosso  
 Sta el lovo devorandoghe el più grosso.  
 Buta via quello per socorer questo,  
 E sbrissa e casca, e perde questo e quello :  
 Un altro lovo ghe spaventa el resto,  
 E ghe magna el molton coi corni e 'l pelo ;  
 El pastor no ga più gambe, nè fià,  
 El se strazza i cavei, l'è desparà.

Mamalù dise allora : « L'è curiosa!  
 L'è proprio el mio ritratto tal e qual !  
 Ai re donca e ai pastori co una dosa  
 Se fa i piati da cogo ? no gh'è mal !  
 Ma me par che lassù se dovaria  
 Qualche riguardo mo a la monarchia. »  
 Caminando più avanti el trova l'erba  
 Più fresca e bela, più fiorito el pian ;  
 In riva al fiume el vede una superba  
 Lista de grasse piegore in lontan,  
 Bianche cussi, che par, mentre le beve,  
 Covertito tuto l'arzere de neve.  
 I bechi se strassina el pelo in tera,  
 I castrai pesa cento lire l'un,  
 Moltoni, agnei .... se vedessi che ciera !  
 I consola a vardarli un bianco, un brun,  
 Ma tuti grassi, in ton ; i core, i saltà,  
 I se menta, i se ingropa, i se rebalta.  
 Le piegore no pol portar le tete ;  
 Squasi tute ga soto el so bebè ;  
 L'erba fresca odorosa ghe rimete  
 El late, e chiuichia pur che za ghe n'è ;  
 Per farla breve e terminar l'elogio,  
 Credela, o no, le xe vestie d'orsogio.  
 El pastor che le varda xe Tognoto,  
 All'ombra stravacà d'un castagner  
 Che sona un ritornelo col subioto,  
 E po canta stonando dal piacer :  
 « La mia morosa xe de le più bele,  
 La ga do occhi che le par do stele. »  
 El re dise, strenzendose le spale,  
 « Vedo, come sta scena à da finir !  
 Gh'è più lovi che albori in sta vale ;  
 Schiao siora mandra ! oh me voi divertir !  
 A salvar quei boconi, bona note !  
 Ghe vol altro, compare, che vilote ! »  
 E, per dia, che arivà su quel mumento,  
 Squasi per far la corte a so maestà,  
 Passa el lovo, ma lesto come el vento  
 Dà su Melampo, e lo stravaca là .  
 Veramente al rumor de la barufa  
 Un molton se la sbrigna per la fuja.  
 Ma, cossa serve ? el zerman de Melampo  
 Gh'è za adosso, a so logo el fa tornar,  
 E tuto torna in regola in t' un lampo,  
 Tognoto subia e seguita a cantar,  
 Come se proprio nol ghe dasse un figo  
 De tuto quel che va nascendo. « Amigo,

Ghe dise Mamalù, fenne un servizio —  
 Saven che gh'è stà el loro, o nol saven?  
 A dirvela, me par poco giadizio  
 Star là cussì; perchè no ve moven? »  
 Da la boca levandose el subito  
 Risponde in bota a Mamalù Tognoto:  
 « Sior, no me movo co so bona grazia,  
 Perchè i cani che go, li ò scielti mi,  
 I è forti, atenti, e poco pan li sazia. »  
 — Ah! dise el re de cope, mo sior sa,  
 O' inteso tuto; finirò i miù afani ... »  
 L'è corso a casa a baratar i cani.  
 S'è visto in bota a moderar le spese.  
 El fante à storto el muso, el cavalo? uh!  
 Ma tuti à respirà da l'asso al diese.  
 Se i altri re imitasse Mamalù,  
 I re, za se capimo, amici cari,  
 De spade, de bastoni, de danari,  
 No un palo solo, no la quarta parte,  
 Respirarave el mazzo de le carte.

## BARBA SIMON E LA MORTE.

Scartabelando i so registri un zorno  
 La morte à trovà un rostro. A conti fati,  
 Secondo el so caprizio, un certo vechio,  
 Chiamà barba Simon,  
 Doveva da vint' ani  
 Far tera da bocali; e co bravura  
 Se scrocava la vita: « a mi (la dise)  
 Te vegno a consolar le mie raise! »  
 E la tol suso la so brava falce,  
 La ghe dà 'l filo in pressa, e la sgambeta  
 Per cucarselo in casa a cavalier;  
 La branca co dispeto el batar,   
 E la dà una batua da creditor.  
 Barba Simon gera andà giusto in caneva  
 A spinarse una bote. A quel fracasso  
 El lassa tuto, el core, el sbalza su,  
 El spalanca la porta: « vita mia,  
 Un' altra volta (el dise) batè a pian,  
 Che za go bona rechia.  
 Oh, via, chi seu? cossa ve casca, vechia? —  
 — Varda sto siega vite:  
 Goi bisogno de dir che son la morte?

Vegno a cercar quella forza de vechio  
 Che alogia qua de su ... Dov'è la scala?  
 Shrighemose, alon, presto,  
 Che disisote medici me asmeta  
 A l' arcova d' un re.  
 — Go qua el fagoto,  
 Comare, e mi son pronto.  
 — Eh, no la go co ti! voggio, te digo,  
 Monsù barba Simon, voi quel spazzeta,  
 Che da un secolo squasi a le mie spalle  
 Fa carneval del lacrymarum vale.  
 — O' inteso bon, capisso: qua se trata  
 De far un pisoloto co la coa  
 A braccia colo de l' eternità;  
 E mi ve l' ò za dito, e mi son qua;  
 Perchè, a scanso d' equivoci, sapiè,  
 Che quel barba Simon che v' à mo fato  
 Saltar la mosca sur la schizza, quello  
 Son proprio mi!  
 — Me tostu per un' astose?  
 Ti? quel color, quei denti, quei cavei,  
 Quela gamba, quel' ose, quella vita,  
 Te l' à imprestai la bela Margarita?  
 — Ma la xe mo cussì;  
 Barba Simon son mi!  
 — Adasio: parla schieto,  
 Te la intendistu forsi, del vechieto,  
 Co quel famoso magnetizador  
 Che resuscita i morti? ....  
 — So benissimo  
 De chi volè parlar.  
 O' sentio celebrar i so prodigi  
 So la zuca ch' el xe;  
 Ma mi con lu n' ò mai parlà a la fe!  
 — Donca ti ga un specifico,  
 Un elisir, un balsemo,  
 Qualche diavolo forte,  
 Chè te tien vivo a spese de la morte.  
 Orsù, vien qua: vegnimo a pati; vivi  
 Fin che ti pol (che za una volta, o l' altra  
 Te cucarò anca ti), ma in ricompensa  
 Ti m' à da palesar el to secreto:  
 Nè aver paura za, che mi .... minchioni!  
 No son minga imbriga  
 Saria l' istesso che serar botega,  
 E voler dar el cul su la bancheta.  
 Fora quella ricetta.  
 — Oh! l' è facile e curta in verità! —

— Ben, dila su —

— Son qua :

Bisogna che sapiè, comare cara,  
Che fina da quel di che la rason  
M' à deslatà el giudizio,  
Nè a vu, nè al zorno che volessi farme  
L'onor de visitarne,  
Co vostra bona grazia, n' ò volesto  
Mai pensarghe un mumento.  
Timor de l'avegnir? mi no lo sento,  
O' stadià sempre da putelo in su  
De tor el mal e 'l ben  
Tal e qual com' el vien.  
Goder, sofrir senza trasporti e smanie,  
E per una secreta antipatia  
Col pentimento, che xe 'l re dei guai,  
Mi no so d'aver mai  
Proprio abusà de gnente in vita mia.  
Cussì, gradiadio, son neto in utroque,  
De viscere, voi dir, e de conscienza,  
Vivo (che xe dei ani veramente! )  
E vivo ben. N' ò domandà mai gnente,  
Nè rifiutà mai gnente a la natura.  
Oe, mi v'ò dito el medico e la cura.  
Se sta riceta ga qualche virtù,  
Vardeme un altra volta, e disè vu ! »

### I CASTELI IN ARIA.

Tuti sa che là in campagna  
Verso l'alba senza falo  
Canta el galo : cucurù :  
Dona Cate da la late  
Giusto allora lèva su.  
Con un passo la xe in stala,  
Là la monze la Lucieta  
La vacheta, che savè ;  
La prepara po la zara  
Col so late come el xe.  
L'altro zorno, andando a punto  
Co la zara su la testa  
Scalza e lesta a la cità,

A bel belo un bel castelo  
La s' à in aria fabricà.  
« Oh ! tre lire (la diseva) ,  
De sto late ti le trovi !  
Tanti vovi ti à da tor ;  
Ti à da darli per coarli  
A la chioca del fator.  
Mo no passa minga un mese  
Che te becola el formento  
Più de cento bei pipi,  
Che galine grasse e fine  
Te diventa in quatro di.  
Che ? la volpe ? Oh sì el gran caso !  
A vardarle no ti spendi ;  
Ti le vendi, ma co ben !  
Tiò un porcheto ; povereto  
Ve' co belo ch' el te vien !  
L'è st' altr' ano da casoto ;  
Oh che lardo ! el fa la goba,  
I tel roba da le man ;  
Voi sessanta, voi setanta ;  
L'è 'l so prezzo come un pan.  
Ti pol torte co sti bezzi  
Una vaca ... ih, ih, che panza !  
Oe .... te avanza un vedelon ;  
Varda, el salta, el se rebalta  
Tra le piegore e 'l molton. »  
A sto passo d'alegrezza  
La fa un salto su la giara,  
E la zara, tunfe ... zo ;  
E schiao late, bondi Cate,  
Vovi, porco, vaca e bo.  
Done care, tegnì stretto,  
Cari amici, tegnì duro  
Quel sicuro che gavè.  
Mo i xe beli ! .... ma casteli  
Tuti in aria : lo vedè.

## EL SOFI E L' IMAN.

El mio maestro de filosofia,  
 Che dopo m' à insegnà a tirar de spada,  
 Me contava una sera a l' osteria  
 Sta noveleta : mai me l' ò scordada.

Mentre Berta, cantando, taconava  
 Le mudande a Pipin, in Ispaan,  
 Fava la parte de sofi, regnava  
 Un certo .... un certo *Usbek-Ali-Makan*.

Un *scombrow* no xe certo el mio ritrato,  
 E put l'è 'l soranome, che i me dà:  
 E cussà *Usbek*; el gera un poco mato,  
 E i ghe diseva el *savio*: ma chi sa?

Leteraton, astronomo ecelente,  
 Che menava i pianeti per el naso,  
 Forsi i ga dito *savio* per *sapiente*;  
 Fa spesso un *qui pro quo* chi parla a caso.

Strada per lu no gh'era in cielo oculata;  
 Ma de la Persia ghe ne salo una?  
 Basta dir, ch'el piantava la consulta  
 Per spulesar le barbole a la luna.

Cortegià da una fola de bassà  
 Da le tre coe, za soliti aplaudir,  
 Ai so strambizzi, a le bestialità  
 Che l'è solito a far, solito a dir;

Tornando a la so specola una sera  
 « Oh: el ghe diseva: « adesso sì per bacq,  
 Co sti novi strumenti d' Inghiltera,  
 Mio dano se no giusto l' almanaco!

A bon conto s'ha note son sicuro  
 De veder tuto illuminà lassù. —  
 Per un sofi no ghe mai gente scuro,  
 Risponde a coro Osman, Meemet, Oglù. —

« Ma voi scorer la luna sora tuto,  
 E rilevar che omeni xe quei » —  
 Ih! co quel telescopio! in t' un minuto  
 Usbek Ah ghe pol contar i peli!

Tuti dise la soa, quando *Ali-bek*,  
 Lacero, strupio, ctuagenario iman,  
 Se avvicina, e domanda al sofi *Usbek*  
 Un parà, un aspro da comprarse 'l pan.

*Usbek* intanto spassizzava el cielo,  
 Seguitava coi astri a savariar.  
 Tremando el vechio sul so bastoncelo  
 Se buta in zenochion, torna a pregar.

Racc. Poes. Ven.

In quello mo, rompendoghe 'l lamento:  
 « Che compiacenza (esclama Usbek) real  
 Vederme presentar da qua un mumento  
 Da un omo de la luna un memorial!

Rifonderò el governo che là gh'è,  
 Premiarò i boni ... i rei li punirò ...  
 Ma sora tuto, pare, più che re,  
 Sul ben esser comun vigilarò! »

Qua mo l' iman, perdendo la pazienza,  
 Branca l' augusta clamide al sofi,  
 E tirando co cinica licenza,  
 Ghe dise, tal e qual, proprio cussà:

« No, su la luna, Usbek, ma vigilante  
 Dio qua te vol, dove vivemo insieme.  
 Pare e re su la luna? E a le to piante  
 Gh'è in tera un omo, un sudito che zeme? »

Tra l' ira Usbek, e la pietà confuso  
 Ga dà una piastra e 'l canochial sul muso.

## EL MULO IN GLORIA.

Qualche volta le disgrazie  
 Xe mo bone da qual cossa;  
 I canali le desgossa  
 Dove score la rason;  
 Le sculazza l' avarizia,  
 La libidine le scota,  
 L'amor proprio le sberlota,  
 Le desmascara un bufon!

Là in Romagna un mulo in grassa,  
 Brigliadoro d'un prelato,  
 Se vantava d'esser nato  
 Credo in braccio al gran signor;

Ma per altro po 'l saveva  
 Che so mare la cavala  
 Avea avudo for de stala  
 Qualche fufigna d'amor.

Un somaro da do coe,  
 Scimiotando l' imeneo,  
 Se l' aveva a scotadeo ...  
 E po 'l gera nato lu.

Ma lu vol scordarse afato  
 Quel anedoto insolente;  
 Dela mama nol ga in mente  
 Che le beliche virtù.

Quali, in fati, e quante imprese  
 Fate in Asia e qua in Europa,  
 Mentre ch'el gaveva in groppa  
 Scanderbagh e Tamerlan!  
 De sta gloria cavalina  
 Sgionfo l'anima superba,  
 Sdegnà el mulo el fen e l'erba,  
 El vol biava e marzapan.  
 El sta serio su le soe  
 Co i cavali da carrozze:  
 Quei de posta ghe par rozze,  
 Quel del Papa .... oh quello sì!  
 « Se io dovessi (*el se diseva*)  
 Portar qualche soldatello,  
 Un frataccio, un barigello,  
 Di rossore morrei lì! »  
 Una sera, sollevando  
 Baldanzoso al ciel la testa,  
 Co do ochiazzì lustrì in resta,  
 Che le stele vol sùdar:  
 « Va nascondi la tua chioma,  
 Forsennata Berenice,  
 Di mia madre, mira, *dice*,  
 L'aurea coda scintillar! »  
 Cussì in dir un per de zampe  
 Se ghe ingambara, e a l'ingrosso  
 Co la zara in mezzo a un fosso,  
 Patatunfete, piombò!  
 Se ghe spaca la clavicola,  
 Ghe va un tronco in tel daoto,  
 I lo tira suso zoto:  
*Quasi 'l collo si fiaccò.*  
 Monsignor lo trova strupio,  
 Reso inabile al servizio —  
*Vatti a macina il giudizio:*  
 E al molin el l'ha mandà.  
 Tra 'l baston e la cavezza,  
 Zopegando, a colo storto,  
 De za mare el pero morto  
 El s'è in botà ricordà!

## AMOR E PAZZIA.

Roto el scorzo del vovo  
 E comparso a la luse el mondo novo,  
 Tra le tombole e i salti,  
 S'è chiapà benvoler putei tant'alti,  
 Amor e la Pazzia,  
 Cussì, per una certa simpatia.  
 Lu, ancora co i so ochieti  
 Negri, negri, baronceli, furbeti,  
 Fin d'alora insolente,  
 Ustinà, malizioso, prepotente;  
 Ela, in gringola sempre e su la gamba,  
 Capriziosa, barufante e stramba.  
 I andava insieme a scuola,  
 Ma a cossa far? a far la gambariola  
 E dispeti per èstro  
 A quel povero Giobe de maestro,  
 E po i se la sbrignava  
 D'acordo a l'improvviso, e i scorabiava  
 Per i campi del cielo,  
 Inverno, istà, senza scufia o capelo;  
 El zorno co le stele  
 Per l'etere zogando a le burele,  
 E corendo la note  
 Le poste sora el càpo de Boote.  
 Ma el sq divertimento predileto  
 Gera d'insolentar  
 I segni del Zodiaco; e per esempio  
 Quel frascon se meteva le lavate  
 De Saturno, e po andand come un sempio  
 Ora el strucava al Gambaro,  
 Ora al Scarpion, le zate;  
 E intanto la Pazzia  
 Pian pian per da drio via,  
 Robava qualche frezza al Sagitario,  
 E sbusava le tìne de l'Aquario.  
 Lu cazzava per forza in boca ai Pesci  
 El folo: e supia .. a ti, piccolo, cresci ...  
 Ela, in scondon, cambiava a le Balanze  
 Le scuele co do scorzi de naranze.  
 Lu cantava da galo in t' un canton  
 Per rider de la fufa del Lion.  
 Per distinguerli megio ela ai Zemeli  
 Coi dei tenti da ingiostro  
 Fava spesso i mustachi e le moschete.



Lu tormentava Capricorno e Ariete  
 Per caponarli come polastrelli.  
 Ela fava a la Vergine un mazzeto  
 De ortighe fresche e ghel cazzava in peto ?  
 E lu ligava un scarcavalo al Toro  
 Soto la coa per bombardarghe el foro  
 E cento altre de queste ...  
 Curte ... i gera do peste.  
 Qualche volta mo chiassando  
 For de regola in barufa,  
 I taroca, i se petufa ;  
 Li va Momo a separar.  
 Da là un poco po scordando  
 L' uno e l' altro el so dispeto,  
 I spartisce un bel pometo,  
 E i fa el terzo desparar.  
 Ma diseva benissimo ... Chi gerelo ? ...  
 Un filosofo za ... (*accidit in puncto*  
*Quod non contingit in anno*). Una volta,  
 Zogando a la racheta  
 Giusto su la via latea, se no falo,  
 Xe nato tra de lori un disparer,  
 Che s' à fato contrasto, e po barufa.  
 Toca a ti, toca a mi ... i se n' à dito  
 A pie cavalo. Amor  
 Voleva in bota convocar i numi  
 Per farse giudicar, ma la Pazzia  
 Furibonda, e nemiga in conseguenza  
 Dei brodi longhi logici d' Astrea,  
 Co la racheta in man ga lassà andar  
 Un mustazzon cussì bestial sul muso  
 A sior Cupido, che ga fato un' ora  
 Piover sangue dal naso,  
 E quel ch'è pezo, (Dio ne guarda tuti)  
 Ga macà i occhi in modo,  
 Che stuà el cesendolo  
 De l' otica virtù,  
 Quel povaro putelo  
 No ga po visto più.  
 Femena, mare e dea,  
 Ve lasso imaginar che bagatela  
 De fracasso che fa Venere in cielo.  
 E a dirvela po mi la compatisso.  
 Figurarse ! fio solo ! desparada  
 La core per la strada,  
 No la fa che un lamento,  
 De lagreme la sguazza el firmamento,  
 La se strazza la peta,

La ciga, e l' urla, e che la vol vendeta.  
 A un saltanuvole  
 La taca in furia  
 Do cigni scapoli,  
 La sbalza sù.  
 Branca le redene;  
 Schioca la scuria,  
 La sbrega l' etere :  
 No la gh' è più.  
 Ma mi la vedo ... dove ?  
 Ecola là ... butada ai pie de Giove  
 Dal dolor, da la rabia frenetica  
 Fra i sospiri, i singiozzi, le lagreme,  
 La compone un' istanza patetica  
 Che de Giove fa tenero el cuor.  
 Lu a conforto de tanta mestizia,  
 La soleva, la basa, la cocola,  
 Ghe promette compenso, giustizia,  
 Nume, giudice, re, genitor.  
 — « Dileta prole, calmati,  
 Anzi va là, Mercurio,  
 Va a dar el segno solito  
 Per la consulta negra,  
 Sì, figlia mia, t' allegra,  
 Vedrai la rea tremar.  
 Cara, s' io t' amo il sai !  
 Vogio andar mi in Pregai,  
 Avvenga che ne avvenga,  
 Vogio morir in renga,  
 Ma farla castigar.  
 Ma Venere, smaniosa  
 De interessar per ela  
 El libro d'oro de l' Olimpo intiero,  
 E memore che Giove  
 Per caratere peca d' apatia,  
 Lo ringrazia, se inchina e sbrissa via.  
 La core in precipizio da l' amico ...  
 Za me capì ... da Marte ;  
 La ghe la conta, la se racomanda.  
 Lu ghe presenta l' arme e la consola.  
 Dopo de lu la svolta,  
 Più svelta d' una frezza,  
 Da Baco, che spinava un bariluto  
 De flogosi netareo. El la carezza,  
 E 'l ghe impenisce quatro volte el goto.  
 La cala da Netuno,  
 Solito a far per ela monea falsa,  
 E lu interinalmente la ristora

Con un bagno in *utroque* d'acqua salsa.  
 La va dal dio dei orti, e per distrarla  
 El ghe fa quatro freghe,  
 E po ghe torna a destirar le pieghe  
 Del caracò. La passa da Vulcano,  
 (Ma dopo Febo e Pluto)  
 Tuti la basa e ghe promete agiuto.  
 Nè la se scorda za de l' influenza  
 Secreta, ma potente,  
 Ch'el bel sesso plebeo  
 Gaveva sora i numi, che in quei tempi  
 Copiava, per clemenza,  
 I nostri miserabili costumi,  
 El netare lassava per la bira,  
 Come lassemo nu  
 Per la polenta el fricandò, el ragù.  
 Prima de presentarse a le togate,  
 La va da le tabare;  
 E la prega la fiozza e la comare,  
 Ma rabiose de vederse  
 Dame e pedine in so confronto brute,  
 Una per una, tute,  
 Mentre le finge de compassionarla,  
 Freme de no poder proprio sfrisarla.  
 Cerca de qua e de là  
 La dea de la vendeta; ghe riesce  
 Cucarla al fin al club de la Discordia.  
 La se ghe buta in zenochion, la pianze,  
 La fa ai so guai le franze,  
 La depenze co tuta l' energia  
 La sevizie infernal de la Pazzia,  
 L' assassinio de Amor,  
 E la tenta ispirarghe el so furor.  
 Nemesi se la sbriga  
 Co quatro parolete da colegio;  
 Che Superbia e Ignoranza,  
 So sorele da late, e le tre furie,  
 Giusto arivae da Franza,  
 Rapacità, Impostura e Prepotenza,  
 L' aspetava de suso in conferenza,  
 Dubiose ancora, incerte  
 Nel far la scielta de le *quaedam alia*,  
 Da zontar a le strage za soferte  
 Per distrugerte alfin, misera Italia!  
 Dopo quat' ore de consulta negra  
 Su le proposizion da presentar  
 A l' assemblea celeste general  
 Per punir la Pazzia; una saeta,

Come là in cielo s' usa,  
 Ga convocà Pregai, Venere esclusa.  
 Ma za vestia da voto, sgrendenada,  
 • Senza sbeletto, lagrimando perle  
 Sul palpitante tepido alabastro,  
 Che no so se 'l dolor o la malizia  
 Ga fato lassar là mezzo scoperto,  
 Tegnindose el putelo per le inan,  
 Che co la binda ai occhi  
 Ridendo fin de la so trista sorte  
 Ruminava fra lu nove insolenze,  
 Venere su le porte  
 Stava za pronta a far le riverenze.  
 Passandoghe davanti  
 I senatori zoveni d' Olimpo,  
 Ghe mormora a la rechia  
 Morbide, in semiton, crome galanti.  
 Quei de la corte vechia  
 Tenta farghe d' ochieto,  
 E l' ochiada ghe mor su l' ochialetto;  
 Ma squadrandola ben da capo a pie  
 Giunon, Minerva, Cerere, Lucina,  
 Co le pupile inviperie,  
 Barbotandoghe drio, de la sgualdrina,  
 E a so fio, del bardassa,  
 O tosse, o spua, o fa un sbarlefo, e passa.  
 I sera .... La se senta.  
 E per no trascurar gnanca chi resta  
 Venere va giustandose la vesta,  
 El cendà, el fazzoletto,  
 E intanto el nostro orbeto  
 Fa finta de sbrissar,  
 Per pizzegar le pupole bel belo  
 A Giano precursor de *Zambonelo*.  
 I à disputà tuta la note. Baco,  
 Savio de setimana,  
 Propone per condana  
 Che gabia la Pazzia descalza e nua  
 Da folar tuta de l' Esperia l' ua.  
 Netun se nota scontro, e vol mandarla  
 A dretura in galia  
 A bater l' acque de l' idrografia.  
 Pluto, per infamarla,  
 Vol in fronte bolarla  
 Co un sigilo de fogo.  
 Priapo vol pestarghe el tafanario,  
 E farghe un sfriso sopranumerario,  
 Vala a cata .... in che logo!

Se opone a tutti Marte,  
 Come troppo indulgenti,  
 E ghe mete in ridicolo ste parte.  
 Se la Pazzia gera mortal, la in bota  
 La fava fusilar. e allora si —  
 Gera finia la razza dei bufoni,  
 Nè più se gavarìa tanti omenoni.  
 Ma per trattarla par militarmente  
 La la vol condannada eternamente  
 A far la sentinela  
 A l'ospeal dei mati de la luna.  
 Balotae — no ghe n'è passà nissuna.  
 Cossa mo fava Giove?  
 Giove, che sempre ga la testa rota  
 O da le gelosie de so muger,  
 O da le cavalee de Ganimede  
 Che lo ga in quel servizio e lo sbufona,  
 Sta su la so poltrona  
 A far castelli in aria,  
 Supia, sbadagia, mastega, savaria.  
 Ghe nasce quello che ghe nasce spesso,  
 Fin la memoria el perde  
 De quel che ghe sta a cuor, che l'ha promesso,  
 Tosse, brontola, dorme, e va in tel verde.  
 Torna i savj in collegio, e un' ora dopo  
 I capita in senato  
 Co una proposizion d'acordo estesa,  
 Che a pieni voti xe po stada presa.  
 Finalmente su l'alba  
 Sona la campanela. Tra la fola  
 Dei curiosi a le porte  
 Che aspeta la sentenza de la corte,  
 S'è visto incognito qualche pianeta,  
 Do aurore boreali e una cometa.  
 Eco insoma el decreto, tal e qual  
 L'è Mercurio stridà in original.  
 « In nome del destino ; e così sia :  
 » Inseparabilmente la Pazzia  
 » Resti a fianco d'Amor quando si muove,  
 » E meni l'orbo » sottoscritto » Giove.  
 Se Venere sia stada, o no, contenta  
 De sta condana, chi lo sa vel diga,  
 La smania de saverlo no me tenta.  
 Se ghe dol, che la ciga.  
 Mi no voi sindacar quel che i fa in cielo,  
 Che za son vecchio e baso la pazienza  
 Ma vu altri, che se de primo pelo,  
 [ Penseghe un poco, amici, a sta sentenza,

Proclamada mo giusto da Mercurio.  
 Ohimè ! no la me par de bon augurio ;  
 E ve diria : Dio ve la manda bona,  
 S' anca ve inamoresci de mia nena !

## ESOPO E L'ASENO.

In oca Esopo frigio  
 Stava passà a un molin ;  
 Passa e ghe dise un aseno :  
 « Giusto vu, citadin :  
 Se vol che siè un egregio  
 Filosofo moral,  
 Ma perdoneme viscere,  
 No se minga imparzial :  
 Vu dè a la volpe e a l'aquila  
 Insegno sovrumani ;  
 Vu fe parlar co spirito  
 El sorse, el gato, el can :  
 E nu, poveri aseni,  
 Sempre ne maltratè,  
 Ne fe passar per stolidi ;  
 Voria saver perchè ?  
 Dei talenti e del merito  
 Ghe n' avemo anca nu ;  
 Spesso ne invidia i omeni  
 Qualche gentil virtù :  
 Credo no sia tra l'ultime  
 Costanza e gravità :  
 Fene donca giustizia,  
 E rimediè al passà ;  
 Componè qualche favola  
 Da farne figurar ;  
 Ve servirò d'esempio,  
 Se me savè imitar.  
 Bomò, sentenze, e massime  
 Ve vogio sugerir .... » —  
 Risponde Esopo : — « viscere,  
 No ve posso ubidir :  
 Vardè che metamorfosi  
 Che nassaria cussi ;  
 Saressi vu el filosofo,  
 E l'aseno po mi. »

## EL SOL O I DO PAPA'.

Stando in sofita, vinti zorni fa,  
 Le mie fiabe morali a spulesar,  
 Sento zente de fora: « In verità  
 Che qualchedun me vien (digo) a secar!  
 Posso mo star mai solo? Chi è de là?  
 — To barba Nicolò: se pol entrar? —  
 Ghe semo! avanti pur. (qualche pazzia!) —  
 Un mumento, nevodo, e andemo via. —  
 Ma sti signori qua co vu mo? ... — questi  
 Xe do illustri Papà de razza grega. —  
 Scusi signore se le sian molesti —  
 Le se comoda qua .... st' altra carega;  
 Toni, el caffè (ma de carboni pesti!) —  
 — Sto pezzo qua xe 'l celebre Ipomega  
 Filosofo perspicace cussi  
 Che vede el sol quatr' ore avanti di;  
 E dopo aver pesà tempi e vicende,  
 Fenomeni e natura, persuaso  
 De no abadar a quel che no se intende.  
 L'è diventà l' apostolo del caso,  
 Dal qual, secondo lu, tuto dipende.  
 — Ma Nicolò ... nipote .... — daghe un baso  
 Perché el sistema ch' anca lu s' à fato  
 Più sublime del too, xe mo più mato.  
 E st' altro xe Mislogo so fradelo,  
 Altra medagia de diverso conio;  
 Lu, per paura de sbusar el cielo,  
 S' à tegnù sempre basso el comprendonio;  
 Nol varda vovi per no veder pelo,  
 E 'l crede la rason fia del demonio.  
 Ste cagadure xe per altro po  
 Do amici de to barba Nicolò. »  
 Impazientà de vederme davanti  
 Sti tre tomi da dar ai ligadori:  
 « Me ne consolo (digo); e cussì avanti.  
 In che posso servir mo sti signori?  
 — Una fiabeta sola; i à sentio tanti  
 Parlar de sti to apologhi. — Schiao siori.  
 No i me lassa de pesto. — Uno, uno solo  
 Quel che ti vol, e andemo via de svolo. —  
 Oso pregarla anch' io. — No ghè bisogno,  
 Le servirà .... Ghe n' è qua giusto uno

Che squasi squasi, ma no me la sogno ....  
 Siben per altro ch' el saria oportuno ....  
 L'è mo ancora putelo, e me vergogno.  
 — *E giovanetto? Non amò nessuno*  
*Mai più di me la fresca gioventù!*  
 — Oh! l'è un Socrate, sastu: via, di su.  
 M'ò lassà sfregolar un altro poco  
 Dal doto e da l' aloco:  
 Po fissando Ipomega  
 Sentà su la carega  
 Giusto in fazza de mi. — Ben co le vol...  
 (Digo) le servo .... za l'è breve ....  
 » Core i numi el destin d' un bel nastro;  
 O l'è moda, o nissun più lo vol;  
 Cussì 'l sol, co à mancà Zoroastro,  
 Xe andà in fumo anca 'l culto del sol.  
 » Pur là in Persia, fedeli a la seta  
 De quel celebre magico re,  
 Adorava 'l diurno pianeta  
 Soli ancora Abakù e Kabarè;  
 » Ma siben mo che i gera zemeli,  
 Da una nena latai tuti do,  
 Tanto eguali i gaveva i cerveli  
 Quanto el sgrugno una notola, e un bo.  
 » D' Abakù gera in fati la fede  
 Paralitica sul canatin;  
 Se nol vede, ma ben, lu no crede,  
 E i principii l' esamina e 'l fin.  
 » Dal mumento ch' el sponta e ch' el s' alza  
 Fin ch' el sol va po a scondersi in mar,  
 Lu gh'è adosso, co i ochi el lo incalza;  
 Se diria ch' el lo vol divorar.  
 » D' ogni raggio el confronta le cime,  
 De la massa el misura el calor;  
 E al secreto l' aspira sublime  
 De la causa de tanto splendor;  
 » Ma dai dai contemplandolo fisso  
 Abakù in quatro zorni s' à orbà.  
 E co i ochi in caorio ne l' abisso,  
 L' esistenza del sol l' à negà. »  
 E voltandome verso Mislogo,  
 Che me stava vardando incantà,  
 Senza mai baratarse de logo,  
 Tabacando cussì ò seguità.  
 » Kabarè so fradelo a l' oposto  
 Gera credulo e pio più de mi.  
 Se i me dise: sto lessò xe rosto.  
 Bevo 'l brodo, e po digo: sior sì.

» Lu pianvendo la sorte funesta  
 Del so doto fradelo Abakù,  
*Eco ('l dise) che chi ga più testa*  
*Del so spirito abusa anca più.*

» Donca mi deventar voggio un scioco,  
 Viver dindio, morir barbagian;  
 Za chi vol una cosa ogni poco,  
 Se no ancuo se la beca doman;

» E svodai da la zuca là in strada  
 I so quattro graneli de sal,  
 Ghe deveuta el cervelo panada,  
 Nè ghe resta ch'el brio d'un stival.

» Oe se po ('l dise allora) al pianeta  
 Sto vardarlo paresse un ardir? ...  
 Se me sbrissa un' ochiada indiscreta  
 El pol forsi ... lo voi prevenir.

» Soto tera el se scava una grota,  
 El se fica più in fondo ch'el pol;  
 Nova talpa, spontanea, divota,  
 Gnanca lu no ga visto più sol.»

Terminà la mia favola, no fazzo  
 Per lodarme, nissuno m'è lodà.  
 Vedo muti i Papà, co i occhi fissi  
 Inventariarse i peli de la barba,  
 E soto cozzo via rider mio barba;

Ma levandose su de la carega,  
 Cussi, dopo 'l caffè, dise Ipomega;  
 — « Se si chiede a Mislogo ed a me  
 Dei due Persi il più saggio qual fu.  
 Egli certo dirà Kabarè;  
 Io l'intrepido e doto Abakù.  
 Buon amico, giacchè siamo tre,  
 La quistione decidila tu. » —

— « Mi per mi, compare caro,  
 (Ghe risponde Nicolò)  
 A dretura li dichiaro  
 Do bufoni tuti do.  
 Anzi senza controversia  
 Mi li credo, quanto a mi,  
 L'Ipomega de la Persia  
 E 'l Mislogo de quei di. »

A ste parole i do Papà barbota  
 Quatro maghe sarache in lengua ota,  
 Che pol far gropo e machia  
 Co la catramonachia,  
 E i divora le scale in t'un mumento,  
 Che i par moschoni portai via dal vento,  
 — « Schiao sior tomo! che bel mato!

A revederse, bondi!  
 — Vu se l'omo, e mi 'l ritrato,  
 Caro barba, compati,  
 E za lesto el ghe xe drio  
 Per tornarli a sbafonar,  
 E mi resto graziadio  
 Le mie fiabe a spalesar.

## MENGON.

Cuori impastai d'insidie e tradimenti,  
 Calunie in bocassin da pute oneste;  
 Astrea col gua che ghe dà 'l filo ai denti,  
 Castità in conferenza co la peste,  
 Logicij perpetui, odj, lamenti,  
 Guera, fame, poeti, e noia; questo  
 In sta vale de pianto, e chi nol sa?  
 Xe le delizie de la società.

Ma mi da qualche tempo ò scomenzà  
 A viver tra le bestie, e ghe la cato;  
 Fazzo conversazion col papagà,  
 Filosofo col can, zogo col gato,  
 E se quel che 'l lion m'è lassà là  
 Vien el lovo a magnarmelo sul piato,  
 Monzo la vaca, e vivo graziadio:  
 Se el beco me vol mal, l'aseno è mio.

So che le bestie (no me tiro in drio)  
 No xe gnanca ele tute de un umor,  
 Ma contro vinti da butar in rio  
 Ghe ne conosso cento de bon cuor.  
 Anca tra i bruti dà su qualche fio...  
 Gh'è 'l so ladro, el birbon: ma mi, in onor,  
 Furbo per furbo, no ghe penso su:  
 Togo la volpe, e lasso l'omo a vu.

Faria credo cussi, s'el vive più,  
 Anca Mengon paesan a la Tisana,  
 Vechio col cuor coverto de virtù,  
 Come un molton da Scutari de lana.  
 Per ascoltarlo e consegnar con lu  
 Vedè in moto 'l Friul, la Trevisana,  
 Ogni so deto par una sentenza,  
 E l'esempio ghe serve d'eloquenza.

La so solita camera d'udienza  
 Xe là in fondo al cortil soto 'l tezon:  
 Quaranta fioi co la so discendenza

Ogni matina, senza confusion,  
 Se ghe afola d' attorno; co pazienza  
 Lu ghe tamisa i torti e le rason,  
 L' ascolta i dispareri e li compone,  
 Nè mente in fazza soa gnanca le done.

Vardelo là no parlo Simeone  
 Pusà sul so baston de cereser ?  
 Che bei cavei! che barba! che cegione!  
 La polvere nevosa de zener  
 Ga fiocà suso. E quel oson che impone!  
 Quela fisionomia! No l'è un piacer  
 Veder, sentirlo de cent' ani e un  
 Parlar quatr' ore, e no secar nissun ?

Gera là mi co è vegnù da Belun  
 Per squadrarlo l' abate Baracò,  
 Quel che i Savj à mandà de l' otant' un  
 A Padoa per drezzaghe i corni al bo.  
 Se avanza gravemente l' *ego sum*,  
 El bozzolo se strenze in forma d' O,  
 Duro el pedante, e dreto come un I,  
 Tosse, e dise a Mengon proprio cussì:  
 • Nonno, vorrei saper (no, mon ami,  
 San fasson, san fasson) chi fu il maestro.  
 Onde imberbe apprendesti l' abbiocci ?  
 Chi primo di sofia t' ispirò l' estro ?  
 La tua ragione rustica vagi,  
 Balbetò a lungo, o fosti ab ovo destro  
 Ne l' intellettual scuola onorata,  
 Onde il Socrate sei della brigata?

A reficiarti l' anima assetata  
 E' qui Minerva a poppe gonfie accorsa ?  
 O la terra, da saggi un di abitata,  
 Hai quinci e quindi ulisseando scorsa ?  
 Ch' io so che mesci epicurea derrata  
 All' acre di Zenon che i sensi immorsa,  
 E stendi pittagorica vernice  
 Sul zo-Kalon che dal ciel Plato elice.

Ma gnaffè! c'è di più; la fama dice  
 Cose di te che a stento creder posso;  
 Tu non brami che ciò che bramar lice;  
 Altrui cedi la polpa, e rodi l' osso.  
 Sei benefico, povero e felice;  
 Or com' è ciò? Si bujo paradosso  
 Di tenebror l' entelechia mi cinge,  
 Sciommi l' enigma or tu, Nestorea sfinge. —  
 — Vu parole in carrozza su le cinge,  
 Mi strupie, senza scarpe, in nuda pele,  
 Quel che me strenze mi, vu mò vel stringe,

Vu Febo al Sol, astri disè ale stele:  
 Mi piove; e vu: Giove dall' alto minga.  
 Ve ricordeu la tore de Babele ?  
 Ghe risponde Mengon. Monsù l' abè,  
 Se v' abia inteso, o no, lo sentirè.

De le dotrine che me celebrè,  
 De sti protì d' aerea architettura  
 So appena i nomi, o poco più a' a'fè;  
 So che el sistema, el sogno e l' impostura  
 Pol calar stola insieme tuti tre;  
 Mi no ò studià ch' el cuor e la natura.  
 M' à insegnà quello la filosofia,  
 E questo m' à imprestà la libreria.

Mi ò scomenzà putelo in compagnia  
 De l' alba a contemplar le stele e 'l cielo;  
 Po da la colombera a la boaria  
 Tra le piegore, l' oche e l' asenelo  
 O' fato forsi più de vussioria:  
 A poco a pocom' ò copià el modelo  
 De le prime virtù, de la moral  
 Che in boca dei pedanti à perso el sal.

E per esempio: el colombo leal  
 M' à dito: sii fedel a to muger.  
 M' ocoreva sunarme un capital ?  
 M' à insegnà la formiga el so mistier.  
 L' agneleto, incapace de far mal,  
 M' à la conscienza trasformà in dover;  
 M' à dà lizion el manzo de costanza,  
 E melampo e fasan de vigilanza.

E se amor no gavesse (e me ne avanza)  
 Qua per sti fioi che me tien neto el forno,  
 Me n' avaria l' esempio dà abastanza  
 La chioca e i pulesini che go intorno.  
 Cussì, senza zirar Italia o Franza,  
 Da le bestie, bonisior, o note o zorno,  
 M' ò becà una lizion, sia senza ofesa  
 De Socrate, o dei Padri de la Chiesa.

Posso? faccio del ben, ma de la spesa  
 Paga el pro la conscienza in tanto gusto:  
 Co l' amor proprio se l' à sempre intesa  
 La carità d' un cuor tenero e giusto.  
 I desiderj po? fata la resa  
 Dei conti a la rason, spegazzo e giusto.  
 Cussì in pien me la passo. Ma felice ...  
 L' aveu mai vista l' araba fenice?

## TITIRO E' L RUSSIGNOL

Stufo de coret l' etere

Frustando la canicola,  
Verso l' ocaso rodola,  
Mete i so raggi in manega,  
Spica el sol una tombola,  
Che lo sprofonda in mar.  
La note, che al so solito  
Ghe sta alle coste in mascara,  
Spalanca la so nuvola,  
Sbrufa qua e là 'l calisene,  
E fa in bota i crepuscoli  
Stranuando scampar.

Da le celesti natole

Che ghe dà 'l dì ricovero,  
A schiapi scavalcandose  
Scampa le stele in gringola,  
Come sol far le peggore  
Su l' alba da l' ovil.

Le sbusa in ciel le tenebre,

E le criela candida  
Luse de perle e d' opale  
Su l' emisfero atonito.  
Gode la tera in estasi  
La pompa signoril.

Per farla più magnifica,

Lenta la luna, tacita,  
Da l' orizzonte alzandose,  
Sporze quel globo magico,  
Dove l' arzento sfiamega  
In nitido crestal.

I rusceleti limpidi,

Che vien dal monte in copia;  
Porta qua e là co boria  
Quela brillante imagine :  
I par barbini'o codeghe,  
Che core col feral.

Là un furianelo scapolo

Scovola i pini, i roveri,  
Dà la cazza a le notole,  
Rompe i sogni a le lodole,  
E fa le catorigole  
Tra i carpani al fasan.

*Racc. Poes. Ven.*

Qua un zefireto placido

Pisola sul garofolo,  
Basa la viola e 'l bocolo,  
Sbrissa fra 'l timo e 'l ditamo,  
De fragranza aromatica  
Semena 'l cole e 'l pian

Tornada là dal pascolo

Dorme la gregia. Titiro,  
Cenando a pie d' un platano  
Coi resti de Pitagora,  
Fa i prindesi a le Najadi,  
Che a Baco far nol pol.

E mentre el sazia l' otica

De noturni fenomeni,  
Da la cima d' un alboro,  
Per le rechie, su l' anima,  
Etereo miel ghe sgiozzola  
Cantando un russignol.

Crome granite, sferiche,

Traversa l' aria libere,  
E l' eco filarmonico,  
Racolte apena, identiche  
Dala colina, in biscolo,  
Ghe le rimanda là.

Assorto in quella musica

Dolce, vivace o flebile,  
A poco a poco Titiro  
Scorda le imposte civiche,  
El formenton in cenere,  
L' oca che i ga robà.

« Fonti, ruscelli, tortore,

» Deh ! per pietà fermatevi :  
» Dite se un nume o un satiro  
» Fra queste piante ombrifere  
» La mia diletta Fillide,  
» L' idolo mio celò ! —

Late coi lavri supega

El bambin da le fragole,  
E co le rechie Titiro.  
Chiuchia da st' arià 'l netare,  
Ma 'l russignol va in sincope  
Sul trilo del rondò. —

— Oh Dio ! perchè te fermistu ?

» Bon ( *lu risponde* ) sentile ;  
Croà croà ... capissistu ?  
Ste rane senza equivoco  
Dise che stono : Titiro,  
Cedo a la so virtù. —

— No per pietà! *el ghe replica:*

No ghe abadar: el tossego

Ti ghè 'l converti in balsemo:

Lassa pur che le strepita,

Che co ti canti, credime,

Nissun le sentè più. »

L'è tropo seria?

Ben baratemola,

Cambiamo ton.

Senti la satira,

Che fava l'anare

Contro 'l paon.

### EL PAON, LE ANARE E 'L MERLO

Sfogiava a Limena

Un bel paon

La so coa splendida

In O maiuscolo

Sora un tezon.

A quel spettacolo

Raro e gentil;

Se afola in estasi

Colombe e tortore

Sora 'l fenil;

Folti su l'alberò,

Per el stupor,

Esclama unanimi

E tordi e lodole:

« Che bel color!

Quelo xe proprio

Smeraldo fin!

Che sfarzo d'opale!

Varda quel'agata

E quel rubin! »

Ma un schiapo d'anare,

Là dal paltan;

Sul panegirico

Spuava tössego,

Fava bacan.

Che brutto diavolo!

Che pie che 'l gà!

Queli xe forcole:

No parlo un astese?

Vardelo là!

Se ti 'l sentissi po

Co 'l canta ... ih! ih!

Scampa, va a scondese

Fina le celeghe; ...

Dimèlo a mi! »

Cussi l'invidia

Svoda i bomò,

E intanto l'iride

Lampizza e sfiamega

Drento quel O.

Un merlo, stufo mo

De più sentir

Quele petegole,

Sponà dal carpano

Se mete a dir:

« Le diga, strissime,

Mi no me par

Che colù meriti

Che le se incomodi

De criticar.

El mè fa stomego,

L'è là un balon ...

E po, le suplico,

Voriele meterse

Co quel bufon?

Mo, tra i volatili

Gh'è chi sostien,

Che per esempio

Gnanca ele, strissime,

No canta ben:

Che 'l paon agile

Ga la virtù,

Mentre ele zoepa:

Qua su le crozole,

De andar lassù.

Bon! da petarsela!

Porlo, co 'l vol,

D'una coa magica

Com'ele, strissime,

Far pompa al sol?

Le prova a dirghe mo

Co l'O spiegà —

— A vu sior tangaro

Copiè sta letera: »

Le l'ha copà.



## EPILOGO.

Capi za l'ironia,  
 Vegnimo a la moral.  
 Chi acusa i russignoli de stonarg?  
 Le rane dal croà croà  
 Monotono e molesto.  
 Chi spua velèn sui lampi  
 De la coa del paoni?  
 Le anare dal paltan col fango al cesto.  
 L'è donca tuta invidia,  
 E scioca presunzion.  
 Però inventori de ragù, de salse,  
 Liquoristi sublimi, dotorai,  
 Fabricatori de morbide stoffe,  
 Pittori egregi, architetti, scultori,  
 Maestri de capela,  
 E poeti, oratori,  
 E sora tuto vu, parte più bela,  
 Vita, delizia del genere uman,  
 Sfodrerè i talenti che v' à dà la sorte,  
 Mostrene 'l vostro zelo,  
 Buteve là in batelo,  
 Vegnine a consolar,  
 E ralegrè sta *lacrymarum vale*.  
 E l'anare e le rane?  
 Volteghe pur le spale,  
 Lassele brontolar sin che le vol.  
 Finzè de no sentir, de no saverlo,  
 E ricordeve l'istoria del merlo,  
 Quel che Titiro'à dito al russignol.

## L'ASENO VERDE.

Certa dona Gasparina,  
 Rica, vedoa d' un fator,  
 Visentina, lombi e schena  
 Gera piena de calor.  
 De che ani? Coss' importa?  
 I è cinquanta a san Martin,  
 Ma la i porta! .... L' era ancora

Su l'aurora del morbin.  
 Fin al zorno de quel santo,  
 Tra la pizza e la virtù,  
 Tanto e tanto la se inzegna,  
 La se segna, e la sta su.  
 Ma trovandose al pachieto,  
 Che santifica quel di,  
 Bortoleto sentà arente,  
 La se sente .... za capi!  
 L'è za in fati un bel batocchio  
 Bortoleto ben forma!  
 El ga un occhio! .... e quella gamba?  
 L'aria stramba da soldà.  
 Ma quel po ch' el cuor ghe roba  
 Xe mo un naso .... del gran stil  
 Co la goba, tinto in rosso,  
 Longo, grosso e vescovil.  
 A la vista de quel pezzo  
 Là a'Vicenza una ogni tre  
 Va in borezzo. La par mata;  
 Valo a cata mo el perchè?  
 Qua a Venezia po le done,  
 Educae come convien,  
 Xe minchione su sto tomo:  
 Le tol l'omo come el vien.  
 Ma tornando a Bortoleto:  
 Vintiun ano, bel aspeto,  
 Bona gamba, bona schena:  
 Ma 'l disnar mo? ma la cena?  
 L'è là un povero squartà  
 Da la sorte abandonà,  
 Che la stica tra la zente ....  
 Come? bon, mi no so gnente:

So che fina da ragazzo  
 L'è coplà fedelmente Michielazzo.  
 A l'oposto Gasparina  
 Ga al so comando tanto de musina;  
 Che Brunoro so mario  
 Ga lassà, se sol dir, el ben de Dio,  
 E, podendola sposar,  
 Per Bortolo el sarave un bon afar.  
 L'è vecchieta? ben: pazienza;  
 Co un tantin de compiacenza  
 E col farghe co giudizio,  
 Ora questo, or quel servizio ....  
 A bon conto intanto lu ....  
 Cinque in vin, conzo in colmo e ben passù.  
 E po .... bela! co la mor

La podaria lassarlo anca un signor.  
 Sumando sti vantagi e ste speranze,  
 Bortoleto, che in fondo no xe un' oca,  
 Mete la binda ai occhi  
 A quella natural antipatia  
 Che ga la zoventù per le antigage,  
 E acorzendose che la Gasparina,  
 Soto cozzo lo varda, e po sospira,  
 El sospira anca lu coi occhi lustrì ;  
 Anca lu la saeta :  
 El par proprio un putelo  
 Che sgangolisce sora la polpeta.  
 El la loda, el la inzucara,  
 El ghe mua 'l piato, el ghe tempa 'l vin,  
 El ghe fa de comieto e de penin :  
 E po de quando in quando  
 El ghe va in t' una rechia smozzegando  
 Qualcheduna de quele parolette  
 Maliziose, grassete, che ale vedoe  
 Ressuscita le idee matrimoniali ....  
 A le curte, no termina el pashieto,  
 Che al so bel Bortoleto,  
 Imbriaga d' amor, la Gasparina  
 Ga za promesso cuor, man e musina.  
 Ma bisogna mo dir la verità,  
 In barba de la so ninfomania,  
 Gasparina no gera de la fragia  
 De sti nostri moderni  
 Spiriti forti in cotole,  
 Che se buta in tel cesto filosofico  
 I riguardi del mondo per bon ton.  
 Ga sempre imposto el poi. C'an diraton ?  
 La se ricorda, che xe un ano apena  
 Che Brunoro, bon'anima, xe morto.  
 Tornarse cussì presto a maridar !  
 Se ghe presenta ai occhi de la mente  
 Cronologicamente  
 I so cinquanta carnevalli in fila,  
 E poverazza no la xe tranquila.  
 « Figurarse (la dise) co i me vede  
 Sposar su quella fregola de naso,  
 Quel zovenoto de bela presenza,  
 Figurarse che chiasso per Vicenza !  
 Da l' altra parte a dirsela po, dopo  
 Che ò visto Bortoleto,  
 Mi no posso più star senza de lu,  
 Nè voi certo lassarmelo scampar.  
 Coss' oi donca da far ? »

Per bona sorte mo la so massera,  
 Meneghina da Schio,  
 Doneta de proposito  
 E in ste materie dota,  
 La gera vedoa de la terza cota.  
 Gnente de meglio per la circostanza.  
 La la chiama a consulta  
 Una sera sul tardi,  
 La ghe conta 'l so caso,  
 La smania per quel naso, e i so riguardi.  
 Franca come un dottor la Meneghina :  
 « Cara la mia parona (la risponde )  
 No ghe badè. Sposeve e lassè dir !  
 Sih ! chi volesse tenderghe a sti nfati,  
 Ghe saria per nu mai consolazion ?  
 El matrimonio xe un' opera pia,  
 E chi replica 'l ben merita più.  
 Qua no credo falar. Mi, graziadio,  
 M'ò maridà tre volte,  
 E son sempre disposta per la quarta.  
 Riguardi s' à d' aver a far del ben ?  
 E po, parona, fideve de mi.  
 In cao quindese di .... bon, cossa dighio,  
 Cambieme nome se in tre zorni al più  
 Nissun pensa più a Bortolo, nè a vu.  
 Forsi doman qualch' altra novità  
 (Che za no ghe ne manca)  
 Torna a portar le chiacole a man zanca.  
 Per esempio, quel aseno ch' è là ....  
 Ghe zogo, che co un fià  
 De furberia, de industria,  
 Tra quel aseno e mi  
 Demo sesto a sto afar.  
 Lasseme mo pensar .... ghe l'ò catada.  
 Andè ; deve una bona maridada,  
 Rispondo mi de tuto ;  
 Ma ricordeve, che volemo un puto. »  
 Consolada, contenta,  
 In pressa, in furia, ma però in secreto,  
 Gasparina se sposa Bortoleto.  
 Bon ! ma Vicenza in tre minuti è piena  
 Del matrimonio de la Gasparina ;  
 No gh'è café, conversazion, nè cena  
 Che no parla de naso o de musina.  
 Dusento morbinosi, per far scena,  
 S'alza co l'alba, e spogia la cucina  
 De grela, de farsora e de stagnada  
 Per andarghe a sonar la matinada.

Una bona casota, giusto là  
 Su la piazza de l' isola, in canton,  
 Che Brunoro s' aveva fabricà  
 Co i so sparagni, a spese del paron,  
 Gera l' asilo, dove, consumà  
 La solita nuzial operazion,  
 Desnombolai ronchizzava sul leto  
 Imeneo, Gasparina e Bortoleto.  
 Andava za quei mati concertando  
 Le caldiere in baritono e in contralto  
 Soto el balcon dei conjug, aspetando  
 Per scomenzar che spontasse da l' alto  
 Quel naso illustre a chiapar aria, quando  
 Daporton de la stala con un salto  
 Capta in strada un aseno lisier,  
 Del clor de le foge de figher.  
 Che chiaole, che chiasso a quel spettacolo!  
 « Elo u aseno o no?  
 El par un luserton: el gran miracolo!  
 (Dise 'l dottor) Oh! l'è un gran caso po!  
 No varia la natura i so fenomeni  
 Cinquanta vte al dì?  
 No gh'è tant somari che par omeni?  
 Nè vedè che quei ve stupì —  
 — Che superbolo! (esclama un nobile)  
 E co mal impijà!  
 Se 'l fusse un asante a tromba mobile,  
 Allora sì; ma un aseno! pecà!  
 Se mete i ochia sul naso sior Orazia:  
 L' al varda so e su:  
 Belo! (la disse co che grazia,  
 Co che brio, l' el sa moverse colù! —  
 — Affè! ha rubo la camiscia al cavolo!  
 (Dise quel lafàfè)  
 Ehi, Cenci, tencio: ti regalo un pavolo  
 Se mi sai ir di che paese egli è. —  
 — Sparagne (risponde un barbiere gobo  
 Metendo zì bacil)  
 Vel dirò mbe dè zirà tuto 'l globo  
 Prima con t, e po con Bughenvil:  
 L'è nato a Co-verde, anzi a Verdopoli,  
 Che xe la ca; l;  
 Ghe n'ò vist miera tra quei popoli:  
 L'è 'l verde-vabile-animal;  
 Qua in Italia (forse per l'aria)  
 Ghe n'è d' ognor;  
 Là mo de stoffa eni no varia,  
 I nasce tuti verd verd i mor.

Questo, per altro, podaria bel-belo  
 Qua in clima forestier  
 Deventar zalo, e po cambiar el pelo,  
 Come cambia le foge ogni salgher. —  
 — Ecolo là, colù! (ciga segnandose  
 La nezza del piovàn)  
 Colù che va la note furegandose  
 Per le coltre pian pian. No ve fidè,  
 Done, vel so dir mi, l'è el pesario. —  
 — Che el sia mo chi se vol, per mi alafè,  
 Gnanca se vien i fioi dela Redodese,  
 Magari tuti dodese,  
 No i me dà sugizion, (risponde Beta). —  
 Salta suso Lucieta: — E mi ve digo  
 E ve lo provo: quel xe l'orca spurio!  
 L'è impastà su col fièl; no lo vedè?  
 El fièl xe verde e amaro.  
 Donca pessimo augurio, parlo chiaro:  
 Po la m'è nata a mi, l'ano passà,  
 Giusto da san Martin: tanto de notola  
 Verdone, tal e qual come quel aseno,  
 Se m'è furegà qua soto la cotola:  
 Figureve, che cighi! che spavento!  
 Me par ancora .... ancora me la sento.  
 Core là mio mario  
 Per scaturirla fora,  
 El ghe dà adosso, povareto! un' ora;  
 E mentre el strussia, el supia, el susta, el sua,  
 No me restelo là morto sbasio  
 Da un colpo in te la mente?  
 Verde saveu! no ve digo più gnente.  
 Da le rechie cussi fin a la coa  
 L' aseno smeraldin studià, pesà,  
 Su quel color tuti à dito la soa,  
 E nissun graziadio s' à mai pensà,  
 Che 'l gera stà depento co la scoa  
 Da Meneghina, che l' à mandà là  
 Per distrar da l'impresa i morbinosi,  
 E sparagnar la matinada ai sposi.  
 In soma da quel aseno invasada  
 La fola disputando se disperde.  
 I picava quel dè un sassin da strada;  
 E bona note sior aseno verde!  
 Tuti parla del reo, de la picada,  
 E a poco a poco la memoria i perde  
 Tanto del naso che de la musina.  
 Xela gnanca una dona Meneghina?

## ERCOLE IN CIELO.

Terminà le so imprese, el fio d' Alcmena  
 Lassa 'l scorzo mortal e svola su.  
 Per far là corte a Giove a boca piena  
 Ghe sbragia i numi : Pare sana a nu ?  
 Gavarave Giunon voltà la schena,  
 Ma de necessità la fa virtù :  
 La ghe la sporze un tantinin a pena  
 La man, e gnente gnente po de più.  
 Marte ghe buta proprio i brazzi al colo;  
 Ghe fa Mercurio un bel complimenton;  
 Ghe spifara un soneto el biondo Apolo;  
 E Venere ghe dise in t' un canton :  
 « Sul far de l' alba vien da mi, ma solo,  
 Che voi che ti me sbati el zavagion.  
 Pien de consolazion  
 Per tante cortesie l' à ringrazià  
 Una per una le divinità.  
 Ma co s' à presentà  
 Pluto, el famoso dio de l' oro, el qual,  
 Per non eceder nel cerimonial,  
 Co un cefo d' animal  
 Ghe schizza l' ochio, dreto come un fuso,  
 Ercole squasi ga spua' sul muso.  
 Pensandoghe po suso  
 El s' à voltà, per no guastar la festa,  
 E xe andà 'l spuo su l' andriè de Vesta;  
 Ma per questo no resta  
 Che barba Giove, che no varda a caso,  
 No gh' abia visto andar la mosca al naso;  
 Anzi dandoghe un baso,  
 El ga dito: fio mio, ti senza falo  
 Col dio de l' oro ti à chiapà el cavalo:  
 T' alo sapà su un calo ?  
 Eh no, papa! ma co vedo quel sior,  
 Xe proprio vero, se me ingrinta el cuor,  
 Me da su el mal umor :  
 L'ò visto in tera, in tanti incontri e tanti,  
 Protetor squasi sempre dei birbanti.

## EL VISIR E L' ANELO.

Al Cairo circa setant' ani fa,  
 Kalù bizaro, prodigo bassà  
 D' una de quele coe che val per tre,  
 A' fato un dì chiamar per el lachè  
 El so prete de casa, un bon dervi,  
 Savio, prudente, e 'l ga dito cussì :  
 « Belchù, varda sta gema : te dirò  
 Per chi l' à da servir. Za de ti go  
 Prove che basta : tola donca su,  
 La deposito in man de la virtù.  
 Queste xe borse piene d' oro. Va  
 Zira l' Asia, l' Europa, le cità  
 Le vile, i borghi, le mosche, i caffè,  
 E pesa le pazzie quante le :  
 E co ti trovi un che te par a ti  
 El mato più solene de stili,  
 Faghe a l' uso oriental e prostinò,  
 Metighe in deo l' anelo dighe : tiò,  
 Questo è il tributo debassà Kalù :  
 E in quatr' ani te aspo. Adio Belchù. »  
 Belchù tol su l' anelo e 'l bocasnà,  
 El se mete a viazar, e presto el sa  
 Che, da mezzo milion btendo tre,  
 Dei mati al mondo, gradadio, ghe n' è ;  
 Cervei bislachi senza tiè mi,  
 Logiche gravie de chicrichi,  
 Teste che suma tre fia inque do,  
 Spiriti incoconai de qupro quo :  
 E gh' è per tuto inzegni aul in su  
 Che crede el noi sinonimo el ta.  
 Tra i vovi a corbe de l' umanità  
 A scielger mo te voi ! cor se fa ?  
 Se mentre sora d' un la an portè,  
 Un più belo o più grossoghe ne ochie.  
 Belchù studia, confront invoca Ah.  
 Ma cossa serve se nol po a chi  
 Consegnar quel anelo a san Malò  
 L' aveva trovà un too... e squasi .... oibò  
 (Ghe dise el cuor) a oma, o in Calicù  
 Ghe n' è forsi un p mato de costù.  
 Sempre in dabio el dvi, mortificà,  
 Tuta l' Asia e l' Eopa l' à zirà ;

L'è tornà a Duvr, l'è tornà a Calè ....  
L' anelo ..... sempre el lo ga in man. Ma che?

Tra una fola d' eroi, de bos-espri,  
Come a un solo mo dir: tien, mon ami?  
Per no incandirse l' anima e i cocò,  
Oh basta, el dise, che ghe pensa el bo;  
Tornarò a casa, cercarò tra nu.

L' è a Venezia e 'l s' imbarca per Corfù.

Mati a Venezia nol ghe n' à trovà,  
Ma dei savi a fioroni in quantità.  
Co l' è a Costantinopoli (vardè  
Quando che i dise ) mentre el beve un tè  
Corer el vede el popolo, i spal,  
I gianizzeri, agà, cadì; muftù  
Verso el seragio, e tuti ciga .... halò  
Sala-mekuka-ke-al-koranò;  
Che vol dir ne l' idioma del Talmù;  
Palme, allori a chi c' è, corna a chi fu.

Mosso da natural curiosità  
El domanda: gh' è qualche novità?  
Ghe risponde un iman: no lo vedè?  
Le solite miserie che savè;  
I à strangolà el visir Macmu-Kepi,  
E tuti fa bacàn, sentiù? senti!  
El sultan ama el popolo, e perciò  
El ghe regala spesso sto gatò.

B. Nissun vorà visir dopo Macmù!

T. Eco là el suessor; vedeu colù?  
El buta l' ochio dove i ga mostrà,  
E saveu mo chi el vede? el so bassà,  
Proprio Kalù. Sorpreso el dise .... Oh ve!  
Xelo, o no xelo lu? l' è lu alafè,  
Kalù lo riconosce .... — adio, bondì,  
Ti è tornà: sì .... e l' anelo? .... presto, di, —

B. Visir, ve fazzo prima un prostinò. —

K. Voi saver de l' anelo .... el gastu, o no? —

B. Eco l' anelo .... no cerchè de più,  
Fe a mio modo, visir, tegnilo vu.

## EL CAN E 'L GATO.

Oe, per pagar le fritole a l' amiga .  
Toni à vendù el so can geri al marcà;  
Fasan da la so corda se destriga,  
E torna a casa; el gera nato là!  
I lo cerca, i lo trova, i te lo liga,  
I ghe paga a legnae la fedeltà,  
E i lo torna a cazzar, ma co fadiga,  
Dal sior conte Susin, che l' à comprà.  
Stava sustando el povero fasan,  
Sorpreso, desolà. — « Disè compare,  
(Ghe sgnoola arente un bel gatòn surian)  
V' à dà da intender vostra siora mare,  
Che i paroni ne tegna gato e can  
Per i nostri bei occhi? ghe xe care  
Le bestie le più rare,  
Fin che i ghe n' à bisogno; e po schiao siori,  
I sacrifica amici e servitori,  
Ai bisogni magiori,  
La me xe nata a mi, là dal curato,  
Dopo dies' ani: — Zorzi,  
In casa gh' è più sorzi? —  
— Sior no. Cazzeme via donca sto gato. —  
A vu sior fasanelo,  
Ve credevi esentà? Se proprio belo!

## LA LIZION.

« Che bel cielo, proprio belo!  
La colina stamatina  
Xe superba; fina l' erba  
Par più verde; no se perde  
Gnanca un fior;  
E st' arieta! benedeta!  
La va al cuor.  
Fe un servizio, don Fabrizio;  
Conduselo sto putelo  
Verso 'l monte per le sconte.

Drio 'l boschetto .... l' è uu mieto  
 E mezzo al più.  
 Za ghe giova ; po se prova,  
 Caro vu.  
 Qua el fa chiasso ! A spasso, a spasso,  
 Che no vogio più sto imbrogio ;  
 Podè andando, chiacolando,  
 Farghe scuola; la parola  
 Dà lizlon,  
 Stuzzegheghe, scozzoneghe  
 La rason.  
 Dov' el sia mo ? ... Zise, via  
 Col maestro .... Che bel estro ?  
 Xestu mato ? zo quel gato ....  
 Che sempiezzi, che strighezzi  
 Che 'l se tien!  
 Oe, la mama che te chiama ....  
 Va là... el vien. »  
 El ragazzo gh' è za in braccio.  
 « La scooleta, presto, Beta ...  
 Sta su dreto ... tiò 'l pometo,  
 Supia el naso .... dame un baso ;  
 Zo 't colar.  
 Via, batocchio ; .... l' abia ochio ... (a don Fabr).  
 E no saar » (al putelo).  
 El tol suso for da un buso  
 De la stala la so bala.  
 L' à in scarsela una burela,  
 Quatro nose, e un bel dose  
 In marzapan ,  
 El subiato, un pomo coto,  
 Piombè in man.  
 Don Fabrizio tol l' ufizio,  
 I so guanti, e marchia avanti  
 Motivando, cantuzzando  
*Tantum ergo*. Zise a tergo  
 In sol - do - re  
 Ghe fa fiò - fiofiò - fiofiò  
 Col so piombè.  
 Scorabiando, matizzando  
 Spesso Zise : *en diga* (el dise)  
*Chente chele, tossa xe le,*  
*Sion magento ?* — L' è un tormento !  
 Se nol sa,  
*Zuche tonde* (el ghe risponde)  
*Tasè là.*  
 I se avanza, e in lontananza  
 Là de fronte, a pie del monte,

Sau chi 'l vede ! Palamede,  
 Quel da Como, quel bel omo ...  
 No capì ?  
 Quel che gera l' altra sera  
 Qua co mi.  
 Don Fabrizio conosceva  
 Palamede ; e fa 'l giudizio  
 Che 'l doveva, co 'l lo vede.  
 Ma 'l putelo ( come spesso  
 Fa tre quarti del bel sesso )  
 Mala pena l' à vardà,  
 Che ga visto e giudicà.  
*Oh to gando !* (el dise ) quando  
 A redosso da una ciesa  
 El ghe vede per da drio  
 Un altr' omo spantar su,  
 Alto tanto più de lu.  
 Figureve che sorpresa !  
 El lo varda incocalio :  
*Vanda, pento, sion maento ;*  
*To le piante gh' è un ziganie,*  
*Da dio via vien su Golia.*  
 Capia l' otica ignoranza  
 Del putelo, per difeto  
 De pensar a la distanza,  
 E a la base de l' ogeto :  
 Eco ( dise don Fabrizio )  
 « El mumento mo propizio  
 De poder co la lizlon  
 Scozzonarghe la rason.  
 Golia ? caro, andemo su  
 E vedemo se l' è lu. »  
 El ghe branca una manina,  
 E i va su per la colina.  
 Palamede giusto in quello  
 Fava in zo l' istessa strada ;  
 El lo incontra col putelo,  
 Ma 'l putelo no ghe bada,  
 Che 'l lo vede tal e qual  
 Che 'l l' ha visto poco prima,  
 Un bel' omo ; lu mo stima  
 Più un zigante : natural !  
 Ma più suso de là un poco :  
 « Vegni quà mo, sior a loco,  
 (Dise 'l prete ) vita mia,  
 Questo xe 'l vostro Golia. »  
 E chi vedelo ?  
 Un ometo, un gobeto,

Alto, longo  
 Mezzo braccio più d' un fongo,  
 Che dal sito dov' el stava,  
 Visto là da la pianura  
 De do quarte superava  
 Palamede de statura.  
 El ragazzo resta là  
 Contemplandolo incantà:  
*Golia chento, sion maento?*  
*To gobeto! P' è un ragneto?* —  
 — Oh l' au visto? imparè, sior,  
 E lighevela mo al cuor:  
 Che bisogna esaminar,  
 Separar e confrontar  
 Per poder ben giudicar.  
 E pol andar a pati a l' ospeal  
 Chi sènza st' avezenza misurando  
 Confonde co la statua el pedestal;  
 L' omo dreto, belo, grandò  
 Tanto a basso, che qua su  
 L' aveu visto? el resta lu,  
 Tal e qual l' à Dio formà.  
 Se va 'l gobo rampegando  
 Per da drio sora de lu ...  
 Ben; l' è un gobo che à dà su,  
 Che la goba à sublimà.  
 Vienlo zo mo dal so scagno?  
 El gobeto, povareto,  
 Resta un ragno. Velo là  
 Don Fabrizio co giudizio  
 La lizion à fenio qua;  
 E po a casa col putelo  
 A bel belo l' è tornà.

## \* I TRE GOBI.

Verso el passo de Menai,  
 Soto un olmo stravacai,  
 Un cavalo, un manzo, e un aseno  
 Stava un di in conversazion.  
 Ma parlando de se stessi:  
 Che alboroni! che cipressi! ...  
 I se esalta! stenta a intenderse  
 L' amor proprio e la rason. —  
 — « Son più forte! — e mi più belo! —  
*Racc. Poes. Ven.*

— Go più sal! — mi più cervelo!  
 E i se indora a lodi enlatiche  
 Giusto i pregi che no i ga. —  
 « Ti de seda? e mi de ganzo. —  
 A le curte « (dise 'l manzo)  
 » Seu contenti se ne giudica  
 Sti tre gobi, che vien qua?  
 Spieghe ognun la so pretesa,  
 Faza ognun la so difesa,  
 Sia 'l giudizio inapelabile  
 Se d' acordo ghe n' è do. —  
 — Ben; so dano chi se pente. »  
 « Passa i gobi, i ghe va arente,  
 E i presenta la so suplica.  
 Quei risponde — *perchè no?*  
 No i gā veste, nè peruche,  
 Ma i se senta su tre zuche  
 Che ghe insinua el so criterio,  
 Za capi, de soto in su.  
 No ghe xe la mezzarola  
 Che ve scana l' ose in gola;  
 Ma 'l Cao dise — *no preamboli:*  
*Sior dai corni, toca'a vu.*  
 Senza pompa d' oratoria  
 Conta 'l manzo la so istoria,  
 Fa l' elogio dei servizi  
 Che l' è solito prestar.  
 Nol ga pari in robustezza,  
 Nè in costanza, nè in bellezza,  
 « El se salva co l' epilogo  
 Che l' è bon fin da magnar.  
 El cavalo con orgoglio  
 Dise — « amici, io nacqui al soglio;  
 Vanto i nobili esercizi  
 D' un magnanimo destrier;  
 Vo' di volo per la terra,  
 Mi cimento nella guerra,  
 Ed in grembo alla vittoria  
 Meco porto il cavalier! »  
 Pesi enormi, vici eterni,  
 Soli ardenti, crudi inverni,  
 Toleranza, mansuetudine  
 Fa de l' aseno l' onor;  
 Ma 'l ghe mete anca davanti  
 Ch' el ga 'l primo tra i galanti,  
 Nè 'l ghe tase che sinonimo  
 L' è anca spesso de dotor.  
 El gobeto Sabatai,

Baratin de quei mercai,  
 Dise: — « basta, ò igteso, e giudico  
 Ch' el cavalo ga rason. —  
 — Oe, compare, dove sen? —  
 Cossa diavolo diseu?  
 ( Ciga alora el gobò Semola-  
 Moliner de profession ): —  
 « E pur geri sentà storto!  
 Vu fe a l' aseno sto torto?  
 Per un solo dei so meriti  
 Tanto celebre lo fe? —  
 — Mi per mi, ghe dago el primo. —  
 Bravi fioi! per Dio, ve stimo!  
 ( Dise 'l terzo in ton ironico )  
 « E del manzo no parlè?  
 Vedeu là quella boaria?  
 Savè tuti che l' è mia.  
 Sapiè mo che la bon' anima  
 De mia mare è nata là.  
 Più de mi no ghe xe al mondo  
 Chi conossa un manzo a fondo,  
 Lo dichiaro el più benefico  
 Per l' umana società! —  
 — Ma qui, amici, a quel ch' io sento,  
 ( Dise 'l nobile giumento )  
 L' interesse e 'l vostro codice  
 Move il senso di ciascun. —  
 — Oh che caro Brigliadoro,  
 ( Ghe risponde i gobi a coro )  
 Cascheu forsi da le nuvole?  
 L' è la regola comun.

## LE DO ZUCHE PELAE.

Prima de barufar esaminè;  
 Feve romper el muso aleggamente,  
 Ma sapiè, almanco, pofardio, perchè.  
 Martin da Fiesso, e Nicolò da Strà  
 Xé soliti, l' istà, squasi ogni festa  
 Disnar insieme con un tanto a testa  
 Al ponte. El cafetier, per i so finà,  
 Sol tratarli a bon pri da paladini. ♦  
 Nicolò, per la regola del tre,  
 Ancuo doman za xe su i sessant' ani:

E Martin xe vestio dei stessi pani:  
 Amici vecchi da puteli in su,  
 E a metà de difeti e de virtù.  
 Per tosarse la chieriga a dover  
 No ghe ocure barbier, nè i ga peruche.  
 Cento spiantani in do sora le zuche,  
 Ma za savè, le teste senza peli  
 No xe pb minga stuchi da cerveli.  
 Lassemo andar. Sto zugno, el di de san ...  
 Giusto de sant' Alban, dopo esser stai  
 A spulesarse in chiesa dei pecai  
 Le conscienze per ordine del Papa,  
 I xe corsi a disnar a la so tapa.  
 Ardeva el sol, figurarse! in quei di!  
 E dopo mezzodi! I slanza in bota  
 Al diavolo el capelo, la calota,  
 La colarina, la velada shrisa,  
 E in man ghe i se mete de camisa.  
 T disna in quiete. I ga i so cento risi,  
 Un bon piatto de bisi, un lai de fora  
 Co la salsa de capari de sora,  
 Item una superba polastrella.  
 Qua un potachieto, là una mortadela.  
 Per rosto un pezzo de castrà ecelente;  
 La so sala, sante: e de qua sgiozza  
 El lodesan; e gh'è de là una bozza  
 De corbin scielto, da chiapar la chioca,  
 Che ghe peta i mustachi su la boca.  
 I magna un pero; e cussè, a crepa nua,  
 I supia, i susta, i spua petegolezzi  
 D' asceticologia: i conta i bezzì,  
 E i dise plagas de l' eroe francese,  
 Prevedendo d' averghe a far le spese.  
 Dovaressimo andar (dise Martin)  
 Adesso mo in zardin: e Nicolò, —  
 — Ben, staremo più freschi perchè no?  
 El fazzoletto in testa i s' aputà,  
 E col ventolo in man, ecoli là.  
 A pie d' un castagner i va cercando  
 Dove far cuzzo, quando — Varda ve!  
 I dise tuti do) varda, alafé,  
 Qualcossa luse là ... la voi tor su ... —  
 Lassime andar ... — vogio andar mi -- no vu.  
 Ma (dise quel da Strà) mi so sta 'l primo;  
 Provite che testimo ... — Lo voi mi,  
 Replica l'altro: e tra el sior no e 'l sior sì,  
 I se urta, i se spenze, i lota, i sbiufa,  
 Se sublima el corbin e i se petufa.



No li vede missun: e tanto pezo!  
 Nissun mete de mezzo, i fa massacro,  
 A furia de peae, de l'osso sacro  
 Sora tuto i se strazzà, i se despianta  
 Quel resto de cavei: tuti cinquanta.  
 Ma quèlo mo da Fiesso a quel da Strà  
 Dà una peada là dove no dîgo  
 E zo a gambe levae buta l' amigo,  
 Po spica un salto, e se tol su co boria  
 El premio ben pagà de la vitoria ....  
 Cussi, de i do pelai, quello ga 'l cesto  
 Sfracassà, in pezzi; e questo ansa da can:  
 E saveu cossa ch'el se trova in man?  
 Un petene de nacre bien travaillé  
 Da governarse i bucoli e 'l topè.  
 Prima de barufar esaminé,  
 Fève romper el muso alegramente  
 Ma sapiè, almanco, pofardio, perchè.

## LA TORDINA E I TORDINOTI.

Vestio da festa, in gringola  
 Sponta dal mar el zorno,  
 Ragi sbrufando intorno  
 Per sciàlo de splendor.  
 Fin quele giozze limpide  
 Che la rosada spreme,  
 Lu le converte in geme,  
 E brila l'erba e 'l fior.  
 Za la colomba rugola  
 Inquieta su la gorna,  
 Svola, se pente e torna  
 La prole a carezzar.  
 Za i passeroti a nuvole  
 Sbrega l'aria improvvisi,  
 E in bozzoli o divisi  
 Va i campi a spalesar.  
 Sparpagna l'ara i vilici  
 De formenton; de biava,  
 Togna le staeze lava,  
 Po le destende al sol.  
 Chi porta giande al maschio,  
 Chi monze vacche in stala,  
 Chi la farina zala,  
 Tamisa su l'albol;

Chî va a siegar el rovere,  
 Chi buta 'l fen sul cao,  
 Chi carga el so somaro,  
 Chi giusta el so teler.  
 Al so bambozzo stupido  
 Menega dà la teta,  
 Pasqua se fa la peta,  
 Po stizza su el fogher.  
 Vedendo l'ave atorzio  
 Che i fiori i ponze e chiuchia,  
 Spessegia la so guchia,  
 Core Lucietta al miel,  
 L'aseno a zampe a l'aria  
 Russa la schena in tera,  
 Par che 'l dichiari guera  
 A scalzi e pùgni al ciel.  
 Là, mentre l'ocche e l'anare  
 Se sgutara in fossato,  
 Se smozza l'onghe 'l gato,  
 Rosega un osso 'l can.  
 Qua la galina celebra  
 El so trionfo novo,  
 La nascita del vovo  
 Col cocodè in sopran.  
 Marenda là su l'arere  
 Pastor, piegore, agneli;  
 Pulieri, soraneli  
 Pascola in mezzo al'pra:  
 Qua 'l cazzador se furega  
 Quachio tra piante e piante  
 Col so fedel argante,  
 Co l'azzalin montà.

Ma in coa del sol, a la lontana via,  
 Se va ingrossando un nuvoloto biso.  
 Che pien de mata invidia e d'albasia  
 Ga 'l reo pensier de spegazzarghe 'l viso;  
 E za da drio de la colina el spia  
 Se 'l pol saltarghe adosso a l'improvviso,  
 E tempestando a so dispeto un'ora  
 Castigar le campagne che lo adora.  
 E, infati, mentre tuto brila 'e splende,  
 El se converte in negra bissabova;  
 El sciroco con lu za se la intende,  
 E ghe associa le nuvole che 'l trova.  
 Le prime 'l sol ghe le sbaragia e sfende,  
 Coi ragi stafilandoghe la piova;  
 Ma core un nembro, drudo de la note,  
 A taconarghe le nuvole rote.

Scampa de qua e de là cani, pastori;  
 Done, galine, piegore sgambeta;  
 Pianta 'l solco e la falce i segadori;  
 Uno perde 'l capelo, un la baretta;  
 Core soio le piante i cazzadori,  
 E un refolo insolente alza a la Beta  
 E cotole e camisa su la testa ...  
 Che spettacolo ai rospi, oh Dio, la resta !

Passava quello da la marmotina,  
 E 'l s'è avudo a segnar per maravegia.

La campagna diventa una pissina,  
 Se cufa i osei, no i bate beco o cegia;  
 Pur tra i rami d' un olmo una tordina,  
 Fata da un mese mare de famegia,  
 Stava ancora ai so fioi facendo scuola  
 De le teorie che à da saver chi svola.

Ma i so tre tordinoti, osei ragazzi,  
 Soliti andar, giustò a quel' ora, a spasso,  
 Vedendose a fiscar da quei scravazzi  
 Zogatoli, marendà, e svolo e passo,  
 Divorando le cime dei palazzi,  
 El monte, el bosco, i brontola, i fa chiasso ! ...  
 « Maledeta sta piova (i ciga) e chi la ...  
 E la tordina : « zito là, finila :

Pretenderessi, stolidi,  
 Volerghe vu insegnar  
 A chi sto mondo regola  
 Che tempo l' à da far ?  
 I ghe xe ancora i rocoli :  
 Se xe fenio l' avril,  
 Pensè a scansar le insidie  
 Del vischio e del fusil.

Là, là, ghe vol del spirito :  
 Là ocore averlo a man !  
 Sau chi manda le nuvole ?  
 Chi ve regala el gran ?

Giove co mire provide  
 Dà la piova e 'l seren ...  
 No podaria mo plover  
 Forsi per vostro ben ?  
 Vardè che umor ! petegola,  
 Studia la to lizion ...  
 E vu, sior primogenito ...  
 Parlo co 'ti frascon ...

Mentre la savia mare in sta maniera  
 Stava ando ai so fioi la romanzina,  
 El borin spenze el nembo in Inghiltera,  
 El scravazzo diventa piovesina,

El cielo va facendo bona ciera,  
 E 'l arco celeste abbrazza la marina ;  
 Sfodra i so raggi el sol : albori, vide,  
 Monti, selve, animali, tuto ride.

Ma la tordina ( che no ga in pensier  
 Che i so do tosi, che la so putela )  
 Col cuor d' accordo sul proprio dover  
 Coi occhi in ziro, sempre saldi in sela,  
 Scovre un oselador, che dal figher,  
 Che fin allora ga servio d' ombrela,  
 Muto sbrazza el fusil, e za lo monta  
 Verso quel' olmo, là, dove l' è sconta.  
 « Un schiopo, un schiopo ! O Dio ! fioi, svolè.  
 Slarghè l' ale e la coa ... presto anca ti ...  
 Racomandeva al Ciel ... là, tuti tre ...  
 Sul fenil, sul fenil ... ve son drio mi.

L' oselador à tirà el ean ; ma che ?  
 L' azzahin no risponde che cri-cri,  
 La piova penetrada sul fognon  
 Gaveva sofegà fulmine e ton.

Ma quando la tordina  
 Scrocar sente 'l fusil,  
 Aì so tre tordinoti,  
 Che trema sul fenil :  
 « Qua, qua, mozzina,  
 Qua, la dise, pissoti !  
 Slarghè quel' ale ...  
 Zontè le zate ...  
 Su quella testa ! ...  
 Zo quella coa ! ...  
 Vardè là in alto ! ...  
 Stè là ... cussi ...  
 E disè quello  
 Che digo mi.

TORDINA.

« Barba Giove (slarghè l' ale),  
 Ste tre povare cigale  
 Scioche, mate, ma pentie,  
 Pietà implora ai vostri pie  
 Per la so temerità. »

TORDINOTI.

Pietà implora ai vostri pie  
 Per la so temerità.

TORDINA.

« Fioca neve da quel monte ?

Tuti tase ... (*zatz zonte*)  
Tutti tase, come i deve;  
Nu mandemo fin la neve  
A fiocar de là da Stra »

TORDINOTI.

Nu mandemo fin la neve  
A fiocar de là da Stra.

TORDINA.

« Fa borasca? piove un' ora?  
(*Su quel beco*) e nu in malora  
Sti tempazzi, e chi li à fati ...  
Ma vien po 'l castigamati,  
Sponta el schiopo dal figher. »

TORDINOTI.

Ma vien po 'l castigamati,  
Sponta el schiopo dal figher.

TORDINA.

« Che se vu con un scravazzo  
No cambiavi 'l fogo in giazzo,  
E la polvere in panada,  
Barba Giove, che speada  
De tordine sul fogher! »

TORDINOTI.

Barba Giove, che speada  
De tordine sul fogher!

TORDINA.

« Ma la mama a za risolto ...  
(*Zo la coa*) chi poco, o molto  
Se lamenta da recaio,  
La vol farlo dal babao  
Su i nostri ochi sculazzar. »

TORDINOTI.

La vol farlo dal babao  
Su i nostri ochi sculazzar.

TORDINA.

« Se co nevega, o co piove ....  
(*Vardé in alto*) barba Giove,  
Ne vien più de sti caprizi,  
Ah! fe un viazo e tre servizi,  
E lassene fusilar.

TORDINOTI.

Ah! fe un viazo e tre servizi,  
E lassene fusilar.

TORDINA.

« Barba Giove ... a capo, su ...  
Andè a marena ... e che ve senta più. »

EL BASSA', EL PAPAGA' E MIMI.

Macmù Ibraim-bassà  
De Karà-Dabalà,  
Quel che à inventà el caffè,  
(Cussì me capirè)  
Stava quatr' ore al di  
In coro coi dervi.  
La note po no so,  
Ma mi credo de no,  
Che 'l gaveva anca lu  
La morosa Macmù.

L'aveva ristaurà  
El Karavan-serà :  
L'aveva fornio tre  
Moschee d'arzan plachèr.  
L'era sta col muftà  
Al sepolcro d' Ali ;  
Per i poveri po,  
A forza de dir tiò,  
L'aveva un di vendù  
Sina el ganzar Macmù.

Tra tante carità,  
Che dai turchi se fa,  
Anca quella ghe xe  
De sporzer al tètè  
La papa e 'l biscuñ;  
De agiutar el pipi  
Col sorte dal còcò ;  
De menarlo su è zo  
Sin ch'el staga ben su :  
E 'l lo fava Macmù.

L'aveva visità  
Un aseno amalà,

L'avea messo a un bebè  
 Un laveman de te,  
 El fava (che soi mi!)  
 Del ben squasi ogni dì  
 Da lé formighe ai bo,  
 A tu les animò:  
 E vecchi e zoventù  
 Venerava Macmù.  
 Andando un dì al marcà,  
 El vede un papagà;  
 (Oe cossa serve) el re  
 De tu le parochè,  
 El ga un zufon cussì!  
 Color del mezzodì,  
 El color bianco e blò,  
 L'ale d'oro e ponso;  
 L'era nato al Perù: —  
 Belo! dise Macmù.  
 Ma no la stava qua:  
 El canta, el subia, el sa  
 Parlar bien le fransè  
 Quanto ... quel che volè ...  
 Quanto l'abé Mori. —  
 M'em tu mon ami? —  
 Monsiè, monsiè, tu bo,  
 Pa tan que le gatò,  
 Ghe risponde colù.  
 Oe, l'è incantà Macmù.  
 Ma el nostro bon bassà  
 Vedendo el papagà  
 Là cussì garotè,  
 Come un ladro, disè ....  
 L'à domandà: son pri?  
 Tran cechen. — Le voaci. —  
 El conta i soldi, e po  
 El lo desliga: tiò,  
 Torna, el dise, al Perù,  
 Prega Ali per Macmù.  
 E avendolo sligà,  
 Ma gnancora molà,  
 Vogio, el dise, alafè  
 Che mon bisù fransè,  
 La mia bela Mimì,  
 Che adoro dopo Ali,  
 Te daga un baso o do.  
 Za la dirà, lo so: —  
 No lo strussiamo più,  
 Lassilo andar Macmù.

E al seragio tornà  
 In bota l'è mostrà  
 Quel raro parochè  
 A son bisù fransè.  
 Incantada Mimì  
 La 'l tol in man: — bondì,  
 La dise, ah ch' il è bo,  
 Sarmant, morblè, mém grò!  
 De chi estu caro? E lu:  
 De mon papà Macmù. —  
 — Sto brio, la dise, el ga?  
 Oh lo vogio in cheba qua,  
 Qua qua vicin al le ....  
 Al leto ...; no, perchè ...  
 Vien, mon peti mari,  
 Dame un baseto, issi ....  
 No aver paura nò,  
 Povareto totò, —  
 — Ma adasio, mon bisù,  
 Dise allora Macmù:  
 No l'ò minga comprà  
 Per tegnirlo sarà:  
 Ze vudrè, s' il te plè,  
 Le metr an libertà:  
 Opera pia che Ali ....  
 — Eh pazzie, caro ti ....  
 Ma, cara fia, mi po  
 No voi perder el pro  
 De un ato de virtù,  
 Torna a dirghe Macmù.  
 — Caro el mio bel bassà  
 Lassè ch' el staga qua,  
 La risponde: perchè ...  
 L'avè vus-ubliè?  
 M'avè comprà anca mi:  
 No so se me capà ...  
 Comprai mo tuti do  
 Lu in libertà, è mi no?  
 L'opera pia per lu,  
 E no per mi, Macmù?

## EL MONUMENTO.

Gera a Londra al teatro, quella sera  
 I recitava Amleto. Che pienenon!  
 Capiva poco. O' domandà chi gera  
 Quela bela signora in mantigion,  
 Là in prosenio a manzanza: « Uh! d'alta  
 (Me rispondè'l vicin) la Morthampton, (s'era  
 La duchessa; un prodigio de talento;  
 Quela, me capirè, del monumento —  
 Che monumento mo? (domando mi) —  
 E lu: — No lo save? donca senti;  
 Quatr'ani fa, l'è avudo, poverazza,  
 Un groppo de disgrazie, ma de quele! ...  
 Oe, cossa serve, una sola ve mazza!  
 E tute in quatro dì: le so putele  
 Xe cascae tute do co la terrazza,  
 E la so nena s'è copà con ele:  
 La xe restada vedoa, e so fradelo  
 Co una pistola s'è brusà el cervelo.  
 Se no gavè in tel cuor sconto, Neron  
 Compattirè la so desolazion.  
 Dopo sta bagatela de sventura,  
 Che fa la gambariòla a la costanza,  
 Per evitar almanco la tortura  
 De le ofiziosità de condoglianza,  
 Già risolto lassar Londra a dretura;  
 E da Duvrè à Calè l'è andada in Franza.  
 Arivada a Lion, la s'è fermà,  
 Ma no n'ingia per spasso; a chiapar fiù.  
 Ghe stava fissi al cuor duri i so guai,  
 Come i zafi al burchiglo co i va a lai.  
 Vero, che la gaveva la so banda  
 Con ela, e 'l so equipagio, tal e qual;  
 Che la ocupava tutta la locanda,  
 Là verso el corso a l' aquila imperial;  
 Ma cossa serve mo? Se la comanda  
 Che i l'abia a lassar sola; e gh'è un formal  
 Preceto fin ai piferi e ai lachè,  
 De no dir, gnanca a l'aria, chi la xe.  
 Ma al locandier che gera un visentin:  
 Gh'è riuscito de saver tuto a pontin.  
 L'è contà tuto a tuti. El zorno dopo  
 A scomenzà le visite a fiocar.  
 Ela, asfita e rabiosa de sto intopo,

Co aviltà s'è fate dispensar;  
 Ma xe vegnù un inglese e à sciolto el groppo.  
 Milord Artur no la 'l pol rifiutar:  
 Filosofo, signor, parente, amico,  
 Gh'è sempre una rason per ogni intrigo.  
 La educava viazando el proprio fio,  
 Solo de tredes' ani e pien de brio.  
 Pianzendo sempre, ma dirotamente,  
 Che, povareta, la cavava el cuor,  
 La ga contà la tragedia dolente  
 De tute quele tre scene d'oror.  
 Milord Artur, filosofon, prudente,  
 E che saveva come s'è da tor  
 Le disgrazie dei altri, no à mancà  
 De dirghe tuto quel che tuti sa. —  
 Ma vedendolo tempo butà via,  
 L'omo de garbo à cambià bateria: »  
 « Miledi (el dise) giova spesso in vita  
 Confrontarsi con chi non vive più;  
 Figlia d' Enrico il grande, Margherita,  
 No cedeavi in disastri, nè in virtù,  
 Scherno del mar, da' regni suoi sbandita,  
 Poi prigioniera, spettatrice fu  
 Di quel colpo di rea scure funesta,  
 Che al suo sposo regal troncò la testa. —  
 — Milord, compiangio i mali altrui, ma poi ...  
 E la torna a pensar ai casi soi.  
 « E la Stuarda? marital vendetta  
 Le sgozzò in grembo l' amator canoro.  
 Parente, amica, l' angia Elisabetta,  
 Vana d' un v'iginal dubbio tesoro,  
 Per ben tre lustri in duro carcer stretta  
 Pria la ritenne, e in un vedovo toro;  
 Indi 'l capo le fè, gentil, venusto,  
 Invida separar dal niveo busto. » —  
 Vile eccesso e crudel, milord; ma poi ...  
 E la torna a pensar ai casi soi.  
 « E la Partenopea bella regina? ...  
 Ben diverso destino el ciel vi accorda.  
 Voi vivete fra gli agi, ella, meschina,  
 Spirò tra' nodi di un' infame corda!  
 Voi notturna non-trasse empia rapina  
 Fuor de la reggia ai vostri lagni sorda,  
 Come la Russa, un dì scettrata donna  
 Che pel deserto errò priva di gonna! » —  
 Duri casi, milord, in ver! ma poi ...  
 E la torna a pensar ai casi soi.  
 « Ma come? al duol, che tienv l' alma oppressa

Non è balsamo ancor l'ambascia altrui?  
 Fialo di un' altra illustre principessa  
 La rea vicenda. Io spettator ne fui.  
 Beltà vampa è di sol: nutre se stessa  
 Rassorbendo emanati i raggi sui:  
 Ardea la bella, ed all' eccesso amante  
 Rlluceale l' ardor sul bel sembiante.  
 Non vantava il garzon l' ombre degli avi,  
 Ma vaghe forme, un cor, sensi soavi.  
 Mentre fra dolci amplessi, in erma stanza,  
 Mormoravano un dì flebili accenti,  
 Scorti 'l padre di lor, che lento avanza,  
 Gli occhi accesi d' amor, cupidi, ardenti,  
 Arma l' aulica destra di possanza,  
 Ne squassa ad ambo, in doppio colpo, i denti..  
 Ma vil ferreo strumento adocchia a terra  
 Il garzon prode e rapido lo afferra,  
 L' alta cervice al suo signor percuote;  
 Liquid' ostro regal striscia le gote.  
 A lei nel cor, tenera amante e figlia,  
 Quale e quanta d' affetti aspra battaglia!  
 Cede al terror, che cieco la consiglia;  
 Sbalza al veron e nel giardin si scaglia.  
 La rea caduta lacera, scompiglia  
 Del delicato pie la nervea maglia;  
 Vid'io lo sfregio in fronte al padre impresso:  
 E zoppicar vidi la figlia io stesso.  
 Al nuovo giorno, al suon di sue ritorte  
 Tratto è l' amante a ignominiosa morte.  
 Ella a l' eburneo collo dell' amato  
 Fido garzon non vide il laccio infame,  
 Che stridè e svenne. Almen pietoso il fato  
 Tronco le avesse l' abborrito stame!  
 Nel carcer tetro, che chiudeala, dato  
 Fu a me di penetrar. Atroce sciame  
 Rodeale il core d' angosciosi affanni:  
 Nè d' altro mi parlò che de' suoi anni. » —  
 Perchè dunque non posso, eterni dei,  
 Milord, anch' io parlar de' danni miei? —  
 « Perchè, a dirla, miledi, a la fin fine  
 Di più a lungo parlarne a voi disdice:  
 E dopo tante celebri regine,  
 Questa di quella più, meno, infelice,  
 Private rammentar stragi, rovine,  
 Piangere, desolarsi a chi più lice?  
 Di Niobe il reo destino lo sapete?  
 Vi rammentate d' Ecuja e piangete? —  
 Milord, credetè non le avrebbe mai

Confortate l' istoria de' miei guai. »  
 L' à provà qualche favola d' Esopo,  
 El g' à Boezio e Seneca cità,  
 L' à predicà al deserto! El zorno dopo,  
 Cavalcando so fio per la cità  
 Su la riva del fiume de galopo ....  
 Punfete! in mezzo al Rodano: negà ....  
 Pare, più che filosofo, Milor  
 Xe sta mafo tre dì per el dolor.  
 Xe andà Miledi amsarghe una creanza,  
 A condolerse come vol l' usanza:  
 E la ga presentà (de cortesia  
 No volendo mo sfarghe un passo indrio)  
 La serie esata per cronologia  
 Dei re che à perso un dì l' unico fio,  
 Con amara disendoghe ironia:  
 A voi, Mi'ord, ecco il ristoro, addio.  
 Scorre il padre la lista, e bagna intanto  
 La barba del filosofo col pianto.  
 Is' à lassà cussì. Dopo sie mesi  
 I xe a Londra tornai da boni Inglesi.  
 Arivada la Todi in Inghiltera,  
 Ga dà un academion: e là mo a caso  
 La duchessa e Milord l' istessa sera  
 S' à avudo da incontrar naso co naso:  
 Ma vedendose alegri e in bona ciera,  
 I s' à stretto una man, e i s' à dà un baso:  
 E dopo dialogà qualche mumento,  
 I à deciso de alzar quel monumento!  
 Ve' l mostrarè: superbo! co la sola  
 Breve iscrizion: *Al tempo che consola.*

### TOGNOTO E LA MORTE.

Tornava dal bosco  
 Coi fassi sul colo  
 Tognoto, ma solo,  
 Ansando, sustando,  
 Strussià come un can.  
 « Beato, el diseva,  
 Chi voga in galia:  
 Che vita bu .... e via!  
 Me strazzo, me mazzo,  
 Po .... a capo doman.

Me trema le gambe,  
 Sta carga me struca,  
 Go spanto la zuca,  
 Nè posso che a un fosso  
 Stuarne la sè.  
 Se arivo po a casa,  
 Un leto de pagia,  
 Sie fioli che sbragia,  
 La Lucia me crucia,  
 E mi so 'l perchè.  
 El prete me aspetta  
 Che 'l vol el quartese,  
 Me cresce le spese,  
 I stenti, i tormenti ....  
 No trovo pietà.  
 Oh morte, delizia  
 Dei più desparai,  
 Finissi i mii guai ....  
 Un baso, e po taso ...  
 Via, cara, vien qua.  
 E in tera rabioso \*  
 Tognoto a sto passo,  
 Precipita el fasso,  
 La morte più forte  
 Tornando a chiamar.  
 La morte mo in quello,  
 A falce guada,  
 Traversa la strada:  
 Che vite remite  
 L'andava a oselar.  
 La sente chiamarse:  
 La gh'è za davanti:  
 Son qua senza guanti,  
 La dise, raise,  
 Me vùstu co ti?  
 Tognoto che vede  
 Quel' orida schizza: —  
 No go tanta pizza:  
 Raise, el ghe dise,  
 \*Me cargo, bondi.

## EL PUTELO E LA LUNA.

Una bela damina, (e taso el resto  
 Perchè no vogio chiacole per piazza)  
 Avudo el primo maschio, ga volesto  
 Arlevarselo ela, poverazza!  
 So mario, che gaveva poco sesto,  
 Siben ch' el gera senator de razza,  
 El l' à lassada far, mà quel putelo  
 Presto a la mamà à rebaltà el cervelo.  
 Cossa serve .... la gera incocalia;  
 Pisselo in leto? — povàreto, el sua:  
 Rompelo la spechiera? — vita mia,  
 Varda, per carità, no te far bua.  
 Diselo un' insolenza, una busia?  
 La ghe dà un baso, e po un grasseto d' ua.  
 Dalo un pugno sul muso al sior maestro?  
 — Che bufoncelo, che maton, che estro!  
 In soma, per paura ch' el se amala,  
 No la vol che nissun ghe contradiga.  
 El regazzo, che sa che mai nol fala,  
 El fa tuto a so modo, el se destriga.  
 Se no i xe pronti a darghe su la bala,  
 El va in furor, el pesta, el rompe, el ciga; —  
 E de set' ani apena quel frascon  
 Gera un Atila in erba belo e bon.  
 El papà senator vedeva el puto  
 Da l' amor de la mama sassinà,  
 Ma nol gaveva cuor de farse bruto  
 In fazza de la so cara metà.  
 I parenti i parlava senza fruto,  
 I amici no gaveva autorità,  
 Ela po, se anca i tenta iluminarla,  
 Ga el don de Dio de no ascoltar chi parla.  
 Mentre la stava un dì lezendo sola,  
 O ingropando panele .... uh che rumor!  
 Da la corte, sbregandose la gola,  
 Quel bardassa cria: mama .... Con furor  
 La buta tuto al diavolo, la svola:  
 Indovinè perchè mo? un servitor  
 Ghe negava una cossa fora d' uso,  
 E lu da rabia se sgrafava el muso.

— Pezzo d'aseno, forca, di, perchè  
No ghe portistu subito corendo;  
Quelo che 'l vol? se in casa no ghe n'è,  
Birbante, va a comprar; son mi che spendo,  
Ubidissilo in bota. Ma el lachè  
Strenze le spale, e risponde ridendo:  
Celenza, el pol cigar fin a doman  
Che no ghe dago gnente da cristian.

La torna su furente in convulsion;  
So mario gera in camera d'udienza,  
La ghe conta l'ardir de quel bricon,  
La ghe manda de mal la conferenza,  
Tuti va a la fenestra; e dal balcon  
Co un pegio da caovechio so celenza  
Dise al lachè: — Ubidissi temerario,  
O te cazzarò via senza salario. —

— Ma .... za paron, ste cosse, con permesso,  
No le se ghe fa bone gnanca in cuna:  
El vardava in quel sechio, e per riflesso  
L'è visto in acqua a bagolar la luna;  
Sala mo cossa che 'l vorave adesso?  
Se la parona ghe ne pol dar una,  
Mi no per dio! nol vol minga el ragazzo  
L'acqua, nè 'l sechio, el vol la luna c....!

Ride tuti, compresa la parona,  
A sto spropositazzo da paela:  
Ma la ghe pensa su, la ghe ragiona,  
El zorno dopo no la par più ela,  
Coi speroni e la scuria la scozzona  
El so pulier; l'è portà brena e sela ....  
Oe .... l'è stà consegier de santa cròse,  
L'è andà su come rosso, e morto dose.

#### EL PARALITICO E L'ORBO.

Viveva a Balsora,  
Cità de Persia,  
Trent'ani fa  
Do miserabili,  
Che proprio merita  
Celebrità.

Un gera strupio  
E paralitico  
Desnombolà;  
E l'altro un inclito

Professor d'otica  
L'aveva orba.  
Quel stava immobile  
Vicin a un gatolo  
Abandonà;  
Se 'l tenta moverse  
El casca in sincope,  
El fa pietà.

Tuti el comisera;  
Nè ghe fa un' anima  
La carità.  
La fame 'l rosega,  
La rabia el sofega,  
L'è desparà.

L'orbo a una betola  
Da terza a vesparo  
Stava pusà,  
De drento i crapola,  
Ma gnanca tossego  
Nissun ghe dà.

Se 'l va, el precipita;  
La gola el stracola  
Se 'l resta là;  
Almanco avesselo  
Quel can da foleghe  
Che i ga copà!

L'era el so codega  
Da lu in tei bozzoli  
Sempre menà;  
L'aveva in piccolo  
Provisto al mastègo,  
E sbezzolà.

Pianzendo a lagreme  
Su la so perdita  
Col cuor strazzà  
A pie d'un alboro  
Col paralitico  
El s'è trovà.

Conforta i poveri  
L'aver dei miseri  
In società.  
Le so disgrazie,  
Interompendose,  
I s'è contà.

Dopo che al diavolo  
I richi stitici  
I ga mandà;  
Par che ne l'anima



Ghe piovà el netare ;  
 I chiapa fià.  
 Al paralitico  
 Dise co spirito  
 L'orbo : « vien qua :  
 Ai pover' omeni  
 L'ira, la colera  
 No à mai giovà ;  
 Ricchezze e feudi  
 Se a pochi stolidi  
 Ga el ciel donà,  
 D' inzegno fertile,  
 D' astuzie prodigo,  
 Co nu l' è stà.  
 El cuor dei omeni  
 No è minga in Persia  
 Disumanà ;  
 E po le femene  
 Tien sempre catedra  
 De umanità :  
 Amigo, credime,  
 Tanto xe un talaro  
 Che do metà.  
 D'acordo unimose  
 Sposemo i cancarì,  
 Le avversità.  
 Gambe per moverme  
 Mi go ; per vederghè  
 Ochi ti ga.  
 Saremo i organi  
 De indispensabile  
 Necessità.  
 Levite in aria :  
 Su in spala ; pusite !...  
 Cussi se fa.  
 Varda che pupole !  
 Ste gambe crozzole  
 Per ti sarè ;  
 Ti per mi esanima  
 Con ochio vigile  
 Dove se va ;  
 E l'orbo intrepido,  
 Dove te comoda,  
 Te porterà.  
 Do corpi inabili  
 Un san e vegeto  
 Cussi à formà ;  
 I cerca, i furega

Tuti i viotoli  
 De la cità.  
 Da quel spettacolo  
 Mossa la publica  
 Curiosità,  
 Se afola el popolo,  
 E le limosine  
 Ga scravazzà.

## EL GRILLO E LA FARFALA.

Sconto là, tra l'erba e i fiori,  
 Stava un povero grileto,  
 Contemplando co dispeto  
 Un superbo calalin.  
 Su quatr' ale fine fine  
 De magnifico lavorò,  
 Ghe brilava in mezzo a l'oro  
 El smeraldo col rubin.  
 Che bel vederlo a capriccio  
 Lasciyeto andar svolando,  
 Sal e spirito robando  
 A la rosa, al zensamin !  
 Ma diseva tra lu el grilo :  
 « Che giustizia xe mai questa ?  
 Me darave un pugno in testa  
 Quando penso al mio destin !  
 La natura incocalia  
 De quei corni che l'impira,  
 A lu tuto, e qualche lira,  
 E a mi gnanca un bagatin ?  
 A lu vezzi, grazie e doni,  
 A mi i sali d' una zuca ?  
 Via meteme la perùca,  
 Che son proprio un figurin.  
 Gh'è nissun mo che me varda ?  
 No i sa gnanca che ghe sia ;  
 Creparò de sora via  
 Soto el stalfo d' un fashin.  
 Ma no gera meglio assae ...  
 Corpo e taca .... de lassarme  
 Nel mio vovo, che menarme  
 In sta gala, a sto festin ?  
 Da su, intanto ch'el taroca,  
 Oto dieste puti in fola,  
 Che tornava da la scuola  
 Morsegando el calepin.

Visto apena el bel pàvegio,  
 Quela stofa rica e rara  
 Tuti core, tuti a gara  
 Tenta farghene botin ;  
 E chi spiega el fazzoletto,  
 Chi la man stende bel belo,  
 Quelo sporze el so capelo,  
 Questo buta el baretin.  
 Fa de tuto per salvarse  
 Quela povera farfala ;  
 La va su, ma po la cala ;  
 Se la cuca el più vicin.  
 Tuti allora ghe xe adosso,  
 Chi la testa, chi un' aleta,  
 Chi ghe sbrega la coeta ....  
 Bona note calalin.  
 Quando el grilo, che spiava ,  
 Vede come 'l ga finio ;  
 « Mo minchioni, el dise, sio,  
 Che 'l se peta el so morbin !  
 El brilar, a quel che vedo,  
 Costa tropo; adio sior mondo,  
 Torno in buso, me sprofondo,  
 Vago a farne certosin.  
 Cari fioi, gavemo tuti  
 Mal e ben in varia dose,  
 Ma chi spica sempre rose  
 Più dei altri dà nel spin.

#### EL PROGETO DE L' ASENSO.

Diseva un aseno  
 Ben bastonà :  
 « No gh'è giustizia,  
 Nè carità :  
 Perchè mo a trotolo,  
 Can del fator,  
 Tante mignognole,  
 Tanto favor ?  
 Tuti lo cocola,  
 Vien qua tetè,  
 Buzzolai, zucaro,  
 Cipro e caffè ;  
 E a mi che strussio  
 Più d' un stalon,

Povaro diavolo,  
 Pagia e baston!  
 Dov' è i so meriti  
 Voria saver ?  
 Mi no so vederli  
 Da cavalier.  
 Alzarse e meterghe  
 Le zate in man,  
 Saltarghe ai totani,  
 Farghe bacan ;  
 Star come i omeni  
 Col peto in su,  
 Licarghe in gringola  
 Dal ron al cu ...  
 Ma se ste buscare  
 Lo fa regnar,  
 Per cossa m' ogio  
 Da desparar ?  
 E grazia e spirito  
 Anca mi go ...  
 Orsù, provemose ..  
 L'ò imitarò. »  
 E la so massima  
 Fissa cussì  
 El mete in pratica  
 L' istesso di.  
 Torna da vesparo, .  
 O dal perdon,  
 Col padre Ipolito  
 El so paron:  
 Co vede l' aseno  
 Ch' i è là ch' i vien,  
 Se mete a l' ordine,  
 Se posta ben ;  
 E su drezzandose,  
 Lesto e gentil  
 In perpendicolo  
 Da campanil,  
 Spalanca in ipsilon  
 Le zampe, e zo  
 Al colo butise  
 De tuti do.  
 Li basa e strucola  
 De vero cuor,  
 Li imbava e imbrodola  
 Da far oror. —  
 » Misericordia !  
 Agiuto! oimè ! —

E a gambe a l'aria  
 Va tuti tre.  
 Ma Biasio e Tofolo,  
 Toni e Martin,  
 Chi armà de latole  
 Chi armà de spin.  
 Come a Venezia  
 Sul bacalà,  
 Pesta su l'aseno ...  
 I l' à copà.  
 Par che sta favola  
 Ne voglia dir :  
 Che dal so circolo  
 No s' à da uscir,  
 Lassè ai gramatici  
 E l' hoc e l' hic,  
 Se portè crozzole  
 No fe da Pik.

## EL LOVO E LA CIGOGNA.

Un lovo, zentilomo del paese,  
 Tornando da le nozze de dogati,  
 Dove, per comparir grato e cortese,  
 L' aveva divorà piatanze e piati.  
 Gaveva ancora un osso ficà in gola,  
 E nol poteva proprio liberarse ;  
 Oe ... ghe andava mancando la parola,  
 E za el gera là là per sofegarse.  
 Ghe mete el beco drento in pressa allora  
 Una cigogna, che là gera in ziro,  
 La branca l' osso, la ghel tira fora ;  
 E 'l lovo : *ohimè no moro più, respiro.*  
 La cigogna se aspeta un regalon ...  
 Gnanca el la varda; ela ghe dise a pian :  
 « Me donela qualcosa za-paron ?  
 E lu : credo, comare, che scherzè :  
 V' ò lassà tirar fora el colo san,  
 E volè che ve paga ? ingrata ! andè.  
 Done, za me intendè,  
 Gh' è 'l lovo anca tra nu. Felici  
 Se in premio de la vostra carità  
 Tuto el mal che 'l pol farve nol ve fa.

## OSMAN E MOMOLA.

Done care, done bele,  
 Cossa mai voleu de più ?  
 Ah ! gavè tra carne e pele  
 Qualche magica virtù !  
 Siè pur vedove, siè pute,  
 ( Ghe scometo, se volè )  
 Tute quante, tute, tute,  
 Circum circa la gavè,  
 Gh' è nissun che ghe resista ?  
 No lo crado in verità :  
 Chi pol mai formar la lista  
 Dei prodigi che la fa ?  
 Al brilar de do pupile,  
 Al sorider d' un bochin  
 Branca in pressa el fuso Achile,  
 Torna Alcide in bocassin.  
 Per vu el mato fa giudzio ;  
 Deventè la so rason :  
 Vu le norma del caprizio,  
 D' un filosofo un bufon.  
 Sempre averta a becar cuori,  
 Vu la trapola tegnì.  
 Chi se ingambara, schiao siori,  
 Co l' è drento lo sbasi.  
 Done care, done bele,  
 Cossa mai voleu de più ?  
 Ah ! gavè tra carne e pele  
 Qualche magica virtù ;  
 A sto proposito :  
 Co gera a Tripoli,  
 Vint' ani fa,  
 Meemè gianizzero  
 M' à un dì contà,  
 Che là sul Bosforo  
 El primogenito  
 De Tamerlan  
 ( Chè xe stà 'l celebre  
 Sultano Osman )  
 Secondo el solito  
 Gaveva un florido  
 Seraglio pien

Tutto de Veneri...  
 Ascoltè ben.  
 Qua ochieti languidi  
 De amor in gringola,  
 Che dise: Oimè!  
 Oh cascò in sincope,  
 'Moro alafè.  
 Là negri-fulgidi  
 Co cento diavoli,  
 Che dise: oibò,  
 Va pur e brusite,  
 Ma co mi no.  
 De qua un perlifero  
 Soave, tepido  
 Gentil bothin  
 De coral morbido  
 E de rubin;  
 De là biondissime  
 Chiome, che piccola  
 Sie quarte e più,  
 E in-drezzè, e in bucoli  
 Vien zo, va su.  
 • Svelta discepolà  
 • Qua de Tersicore,  
 Che in bianco vel  
 Par tra le nuvole  
 Scesa dal ciel;  
 Grazie la semena  
 Col penin celere  
 Lizier cussì;  
 Che 'l vedè a moverse,  
 Ma nol senti;  
 E intanto armonici  
 Deolini candidi,  
 A quatro, a tre,  
 Saltela e bagola  
 Su l' oboè.  
 Ma ste delizie,  
 Conforto e Balsemo  
 D'ogni mortal,  
 Per Osman proprio  
 Xe senza sal.  
 La bela Momola  
 (Che gran de peyare!  
 Che mato umor!)  
 Ga ponto l'anima,  
 Ga robà 'l cuor,  
 Vardela, tochela?

Lu core subito  
 A basar là;  
 L'adora in estasi  
 Quel che la fa;  
 Per farghe i nobili  
 Doni magnifici  
 Che 'l voria lu,  
 L'Indie xe povere,  
 Spogio el Perù.  
 Ogni dì splendide  
 Stofe d'egregio  
 Lavoro fin  
 Sfioa dal Messico  
 O da Pekin;  
 Per ricamarghele  
 L'agata e l'opale  
 Indrio nol tien,  
 Le perle a sessole  
 Ghe svoda in sen.  
 Curte; i caprizi  
 Tutti de Momola  
 Xe per Osman  
 Decreti altissimi  
 De l'Alcoran.  
 Una note, ma che note!  
 Chiara, placida, superba,  
 Stava Osman sentà su l'erba  
 Co la Momola in zardin.  
 Va increspando la marina  
 Fresco fresco un zefireto,  
 Che a la bela in corsiereto  
 Fa tremar el cotolin.  
 No gh'è luna; tase 'l bosco,  
 Tutto atorno xe tranquilo;  
 Al più canta qualche grilo,  
 E in lontan un russignol.  
 Spesso atorno ai do morosi  
 Slarga e strenze le so alete,  
 Matizzando fa baossete,  
 Scampa e torna 'l lusariol.  
 Strucchiandoghe i zenochi,  
 Sbasuchiandoghe le man,  
 Pende assorto in quei bei occhi  
 Semivivo el Musulman.  
 E qua i critici pretende  
 Che i do amanti a brassacolo  
 Far de do volesse un solo ....  
 No voi dir quel che no so.

Co no vedo mi no credo,  
 E co vedo vardo e taso,  
 Ghe xe forsi cascà un baso,  
 E l' invidia taglia zo.

Tut' a un trato Momoleta

De un spernachio sul confin

Spuntar vede una steleta

Col so lampo cristalin :

« Oh co bela! oh dio co bela!

Varda, Osmano, che splendor!

Quela stela, quella stela ...

Ah ! ghe lasso suso el cuor. —

— Vita mia, risponde Osmano,

Per pietà no ghe pensar ....

Che tormento ! oh dio ! che afano

No podertela donar. »

Done care, done bele,

Cossa mai voleu de più ?

Ah gavè tra carne e pele

Qualche magica virtù !

Ma per altro po, sorele,

Cussì a dirsela tra nu,

O fe 'l manegò a le stele,

O lassele star la su.

### L'ASENO IN GALA.

Un aseno portava su la schena

Le reliquie d' un santo in prussission.

Che popolo ! La piazza gera piena ....

Zo riverenze: tuti in zenochion.

L' aseno, che toleva quella scena

Per una personal venerazion,

Marchiava in'gravità, vardava apena,

E se credeva almanco Salamon.

L'istesso a mi sta note: m'ò insognà

De meter su la vesta. Ih ! ih ! che fola !

Che inchini a rompicolo qua e de là !

Oe ! scomenzava a far la sotogola ....

M'è cascà i brazzi co m' ò ricordà

Le mie maneghe larghe, e la mia stola.

Regazzi ! corè a scuola

De virtù e de saver. Sapienti, onesti,

Se no ancuo ( che no i par tempi questi )

Vegnarà un dì, che senza  
 Ordini, toga, titoli, divisa  
 Godarè la beata compiacenza  
 De farve rispetar anca in camisa.

### EL CINGIAL E 'L SIOR MARCHESE.

El marchese Merliton

Rico, vano e macaron,

( Qualità gentili e bele

Che sol viver da sorele )

Se credeva, poverazzo,

D' aver tute in festa a mazzo,

Seben sparse in tante parti

Le dotrine e le bel' arti,

E vedeva in tei so bezzì

Scienza, brio, talenti e vezzi.

Ogni zorno una dozzena

De bei spiriti de schena,

De sublimi progetisti,

De antiquari, de modisti,

De mercanti d' antrezza,

De gargati in elafa,

De maestri de penelo,

De dotori de scarpelo,

De alchimisti, de architetti,

De oratori, de poeti,

Tuti amici de la gola

Decorava la so tola.

Chi mostrava un disegno,

Chi diseva su un soneto,

Chi stonava un bel rondò,

Chi strussiva do bonò

Chi abbozzava una chiacona,

Chi l' arena de Verona ;

Questo imagina un negozio,

Quelo giusta l' equinozio,

Uno dona, st' altro tol,

E fa un terzo i conti al sol.

El marchese gravemente

Sente tuto come gnente,

Tuto esamina e corege,

E stranua sentenze e lege.

Muti, estatici tra lori

Quei artisti, quei dotori  
 Svoda intanto fiaschi e goti:  
 Dise in cuor: *viva i merloti!*  
 Sbragia è ciga come mati:  
*Viva el re dei mecenati!*  
 Dopo pranzo so celenza  
 Ga più calda la sapienza,  
 E va al fresco d'ordinario  
 Nèl so parco solitario.  
 Squasi sempre ghe va drio  
 Cò rispetto sior Matio,  
 Fator vecchio de paruca,  
 Colo storto e bona gnuca.  
 Verso sera, no xe un mese,  
 Spassizzando el sior Marchese  
 Per la solita verdura,  
 Che se fava un poco scura,  
 Tira fora l'ochiafeto  
 E contempla el so boschetto.  
 Stava in quel col sgrugno in guera  
 Un cingial strazzand' tera,  
 Come i è soliti de far  
 Quando i denti i vol guar.  
 Osei piccoli, osei grossi,  
 Gardellini, petirossi,  
 E cainegri e fagareli,  
 Merli, lodole e storneli,  
 Russignoli, passeroti  
 Amaestrai da Pachjaroti,  
 Fava intorno svelazzando,  
 Gorghegiando, beolando,  
 A quel bruto animalazzo  
 Quela corte che a palazzq,  
 A l'usanza veneziana,  
 Se fa al savio in settimana  
 El caonegro qualche volta  
 Fa un bel trilo; e lu l'ascolta.  
 Qualche volta el russignolo  
 Se graniste un bel a-solo;  
 E sporzendò el sgrugno in sù  
 Par mo proprio che colù  
 Vegia dir, no: da cingial,  
 Che no gh'è po tanto mal.  
 El Marchese incocalio  
 Dise allora a sior Matio:  
 « Oe! fator, coss'è st'istoria?  
 Vardè fa co quanta boria,  
 Co che pegio da censor

Fa quel porco mo el dotor.  
 De la musica vocal  
 I fa giudice un cingial! »  
 Con un bel riverenzon  
 Al marchese Merlito  
 Sior Matio risponde lesto:  
 « Oh! za no, no è minga questo,  
 Sti osei, vedela celenza,  
 Va drio al porco con pazienza,  
 Perché lu smove la tera,  
 Fa dar suso qualche miera  
 De graneti, de vermeti  
 Che per lori xe confeti  
 Cantuzzando i lo compagna  
 Finchè dura la cucagna,  
 Po i ga el porco, e la sentenza ....  
 Me ricevela, celenza? »

#### I DO PAESANI E LA NUVOLA.

« Vardè che fregola  
 De nuvolon!  
 (Diseva a Biasio  
 Barba Simon)  
 Oimè, aspetemose  
 Un tempeston!  
 Che lampi oribili,  
 Che saeton!  
 Misericordia  
 San Pantalon!  
 La biava al diavolo  
 Col formenton!  
 Schiao siori persegghi,  
 Gnanca un melon,  
 Gnanca una nespola,  
 Gnanca un maron!  
 Quel'ua de zucaro  
 Là del stradon ....  
 Bruzada in cenere ....  
 Tuto un carbon!  
 St'altra domenega  
 Che sagradon!  
 Magnemo i roveri  
 E quel teson!

E po ancuo quindese ...

Fora bubon,

E manzi e piegore

A tombolon :

Me scondo in camera,

Scrivo al paron.

*Fisso fisso vardando su in cielo*

*Coi so bravi ochialoni sul naso : —*

De ste to profezie persuaso

Proprio gnente ma gnente no son ;

*(Barba Biasio risponde a Simon)*

Anzi a dirtela, caro fradelo,

Sbrega pur, buta via el to lunario,

Che mi vedo a dretura el contrario.

Che tempesta ! Quel bel nuvolon

Porta piova, e po piova, minchion !

Oe, ti sa che xe vinti e più zorni

Che no casca una giozza da l' Mto :

Un scravazzo xe un miel ! Femo un salto,

Oh che biava ! che bel formenton !

Quanto fen ! quanto vin ! oh co bon !

Visto mai no avarà sti contorni

Un raccolto più belo, più grasso :

Se faremo riconi : e che chiasso !

Ch' el ne slarga i graneri el paron,

E ordinemose un bel canevon.

*Ma qua barba Simon*

*Dando a Biasio un spenton : —*

Va là, el dise, zucon,

Mi go otanta stagion ;

De sti nembi un million

Ghe n' ò visto bufon :

Ma mai più quel cegion.

Veh che lampi ! ahj che ton !

Ma za ti in conclusion

Ti è una zuca, un melon.

B. Tuti vede coi so ochi ...

S. Sì, ma i toi xe do fenochi ...

B. Spero in Dio che ridarò ..

S. Pianzaremo tuti do.

Ma voi darte po del stolido,

B. E mi darte voi de l' aseno.

S. A chi ? ... B. a ti-S. ela a mi ? mo no ...

Chiapa intanto ; intanto chiò ... »

Qua scomenza una salva de pugni,

De scalzae, de sgrafoni, de slepe ...

Core a meter de mezzo el piovan : —

« Via, sbragiando, via zo quele man,

*Racc. Poes. Ven.*

» Oe Simon, Biasio, quietite — Oibò ! »

El se beca el quartese col pro.

Ma intanto che i se pesta

Dà su un colpo de vento,

Che se scoa in t' un mumenton

Quel nuvolon coi lampi,

E adio piova e tempesta ;

El raccolto dei campi,

Tal qual el gera, el resta.

Chi se vanta saver quel che Pandora

Tien drento del so vaso,

Squasi ogni dì, co la lo svoda fora,

Se trova regalà tanto de naso.

### EL SACERDOTE DE GIOVE.

No so in che secolo,

E no so dove :

So che pre-Mocolo

L' altar de Giove

Ministro preside

Serviua un dì ;

El gera vedovo,

E co do pute ;

Do bone diavole

E gnanca brute ;

Ma in quanto a spirito,

Cussì e cussì.

Far guardia a vergini,

Mistier da cani ;

El sa che Giulia

Ga disdot' ani,

Livieta sedese,

Come se fa ?

Però el se rosega

Per maridarle ;

Ma el più difficile

Xe de indotarle,

Che apena i zocoli

L' à civanzà.

L' era el pontefice

Fra i sacerdoti ;

Ma scarse vitime,

Pochi divoti

Povero e squalido

Lassa l' altar.

Un zorno Giulia  
 Tonda e robusta  
 Sunando fragole  
 Move la susta,  
 Stazzega i nomboli  
 D' un zardinier ;  
 E sul so esempio  
 Anca Livietta  
 Co do mignoguale  
 Fate a moleta  
 Pizzega el fomite  
 D' un pignater.  
 I tol pre-Mocolo  
 Uno per banda :  
 Per muger Giulia  
 Quel ghe dimanda,  
 Dimanda Livia  
 St' altro per lu.  
 « Oh ! ( *dise Mocolo* )  
 Da sacerdote,  
 Le la ga picola,  
 Fioli, la dote! —  
 — Oh ! *i ciga unanimi*;  
 Megio per nu ! —  
 — Ben, donca totela ...  
 St' altra xe toa. »  
 Questo e quel zenero  
 Tol su la soa ;  
 E i core i posterì  
 A scaturir.  
 I studia l' ordine,  
 L' economia,  
 I salva el merito  
 Co l' armonia:  
 Cussì i vivatola  
 Senza patir.  
 Ma el pare tenero  
 Per le so tose  
 Brama de vederle  
 Anca da spose  
 Dopo la critica  
 Risoluzion.  
 Gera mo scandalo  
 Anca in quei zorni  
 Zirar in tonega,  
 O in mitra a corni,  
 Lu el ghe va in mascara  
 Da pantalon.

El chiama Giulia  
 Sola da parte :  
 « Vien qua mo, cocola,  
 Vien a sfogarte,  
 Se qualche radeo  
 Ti ga sul cuor.  
 Parlime libera :  
 Xestu contenta ?  
 Disnistu ? cenistu ?  
 Pan o polenta ?  
 Te manca, viscere,  
 Quel che più ocor ? —  
 — Papà, co Tofolo  
 ( *La ghe risponde* )  
 Vivo in tel zucaro :  
 Ma ne confonde,  
 Ne seta i totani  
 Sto ciel seren.  
 Oh se gavessimo  
 Ogni matina  
 Un scravazzotolo  
 De piovesina,  
 Che i nostri brocoli  
 Sgionfasse ben ! —  
 — Ho inteso : seguita :  
 E per el resto ? —  
 — Papà, credemelo,  
 Bastaria questo ! —  
 — Fia mia, consolite,  
 Te assisterò.  
 Doman mi celebraz  
 L' aniversario  
 De Giove Olimpico.  
 No go salario :  
 De quatro nuvole  
 Lo pregarò.  
 Finta la visita,  
 Prima de sera  
 El va, e l' interoga  
 La pignatera.  
 « Voi saver, Livia,  
 Come la va. —  
 — Oh ! poche chiacole,  
 Papà mio caro,  
 Mio mario Trapano  
 Xe un omo raro :  
 No gh' è 'l so simile  
 In sta cità ;



Da terza a vespero  
Mai nol sta in oio :

El ga del credito :

E che negozio !

Semo do tortore,

Mi e lu, lu e mi ;

Solo vorèssimo,

Co le xe fate,

Che 'l sol benefico

Su le pignate,

Pronto a sugarnele

Fusse ogni di.

Se Giove Olimpico ...

Papà, preghelo,

Bechè sta grazia

Per nu dal cielo,

Da lu el pontefice

Ga quel che 'l vol. —

— El ga la buscara,

Livietà bela !

Va prima e giustite

Co to sorela :

Pignate o brocoli,

O piova o sol. »

## EL PLATANO E 'L RUSCELO.

El conte Sardapol, che discendeva .

In linea reta da' Sardanapalo,

Che vegniya anca lu d' Adamo e d' Eva,

Come el primo che passa se no falo,

Gera za un pezzo grosso, ma pareva

Ch' el s' avesse ingiotio, che soi mi? un palo,

Qualche mazzo de maneghi de scoe:

Tanto el stava dureto e su le sog.

Per render rispetabili i so torti,

E la fama eclissar dei so magiori,

L' aveva visità tute le corti,

Cambiando l' oro in titoli e in onori.

Tra i usi mezzi dreti e mezzi storti,

Che copia uno da l' altro i gran signori,

L' à portà quel de finger, prima o poi,

De abadar qualche volta ai fati soi.

Dando corso a le mode forestiere,

Come sol far chi torna al so paese,

L' à scielto una anca lu de le so tere

Per darse l' aria d' occuparse un mese ;

Ma pien de pure idee zentilomere,

Che 'l teme de sporcar, se l' è cortese,

Nol trattava nissun, talchè la noia

Stava per farghe nobilmente el boia.

L' andava qualche volta, per svagarse,

A spassizzar per un alè a cordon

D' albori dreti, come le comparse

De l' opera co i tira su 'l tendon;

E là el pensava a l' abito da farse

Per guadagnar el premio del bon ton :

Là el stonava in falso un bel rondò ;

Là 'l chiamava a capitolo i bombò.

Ma in pien, come d' za dito, el se secava,

E 'l gera tuto 'l di de mal umor ;

Che la boria del rico fa la bava

Se l' invidia no maza el spetator.

El piovan de la vila ghe spuzzava ;

El medico xe un scioco ; e co dolor

L' à rilevà che in tuto quel paese

No gh' era un can che parlasse francese.

In fondo a quel alè svolava al cielo

Rochetoni de giozze cristaline,

Che ghe inafiava po, fate ruscelo,

Un boschetto de piante oltramarine.

Sfogiava in aria, in forma de capelo,

A custodia de quel' acque argentine,

Dal margine, smaltà de fiori e d' erbe,

Le so fronde un bel platanò superbo !

Mentre un zorno a quel' ombra el conte solo,

Per no lassarse imponer da la smara,

Scortegava le rechie al biondo Apolo,

Cantando una canzon su la chitara,

El sente ronchizzar in fondo al brolo :

El buta l' ochio, el vede verso l' ara,

Soto al tezon, sbafarà ne le forme,

El so gastaldo, Bortolon, che dorme.

« Ehi Bortolone ! ( ciga so celenza )

Alzati dico ! villanaccio, qua ...

Bue ... più profonda quella riverenza ...

Io suono, e dormi ? che temerità !

Ardisci di russare in mia presenza ?

Meriteresti ... petulante ! va,

Ma rammenta, bifolco, chi tu sei,

Che il cibo che ti nutre a me lo dei ;

Che signor quinci e quindi è Sardapol;  
 L' alito stesso, che respiri, è mio ...  
 Capisci? » — Bortolon, che co ghe dol  
 Ga imparà da putelo a dir oh dio!  
 Che à studià, che sa' scriver, che se 'l vol  
 Parla anca lu toscan co qualche brio,  
 Se frega i occhi, se va destirando,  
 E risponde po al conte sbadagiando :  
 « Sala, celenza, che la m' à alafè  
 Spiegà mo 'l sogno ? me pareva, giusto  
 Co l' à chiamà, che no so mo perchè,  
 Sto platano disesse in ton d' Augusto  
 Là a quel ruscelo : Tu senza di me  
 Saresti un vile arido fosso angusto ;  
 L' ombra ( tal qual ) delle mie frondi sole  
 Ti serba illeso dall' ardor del sole.  
 Se quinci e quindi a' pellegrini erranti,  
 (La senta mo che bela cargadura :)  
 Se a' guerrier sitibondi ed anelanti  
 Tu largo appresti l' onda fresca e pura,  
 Se dolce sonno a' pastorelli amanti  
 Il tuo soave mormorio procura,  
 Egli è sol mia mercè. Quanto tu sei,  
 Capisci ? è dono degli auspici miei.  
 El ruscelo, celenza, no se perde .  
 Minga per questo. Credela ? el risponde : —  
 — Sarà ! ma la me onori, Altezza verde,  
 L' umor che note e dì per le profonde  
 So raise se filtra, se disperde,  
 E i rami ghe moltiplica e le fronde,  
 Chi ghe 'l va preparando in cortesia ?  
 El ruscelo: sior platano ? ... e po via. »

## EPILOGO.

Ai birbi e ai sfolidi  
 Mi fin adesso,  
 Come vedè,  
 Fat' d' 'l processo.  
 Cinquanta favole  
 Bastele? oimè!  
 Ma za le chiacole  
 Me mor in boca,  
 No posso più!

Soto a chi toca :  
 Fora quel pifaro,  
 Poeti, a vu.  
 Vizi e spropositi ?  
 L' isola è piena ;  
 Proprio la par  
 Quela balena  
 Che ingiote e gomita  
 I pesci in mar.  
 Ma quel proverbio,  
 Che un dì brilava,  
 Xe ancora in ton :  
 « Perde chi lava  
 La testa a l' aseno  
 L' acqua e 'l saon ! »  
 Vegna pur l' etica  
 E la poesia :  
 Per diana, sì !  
 A butar via  
 Rime e rimproveri,  
 E a secar i ... !  
 Superbia indomita,  
 Caprizi mati,  
 Smania venal,  
 Ga cambià in fati  
 L' orbe teraqueo  
 In ospel.  
 L' è fato a circolo ?  
 Lasselo tondo.  
 Chi tor mai pol  
 I vizi al mondo,  
 L' acqua a l' oceano,  
 El fogo al sol ?  
 Veden del Berico  
 Là le coline ?  
 Viva 'l bon vin !  
 Quel' ue divine  
 Convertè i spasemi  
 Tutti in morbin !  
 Voi che a l' unissono  
 Cantemo in botà,  
 Co sarò là,  
 Una vilota  
 Mi e la mia tragica  
 Necessità  
 Perchè no libero  
 Viver in Franza ?  
 Là tut è bien :

Ahi l' eguaglianza  
 Per virtù magica  
 De tu fe rien!  
 Voi la sinderesi  
 Sempre in bonazza.  
 Se trovarò  
 Qualche ragazza  
 L' amor platonico  
 Ghe insinuarò.  
 E perchè l' ozio  
 Fa l' esistenza  
 Languida e vil,  
 Co so a Vicenza  
 Me compro subito  
 Vanga e bail.  
 Farò coi vilici,  
 A chi più sua,  
 Gara d' onor.  
 Folarò l' ua,  
 Sarò botanico  
 E oselador.  
 Mi per antidoto,  
 E vu per boria,  
 Sgobeve pur,  
 Feve a la gloria  
 Per man dei secoli  
 Eroi condur.  
 Là no voi letere  
 Da chi se sia;  
 No voi saver  
 De signoria,  
 S' anca i fa un ravano  
 Per consegier.  
 Per far, a dirvela,  
 Che de mi proprio  
 Se scordi ognun,  
 Go impastà d' opio  
 Tut i mii apologhi,  
 Uno per un,  
 Ma i coli Berici  
 No xe lontani,  
 Nè zo de man;  
 Vien su i paesani,  
 E ogni di capita  
 Zente dal pian.  
 De qua un pacifico  
 Oioe in zavate,  
 Che torna su

Per torse el late,  
 Che a chi sa monzerla  
 Dà la virtù!  
 De là una timida  
 Famegia in tochi,  
 Che cambia ciel  
 Prima che i stòchi  
 Per mana e netare  
 Ghe venda fiel.  
 Là un aristocrato  
 Che per far fogo  
 Brusa el baul.  
 Qua un demagogo  
 Scazzà dai nobili  
 A pie in tel cul.  
 Sti malinconici  
 Pol aver torto?  
 Chi no, chi sì.  
 Qualche conforto,  
 (Za che i xe omeni)  
 Ghe 'l daria mi.  
 Ma, se burlemio?  
 Fala danari!  
 Ogio d' andar  
 Qua zo a tabari,  
 E sta limosina  
 Là su portar?  
 Un socorendone  
 Saria beato  
 Poderghe dir:  
 Sii pur ingrato,  
 Povero diavolo,  
 Ma no perir.  
 Fortuna ascoltime:  
 Se ti ga cura  
 De sta intenzion  
 Pesa, misura ...  
 No vogio invidia,  
 Nè compassion.

## EL BRIGLIADORO

FAVOLA CHINESE.

## PARTE PRIMA.

*Turun-tun- tun -- Turun- tun-tun.*

Tase el tamburo, e le porte de fero  
 De l' ultimo cortil co rauco susto  
 Sora i polesi zeme e se spalanca.  
 Come a Venezia, spenta  
 Dal siroco autunal l' onde del golfo  
 Rumando avanza, e rive e campi alaga,  
 Dai borghi più lontani  
 Dense turbe de popolo  
 Da curiosa inquietudine comosse,  
 Traversando le strade de Pekin,  
 Barbotandose in rechia  
 Voci de compassion e de sorpresa,  
 Che 'l rispetto o 'l timor ghe smozza in gola,  
 Entra, se spande e la gran piazza afola.  
 Dai fianchi de la regia ( amasso enorme  
 D' alabastri de gotico lavoro )  
 Quattrocento colone  
 De marmo limoncin de Tartaria  
 In do schierade oposte curve, base  
 D' alta dopia ringhiera,  
 Orla quel vasto circolar recinto;  
 E dodese de più robusta mole,  
 De prospeto a la regia,  
 In do liste uniformi, a peso pari  
 Sostenta l' arco trionfal d' ingresso,  
 L' arco che la sublime  
 Specola porta in gropa  
 Dei gesuiti astronomi d' Europa.  
 Dal pergolo imperial, dove Kien-Long  
 (Siben quel di d' aulica smara negro)  
 De grosse tempestà fulgide geme,  
 Garegiando col sol lampizza in trono,  
 Provisoria, potente scalinada

Tuta da l' alto al basso tapezzada  
 De veludo rubin a draghi d' oro,  
 Pùza i fianchi a le loge laterali,  
 E sul palco funebre ampliadrato,  
 Ereto in piazza quella note, va  
 Pomposamente degradando e sta.  
 In eguali simetriche distanze  
 Vintiquatr' urne in porcelana negra  
 Brusa sul catafalco arabe droghe,  
 E supia al cielo in vortici soavi,  
 Squasi fontane d' elisir ardente,  
 Balsamici profumi,  
 Che va l' ambrosia a siropar dei numi,  
 Là, Brigliadoro, zenso  
 E de la fama erede  
 Del celebre ronzin, scorta d' Orlando,  
 Brigliadoro, del despota cinese  
 Prima delizia, che poch' ore avanti  
 Se no vinta, delusa  
 Ga nel bosco l' atigre, e trato in salvo  
 El so signor, per una stasi, forsi  
 De mal digesta boria  
 Che fa le veci de l' apoplezia,  
 Gera morto, tornando in scuderia.  
 Co le redene ancora de brillanti,  
 Col morso ancora de smeraldi in boca,  
 Col so zafiro a lunapiena in fronte,  
 Sora un sofà de soprarizzo d' oro,  
 (Che de leto nuzal più che de bara  
 Sfogia i fregi e la forma )  
 Dure stende le zampe e par che dorma.  
 Sul cabarè de diaspro sanguigno  
 Che ghe sta a fianco, squasi  
 Fatua noturna bampa, la tremenda  
 Scimitara imperial sfiamaga nua :  
 E a la vista del popolo raccolto  
 Furibondo Kien-Long vol far co questa  
 A Thulan-kin de propria man la testa ;  
 A Thulan-kin, che gran palafrenier,  
 Con ignoranza rea no ga previsto  
 L' apopletico colpo micidial,  
 O che no ga, magnetizzando a tempo  
 I quadrupedi spiriti animali,  
 (Prodigio familiar al nostro Lita)  
 Richiamà Brigliadoro a nova vita.  
 E za la smania sui lavri ghe susta  
 De dar un sfogo a l' atra bile augusta.  
 Come un cordon de chiochiele impirae,

Scielte fra le più bele a la marina  
 E su l' ampio senato destirae  
 De qualche patagonica regina,  
 Tre mile mandarin  
 In splendide togate gerarchie,  
 Col' ombrelin a mo capelo in testa,  
 Coi brazzi in crose al peto, e le pupile  
 Su i mustachi indurie,  
 Da le spale del trono  
 Zo per la scalinada  
 E su per le ringhiere,  
 Fin in coste a la specola, in do liste  
 Fastose, reverende,  
 Rica pompa oriental, muti destende.  
 Da l' orlo superior de le ringhiere  
 L' ochio presbite scovre in lontananza  
 Turbe imense de popolo curioso,  
 Che afolà sora 'i teti de le case,  
 Rampegà su le palme, su i moreri,  
 Sparso per orti pensili e coline,  
 E sventolando toghe  
 Blò, bianche, rosse, naranzine e brune,  
 Par le livree de l'iride  
 Che in prospettiva orizzontal superba  
 Sparpagna fiori a larga man su l'erba;  
 Nè credo che Bibiena  
 A colpi de penelo  
 Abia mai fato comparir in scena  
 Spetacolo più belo;  
 Nè ghe ne mostra un simile  
 Gnanca mo, ghe scometo,  
 Quela lanterna magica sublime  
 Là su l'Empireo, dove Giove istesso  
 A Ganimede atento, incocalio,  
 Va a spiegar le vedute per da drio.  
 Tra la specola e l' arco, e giusto in fazza  
 A quel palco funebre,  
 Sporze sora la piazza  
 Un bel veder pulpiti-forme, e là  
 Una general curiosità  
 De tuti i ceti i spettatori invita.  
 Là 'l padre Parulasse gesuita,  
 Astronomo primario e mandarin,  
 Stava in conversazion  
 Col plenipotenziario del Giapon:

« Ma perdoni, eccellenza (el ghe diseva)  
 Io non capisco, come, assaporando

I nostri prosatori, ed i poeti  
 Che fan testo di lingua, ella poi parli  
 In vece del purgato e buon toscano  
 Il dialetto triviale veneziano!  
 E quel che intendo meno, coll' accento  
 Proprio de' pantaloni di Venezia,  
 Dov' ella, certo, mai non fu! L' enigma  
 È tale in verità ... »

« Ghe lo spiegarò mi, padre, son qua;  
 Ma, prima, quanto credela che possa  
 Mancarghe al fin de sta tragedia? »

« Oh un' ora almeno, veda!  
 Le cerimonie sono tali e tante .... »

« Va ben: donca gavemo  
 Tempo da chiachiarar quanto volemo.  
 La me fazza una grazia, caro padre,  
 Ela è nato a Fiorenza, se no falo? »

« Sì certo. »

« No xe donca sorprendente,  
 Che 'l quinci e quindi no ghe costi gnente;  
 Ma mi son Venezian, e la perdoni ... »

« Credo, eccellenza, che la mi canzoni:  
 Lei veneziano? Un plenipotenziario  
 Del Giapone alla China? Oh! questa poi  
 Faria meco stordir tutta l' Europa! »

« No la vada indrio copa; la me ascolta.  
 Ma una cossa a la volta: e per parentesi,  
 Se le carte geografiche no bara,  
 Semo donca italiani tuti do;  
 E in fati, da mezz' ora  
 Che chiacolemo insieme, doparando  
 Tuti do le parole,  
 Che n' à insegnà le rispettive nene,  
 Ela in barba del mi, e mi de l' io,  
 Se intendemo abastanza grazia dio!

« Perfettissimamente. »

« Perchè donca,  
 Fando la gambariola

A la so cortesia,  
Chiamela mo la soa lingua purgata  
E dialeto trivial, padre, la mia ? »

« Scusi, eccellenza, veda: io non sapeva,  
E non poteva immaginarmi poi ... »

« No ghe la fazzo minga bona: oiboi !  
Lingua, o dialeto po, come la vol,  
Ma tanto el venezian che 'l fiorentin,  
Za i xe nati in un parto e po scassai  
Tuti do in t' una cuna, a tuti do  
Ga dà tete l' Italia,  
Qua col nome de nena e là de balia.  
E no par minga bon  
Sentir i fioli de l' istessa mare,  
( Che certo po ghe deve dei riguardi )  
Decorarse col nome de bastardi ! »

« Mo la Toscana poi, veda, e Firenze  
Sopra tutto, eccellenza, è un formicajo  
D' oratori e poeti ... »

« Padre caro,  
La creda che a Venezia  
Tra quelli de palazzo,  
E quelli de i caffè,  
Ghe n' avemo anca nu proprio un scravazzo!  
Ma tanto i soi che i nostri  
Se no i manda per aria  
Che chiacole canore,  
I seca ... la me intende ! e i canta indarno  
Tanto sul canal grandando che su l' arno.  
Donca de le parole,  
Che za in tute le lingue  
No xe che le carpe de le idee,  
Separo la sostanza,  
E giudico dal sugo la naranza,  
Ma tornando ai poeti  
E a le lingue e ai dialetti,  
Ghe farò una domanda suggestiva,  
E ghe lo averto, oportuna per altro  
A scioglièr la question : L' altra matina  
La me parlava, padre, de l' Iliade  
Con un trasporto ! ... in grazia,  
Omero mo in che lingua  
Galo scritto quel poema ? »

« Vò-eccellenza  
Scherzoso sempre, questa mane poi ... »

« No, no; in che lingua? la me onori, padre. »

« Diamine ! in greco ; e chi nol sa? la madre  
Lingua dei dotti, e mia vera delizia !  
L' ò professata in Pisa,  
Per dieci anni, sa ella ! e piango ancora  
Uuo scolaro, che ... »

« Bisogna mai alafè,  
Che la scienza sublime  
Che la professa qua, l' astronomia,  
Ghe soni a la memoria l' angonia !  
S' ala donca scordà, che quel poema  
Scrito, come la dise, ne la madre  
Lingua de' dotti e sua vera delizia,  
In quanto a le parole,  
No xe po in fondo che una bela torta  
Impastizzata suso a varia dose  
Giusto mo co i dialetti  
Che parlava in quei tempi  
I popoli diversi de la Grecia ?  
E chi sa quante volte che là a Pisa,  
Per provar da la catedra ai scolari  
L' energia dei vocaboli d' Omero,  
Ella de bona fede avarà scielto  
Per limpida e cruscante,  
Tra una fola d' esempi  
Qualche frase chiozota de quei tempi !  
Oh la giustizia, eh' à mo reso in Grecia  
A tuti i dialetti  
El pare de i poeti,  
Credo che senza scrupolo  
Poss' anca farla un italian cortese  
Con quei del so paese ;  
E digo senza scrupolo perchè,  
Se disertando da sto bel esempio  
La vol dar in Italia,  
A questo più che a quel la primazia,  
Credo in anima mia,  
Che la farà st' onor, certo, al dialeto  
Del popolo più antigo e più famoso  
Ne l' istorie moderne de l' Italia ;  
E allora in verità mo che la Crusca,  
Con permission de vostra riverenza,  
Vien zo per la coriera de Fiorenza, »

E se tol un palazzo,  
Proprio sul canalazzo. »

« Eh ! ci sarebbe poi molto che dire,  
Veda, eccellenza ! E di tanti dialetti  
Certamente nessun ... »

*Turun-tun-tun-tun - Turun-tun-tun-tun.*

« Sento ancora 'l tamburo ! ... »

« È la milizia,  
Veda, che sfila in traccia  
Del gran palafreniere ... »

« Uh pover' omo ! ...  
Passemo donca intanto a l' altro tomo.  
Sti miracoli, padre, da stordir  
Tuta l' Europa, perchè un venezian  
Xe plenipotenziario  
Del Giapon a la China ? altro difeto  
De memoria. Se scordela, che in barba  
De la salica massima cinese,  
Che no vol europei qua in sto paese,  
Mi ò l' onor de parlar in sto mumento  
Col padre Paralasse fiorentin  
A Pekin gesuita e mandarin ?

Mi mo che so che quel che no sucede  
A le montagne incastrae su la tera  
Pol ben nasser ai omeni  
Che camina, che nua, che va per aria,  
Per no perderme a far coment al testo,  
Le maravegie me le tegno in cesto.

Ma per altro son qua. Za quanto manco  
Me importa de saver quei dei altri,  
Altretanto per metodo  
Con i curiosi mo dei fati mii  
Me son sempre picà de complacenza,  
E farò conto d' esser a Vicenza ; »

« Ma perdoni, eccellenza,  
Io non ardisco che bramarmi istrutto ... »

« No, no, la senta pur ; ghe voi dir tuto.  
Son donca venezian, nato a San Zan-

*Racc. Poes. Ven.*

Grisostomo za circa sessant' ani.  
Go nome Marco e de cognome Polo,  
Perchè giusto mo el sangue  
De Marco Polo, viaggiator famoso  
Quatro secoli fa, deto 'l Milion,  
Filtrandose per sie generazion  
De rene in rene in quele de mio pare,  
E šorbio su dal tubo de mia mare,  
( Come la piovà che de copo in copo,  
E da la gorna in pozzo  
Torna po suso a far andar el mato )  
M' aveva dà la vita a mi, che, a dirla,  
Pensando a l' altra specie  
De mati che fa andar la società,  
Gnanca mo mi no son passà a Venezia  
Per un de i sete savi de la Grecia.

Ghe ne vorla una prova ? Restà solo  
Patron del mio, de vintjùn ano apena,  
In trenta mesi circa  
De scialacquo e de chiasso,  
Tra le bische, le mode e le regazze,  
Go mandà in fumo tuto,  
No m' è restà per fruto  
De la mia economia, de tuto l' asse  
De quel nono del nono de mio nono,  
Che l' arma, el nome e la fisonomia !

Un ponto a la basseta ... el do de spade,  
No me lo scordo più se vivo un secolo,  
M' aveva portà via fina la casa ;  
Bisognava slogiar e andar su un ponte.

Prima de abandonar i dei penati  
M' à parso ben d' andar de su in sofita  
A veder se mai là tra le scarpe  
Ghe fusse qualche avanzo  
Sconto, desmentegà .... Son al romanzò :

Furegando co un legno tra le natole,  
Urto in qualcosa : no distingo ben :  
Me meto a cufolon, destendo i brazzi,  
Slargo le man, e branco una cassetta !  
Per strassinarla al chiaro

Tiro a mi quanto posso ....  
Punfete ! a gambe col coverchio adosso.  
La gera marza ; figurarse ! i tarli  
Per tresento quaranta o cinquant' ani,  
Laorando sete dì a la settimana,  
Se l' aveva ridota

Una spezie de sponza in filagrana.  
Smanioso, ingaluzzà,

Bisego drento, e tra  
 La polvere e le tarme tiro fora  
 Un valisoto lacero,  
 Che gaveva anca lu  
 Consumà 'l so curame  
 Cavando a quei tre secoli la fame.  
 Sbrego zo in pressa quel che resta, e trovo  
 Un scartafazzo in pecora fumada  
 Col titolo de' Viazi  
 De Marco Polo, in caratere gotico  
 E in venezian, che, come ò visto dopo,  
 Gera giusto el giornal storico esato  
 Del viazo che al Giapon l' aveva fato.  
 Lo buto in t' un canton, torno a pescar,  
 E vien su una bissaca,  
 Che se me desfa in man, e lassa andar  
 Una tempesta suta  
 De medagioni d' oro ( de sta pegola ! )  
 Che rodola cantando per sofita,  
 E po no basta minga, e po un scravazzo  
 De cogoli preziosi, voggio dir .  
 De diamanti, ( cussi ! )  
 De smeraldi, rubini, e sie dozzene  
 De perle grosse come peri gnocchi ! ...  
 La ride ? E pur mi so che qua a Pekin  
 La vorave spazzarghene mo anca ela  
 Qualcuna de più grossa e de più bela !  
 Bianche po e d' un splendor,  
 Che le ricorda apena  
 El riflesso de l' onde a luna piena.  
 No ghe descriverò la mia sorpresa,  
 La mia consolazion ; ghe dirò ben,  
 Che se un colpo improvviso de fortuna  
 Ga spesso orbà qualche cervelo, a mi  
 Me xe nato el contrario, e m' ò sentio,  
 Proprio con istantaneo benefizio,  
 Bater le catarate del giudizio.  
 Go risolto cambiar vita a dretura,  
 E per spontar afato le locali,  
 Le consuetudinarie tentazion,  
 Go suna tuto, e insalutato hospite  
 Son partio da Venezia col tesoro ;  
 E me ricordo che butando l' ochio  
 Per viazo sul forzier  
 Rideva del fiscal del Cataver.  
 Passà in Olanda, dove  
 M' è riussido esitar a poco a poco  
 Col fior in rechia i cogoli e le perle,

Scartabelando spesso el scartafazzo  
 De Marco Polo, m' ò scaldà la testa ;  
 M' è saltà 'l grilo de far anca mi,  
 Sul so esempio, la prova  
 De qualche mercantil speculazion,  
 E de passar con un cargo al Giapon.  
 M' ò comprà in conseguenza un vasseloto,  
 M' ò ingagià i marinieri e un bon piloto,  
 E dopo un' odissea  
 De rischi e de vicende,  
 Che me riservo dirge un' altra volta,  
 So arivà co la fragia  
 Dei mercanti olandesi a quella spiaggia.  
 In pressa in furia tuli  
 Xe corsi in tera a far i fati soi ;  
 Mi mo per una certa bizzaria  
 De caprizi d' origine materna,  
 Me so ustinà de no lassar el bordo  
 Se no imparava prima a menadeo  
 La lengua del paese : e cossa vorla ? .  
 In grazia de la mia bona memoria,  
 Agiutada da l' estro,  
 Ben dopo un ano e un mese,  
 Ficà in sacco el maestro,  
 Go tirà in tera le mie mercanzie,  
 Che a norma de l' aviso del mio auctor  
 No consisteva che in casse e cassoni,  
 Coli, bale e' fagoti  
 De spechi, pive, piavoli e subioti,  
 E senza dragomani, nè sanseri,  
 Go vendù tuto, e me son guadagnà  
 Squasi 'l cento per un : »

*Tur-un-tun-tun -- tur-un-tun-tun.*

« Oh ! xelo qua ? »

« Non ancora, eccellenza :  
 Credo che passi adesso  
 Dinanzi a l' imperiale scuderia,  
 Dove è mancato a' vivi Brigliadoro ;  
 E là l' ordine equestre  
 Onora cò' suoi pianti .... »

« Eviva i mati ! andemo pur avanti.  
 Fato ricon, m' ò comprà campi e case ,



Po me sòn maridà; ma, indispetio  
 De veder usinada mia muger  
 A storzeme ogni zorno un per de fusi.  
 A colpi de marteli giaponesi,  
 Go tagià 'l matrimonio in cao sie mesi.  
 A poco a poco l'ozio  
 M' à svegià l' ambizion; regeva allora  
 Mamao terzò l' impero del Giapon,  
 E 'l gaveva per stuchio de cervelo  
 Un de quei do pendentì  
 Persi in Italia un dì da Farinelo,  
 E dei quali po in Spagna,  
 Come la sa, l' à trovà la cucagna.  
 Per prevegnir in mio favor la corte  
 Go donà 'l mio vasselo a so Maestà,  
 E lu per compensarme  
 E sparagnar l' erario,  
 Dopo d' averme naturalizzà,  
 M' à creà mandarin cubiculario.  
 Tra l' oportunità  
 D' esserghe sempre a fianco, e la destrezza  
 Propria del clima dove gera nato,  
 E co la qual saveva  
 Condir le frasi de l' adulazion,  
 Me so andà a poco a poco guadagnando  
 La grazia de quel regio macaron.  
 Una matina, dopo averme squasi  
 Tegnù quatr' ore incantonà (a la vista  
 De cinquanta Magnati  
 Che spuava velen) a interrogarme  
 Su l' uso de la semola in Europa,  
 E qualch' altra materia  
 Un poco manco seria,  
 Mamao de bon umor, nel congedarme,  
 Scordandose a dretura l' eticheta,  
 Che fa un delito de l' urbanità,  
 M' à butà i brazzi al colo, e m' à dà un baso  
 Giusto mo qua su la punta del naso.  
 Sto eccesso de favor xe andà sul fogi,  
 Xe focai memoriali,  
 Le visite, le dediche, i regali;  
 Son diventà, che soimi, un capitulo;  
 Tuti à volesto aver el mio ritratto  
 Per meterge davanti el cesendelo;  
 E basta dir, che astronomi e poeti  
 Per eternar la fama del mio nome  
 Ga tirà caregoni, e à decretà  
 Che da quel zorno l' iride

O la prima meteora,  
 Che nel ciel del Giapon splendesse in arco,  
 S' avesse da chiamar l' astro de Marco:  
 E perchè 'l tempo, che ga bona boca  
 E sol far sopra sina dei cognomi,  
 No mogiasse anca 'l mio  
 Ne l' acqua de l' oblio come un pandolo;  
 I à dà a l' orbe teracqueo un terzo polo.  
 « Ma chi spica trope rose  
 Più d' ogn' altro dà nel spin: »  
 (Dise 'l parente del fu beco e dose  
 Ne la fiaba del grilo e 'l calalìa.)  
 Quel maledeto baso  
 Nel cuor de Pantegan primo visir,  
 Ga cambià i vermi de l' invidia in vipere,  
 E à svegià in quel de so sorela Utia;  
 Primaria concubina,  
 Una tal furibonda gelosia,  
 Che d' acordo i à zurà la mia rovina.  
 Un dì, che, per delirio, a la presenza  
 Giusto de tuti do l' imperator  
 Meteva ai sete cieli la bravura  
 Co la qual forestier, sudito, e donca  
 Bli tri a nativitate,  
 In t' un ano e in t' un mese  
 Me gera dotòrà nel Giaponese,  
 « Poh! (dise Pantegan) che maravegie!  
 Marco Polo sa far altro che questo!  
 Te ricordistu, Utia, quando 'l n' à dito,  
 Che volendo degnarse so Maestà  
 De studiar l' italian,  
 Se in trentacinque dì soli de scuola  
 Nol ghe lo fa parlar meglio de lu,  
 Lu se contenta in bota  
 Perder la testa? .... » e so sorela: « in trenta  
 A mi 'l m' à dito (la risponde) al più. »  
 E ste quatro flogistiche parole  
 Su l' amor proprio grasso de Mamao  
 Ga prodoto l' efeto  
 De la michia impizzada sul fogan,  
 E l' à sbarà 'l decreto,  
 Che me ordinava de andar là sul fato  
 A principiar le mie trenta lizion,  
 Butando fogo mato  
 Per la smania loriosa  
 De mandar tuta l' Asia a gambe in aria  
 Per el sbalordimento,  
 Al son de quel portentoso,

Co quella bisinela de talento.  
 La pensa se son corso a precipizio  
 A butarmeghe avanti in zenochion  
 Per farme dispensar da tanto onor.  
 Scuse? preghiere? al vento; à bisogna  
 Parlar schieto e tocarghe  
 L'impossibilità ... L'è andà in furor  
 Sentindo che se osava  
 Meter in contingenza  
 La so inteletual onipotenza,  
 E se no me rassegnò  
 Lu co un altro decreto a scotadeo  
 Me fa sbalzar la testa sul tapeo.  
 No podendo scampar, per diferir  
 De trenta zorni ancora  
 La mia decolazion, m'è convegnù  
 Far de necessità magra virtù.  
 Per confortarme, ò dito tra de mi,  
 Ghe vol pazienza: provarò. A bon conto  
 El dialeto più breve e più sonoro,  
 Che se parla in Italia, sarà certo  
 Sora tuti 'l più facile a impararse;  
 E se la xe cussì, gnente de meglio  
 Donca de quello de Venezia, che  
 Lima le consonanti,  
 Perchè no le ne scorteghi la gola;  
 Che stenta a radopiarghene qualcuna  
 Se no la cambia senso a la parola;  
 Che per dar più rissalto a le vocali,  
 Fina i verbi castrando  
 De le terze persone dei plurali,  
 Fa che par che se canti anca parlando;  
 E co i pie me son messo e co le man  
 A tentar de insegnarghe 'l venezian.  
 La indovina mo, padre?  
 Xe spirà 'l mese prima che Mamao  
 Savesse pronunziar schieto figao.  
 Invece de criar co la natura  
 D' averghe dà panada per cervelo,  
 O co l'aulica nena,  
 Che no gaveva ben tagià 'l filelo,  
 Mamao s' à imaginà,  
 Chè la so stolidezza gentilizia  
 Fusse l'efeto de la mia malizia;  
 Molto più che 'l visir, e so sorela,  
 Che lezeva i fogietti de l' Olanda,  
 L' aveva assicurà,  
 Che giuste mo a Venezia

Certo abate Vaseli,  
 Che no se sogna d'esser un bufon,  
 Insegnava a chi passa  
 La lingua inglese in dodese lizion;  
 Tanto che se Mamao,  
 Celebre per ingegno trascendente,  
 No parlava in t' un mese  
 L' italian quanto 'l Casa o 'l Fiorenzuola,  
 Gera un segno evidente  
 Che mi, d'acordo con i so nemici,  
 Gaveva donca machinà e deciso  
 Dè bararghe la scuola  
 Per dar sul muso a la so gloria un sfriso.  
 Fato 'l mio buso in acqua, in conseguenza  
 I m' à solenemente dichiarà  
 Reo de lesa maestà: i m' à cazzà  
 In un fondo de tore: i à confiscà  
 Tuti i mii beni. Kon-Ghij,  
 Preside al criminal, che poverazzo  
 Gaveva protesta  
 Contro l' ato ilegal de condanarme  
 Senza prima ascoltarne, i l' à impalà  
 Dopo averlo ascoltà:  
 E in cao tre dì, per terminar la festa,  
 Se me doveva batar via la testa. »

« Raccapriccio d' orror! e chi ha potuto  
 Salvarla poi da la perversa frode? ... »

« La mia fortuna, o l' anzolo custode:  
 Cossà vorla che diga!  
 In fati mentre là ne la mia tore,  
 A la presenza de vinti curiosi,  
 In mascara d' amici,  
 Per onor de la patria  
 Afetava disprezzo per la morte,  
 E calmà filosofica sul viso  
 Cq una borasca de biasteme in gola ... »

Qualcùn grata a la porta, sala, padre »

« Entrate pur ... scusi, eccellenza, ... qui,  
 Qui, qui sul desco; andate,  
 Ci rivedremo poi ... Peppino, a te  
 Ecco le chiavi, presto ...  
 Le salviette di seta; i due piattini  
 Di porcellana verde; i bicchierini  
 Di cristallo di rocca ... »

L' ampolla del rubino, già capisci,  
E il coltellino d' oro .... bravo ; adesso  
Torna caro a spassarti nel giardino ....  
Ti serberò la parte tua Peppino. »

« Che bel' idea de zovene. »

« È un povero orfanello  
Che un capitán di nave amico mio  
Trovò ramingo di sett' anni appena  
In Oriente e lo portò a Livorno,  
Di là passar dovendo a la Giamaica,  
A la cui vista il misero  
Naufragando perì, me l' a ffidò  
Per educarlo e averne cura, e n' ebbi  
Per ben cinqu' anni. Destinato poi  
Dal santo Padre a questa missione  
Io divisava collocarlo altrove,  
E sbarazzarmi ; ma il ragazzo, veda,  
Mi si era affezionato, e papà, babbo,  
Piangeva : che so io .... non ci fu modo  
Di far corè e staccarmelo dal fianco.  
Risolsi dunque di portarlo meco,  
E tenerlo qual figlio. Per averci  
Poi l' occhio, perchè il sangue  
Nell' età prima rigoglioso bolle,  
E il tentennino titillando tenta,  
Poi vistoso com' è potrebbe forse  
Correr dei rischi, .... gli ò fatto allestire  
Un letticiuol nella mia stanza istessa.  
Ma lode al cielo alle sue belle forme  
La bellezza dell' animo risponde,  
E il mio Peppino ( già non è presente )  
È un prodigio di senno e di virtù,  
Docile poi da farne quel che un vuole :  
E a quali prove mai non l' ho mess' io !  
È d' Atene sa Ella. »

« Ah sì ò capio :

I greci de quel clima e i fiorentini  
Par proprio nati da l' istesso vovo.  
Infati oltre l' acume de l' inzegno,  
Che li confonde insieme, i sol aver  
Anca una certa analogia de gusti,  
Che se i se incontra mai  
I se taca che i par impègolai.  
E po za 'l so trasporto per la madre  
Lingua dei doti, e per el so Kalon ,

Che xe 'l belo socratico in persona,  
Ghe lo rendeva, padre, necessario  
Quanto 'l pan che la magna un Alcibiade.  
Quel scolaro de Pisa  
Che la diseva che la pianze ancora  
Prova credo a evidenza ....

« Evviva il buono umor di vo-eccellenza ;  
Or si serva e mi onori. »

« Questa, padre,  
Xe una marena proprio da monarca.  
Qua gh'è boca che vustu ! »

« Dice bene, eccellenza, da monarca !  
Istituzion, povera ancora,  
Non potrebbe fornirci  
Già di queste delizie .... un di chi sa !  
L' imperadore intanto, il buon Kien-Long,  
Ne' giorni di spettacolo fa parte  
Di sua refezion  
Col mandarino astronomo, sa ella ... »

« Bisogna esser *ad aures* come va  
Per aver de ste grazie! me consolo  
Con ela ; ma no so  
Come godendo apunto  
De tuto sto favor presso un monarca  
Che pol andar sogeto  
A l' impeto de l' ira, ma che po  
Sento universalmente a celebrar  
Per giusto, per magnanimo e clemente,  
No la se sia fato un dover, un merito,  
De mostrar a Kien-Long el torto enorme,  
Che fa a la gloria del so nome un ato  
De scioca crudeltà come xe questo.  
Che diavolo! la morte,  
De propria man, a un pover' omo per ... »

« Sottovoce, la supplico, eccellenza, ....  
Potrebbe alcuno quinc' intorno, veda ! ....  
Questo, com' ella sente,  
Non'è argomento, in cui possa l' astronomo ;  
Poi l' interesse della sussistenza  
Che deve starci unicamente a cuore. »

« Eh ! lo diseva, supponendo, sala,  
Che un padre Paralasse

Fusse un omo anca lu ; quanto a l' astro-  
 Mi lo consergave ( nomo,  
 (Pantalon qualche volta  
 Dà dei boni consegi anca al dotor)  
 De ricordarse, che tegnindo sempre  
 Le pupile inchiodiae sul firmamento,  
 Senza butar mai l' ochio  
 Dove 'l mete le zate, un zorno o l' altro  
 El rischia ingambarse in qualche intopo,  
 Che lo sbalza sul fango  
 A vendicar la tera indispetta  
 Col stampo de la so fisionomia.  
 Me ricevela, padre? ma, lassando  
 Che chi deve balar pensi ai so cali,  
 Profitarò de le so grazie : e intanto  
 Provarò sto ananas se no l' è duro. »

« Provi questo, eccellenza, è più maturo ....  
 Glielo monderò io. »

« Grazie! cussi, . : .  
 Cussi, padre, una feta .... l'è prezioso ! ....  
 Cossa fala mo adesso ? »

« Le preparo .  
 Un bicchferino di certo elisire ....  
 L' ho distillato, veda,  
 Colle mie proprie mani ; e sua Maestà  
 Lo preferisce .... »

« Mo minchioni, padre,  
 Sta volta so Maestà ga mo rason !  
 L'è un netare a dretura! ... anca ela un poco...  
 Vogio servirla mi. »

« Oh! tropp' onore !  
 Li, lì, eccellenza ; un sorsellin, la mostra.  
 Viva mill' anni l' eccellenza vostra ! »

Lassemo 'l resto per un' altra volta ;  
 Minga za che sia straco,  
 Ma no voria dar l' opio a chi m' ascolta ....  
 Chi me impresta una presa de tabaco ?

## PARTE SECONDA.

*Turun-tun- tun -- Turun-tun-tun.*

Sugandose la boca  
 Col tovagliol de seda sul balcon,  
 « Oh ! adesso mo, (diseva al fiorentin  
 El plenipotenziario del Giapon )  
 Adesso credo mo che quel meschin  
 Se vegna avvicinando al so destin !  
 Cossa disela padre ? »  
 « Non ancora, eccellenza, ( el ghe risponde )  
 Più lento e cupo il suono del tamburo  
 Non mancherà di darcene l' avviso ;  
 Or passa al tempio a far le preci estreme,  
 E vi si tratterrà mezz' ora almeno.  
 Potrebbe intanto, vo-eccellenza, veda,  
 Se non le grava di soverchio .... scusi,  
 Ma sono impaziente  
 Di sapere di qual fausta maniera .... »

« Vorla el so resto ? sì ? ben : volentiera.  
 Dove gerimo ? ah ! sì. Mentre che donca  
 Afetando franchezza, ma col cuor  
 Torcolà da la rabia e da l' angossa,  
 Stava là ne la tore  
 Tegnindo streta l' anima co i denti,  
 Mamao viveva co la testa in sacco,  
 Se credeva immortal, se sbabazzava  
 Tra l' elisir de Venere e de Baco,  
 Xe mo vegnù la soa. L' apoplezia,  
 Da doneta de garbo, à lassà andar  
 Sul vovò pineal  
 Del bipede imperial una peadina,  
 Cussi a tempo, cussi ben misurada,  
 Che l' à mandà, ne l' ato  
 Che 'l stava per segnar la mia condana,  
 A balar ne l' abisso una furlana. »

« Providenza del ciel non manchi mai ! »

« Go mo gusto alafè che la la toga  
 Per el bon verso anca ela, che cussi

Spero, padre, che la me assolverà  
 Senza difficoltà se ghe confesso,  
 Che, in barba del *diligite inimicos*,  
 La nova de la morte de colù  
 M'è fato recitar  
 Un *agimus* divoto,  
 Come un chietin che beca un terno al loto.  
 Ma no vedendo po  
 Che vegnisse nissun gnanca per questo  
 A spalancar le porte de la tore,  
 E savendo che intanto  
 Continuava a comandar le feste  
 El visir Pantegan e so sorela,  
 Che i me voleva morto a tante prove,  
 M'è da recaio sentio  
 Furegar dal pipio ... la sa za dove !  
 Bisogna che la sapia mo de più,  
 Che Mamao dal figao  
 Da la sposa imperial Kara-Kalim,  
 Zovene, bela, sterile per forza,  
 Morta scuorada qualche mese prima,  
 No 'l gaveva abù prole, e no restava  
 De quel sangue porcìn  
 Che un mulo adulterin,  
 Fio de la concubina ... el so ritrato,  
 A dir la verità, mo tal e qual,  
 Proprio un pomo spartio con un cocal :  
 Le legi del Giapon no dà mo 'l trono  
 A chi se sia, se ogni giozza de sangue  
 De l' aspirant e, o sia stola calada,  
 Passada e ripassada  
 Per el lambico del Blason, no pesa  
 Una lira a la grossa,  
 E se ghe manca un' onza, ore rotundo,  
 Le manda al tempio a consultar l' oracolo  
 Per scielger una nova dinastia.  
 Ma 'l fradelo de Utia, che, coronando  
 El so bel nevodin de dodes' ani,  
 Coltivava l' idea de manizzar  
 In nome soo la mescola imperial,  
 Col mezzo d' un tørtion a droghe d' oro,  
 Cusinà in zeca per la sacra lupa  
 Del somo sacerdote,  
 Che supiava drio l' idolo Fu-by,  
 Ga podesto otegnir, che a chiare note  
 Rispondesse l' oracolo cussi :  
 « O la regia sembianza amplo lavacro

È alla macchia del figlio, o la corregge  
 Il diritto del padre al figlio sacro ;  
 Se natura parlò taccia la legge.

« Cinque o siecento sanculò, che aveva  
 Marendà co le fregole cascae  
 Da quel tortion, no à manci de sbragiar,  
 Che donca un fio, che somegiava tanto  
 Al so gran genitor,  
 Gera l' unico, el vero successor.  
 Voltandose al ministro de l' altar,  
 Co l' inocenza del Tartufo in viso,  
 Umilmente domanda Pantegan :  
 Mio nevodo no ga donca più nei ?  
 Vox populi, vox dei;  
 Ghe risponde la birba del piovan ;  
 E senza perder tempo i sanculò  
 Core, se tol in spala, e a son de pifari  
 Porta e puza sul trono  
 St' altra spezie de travo  
 Col nome de Talpon-Alepe otavo. »

« Oh questa non mi garba in coscienza ! »

« So qua mi col limon, padre, pazienza.  
 Xe andà le nove al campo ;  
 El prencipe Ura-Kań,  
 Zerman de sangue de Kara-Kalima,  
 Comandante de l' arme e pretendente  
 Al caso d' una nova dinastia  
 Al trono del Giapon, s' à ben vardà  
 Dal publicar protesti o manifesti,  
 Che rende disputabile el diritò ;  
 E senza tante chiacole a la testa  
 De tuta quanta la cavaleria  
 Co una marchia sforzada  
 Xe piombà in Corte, e giusto  
 Mentre andava sfilando i deputati  
 De le provincie a dar el zuramento  
 De fedeltà, fingendo  
 De voler anca lu prestar omaggio  
 Al novo imperator,  
 Franco come un dottor,  
 Ne l' ato de basarghe  
 La clamide gemata, ga brancà  
 Ambo i gemini augusti, e zo l' el ga fato  
 Misurar un per un, naticamente,  
 I scalini del trono, e a son de slepe

Ga cazzà a l' ospeal Talpon-Alepe. »

« Ma ci sta bene. Oh ! veda un po ... »

« E d' un salto

Sbalzando in trono lu, de propria man,

Co dignità, co brio

S' à incoronà. »

« Ma bravo, affedidio !

Scusi, eccellenza, ... »

« La se serva pur.

Sti do bei squarzi d' eloquenza muta

Sostenudi da l' arme, more solito,

Ga persuaso o imposto : e non esclusi

I sanculò ( che come za xe notò,

Per le dopie marende

Ga pronto sempre el ritornelo in gola )

Tuti a coro batendo i pie, le man,

Ga sbragià, viva chi ! viva Ura-Kan !

La credarà che sfraco per la corsa

De setanta tre mia svolai d' un fià,

Fato 'l so colpo, el novo imperator

No vedesse mo l' ora

De corer a cambiarse de camisa ;

Oibò ! no l' à volesto

Moyerse da de là

Se no 'l ga prima dà

Un augurio felice, un chiaro segno,

De la gloria futura del so regno.

L' à spicà vintiquattro mandarinì,

Le stele 'del Giapon, a là mja tore

Per condurme in trionfo a pie del trono :

E co 'l m' à visto a comparir in fazza

D' un popolo infinito, come qua,

Che no se buta un gràn de meglio in piazza,

L' è disceso dal trono e in zenochion,

Sbragiando come un' aquila perchè

Tuti avesse a sentir,

A nome de le legi del Giapon,

El m' à domandà scusa e perdonanza

De le ingiurie sòferte dal mió onor,

Per colpa de la tartara ignoranza

Del so predecessor : e qua mo, padre,

La compatisso se per la sorpresa

Se ghe slonga una quarta e mezza el naço,

Che questa sì, sì ben che là in Europa

I suditi camina sul bombaso,

Li farave mo andar tuti in driocopa !

A lu no ga bastà restituirme

E la carica e i beni,

Che per no lassar senza

La debita vendeta so zermana,

La so spezialità,

Nè la mia riverenza,

L' à ordinà al marescalco de la Corte

De tegnir pronte le tanagie d' oro

Per andar a cavar a mezza note

Dodese denti al somo sacerdote ;

L' à trato una cambial su Pantegan

A l' ordine s. p. se pichi a vista.

E perchè gnanca Utia, la prima in lista

Tra i rei de 'quel diabolico concerto,

No la dovesse portar fora suta,

El l' à mandada ai Bonzi del deserto,

Per starghe infin che la tornasse puta. »

« Quest' è uno scherzo poi, capisco bene ... »

« Ah scherzi, padre, la ghe dise a questi !

Per mi come la sento

La gera donca terminada in ben,

E tornava a fiocar i memoriali,

Le visite, le dediche, i regali :

Ma l' imagine viva

Del pericolo corso, che ustinada

Me andava notà e zorno

Sventolando la sciabla su la testa,

M' aveva fato sparir via bel belo

I fumi de la boria dal cervello :

E come 'l gato o 'l can,

Che una volta scotà sconde le zate,

A l' uso venezian

Gaveva messo colarin d' abate ;

Voi dir che rinunziando

A la mia dignità cubicularia,

Gera passà in bon' aria

A far vita più quieta, e più sicura

Fra l' ozio e le delizie,

Che dispensa in campagna la natura.

Là no passava di che no vegnisse

Qualcun dei mii coleghi a visitarme,

A maledir le trame de l' invidia,

E a sfogar con un libero lamento

Le smanie de i so torti ;

Mi rispondeva sempre più contento  
 « Vidi e conobbi anch' io le inique Corti: »  
 E aveva in conseguenza anca zurà  
 De no moverme più, mai più, de là;  
 E passai gera in fati quindes' ani  
 Che viveva là in quiete,  
 Senza lezer mo gnanca le gazete,  
 Quando sie mesi fa tra le do corti,  
 De la China voi dir e del Giapon,  
 Xe nato un dissapor che presto o tardi  
 Reudeva inevitabile la guera.  
 Ura-Kan, che voleva  
 El vero ben dei omeni, la pase,  
 Smaniava note e dì per stanar fora  
 Tra i grandi del so regno  
 Qualche spirito pronto,  
 Scozzonà nei ripieghi e nei raziri,  
 Da mandar qua a Pekin ambassiadior  
 A tratar co destrezza,  
 L'argomento in question,  
 E salvar co l'onor  
 L'interessé e la calma del Giapon;  
 Ma per quanto el cercasse  
 Nol se trovava intorno  
 Ghe tangari e bardasse.  
 Un dì che tavanà da sto pensier,  
 L'era a la cazza, giusto  
 Su le mie tere, colto  
 A l'improvviso da la bissabova,  
 Che manda a gambe fin la monarchia,  
 L'è sta in necessità de ricovrar-se  
 Co tuta la so corte in casa mia.  
 L'ha domanda de mi: L'è ricevudo ....  
 La se pol figurar, l'imperator! ....  
 E po, no se burlemo, ghe doveva  
 Vita, sostanze e onor!  
 M'è richiamà a memoria  
 Quel che Alvisè Pisani  
 Per puro genio d'ospitalità  
 Aveva fato a la Zueca e a Stra,  
 E là nel so palazzo de Venezia  
 Tratando el re de Svezia,  
 E ò volesto anca mi dar fogo al pezzo  
 Spendendo cento mile come un bezzo.  
 Ma comèdopo de tre dì e tre note  
 Gnancora 'l cielc fava bona ciera  
 Nè podeva Ura-Kan meterse in viazo,  
 Me son trovà intrigà la terza sera,  
 Racx. Poes. Ven.

Perchè cena, disnàr, musica, balo,  
 E po balo, disnàr, musica e ceña,  
 Gaveva una paura maledeta  
 Che vegnisse la noia  
 A sporcar tuto co la so perzeta;  
 Che no gh'è 'l pezo ( come za pur tropo  
 Sucede ai ricchi tuto 'l dì ) che spender  
 E spander e secar; o come nasce  
 Più spesso mo ai poeti ( e lo so mi! )  
 De strussiar-se da cani,  
 E po zirando col capelo in volta  
 Sbezzolar i shadagi de chi ascolta.  
 Me son per bona sorte ricordà  
 Che in vece de studiar la mia lizion  
 Me gera da ragazzo esercità  
 Nel zogo piazzarol de i bossoloti:  
 E persuaso del proverbio trito:  
 « Impara l' arte e metila da parte »  
 Per no disimparar anca là in vila,  
 Ne la mia vita patriarcal, passava  
 Spesso qualche mezz' ora  
 A sbalordir la Togna o la Lucietta  
 Con i prodigi de la mia bacheta.  
 E mentre, per esempio,  
 Quela filava, e st' altra fava suso,  
 Mi ghe cambiava in man i gemi e 'l fuso,  
 Tanto che brillantando  
 Co l'assidua coltura  
 I doni de natura, posso dir  
 ( Rispettando za, padre, i professori )  
 Che pochi diletanti  
 Me pol andar avanti.  
 Certo del bon efeto,  
 Perchè quel passatempo  
 Gera novo al Giapon,  
 Me son donca pensà  
 De far de la mia sala una piazzeta:  
 E disposti a l'intorno  
 Cento e vinti cuscini  
 Per servir de careghe ai mandarini  
 Che aveva seguità l'imperator,  
 In fondo un sofadon de samis d'oro  
 ( Sul gusto là de quel de Briigliadoro )  
 Per so Maestà, col mio taolin in fazza,  
 Fornio de l'ocorente, e mi davanti  
 Co la bissaca piena de strighezzi,  
 O'scomenzà a laorar. Gera de vena,  
 E dandoghe co un piato

De bomò da dozena  
 El solito rinfresco per le rechie,  
 Per ficarghela megio per i occhi,  
 O' fato zòghi de bale e de carte,  
 E burle cussì mate e sorprendenti,  
 Che per stupor quei bruti mascaroni  
 Tagiai su co la britola in Tirol,  
 A' mostrà sempre i denti coi sbarlefi,  
 Co i scurzi più bufoni, e so Maestà,  
 Butando in t'un canton la gravità,  
 A' passà graziadio la terza sera,  
 Smascelandose come una massera.

Dopo 'l bancheto solito,  
 Nel qual cinquanta prindesi  
 A' scialaquà tute le rime in olo  
 Per terminar col viva Marco Polo,  
 Prima de andar in leto so Maestà,  
 Chiapandome per man, m' à dito : « Marco,  
 Te levistu a bon' ora la matina?

— Oh su l' alba, Maestà. — Ben : se bonazza

Vienme in bota a svegiar,  
 Che prima de partir  
 Faremo insieme un per de ziri in parco ;  
 T'ò qualcossa da dir....

Ma domatina ; bona note Marco. »

E tuta quella note ò savarià  
 Senza mo indovinar  
 Cossa 'l podesse mai voler da mi.  
 Malapena ò sentio

Da un galetto irochio  
 El solito stonar kikiriki,  
 Son sbalzà su in camisa,  
 O avertò la terrazza,  
 E ò butà l' ochio in cao de la laguna,  
 Per veder mo se prima  
 De far la cavalcata per el cielo  
 Gavesse 'l zorno digerio la luna.  
 El spontava su belo a barba fata ;  
 Me l'ò fata anca mi ; m'ò messo in gala,  
 E andava per svegiar l' imperator,  
 Ma go dà giusto el muso drento in sala.

L' à fato segno a tuti

Che 'l voleva sortir solo co mi :  
 L' à tolto su un pacheto sigilà  
 Co l' arma del Giapon, e in fondo al parco  
 El m' à dito cussì : « Bravo 'l mio Marco ;  
 Fin dal primo mumento che scampando  
 L'altra matina da la bissabova

M' ò salvà in casa toa, la to alerezza  
 Ne l'acogliërme, franca e liberal,  
 M' à provà 'l to sincero atacamento :  
 La prova de la to cordialità  
 Sta volta la m' à proprio imbalsemà,  
 E ne l' arduo cimento,  
 Che me angustia 'l pensier,  
 Per deluder el qual da quattro mesi  
 Cerco e no trovo ancora  
 Chi me mostri un ripiego e me socora,  
 La to semplice bona volontà  
 No me lassa partir senza couforto.  
 Dovendo ora saltar de là del fosso,  
 Per no cascarghe drento a tombolon,  
 Come faria qualche cavala stramba,  
 No basta 'l cuor, nè la bona intenzion,  
 Ghe vol ochio, destrezza e bona gamba.  
 Ringrazio qua de fuor la bissabova  
 Che m' à obligà fermarme anca ger-sera,  
 E cussì m' à dà campo de scovrir  
 Quela rica miniera de portenti  
 Che ti porti in scarsela,  
 La to facondia, insoma i to talenti  
 Tanto oportuni per la circostanza,  
 Che 'l mio cuor poco prima sbigotio  
 Ga za fato un caorio ne la speranza.

Ti sa le differenze

Ultimamente insorte  
 Tra mon frer de la China e la mia corte.  
 Queste, senza un prodigio  
 De la to lengua o de la to bacheta,  
 Che al superbo Kien-Long  
 Tegna 'l cervelo soto a la baretta,  
 Minacia guera oribile al Giapon ....  
 No so, nè voi saver, con quali forze  
 Posso lotar col mio nemigo in campo ;  
 So, nè me voi scordar, ch' ò zurà al cielo,  
 Ch' oltre quel che l' interna sicurezza  
 Da la giustizia criminal esige,  
 Una giozza de sangue Giaponese,  
 Fina che regno mi, no bagnaria  
 La tera del Giapon per colpa mia.  
 E chi più reo de mi,  
 Se al pacifico mezzo  
 De salvar tuto co la to destrezza,  
 Per vanagloria preferisse quello  
 Che prepara l' oribile spettacolo  
 D' un monte de cadaveri,



De gambe e teste rote ?  
 Se preferisse, digo,  
 A l'arie da batelo, a le vilote,  
 I gemiti, i lamenti  
 De le vedoe, de i orfani inocenti ?

O za fissà: no vogio

Crozzole, carestie, requisizion ;  
 Nè per dar sfogo ai fumi  
 De la mia indigestion,  
 Ridur in fili da coverzer piaghe  
 Le camise del popolo, le strazze :  
 Vogio e spero da ti Marco la pase ;  
 Da ti che col to nome  
 Ti me ricordi quel *Pax tibi Marce*  
 De la to patria un dì gloria e decoro ;  
 Da ti che se pensando al to cognome  
 Te vardo me consolo,  
 Che in mezzo a la borasca  
 Per conforto maggior vedo el mio Polo !

Ma 'l pericolo cresce e ne sovrasta,  
 Nè gh'è tempo da perder, elefanti,  
 Mandarin de seguito, regali  
 Per altra via, te incontrarà al confin ;  
 Eco le to istruzion, le credenziali,  
 Tol su i to bossoloti e va a Pekin.  
 Là plenipotenziario d' Ura-Kan,  
 Presentite a Kien-Long, e con un squarzo  
 De quella to eloquenza vitoriosa,  
 Che mena per el naso  
 El sensorio comun de chi te ascolta,  
 Rendilo del so torto persuaso,  
 O se 'l resiste faghe dar la volta.  
 Ti sa quel che voi dir ... fora 'bacheta,  
 Faghe del scetro un ravano,  
 Del diadema una zuca,  
 E servilo de barba e de peruca ! ....  
 Obieti ? Zito ; no li voi sentir. »

E curte, padre, à bisognà ubidir.

Xe un mese che son qua,  
 E se la me dispensa  
 Da l' anfibologia de la modestia,  
 Ghe dirò francamente,  
 Ch'ò za capio l' umor de la mia bestia.  
 Basta darghe rason prima che 'l parli  
 Per aver po rason co l' à parlà ;  
 E in grazia de sto metodo che za  
 No xe che l' A-be-ce  
 Del berlik-berlok passa e camina,

Spero guarir in breve  
 El Giapon de la freve,  
 Manipolando a modo mio la China.  
 Questa xe la mia istoria .... »

Veramente

Bizzarra e sorprendente, e non ho lingua,  
 Eccellenza, che basti a ringraziarla  
 Di tanta degnazione .... ma perdoni,  
 Non la trivial destrezza  
 D' un barattier di piazza,  
 Come per celia le piace asserire;  
 Ma bene il suo saper, la sua prudenza,  
 E certo i diplomatici talenti  
 Di vo-eccellenza ad Ura-Kan già noti .... »

« No la fazza sto torto ai bossoloti,  
 Padre, che sto bel zogo  
 Prencipi, leterati,  
 E guerrieri, e togati  
 E da la Pampadur fin a la coga,  
 Dal savio al so stafier, chi 'l sa lo zoga.  
 El scioco amira, el dreto se approfita ;  
 E po 'l è d' invenzion de quel famoso  
 Padre Fufigna-e-scondi l' eremita,  
 Che del mile siecento e quarant' un .... »

*Tun-turun-tun-tun -- Tun-turun-tun-tun.*

« Oimè ! sentela, padre ? In verità,  
 Che quel povero diavolo xe qua ;  
 L' à da passar soto de mi ; co penso  
 Che quel can de Mamao anca mo a mi,  
 Per una rason squasi su sto gusto,  
 Voleva circa sedes' ani fa  
 Che i me mocasse a mo candela el busto,  
 Moro proprio de voglia  
 De dar un pugno su la schizza al bogia. »

« Ma si calmi, eccellenza. »

« Eh ! gnente, padre ;  
 Se la ga po paura del cataro  
 La se involza pur elà nel tabaro.  
 Adesso si capisso la rason  
 Che no i vol forestieri qua a Pekin ;

Sti spetacoli infama una nazion :  
Qua no gh'è umanità, senso comun .... »

*Tun-turun-tun-tun — tun-turun-tun-tun.*  
*Tun-turun-tun-tun — tun-turun-tun-tun.*

In soto vesta grisa,  
Che a mo camisa sventola i zenochi,  
Col barbuzzo sul peto  
E col zufeto a picolon su i occhi,  
Co una lagrema fissa,  
Che rota sbrissa e sgiozzola dai bafi,  
Infassà brazzi e schena  
Co una caena tegna su dai safi,  
Tra do liste d' arcieri  
Che divide la fola,  
Fisionomie da sgheri,  
Che co un' ochiada sola  
El sangue per teror ne i cuori giazza,  
Entra per l' arco Tulan-Kin in piazza.  
Come per l' alvear scosso dal refolo  
L' ave ronzando in gemito  
De ceta in ceta sbigotie se furega,  
Là per l' arena al comparir del misero  
Mile de compassion susti patetici  
De rechia in rechia a mezza voce sibila.  
Quattro soli e ben comodi scalini  
Mete sul palco ; fato 'l primo apena  
Tulan-Kin no ga più moto nè lena,  
Ma la so cruda scorta  
Con atroce pietà lo inalza e porta :  
E tra 'l sofà de soprarizzo d' oro,  
Sora el qual Brigliadoro  
Dure stende le zampe e par che dorma,  
E 'l cabarè da dove la tremenda  
Scimitara imperial sfiamèga nua,  
Trato 'l meschin, piega i zenochi, piomba  
Sul palco che rimbomba,  
E drezza 'l colo e sudor fredda sua.  
Lion che da la tana  
Spia la preda cufà, se verso 'l bosco  
Vede avanzar la piegora innocente,  
Usmando s' alza, gua le sgrinfe, e 'l dente  
Co l' ochio e col pensier za la divora ;  
E Kien-Long, che da un' ora anzioso aspeta  
Là dal trono la vitima infelice,

Spontar la vede apena,  
Che sbuffando l'è in pie: za le pupile  
De giubilo feroce ghe balena.  
Sordo a la voce del regal decoro,  
Osse de furor, da l' aurea toga  
Scarcera spale, fianchi,  
Sbafara 'l colo, snuda i bmazzi, slanza  
Scetro, corona, e per la scalinada  
Precipitando sul funereo palco,  
De tante 'l brila ancora  
Fulgide perle e geme  
Che 'l par noturno, estivo  
Spruzzo de stela che traversa 'l cielo.  
Da la dolente vista  
Del cadavere là de Brigliadoro  
Rianimandose a l' ira,  
Branca la scimitara, e perchè falso,  
Nè dubio colpo regia man no rischia,  
Lo preludia per l' aria, e in aria el fero  
Per ben tre volte lampizzando fischia.

« Chi xe, padre, quel vechio venerando,  
Che vien per man de quei do mandarini  
Zo per la scalinada seguitando  
L' imperator ? lo vedela ? »

« Lo vedo.

Quegli, eccellenza, è il buon vecchio Ton-Kai  
Preside al tribunale dell' istoria,  
Custode delle leggi, ultimo avanzo  
Del sangue di Confucio :  
Centenario, sa ella ! »

« El se lo porta

Col fior in rechia el so secolo in spala .  
Bela fisionomia ! L' à un brio ne i occhi !  
La me fazza una grazia : e cossa vienlo  
A far mo abasso ? »

« No lo so davvero :

Perchè, veda, eccellenza, io non ò dritto ... »

« Sto perchè ghe lo dono, padre, zitto. »

Curiosità, spavento,

Profonda compassion oprime i sensi,  
Trasforma in simulacri i spetatori,  
In muta solitudine la piazza.

Ma za Kien-Long dal più oportuno posto  
 Calcola le distanze, e verso 'l colo  
 De Thulan-Kin (ghe trema  
 Strenzendo a dopia man la scimittara)  
 Misura 'l colpo orizontale de morte;  
 E za per el teror che le pupile  
 Ofusca e cambia 'l cristalin in talco,  
 Crede mil'ochi e mile  
 Veder la testa rodolar sul palco;  
 Quando sie passi indrio  
 « Alto ( esclama una voce  
 Gravemente sonora )  
 Alto, Signor, che non è tempo ancora ! »  
 Ferma a mezz' aria per sorpresa 'l colpo  
 Voltandose Kien-Long : e — « temerario !  
 Osa Ton-Kai ? »

— « Ton-Kai, Sire, non osa,  
 Che a le legi ubidir ! »

— « Che legi ? »

— « Quele  
 Che da cento e più secoli  
 El più grande de i popoli governa :  
 Quele che un zorno el tartaro Kan-Gy  
 Conquistando la China à rispetà :  
 Quele che sacri e ilesti  
 Conserva, Sire, i vostri dritti al trono. »

— « E ste legi ( che flema ! ) cossa vorle ? »

→ « Gnente, Sire, che 'l giusto,  
 Al gran cuor de Kien-Long sì caro sempre.  
 Le comanda che prima de eseguir  
 Una sentenza capital el giudice  
 Rimproveri al paziente el so delito. »

— « E ben, fa le mie veci  
 Ti stesso, benemerito  
 Custode de le legi, e sentirò  
 Se al to zelo per queste  
 Quel che ti devi al to Signor, risponda. »

— « Ubidirò. »

E de fato,  
 Passa Ton-Kai dall' altra parte, e fermo

Dè fronte a Thulan-Kin, dise cussi:  
 ( Lu za in chinese e in venezian po mi.

« Perchè una voce nel to cuor sepolta  
 Non osi borbolar : *Moro innocente !*  
 L'enormità del to delito ascolta:  
 Da ben vint' ani e sempre più furente  
 L'empio Tan-Ky con verga ferea acuta  
 Sfezzava 'l cuor de la China gemente !  
 Cieca barbarie o insania dissoluta  
 Fava le veci de l' onor in corte :  
 Sordo gera 'l dover, la virtù muta !  
 Tronca l' ira del ciel sì dura sorte,  
 E abbandona 'l tiran, vitima lenta  
 D' ogni abuso moral, in braccio a morte.  
 Va sul trono Kien-Long. Se ghe presenta  
 Giustizia, umanità ; pianze 'l so scorno,  
 Lu le conforta, e a i so fianchi le senta.  
 L' altre virtù ghe fa corona intorno,  
 Lu le consulta 'l dì, vegia le noti  
 Con ele a riparar i guai del zorno ;  
 Trema comossi i suditi divoti  
 Per la salute de l' eroe chinese,  
 E mile manda al ciel fervidi voti,  
 Perchè cure sì gravi, e mai sospese  
 Da qualche dilettevole ristoro,  
 No richiami po un dì le antiche ofese.  
 Devasta i campi furibondo un toro ?  
 Sbalza in sela Kien-Long, doma è la fiera.  
 Chi lo porta al trionfo ? Brigliadoro.  
 Lieto de la comun letizia vera  
 Da quel zorno Kien Long per le foreste  
 Cala contro le belve la visiera,  
 E sul prode ronzin le fuga o investe ;  
 Cussi svaga 'l pensier e lo ristora  
 Da le cure del trono più moleste.  
 Ma no lassando senza premio un' ora  
 Zelo e valor ne le caste più basse,  
 De tanti fregi el so destrier decora,  
 Che, forsi ( perchè mai no l' invidiasse  
 De Caligola i doni e fasci e scure )  
 Forsi un dì, mandarin de prima classe ...  
 Ma non osi profane congeture  
 Tocar el sacro impenetrabil velo  
 De le sublimi auliche idee future !  
 Sto genio equestre delegà dal cielo,  
 A l' imperial virtù caro conforto,  
 Gera afidà, Thulan-Kin, al to zelo ;

Quanta invidia a sta scielta! Ah non a torto!  
 Soto un altro più vigile custode  
 Vivaria forsi .... e Brigliadoro è morto! ...  
 No, non t'acuso de spontanea frode,  
 Miserabile! reo ti xe abastanza;  
 E un delito minor saria mai lode?  
 La plebea te rimprovero ignoranza  
 Dei magici preceti de quel' arte,  
 Che sola al mondo i retrogradi avapza;  
 Che ferma i passi a l' anima che parte,  
 Che rinvegeta i tronchi e che .... ma resti  
 La causa pur del to delito a parte.  
 Quali efeti terribili funesti  
 A l'impero, a Kien-Long... a Ton-Kai stesso!  
 Racapriccio d' oror pensando a questi!  
 Eco Kien-Long, e per tua colpa, ossesso  
 Dal più cieco furor! eco l' impero  
 Da la barbarie novamente oppresso!  
 Sacro dover de doppio ministero,  
 Dei posterì gelosi a la memoria  
 M' obbliga mi mandar intato el vero;  
 E mentre nel detar l' odierna storia  
 Giubilo in mezzo ai più felici auguri,  
 Tra i fasti de Kien-Long e la so gloria,  
 Presentar devo ai secoli futuri  
 Per colpa toa l' infamia de sto dì,  
 Perchè tanto splendor tuto se oscuri?  
 Chi tra sta fola imensa e mesta, chi,  
 Contemplando i to spasemi no crede  
 Che regni ancora el perfido Tan-Ky?  
 Dov' è Kien-Long? (dise ogni cuor) l' erede  
 De le virtù de tanti eroi chinesi?  
 Chi un carnefice vil in lu no vede?  
 E per to colpa impunemente lesi  
 Tutti i driti de l' umanità,  
 Queli de la giustizia vilipesi,  
 El decoro imperial vituperà;  
 El pare del so popolo, in t'un mostro  
 Sitibondo de sangue trasformà,  
 Sta per lordar l' augusta man e l' ostro,  
 Sacrificando un sudito a un cavallo:  
 Qual sarà in avegnir el destin nostro?  
 Colpa sì enorme sarà tenue falo?  
 Ingiusto el to suplizio? Delinquente,  
 Chi più de ti degno de corda o palo!  
 Soprimi donca un fremito impotente,  
 E in vece de la voce che sepolta  
 Te brontola in tel cuor: *Moro inocente!*

El pentimento e i to rimorsi ascolta. »

Se aspetava Kien-Long ben la secada  
 De qualche parlatona da cao vechio,  
 Quondam avogador, e za la noia  
 Ghe preparava la sbadagiarola.  
 Sentindose mo ponzer l' amor proprio  
 Co l' ago damaschin de l' ironia,  
 L' era per ceder a la tentazion  
 De spartir in do tomi  
 Con un colpo de sciabla la parola.  
 Ma 'l sangue de Confucio che scoreva  
 Ne le vene a Ton-Kai,  
 La so riputazion, i so cent' ani  
 Ghe ligava le man, e à bisognà  
 Che a so marzo dispeto  
 El se la chiuchi suso quella bozza  
 D' amaro fiel insin l' ultima giozza.  
 Mentre per altro el stava là facendo  
 Con eroica pazienza  
 Sto mazzeto de fiori a la virtù,  
 A poco a poco el se va via incantando,  
 El resta là sul palco  
 Coi ochi bassi e fissi,  
 Col viso ancora tra 'l confuso e 'l truce,  
 In ato de impirarsè le pupile  
 Sora le ponte de le so papuzze;  
 El pareva, che soimi,  
 Quel famoso idolon de porcelana  
 De la capela de la gran sultana.  
 Ma come tuti lo varda lu solo,  
 E ghe spiona la fisionomia  
 Per norma del timor, de la speranza  
 Dai dai gh' è chi se acorze,  
 Che va via bonazzandoghe la smara,  
 Perde 'l pregio le grespe, e ghe scomenza  
 Un per de lustre liquide perlete  
 Tra palpiera e palpiera a far baossete.  
 In fati giusto mentre  
 Che 'l bon vechio Ton-Kai gera al *dicebam*  
 De la so artificiosa romanzina,  
 Da la man drete de l' imperator,  
 Ch' à domà 'l so furor, la scimitara,  
 Patatunfete zo, piomba sul palco.  
 Se volta a quel fracasso Thulan-Kin;  
 Forsi chi 'l sa? credendo  
 Che i ghe l' avesse za fata la festa  
 Per dar l' ultima ochiada a la so testa.

Ma Kien-Long, che za no gera più Kien-Long,

Che de l' indole fiera del lion

No s' aveva tegnù che la grandezza,

La magnanimità,

Ghe stava là d' intorno facendà

A desvolzerge zo de propria man

Quele trentasie quarte de caena,

Che ghe infassava i brazzi co la schena,

E agiutandolo in pressa a levar su :

« Torna nei to diriti, in libertà

Thulan-Kin, (el ghe dise ) e sia per ora

Compenso a le to angustie, a tanti afani

Sentirte a dir da la mia boca istessa ,

Che 'l solo reo son mi, ti l' innocente ;

Nè te ofendo de più col mio perdono! »

E con trasporto tenero e decente

Basà in fronte Ton-Kai torna sul trono.

Saria intrigà dasseno se volesse

Descriverve l' aplauso e l' esultanza

De quel mezzo milion de spetatori ;

E pur gera presente ! Oe cossa serve !

Go visto mi proprio sui occhi a tuti

A bagolar per alerezza i cuori,

Un batiman, un potpuri d' eviva,

De cighi in tuti i toni,

Un fracasso de piferi e tamburi,

De trombe e rochetoni,

De gnacare, de pive e scarcavali,

De man pestae su i muri,

De pie che se desmentega i so cali ;

Insoma basta dir che i mandarini,

I mandarini stessi,

Rote le stroppe de la gravità,

Ga slanzà tanto in alto i so ombrelini,

Che 'l zenit per prudenza s' à cavà.

« Ohimè, padre, son proprio imbalsemà !

Eh ! no me scondo no, no me vergogno;

Go pianto sempre, sala, a le tragedie

De lieto fin, e quele

No gera che romanzi da teatro.

La se imagina po se voi tegnirme

Giusto mo a sto spettacolo ! »

« Le pare ?

Anzi questo, eccellenza, fa l' elogio

Del carattere angelico .... »

« Obligato !

Ma no ghe n' ò nè merito nè colpa.

Ghe digo ben per altro,

Che 'l ga mo torto el codice chinese,

Che no vol forestieri in sto paese.

Fina che gh' è un ministro che sa dirla,

Che gh' è un sovran che se la lassa dir,

E se approfita de la verità,

Toria l' impresa mi de sto casoto.

Conosso là in Europa

Un schiapo de curiosi,

Che coraria le poste a precipizio

Per veder sto prodigio ; altro che l' ombre !

Saltadori e pagiazzì

Qua co sta rarità faria bezzazzi !

Oh ! padre, la solevo e la ringrazio ... »

« Oh ! perdoni, eccellenza ! io stesso devo

Pormi a' suoi piedi .... »

E se mai posso, sala .... »

« Corbezzoli, eccellenza, s' ella può !

Non avria da doverlo che a volerlo ....

Ma questo non è il tempo, non è il luogo ... »

No, no ; la diga pur, magari ! ....

« Incolpi

Dunque la sua bontà se mi fo ardito ... »

« Eh ! franco, padre. »

« In fatti il suo favore,

La sua piena influenza

Presso l' imperatore del Giappone ....

E questa poi sarebbe

Opera illustre e degna

De' suoi talenti e della sua pietà .... »

« Ah ! ah ! poi, padre,

Go capio tuto e ghe rispondo in bota.

Anzi le cortesie

Che la m' à praticà qua sta matina,

Senz' ombra come sento d' interesse,

Ghe dà un vero diritto

Su la mia ingenuità. Ghe dirò donca

Che scienze, arti, ignoranza

E vizi e pregiudizii e ipocrisia

Vestia de divozion, ghe n'è, xe vero,  
 Forsi quanto in Europa, anca al Giapon :  
 E quello che succede  
 Sui ochi de la fede,  
 E tra i lampi de le università,  
 Poco su poco zo, nasce anca qua.  
 Ma Ura-Kan ga per massima  
 Quel famoso proverbio venezian :  
 « Che quando la va ben tanto che basta  
 A tetarghe in tel c.... la se guasta .... »

« Niente, eccellenza !  
 Nou mi sorprende punto,  
 Che lo spirito, i sali, le facezie  
 De' scrittori flogistici del secolo,  
 Che nemici dell'ordine, e abusando  
 Del nome di filosofi, san dare  
 Alle intenzioni le più rette e pie  
 Sensi bistorti, maliziosi, oscuri,  
 Abbian saputo prevenire il mondo  
 Contro di noi così ch'ella non creda  
 Di cimentar per ora  
 L'autorevole sua protezione  
 In favor nostro, ed anzi  
 Non so negare la dovuta lode  
 Alla sua saggia previdenza, tanto  
 Sempre opportuna, e in questi tempi poi,  
 Veda, eccellenza, necessaria troppo  
 A l'uffizio geloso che sostiene,  
 Nè mi aspettava meno dalla nota  
 Desterità dell'eccellenza vostra ;  
 E per questo, com'ella à ben veduto,  
 Io titubava .... ma in un altro istante,  
 Quando procurerò darmi l'onore  
 Di umiliarle a palazzo i miei doveri,  
 Degnandosi ascoltar mi, spero ch'ella .... »

« Ben ; se la crede de sperar, la spera  
 Che chi vive sperando .... ma fa tardi,  
 E donca rinovando,

Padre, le mie proteste .... »

« Dove sei ?  
 Peppino, presto corri,  
 Precedi sua eccellenza per la scala .... »

« Eh ! no, no gh'è bisogno ; cossa fala ?

« Bacia dunque la mano a sua eccellenza. »

« Oibò ! pezo ! che diavolo !  
 Oh ! la mia riverenza.

« E la mia devozione a vo-eccellenza. »

E qua finisce la conversazion  
 Del padre Paralasse fiorentin  
 Col plenipotenziario del Giapon.  
 Mi mo me son fermà là su la piazza  
 Mezz' oreta de più,  
 E ò visto quel che no l' à visto lu !  
 Go visto quei tre mile mandarini  
 Stravacai panza-a-tera  
 Su l' ampia scalinada  
 Adorar la clemenza del monarca.  
 Go visto tuto 'l popolo  
 Corer qua e là sul palco,  
 Butar in mile pezzi  
 Quele vintiquatr'urne de profumi  
 Che va l' ambrosia a siropar dei numi ;  
 Spuar, senza riguardo  
 Del bel sofa de soprarizzo d' oro,  
 Sul sgrugno a Brigliadoro,  
 E portarse in trionfo,  
 San piero in caregheta,  
 Per le strade reali de Pekin  
 El bon vecchio Ton-Kai e Thulan-Kin :  
 E po turun-tun-tun,  
 Tuti core a disnar, contenti e alegri,  
 E la morte quel di resta a desun.



# POESIE

DE

ANTONIO LAMBERTI

---

## CANZONETE.

### EL LAMENTO.

No, no xe vero, Filide  
Che per cambiar teren  
Se cambi el mal in ben,  
L'afano in gusto.  
Co xe amalada l'anima  
Per tuto podè andar,  
Ma per tuto portar  
Co vu la piaga.  
Se fusse mai pussibile  
Menar un condanà  
Ne la preson sarà  
Da un polo a l'altro,  
El ciel ridente o torbido  
Nol cambiaria de ton,  
Per lu saria preson  
Parchi e zardini.  
Tal so anca mi, d'un atomo,  
Co tuto el mio variar,  
No m'è sentio a scemar  
Nel cuor l'afano.

*Racc. Poes. Ven.*

La tropo cara imagine  
Sempre xe viva in mi;  
No vedo altro che ti,  
Ti sola sento.  
Ma, cara, oh Dio! do fulmini  
Quei bei occhi me par,  
E i vedo a condanar  
La mia fredezza.  
E pur no son colpevole:  
Se ti m'è leto el cuor,  
Ti avarà del dolor  
Visto le marche.  
Perchè quel zorno oribile  
Che t'ò cussì lassù,  
No xelo scancellà  
Dai dì de l'ano?  
Perchè un destin teribile,  
Perchè un dover tirau,  
M'è da tegnir lontan  
Da chi è 'l mio tuto?  
Za le infernali furie  
Strazza ogni dì sto sen,

Sento tuto el velen  
 Dei so serpenti.  
 El sono ( che dei miseri  
 Sempre ga buo pietà )  
 Da dopo che son qua  
 Mai no l'ò visto ;  
 Nè ò visto che le tenebre,  
 El silenzio, el dolor,  
 A ste note d' oror  
 Formar cortegio.  
 Gersera un leto morbido  
 No go possoo sofrir,  
 Che m' à parso dormir  
 S' un leto d' aghi.  
 Son sbalzà su da rabia,  
 Al ciel seren so audà,  
 Ch' el gera illuminà  
 De stele ancora.  
 Oh come ò visto placida  
 Natura a riposar !  
 Oh quanto a tormentar  
 M' à bu l' invidia !  
 Za scomenzava a perdersè  
 Le stele, e 'l di vicin  
 El cantor matutin  
 Za salutava.  
 E sola l' alma Venere  
 S' aveva in ciel fermà  
 Per compassion, chi 'l sa ?  
 De un qualche amante.  
 Za andava sbianchizzandose  
 Verso l' oriente el ciel,  
 E i zefiri de miel  
 Spruzzava i fiori ;  
 La bionda aurora, alzandose,  
 Fava col so splendor  
 Cambiar in t' un rossor  
 Quela biancura,  
 E da quel lume vivido  
 Le montagne a indorar,  
 E dopo a rossizzar  
 Vedeva i coli :  
 E 'l ragio vivacissimo  
 Del sol, che avea spontà,  
 Riffetea qua e là,  
 Sui prai, sui campi,  
 E sora l' erbe morbide,  
 Che l' andava a ferir,

Vedevi a comparir  
 Perle e diamanti.  
 Chi mai co sto spettacolo,  
 Quando nol gera un mi,  
 Benedio quel bel di  
 No gavarave ?  
 E pur l' oror, le tenebre,  
 Go bu a desiderar  
 Per poder pascolar  
 ' La mia tristezza ;  
 Che za no pol un' anima,  
 Ch' à perso el caro ben,  
 Goder più pase in sen,  
 Sentir più gusti.  
 Più gnente no la stuzzega,  
 Gnente piacer ghe dà,  
 Co quel ben no la ga  
 Che la riempiva.  
 Ben i se acorze, Filide,  
 De la mia situazion,  
 E son la derision  
 Dei mii nemici ;  
 Ma deridème, stolidi,  
 De mi ludibrio fè,  
 Cussì no meritè  
 D' esser affiti :  
 Che st' affizion, ste lagreme,  
 Che me vedè a sgorgar,  
 Queste me fa stimar,  
 E no avilirme.  
 El mio no xe incantesimo ;  
 El vero ama sto cor :  
 Nè ga bisogno Amor  
 De far qua el mago.  
 Co 'l voglia d' una Filide  
 Qualche cor impiagar,  
 Nol la ga che a mostrar ;  
 Xe tropo ancora.  
 Cussì volesse el barbaro  
 Mostrarme el caro ben  
 Co quel ochio seren,  
 Co quel sorriso :  
 Cussì, nel di teribile  
 Ch' ò da vegnirte a dir :  
 ' O perdona, o morir  
 Vedime, cara :  
 Quela man adorabile  
 Me avcsse a soleva ;



Sentisse a pronunziar :  
*Si, te perdono.*  
 Tutti i mumenti numero,  
 Ch' à da portar quel di,  
 Ma tremo in fra de mi  
 Per quel mumento.  
 Sarastu quela Filide,  
 Che co tanta pietà  
 M' aveva perdonà  
 L' ardir de amarte ?  
 O un altra ? ah no, comovite,  
 Pensa in che stato son,  
 No zontar afizion  
 A chi xe affito !  
 No credaria provandolo :  
 Ti sa coss' è dolor ?  
 Mi l'ò visto quel cuor,  
 So quanto el sente.  
 Sì, el mio lamento, Filide,  
 Comoverà quel sen,  
 E se cambiarà in ben  
 Tuto l' afano :  
 Terminarà le lagreme,  
 Le pene cessarà :  
 Quel che no finirà  
 Sarà l' amarte.

## LA RIFLESSION.

Chi se agiuta a minchionarse  
 El piacer lo gusta più:  
 L' artificio de inganarse  
 Xe a le volte una virtù.  
 Mai vedè sortir l' aurora  
 Come in versi la lezè :  
 Mai cussè no la vien fora :  
 L' è un ingano, ma godè.  
 Se quel baso a Nina bela  
 No avè dà proprio col cuor,  
 No xe arzentò de copela  
 Le carezze del so amor.  
 La se ingana, e pur la gode ;  
 Vù godè, ve minchionè ;

Monea falsa paga e scode  
 L' uno e l' altro, ma godè :  
 Credè quela un' Eloisa,  
 Deventè sentimental :  
 No sè tali po in camisa,  
 Ve inganè, ma no stè mal.  
 Co gh' è un giozzo de riflesso,  
 Schiao patroni sior piacer ;  
 Trovè el vero troppo spesso  
 Che no è molto lusinghier.  
 Minchionarse, minchionarse,  
 Cari amici, se se pol ;  
 Za se ariva a sminchionarse,  
 E xe alora che ne dol.

## LA NECESSITA'.

No xe l' età freschissima,  
 No xe contento el cuor,  
 E so che Amor xe un perfido,  
 Nè so scampar da Amor.  
 So che un' amante fervida  
 Spesso la dona xe,  
 Co no l' amè sul serio,  
 O pur se no l' amè ;  
 Ma so che la xe insipida  
 Senza impizzarse el cuor ;  
 E benchè Amor sia un perfido  
 No so scampar da Amor.  
 So che a so mare Venere,  
 Sporzendoghe la man,  
 Sparagno afanti e spasemi,  
 Scampo dal dio tiran ;  
 Ma che le so delizie  
 Sazia, nè ariva al cuor :  
 E benchè Amor sia un perfido  
 No so scampar da Amor.  
 So che la benda magica,  
 La benda d' ilusion,  
 Strazza dai occhi ai omeni  
 Filosofia e razon :  
 Ma so, che senza iluderse  
 La vita xe languor ;

E benchè Amor sia un perfido  
 No so scampar da Amor.  
 So .... ma el saver no medica  
 Chi è nato per sentir ;  
 E so, che no scampandote  
 Tropo avarò a sofrir ;  
 So che in quel occhi, o Filide,  
 Xe sconto el traditor ;  
 Nè so scampar da Filide,  
 Nè so scampar da Amor.

## LA GONDOLETA.

La biondina in gondoleta  
 L'altra sera go menà,  
 Dal piacer la povereta  
 La s' à in bota indormenzà.  
 La dormiva su sto braccio,  
 Mi ogni tanto la svegiava,  
 Ma la barca che ninava  
 La tornava a indormenzar.  
 Gera in cielo mezza sconta,  
 Fra le nuvole la luna  
 Gera in calma la laguna,  
 Gera el vento bonazzà.  
 Una sola bavesela  
 Sventolava i so caveli,  
 E faceva che dai veli  
 Sconto el sen no fusse più.  
 Contemplando fisso fisso  
 Le fatezze del mio ben,  
 Quel viseto cussì slisso,  
 Quela boca e quel bel sen ;  
 Me sentiva drento in peto  
 Una smania, un missiamento,  
 Una spezie de contepto  
 Che no so come spiegar.  
 So stà un pezzo rispetando  
 Quel bel sono, e ò soportà,  
 Benchè Amor de quando in quando  
 El m' avesse assae tentà ;  
 E ò provà a butarme zozo  
 Là con ela a pian pianin ;

Ma col fogo da vicini  
 Chi avaria da riposar ?  
 M' ò stufà po finalmente  
 De sto tanto so dormir,  
 E gh' ò fato da insolente,  
 Nè m' ò avudo da pentir ;  
 Perchè, oh Dio, che bele cosse  
 Che gh' ò dito, e che gh' ò fato !  
 No, mai più tanto beato  
 Ai mii zorni no son sta.

## EL TU E 'L VOI.

Nina, dov' è quei tempi  
 Che in barca da traghetto,  
 Su l' ora del frescheto  
 Se andava a scorsizzar ?  
 Che sol de le to grazie,  
 Del to bon far vestia,  
 Ti davi gelosia  
 A qualche dea del mar ?  
 Dov' è quei dì beati  
 Che un marendin bastava,  
 Che ambrosia el diventava  
 Solo da ti tocà ?  
 Che in mezzo al to matèzzo,  
 Donandote a l' amante,  
 Ti 'l favi in un istante  
 Felice ed inganà ?  
 No ranghi, no tesori,  
 Te dava allora el cielo,  
 Ma el fresco, el bon, el belo,  
 E un cuor inzucarà ;  
 E morbinosa l' anima,  
 E ochieto biseghin,  
 Sen d' alabastro fin  
 Sul torno lavorà.  
 Co tante grazie adosso,  
 Fresca, matona e bela,  
 Chi furba e baronzela  
 No aveva a deventar ?  
 Ti 'l geri, o caro ogeto,  
 E Amor, me lo perdona,

Furba cussì e barona  
 Più te saveva amar.  
 Quanto è diversa, oh Dio  
 Degnissima signora,  
 Sta vita che ve onora  
 Da quei beati di!  
 Quel omo grandò e grosso  
 Che fè a la porta star,  
 L' imagine el me par  
 Giusto del tempo e mi;  
 Par che da vu el descazzi  
 Co quel so bruto viso  
 Piaceri, amori e riso,  
 Che nol li voglia più.  
 In fati, quei puteli  
 Mati, insolenti e schieti,  
 Sui ricchi vostri leti  
 Trema de montar su.  
 Oh Dio! me li ricordo,  
 Vegnui per el balcon,  
 Sentarse a cufolon  
 Su quel to letesin;  
 E far mile matezzi,  
 E ti scherzar con lori,  
 Riso, piaceri, amori,  
 Pianzè 'l vostro destin.  
 No, quei tapei, signora,  
 Tessui per man d' Aracne,  
 Nè quei che le persiane  
 Ga ordio co le so man,  
 Nè quella vostra tanto  
 Superba arzentaria,  
 I piati co maestria  
 Incisi da German (135);  
 Quei vostri gabineti  
 Fati a vernise fina,  
 Che l' arte dè la China  
 Ariva a suparar';  
 I vasi giaponesi,  
 Le chichere del Vezzi (136),  
 E quei tanti altri pezzi  
 Che usè de doparar;  
 Quel padiglion magnifico  
 Che alzè co se in campagna,  
 Dove no sol se magna  
 Al fresco i di d' istà,  
 Ma che s' impianta spesso  
 Soni, festini e canti,

E tuto quel che incanti  
 Dal mondo vien chiamà;  
 Le zoge che avè al colo,  
 Le bucole, i rechini,  
 E le perle e i rubini  
 Che ai brazzi vu portè,  
 Le franze, i fiocchi, i merli,  
 E tanti bei ricami,  
 Le stofe e quei pelami  
 Che a casse conservè,  
 In soma tuta quella  
 Pompa che dea ve rende  
 Ai occhi che no intende  
 La vera volutà,  
 Perdona, cara Nina,  
 No condanarme e tasi,  
 No val un per de basi  
 De la to prima età.

## LA MARINA.

Za se abozzava el zorno;  
 Le stele in ciel spariva,  
 L' aurora compariva  
 El mondo a ralegrar.  
 Un bel matin de zugno,  
 Che a Lio su la marina  
 Gera co la Biondina  
 El fresco a respirar,  
 Con un fioreto in testa  
 La gera; e coi caveli  
 Che sparsi in biondi aneli  
 Ghe zogolava in sen;  
 No la gaveva busto,  
 Nè veli, nè cerchieto,  
 Ma solo un corsiereto,  
 E un bianco bocassin.  
 Messa cussì, in quel' ora,  
 Puzada sul mio braccio,  
 Penseve che strapazzo  
 La fava de sto cuor!  
 La se ne gera acorta  
 Sta furha, sta strigheta,

E a darme la stangheta  
 La s' à volsù provar :  
 Varda quel sol, la dise,  
 Co belo ch' el vien fora,  
 E come che l' indora  
 L' acqua col so splendor!  
 Come ch' el venteselo  
 Va l' aria rinfrescando,  
 Come se va increspando  
 Placidamente el mar!  
 Ma mi, che come brase  
 Tuto de drento ardeva ;  
 Penseve se gaveva  
 Più voglia de vardar.  
 Ti, ti xe el sol, rispondo,  
 Per mi, nè gh'è altri soli ;  
 O che ti me consoli,  
 O vedime a morir.  
 Pietosa quei ochieti  
 Verso de mi la move,  
 E sento che me piove  
 Mile dolcezze in sen.  
 La man ghe strenzo alora,  
 La bela me risponde,  
 Le idee se me confonde,  
 Più no me trovo in mi.  
 De st' estasi beata  
 Chi podaria parlarve ?  
 Coss' ogio da contarve  
 Se in mi no gera più ?  
 So che svegià m' ò visto  
 Sentà co la mia bela ;  
 E Amor sentà con ela,  
 Ma mezzo indormenzà.

## EL PENSIER

Vado pensando, nonola,  
 Quello che amor facesse  
 Quando ch' el te vedesse :  
 No xelo un bel pensier ?  
 Mi ghe scometarave  
 Ch' el restaria incantà ;  
 E che dopo el dirave :  
 Sta dona ghe xe qua ?

Cussi el dirave, nonola,  
 E po dopo a bel belo  
 Quel mato de putelo  
 Te vegnaria a basar  
 Prima la man, po un braccio,  
 E po el faria un sestin,  
 E po dopo el furbazzo  
 A pian, a pian pianin,  
 L' andaria rampegandose  
 Più in su, più in suso ancora  
 Disendo : la inamora  
 Custia l' istesso amor.  
 E nol staria più quieto,  
 Come i puteli fa,  
 El chiaparia un ochieto,  
 La boca : e po chi sa ?  
 E ti po disgustandote  
 Ti lo manazzaressi :  
 Putelo, ti diressi,  
 Sta quieto, via sii bon.  
 E lu, come i putei,  
 Mezzo mortificà,  
 In quei to bei cavei  
 Tuto quanto imbautà,  
 Parlandote, pianzendote,  
 Tanti sesti el faria,  
 Che alfin te sentiria  
 Dirghe : vien qua baron.  
 Alora, co quel sesto  
 Che pol aver colù,  
 Svolando presto presto  
 Ora zozo, ora su,  
 L' andaria cocolandote :  
 E ti ti ridaressi,  
 E ti diventaressi  
 Più bela assae de lu.  
 Ma mi diventio mato ?  
 Amor l' à da vardar ?  
 No xelo chi t' à fatu ?  
 Questo xe zavarlar.  
 Ah sì, son mato, nonola,  
 E pur tropo lo vedo :  
 Figurite, che credo  
 Che ti me vogi beà.  
 E pur te pregarà,  
 Cara, benchè sia tal,  
 Lassarme in sta busia ;  
 Za no la te fa mal.

## EL DUBIO.

Mi, co te vedo, sento  
 Un certo no so che,  
 E digo che nol sento ;  
 E digo che nol gh'è.  
 Mi, se me inchiava i denti  
 Quando te voi parlar,  
 E digo, i xe accidenti ;  
 Digo che l'è 'l mio far.  
 Me cocola una bela,  
 E in vece penso a ti,  
 E digo che xe quella  
 Un' incostanza in mi.  
 No visitarte zuro,  
 E so ogni sera qua,  
 E credo, e son sicuro,  
 Che l' uso m' à portà.  
 Voi disgustarte, e sento  
 Proprio che no so bon;  
 Ma digo : no lo tento  
 Perchè no go rason.  
 Me meto anca in borezzo,  
 E po so imusonà,  
 Ma digo : l'è un matezzo,  
 Sempre cussì son sta.  
 Digo ste cosse, è vero,  
 E pur no stago ben,  
 E se ò da dir sincero  
 Go de l' afano in sen.  
 Cossa che sia sto impianto  
 Voria saver da ti,  
 Essendo che da tanto  
 No so capace mi ;  
 Vorave po .... eco el caso ....  
 No posso andar più in là,  
 Tremo, barboto, taso ....  
 Saravio inamorà ?

## LA RIUNION.

Silvia, la bionda Silvia,  
 Che un tempo de sto cuor  
 Xe stada la delizia,  
 Che m' à imbrigià d' amor,  
 Lusendo in ciel chiarissima  
 La luna a mezzo istà  
 Sui fiori e l' erba tenera  
 S' avea co mi sentà.  
 Nè 'l tempo, nè altre Veneri,  
 Nè quel tremendo sì,  
 Avea la bela imagine  
 Mai scancelada in mi.  
 Fissi un co l' altro, immobili,  
 Se stevimo a vardar ,  
 El cuor sentiva a baterme;  
 Ma no podea parlar.  
 Alfin co un' ose languida,  
 Che ben facea capir  
 La situazion de l' anima,  
 Cussì m' ò messo a dir :  
 Questa è quel' acqua limpida  
 Che semo andai ti e mi  
 A scaturar i gambari ;  
 No è vero ? e Silvia : — sì.  
 E là, da drio quei alberi  
 Che la se va a stagnar,  
 Xe dove che quel' anara  
 Ti m' à mandà a chiapar ;  
 Che tropo cocolandola  
 Tanta gran rabia ò bù,  
 Che voleva mazzartela ....  
 Te ricordistu più ?  
 Che dopo benedivimo  
 Le colere d' amor,  
 Che in do nu no sentivimo  
 Che un' anima, che un cuor ?  
 I gran mumenti, Silvia !  
 Ch' i n' abia più 'a tornar ?  
 Ela un' ochiada tenera  
 Lassa su mi cascar.  
 Allora strucolandoghe  
 La man, digo: mio ben,

Come in quei dì, assicurate,  
 Arde per ti sto sen ;  
 Ma ti ? .... quele to lagreme  
 Voriele forsi dir,  
 Che l' amor te rimprovera,  
 Che ti torni a sentir ?  
 Ah ! pensa, che 'l primissimo  
 Son che ti gh' à zurà  
 In quei zorni beatissimi  
 Eterna fedeltà ;  
 Che quel dover terribile  
 Che t' à sbregà da mi  
 Per quatr' ani continui  
 Ga tossegà i mii dì ;  
 Che da la mia memoria  
 Mai n' ò savù scazzar  
 Quele to tante grazie,  
 Quel soave parlar :  
 Mai quei cavei finissimi,  
 Nè quei lavri de miel,  
 Quel bel ochio ceruleo  
 Che me ricorda el ciel :  
 Pensa .... ma interrompendome,  
 Senza però parlar,  
 Da quella man bianchissima  
 Me sento a slontanar.  
 Oh Dio ! .... mortificandome,  
 Dopo de aver slanzà  
 De le ochiae languidissime,  
 Che diseva, pietà,  
 Ai pie de la mia Silvia  
 Za gera per morir ....  
 Amor un tal spettacolo  
 No ga possù sofrir.  
 Quela tremenda fiacola  
 L' à fato shampolar :  
 La luna in t' una nuvola  
 Se xe andata a sarar.  
 Un fogo vivacissimo  
 S' avemo sentio al cuor,  
 Son certo che se amevamo,  
 Se no, coss' è l' amor !  
 Come po che se amessimo,  
 Cossa de nu sia stà,  
 Mi no savaria dirvelo :  
 Domandeghe a quel pra.

## LA CONSOLAZION.

Me vede malinconico  
 Catina l' altro dì  
 E la me dise : « Trotolo,  
 Cossa mai vustu ? *E mi :*  
 — Sapi, che Lila .... — Lila ?  
 Ti ghe vol ben ancora ?  
 Va via sastu in madora : —  
 — No lo sastu anca ti ? —  
 — Lo so, maledetissimo,  
 Ma ti l' à da scordar :  
 O va a l' inferno, o l' unica  
 Son che ti ga da amar. —  
 — Sì, te amarò ti sola. —  
 — Mostro, te mazzarla,  
 Sì, za l' è butà via,  
 Sì, l' è negà sto cuor ;  
 Ma, curte, sta to cocola  
 La t' à savù impiantar. —  
 — Cossa ? — Via presto, dimelo,  
 Che ti possi crepar : —  
 — L' à dito ... — Fa 'l smorfioso ...  
 Cossa ? — Che la voria  
 Se no fusse omo ... Via —  
 — La me vorave amar : —  
 — Marfisa gentilissima !  
 Che anima che la ga !  
 Oh povero el mio Trotolo  
 Ti fa proprio pecà !  
 Donca cussì i me toca ?  
 Va là che ti è un gran tomo ;  
 Te desfàrò de omo  
 Cussì la te amarà.

## L' A V A

TRADUZION DAL SICILIAN.

Dime, aveta bonoriva,  
 Perchè avanzistu l' aurora?  
 No gh' è ancora anima viva,  
 No rossizza i monti ancora;  
 Trema e luse in ogni parte  
 Su l' erbete ancora intate  
 La rosada: ah! no bagnarte  
 L' ale d' oro delicate;  
 Nei so verdi bocoleti,  
 Streti suso e fati in massa,  
 Sonachiosi xe i fioreti  
 Co la-testa ancora bassa.  
 Mo via fermite, cativa,  
 No stracar le alete ancora;  
 Dime, aveta bonoriva,  
 Perchè avanzistu l' aurora?  
 Vustu miel? cerchistu questo?  
 Sera l' ale e no stracarte,  
 Mi te insegno un logo presto  
 Da chiuchiarlo e sbabazzarte.  
 La mia Nina a l' ochio belo  
 Ti conosci, e a le fatezze;  
 Svola al lavro; apunto in quello  
 No ga fin gusti e dolcezze.  
 Sì, in quel lavro che un sorriso,  
 Un sorriso adesso infiora,  
 Ghe xe un miel de paradiso ...  
 No ti chiuchi, aveta, ancora?

## EL FIA'.

TRADUZION DAL SICILIAN.

Delizioso profumeto  
 Del qual st' aria xe vestia,  
 Chi te manda? e da che via?  
 Che indovino ghe scometo,  
*Racc. Poes. Ven.*

Diria qualche testa sbusa,  
 Che ti è fio dei più bei fiori;  
 Che i so balsemi, i so odori,  
 Xe in ti uniti a la refusa.  
 Mi nol nego, la fragranza,  
 Che dà ai fiori la natura,  
 Più balsamica, più pura,  
 Ghe xe in ti, ma ghe ne avanza:  
 Diria un altro: un zefireto  
 Da l' Arabia fortunada  
 Quel' essenza prelibada  
 Suna suso, e vien qua dreto.  
 Oh! se i boschi dei Sabei,  
 Se d' Arabia l' erbe e i fiori  
 I gavesse de sti odori  
 Ghe starave drento i dei!  
 Ti, ti ridi, che i se ingana:  
 Ah, baron de profumeto,  
 Che indovino ghe scometo?  
 Ti xe el fià de la mia Nana.

## EL ZENSAMIN.

TRADUZION DAL SICILIAN.

Zensamin, de far bravate  
 No so vederghes el perchè;  
 Star in mezzo a un sen de late,  
 No lo nego, l' è un gran che;  
 Ma le rose e i amaranti  
 Xe stai là, li ò visti mi,  
 E un onor concesso a tanti  
 Xelo onor? dimelo ti?  
 Zensamin, te vedo a ciera,  
 Un sovràn ti è diventà;  
 Varda ben che avanti sera  
 Sto sovràn no sia fischia.  
 Farse gloria al dì d' ancuo  
 Che una dona v' ama! oibò;  
 Caro ti, l' è amor a fruo,  
 E ancuo l' ama, e doman no.  
 Fuignà, vedistu, in tera  
 Quel garofolo ch' è là?

Quel garofolo ger sera  
 Come un dio l'è sta adorà;  
 Nè invocar Flora e Priapo  
 No ghe val; nè dir: « oimè,  
 Lila mia, per ti son fiapo, »  
 Che pietà per lu no gh'è.  
 Benchè ancuo ti sii l'eletto,  
 Ti avarà per sucessor,  
 Chi lo sa, zensamineto?  
 Forse ancuo de zuca un fior;  
 Che nel regno d'incostanza  
 Gh'è cucagna, credi a mi:  
 Tuti ga la so speranza,  
 Se no un zorno, un altro dì.

#### EL SOFÀ.

Vicin de Nina  
 Xe tuto incanto,  
 E par che l'arte  
 Sia nata là;  
 Ma quel che bisega  
 Che m'urta tanto,  
 Xe 'l so tempieto,  
 Xe 'l so sofà.  
 Se la vedessi!  
 L'è un paradiso,  
 Bisogna amarla  
 Da desparà;  
 Gran bele cosse  
 Che fa quel viso  
 In quel tempieto,  
 Su quel sofà!  
 Se del mistero  
 Fra l'ombre care  
 Amor da rente  
 Se gh'à sentà,  
 Sempre ga parso  
 Star co so mare  
 In quel tempieto,  
 Su quel sofà.  
 In sin che vivo

Mi voggio amarla,  
 E mi felice  
 Se me vien dà  
 De dir sta cossa,  
 De replicarla  
 In quel tempieto,  
 Su quel sofà.  
 Vu che voressi  
 Sbregarme via,  
 Voria mo veder  
 Che forza ga  
 La vostra tanta  
 Filosofia  
 In quel tempieto,  
 Su quel sofà.  
 Mi za nol nego  
 Che sta barona  
 Gabia un matezzo  
 Che va al de là;  
 Ma oh dio! chi è savia?  
 Disè, che dona?  
 In t'un tempieto,  
 Sora un sofà?

#### EL CONSEGIO.

Se amor mai da vu se vede,  
 Cari puti, a zogolar,  
 Per pietà no ghe dè fede,  
 No lo stessi a carezzar.  
 Su la boca el mostra el riso,  
 La dolcezza sul so viso,  
 Ma col rider su la boca  
 Pizzegoni e slepe fioca;  
 E fra mezzo a le carezze  
 Mile stili, mile frezze,  
 Quel furbazzo sa missiar:  
 Se savessi che zoghetto  
 Che m'à fato un di costù!  
 Dopo averme chiapà stretto  
 Da no moverme mai più,  
 Con un ago damaschin  
 Su la pele a pian pianin  
 Tuto quanto el me ponzeva;



Mi pianzeva, e lu rideva,  
 E 'l diseva: « ti xe bravo,  
 Ma, birbon, t'ò fato schiavo. »  
 La gran rabia che go bu!  
 Saveu come che l' à fato  
 A chiaparme sto bricon?  
 El s' à messo come un gato  
 Quachio quachio a cufolon;  
 L' à aspetà che un dì Nineta  
 Me contasse una fiabeta;  
 Mi, credendo esser in porto,  
 De colù no m' avea acorto;  
 E lu, vien per da drio via,  
 Chiapa, strenzi, e mena via,  
 Nè val pianti, nè rason.  
 A scravazzi de sta sorte  
 Sto baron ghe ne sa far,  
 Come un bogia el dà la morte,  
 Quanto un bogia el sa strozzar;  
 Lu ga lazzi, el ga manere,  
 El ga forni, el ga caldiere,  
 El ga corde e manganelli,  
 El ga chiodi, el ga marteli,  
 E lanzete e gamauti ....  
 Ah! scampeghe, cari puti;  
 No se vince che a scampar.

## LA LONTANANZA.

Come el vilan l' istà,  
 Ch' el calor ga arsirà  
 L' erba e le biave,  
 Brama l' acqua dal ciel,  
 Che più dolce del miel  
 Per lu sarave;  
 Come che un pelegrin  
 Brama vederse al fin  
 D' un longo viazo;  
 E che un interessà  
 El tesoro trovà  
 Lo brama al sazo;  
 E come chi xe in mar  
 Dopo un gran navigar  
 Sospira el porto:

E come brama san  
 La mare el fio lontan,  
 Solo conforto:  
 Come el sol el Lapon,  
 La libertà el preson,  
 L' orbo la luse;  
 Con un istesso ardor  
 A bramar quel to cuor  
 Amor m' induse  
 Con un istesso? no  
 De più bramar lo so,  
 Più lo sospiro.  
 Quei altri a delirar  
 No i vedo e angonizzar  
 Senza respiro:  
 Mi sì, che sento in sen  
 E le fiamme e 'l velen,  
 Nè go un conforto.  
 Quel che savaria in mar  
 No vorave trovar  
 La morte in porto;  
 Nè 'l pelegrin vorà,  
 Dopo aver ben strussià,  
 Patria e caena;  
 Nè veder l' orbo el ciel  
 Per no beber che fiel  
 Disnar e cena.  
 Mi, del to cuor paron,  
 Aceto la preson,  
 Morte disprezzo.  
 Credilo, cara, sì,  
 Ogni ben l' è per mi  
 Ben senza prezzo.  
 Ma come che l' amar  
 Ne fa spesso cascar  
 In tel delirio!  
 Sospiro per amor,  
 Desidero el to cuor,  
 Perchè sospirio?  
 No me l' astu donà,  
 E no m' astu zurà  
 Mai torlo in drio?  
 E vero, sì, mio ben,  
 Ma ti è lontana, e in sen  
 Ti 'l ga col mio.

## EL TROPO E 'L TROPO POCO.

DAL FRANCESE.

Ne la stagion dei bocoli,  
 Sul tramontar del dì,  
 Sentai soto una pergola  
 Gerimo Nina, e mi ;  
 Mai più l' aveva vista  
 Quanto in quel zorno bela ;  
 Fisso mi gera in ela  
 Disendoghe cussi :  
 « Quel che ti fa, mia cocola,  
 Xe tropo per scherzar,  
 Ma tropo poco, nonola,  
 Quando ti vogi amar.  
 Quele ochiadine tenere  
 Che co le mie se vien,  
 Fa che 'l mio cuor s' imagini  
 De bisegarte in sen,  
 Ma de sto dolce ad onta  
 Parlar, che 'l cuor me toca  
 Oh dio ! che la to boca  
 Co quele no convien.  
 Quel che ec.

Se voi scazzar da l' anima  
 Quel fogo che soffrir  
 M' à fato tanti spasemi,  
 Ti ti me 'l sa proibir,  
 Ma se te digo, cara,  
 Sentistu in tel to peto  
 Per mi l' istesso afeto ?  
 No ti me lo vol dir.  
 Quel che ec.

Su quele neve candide  
 Se sbrissa la mia man,  
 Neve che fa. ardentissime  
 Un dio per mi tiran,  
 No trovo che se opona

La toa su quel mumento,  
 Ma da là un poco sento  
 Cazzarmela lontan.  
 Quel che ec.

Qualche coral dai laveri,  
 È vero, t' ò robà,  
 E ti compassionandome,  
 Robar ti l' à lassà ;  
 Ma no ghe xe stà esempio  
 Che da to posta mai  
 Un de quei bei corai  
 Ti m' abi regalà.  
 Quel che ec.

Ah ! Nina, se deciderse  
 No vol per mi el to cuor,  
 Vien qua, piuttosto mazzime,  
 Termina el mio dolor ;  
 Daghe sto premio, ingrata,  
 A Toni che te adora,  
 Fa che con elo mora  
 El più costante amor.  
 Decidi, cara cocola,  
 Se ti me vol burlar,  
 O se xe vero, nonola ;  
 Che ti me vogi amar. »  
 Pietoso el fio de Venere  
 Allora s' à mostrà,  
 E in t' una bela nuvola  
 Insieme el n' à sarà.  
 No so se fusse al mondo,  
 O pur da quel diviso,  
 Ma so che un paradiso  
 Gnente de più no ga.  
 E ò dito : « La mia cocola,  
 Questo no xe scherzar,  
 L' è far da seno, nonola,  
 Questo xe vero amar. —  
 — Sì, co un sorriso amabile,  
 Ma insieme anca baron,  
 La dise : mi no dubito,  
 L' è amor, ti ga rason ;  
 Ma el to vantar, perdona,  
 Fa che la to Nineta  
 Sul muso te ripeta  
 L' istessa to canzon.

Quel che ti à fato, cocolo,  
Xe tropo per scherzar,  
Ma tropo poco, nonolo,  
Quando ti vogi amar. »

## A M O R.

De confessartelo,  
Nineta, credime,  
No go rossor,  
Imperscrutabile  
Ne l' uman genere  
Trovo l' amor.

Dise i filosofi,  
Che amor in genere  
Xe l' atrazion :  
Che sta forza insita  
Co la predomina  
Forma le union.

Da la molecula  
Indivisibile  
Ch' esiste qua  
A le rotabili  
Masse de l' etere,  
Tuto la ga.

Per questa rodola  
Tanti sateliti  
Atorno al sol,  
Questa semandose,  
Questa tolendose,  
Tuto se tol.

Ela ve genera  
L' acido, l' alcali,  
L' etere, el sal;  
La sa componere  
Bitumi, solfare,  
Acqua, metal.

Le fibre organiche  
Dei vegetabili,  
Che in tera gh' è,  
Ela le assimila,  
E fa che i germi  
Come vedè.

Nè ghe xe un atomo  
Che al mondo sta,  
Chè amor no domini,  
Che amor non animi,  
Che amor no ga;  
Ma discostandose  
Dal mondo semplice  
Sta relazion  
Complicatissima,  
E in ragion centupla,  
Nasce l' union.

Perchè nei esseri,  
Che una sensibile  
Vita contien,  
Tanto el s' imascara  
Che un vero Proteo  
L' amor divien.

Per questo, replico,  
Nina adorabile,  
Senza rossor,  
Che indefinibile  
Ne l' uman genere  
Trovo l' amor.

Perchè sto diavolo  
Lo trovo un piavolo,  
Lo trovo un cavolo;  
Perchè l' è un boccolo,  
Perchè l' è un brocolo,  
Perche l' è un mocolo;

Perchè l' è un' anima,  
Perchè l' inanima,  
Perchè l' disanima.

Lu xe vivifero,  
Lu xe pestifero,  
Lu xe mortifero;  
L' è zucherigero,  
El xe saligero,  
El xe acidigero;  
El xe filantropo,  
El xe misantropo,  
El xe genantropo,

El xe notambulo,  
El xe sonambulo,  
L' è tenebrambulo;  
L' è un bel putelo,  
L' è un ladroncelo,  
L' è un Machiavelo;  
L' è un zogo.

L'è un logo,  
 L'è un fogo ;  
 L'è un covo,  
 L'è un vovo,  
 L'è un lovo ;  
 L'è un globo,  
 L'è un gobo,  
 L'è un robo ;  
 L'è un mato,  
 L'è un gato,  
 L'è un flato ;  
 L'è molo, l'è saldo,  
 L'è fredo, l'è caldo ,  
 L'è curto, l'è longo,  
 L'è un alboro, un fongo,  
 L'è tondo, l'è acuto ;  
 Nineta, l'è tuto.

#### LETTERA A NINA.

Adesso che la neve  
 Xe tuta desgiazzada,  
 Che pianze la to pergola,  
 Che l'erba xe tornada,  
 Che sponta viole e boculi,  
 Dime, dov' estu .... là ? ....  
 Là in quel bel pra, mia Nina,  
 Che i primi nostri amori  
 Ga visto in cuor a nascerne  
 Come che fa i so fiori,  
 Che sponta senza acorzerse ....  
 Saressistu in quel pra ?  
 Mo ! .... là ò ridestò un tempo ;  
 Là ò pianto ; là le sere,  
 Nineta, te ricordistu ?  
 Mi consumava intiere  
 Fissandote, parlandote :  
 Come me ardeva el sen !  
 Co gera più fogosi,  
 Più vivi i nostri afeti,  
 El sol pareva goderse,  
 Cantava i oseleti,  
 Andava via le nuvole,  
 Tornava el ciel seren.

Ti sarà là, mia cara,  
 Ma mi no ghe son miga !  
 Per ti se infiora i albori,  
 Nasce per mi l'ortiga,  
 El ciel per mi xe torbido,  
 Per ti più belo el sol.  
 Son qua, lontan, fra zente  
 Che par 'na mascarada,  
 Che come le formigole  
 Va in riga per la strada ;  
 Che v' urta, che ve strucola ;  
 E spesso anca ve dol.  
 Oh dio ! se ti vedessi  
 A miera xe le case !  
 Sastu che se pol perderse ?  
 Oh in soma, no me piase ....  
 E come mai pol piaserme  
 Co Nina no xe qua ?  
 Lavoro come un storno,  
 Sempre el paron me cria ;  
 Fazzo el botiro a perderghe,  
 E 'l vol mandarme via :  
 E mi, Nineta, credistu  
 Che me despiasarà ?  
 Qua mi no vedo Nina,  
 Qua adesso è primavera,  
 Ma mi no posso acorzerme,  
 Xe tuto zente o piera ;  
 Qua no fiorisce un alboro,  
 Un fior no sa spontar.  
 Mezza de sta gran zente  
 Par sempre desaparada,  
 I pianze, i prega, i suplica,  
 I dorme su la strada,  
 E insin a mi limosina  
 Me i vedo a domandar.  
 St' altra metà par rica,  
 Vestii sempre da festa,  
 I paga certe frotole  
 Un ochio de la testa ;  
 L'oro, l'ariento, credime,  
 Par che ghe nassa in man.  
 I beve brodi negri,  
 Acque che par lissiazzo,  
 Sentadi in certe camere,  
 E i magna in sin el giazzo ;  
 In suma, certi tosseghi  
 Da starghene lontan.

Quei loghi per sti siori  
 Mi credo za che i sia,  
 Facendo tanto strepito,  
 Giusto la so ostarìa ;  
 E chi no ga da crederlo  
 A tuto quel che i fa ?

Le done ride, chiacola,  
 A tuti le fa ciera,  
 Come le nostre femene :  
 El zorno de la fiera,  
 Ma assae più strambe, credime,  
 Me par che le sia qua.

Gh'è certe case grande (137)  
 Che drento ga i balconi,  
 E stanze che par scatole ;  
 Là e sesti e canti e soni ....  
 Oh mi no so descriverte  
 Le cosse che i sa far !

Par de insoniarse, Niña !  
 M' à fato insin paura ;  
 Se vedè monti, pascoli,  
 Case, preson, verdura,  
 Ma no ghe tornq, accertite,  
 Che là i ve pol strigar.

De strigarie un gran numero  
 Ghe n' è per ogni banda ;  
 Go portà el late un venere  
 In t' una casa granda,  
 E un caso .... goi da dirtelo ? ....  
 Sì, tuto t' ò da dir.

Là vedo una signora  
 Vestia da dea del cielo,  
 La vien, la dise : « Picolo,  
 Xestu quel pastorelo  
 Qua dal pestrin de Bortolo ?  
 Quel late voi sentir ;

E dopo ; bravo .... neto ....  
 Bon .... ti è anca tì pulito ;  
 Ogni matina portilo  
 Qua, sastu, qua in sto sito :  
 Adio, hiondoto : ascoltime ...  
 Fermite un poco qua. »

Risponder no saveva,  
 Gera inzucà là in pie,  
 L' à scomenzà a discorerme,  
 A dirme .... oh che busie !  
 Mi so scampà in t' un supio,  
 E ò maledìo quel di.

La gera striga certo ;  
 Ora l' avriva i ochi,  
 Ora la i fava picoli ;  
 Mi m' à tremà i zenochi,  
 Come chi vede el diavolo,  
 Nè so tornà mai più.

Nina, el paron za impianto,  
 Torno da ti, caretà,  
 Pascolarò le piegore,  
 Ma vedarò Nineta,  
 Vedarò l' erbe, i albori,  
 E col mio ben sarò :

Sarò più povereto,  
 No magnarò ogni zorno,  
 Manestra, carne, intingolo,  
 Ma sarò manco storno ;  
 La testa qua va in fregole,  
 E no se pol star ben ;

Adio, Nineta bela,  
 Da qua do settimane  
 Sarò co ti ; a revederse  
 Sul pra de le fontane.  
 Conservime sta letera,  
 Scondila in mezzo al sen.

#### L' IMBRIAGON.

« Tolèghe carica,  
 E cassa e talari,  
 E campi e stabili,  
 E casa e mobili,  
 E la co cocola ;  
 Caveghe i abiti,  
 Fischè i so crediti,  
 Lasseghe i debiti,  
 Fe miserabile  
 Chi è sta invidiabile ;  
 E po doman  
 A quel medesimo  
 Meteghe in man  
 Un fiasco e un profano  
 De vin teran,  
 Sie de luganega,  
 Quatro de pan ;

Co no le astemio  
De l' adorabile  
Oro potabile,  
Lo vedarè  
Tornar richissimo  
Deventar re.

Questi xe i meriti  
Che ga l' autuno.  
E contrastarmelo  
No pol nissuno ;  
No el cielo placido,  
No i zorni tepidi,  
No i peri e i persegghi,  
No i campi fertili,  
No ste petegole  
Che va a far tombole  
Soto a le pergole,  
Che va a distruggerne  
Senza costruto  
L' ua venerabile,  
Quel sacro fruto.  
Salvo quel netare  
Che dà l' autuno,  
Vita dei omeni,  
Piacer d' ognuno,  
Tuto xe frotole  
E romanzeti  
De sti poeti,  
Che fa sussuro  
Co ste so favole,  
Ma che dal muro  
No cava un ragno, »  
In ton da catedrala  
Disea un bevagno ;

E in sto dir col goto pien,  
Co un bocai che a e che vien  
Con un resto de brisiola  
De bon porco e primariola,  
Del formagio e la noseta  
L' a cantà sta canzoneta : —  
« In fra i dei che da la favola  
Vien ficai nel Panteon,  
Baco solo se lo merita,  
Che xe el vero, che xe 'l bon.  
Per la fragia dei bevagni  
La marmagia dei imortali  
I xe giusto tanti scagni,  
Tante crepe de bocai

Da trar fora del balcon.  
Co l' aurora el cielo ilumina,  
E i prai torna a incolorir,  
Carateli e bote visito,  
E ogni vin vogio sentir ;  
E a la bela dea lusente,  
Goto in man, mi ghe domando,  
Asta visto là in Oriente  
Un rubin più rosso e grandio  
Del mio naso a comparir ?  
Se i me vien co fasso bacara  
Cento guere a dichiarar,  
De la tera el più gran despota  
No me degno de ascoltar.  
Gnente a tola me spaventa,  
E co bevo un vin picante,  
E che in ciel fulmini senta,  
Digo a Giove fulminante :  
El mio amor te fa tremar.  
Se mai morte la terribile  
Me farà chiocho finir,  
De scamparghe no desidero  
E go gusto de morir.  
Andarò a la spiaggia averna  
A imbrigar Megera e Aleto,  
E voi verzer 'na taverna  
De Pluton nel gabineto,  
Ch' el mega da benedir.  
Sto grazioso e caro netare  
I demoni vincerà.  
E i demoni e 'l re dei diavoli  
Lodi a Baco cantarà.  
Voi che Tantalò se goda,  
Che anca lu a la fin se sguazza,  
E a Ission su la so roda  
Vogio darghene una tazza,  
Che un tantin lo quietarà.  
No de marmo, no de porfido  
Un sepolcro gavarò,  
Ma una bota, e fra la gripola  
El gran sono dormirò.  
Sia scolpio su la so base  
El mio goto, quel più grandio,  
E sia scritto : « Dorme in pase  
L' imbragion più venerando  
Ch' abia visto el sol qua zo. »  
Vegnarà, za no lo dubito,  
L' otavario a celebrar

Più imbrighi, strassinandose  
 Le mie ceneri a onorar ;  
 E per far un' ecatomba,  
 Che a sto mondo me immortali,  
 La mia bota, la mia tomba  
 Co tresento e più bocali  
 I me vegnarà a sguazzar.

## LUNA DE ZUGNO.

Vu, che avè el cuor zentil,  
 Vu, dolci amariti,  
 Vu, che ve amè costanti  
 Sin dal più verde april,  
 Za che se mostra in ciel  
 Sora d' ogni altra stela  
 Piena d' un dolce miel  
 Cinzia la bela,  
 Za che mai più cussì  
 Seren el viso,  
 Nè grato xe stà 'l riso  
 Come che l'è in sti dì,  
 Vegni qua su sto pra  
 Da sti russei frescheti,  
 Da sti verdi boscheti  
 Intorno circondà;  
 Vegnila a venerar,  
 Vegni a sentir in peto  
 Quel che la sa ispirar  
 Divin afeto!  
 Vardela su quel col,  
 L'è arzento puro:  
 Ga da invidiarla el sol,  
 Mi son sicuro.  
 E vardè là, vardè  
 Fra quei lauri odorosi,  
 Fra quei mirti amorosi  
 Come a trati la xe!  
 Come vien a interzar  
 L' ombra l' arzento,  
 Come la va a scherzar  
 Fra i rami drento.  
 Oh d' ogni amante cuor  
 Serenatrice;

*Racc. Poes. Ven.*

Oh ti consolatrice  
 D' ogni amoroso ardor!  
 Risplendi sempre in ciel,  
 Mai no robarte,  
 No portarghe sto fiel  
 A chi sa amarte.

## LUNA DE SETTEMBRE.

Proprio un azzal xe el cielo,  
 Un specchio el mar tranquilo,  
 L' aria no move un filo,  
 Xe moderà el calor.  
 La luna, come brasa  
 Nata del mar là in fondo,  
 De secondo in secondo  
 Scolora el so rossor.  
 Eco, color de l' oro  
 La par in sto mumento;  
 Eco, la par d' arzento,  
 Ecola a dominar.  
 Scampa dal ciel confuse  
 Le più brillanti stele,  
 Che d' esser manco bele  
 Le stenta a tolerar.  
 Del mar la se fa specchio,  
 La fissa el viso belo,  
 E 'l mar un altro cielo  
 Se vede a comparir.  
 Ste rive, ste vignete,  
 E quanto se presenta,  
 Tute le se inarzenta,  
 Le gode al so aparir.  
 La luse, che modesta  
 La manda su l' ogeto,  
 Fa che ne resti in peto  
 Qualcosa da bramar.  
 Crearse in un tal stato  
 Pol l' anima sicura,  
 Più bela la natura  
 La so creatura amar.  
 Radopia, o cara Eurila,  
 Sto portentoso incanto,  
 Toca quel' arpa, e al canto  
 Unissila d' amor;

Cinzia te lo dimanda,  
 Che benchè casta anch' ela,  
 D' amor la fiamma bela  
 Un di ga scaldà 'l cuor!  
 Varda! el so raggio adesso,  
 Xe proprio sul to peto;  
 Un amoroso afeto  
 No te se svegia in sen?  
 De mi no parlo, o cara,  
 Che inutile xe ogn' arte,  
 Gnente no so ispirarte ....  
 E pur, mio caro ben,  
 Pur te amarò costante ....  
 Ma qual incanto novo?  
 In mi più no me trovo ....  
 Ti è un paradiso, sì ....  
 Co appassionae ste voci!  
 Da che armonia interote!  
 Dopo una de ste note  
 Che se vergogni el dì.

## I N O

## A LA MORTE.

Ti, dea terribile,  
 Ti, dei mortali  
 Arbitra e despota  
 Senza rivali,  
 Ti, che ti domini  
 La tera e 'l mar,  
 Ti, che le porpore  
 E le corone,  
 Che al pien dei omeni  
 Tanto ghe impone,  
 Coi sachi e i zocoli  
 Ti sa missiar;  
 Ti, che l' imperio  
 De la fortuna,  
 Che me perseguita  
 Sin da la cuna,  
 Da formidabile  
 Ti sa domar;

Ti, che quei stimoli  
 Discordi tanto,  
 Che porta i omeni  
 De pianto in pianto,  
 Che li fa martiri,  
 Ti sa quietar;  
 E ti, che al misera  
 Senza conforto  
 Co man benefica  
 T' insegni el porto,  
 Ti, dea terribile,  
 Voi celebrar.  
 Quanto xe stolidi  
 Chi destruttrice  
 Te chiama, o provida  
 Generatrice!  
 Quanto i xe deboli  
 Nel so pensar!  
 Dal di primissimo  
 Che sui mortali  
 E falce e fiacola  
 E l' arco e i strali  
 T' à dà 'l trifalmine  
 Per dominar,  
 In tanti secoli  
 Ch' el mondo zira,  
 L' imenso numero  
 De chi respira  
 S' à visto simile  
 Sempre a restar.  
 No ti è che pausa  
 De la natura;  
 Se un omo termina  
 La specie dura;  
 E specie e generi  
 Ti fa tornar;  
 Che quel che regola  
 Sto nostro mondo  
 Quanti individui  
 Vive qua in fondo  
 Come tanti atomi  
 Sa contemplar.  
 E quella fiacola,  
 Che ne destruze,  
 In miera d' esseri  
 Spande la luse,  
 E in miera d' esseri  
 Ne fa cambiar. (138)



Ma ne l'empireo,  
Ma ne l' inferno  
Nume più provido  
Nel so governo  
Chi sa trovarmelo,  
Chi 'l sa idear ?

Forse un Prometeo,  
Che vita e forma  
Ga dà a la polvere  
Che ne conforma,  
Che ragionevoli  
N' à bu a crear ?

Che a virtù languida  
L' à insieme unito  
Ogni delirio,  
Ogni prurito,  
Che l' imbramabile  
Ne fa bramar ?

Ah ! quanto infausto  
Sia sta ogni dono,  
Le tante supliche  
Che ghe al to trono,  
Dea potentissima,  
Lo sa provar.

Sarè giustissimi  
Numi del cielo,  
Ma impenetrabile  
Destendè un velo,  
E lassè un adito  
De mormorar.

Morte al contrario  
Senza mistero  
Dona benefica,  
Sempre sincero,  
Sempre giustissimo  
Xe el so operar.

Ela a la gloria  
Salva i mortali ;  
Dal precipizio,  
Dai più gran fali,  
La virtù debole  
La sa salvar.

Vedo Virginia  
Pretesa schiava ;  
Vedo el decenviro  
Che za trionfava,  
Su la so vitima  
L' è per piombar,

L' è per distruggerghe  
L' onor, la gloria ;  
Ma ti, la vergine  
A la vittoria  
Dal vituperio  
Ti sa portar.

Chi mai de un Dario  
Là in Arabela  
La funestissima  
Iniqua stela,  
Che lo perseguita,  
Chi sa placar ?

Forsi quei providi  
Celesti numi,  
Che tanti spasemi,  
Che 'l pianto a fiumi  
Dei so fioi miseri  
No sa tocar ?

Dal stato orribile  
De schiava vita,  
Dal vituperio  
D' una sconfitta  
Ti sola, o provida,  
Ti 'l sa sotrar.

E l' invincibile  
Che l' à desfato,  
Per tanti secoli  
Chi è sta che à fato  
Grando e magnanimo,  
Chi 'l fa onorar ?

Ah ! de la gloria  
Che lo iragiava  
El lume vivido  
Za za oscurava  
Vizio e tiranica  
Sè de regnar.

Se 'l nome celebre  
La fama spande,  
Se quel Macedone,  
Se chiama el grande,  
Soto el to fulmine  
Lo fa chiamar.

Quel pare misero  
Fra quatro fioli,  
Che no ga un' anima  
Che lo consoli,  
Che le so lagreme  
Xe 'l so disnar,

Che smunta e macera  
 Su quatro strazzi  
 Vede puerpera  
 De tre regazzi  
 L' infelicissima  
 Che lo sa amar,  
 Che va slanzandoghe  
 In fra el sangiotto  
 De le ochiae languide  
 Senz' altro moto,  
 Me par de vederlo  
 Morte a invocar ;  
 Me par de vederte  
 Morte pietosa,  
 Gnente teribile,  
 Gnente sdegnosa,  
 Quei miserabili  
 A consolar.  
 Me par de vederte  
 Soto altro aspeto,  
 Sempre benefica,  
 Giusta in efeto,  
 La falce e 'l fulmine  
 Adoparat.  
 Vedo i Dionisi,  
 Vedo i Neroni,  
 Vedo i Caligola  
 Zozo dei troni  
 Per ti la polvere  
 A morsegar.  
 Chi dai pestiferi,  
 Chi ne purgava ?  
 Forsi el trifulmine  
 Che i consacrava,  
 E che intangibili  
 Ne i fa trovar ?  
 Te onoro e venero,  
 Divin Petrarca,  
 E dolci lagreme  
 Spando su l' arca  
 Che le to ceneri  
 Sa conservar ;  
 Ma, oh dio ! perdonime,  
 Perchè mai dirne :  
 « Le più bel' anime  
 La va a rapirne,  
 Le triste e perfide  
 La sa salvar ? »

Da la to Laura  
 Ti P' à pur vista,  
 Senza quel' orido  
 Che la fa trista,  
 Ti à sentio placida  
 Morte a parlar :  
 « L' imparegiabile,  
 La dona eleta,  
 Prima che istabile  
 Fortuna meta  
 Nel miel l' assenzio,  
 Vogio eternar. »  
 Oh ! quante Laure  
 Che da fortuna  
 Sempre volubile  
 Nela laguna  
 De tanti secoli  
 Ti à bu a sotrar !  
 L' ingiusto e 'l perfido  
 Ti sola teme,  
 E al miserabile,  
 Che oppresso geme,  
 Fa manco barbara  
 Sorte provar.  
 E là nel' erebo,  
 Là nel' eliso,  
 Dove el reo crucia  
 Da nu diviso,  
 Dove se premia  
 Reto operar ;  
 Per ti nel' erebo  
 La colpa fioca ;  
 Beatitudine  
 Per ti ne toca,  
 E un novo secolo  
 Ne fa trovar.  
 Dea potentissima,  
 Solo conforto  
 De chi fra 'l turbine  
 Sospira el porto,  
 Benigna ascoltime,  
 No me sdegnar :  
 Sì, dea teribile,  
 Sì, dei mortali  
 Arbitra e despota,  
 Tronca i mii mali,  
 Ti che ti domini  
 La tera e 'l mar.

## A P O L O G H I.

## EL MEDICO.

Un signor opulente,  
 Che de saver chi 'l sia no importa gnente,  
 Dise un zorno al so medico : « Senti,  
 Dotor mio caro, quel che trovo in mi,  
 E che no so spiegar :  
 Mi no son uso de disordinar,  
 Son ben costruto e san,  
 Co magno mi divoro come un can,  
 Mi no servo al capriccio, nè a l' usanza,  
 E magno roba che pol dar sostanza,  
 Epur per mia vergogna  
 Ogni zorno devento più carogna. —  
 — La m' à fato l' onor  
 ( Risponde sior dotor )  
 De invidarme più volte al so disnar,  
 E mi no l' ò mai vista a mastegar,  
 Onde co l' opinion de boni autori ...  
 Ma lu interrompe, come fa i signori,  
 Disendo gentilmente :  
 No, no xe vero gnente,  
 Ma s' anca fusse, ò sempre sentio a dir,  
 Caro dotor, ch' el cibo à da nutrir. —  
 — E chi no l' à da dir ?  
 Cazza ! i putei lo sa ;  
 Ma col vien preparà,  
 Triturà, masenà,  
 Dal che ghe ne vien drio  
 Che essendo facilmente digerio  
 In sugo e in sangue passa ;  
 E questo è 'l caso che chi magna ingrassa,  
 Ma imbecà e divorà,  
 Come vostra celenza à sempre usà,  
 No per dio Baco che nol fa bon pro,  
 Ch' el se corompe in corpo, e 'l passa zo. »  
 Vu altri che leze  
 Tanti gran libri, o sia che li passè,  
 Vorave, se podessi,  
 Che sta istoriela a mente la imparessi.

## AMOR SUBLIMA'.

Sempre in quei tempi vechi che savè,  
 E che nissun credè,  
 Ma che ghe sarà stai  
 Se de lori ne parla  
 Anca i libri stampai,  
 Ghe gera do cavaì  
 Un maschio, e st' altro femena,  
 Che avendose incontrà  
 Al pascolo in t' un pra,  
 S' à ochià, s' à sfiorizà,  
 E dopo qualche smorfia  
 Un po de ben voler i s' à chiapà.  
 Sto amor ghe xe cressù  
 E i s' à amà che mai più ;  
 Ma seguitando i moti  
 Che se dise del cuor,  
 O vero sia l' istinto,  
 Che n' à messo el Signor,  
 No ghe gera un quarelo  
 D' erba fresca e fioria  
 Dove no i se trovasse in compagnia.  
 Se una fontana chiara  
 In mezzo la campagna,  
 Gera in bota avisà  
 El so caro compagno,  
 Che l' andasse con ela a beber là.  
 Al sol, a la frescura,  
 A l' erba, a la verdura,  
 E in ogni logo no ghe gera falo  
 Voleva la cavala el so cavalo.  
 Quando amor invidioso  
 D' una tanta dolcezza,  
 Vien dito, che al cavalo  
 Gabia impiantà 'na frezza,  
 E dopo esser ferio  
 El s' abia inasenio.  
 In fati el s' à sentio  
 Un no so che nel cuor,  
 Che sti siori platonici  
 Ghe va chiamando amor.  
 Gh' à parso ch' el cavalo,

Anemal valoroso,  
 Nobile generoso,  
 No l'avesse d'amar  
 Cussi, senza stimar,  
 Senza trovar in tel amato ogeto  
 No so che de perfeto;  
 L' à donca stabilio  
 De amarla e de stimarla,  
 Ma nol podea spantarla,  
 Perchè la so cavala  
 Gera bela, ben fata,  
 Afetuosa, garbata,  
 Andando de ghinea  
 La pareva una dea,  
 Ogni passo la fava;  
 Ma debole de gamba  
 Che ogni fià la cascava,  
 (Difeto nei cavai  
 Pezzo, per quel che i dise,  
 Dei altri cinque obligai)  
 E ghe gera un de più,  
 Che no la se voleva tegnir su,  
 Disendo che natura  
 La chiamava a cascar,  
 E che no la se ga da contrariar;  
 Che tuti i cavai casca o poco o tropo  
 De troto o de galopo,  
 E che se forti in gamba  
 Tanti da nu se crede  
 Xe perchè no i se vede,  
 Perchè sti satraponi  
 Fa parer salti in fin i tomboloni.  
 Sto cavalo imprudente,  
 Un dì ch'el gera ardente,  
 Ga dito a la cavala:  
 « Sapi che te amo assae,  
 Ma no de amor de stala;  
 L'è de quel fin che mai se possa dar,  
 Sapi, cavala cara,  
 Che te vogio stimar. »  
 No aveva la cavala mai pensà  
 A sto amor sublimà,  
 Ma da lu ricordà  
 Nel cuor se ga svegià  
 Un sentimento a sta sublimità;  
 E ga dito: « Sior sì, vogio provar  
 Cossa che xe un amante  
 Che me sapia stimar, »

E voltada al cavalo  
 L' à dito: « no far falo,  
 Sastu, stimime assae,  
 Perchè mi son de quele  
 Che ga da esser stimae. »  
 Ogni zorno che insieme  
 O i magnava, o i trotava,  
 O pur che i se sguazzava,  
 Ela ghe dimandava:  
 « Caro cavalo mio,  
 Me stimistu? » e 'l cavalo  
 Ghe rispondeva: « Ohi dio! ....  
 Ela credeva quanto!  
 E la se compiasava de sto impianto.  
 Quando che un zorno alfin,  
 Dopo d'esserse stai ben da vicin,  
 La dise: « ti me stimi,  
 Cavalo, no xe vero?  
 Via parlime sincero. —  
 — Sì, cara, voi stimarte,  
 (Lu risponde) e adorarte. —  
 — Ti vol .... donca al presente  
 No ti me stimi gnente. —  
 — Sì, ma sapi go un cuor  
 Indegno del to amor. —  
 — Eh! questi xe pretesti;  
 Curte, ti m' à da dir  
 Se veramente stima  
 Ti sa per mi sentir. »  
 Nol se pol più tegnir;  
 El ghe dise che 'l ga  
 Nel so cuor una gran contrarietà;  
 Che 'l vorave stimarla,  
 Ma che 'l sente per tuto a placitarla,  
 Fin dai so amici istessi  
 Per cavala de gamba tropo lasca,  
 E che ogni quatro passi  
 La scapuzza o la casca,  
 E che lu stesso à visto  
 Far qualche sesto tristo,  
 Onde che lu voria  
 Vederla ben guaria,  
 E che la xe una cossa  
 Che la podaria far,  
 Basta che la se usasse a sostentar.  
 La sa messo a cigar,  
 La ga trato scalzae,  
 E la ga fato mile cavalaie;

E la ga dito : « Porco,  
 Ti che ti xe più brutto assae de l' orco,  
 Che no ti è degno de tocarme un pelo,  
 Cussì ti pensi, e ti vol farme el belo ?  
 Perchè da quatro strupi de cavali,  
 O da qualche cavala  
 Refudo d' ogni stala  
 Te vien dito de mi,  
 Subito porco, mulo,  
 Ti à da pensar cussì ?  
 Impara a rispetarme,  
 Onorarme e stimarme  
 Se ti mē vol amar,  
 Se no, mostro del diavolo,  
 Vate a far gazerar. »  
 Basta, l' à ben pregà,  
 E la scena quel zorno s' à giusta ;  
 Ma da quel zorno in qua  
 Ghe xe sta barufete,  
 Museti, parolete,  
 Morsegae, scalzadine;  
 Dispetti, romanzine ;  
 In soma, no i magnava quel bocon  
 Che prima, overo dopo,  
 No i se avesse da dar un morsegon ;  
 E tuto per l' afar  
 De amar e de stimar.  
 Quando quel di teribile  
 S' à visto a capitar,  
 Che 'l cavalo ga dito  
 Con un viso da afrito,  
 Che in tal logo, in tal ora, in tal zornada  
 L' à dà 'na scapuzzada,  
 E che la xe cascada ;  
 La fiaba è terminada,  
 Che in vista de sta racola  
 Convinta e indispetida la cavala  
 La l' à scazzà per sempre dala stala.  
 Da sto strazzo de afar  
 Un moralista podaria cavar,  
 Che quei che vol star ben  
 Toga le cosse come che le vien.

## I S O R B E T I.

Dimandando a un cortesan,  
 Che ogni cossa ga per man,  
 Che nei afari de sto mondo  
 El procura andar al fondo,  
 La rason perchè l' amor  
 Tante forme el sapia tor,  
 Ma in un modo, che capir  
 Nol se pol, nè definir,  
 Sento a dirme : « vegnì qua,  
 Al caffè de la realtà,  
 Un sorbeto bevarè  
 E l' amor conoscerè. —  
 — Vado; el dise : cossa ghe ? —  
 I risponde : — Framboè,  
 Cedro, ribes, maraschin,  
 Moscatela, canelin,  
 Dela vissola, del persego,  
 Del farsido, dela fragola : —  
 — Basta ; fragola, disemo,  
 E bevemo ;  
 E bevendo el dise lu :  
 « Caro vu,  
 Sti sorbetti che xe stai  
 Dal ragazzo nominai,  
 Xeli ognuno diferente ? —  
 — Che dimanda ? no i se sente ? —  
 Sì, ma el corpo, o per dir megio,  
 Quela cossa che i sostenta,  
 Che diventa  
 La so essenza, in conclusion,  
 Cossa xela ? — L' è 'l limon. —  
 — Ben ; l' amor xe vanità,  
 Xe interesse, xe pietà,  
 L' è amicizia, platonismo,  
 Tenerezza, magnetismo ;  
 Ma l' essenza, in conclusion,  
 Xela altro che limon ? —  
 So restà come un minchion.

## EL MORTER E LA MAZZA.

De le volte spassizzando,  
 E baucando,  
 La gnagnera che go vadu passando,  
 E l' altro zorno aponto,  
 Che la gaveva proprio maledeta,  
 Me so trovà in piazzeta,  
 E osservando per spasso  
 Una botega là soto la zeca,  
 Dove va, per esempio, la Baleca (139),  
 Momolo dai zaleti,  
 Quel che vende oseleti,  
 E in fin la pevarada (140)  
 A beber la semada,  
 M'ò fermà s' un morter,  
 Che tegniva davanti el cafetier,  
 Tuto sfeso e sbecà,  
 Deslavrà, magagnà,  
 E che pareva za un' antichità,  
 Co drento una gran mazza,  
 Che gera tuta strazza,  
 Macada, desfilada,  
 E che fra poco tempo  
 No i l' avarave za più doparada;  
 E go dito al fachin  
 Che gera là vicin:  
 « L' è in cao sto to morter. —  
 — La se ingana, el risponde,  
 El fa ancora dies' anni el so mistier.  
 Sala che cussì sfeso e magagnà  
 L' à frùà trenta mazze  
 De quele che xe là: —  
 — Minchioni, ò replicà,  
 Ghe cavaremo la moralità. »  
 E go dito cussì,  
 Parlando in fra de mi:  
 « Omeni, ricordeve  
 Più d' una volta al dì,  
 Che un morter desbecà,  
 Deslavrà, magagnà,  
 E che deboto xe un' antichità,  
 El resta ancora là,

E ch' el vien doparà;  
 Quando che trenta mazze,  
 Benchè nove de trinca,  
 Xe stae ridote in strazze. »

## L' OMO GRANDO E 'L PICOLO.

Gh' era un paese al mondo  
 (Che 'l nome no lo so  
 Perchè no lo ricordo,  
 Ma se mai, ve premesse el savarò )  
 Del qual i so abitanti  
 No solo gera manco de ziganti,  
 Ma de una tal statura,  
 Che per esempio a un ussario  
 No i ghe arivava gnanca a la cintura.  
 Col trapassar dei ani  
 Xe nato, che qualcun de sti paesani  
 Metendose a viazar  
 In sti nostri paesi à bu a arivar,  
 Ma co i s' à visto in linea de statura  
 Far una miserissima figura,  
 I à pensà de slongarla.  
 Per quanto ch' i à possù  
 La testa i à drezzà su,  
 I à trato el peto in fora,  
 I à ritirà el martin,  
 Marchiando sempre in punta de scapin;  
 E co 'sto studio, dopo aver strussìà,  
 Tre quatr' once i s' à alzà,  
 Senza però schivar  
 El rider de la zente  
 E 'l rischio de cascar.  
 Co a casa i xe tornai,  
 Fra i costumi portai,  
 I à messo in moda questo,  
 Che in verità à piasesto,  
 Perchè co sto slongarse de statura  
 Ghe pareva de far meglio figura,  
 Ognun sta nova moda a volsù tor,  
 E l' à fato furor.  
 Intanto un viaggiator  
 De sti nostri paesi xe arivà  
 Anca in quel logo là;  
 Che quantunque nol fusse

D'una statura stramba e gigantesca,  
 El podeva a quei stropoli  
 Magnarghe i macaroni su la testa.  
 Al so primo arivar  
 Tuti l'è buo a stimar ;  
 Ma quando ch'i l'è visto a caminar  
 Senza studio, a la bona,  
 Co tuto el pie pusà,  
 E senza donar gnente a la persona,  
 I à dito: « Che pechè,  
 Che un ometo, che xe piutosto grandò,  
 Vada co sto mal sesto caminando! »  
 E uno fra quei tanti  
 Se gh'è fato davanti,  
 E à buo el coraggio de parlar cussi:  
 « Perchè no camineu, sior, come mi?  
 Per cossa no ve alzeo? —  
 — Infelice Pigmeo,  
 Ga risposto ridando el forestier,  
 Chi è grandò no à bisogno de parer.

## LA DEA E L'OMO.

Una dea del terzo cielo,  
 Vegnindo a spasso in tera,  
 S'avea degnà de amar un pastorelo,  
 E per quanto pol far  
 Una dea con un omo  
 La lo saveva amar.  
 Vu ve podè pensar  
 Qual fusse in sta aventura  
 El stato d' una povera creatura.  
 Infiamà,  
 Passionà,  
 L'avaressi osservà  
 Qualche volta avilio  
 Qualch' altra imatonio,  
 E gh'è sta dei mument  
 Che l'è credesto deventar un dio.  
 Povero barbagian!  
 Chi xe uman reſta uman;  
 Sta dea, stante el deismo,  
 Viveva suso in cielo,

*Racc. Poes. Ven.*

Ma la se fava veder  
 Anca dal pastorelo.  
 Un di la dise: - « Puto,  
 Te voi felicitar,  
 E vogio che ti vegni  
 Doman co mi a disnar. »  
 Penseve l'alegrezza  
 Che in elo l'è provà!  
 Quel di no l'è disnà,  
 Nè la sera cenà  
 Per farse onor co sta divinità.  
 Co le idee che 'l gaveva  
 El bon pastor credeva,  
 Che come i dei coi omeni  
 In tuto i ghe va avanti,  
 I magnasse da manzi o da elefanti.  
 Vien l' ora, e in certo sito,  
 Che la gaveva dito,  
 La lo stava a aspettar  
 E lu, senza falar  
 Un minuto secondo,  
 El trova là un palazzo  
 De quei che no gh'è al mondo.  
 Sta dea donca riceve  
 L'ogeto del so amor,  
 Come che de un Tabaro (141)  
 Farave un Senator,  
 Con un'aria ridente,  
 Ma che no è confidente,  
 Con espression de afeto,  
 Ma che vien da la testa e no dal peto,  
 E con un tal contegno,  
 Che de una dea xe veramente degno.  
 El nostro pastorelo  
 Sta là come un putelo,  
 El teme de parlar, de alzar i ochi,  
 E ghe trema i zenochi;  
 Ma el pensier lo ricrea  
 De magnar la manestra  
 Co la so cara dea.  
 Xe in tola. Oh ch'è possae!  
 Che piati, che terine  
 Tute quante storiæ!  
 Che parecchio curioso!  
 Che deser delizioso!  
 Che vasche, che bei fiori!  
 E dai piati che odori  
 Che se fava sentir!

El pastor za scomenza a sgangolir.  
 La dea co le so man  
 Vol darghe da magnar al nostro uman;  
 Ma quando el mete in boca  
 Gnente el palà ghe toca,  
 Che d' una spezie d' etare ogni piato  
 A l' usanza divina gera fato.  
 El so gusto ghe gera,  
 Ma el palà del pastor, fato de tera,  
 No podega sentir  
 I sali impercetibili  
 Che lo andava a ferir.  
 Pur el fa finta per riputazion  
 De magnar de quei cibi  
 Co tuta divozion,  
 Ma da la fame orenda  
 Za diventà rabioso  
 El lassa alfin sul piato  
 Ogni cibo prezioso.  
 La dea, che se ne acorze,  
 Dimanda al pastorelo,  
 Perchè nol magna quel che i magna in cielo;  
 El se trova intrigà,  
 Risponderghe nol sà;  
 Ma pur incoragio  
 Dal titolo de amante,  
 El dise: Fia de un dio,  
 Me par che lo gavevi da saver  
 Che mi son tera, e che vu sè pensier;  
 E che dovevi, avendo da trattarme,  
 O umanizarve, opur divinizarme. »  
 Se no temesse, amici, de chiamarme  
 I castighi del cielo,  
 Co l' esempio del nostro pastorelo  
 Vorave ste divine consegnar  
 De farse venerar  
 O in prussion, o sora d' un altar;  
 Ma a no far la sempiaa  
 De smorosar coi miseri mortali  
 No dandoghe che pranzi celestiali.

## TELEME E MACARI

OSSIA

## EL DESIDERIO E 'L PIACER.

*Parafrasi d' un' ode de Volter.*

Xe Teleme una ragazza  
 Tuta brio, tuta vivezza;  
 Ma ch'è stada sempre avezza  
 A bramar più del dover;  
 Ela in tuto la stravede,  
 Nè mai pase la possede.  
 Questa amava un regazzoto  
 Diferente assae d' umor,  
 Fresco e belo come un fior,  
 E seren come el bel dì;  
 Noia e gusto troppo forte  
 Gera odiai da lu a la morte.  
 De più dolce del so sono  
 No se pol imaginarse,  
 Nè più bel del so svegiarse;  
 L'è un incanto po fra el dì.  
 Nome Macari lu ga  
 E da tuti l'è bramà.  
 La ragazza intolerante  
 Co secae lo tormentava,  
 I rimproveri fiocava,  
 La voleva adorazion;  
 E lu stufo, disparada  
 A ridando el l' à lassada.  
 Come storna la coreva,  
 Rossa in viso quanto el fogo,  
 A cercar per ogni logo  
 L' infedel, ma caro ben,  
 Che ghe gera un gran tormento  
 Senza lu star un mumento.  
 La va subito a la corte,  
 La dimanda a questo a quello:  
 « Aveu visto qua el mio belo?  
 Ghe xe Macari, el mio amor? »



I soride a sta dimanda  
 E i se volta d' altra banda.  
 Un fra lori più compito  
 Co la ganga-de la corte  
 El ghe dise: « Fia, per sorte,  
 Sto Macari che cerchè  
 Xelo un can o un oseleto?  
 L' aveu perso povareto? —  
 — Sto bel puto che mi cerco  
 No ga macola o difeto,  
 Questo è l' omo più perfeto  
 Che se possa mai trovar;  
 Odio mai l' à conossù,  
 E nissun mai l' à odià lu;  
 Co bon senso lu ragiona,  
 Nè sospeto, nè timor,  
 No l' à mai cambià d' umor,  
 Nè geloso mai l' è stà: —  
 — Omenoni de sta sorte,  
 Cara fia, no vive in corte.  
 La va in bota a la cità,  
 La se imbate in t' un convento,  
 E la dise: « Pur qua drento,  
 Me dà el cuor, ch' el sia vegnù.  
 Quela so tranquillità  
 Me fa creder ch' el sia qua. »  
 El prior col colo storto,  
 Tuto miel e tuto unzion,  
 El ghe dise: « Xe un pezzon  
 Che se aspeta sto bon fiol;  
 Ma per nostra mala sorte  
 No l' à mai batù a ste porte.  
 Le visilie, el tempo perso,  
 La discordia e l' astinenza  
 De aspetarlo in ricompensa  
 S' à dovado soportar. »  
 Salta suso là a la presta  
 Un fratin radà la testa:  
 — « Tralassè d' andar atorno  
 Perchè, fia, se no i me ingana,  
 No ghe xe tanta bubana  
 Qua in sta vale d' affizion;  
 Tanto bon e tanto belo  
 Nol pol esser che su in cielo. »  
 Sto discorso impertinente  
 Mete in colera Teleme:  
 « Vegnì qua, padre, ascolteme,  
 La ghe dise co furor,

Quel che al cuor me fa la guera  
 Ga da viver qua in sta tera;  
 Per mi certo lu xe nato,  
 Che i se averza pur la gola,  
 Mi ò da esser, sì mi sola,  
 L' elemento del se cuor. —  
 — Chi v' insegna a un' altra via  
 Ve minchiona in fede mia. »  
 La se parte dal convento,  
 E la tenta un altro passo;  
 Là lo cerca in tel fracasso,  
 Fra la crapula, fra el vin;  
 La ghe pensa suso dopo,  
 E la dise: « Qua nol topo.  
 Fra i bei geni de Parigi,  
 Sì tra quei che l' à depento  
 Cussi pien de sentimento,  
 Cussi caro, e cussi bon,  
 L' à da esser senza fallo;  
 Che se no, dove saralo? »  
 Un de lori in confidenza:  
 « Bela puta v' inganè,  
 El ghe dise, se credè  
 Che 'l se trovi qua co nu,  
 Co dei versi el depenzemo,  
 Ma, ste su, nol conossemo. »  
 Via la core, e la se trova  
 Al palazzo del pretesto:  
 « Leva i ochi e passa presto;  
 La se dise, qua no ghè  
 In sto logo abominabile  
 El mio Macari adorabile.  
 A stimar che el fusse in corte  
 No pensava da putela,  
 Qualche cossa gh'è de bela  
 Che pol forse lusingar;  
 Ma nemici soi mortali  
 Ga da esser i curiali. »  
 Al gran tempio de Ramò,  
 Da Melpomene e Talia  
 Sta ragazza la se invia,  
 E la dise: « Là el sarà;  
 Ghe xe l' opera da novo  
 E per certo mi lo trovo. »  
 Là i la invida a una ceneta  
 De persone giovialissime  
 De bon ton, delicatissime,  
 Che par fate per star ben.

Questa xe la coteria  
 De la bona compagnia.  
 Uua copia a prima vista  
 Del so Macari i ghe par,  
 Ma più i cerca d'imitar  
 Le so grazie, e parer lu,  
 Più la i scovre andando avanti  
 Dal so Macari distanti.  
 Disparada alfin Teleme  
 Stufa e stanca de cercarlo,  
 Senza mai però trovarlo,  
 La se torna a ritirar  
 In quel logo, che una volta  
 Cussì ben l'avèva acolta.  
 Oh! che caso inaspetato  
 Xe per ela, oh che diletto!  
 Trovar Macari al so leto  
 Che la stava là a aspetar;  
 Che sorprenderla voleva  
 Quando manco la credeva.  
 Co un parlar dolce e soave,  
 El ghe dise « Mia Teleme,  
 Vivaremo sempre insieme  
 Da qua avanti se ti vol,  
 Ma ti el grilo non aver  
 De bramar più del dover.  
 Sarò too se a ti te piase,  
 Tuto a ti vogio donarme,  
 Ma no star a domandarme  
 Più de quel che te voi dar. »  
 E in sto dir streti i se abbrazza  
 El ragazzo e la ragazza.  
 Cossa sia Teleme e Macari  
 Savarà senza fadiga  
 Chi sa tolto un po la briga  
 Lingua greca de studiar,  
 E in sto emblema vedarà  
 Quel che a l'omo è destinà.  
 Ti ti xe, Macari caro,  
 Quel che sempre nu bramemo,  
 O che miseri perdemo  
 Per volerte tropo ben.  
 Mi za spero de goderte,  
 E me par de possederte,  
 Ma de dirlo assae me vardo,  
 Che se averlo alcun se vanta  
 Dal so sen l'invidia el schianta,  
 Lo fa gramo deventar;

Che per goder tanto ben  
 Saver scondersi convien.

## LA VERITÀ

Vien dito che 'l dio Celo,  
 O un altro che ghe gera,  
 Che à fabricà la tera,  
 I pianeti, e le stele,  
 E tute st'altre cosse o brute o bele,  
 (Fra le quali gh'è l'omo,  
 Che per parlar sincero xe un gran tomo )  
 L'avesse anca creà  
 Certe divinità,  
 E fra le altre una tal,  
 Che 'l gavea messo nome Verità.  
 Questa doveva el mondo iluminar,  
 L'ordine conservar,  
 Assister i mortali,  
 E far ch'ogni creatura  
 Facesse in sto teatro,  
 Per quanto che se pol, bona figura.  
 Le xe vegnue qua in tera,  
 E eseguindo de Celo l'intenzion,  
 Per quanto le à podesto  
 Le ga fato fazon.  
 Mi no ve parlarò  
 De quel che le abia fato,  
 Tante cosse no so,  
 Ma de la Verità,  
 Za ch' i me l'à contà,  
 Ve dirò su un caseto,  
 Che quantunque strambeto,  
 Se de ascoltarlo, amici, ve degnè,  
 Son certo che 'l so dreto ghe catè.  
 Sta Verità è una dea  
 Soto umana figura,  
 Ma d' un'altra natura;  
 D'una bela statura,  
 Maestosa, ben piantada,  
 Magra, ma no scarnada;  
 Se pol in t'una ochiada  
 I so vasi, e i so muscoli osservar,

E no ghe xe putelo  
 Che no la sapia a vista disegnar.  
 Co una so sola occhiada  
 La busia vien copada,  
 L'arte perde el color, a ogni mistero  
 Ghe casca el velo, e 'l resta un blitri, un  
 Co s'altre dee, che gera le virtù, (zero.  
 Nei primi dì del mondo  
 Anch'ela xe vegnuda a star co nu;  
 ( Cioè co quei d'alora,  
 Dai quai, stante le croniche,  
 Nu semo vegnui fora )  
 E con piacer dei omeni  
 E soa sodisfazion,  
 L'è fato per un pezzo ogni funzion.  
 In fati no ghe gera  
 Chi facesse per forza bona ciera,  
 No ghe gera un strupia  
 Che se credesse dreto e ben piantà,  
 Un vechio zovenoto,  
 Un che scondesse soto  
 D'una bela croata  
 Un gosso grandò come una pignata,  
 Una vechia gabrina  
 Che se credesse Nina,  
 No culeti postizzi,  
 No impiastri, no pastizzi  
 Da far slissa la pele,  
 Nè sbeleti e sandrache,  
 Che ne crea tante bele,  
 Nè polpetine tirae su per forza,  
 Nè quela certa scorza  
 Che missiada col grasso  
 A molte done fa rigenerar  
 Quel fior che apena nato  
 Le s'è fato robar;  
 Co ai poltroni, ai scroconi,  
 Ai mami, ai marzoconi,  
 Ai dureti de cuor,  
 Ai nemici d'amor,  
 Ai ingrati, ai superbi,  
 Ai maligni, ai acerbi,  
 Ai arditi, ai birbanti  
 La se ghe fava avanti,  
 Tuti se conosseva,  
 E squasi tuti la li coregeva.  
 Sta dea donca nel mondo  
 Soto Saturno dio, ch'è stà el secondo,

L'è fato gran facende;  
 Ma dopo le vicende  
 Che xe nate fra i dei,  
 E che dai tre fradei  
 Messer Pluton, Netuno, e 'l somo Giove,  
 Xe stà diviso el mondo;  
 E che co legi nove  
 I à scomenzà a regnar,  
 E volesto provar  
 Coi contraposti la virtù de l'omo  
 Per farlo a tute prove  
 Restar un galantomo;  
 Che i vizi i à descaenai,  
 Che xe vegnù i pecai,  
 Che l'è cambià natura,  
 La Verità no à fato più figura.  
 Anzi in qualunque logo  
 Che l'è avudo d'andar  
 La sa visto ad odiar;  
 E ben vedendo de no far più fruto  
 In sto mondo ribel,  
 L'aveva stabilio  
 De tornar suso in ciel;  
 Ma Giove ga ordinà  
 Che la stasse pur qua,  
 E xe sta apunto alora  
 Che sta dea s'è pensà  
 De trovar la maniera  
 De poder esser utile  
 Ai fioli de la tera;  
 Ma perchè in viso i omeni  
 No la volea vardar,  
 La se xe andata imbota a imascarar.  
 Ora in forma d'apologo,  
 Ora vestia da strolego,  
 Da proverbio, da emblema,  
 Da fiaba, da poema,  
 E in mille forme la s'è visto alfin;  
 Mi no ve digo altro,  
 Gh'è chi l'è vista messa d'arlechin.  
 A dir vero in sto modo  
 La ga podesto far  
 Quel ben ch'ela medesima  
 No la savea sperar.  
 Per altro mai cavar  
 Ga volesto la mascara, sicura  
 De no far fruto, e de portar paura.  
 Intanto el tempo à corso,

O sia con sucession  
 Le cosse de sto mondo  
 Ga fato mutazion.  
 Le montagne nel mar  
 A poco a poco le xe andade a star.  
 Quel moto, che le viscere  
 De sto globo fermenta,  
 Ga butà su del' isole  
 Fin da la fondamenta,  
 E l' à fato ingiotir  
 Senza tanti pensieri  
 Dei continenti intieri,  
 E dove gera mar  
 S' à visto a semenar;  
 E permutando i popoli  
 Tute le forme insolite  
 Tanti imperi à crolà,  
 E i s' à rigenerà,  
 E xe nate republiche,  
 E i omeni xe stai  
 Ora al lusso portai,  
 Al trafego, ai piaceri,  
 Ale fiabe, ai misteri,  
 Ala pase, ala guera,  
 Senza che mai d' un atomo  
 Se fruassee la tera.  
 Cussì corendo el tempo  
 Xe anca arivà quei zorni  
 Che de la nostra Europa nei contorni  
 Atene ga fiorio,  
 E tante altre cità ghe xe andae drio;  
 Xe vegnù in moda la filosofia  
 E gh' è sta chi l' à amada  
 Sin a la frenesia.  
 S' à formà molte sete,  
 Che per quello che i dise  
 Xe stae tute imperfete;  
 E ognun de sti filosofi à cercà  
 De trovar senza mascara  
 La santa Verità.  
 Fra questi è sta un filosofo  
 Che s' à ficà in la testa de trovarla,  
 E de desmascararla.  
 Costu filosofando  
 L' andava, e spassizzando  
 Per una certa strada,  
 El s' à dà un' intopada.  
 Cossa gera l' intopo?

La Verità coverta  
 Co le forme d' Esopo.  
 Sul fato el s' à irabià;  
 Ma Esopo ga parlà,  
 E in elo l' à trovà  
 Senza tropa fadiga  
 Sconta la Verità.  
 Allora entusiastà,  
 Da vero temerario, el l' à pregada  
 De mostrarse un mumento smascarada.  
 La grazia vien negada.  
 El dà, in quel che se dise, un' asenada,  
 Sforzandose a provar  
 Che la s' aveva da desmascarar;  
 Disendo, che i filosofi,  
 Che gera de virtù tuti impenii,  
 Poteva contemplarla  
 Senz' esser avilli;  
 Che no s' à da confonderli  
 Col resto de la razza;  
 Ma la dea, soridendo,  
 La dise: « Tiò, vardime pur in fazza, »  
 Come quel che bevendo in certa tazza  
 Per incanto el vedeva  
 I corni che 'l gaveva,  
 E che co abilità  
 La so cara mugier gavea impiantà;  
 Cussì a l' aspeto insolito  
 De Verità teribile,  
 Se acorze sto filosofo  
 De le fangose saçole  
 Che ghe infranzava l' anima;  
 E de lu disgustandose,  
 E in tel cuor biastemandola,  
 Co le lagreme ai occhi el l' à pregada  
 De farse anca ai filosofi  
 Veder sempre coverta o imascarada.  
 Omeni, done, amici, che ascolte,  
 E che sempre dispe:  
 « Parlème schieto; voi sincerità: »  
 Ricordeve de quel che v'ò contà.

## EL RE E 'L SO BUFON.

IMITAZION D'UN APOLOGO TODESCO.

Ai tempi che 'l regnar  
 Consisteva in poderse sodisfar,  
 Un re, che se chiamava Woldmar,  
 El qual s'aveva in tuto sodisfà,  
 E d'ogni cossa za s'avea stufà,  
 Co tuta quanta la so signoria  
 Lo mazzava una negra ipocondria ;  
 E per colmo dei mali che 'l sofriva  
 Un mumento la note nol dormiva.  
 Quando un dì per distrarse l'è andà a cazza,  
 Come che usava i re de la so razza,  
 E la strada falando  
 El s'è trovà in t' un precipizio grandò,  
 In sto tremendo intrigo  
 El so bufon, che gera anca el so amigo,  
 (Cariche separae,  
 Ma che se trova in corte combinae )  
 Che no aveva un-mumento abandonà  
 El so amigo maestà,  
 Passando rischi che no gera picoli,  
 Ga tirà fora el re da quei pericoli ;  
 E sti do amici alfin  
 S'è trovà sora un lago cristalin.  
 Su quello dominava,  
 E maestoso nel' acque se spechiava,  
 Un rovere vechion,  
 Che faceva più ombra d' un cason ;  
 E soto quello col so cuor contento  
 A l' ombra fresca, e rinfruscà dal vento,  
 Con el più gran saor  
 Dormia su l' erba un povero pastor.  
 So maestà s'è fermà.  
 « Dorme un bifolco, e de dormir l'è degno,  
 E mi no dormo, e son paron d' un regno !  
 Per dio ! rinunziaria  
 La mia sposa real, e donaria  
 Sin la mia simia istessa, se una note  
 Dormisse come dorme ste marmote.  
 Caro amigo bufon, dime perchè

No trova requie el povero to re ? —  
 — Sire, el risponde, no la trova el sono,  
 Perchè la dorme tropo sul so trono. »  
 Per disgrazia del bufon  
 Tropo ingenuo xe sta el ton,  
 Mentre el re per dignità  
 De la sacra so maestà,  
 Tolta l' asta de la cazza,  
 Co clemenza sta bestiazza  
 L' è coreto del' eror  
 Col cazzarghela in tel cuor.  
 Anca sta volta el re s'è sodisfà,  
 Ma pur el sono no l' à mai trovà.

## EL GRANZO E L' OSTREGA.

Contava un pelegrin,  
 Che i abitanti del regno submarin  
 Ga anca lori i so ingani  
 Come nu altri umani.  
 Per esempio el diseva,  
 Che a l' ostrega ghe greva  
 De star sempre sarada,  
 E che no la d' à mai 'na spalancada,  
 Ma la fa una sfeseta,  
 E per quela ghe va qualche giozzeta,  
 Ma el granzo furbo, che la vol magnar,  
 Sta atento, e co la vede un fia a slargar,  
 El ghe tra co le branche un bel sasseto,  
 E quela el crede giozza ; e l' intra neto.  
 Pena che la se acorze la fa un sforzo  
 Per sarar suso el scorzo,  
 Ma fra i do scorzi el sasso à fato presa,  
 E ghe resta la sfesa.  
 Allora el granzo fica la so branca,  
 El la sforza, el l' averze, el la spalanca ;  
 E col l' à divorada  
 Sul' alega el va a dar 'na spassizzata.  
 Ricordeve regazze,  
 Che de sti granzi ghe ne xe gran razze,  
 E che lode, carezze e regaleti,  
 Xe cosse bele, ma che i xe sasseti.

## LA VERITÀ.

Dea venerabile  
 Ma disgraziada  
 Con i filosofi  
 Un dì cubiada  
 Gera teribile  
 La Verità.  
 Ma a l'uman genere  
 La disgustava,  
 E grandi e picoli  
 La maltratava,  
 E no voi dirvelo  
 Chi l'è atacà.  
 De quei filosofi  
 Cubiai co ela  
 Chi è morto martire,  
 Chi à fato vela;  
 Xe stai pochissimi  
 Quei che à campà.  
 Povera diavola!  
 Da tuti odiada  
 Da Giove subito  
 La xe tornada,  
 E lagni e supliche  
 La ga portà.  
 Lu prevedendose  
 De aver in cielo  
 Sta so dea pitima  
 Sempre con elo,  
 Se un dio pol esserlo,  
 El s'è irabià:  
 « Mo via, petegola,  
 Dise el tonante,  
 Per cossa farmene  
 Tante e po tante,  
 E comprometerme  
 De qua e de là?  
 Su ne l'empireo  
 Ti a buo a negarme,  
 E i mii condomini  
 A maltratarne;

Te mando ai omeni  
 Pezo ti fa?  
 Za da la rabia  
 Te mazzaria,  
 Ma ti è impassibile,  
 E ti è fia mia;  
 Pur pena debita  
 Ti portarà.  
 Va in tera subito,  
 E co la boca  
 De tuti i stolidi  
 Parla e taroca. »  
 E quel proverbio,  
 Che à dominà  
 Per tanti secoli,  
 Per ani anorum,  
*In ore abundat*  
*Risus stultorum,*  
 Per sta catastrofe  
 Xe sta cambià.

## LA GALINA E I PULESINI.

Del mondo in una età  
 Una brava galina avea coà  
 Varie spezie de vovi  
 Per grandi ogeti e novi;  
 E da quei gera nato  
 Squasi tuti in un trato  
 I so bei pulesini,  
 Che gera picinini,  
 Oh bela! appena nati,  
 Ma tuti spiritosi e squasi mati.  
 Apena che i à podesto saltuzzar  
 Tuti un progeto a parte à buo formar.  
 « Stago su sto morer,  
 Questo sarà el mio aver, »  
 Uno diseva; e st' altro: « In sto formento  
 Sarà el mio regno, e viyarò contento. »  
 Chi aveva una montagna, chi un boschetto  
 Chi un bel pra, chi un laghetto;  
 Infìn chi qua, chi là  
 I s' aveva isolà.  
 Guai chi avesse parlà

De unirse e infradelarse,  
 Guai chi disesse mai de concentrarse!  
 La galina v'edeva  
 Tute le operazion che se faceva,  
 E gh'è qualcun che dise,  
 Che la se la rideva.  
 Ma finalmente un zorno  
 Che i sussurava tuto quel contorno,  
 La l'ha chiamai davanti  
 Uniti tuti quanti,  
 E l'ha dito: « Putei,  
 Pulesini fradei,  
 Cossa ve salta in testa?  
 No gavè ale, nè cresta,  
 No gavè fato el beco,  
 Sè magri come un steco,  
 E parlè come gali,  
 E ve scordà  
 Che da mi dipendè,  
 Che mi v'ò fato nascer per ogeti  
 Degni de mi e perfeti?  
 Ah cari i miei putei,  
 Pulesini fradei,  
 Quietevè cari, e magnè papa adesso!  
 Quando che dal destin sarà permesso  
 Ve darò stato, fioli, e lo farò  
 Come che credarò. »  
 Vien dito che nissun disesse: oibò.  
 Se fra i bipedi umani  
 Dèi paesi italiani  
 A isolarse qualcun pensa o destina,  
 Che 'l se ricorda sempre sta galina.

## LA MOSCA.

In quei bei tempi d'oro,  
 Che parlava el molton, la manza, el toro,  
 Le mosche, i rospi, i sorzi, i aseneli  
 E che tuti pàrevimo fradeli,  
 Che nasceva i puteli  
 Senza che la comare o 'l comaron  
 Facesse dele brute operazion,  
 Che gera tuto bon;  
 Che dai roveri el miel,

*Racc. Poes. Ven.*

Dai fiumi se gavea late e puina,  
 Che no gh'era cusina,  
 Nè leti, nè poltrone,  
 E che le done gera nine e none,  
 Val a dir brave e bone,  
 Servindo d'una gran comodità  
 A tuta quanta la comunità  
 Senza driti esclusivi;  
 Che sicuri dormivi,  
 Che no ghe gera lite e terza e nona,  
 Nè dei grandi la razza sfondradona;  
 (Tempi che se i xe stai,  
 No i tornarà più mai  
 Per i nostri pecai)  
 Giusto in sti tempi digo, gh'è sta un omo,  
 Che stufo de campar da galantomio  
 Una dona l'aveva inzinganà,  
 El s'avea messo in testa  
 De formar quel che i chiama società,  
 Co lu l'avea chiamà  
 Un bravo gato e un can,  
 Za persuasi de sto novo pian.  
 I è andai in t'una valeta  
 Da la madre natura predileta,  
 E in quella i à destinà  
 De piantar sta so nova società.  
 L'omo cussì a parlà:  
 « Animali fradeli,  
 Se ò da considerarve come fioli  
 De quella che chiamemo la natura,  
 Che à stampà ogni creatura,  
 De mi inferiori assae,  
 Per altro co se vol considerar,  
 Che in do pie no podendo caminar,  
 No gavarè mai man,  
 Come el genere uman;  
 Quando se pensi a la mia gran malizia,  
 Che da qua avanti chiamarò giustizia,  
 Filosofia, rason,  
 E che un zorno à da farne parer bon;  
 Animali, diseva,  
 Vu vedarè che no savemo unito  
 Per scampar dala sè, o dal'apetito,  
 A bastanza ne dà  
 Quella che n'ha creà,  
 Ma i gusti è pochi e scarsi,  
 E v'ò fato capir,  
 Che stando uniti insieme

Li podemo ingrandir,  
 Perfezionar, condir;  
 Insoma gh'è una gran diversità  
 Da l' animal salvadego,  
 A quel de società.  
 Sto principio impiantà,  
 Qualcossa s' à da far',  
 Vu za el vedè, un per l' altro  
 Per poder ben campar.  
 Mi a la bona stagion  
 Farò la provision  
 E de grani e de fruti,  
 Perchè co vien l' inverno  
 No abiamo da zunar in sempiterno.  
 Sta dona che vedè,  
 Che da qua avanti chiamarò mugier,  
 Val a dir che nissun la pol più aver,  
 La penserà a sugarli,  
 A netarli, a secarli,  
 E po co tuta l' arte  
 La ne farà la parte;  
 Invece de spelonca  
 Co de la pagia, co dei rami sechi,  
 Co del fango, dei stechi  
 Farò una certa fabrica,  
 Che chiamaremo casa,  
 Dove che 'l fredo, el vento  
 No possa vegnir drento;  
 Farò cent' altre cosse in conclusion  
 Perchè el viver sia bon.  
 Mi farò questo, e vu  
 Cossa fareu, da bravi,  
 Rispondè; disè su? —  
 Mi, disè 'l can, dai ladri,  
 Che ancuo s' à da chiamar  
 Quei che qua se volesse desfamar,  
 Ve savarò vardar,  
 Cigarò, sbragiarò,  
 E se ocoresse li morsegarò. —  
 — Ben bravo, disè l' omo,  
 L' è un far da galantomio,  
 E vu: voltà dal gato;  
 — Mi per tante bravure no son fato;  
 Ma savè che gh'è i sorzi,  
 Che da per tuto i va,  
 E i vegnarà anca qua,  
 E che per profession  
 Me piase el bon bocon;

Mi li mazzarò tati, e co bravura  
 Ghe darò in tel mio corpo sepolitura. »  
 Intanto che i parlava  
 I vede là una mosca,  
 Che atenta li ascoltava  
 — « Sior animal chi seu?  
 Ghe dise allora l' omo,  
 E co nu: cossa feu? —  
 — Mi son la mosca, e come in vita mia  
 M' à sempre piasso star in compagnia,  
 Cussi, cari, sentiudo  
 Tante cosse a contar  
 Del novo vostro star,  
 Voleva in sto mumento  
 Co vu unirme a campar. —  
 — La mosca donca sè,  
 E star co nu volè?  
 Ben siora, rispondeme,  
 Qual è el mistier che fè? »  
 Co un' aria da petegola  
 La sbalza su una fregola,  
 Po a la testa del can,  
 E alfin sul naso uman;  
 Lu intanto chiacolando,  
 Sempre la stuzzegava,  
 E l' omo stranuava.  
 Ela in bota scampava,  
 E dopo la tornava,  
 E l' omo s' inquietava:  
 « Via quieteve in malora  
 El dise, rispondè,  
 Qual è el mistier che fè? —  
 — Co volè che ve diga  
 No son tropo paziente;  
 Mi no ò fato mai gnente;  
 Stago coi animali  
 Uguali, disuguali;  
 Se gh'è qualche bocon  
 Che anca per mi sia bon,  
 Mi te ghe sbalzo in cima,  
 E voi esser la prima;  
 Volverme cazzar via,  
 S' à capio che l' è un pezzo,  
 Che la xe una pazzia;  
 E chi me vol mazzar  
 Ghe perde più in tel tempo  
 Che bisogna fruar.  
 No gh'è animal per questo



Che me fassa paura  
 Nè per le sgrinfè o el dente,  
 Nè per la so statura,  
 In soma mi no ò fato,  
 E no farò mai gnente :  
 — L'è un parlar da insolente,  
 Šalta su el can, nè so chi che me tegna .... —  
 — Sior can la se trategna,  
 L'omo interòmpe, co la furia mai  
 No ga da esser tratai  
 I afari tra nu altri, e qua sta el ponto,  
 Che s' à da far quel che più torna a conto.  
 Lassè che parla mi :  
 Siora mosca, senti,  
 Ghe dise alora l'omo,  
 Mi de rason podaria farve un tomo,  
 Ma inutili al mumento,  
 Voi che ve persuada el sentimento.  
 Capisso che la massima  
 Per vu xe bela e bona,  
 Se vede che sè nata zentildona ;  
 Ma se de star co nu ve degnarè,  
 Cara, son persuaso  
 Che qualcosa farè. —  
 — Gavè una bona grazia,  
 Dise la mosca alora,  
 Che molto me convince e m' inamora ;  
 Quello che posso far  
 Ze de lassarve star  
 Co me dè da magnar. »  
 Da rabia el can sbragiava,  
 E anca el gato sgnolava,  
 Ma l'omo più prudente,  
 Che se ramemorava  
 Quanto la mosca al naso lo inquietava,  
 El li tira in disparte,  
 E co tuta quel' arte,  
 Che xe fia de l'umana costruzion,  
 El fa che 'l can, e 'l gato  
 Intenda la rason.  
 Con un primo decreto,  
 Che xe sta el più perfeto,  
 S' à dovudo fissar  
 De darghe da magnar  
 A so celenza mosca  
 Perchè la i lassa star.  
 Qualcun dimandarà  
 Se in sta fiaba ghe xe moralità,

E mi ris pondarò :  
 Co nol savè vu altri  
 Gnanca mi no lo so.

## LA CANDELA.

Ghe diseva una dona al so moroso,  
 Che gera inamorà, ma no fogoso :  
 « No, no ti'è quello, che ti geri un di.  
 E lu : Sì, nana, son l'istesso, sì. —  
 — No, che no ti è l'istesso :  
 Ma per[cossa più spesso  
 No me vienstu a trovar ;  
 Assae più s' à d' amar. »  
 Ma lu no replicava,  
 E la candela intanto el smocolava.  
 Nana diseva : « Ascolta,  
 Mo via badime, caro,  
 Ma cossa fastu? — Fazzo un po più chiaro. »  
 E tanto l' à mocà  
 Che a la fin la candela l' à stuà.  
 « Za lo vedeva, à dito la so bela,  
 Sior sempio, che stuevi la candela :  
 — Sì cara, come vu fe de sto cuor,  
 Che per farlo più ardente  
 Stuzzega è sin che stuarè l'amor. »

## E L' FASAN.

A una cena formal,  
 Dove che se se trova ben e mal,  
 Aveva smagnazzà,  
 Sbevuchià,  
 Chiacolà,  
 Quando che 'l rosto in tola s' à portà.  
 Sto rosto l'ò trovà gustoso e bon,  
 Ma 'l m' à parso capon,  
 No badandoghe gnente,  
 Come se fa a ste cene,  
 Che 'l gavesse da drò tacae le pene ;  
 Ma quando che una dona,

Che gera de la cena la parona,  
 Per farne un schërzo, me l' à messe in man  
 L' ò conossue per pene de fasan.  
 Allora in tel magnar  
 Quel rechiot de rosto che restava,  
 M' à parso de trovar  
 Quel gusto che in avanti no trovava.  
 E mastegando pian  
 Go sentio proprio el gusto del fasan ;  
 E ò dito, soridendo, in tel magnar,  
 « Ste pene me l' à fato fasanar, »  
 Fasani per caponi,  
 Caponi per fasani,  
 Anca i bipedi umani  
 Del mondo a le gran cene  
 Vien tolti per le pene.

#### LA BALÀ.

Trovandose in campagna,  
 Ne la stagion de istà,  
 Certe signore un dì le s' à pensà  
 De andar a visitar  
 Un certo matematico  
 Che in vila, e da so posta, usava a star,  
 Curiose de osservar  
 Cossa gera sto tomo,  
 E veder se l' è un omo.  
 Queste xe dentà andae  
 Tute linde e slissae,  
 Co quel' aria e quel ton  
 Che xe soliti a far del cuor carbon.  
 Co le xe stae al porton  
 Le l' à fato avisar,  
 Che alquante signorine xe curiose  
 De veder le so machine studiose ;  
 E lu ga fato dir,  
 Che le gera parone de vegnir.  
 Quando le xe stae là  
 Co molta gentilezza el ga mostrà  
 I sistemi celesti,  
 Secondo la opinion  
 De Galileo, Copernico e Newton,

Fati tuti de legno o de carton ;  
 E che co certi inzegni se moveva,  
 Come i fa in cielo, a quel che lu disea.  
 Le machine pneumatichè,  
 Le machine areostatiche,  
 Quele d' elettricismo,  
 E prismi e lenti, e sin el magnetismo.  
 Ste signore vardava,  
 E ogni tanto d' acordo le criava ;  
 Oh cospeto! cospeto!  
 E po le replicava :  
 Oh cospeto! cospeto!  
 E 'l sapiente s' avea secà el culeto.  
 Dopo averlo lodà  
 Le ga anca dimandà  
 Se mai l' avea amà ;  
 E lu à dito : — « ò zirà,  
 Ma no me son fermà. »  
 Le s' à maravegià,  
 E le ga dito senza complimenti,  
 Che per el più sti bravi, sti studenti,  
 Ze zente senza cuor.  
 Ma el nostro professor,  
 Senza dirghe un de no, nè adurghe prove,  
 El le conduse dove  
 Ghe gera un bel taolin  
 Fato tuto de legno serpentin,  
 Sora del qual ghe gera situada  
 Una bala d' avolio  
 Tuta quanta miniada.  
 Ghe gera piturada,  
 Costanza, volutà,  
 E amor, e fedeltà,  
 E cent' altre istoriele,  
 Che gera tute bele.  
 Essendo egual el pian,  
 E la bala perfeta,  
 Dandoghe un fià de moto co la man  
 La bala no restava mai più quieta ;  
 Ste piture a vicenda se vedeva,  
 E 'l gera un zogolin che ghe piaseva.  
 Invece de cospeto,  
 Le disea : « L' amor ! oh benedeto !  
 Volutà ! cara ! .... fedeltà ! .... l' amor ! ....  
 Vardè le grazie ... oh bele ! e quela, e questo ...  
 Ma lu s' avea secà de novo el cesto.  
 E dimandando senza afetazion  
 Se ghe piaseva l' ultima invenzion . —

« No se dà de più belo e de più bon,  
 ( Tute quante d' acordo ghe conferma )  
 Ma quella bala che no sta mai ferma  
 Xe un gran difeto ; e no poder gustar  
 Le bele piturete  
 Che 'l ga fato miniar .... »  
 Ma s' à sentio el filosofo a criar  
 Con una osona, ma de quele rare :  
 « La dovevi fermar, done mie care. »  
 Cussì se ghe pol dir a tante e tanti,  
 Che dise che no gh'è cuori costanti.

## L' QCHIAL.

Gh'era un certo signor  
 Che provava el dolor  
 De veder ch' i so amici  
 Se credeva felici,  
 Vedendoghe, per quanto che i diseva ;  
 Assae de più de quel che lu vedeva.  
 De sta cossa picà  
 Co qualchedun de lori el s' à informà  
 Come el podega far  
 La vista a megiorar.  
 Questi à risposto in bota  
 Va là da Selva e trota ;  
 El te darà un ochial  
 Che farà che ti vedi manco mal.  
 Da l'otico l' è andà,  
 L'ochial el ga trovà,  
 E l' à visto i ogeti  
 E più vivi e più neti ;  
 Tanto xe sta el piacer,  
 Che in sta scena gh' à parso de goder,  
 Che l' è tornà da Selva a domandar  
 L'ochial più bravo che se pol trovar.  
 E l'otico gh' à dà  
 L'ochial più bravo che sia sta inventà.  
 Contento la matina  
 El va a trovar la so diletta Nina ;  
 Ma oh dio ! che 'l viso belo  
 Deventa un radeselo ;  
 L'occhio, a trar dardi ayezzo,  
 Oribile strambezzo,

E i lavri porporini  
 Borondoli o cuscini,  
 Che par giusto fodrai de marochini.  
 Lu, biastemando insina i cherubini,  
 Maledindo l' ochial, l' artista e l' arte,  
 El l' àtrato per sempre da una parte.  
 Per l' istessa rason,  
 E co l' istesso ton,  
 Quante volte che ò dito, e che diria,  
 'Sia maladeta la filosofia !

## I D I L I.

## LA VISION.

Ne la bela stagion che 'l biondo Apolo  
 Senza infuriar benefico se mostra,  
 Che se rinova l' erbe, e cento verdi  
 De diferente scaco, e mile fiori  
 Ne presenta natura in le campagne ;  
 Quando zefiro spira, e che de Giove  
 La bela fia che sta nel terzo cielo  
 Nova virtù nei animali infonde,  
 Virtù che insegna ai russignoli el canto,  
 Che sui prai fa saltar le armente e i tori,  
 E che conserva e fa più belo el mondo ;  
 L' amoroso Leandro a le coline,  
 Dove el castello d' Asolo s' inalza,  
 S' aveva ritirà. Nene la bela,  
 La so tenera Nene, che rapia  
 Gaveva morte, crudelmente fissa  
 Lu tegniva nel cor : nè nove fiamme,  
 Nè tempo distrutor, l' acerba piaga  
 Rimarginar podega. Se solitario,  
 Quando s' alza più el sol col caro d' oro,  
 Soto un orno sentà, se verso sera  
 Seguitando d' un' acqua el dolce corso,  
 Solievo el cerca al so dolor, l' imagine

Del caro ben, l' imagine diletta  
 Ghe xe sempre presente. E un dì fra i altri  
 Che da un logo eminente el contemplava  
 L' imensa interminabile pianura,  
 Che dai coli Asolani a le lagune  
 Dolcemente inclinando se destende,  
 Del sito ameno entusiastà, comosso,  
 A seconda del cuor cussì el disea :

Coli ridenti e fertili,  
 Come xe questi, un dì  
 Me vedeva co ti,  
 Nene diletta ;

E de sti verdi carpani,  
 Come che i vedo qua,  
 Godevimo l' istà  
 L' ombra secreta.

Oh dio ! me par de vederte  
 Fiori sul pra a sunar,  
 E dopo inghirlandar  
 Quei bei cavei ;

E i furianeli e i zefiri  
 Trarli de qua e de là,  
 E quel mal inestà  
 Farli più bei !

Proprio in t' un sito simile  
 Quel primo dì, mio ben,  
 T' ò visto, che in sto sen  
 L' amor sa sconto :

Quel dì che fogie morbide,  
 Volendote sentar,  
 Te son andà a cercar,  
 Quel zorno aponto,

Che son cascà dal frassene  
 Col nio che avea trovà,  
 Ma che vivi ò portà  
 Quei russignoli ;

E che nel mio pericolo  
 Solo fissando in ti  
 Smorti ò visto per mi  
 Quei do bei soli ;

E d' una tinta languida  
 Le rose a comparir,  
 Tinta che volea dir  
 No parlo, e sento !

Oh quanto mai dissimile  
 Che t' ò vista in amor  
 Da tante che sto cuor  
 Xe sta in cimento !

Come xe ancuo fra nuvole  
 El sol mezzo imbautà,  
 Quela note d' istà  
 Gera la luna,  
 Che fisso, muto, estatico,  
 Standote a contemplar  
 S' à buo da dichiarar  
 Per mi fortuna ;

E che la dea castissima  
 Spionandone dal ciel,  
 Dei nostri amori 'l miel  
 Forse invidiando,  
 Col raggio incerto e palido  
 O 'l bel fronte seren,  
 O la neve del sen  
 Illuminando,

Più cara, no volendolo,  
 Te fava deventar,  
 E un belo in ti trovar  
 Che 'l cuor rapisce.  
 Oh dio ! tante delizie  
 Tute è sparie per mi,  
 Come fior che in t' un dì  
 Nasce e perisce.

La parca inesorabile  
 I lazi de l' amor  
 Ga roto, el più bel fior  
 Tolto à dal mondo.

Perdita irreparabile !  
 Dolor che porterò  
 Fin che vita avarò  
 Del cuor nel fondo.

Ma se missià a le lagreme  
 Più lune è stà el mio pan,  
 Scorendo 'l monte e 'l pian  
 Senza conforto,

No dubitar, che st' anima  
 Sempre te onorerà  
 Finchè la troverà  
 Fra l' ombre el porto.

Mesto cussì el disea, e intanto l' ombre,  
 Che cascava dai monti, a le capane  
 Invidava i pastori. Una profonda  
 Malinconia dopo sto amaro sfogo  
 Investiva Leandro, e su quel' erba,  
 Desmentegà de lu muto el restava.  
 Quando unito a la note un fiero nembo  
 S' alza dal mar, e sordo el ton se ascolta

Da lontan mormorar; nuvoli a nuvoli  
 Za se ingropa nel ciel, se vede el lampo,  
 El ton più forte a strepitar se sente;  
 Cambia el vento, s' incalza, e un velo orendo  
 Se destende sul pian; la piovra e 'l turbine  
 E la tempesta, e i replicati fulmini  
 Le campagne flagela; el nostro amante,  
 Scosso ala fin da oror, una capana  
 Tenta trovar, ma inutilmente; e un sasso,  
 Che da l'acque scavà lassava un vodo,  
 Xe l'asilo che 'l trova. Minorando  
 Va la tempesta, el turbine se calma,  
 Cessa la piovra e 'l folgorar del cielo,  
 E tra un nuvolo e l'altro alfin se vede  
 Le stele a comparir. Tenta Leandro  
 Riguardagnar la strada, e invece a un vasto  
 Pra, che un bosco circonda atorno atorno,  
 Lu trasporta i so passi. Alti cipressi,  
 Proprio in mezzo del pra piantai, serava  
 Un gran mûchio de sassi. El ciel s' avea  
 Fato seren, e una profonda quiete  
 Dominava natura. Oh come acesce  
 Sto lugubre teatro al mesto amante  
 La tristezza, e l'oror! Ma quei cipressi,  
 Quei bianchi sassi, i tetri so pensieri  
 Magiamente ocupava; e fata forte  
 La tristezza nel cor, la mente e i sensi  
 L'ariva a conturbar. Dona e regina  
 Fantasia signoregia, e verso i sassi,  
 Che un sepolcro ghe par, cussì el prorompe:

Fra quele piante funebri  
 Certo un sepolcro el xe!  
 La ghe sarà le ceneri  
 D' una che più no gh'è.  
 Le ceneri? le ceneri?  
 Orribile pensier!  
 Nene una freda polvere  
 Donca .... ah! nol voi saver,  
 No, no podea quel anima  
 Poca tera informar,  
 No pol, no pol un anzolo  
 Polvere deventar.

Nene xe in ciel bellissima,  
 Come la gera qua;  
 Quel tesoro invidiandome  
 Là suso i s' à portà.  
 Quando bellezza e grazie,  
 Modestia, amor, virtù,

Unite, indissolubili,  
 S' à visto mai fra nu?  
 Chi de fortuna istabile,  
 Scoglio del cor uman,  
 Sprezzandola, avilindola,  
 Ga disdegnà la man?  
 Chi à sparso tante lagreme  
 De amor, de compassion,  
 O sora i miserabili,  
 O su le bele azion?  
 Chi? .... ma xe mai possibile?  
 A tanto son salvà?  
 Me insonio? .... ombra adorabile  
 Ti è ti! .... chi t' à mandà?  
 No ritirarte .... ascoltime ....  
 No, no te toco no,  
 Rispetto la to gloria,  
 Che ancuo ti è sacra, el so;  
 Ma solo avvicinandome  
 Tentava de osservar  
 Se dolce l'occhio o torbido  
 Se andava in mi a fissar.  
 Che? ... te son caro ... oh giubilo!  
 Che? .... ti me vol co ti?  
 Via morte, via distruggime,  
 Tioteli pur sti di.  
 Per mi xe insoportabile  
 Quanto che gh'è de uman,  
 Ti sola ..., ombra, me chiamistu?  
 Sì? vegno, eco la man.

Fusse che fantasia portasse in fola  
 Tutti i spiriti al cor, o che l'estrema  
 Dolcezza d' un amor puro e celeste  
 Estasia lo gavesse; in quel mumento  
 Perde Leandro i sensi, e vita e moto  
 Nol torna a riacquistar che quando in cielo  
 Ricomparsa l'aurora, ai freschi pascoli  
 Co cento pive dai pastori el sente  
 Le so mandre a invidar. Un bel sepolcro  
 Fra quei cipressi, no è passà sie lune,  
 Che in memoria de Nene alzar s' à visto.

## GIACINTO.

Zorni sereni e un'aria tepideta  
 Da grati furianei solo agitada,  
 Avea invidia Giacinto ale delizie,  
 Che semplice natura in le campagne  
 Liberal ne presenta; e gera alora  
 Che l'ua, color de l'oro, a graspi a graspi  
 Xe tacada ale vide. Un solitario  
 Ma grazioso casin, d'una colina  
 Su la falda piantà, gera el tranquilo  
 Logo che l'avea scielto. Da una parte  
 Nasceva un fiumeselo, che tra l'erba  
 E tra i fiori del pra quieto coreva;  
 Da st'altra, ma in lontan, s'alzava un bosco,  
 E ghe rideva una pianura imensa  
 Proprio in fazza al casin. Se al far del' alba  
 L'averziva el balcon; se su la sera  
 El vedeva tornar carga de pomi  
 O d'ua la vilanela, o se in t'un groppo  
 Atorno una polenta quei vilani  
 L'osservava a magnar, in lu el sentiva  
 Crescerse el cuor. Oh dio! Ma no bastava  
 A scancelar la tropo fissa imagine  
 De la bela crudel, che a un altro amante,  
 Dopo l'amor più sviscerà, più caro,  
 S'aveva abandonà. Piaghe xe quele  
 Che no sana cussì. Ben pensieroso  
 Spesso l'andava in solitaria parte  
 A sfogar el dolor che lo investiva,  
 E una note fra l'altre, che più bela  
 No avea visto quei loghi, in mezz o al bosco  
 El s'aveva inoltrà. Nel ciel la luna  
 Cussì chiara luseva, che d'ariento  
 Pareva i coli, e le campagne atorno  
 E l'aria odori e balsemi spirava;  
 De quele note insoma che ad ogn' altro,  
 For che a amante tradio, xe un paradiso.  
 Pur sul'erba sentà, fra quele piante,  
 Cussì disendo, iluderse el tentava:  
 Erbe odorose e morbide,  
 Aria che sventolar

Te piase e sussurar  
 Tra fogia e fogia;  
 Ragi che introdusendove  
 Tramezzo i rami andè,  
 E tra l'ombre lassè,  
 Sto dolce lume;  
 Oh! qual piacer patetico  
 Fe che se svegia in mi,  
 Come che radolci  
 Del cuor l'afano!  
 Nè questi xe incantesimi,  
 Come xe quei d'amor,  
 Che tra i fiori el dolor  
 Sconde e le pene.  
 Nè per bellezza istabile  
 Sento el piacer in sen  
 Per sofrir del velen  
 Dopo le angosse.  
 Tropo anca mi una perfida,  
 Credulo tropo, d'amà,  
 E go sacrificà  
 Tut' i mii afeti;  
 Ma alfin, del mio delirio  
 Trioufando la rason,  
 Del' indegna ilusion  
 Fa che me penta,  
 E che desmentegandome  
 De quel ingrato cuor,  
 Bosco, nel vostro oror  
 Trovi la calma.

In t'un dolce sopor dopo sto sfogo  
 Quela calma pareva che 'l godesse  
 Che 'l voleva trovar. Quando che un'ose;  
 Che ghe passava el cuor, lo svegia; el vede  
 Un ogeto confuso che fra i albori  
 Gera come butà, che un raggio debole  
 De luna, che fra i rami trapassava,  
 Ghe permeteva de scovrirlo apena;  
 Mestamente cussì l'ose disea:

« Ombre, me par che st'anima  
 Trovi nel vostro oror  
 Pascolo a quel dolor  
 Che la consuma;  
 Vu fe che, lusingandome  
 Sta vita terminar,  
 Senta nel mio penar  
 Qualche conforto. »

Qual ose, oh dio! me lacera  
(Giacinto esclama) el cuor?  
Qual novo abitor  
Ghe xe in sti orori?

Un dio che me perseguita,  
Un dio certo infernal  
Per colmo d' ogni mal  
Giulia me afazza.

Spetro, che a mi teribile  
Più che le furie ti è,  
Che 'l più crudel no gh'è,  
Torna a l' inferno;

Desfantite, destruzite,  
Va via, lassime star ...  
Mi no posso scampar,  
No go più forza ...

El pianto, oh dio! le smanie  
Anca ti fa sentir,  
Megera, a incrudelir  
El mio tormento?

Perfida, quele lagreme  
Xe quele che ò sgorgà,  
Da quele vien bagnà  
Quel peto indegno!

Sangue crudel, no lagreme,  
Sangue l' à da bagnar,  
Lu solo à da lavar  
El to delito ...

Ma m' insonio? o xe i gemiti  
Questi d' uno che mor? ...  
Tropo debole cuor,  
Mente, dov' estu?

Cessi l' ingano .... ahi misero ....  
Carne giazzada! .... oimè! ....  
Giulia istessa la xe,  
Giulia che manca ....

Torna, no xe implacabile  
Sto cuor, cara revien;  
Torna, torna a sto sen,  
Tuto perdono.

Ti respiri? vardandome  
So quel che ti vol dir ...  
Tasi, no voi sentir  
Scuse o perdoni ...

Ma pur dime el più tenero  
Amante abandonar  
Per cossa? e in braccio andar  
D' un novo amante?

*Racc. Poes. Ven.*

Amor? ... ti è dona, e debole? ...

Ti t' à pentio in quel dì ...  
E per cercarme mi  
Ti à trovà morte? ...

Tasi, ste scuse, incauta,  
Rinova el mio furor,  
Vardite da un amor  
Indispetio.

Amor? caprizio, perfida  
Dona ... no, tigre ti è,  
A cercarme ti xe? ...  
Scampa o te mazzo ...

Un stilo? ah sì ne l' erebo  
Va co le ingrate a star ...  
Mazzite pur ... no far ...  
Dame quel stilo.

Sto cuor, Giulia, lo merita ...  
E la to crudeltà. —  
— No ti è ancora placà  
Cuor de masegno?

No te comove i gemiti,  
L' orida situazion,  
L' ingenua confession  
D' una moriente ...

No ti è mai sta colpevole,  
Ti à bu propizio el ciel?  
Ma dime esser crudel  
No xe una colpa?

Scorda, se ti ga un' anima,  
Tiran l' infedeltà,  
Per ti la s' à scordà  
D' esser virtuosa.

— Mi primo lusingandote  
T' ò insegnà per amor  
A tradir el to cuor,  
Mancar de fede.

O Giulia, o Giulia amabile,  
Perdona a mi; mio ben  
Vien fra sti brazzi, al sen  
Vien che te strenza.

No vedo più, assicurate,  
Che 'l mio ben: leva su;  
Cara, no vedo più  
Che le to lagreme.

No vedo che quei laveri  
Dove che amor un dì  
Zogitolava, e mi  
Co lu rideva.

Lassime benchè languidi ....

Mo via no pianzer più,

No regni fra de nu

Che l'alegrezza.

Me vustu ben ? .... rispodime ....

Si .... ma cossa ? .... infedel ?

O infedel, o fedel

Ancuo ti m' ami.

Questo me preme, viscere,

El resto l'ò scordà,

Dame la man, vien qua,

Vien che te porta.

No ti ga forza ? pusite

Donca, al colo la man

Passa; no xe lontan

Dove che andemo.

Cussì el pietoso amante a lenti passi,

Squasi portando Giulia, che languente

Se andava consolando, a la colina

Dove gera el casin el l'ha condota.

Là el l'ha vista a sanar; là l'ha savesto

Che pentia per cercarlo in mezzo al bosco,

Persa la strada, dal dolor, da fame,

E da stanchezza mezza morta, l'ultimo

L'aspetava dei dì. Là in fin Giacinto

El ga visto a tornar le rose in fazza,

El ciel nei occhi, amor sui lavri, e in mezzo

Dei più dolci trasporti amante e amata

Ga passà in quel casin zorni beati.

#### E U R I L A .

##### IMITAZION DE LA SULAMITIDE.

Sparpagnava i so balsemi la note

Su l'aria e su la tera, e i cieli imensi,

Tuti de stele semenai, rideva

Su l'erbete e sui fiori. Alto, maestoso

Silenzio dominava, e solo Eurila,

Za trapassada el cuor da dolce spina,

Lo rompeva col pianto. Ai tronchi, ai sassi,

Sola per sola, dal dolor strazzada,

De la capana su la porta, i moti

Del so tenero cuor, cussì disendo,

Melodiosamente la spiegava :

Quei dì, vita de st' anima,

Dov'ei quei cari dì,

Che 'l mio diletto e mi

Fevimo un solo ?

Vien, ghe diseva, viscere,

Xe toi sti fiori, el pra,

Tuto quel che gh'è qua,

La vigna e 'l brolo.

E lu, al so sen strenzendome :

Sorela de sto cuor,

Son qua, e co mi l'amor,

Sastu, xe sconto ;

Più assae, più assae del netare,

Sti fiori, st'ua, sto miel,

De l'ambrosia del ciel

Più assae li conto.

Dov'ei quei dì de st' anima,

Quei cari e dolci dì ?

Ahi ! che 'l so cuor per mi

Xe perso e morto.

Se el sono lusingandome

Me fava indormenzar,

E ogni senso restar

Nel sono assorto,

Mai no dormiva st' anima,

Sempre sentiva in sen

La ose del mio ben

Che 'l soo chiamava.

Da quella note oribile,

Tropo la sento oimè !

Mai più co mi no xe

Quel che mi amava.

Amiga, amante, averzime,

Lassime, ò sentio a dir,

Veder, e po morir,

Quei occhi bei.

Tuto de bruma, vardime,

La testa son bagnà,

Che la note à lassà

Sui mii cavei.

Chi è stà, chi è stà quel demone

Che m' à fato parlar ?

Son spogia .... in leto, e alzar ....

Vien n'altra sera,

Che cussì a scuro i sandali

Trovar no podarò,

Tuta me sporcarò

Coi pie per tera.



Nega la boca, ah stolida!  
 Ma me strassina el cuor  
 Dove che xe el mio amor  
 Senza ritegno;  
 E l'ò sentio, sforzandome  
 La porta a pian a pian,  
 E l'è messo la man  
 Tra legno e legno,  
 E 'l m' à tocà, e tocandome,  
 Tuta go bu a tremar,  
 E nel fogo a giazzar  
 M'ò sentio tuta,  
 Ma n'ò savù risolverme,  
 Parlar no go possù,  
 No go fenio mai più  
 De star là muta.  
 Ah! tropo tardi, misera,  
 Ah! tropo tardi è stà,  
 Co la stangheta d'alzà  
 Perchè el vegnisse;  
 Che indispetio, scampandome,  
 Disendome infedel,  
 Cambiando ambrosia in fiel,  
 Da mi el sparisce.  
 Me xe cascada l'anima  
 Ch'ò sentio el so parlar.  
 Me son messa a chiamar,  
 Ma senza fruto;  
 No m' à tegnù le tenebre,  
 L'onor no m' à tegnù,  
 Solo d' cercà de lu  
 Sola per tuto.  
 Ma xe sta tuto inutile,  
 E xe passai tre dì  
 Che 'l mio diletto e mi  
 No xe più un solo.  
 Tre dì che nol considera  
 Più soi sti fiori, el pra,  
 Tuto quel che gh'è qua,  
 La vigna, el brolo.  
 Che i fruti soi l'abomina,  
 El so late, el so miel;  
 Tre dì che per mi el ciel  
 Xe sempre scuro.  
 Vu ninfè, amanti tenere,  
 Che forsi me ascoltè,  
 Che me desfo, disè,  
 Sì, ve sconzuro:

Se mai volè conoscerlo;  
 Missià col late e 'l vin  
 Xe el viso, e de rubin  
 Xe i lavri bei;  
 I ochi xe do fiacole,  
 Nissun fissarli è bon,  
 Negri come 'l carbon  
 Xe i so cavei;  
 La ose xe soavissima ...  
 Ma za l'è conossù,  
 Se fra de mile e più  
 L'è l'omo eletto!  
 Cerchelo, o ninfè tenere,  
 Cerchelo, e se 'l trovè,  
 Che me desfo, disè,  
 Sto cuor in peto.

Piena el so sen de lagreme, e i caveli  
 Sparsi qua e là sul colo e sul bel peto,  
 Cussì la se lagnava, aponto quando  
 El so diletto, che ascoltava scontro  
 Drio certe cane, za comosso e vinto  
 S'avea trato ai so pie. Mai cussì dolci  
 Cole lagreme i basi è stai confusi,  
 Nè mortal à gustà delizie tante,  
 Nè amor-s' à mai stupio, quanto osservando  
 Sta bela note, e sti felici amanti.

## EL CASETO.

Più interessada,  
 Che innamorada,  
 Come fa tante  
 Che ga l'amante,  
 Un dì Nigela  
 La pastorela  
 Do basi bei,  
 Per trenta agnei,  
 Ga dà a un pastor  
 Ferio d'amor.  
 Co è sta 'l doman  
 Ghe un novo pian;  
 Elpin ga fato  
 Megio contrato,  
 Perchè Nigela  
 La pastorela

Trenta baseti  
 Per do agneleti  
 Ga dà al pastor  
 Ponta in tel cuor.  
 Nel doman l'altro  
 Lu fato scaltro,  
 Ela inucada,  
 E innamorada,  
 I trenta agnei  
 Dai basi bei  
 La ga dà indrio  
 Po per idio!  
 Per un basin  
 Che ga dà Elpin.  
 El zorno dopo,  
 Questo mo è tropo,  
 Ela i do agnei  
 E 'l can co quei  
 Tuto la dona,  
 Za se doveva,  
 Per un baseto  
 Che a un bel museto  
 L' ingrato à dà,  
 Sora marcà.  
 Done un gran caso  
 Xe questo quà.

## EL GRANZO E LA SEPA.

Ghe gera successo a un granzo de trovar  
 Su la spiaggia del mar  
 Una sepa hutada  
 Da l' onda che la spiaggia avea lassada,  
 E metendo una zata sule drezze  
 Cussi da granzo senza far carezze,  
 Sepa, el gà dito, in lengua submarina,  
 Ti gà le zate che le par paina :  
 E la sepa, sentindo una durezza,  
 La xe fata de fero sta to drezza.  
 El granzo inzatava,  
 La sepa indrezzava,  
 Ognuno pensava  
 Col so natural.  
 El granzo granzava,

La sepa sepiza,  
 El frate fraliza,  
 La dona doniza,  
 El zentilomo zentilomeniza,  
 Lodoli sentenzioso à dito un dì,  
 No me ricordo più dove, nè a chi.

## EL PROFITO DE L' AMOR.

Dopo tanto navigar,  
 Dopo tanto travagliar,  
 In quel mar,  
 Che va tanti a naufragar,  
 Grazie al cielo ò tirà in tera  
 Grasso in ton de bona ciera.  
 No go bele, no go brute,  
 No go done, no go pute,  
 No go amanti,  
 Nè galanti,  
 Nè fiozzete,  
 O pupilete,  
 Nè siorete,  
 O comarete.

Dei gran trafeghi che ò fato  
 No me resta gnente afato,  
 So ridoto povareto  
 Da comprarme el mio fasseto  
 Per scaldarme,  
 E consolarme  
 Sul giudizio che ò salvà,  
 Su la vita, che ò campà.  
 Eco quello, amici cari,  
 Che in sti mari,  
 Quando pur la vada ben,  
 Eco quello che se otien.

## A LUCIETA.

Lucieta

Careta,

Sè un muso da basi,

Ma strambi xe i casi

In fato d' amor.

Gh'è un' altra

Più scaltra,

Che briga,

Che striga,

Che intriga,

Che proprio me stuzzega

La punta del cuor.

Lucieta

Careta,

Sè assae più ben fata,

Ma st' altra è più mata

Scaldada d' amor,

E l' omo

Xe un tomo,

Lo impizza,

Lo istizza

Le done, che stuzzega

La punta del cuor.

Schincheti,

Corneti,

Li fa squasi tute,

Ma quei dele astute

Xe salsa d' amor.

Culia

Xe galia,

Sa farli,

Impastarli,

In modo che i stuzzega

La punta del cuor.

Lucieta

Careta,

Za so un baronato,

So strambo, so mato

Co fazzo l' amor.

Vel digo

Da amigo:

Tochè,

Biseghè,

Ma st' altra me stuzzega

La punta del cuor.

## EL PROPONIMENTO.

Xe vero, ti stuzzeghi

Nol posso negar,

Ti è caro, ti è cocolo,

Ti sa bisegar;

Ma sento in te l' anima

Ancora el brusor;

No voggio più spase mi,

No voggio più amor.

Che colà xè un baronato,

E so mi quel che 'l m' à fato,

Nè se ga più pase in sen.

Sta quieto .... via cavite ....

Che corpo ustinà!

No serve .... via lassime,

O vado de là.

Sior no; no go laveri....

Sior no; no go man: ....

Sta quieto, o te morsego.

Va via, mato can.

Che colà xe un' ec.

Per dia, vado in colera:

Oh dio! che anema! ...

No no, caro Giacomo,

No farne del mal.

Che mostro del diavolo! ....

No posso sofrir ....

Che gusti da barbaro!

Me sento a morir.

Ah! ti xe el gran baronato.

Ah! de mi coss' astu fato,

Che go tanto fogo in sen?

## LE QUATRO STAGION.

## LA PRIMAVERA.

Quatordes' ani,  
 Poco de più,  
 Do ochieti umani  
 Che varda in su,  
 Ma che ogni silaba  
 Li fa sbassar,  
 Un pur de laveri  
 Da sbasuchiar.  
 Ghe vedè in viso  
 Vivo el color,  
 Ma un scherzo, un riso,  
 Ve lo sa tor.  
 Xe i cavei l'ebano  
 Neto, lustrà ;  
 Se la vol riderve  
 La perla è là.  
 El colo è bianco,  
 Colmeto el sen,  
 Xe tondo el fianco,  
 Xe 'l braccio pien.  
 Gamba sveltissima,  
 Scarmo el penin,  
 Le carne morbide,  
 E tuto fin.  
 La primavera,  
 Za la vedè,  
 E viva e vera  
 Sta puta xe ;  
 E la xe amabile,  
 Gavè rason,  
 Ma, assicurevelo,  
 No è tuto bon.  
 L'è tropo acerba,  
 Mi son sincer,  
 E un fruto in erba  
 No dà piacer ;  
 Che se scampandone

La vol scherzar,  
 Sempre no comoda  
 Quel so scampar.  
 La sta un mumento,  
 Mai co se vol,  
 E sempre a stento,  
 Sempre ghe dol.  
 Se la ve cocola  
 La fa sentir  
 Un fredo, un grizzolo,  
 Che fa dormir ;  
 Per un impianto  
 Ghe pianze el cuor,  
 Ma tanto pianto  
 No ga saor.  
 Dolce è la colera,  
 Se la ghe va,  
 Ma dura el nuvolo  
 Più de l'istà.  
 Xe belo tuto,  
 E fresco e san,  
 Ma acerbo è 'l fruto  
 Col tolè in man.

## L' I S T A'.

Bei occhi, ma che fulmina  
 Se mai la fè alterar ;  
 Bei denti, ma che morsega,  
 Se mai la fè irabiar.  
 Tempesta i slepi a refoli  
 Da quele bele man;  
 I afeti è capacissimi  
 De farve in cavruman.  
 La beca quanto un pulese,  
 La ruza da moscon,  
 La strepita, la pizzega,  
 Ghe vien le convulsion.  
 Se mi vogio depenzerve  
 Quela che m' à strigà,  
 Ste cosse descrivendove  
 Digo la verità ;  
 E no gh'è al mondo un' anima  
 Che no me diga a mi :

Perchè co sto arcidiavolo  
 Vustu passar i di ?  
 Se zonto: l' ochio fulmina,  
 Ma spesso el xe seren,  
 E amor svolazza, e cocola  
 L' ochio, el bel lavro, el sen ;  
 Rabiada la ve morsega,  
 Ma in tuto el nostro amor  
 No xe arivà sta diavola,  
 Che a morsegarme el cuor.  
 Do slepi, a confessarvelo,  
 Do slepi ò ricevù ;  
 Mà dolci afeti e lagrime  
 Quanti no ghe n' ò bu ?  
 L'è viva, l' è ardentissima  
 Co amor la fa impizzar,  
 Ma mi sto ardor teribile  
 Procuro de schivar.  
 La beca, sì, la pizzega,  
 Ma ve confora un miel,  
 Che sin nel cuor s' insinua,  
 Che drento no ga fiel.  
 Spaventa quando s' agita  
 Quel viso in convulsion,  
 Ma gh' è i gran bei spetacoli  
 In quella agitazion ;  
 Ghe xe dei zorni critici  
 Che 'l belo pol rapir,  
 Ma da là un poco un anzolo  
 La torna a comparir.  
 Negri i cavei finissimi,  
 Azuro l' ochio e pien,  
 Brazzo robusto e morbido,  
 Colmo e diviso el sen,  
 Vivo e grosseto el lavro,  
 Denti d' avolio, e fià,  
 Che senza droghe e aromati  
 Xe sempre imbalsemà.  
 La tinta vivacissima  
 Ch' al brun tenta inclinar,  
 Figura che una Palade  
 Faria desmentegar,  
 Se voi cussi depenzerla,  
 La fazzo al natural,  
 E tuto xe verissimo,  
 L' è Nina tal e qual.  
 E quei che disprezzandome  
 Da mato m' a tratà

Arivarìa a invidiarne;  
 Letor, cussi è l' istà.  
 Toni, tempeste, fulmini;  
 Un eccessivo ardor,  
 Tavani, mosche, pulesi,  
 E seco distrutor ;  
 Ma sempre el ton no strepita,  
 De raro el va a ferir,  
 L' aria e l' ardor se mitiga,  
 L' aguazzo sa vegnir,  
 E s' arde, se destermína  
 L' erbe e le biave el sol,  
 Natura xe in disordine,  
 L' istà gnente ghe pol :  
 Ma i zorni serenissimi,  
 El caldo temperà,  
 L' ombre, i boschetti, i zefiri,  
 El ciel tuto stelà,  
 Le piove che ressuscita,  
 Che xe a le piante un miel,  
 Le aurore, i bei crepuscoli,  
 Che ve depenzé el ciel,  
 I fiori odoratissimi,  
 I fruti, l' erbe, el fien,  
 Le biave, i campi fertili ,...  
 Scordeu tuto sto ben ?  
 No : se ghe xe dei radeghi,  
 Se fiero xe l' istà,  
 El pol ben compensarveli,  
 Se tanti beni el ga.

## L' AUTUNO.

Nè ragazza, nè vecchiota,  
 No grassona, ma grassota,  
 Morachiota,  
 Furbachiota,  
 Xe Tognota.  
 La ga i ochi de carbon,  
 La ga tuto el resto bon ;  
 La xe amiga, ma de cuor,  
 La se ride de l' amor :  
 Per servirve no la sua,  
 La ve tira zozo l' ua,

La ve porta là de tuto,  
 Pan, polenta, bon persuto,  
 E vin duro e marzemin,  
 E la svoda el canevin :  
 La ga atorno dei putei  
 Tuti grassi e tuti bei ;  
 Co de l'ua la li contenta,  
 E co un toco de polenta ;  
 E depenta  
 Nel so viso è l'abondanza  
 Senza amor, senza giatanza :  
 La xe franca, la xe schieta,  
 La ghe sta a la barzeleta ;  
 Dei-bei prindesi la impronta ,  
 La xe cara co l'è ponta,  
 La ve zonta  
 Sempre el vin in tela tazza,  
 E se sguazza,  
 E crescendo l'alegria  
 Tuti ponti se va via.  
 Per tuti i tempi,  
 Per tuti i dì  
 Sta cara Tognola  
 No xe cussì.  
 La xe inzucada,  
 La xe ingiazzada,  
 La va pensando,  
 E sbadagiando  
 Senza inacorzerse  
 De sbadagiar ;  
 La voria pianzervè  
 No la 'l vol far ;  
 Ma inacorzendose  
 De sto difeto  
 La core a sconderse,  
 O la va in leto,  
 E da un dì a l'altro  
 No ghe xe altro,  
 E la ve sfamega  
 Come fa el sol ;  
 La torna Tognola  
 Tuti la vol.  
 Come xe Tognola,  
 Cussì è l'autuno,  
 Che 'l corpo e l'anima  
 Consola a ognuno.  
 No xe caldo, no xe fredo,  
 Vedè tuto maturà,

No se vive più sul credo,  
 Se tripudia e se ghe n'à.  
 Chi va a là cazza,  
 Chi va a folar,  
 Chi 'l porco mazza,  
 Chi va a balar,  
 Chi co una cocola  
 Fa le brazzae,  
 Chi osela al rocolo,  
 Chi fa matae ;  
 Disnareti,  
 Chiasseti  
 Spasseti,  
 Prindeseti,  
 Baseti,  
 Scherzeti,  
 Col goto in man  
 De vin teran  
 L'amor se celebra,  
 Ma no el tiran.  
 Ma za de un velo  
 Se coverze tuto el cielo ;  
 Fa frescoto,  
 E la piova è qua deboto,  
 Za le nuvole se sera,  
 E la piova casca in tera.  
 Vigne, colì, campi e prai,  
 No pol esser spassizzai :  
 Seu per questo disparai ?  
 Porco e fogheto,  
 E un bon bichier,  
 Polenta e in leto  
 Co so mugier,  
 Ve fa dolci anca sti zorni  
 Benchè sie' stupidi e storni.  
 Ma la bora  
 Dal nord vien fora,  
 Torna el sol  
 Che fa belo el pian e 'l col,  
 E va via  
 Mal umor, malinconia,  
 Sin che ariva co l'inverno  
 Neve e giazzo sempiterno.

L' INVERNO.

Gera d' inverno, e gera in compagnia,  
 E xe sta messo in campo la question,  
 Se de l' istà l' inverno megio sia,  
 Lassando fora l' altre do stagion,  
 Che la grau moda adesso xe i estremi,  
 E drio la moda se propone i temì.  
 E voltandose a mi : — Vu che avè fato  
 Più volte le stagion, me dise un tal,  
 Cossa ve par ? l' inverno ad ogni pato  
 Xe megio de l' istà, l' è natural,  
 Ma no me fè parlar l' a fantasia,  
 Trovè fora rason e no poesia. —  
 — Mile grazie, ò risposto, ma no posso,  
 Che mi co la rason no me ne intrigo,  
 L' è tropo disgraziada, e ò visto in fosso  
 Per causa soa ai mi di più d' un amigo,  
 E se la vol che diga, la permèta  
 Che diga el mio pensier, ma da poeta.  
 — Sì, sì, dise una dona, el ga del sesto,  
 E lasselo dir su quello che 'l crede. —  
 — O mi, signora, me destrigo presto,  
 Ma no pretendo che i me daga fede,  
 E dirò, che l' inverno è tal e qual  
 Come una certa vechia da Noal.  
 Longa, sutila e senza carne atorno,  
 Co cento peli in testa tuti bianchi,  
 Co una bochea, che la ve par un forno,  
 E una brava sciatica in tei fianchi,  
 Coi ochi del color che xe el persuto,  
 E la tosse obligada in fefauto:  
 Se l' andava in carrozza, la diseva :  
 - « Tornemo in drio, me par de sentir vento ;  
 Se qual cossa per casa la faceva :  
 - « Sarè quella fenestra, e vegnì drento. » -  
 Co gera suto mai no la dormiva,  
 E col siroco no la digeriva.  
 Tuto quel che fa bela la natura,  
 E dà un idea de vita e de creazion,  
 Gera per ela inutile fatura,  
 La stava quasi sempre in t' un canton,  
 Quatordes' ore la passava in leto,  
 E l' altre a tola, o al zogo de picheto.

*Racc. Pots. Ven.*

Pur la diseva : — « Co una ragazzota  
 Sta mia tranquillità mi no harato ;  
 I me dirà, che son una marmota  
 Perchè no ziro atorno come un mato ;  
 Perchè passo i mi di fra quatro' muri,  
 E crio se no i me sera ben i scuri.  
 Ma quel leto, quel sono e quel magnar,  
 Quel bon goto de vin, quella partia,  
 I è gusti che de più no se pol dar,  
 E tuto quanto el resto xe pazzia,  
 E ordinarave mi, se comandasse,  
 Che chi no fa sta vita i li picasse. » —  
 Chi xe che de sta vechia no ridesse,  
 E che no schiamazzasse a piena boca ?  
 E pur se un poco se ghe rifletesse  
 L' inverno a far sta vita za ne toca,  
 E quasi tuti i gusti, a dirla schieta,  
 Finisce in pachio, leto e camareta.  
 Gh'è qualche inverno che se va stampando  
 Per chi xe de l' inverno protetori ;  
 Ma no l' è inverno, e po sto contrabando  
 Ghe costa a la natura dei suori ;  
 E come fa le done del bon ton,  
 Le vol refarse in st' altre tre stagion.  
 Se xe un zorno seren, gh'è 'l giazzo in tera,  
 E le gambe e la testa è a mal partio ;  
 A le vechie el borin ghe fa la guera,  
 E ben che abiè el tabaro sè servio,  
 Per tuti i busi el barbaro se fica,  
 Ve brusa i ochi, e 'l naso ve lambica.  
 Se xe siroco sguatarè de gusto,  
 E quel' umidità ve ariva a l' osso.  
 Nevega ? oh ! allora sì, boca che vustu !  
 Perchè o s' ingiazzì o l' umido sia mosso  
 Ve godè a spotachiar per el paese,  
 E gavè un stilicidio per un mese.  
 Senza fogo xe fredo, e 'l fogo impizza  
 E imiserisce, e val tre soldi un fasso ;  
 La stua ve inzuca, el caminar v' istizza,  
 Co l' aria dei café diventè un tasso,  
 Se un teatro se pien l' aria xe un bagnò,  
 Se nol ga zente ve impetrì sul scagno.  
 Dei reumi, de le ponte e de la tosse,  
 E de cento altri mali sfondradoni,  
 Mi no ve parlarò, che le xe cosse  
 Che sta stagion regala per bomboñi.  
 Curte ; l' inverno è morte, e stago saldo,  
 Che no se trova un morto che sia caldo.

## L' INVERNO CAMPESTRE.

Co vedo l' omo nel so bel aspeto

Pianzer sul mal che i so fradeli agrava,  
Smezzar co lori el pan, la vèsta, el leto,  
Difenderlo, scusarlo, e senza bava,  
Senza velen coreger el difeto,  
Contentarlo el capon come la fava ;  
Me lo perdoni Idio! no cambiarìa  
Co un genio celestial la sorte mia :

Ma co a la mente me presento st' omo,  
E pien de ingani e de malizia el vedo  
De la natura sbregar suso el tomo.  
Far che doveri e norme e legi e credo  
Deti amor proprio, e con ingano somo  
Robar, scanar, e far morir da fredo,  
Vorave aver chiuchia da un orsa el late,  
E andar, Dio mel perdoni, in quatro zate

In tempi cussì tristi, che za folta  
Xe la zente e corota, e dove scorla  
La fiacola infernal discordia stolta,  
Dove ambizioni, e ipocrisia sa torla  
Per so compagna, e va con ela in volta ;  
Dove calunia acuse ingropa e incorla,  
( Che cussì xe in cità ) soto qual vista  
Lo vedio mai! solo el pensier me atrista.

Xe per questo che in mezzo a le montagne  
Dal mondo slontanà, squasi romito,  
Passo tranquilli i zorni in ste campagne,  
E più el vilan, che 'l citadin, imito :  
Vedo natura, e ne le so scondagne  
Cerco de penetrar, ma no me irito  
Se un velo me nasconde i so portenti :

Fazzo dei versi, e passo i di contenti.  
Ma i di xe curti e tristi, el sol ne manca,  
Xe muti i prai, xe la campagna morta,  
Sbrufa le bore, i giazzi el monte imbianca,  
La neve de la vale xe a la porta ;  
Za za la fioca, za la tera è bianca,  
Se ferma i fiumi, o in giazzi i se trasporta,  
Cessa nei corpi el moto, e tuto indura,  
Nè par ch' abia più vita la natura.

Par che più vita no la gabia, è vero,  
A l' omo che no è fato per amarla,  
Ma quel che l' ama con un cuor sincero  
Anca nel so riposo el sa trovarla  
Sempre l' istessa a esercitar l' impero ;  
Elo la vede in tuto, e la ghe parla  
Nei venti, ne la neve, e ne la piovà,  
E forsi assae più granda el la ritrova :

Gh'è cossa che sia equal, maestoso inverno,  
Al lusente vestiario, a la bianchezza  
Che covre de la tera el velo esterno ?  
La nostra vita, non ancora avezza,  
Esita de mandar al senso interno  
Sto novo to splendor, e la belezza  
Dei to cristali; intanto el sol radopia,  
E l'iride del ciel in tera el copia.

Qua solitaria a cantuzzar se sente  
La passareta, che à trovà sgrafando  
Qualche granelo che à lassà la zente ;  
Là i colpi el contadin va radopiando  
Sul rovere che crola, e finalmente  
Se vede a tera el tronco venerando,  
Che serve al fio de fogo, e un tempo el pare  
Avea covertò da fresch' ombre e care.

La bora ruza, e 'l bosco la traversa,  
E za la ingoba i più robusti pini ;  
Sentì a zemer la pianta, che roversa  
La neve adosso ai piccoli piantini,  
E quei la so figura à squasi persa,  
Pur vedè fra la neve al par dei spini  
Le fogete a sbusar, che mai no i perde:  
E missiar quel bel bianco al più bel verde !

Ma el sol se mostra, e in mezzo a quel boschetto  
De frassini sfogiai scherza el so raggio :  
Fornii xe i rami d' un cristall perfeto,  
Ch' ora par fato a torno, ora d' intagio,  
Che va sempre cambiando in vario aspeto,  
E se de foga li fornisce el magio,  
Se primavera li fa allora bei,  
Pii maestosi l' inverno i xe de quei.

In mezzo de la vila a un largo fosso,  
Che l' istà serve a imbeverar le armente,  
Pii de cento puteli vedè adosso,  
Sbrissar sul giazzi, urtarse e darse spente,  
E far scurzi e cascar, e a più no posso  
Rider fra lori, e far rider la zente ;  
Altri za strachi, e fati un po più savi,  
Se fa un fogheto, e se cusina i ravi.



Ma dove che la strada a passo a passo  
 Porta inclinando al pie de la colina  
 Vedè i putoti a trar l'acqua sul sasso,  
 Che diventa una lastra cristalina,  
 E con inzegno sbrissar zoso a basso,  
 Facendo sestì a Menega, a Catina,  
 Che ghe soride, e sta vardando atente,  
 E de no far l'istesso le se pente.

Oh! come in mezzo a st' inocenti zoghi,  
 Come che scampa l'ore, e avanza bruna  
 La note in cielo! come in cento loghi  
 Fuma i camini, e l'aria più se imbruna!  
 Xe le famegie tute atorno ai foghi,  
 Quel missia la polenta, e quello suna  
 Le fregole che casca, e tuti aspeta  
 De dar l'assalto a la più bela feta.

L'ora e 'l silenzio al mio camin me chiama,  
 Dove me impizza el fogo la gastalda:  
 Più benigno calor, più bela fiamma  
 Dei camineti de cità ne scalda:  
 Co do tre amici, e co chi el cuor me infiamma,  
 Formemo un cerchio atorno, e sempre calda  
 Xe la conversazion, nè mai noiosa  
 Co gh'è dei amici, un fogo e la morosa.

La maldicenza, o 'l perfido soriso,  
 Mai no ga cuor de comparirne avanti,  
 Ma ingenuità, amicizia e scherzo e riso,  
 Del rustico camin za solo amanti.  
 O vin recenté che ve spruzza in viso,  
 O romatico, o dolce, a tuti quanti  
 Nina dispensa, e crostoli e pan fresco,  
 Maroni e pomi, e questo xe el rinfresco.

La vila nel silenzio xe sepolta,  
 E solo in stala el pulierin se sente  
 Nitirir scorlando la criniera folta,  
 Che la voglia del fien rende impaziente,  
 Le zampe el sbate, e pur nissun l'ascolta,  
 Ma sbragia el can, credendo che sia zente,  
 E alora dal filò qualcun vien fora,  
 E quieta el can, e varda in cielo l'ora.

Xe nei filò le done de la vila,  
 E i puti e le ragazze unite insieme,  
 Al caldo de la stala ognuna fila,  
 E i puti a le ragazze che ghe preme  
 Ghe fa roche e cesteli; ora ghe brila  
 Amor nel viso, ora i sospira e i zeme;  
 Istorie, o fiabe, le più verchie conta,  
 O dove la Versiera vive sconta.

Fa sti filò che in mascara se rida  
 Co Nina mia, co Nina dal cuor belo,  
 Che ste ragazze a cantuzzar la sfida;  
 Ma la luna, che brila in mezzo al cielo,  
 I nostri passi temerari invida  
 A l'aria averta disprezzando el gelo,  
 E al lume dei so ragi la belezza  
 Se contempla dei cieli e la grandezza:

Ah! che stacarse l'occhio mio no possa,  
 No possa mai de contemplarve, o cieli!  
 Ghe xe teatri al mondo, ghe xe cossa,  
 Che sia come sè va maestosi e beli?  
 Quel' anima brutal, che no vien scossa  
 A un spettacolo tal, coi pipistrelli,  
 Coi tassi, co le talpe e le marmote,  
 Viva a palpon ne la più negra note.

Vogia el destin che st'umile caseta,  
 Sti campi, e la mia Nina no me manchi;  
 Me sarà ogni stagion cara e diletta,  
 Che nassa i fiori, o che 'l teren se imbianchi,  
 L'istesso inverno, che spaventa e inquieta  
 Quei che vive in cità, co amor ai fianchi  
 De un nodo autor, che sto mio cuor no acusa,  
 Saludarà contenta la mia musa.

Oh co quanta dolcezza i zorni e l'ore  
 Ne passa insieme! e l'ale amor ghe impresta,  
 Ne vede el sol, e 'l gode, e in mar el core,  
 Ma la note vien drio, la note resta:  
 Che se al to aspeto el nostro mondo more,  
 E xe natura scolorida e mesta;  
 Oh note dei amanti confidente,  
 Ti ne xe cara, e te godemo arente.

Cara in quel'ore che lavora Nina,  
 E i bei dei sul laorier presti la move,  
 Co interrompe el lavoro un'ochiadina  
 Che tuta dolce sin al sen ne piove,  
 E quando un'amorosa canzoncina,  
 In ton la canta, che 'l mio cuor comove,  
 E co amor sconto in la so bruna vesta  
 Ore più dolci ai nostri afeti impresta:

Ore più dolci, e cresemæ da un nodo  
 Tessuo da amor, ma che l'onor no sdegna,  
 Che durarà tra nu costante e sodo  
 Insin che morte a romperlo no vegna;  
 Sì, più che t'amo, o Nina, e più m'inodo,  
 E sempre più d'amor te trovo degna,  
 Nè xe a maravegiarse; amor t'ha fato  
 Per far, col te cognosce, ognun beato.

Al mio ritiro società no manca,  
 Picola in vero, ma genial, ma rara,  
 Nissun sbadagia mai, nissun se stanca ;  
 Se ragiona, se canta, se prepara  
 Qualch'ino a la virtù, che 'l cuor rinfranca,  
 A l'amor dolce, a l'amicizia cara ;  
 E se nevega, o supia tramontana,  
 Se magna insieme al fogo, e se tracana :  
 Se un amico lontan in sto mumento  
 Amicizia conduse, e porta e spenze,  
 Se fa una festa co l'ariva drento,  
 Chi lo chiapa, chi 'l basa, e chi lo strenze,  
 Chi ghe scorla la neve, e chi 'contento  
 El caso sul camin scrive o depenze,  
 E Nina cria, che la 'vol logo anch'ela  
 Per farghe ciera, e la se fa più bela.  
 Vegna pur zorni tristi, e 'l sol ne manchi  
 Sia muti i prai, sia le campagne morte,  
 Sbrufi la bora, e che 'l teren s' imbianchi,  
 Purchè no arivi a penetrar ste porte,  
 E a profanarne sti onorati banchi,  
 Zente stolidi, o tristi, un'altra sorte  
 No vorò mai dal ciel col me destina  
 Sti amici, sti campeti, e la mia Nina.

#### L' INVERNO CITADIN.

Mentre al tropico oposto el sol se inalza,  
 E i benedeti influssi el ghe comparte,  
 E al nostro invece el duro inverno incalza,  
 E par morta natura in ogni parte;  
 Mentre el vilan se stropa sù, e se calza,  
 E a le fenestre mete sù le carte,  
 Co i campi è muti, e co la neve e 'l vento  
 Per tuto sbrufa, e vien per tuto drento ;  
 L' inzegno citadin, che sempre tenta  
 De vincer la natura ad ogni costo,  
 Radopia i sforzi, e gnente lo spaventa ;  
 El vol che sia in cità tuto a l'oposto ;  
 No xe che za nol veda, e che nol senta ;  
 Natura mai non abandona el posto ;  
 Ma 'l mascara, el compensa, el colorisce ;  
 El se ilude, l'ilude, e 'l se applaude.

Intanto perchè i dì xe tristi e scuri  
 Lu fa che i zorni ghe diventa note ;  
 E 'l sono e i sogni, a torto diti impuri,  
 Che 'l delizioso sugo de la bote,  
 Le ochiae che impizzarave i sassi, i muri,  
 Le tartnfole, i cardi, le carote,  
 Ga preparà cenando in compagnia  
 Sin dopo mezzo dì lo porta via.  
 Fra i sbadagi, el tabaco, una gratada,  
 E un poco de caffè passa un' altr' ora ;  
 E dopo una potente impelizzata  
 Co molto ardir se vien dal leto fora ;  
 Xe la fassina pronta za e impizzata,  
 E 'l sacco preparà su la so stiora,  
 La nota dei teatri e del festin  
 Xe messa sora el solito taolin.  
 Resta do orète, e le marmote e i tassi  
 No ghe n' a tante, perchè sempre i dorme :  
 Le xe anca trope a far cinquanta passi,  
 E a contemplar tre o quatro bele forme ;  
 E avanzarave da brusar do fassi,  
 Ma tropo a la natura xe conforme  
 Scaldarse al fogo, e un fasso o una fassina  
 Scombussola ogni testa citadina.  
 Ghevol un caldo citadin, che sia  
 Calor bensi, ma tempà da l'aria,  
 Che 'l polmon manda fora incarbonia,  
 Che da quela vital xe molto varia,  
 Ma a dir el vero assae più incivilla ;  
 Cussi el cervelo certo no zavarìa.  
 Che questa, e 'l fumo che un fornello porta  
 In un dolce sopor ghe lo trasporta.  
 Gh'è paragon co l'aria sempia e pura,  
 Che a cièlo avertò ogni mortal respira,  
 Che da principii soli la natura  
 Ga savesto missiar, nè più ghe inspira,  
 Co quela d'una volta bassa e scura,  
 Che grassa su la testa se destira,  
 Arichia da l'efluvio dei ventricoli  
 E da l'esalazion d'altri ammicoli ?  
 Se va donca al caffè, piacer, delizia  
 De l'omo citadin in vari tempi,  
 Là se sragiona, ma co gran perizia,  
 Mentre no gh'è ignoranti, e no gh'è sempi,  
 E se ghe n'è ro i manca de malizia ;  
 Solo la razza dei politici empi  
 Xe sempre muta, perchè gh'è dei spioni,  
 Che inchieta ochiae, sorisi, ati e scorloni.

Ma xe l' ora del pranzo, e presto presto,  
 Senza vardar se ancora el sol sia in cielo,  
 Se va a incontrarlo; za xe pronto e lesto  
 Un lume de candela assae più belo.  
 El sol per verità no ga un gran sesto,  
 Lo 'vede tuti, e po l'è sempre quèlo,  
 Che'l chiaror de più lumi citadini  
 Lo vede chi ga inzegno, e ga zechini.  
 Ze el pranzo silenzioso, o sussurante,  
 Secondo xe composti i comensali,  
 Sempre za grato, e sempre consolante,  
 Mentre se magna in quiete da animali,  
 O 'l dialogo xe vivo e interessante,  
 Come xe quel fra le galine e i gali;  
 E un delizioso cocodè confuso  
 De la freda rason soprimè l' uso.  
 Levè dal pranzo per el più giazai,  
 Ma se core al caffè, che po xe un forno,  
 Se zoga là le impertineuze ai dai,  
 Chi le riceve e chi le dà in ritorno;  
 Se fa un comercio de odorosi fiai,  
 E a le bele che gh'è se ghe va intorno;  
 E quando che la fola xe più forte  
 I te le struca in tel passar le porte.  
 Le bele no xe tute alora in fiera,  
 Molte sospira el peruchier, qualcuna  
 Xe in conferenza co la camariera,  
 Per farghe po al mario bater la luna:  
 Chi aspeta el moroseto de la sera,  
 E chi de bionda se trasforma in bruna;  
 Che 'l gran ton no se trova in tabernacolo  
 Se no mezz' ora prima del spettacolo.  
 Manca tre orette a mezza note, e alora  
 I teatri scomenza a popolarsse;  
 Vari el coturno e vari el soco onora;  
 Quei per altro che vol paradisarse,  
 Val a dir el bon ton, che più assapora,  
 O a le bufone musicali farse,  
 O al melodrama serio, ad ogni costo  
 O ben o mal i vol trovar un posto.  
 Co 'l teatro xe pien, e che la fola  
 Ve fa star fissi, uniti e ben stivai,  
 Xe un caldeto gustoso che descola;  
 E se per accidente sè suai,  
 Vien l'aria de la porta, e la consola;  
 Se a l'incontro sè pochi e sparpagnai  
 Xe freddo è vero, ma lo fa scordar.  
 Le visite geniali e 'l sussurar.

Quel sussuro gentil che mai no fala  
 Se nò al mumento che se ascolta i bali,  
 Più grato assae de quel de la cigala,  
 Che missià coi strumenti musicali  
 Forma de toni una diversa scala,  
 E fa che dei melodiosi animali  
 No se senta la ose che in confuso  
 Per sbaterghe, o fischiar, secondo l' uso.  
 Gl'è dei zuconi che se fica in testa  
 De spender i so bezz per sentir,  
 Pensando che per lori sia la festa,  
 E invece i fa el teatro divertir.  
 I taroca, i cria zito, i fischia, i pesta;  
 E a le bele, che mai la vol finir,  
 Da brutali, i ghe dise, sfondradone;  
 E tuti ride, e ride anca ste done.  
 Xe po el teatro silenzioso e quieto  
 Co gh'è un tendon da novo, o qualche scena  
 D'un soterraneo, o pur d'un bel tempieto,  
 O sul mumento del rondò in caena;  
 No se tira po el fià co gh'è el baletto;  
 Se tase sempre su la danza piena;  
 E compensa sto poco de riposo  
 Un susseguente strepito armonioso:  
 Ma xe calà el sipario, e za i lumini,  
 Che se stua in bota, el so profumo esala,  
 E intanto che i putoti; i licardini,  
 Farfalizza a le bele su la scala,  
 Le bontoniste, e i bontonisti fini,  
 Che in genere de gusti mai no fala,  
 Socia in palchetto: infati le marmote  
 Core al casin sonada mezza note.  
 Là le croniche, dite scandalose,  
 Dà quei sempioni che vol far i gravi;  
 Ghe xe nove galanti, morbinose,  
 De le done più alegre e più soavi,  
 A diese, a dodes' ochi, soto ose  
 I bontonisti più prudenti e savi  
 Le conta longhe e larghe a st' altre done,  
 Che ride e gode, e che no se scompone.  
 Fenio el racconto, e i fati comentai,  
 Vien l' ora conveniente del casin,  
 Ma andarghe in bota xe da desparai,  
 Bisogna anca al caffè far un provin.  
 Xe i caffè alora tuti popolai,  
 E no gh'è più un sofa, nè un careghin,  
 Ma i xe po paradisi, e quella fola,  
 Quel bogior, quel sussuro, ve consola.

Mezz'òreta e po basta, e alfin se ariva  
 A la più bela istituzion, più sana,  
 Che possa aver un che nel mondo viva;  
 Questo è 'l casin, d'ogni delizia umana  
 Vera appendice. A torto è stada priva  
 Roma ai so tempi, oh Romà, Roma insana!  
 Nè tuta Atene coi so gran talenti  
 No ga savesto far de sti portenti.

Cento compagni che no se conosce,  
 Ma che se unisce, e che convive insieme;  
 Che xe tuti paroni, e che fa cosse  
 Tuti diverse, e qualche volta estreme;  
 Chi chiacola, chi mormora, chi tosse,  
 Chi incalza una doneta che ghe preme:  
 Questi magna, quei zoga, e quello dorme,  
 E chi sbadagia in musicali forme.

De le done se basa e se strabasa,  
 Disendoghe al vicin: « che sfondradona.  
 La vien co st'aria, e i vol po che se tasa?  
 E st'altra dise a un altro: co grassona!  
 Mi se fusse cussi starave a casa  
 A far quel che faceva siora nona. »  
 E le ve conta su vari caseti,  
 E se gode a sentir sti potachieti.

Come che xe la società missiada,  
 (Che qua sta el bon, e che ghe xe de tuto;  
 Cussi nel zogo vien adoparada  
 Qualche astuzieta, e no senza costruto;  
 O sbalo sconto, o posta radopiada,  
 Ma qualche volta el caso se fa brutto;  
 Perchè la se scoverse, e al duro passo  
 Se se strappazza, e se fa un po' de chiasso:

Ste cosse rende viva l'adunanza,  
 E dà logo a graziose satirete,  
 Per la bela qualcun tol su la lanza,  
 Che s'è sconto el panfil ne le carpete,  
 E acusa un'altra che gavea l'usanza  
 De butar via sbalando un quatro, un sete:  
 Ste satire, ste acuse, sto fermento,  
 Xe de molti casini l'ornamento.

Tuti per altro no xe a questi uguali,  
 Ghe n'è de quei che se pol dir licei,  
 La saviezza, onestà, chiari natali,  
 Casta bellezza, purità da dei,  
 Spirito sòdo, grazie naturali  
 Vive e trionfa. Oh questi po xe bei!  
 In questi se sè degno andeghe drento,  
 E vedarè che restarè contento.

Xe cinque boti, e del paradisetò  
 La fola a poco poco se schiarisce:  
 « Che coteghi! a cinque ore andar in leto? »  
 Cria do tre done, e st'altri ghe aplaudisce.  
 Se scherza su sto massimo diletto,  
 Una nova partia se stabilisce:  
 Che se ghe chiama la partia barona,  
 E se finisce co i matini sona.

Allora se va in leto in santa pase,  
 Che 'l zorno citadin za xe spario,  
 E in braccio al sono tuti i sensi tase,  
 Tuto quanto el bon ton xe sepolio.  
 Nè 'l sol ardisce entrar ne le so case,  
 Che quando mezzo el corso el g'ha finio,  
 E qualche volta mai, che qua sta 'l ben,  
 Viver in casa dove 'l sol no vien.

Xe insolenti i so ragi a chi xe avezzo  
 Viver al dolce lume de candela;  
 I scovre tropo, e no i ga mai quel vèzzo  
 De confonder la brutta cola bela.  
 Xe la zentagia che ghe dà sto prezzo,  
 Qualche poetastro e qualche sciocarella:  
 In suma tuti quanti quei animali,  
 Che gode de le cosse naturali.

Ma se se svegia e torna un altro zorno  
 Come xe quel che vo descrito adesso.  
 Varia i trati, per altro, ma 'l contorno  
 Poco su poco zo sempre è l'istesso.  
 Fa de le impertinenze chi xe storno,  
 Le bele se desmentega el so sesso:  
 Gh'è mascare, gh'è cene, ghe xe bali,  
 E ghe xe i randevù sentimentali.

Perchè la vista non aver da lince  
 E trapassar quei misteriosi muri?  
 Se vedaria chi ardito assalta e vince,  
 E i fredì amanti che no xe sicuri;  
 E quele che una prova no convince;  
 E quei che amor fa più costanti e duri;  
 El fier, l'afetuoso, l'indecisa,  
 E la sentimental nova Eloisa.

Ma xe za un pezzo che anca i muri parla,  
 E i misteri d'amor no è più misteri:  
 Qualche volta le dame sa contarla,  
 E qualche volta zonta i cavalieri;  
 E chi la sa se gode a sparpagnarla;  
 E cresce ne le done i desiderì,  
 E diventa le timide sposine  
 Tante sentimentali messaline.

Co sta vita beata no gh'è inverno,  
 No gh'è che 'l nome. e 'l nome no xe cossa :  
 Gh'è chi prova, xe vero, un freddo eterno  
 Che sta in t'un magazen, che xe una fossa ;  
 Dei vecchi senza fogo nè governo,  
 Dei mezzi nui, che ga la carne rossa,  
 Dei senza impiego o lavoratori a spasso,  
 Che no ga la polepta, e no ga un fasso ;

Ma questi chi sta in leto mo i li vede,  
 O se i li vede i tol tabaco e i passa.  
 In fati a sti birbanti darghe fede  
 La sarave una cossa tropo bassa ;  
 E sempre in ogni quadro se travede  
 Qualch'ombra che più belo el quadro lassa :  
 E sta zente strazzona e bisognosa  
 Xe una vista ridicola e curiosa.

Depenzè, se avè cuor, fredi poeti,  
 Usi a lodar la semplice natura,  
 De l'inverno campestre i tristi ogeti  
 Se volè far morir da la paura ;  
 Paragonè quei stolidi dilet  
 Ai gusti che un teatro ve procura,  
 A società brillante e numerosa,  
 A la vita noturna e deliziosa.

Depenzerà qualch'omo malinconico  
 Che sta senza rimorsi in t'una vila,  
 Che in tute le so azion xe sempre armonico,  
 Che 'l piacer come un chimico distila,  
 Che fa l'amor, ma che 'l so amor xe cronico  
 Co l'innocente pastorella Eurila,  
 Che no sa che coi amici conversar ;  
 Cosse per dio da farve sbadagiat.

Un omo che divide i zorni e l'ore  
 Fra 'l studio, l'esercizio e quattro amici,  
 Coi quali el magna al fogo, o che 'l discorre,  
 Disendo fra de lori : « Oh co felici  
 Xe per nu i zorni, oh come el tempo core,  
 Senza rimorsi e senza altri pasticci ! »  
 Un omo, ch'el ciel chiaro, el sol, le stele,  
 E la so Eurila tol per cosse bele ;

Che i so gusti xe far che sia contenti  
 Quei stupidi vilani che 'l ga attorno,  
 Che vede in la natura gran portenti ...  
 Ma me perdo in ste inezie, e no so storno  
 A depenzer sti automati viventi,  
 Che no à de uman che l'anima e 'l contorno.  
 No, no, fredi poeti, a vu ve toca,  
 Mi voi restar co tuto el dolce in boca.

E dir che un paradiso sarà belo,  
 Se ghe sta drento e se diverte i dei ;  
 Ma che un paradiso xe anca quello,  
 Che i nostri citadini semidei  
 Se fabrica l'inverno soto el cielo ;  
 E che se mai vegnisse in testa a quei  
 De goder la città per un mumento,  
 I lassa el cielo, e i vien a star qua drento :

## LA PRIMAVERA CAMPESTRE.

Tornada è primavera :

L'ò vista mi, sa Nina,  
 La gera da quel frassene  
 Da drio de la colina,  
 Là da quel'acqua limpida  
 Dove ti va l'istà.

Oh, se ti avessi visto !

Come ai so pie nasceva  
 A mile i fiori teneri,  
 E l'acqua che coreva  
 Geri pian pian, che strepito  
 Ancuo che la sa far !

De anemoli e giacinti

L'ha fato su un mazzeto,  
 E i lili, i lili candidi,  
 La se li à messi in peto,  
 E i diventava palidi  
 Co la li aveva in sen.

Oh quanto, quanto Nina !

Che la te somegiava.  
 Benche, per non olenderte,  
 A pena la vardava :  
 Ma ti l'istesso, nonola,  
 La me pareva, ti.

Giusto in quel ponto, cara,

Nasceva in ciel l'Aurora,  
 I oseli saludandola,  
 Saltava tuti fora,  
 E bela più del solito  
 Ancuo l'avea spontà.

Parea che la disesse :

« Del sol mi son foriera ;

Ma pur d'un sol benefico,  
 Che no ardarà la tera,  
 E solo a le so viscere  
 Moto darà e vigor. »  
 I monti, la campagna,  
 Quei prai, quel bel boschetto,  
 Dove ti cori a sconderte  
 Par farne a mi dispeto,  
 Che colpo, che spettacolo,  
 Che i gera ancuo per mi!  
 Voltava l'occhio ai monti,  
 No i gera più canui,  
 Fissava sora i albori  
 Che gera tuti nui,  
 E a colpo d'occhio a nascerghie  
 Vedeva e fogie e fior.  
 Vedeva i prai coverti  
 De mille e mille fiori  
 Missiar a ün verde languido  
 Quei cussi bei colori;  
 E andava via indorandoli  
 A man a man el sol;  
 L'istessa primavera,  
 Che gera là sentada,  
 A veder sto spettacolo  
 L'ò vista za incantada,  
 E verso el ciel fissandose  
 Zontar suso le man.  
 Come che la disesse:  
 « O autor d'ogni creatura,  
 Quanto che te ringrazio,  
 Che per mia man natura  
 Ti torni bela e zovene,  
 E rinovar ti fa! »  
 Oh se ti avessi visto  
 A pie de la colina  
 Quele disdoto piegore,  
 Quele che ga Catina,  
 Saltar come fa i daini,  
 E farla disparar!  
 Le armente de Lucietà;  
 E i quatro vedelati,  
 Che la conduse al pascolo,  
 Pareva tuti mati  
 Urtandose, scornandose,  
 Senza saver perchè.  
 I osei da un ramo a l'altro  
 Cantando i saltuzzava,

E dopo sbecolandose  
 Insieme i smorosava:  
 I smorosava, cocola:  
 Fèmo cussi anca nu.  
 E dopo sora un ramo,  
 Fiorio mument prima,  
 Dove scherzava un zefiro,  
 I saltuzzava in cima,  
 E i se formava un biscolo  
 Col solo gorghizzar.  
 Scomèto che anca Lila,  
 La serla pastorela,  
 Che gera soto l'albero  
 Tutta racolta in ela,  
 Capiva che sta musica  
 Ghe la ispirava amor.  
 Mai m'ò godelsto tanto  
 Quanto che sta matina:  
 Oh primavera amabile!  
 No averte a mal, sa Nina,  
 Che gnanca avvicinar meghe,  
 Te zuro, no ò tentà.  
 Anzi un mumento dopo  
 Che m'è scampà un'ochiada  
 No l'ò più vista, acertite,  
 E via la gera andada,  
 E à fato fredo subito,  
 E inuola s'è el ciel.  
 Allora si son corso  
 Al logo che la gera,  
 E ò tolto su sti anemoli,  
 Che xe restai là in tera,  
 E ò tolto su ste fragole,  
 Che te consacro a ti.  
 Ti ridi? ti me burli?  
 Donca no ti agradissi?  
 Xe vero, el don xe povero:  
 E pur se ti capissi  
 Che insieme a lu gh'è st' anima  
 Che unito gh'è sto cuor;  
 Forsi .... ti ridi ancora?  
 Ma quei bei lili .... Nina ....  
 Ma quel mazzeto .... mostrilo:  
 Sconderlo! a la colina!  
 Chi? ... cossa? oh sempio, oh stolido!  
 Donca ti geri ti!  
 Ti! ma i cavei? quel velo?  
 Ti geri trasvestia?

Dimelo, anima mia :  
 Ti à fato per sorprendeme.  
 Barona che ti xe ! ...  
 E mi, che me diseva  
 « L' amor no te perdona,  
 Se via de la to cocola  
 O dea ti fissi, o dona,  
 E stava' come un pampano,  
 Nè ardiva de fissar !  
 Ma se go tolto in falo  
 Ti per la primavera,  
 Chi pol più somegiarnela ?  
 Chi più de ti qua in tera,  
 A quel carmin dei lavri,  
 A l' ochio celestial ?  
 A quele carne morbide,  
 Tra dona e tra putela,  
 A quei caval finissimi,  
 A quella boca bela,  
 A tuto, a tuto, nonola,  
 Quel belo che ti ga ?  
 Ah ! che una primavera  
 Ti xe cussì perfeta ;  
 Che, o no la gh' è, assicurate,  
 O ti xe ti, Nineta,  
 Felicità de st' anima,  
 Delizia de sto cuor.

## LA PRIMAVERA CITADINA.

L' aria xe tepida,  
 Vien primavera,  
 Fiorisce i bocoli,  
 Ride la tera,  
 E torna i zefiri  
 A svolazzar,  
 I coli floridi,  
 I verdi prui,  
 De viole e anemoli  
 Tutti smaltai,  
 Invida i omeni  
 A vilegiar.  
 « Son persuasissima,  
 Cari poeti,

*Racc. Poes. Ven.*

Andè, godevela,  
 Fè dei soneti,  
 Che contentissima  
 Stago in cità. »  
 Cussì, giustandose  
 Co del rosseto,  
 La bela Filide  
 Trà via el libretto,  
 Che ste sempjagini  
 Ga registrà :  
 « Fra mezzo ai albori,  
 Mi sepolirme ?  
 Povari pampani,  
 Voi divertirme,  
 Nei meglio circoli  
 Vogio sociar.  
 Come che un stolido  
 De un oseleto,  
 De l' erba, un alboro,  
 Qualche fioreto,  
 Podesse un' anima  
 Felicitar !  
 Se dei volatili  
 Desiderasse,  
 De quei più piasevoli  
 Che me cantasse,  
 Subito, subito,  
 Li posso aver.  
 E se 'l capricio  
 Go de infiorarme,  
 A mazzi i bocoli  
 Posso comprarme  
 Con un daquindese  
 Dal mio fiorer.  
 Ma caffè, circoli,  
 Partie brillanti,  
 Cenete, musica,  
 Schiapi de amanti,  
 La solitudine  
 No me darà »  
 Brava, ghe replica  
 La camariera,  
 Co quellè grazie,  
 Co quella ciera,  
 L' andar a sconderse  
 Saria pecà !  
 — Son una femena,  
 Cussì i m' à fato ;

Ma se so un zovene  
 Devento mato  
 Solo a vardarmelo  
 Sto figurin :  
 — Co ste to frotole  
 Devento rossa :  
 No so sta Venere,  
 Ma go qualcosa,  
 So sana e zovene,  
 Go del morbin ....  
 — E po co i omeni  
 Ve cora drio ;  
 Co 't più teribile  
 Lo fè un conio,  
 Una marantega  
 Per dio, no sè. »  
 Ma ne la camara  
 Entra fumanti  
 Tre o quatro zoveni,  
 Za tuti amanti,  
 Felicitandola  
 Del so levè.  
 Chi porta un bocolo,  
 Chi un regaletto,  
 Chi à l'occhio torbido,  
 Chi 'l soriseto,  
 E a tuti, Filide :  
 « Cari, bondi :  
 Stago malissimo,  
 Me dol la testa,  
 Ma pur voi moverme ;  
 Sì, sì : a la presta  
 Quel nelson, Momola :  
 Vegniu co mi ? »  
 El no decidere  
 Su sta domanda  
 Saria gravissima  
 Colpa nefanda ;  
 Un vegno unissono :  
 La bela va.  
 Chi ghe sta a latere,  
 Chi sta da drio :  
 La bela trotola  
 Col più gran brio,  
 E ochiac la sfamega  
 De qua e de là.  
 Come xe el solito  
 Se ariva in piazza :

Più d' una Venere  
 De umana razza  
 Su e zo la pertega  
 Col so perchè.  
 La nostra Filide  
 Le fissa tute ;  
 Le ochiae teribili,  
 Le ingiurie mte ,  
 Za xe reciproche,  
 Come savè ;  
 Ma po la semena  
 Più fortune  
 Sora dei omeni  
 Le dolci ochiae,  
 Spesso zontandoghe  
 Qualche sestin ;  
 E no la termina  
 La spassizzata,  
 Che dièse o dodesa  
 L' à circondada ;  
 E a tuti Filide  
 Ghe fa el bochin,  
 Co la gà un numero,  
 Che sia bastante  
 Per poder rederse  
 Dona trionfante,  
 La va altri pelaghi  
 A scorsizzar :  
 « Che miserabile  
 Passegio è questo ?  
 No ghe xe uu'anima  
 Che gabia sesto ;  
 Chi vol me seguiti,  
 Vogio cambiar. »  
 Cussi disendoghe,  
 Verso la riva  
 Va via sfilandose  
 La comitiva,  
 E ride el popolo  
 Da stolidon.  
 Xe in campo el spirito,  
 E in t'un mumento  
 Spiritosissimo  
 Xe l' argomento,  
 Che a tuti Filide  
 Ghe impresta el ton.  
 Se fa tripudio  
 D' equivocheti,



Bomò finissimi,  
 Pronti scherzeti,  
 Tuto se dopara,  
 E tuto va.  
 Sempre istancabili  
 No xe le bele ;  
 Se assae le trotola,  
 Le cede anch' ele,  
 Benchè recalcitri  
 La volontà :  
 Vorave Filide  
 Andar più avanti,  
 Ma 'l fianco gravita,  
 Xe i pie pesanti :  
 Dov'è, la mormora,  
 Dov'è el caffè ?  
 Cigando, i replica :  
 « Semo a castelo,  
 Marina veneta,  
 Quello è 'l cartelo.  
 — Lo vedo stolidi,  
 No me cighè.  
 In fati quindese,  
 Che ciga tuti  
 Co disarmonici  
 Tonazzi acuti,  
 Pol una Venere  
 Convulsionar.  
 Novo spettacolo  
 Se ve fa avanti.  
 De ninfe adriache,  
 E de galanti,  
 Vedè la camara  
 Formigolar.  
 Ma col so esercito  
 Filide avanza ;  
 Tuto riceverlo  
 No pol la stanza,  
 E 'l più gran numero  
 Xe a ciel seren.  
 Un sito comodo  
 Trova la bela ;  
 Tuto è silenzio,  
 La tase anch' ela,  
 Però giustandose  
 La testa e 'l sen.  
 Le ninfe adriache  
 Come le bisse

Sora de Filide  
 Se incanta fisse,  
 E le la esamina  
 Da 'capo a pie.  
 Sta calma estatica  
 Vien interota ;  
 De qua se mormora,  
 Là se barbota,  
 Chi cria rosolio,  
 Chi chiama té.  
 Se forma circoli,  
 Cresce el sussuro,  
 Se sente un strepito  
 Più del tamburo,  
 E se fa massima  
 La confusion ;  
 Nasce dei scandoli,  
 E fra le prede,  
 Che à fatò Filide,  
 Qualcun se vede  
 A far el perfido  
 Sora el porton.  
 Poveri diavoli !  
 I se conforta :  
 Star come i totani  
 Sempre a la porta  
 Xe tropo barbaro  
 Tropo crudel !  
 Li scovre Filide,  
 E in t' un occhiada  
 Vedè l' anatema  
 'Za fulminada :  
 Destin terribile,  
 Per chi è infedel !  
 « Se co una scufia  
 Metè una gata,  
 Per dio quei stolidi  
 Va là e la grata :  
 I me fa stomego ;  
 No i so sofrir ; »  
 Cussi disendoghe  
 Ai più costanti,  
 La nostra Filide  
 Se mete i guanti,  
 Segno certissimo  
 Del so partir.  
 Lo vede i perfidi  
 Quel fiero segno,

I lassa l' idolo,  
 L' idolo indegno,  
 Ma è tuto inutile  
 Nè gh'è pietà.  
 Dei novi subito  
 Ghe vien arente,  
 Co quei la chiacola,  
 Co st' altri gnente,  
 E la scomunica  
 Ga za operà;  
 Che no gh'è un'anima  
 Fra quei disdoto,  
 Che a sti sismatici  
 Ghe fazza un moto,  
 E i se determina  
 Lassarla star.  
 « Andè col diavolo,  
 La bela dise,  
 Co mi bânzigoie  
 No fa raise;  
 Ma dovareissimo,  
 Sau dov' andar?  
 A l' oratorio  
 Dei mendicanti.  
 Ghe xe la musica,  
 Xe zorni santi;  
 Andemo subito,  
 Femo del ben.  
 Za co tre trotoli  
 Se ga i coreti,  
 Che no me sofego  
 Coi zendaleti;  
 E là, stufandose,  
 Se va e se vien.  
 Ma sento el stomago  
 Che vol ristoro:  
 Corio al salvadego, (141)  
 O vadio al, coro?  
 Rispondè, pampani,  
 Dove? e cusai?  
 Tuti xe pensili,  
 Nissun risponde;  
 Più che la strepita  
 Più i se confonde:  
 Stupidi, stoldi,  
 E i vien co mi?  
 La va a la musica,  
 La xe in coreto;

In bota el nomolo  
 Ghe dà el libreto:  
 Sampson ... « Che titolo!  
 Disè, disè? ...  
 Sanson; quel diavolo,  
 Quel che filava?  
 No, quello è l' Ercole.  
 Quel che i tosava? ...  
 Latin ... petevelo,  
 Tolè, tolè.  
 Tasè, petegoli,  
 Tasè, che i canta ...  
 Chi xe sto cancaro?  
 Vergine santa  
 Che scagno incoomodo! ...  
 Deme quel là;  
 Questo me bagola:  
 Cossa ... el dueto ...?  
 Delai. (142) eo l' oboe?  
 Oh benedeto!  
 Mi za lo strucolo;  
 Che 'l vegna qua.  
 Fè che 'l lo replica:  
 Vogio Delai ...  
 Zente senz' anima,  
 Ste là impalai?  
 Che bela musica! ...  
 Caro colù! »  
 Una dolc' estasi  
 La porta via,  
 Tuti xe atoniti;  
 La bela 'cria:  
 Presto al salvadego,  
 No posso più ...  
 Eccla in tavola:  
 Quanti schèrzeti:  
 Che ochiae che bisega!  
 Che prindeseti.  
 E su le fritele  
 Quanto scherzar!  
 El pranzo termina  
 A cinque in ponto;  
 Tuti beatissimi  
 Paga el so conto,  
 E se va Filide  
 A ritirar.  
 Mi no la seguito  
 In quei mument:

Chi vol parlarghene  
 No xe prudenti,  
 E se gh'è fugine  
 Mi no le so.  
 Tornarò a vederla,  
 Sarò presente  
 A l' ora solita,  
 Co vien la zente,  
 E a l' academia  
 La trovarò.  
 Là al lume candido  
 De le candeles,  
 Fra cento cocoli,  
 Fra cento bele,  
 Tinte più armoniche  
 La gavarà.  
 E sin che i musici,  
 E i sonadori  
 Farà del strepito,  
 Su tutti i cuori  
 La bafa Filide  
 Trionfarà.  
 Tornarò a vederla,  
 Brilante in piazza,  
 Rider, spartindoghe  
 Una fugazza  
 A dieste zoveni  
 Brusai d' amor;  
 Criando estatica:  
 Che bela sera  
 Oh che delizia!  
 Gran primavera!  
 Che stagion cocola!  
 Me cresce el cuor,  
 Tornarò a vederla  
 Per sti casini  
 O a magnar brocoli,  
 O sui matini  
 Dal famosissimo  
 Sior Valentin: (143)  
 Ma sul mar tremolo  
 Spenta l' auroa,  
 Se svegia zefiro,  
 I osei vien fora,  
 E va inderandose  
 Qualche camin.  
 In cielo sfiamega  
 La luse d' oro,

La zente misera  
 Torna al laoro,  
 E salpa l' ancora  
 El mariner.  
 Pase o mia Filide,  
 E in vu destili  
 Sono benefico,  
 Sogni tranquili,  
 Fioli de Venere  
 E del piacer.

## L' ISTA' CAMPESTRE.

Oh primavera,  
 Putela bela,  
 Xestu più in tera,  
 Xestu più quella?  
 Dov' estu, nonola,  
 Coss' è de ti?  
 Forse tra i verdi  
 De le campagne  
 Ti ti te perdi  
 Co le compagne,  
 Nè più visibile  
 Ti xe per mi?  
 O dei boscheti  
 Fra l' ombre care,  
 De bei fioreti,  
 D' erbete rare,  
 Ti va fornindote  
 La testa e 'l sen?  
 O ne le grotte  
 Ti bali e canti  
 Co ste putote;  
 Ti burla i amanti,  
 Ti cori a sconderte  
 Co Clori vien?  
 Compagna bela,  
 Caro boschetto  
 Sta baronceta,  
 Parleme schieto,  
 L' au vista a sconderse?  
 Xela co vu?

Ma la campagna  
 No rispondeva,  
 Bosco e montagna  
 Tuto taseva,  
 Ben sospirandola,  
 Ma gnente più;  
 La xe scampada  
 No l'è più in tera;  
 Fra la zornada,  
 Nè su la sera,  
 No vien più i zefiri  
 A svolazzar.  
 Nè più l'aurora  
 Su la mattina  
 Ve spruzza fora  
 Rosada fina,  
 Nè più le tortore  
 Sa smorosar.  
 Ah! so sorela  
 Vien vitoriosa,  
 Fiera, ma bela,  
 Tuta maestosa  
 E'l mondo domina  
 La bionda istà.  
 L'ha vista i campi  
 E le coline,  
 Fra mezzo ai lampi  
 Le nevi alpine  
 Za saludandola  
 S'ha descolà;  
 I prai che gera  
 Smaltai de fiori,  
 Che a primavera,  
 Che a cento amori,  
 Tante delizie  
 Saveva dar,  
 Abandonai  
 Xè ancuo da Flora,  
 Tuti arsirai  
 Se sbrega fora:  
 Fin le so viscere  
 Podè osservar.  
 Solo superbe  
 Vedè le biave  
 In mezzo a l'erbe  
 A far le brave,  
 Paonizzandose  
 Del so color.

Cari agneleti  
 Scampè nei boschi,  
 Cerchè i secreti,  
 Cerchè i più foschi,  
 Dove no penetri  
 Tanto calor.  
 Ve sarè in massa,  
 Sbassè la testa?  
 Ma el sol ve passa,  
 Ma el sol ve pesta,  
 Nel bosco a sconderve,  
 Cari, corè.  
 Scampè, toreti,  
 Del sol el lampo,  
 Scampè, cavreti,  
 Scampa, Melampè,  
 Tramezzo ai albori,  
 Ne l'acque andè.  
 Ma l'istà el fogo  
 Col sol radopia  
 Per ogni logo,  
 Muragia dopia  
 No val più a sconderve,  
 Per tuto el vien;  
 Par dal contento  
 No toca tera  
 Quei che al formento  
 Ghe fa la guera,  
 E alegra l'anima  
 Ghe sbalza in sen.  
 O vu beati,  
 Cari vilani,  
 Che smoderati  
 Pensieri vani  
 No ariva a scondere  
 Drento de vu!  
 Sè i fioi diletì  
 De la natura,  
 Chi ve fa abieti,  
 Chi no ve cura,  
 Cossa sia lagreme  
 Conosce più.  
 Ti dal cuor belo,  
 Dolce mia Nina,  
 Vien dove el cielo  
 Pase destina,  
 La bionda Cerere  
 A contemplar.

I alti muri,  
 Le strade strete;  
 Ai venti puri  
 Mâi no permete  
 L'aria balsamica  
 De trasportar.  
 La cità scampa,  
 Za che ti senti  
 Del sol la bampa,  
 No te spaventi,  
 Che qua gh'è un alboro  
 Nato per ti;  
 Se ti vedessi  
 Come che 'l spanda  
 I rami spessi  
 Da varie bande!  
 El sol no penetra  
 De mezzo di.  
 L'è foltô e largo,  
 De vissolete  
 L'è tuto cargo,  
 In cestelete  
 Farò sunartele,  
 Te le darò.  
 Là el venteselo  
 Farà frescheto,  
 Là un baso belo  
 Su quel viseto ....  
 Ma ti va in colera?  
 No, nol farò.  
 E po in quei zorni,  
 Che i oseleti  
 Va come storni  
 Drento ai boscheti,  
 E sente el turbine  
 Benchè lontan,  
 Nu lassaremo  
 L'alboro e i campi,  
 E vedaremo  
 Lontani i lampi,  
 E a gropi i nuvoli  
 Vegnir pian pian;  
 E dai balconi  
 Del casineto,  
 Dopo dei toni,  
 In altro aspeto  
 Natura, o cosola,  
 Ti vedarà.

Che quela piova  
 Vegnua dal cielo  
 Tuto rinova,  
 Tuto fa belo,  
 Le piante, i albori,  
 I campi, i prà.  
 Ah se scampada  
 Xe primavera,  
 Ti ti è restada,  
 Ti ti xe in tera,  
 Ti che t'imbalsemi  
 Col respirar!  
 Sì, dal cuor belo,  
 Dolce mia Nina,  
 Vien dove el ciet  
 Pase destina,  
 La bionda Cerere  
 A contemprar.

## L'ISTA' CITADIN.

Xe i di eterni, e lè note xe tombole,  
 Dreti i raggi del sol ve percota,  
 Brusa l'aria, la tera ve scota,  
 Boge l'acqua in laguna e nel mar.  
 No, Tonina, no stago in sto sofego,  
 Del paluo no respiro i vapori,  
 No resisto a la spuzza, ai fëtori,  
 Go bisogno in campagna de andar.  
 « In campagna! che sempio, che pampano,  
 Me risponde Tonina la bela,  
 La to testa, perdio, dove xela,  
 O ti è mato, o ti vol deventar.  
 Qua credè che scomenzi el mio dialogo;  
 No xe vero; le bele no aspetta,  
 No val gnente de dir: la permeta,  
 Ela sola se mete a parlar:  
 « L'andar za sie zorni  
 No gera da storni:  
 Trovevi, ma folta,  
 La zente più colta;  
 E Padoa è belissima  
 Co gh'è società.

Gh'è un gran sofegazzo,  
 Gh'è un gran spolverazzo,  
 Ma in prà se trotava,  
 E i legni sfiocava ;  
 E in mezzo quel strepito,  
 Co belo quel pra !

Gran lusso, gran bele !  
 Le do cavanele  
 Fornide de zente ;  
 Che urtoni, che spente :  
 Sin di gh'era bagolo  
 Per tuti i caffè.

Ma adesso i vien via,  
 La fiera è finia :  
 Ghe xe i padoani,  
 Le mosche, i tavani,  
 La polvere, i pulesi,  
 E vu se ghe andè. »

No a Padoa ; in campagna  
 Mi vado, e in montagna :  
 « Si vedo, fra i sassi  
 Coi orsi, coi tassi,  
 A far el filosofo :  
 Mo caro colù !

Fra semplici amori,  
 Fra ninfe e pastori,  
 Che al pra, a la fontana,  
 Ve fa la furlana:  
 E vu sonè el pifaro.

Mi godo per vu!  
 Disè: nei boschetti  
 Parleu coi oseleti,  
 Feu care in le grotte,  
 Ben mio, le marmote ?  
 Sarà dona Menega  
 La ninfa del cuor?

Perdio, caro Togno  
 Per ti me vergogno.  
 Sta qua : i rusceleti  
 Ti trovi e i boschetti;  
 Ga tuto una çocola  
 Scaldada d' amor!

Ghe xe cento spassi,  
 Ghe xe cento chiassi :  
 Ghe i tè la matina ;  
 Diria, gh'è Tonina, ....  
 Ma povera diavola  
 Nissuno la vol.

Florian (144) su la sera  
 Par proprio una fiera.  
 Teatro e casini  
 Ve porta ai matini,  
 Sè ancora al salvadego  
 Che in cielo xe el sol.

No gh'è i carègoni  
 Dei nostri vechioni,  
 Le done in busteto,  
 L' anguria, el figheto,  
 E tanto de ventolo  
 Co sior pantalon,  
 No gh'è mo quei sempi,  
 Che andava in quei tempi  
 Vogando in batelo  
 Col so polastrelo ;  
 No fa siora Momola  
 L' amor sul balcon ;

Nè più le signòre  
 Strapazza le ore,  
 E in stil pedantesco  
 Va in gondola al fresco.  
 Sti gusti ridicoli  
 Per mi no li go.

No andè a santa Marta  
 Per veder de carta  
 Farali e baloni,  
 Tartane coi soni,  
 E gropi de gondole,  
 Che voga su e zo :  
 Tre o quatro vignazze  
 Co cento donazze,  
 Che sta alegramente,  
 Sul far de sta zente,  
 E miera de stolidi  
 In barca a cenar.

Oh nu semo stai  
 Assae fortunai  
 A nascer più tardi!  
 Quel sempi vechiardi  
 De sagre e de fritole  
 I fava un afar,  
 E le serenate  
 Per Nina e per Cate.  
 E quele sempiete,  
 Che fava baosete  
 Fra i scuri del pergolo,  
 Fa proprio peccà

Oh diu! i gran babant  
 Ghe gera in quei ani.  
 In soma, Togneto,  
 Sta qua, fa da ometo :  
 E un omo de spirito  
 Ghe toca a star qua. »  
 Mi voleva dir qualcosa :  
 Ma la bela seguitava,  
 La so susta gera mossa,  
 E nissuno la fermava ;  
 Sul sofa me son sentà,  
 E la bela à seguità :  
 « Dirè, che Venezia  
 La note xe un forno ;  
 Se bogie. Benissimo,  
 Ma mi co no è zorno  
 No vedo la camara,  
 Nè vado a dormir.  
 Gersera so stada  
 Tre orete sentada :  
 Go un poco de reuma  
 Chiapà a la Vitoria (145).  
 Ma ò visto un' istoria,  
 Che pol divertir.  
 Ghe xe siora Barbara,  
 Ti sa chi te digo,  
 Sentimentalissima ;  
 Sior Sgualdo, el so amico,  
 Che fava el filosofo  
 De là del faral,  
 Apena squagliai  
 No li go abandonai ;  
 Eh ben, siora Barbara,  
 Disendo : che caldo !  
 Se struca sior Sgualdo ;  
 Sin qua no gh'è mal.  
 Ma dopo cascandoghe  
 La ventola o un guanto,  
 E insfeme sbassandose ,  
 Che sporco d' impianto  
 Ghe vedo sta ipocrita  
 Un baso a pular.  
 Sior sì, e po la intona ;  
 Vardè che barona !  
 Che tempi, che secolo!  
 Ste done galanti,  
 Sti sporchi de amanti,  
 No i so tolerar !

*Racc. Poes. Ven.*

M' à fato un tal impeto,  
 Tel zuro d'amiga,  
 Che proprio sui lavri  
 Gaveva : che striga!  
 E aver da stroparseli  
 Ghe vol un gran cuor !  
 Ma ò dà una risada  
 Cussì ben marcada,  
 Ch' i à bu da inacorzerse  
 Se i fusse salgheri.  
 Che strazza mistieri !  
 Cussì i fa l' amor?  
 Sapiante ridicola,  
 Galante refata,  
 Me fa proprio stomego  
 Quel muso da gata ;  
 Mi sì, vogio fartela,  
 E te la farò.  
 El pan che ti à in forno  
 Tel robo in t' un zorno,  
 Voi torte , petegola,  
 Co tuto el to intrigo,  
 El galante, l' amico,  
 E po ridarò.  
 Ma, aponto, sior Cesare  
 Ne dà sta matina  
 Un tè, ma magnifico :  
 Ti vien co Tonina ?  
 Sì, sì, caro Tognolo,  
 Andemo co mi :  
 Disè, Momoleta,  
 Voleu che me meta ?  
 (No voi sta lustrissima )  
 Quel abito a fiori,  
 O quello a colori ?  
 Quel bianco ? sì sì.  
 Camisa, no, momola,  
 La sta infagotada ;  
 De soto voi meterme  
 La vesta setada,  
 Quel scial bianco e cremese  
 Vegnù da Lion :  
 Ma adesso se sua,  
 E son mezza nua.  
 Pensè, in quella camara  
 Che semo in quaranta !  
 Ma, oh Dio ! che lo impianta ?  
 No gh'è po rason.

No adesso quel abito,  
 Xe tropo a benora,  
 Gnancora le dodese ;  
 L' invido xe a un' ora,  
 E s' à d' esser l' ultima  
 Se i vol, se no i vol.  
 Per far che i ve stima  
 No siè mai la prima ;  
 Che vada sior Agata,  
 La Venere magra  
 A averser la sagra ;  
 Tonina no pol.  
 Ma ohimè ! xe un gran sofego,  
 E aver da vestirse !  
 Tonin quela ventola ...,  
 Chi vol divertirse  
 Bisogna che toleri ...  
 Go 'l fogo in tel sen.  
 Vien qua, senti, Toni,  
 Sti brazzi è carboni :  
 Che toga del' etare ;  
 No, alchermes rimonta,  
 La bozza è più pronta :  
 Da qua, caro ben.  
 So un altra, mo vedistu ?  
 Son proprio intonada,  
 E son capacissima  
 De far la zornada  
 Zirando, godendome ....  
 Te digo el mio pian. »  
 Tonina, ò capio,  
 E vado con Dio  
 « No, ascolta, via fermite »  
 Per mi vado fora :  
 « Sta qua in to malora,  
 Da qua quela man :  
 Apena che termina  
 Del tè la partia,  
 Saludo sior Cesare,  
 E po meno via  
 La zente de spirito  
 Insieme co mi.  
 Se va in t' un logheto,  
 Se beve un sorbeto,  
 Se ride, se critica,  
 Se fa dei matezzi.  
 Ma za i cocolezzi  
 Xe tuti per ti,

Mi son tuta Tognolo,  
 Nissun no me beca :  
 Se tol una gondola  
 Se va ala Zueca ,  
 Finisso sentandome  
 Dal gran Valentiu.  
 No passa un minuto  
 Go attorno de tuto :  
 El par impossibile !  
 Todeschi, francesi,  
 Da tuti i paesi  
 Me vien da vicin :  
 De là andemo a goderse  
 Dei quadri a la Nave. (146)  
 Che scene ridicole !  
 Giulietta soave  
 Ghe parla in patetico,  
 Nè varda nissun ;  
 E siora Maria  
 Col peto in scanzia,  
 Che ciga, che strepita,  
 Che dà sempre urtoni,  
 Che tol pizzegoni,  
 E po fa dezun.  
 Vien po certi zoveni,  
 Che i è proprio cosseti,  
 In cisme lustrissime,  
 Coi so capeleti,  
 Le braghe sul stomego,  
 Do dei de gilè.  
 Vedè el so barbuzzo  
 Sul colo a far cuzzo ;  
 E mi me li gongolo,  
 E co li ò inviai  
 Li lasso impiantai,  
 Contenti al cafe :  
 Perchè vado a la Vitoria  
 A osservar qualch' altra istoria ;  
 Po a le Rive, al padiglion ;  
 Ma 'l cafe no i lo fa bon.  
 Po de suò un pochetin ;  
 Ma xe un forno quel casin !  
 Ma za passo ai rinovati  
 A l' Orfeo, dai avvocati, (147)  
 E in sti loghi se fa pele,  
 E a le tre stele,  
 O a l'ostaria  
 In compagnia



Co molta zente  
 Alegramente  
 Se magnarà  
 Se ridarà,  
 Se zogarà;  
 E po suai,  
 E descolai,  
 Un ponchio carico  
 Rimontarà;  
 E dopo in gondola  
 Se andarà a casa.  
 Ma, oh Dio ! el mio Tognolo,  
 So una fornasa ....  
 Sin mezzo zorno  
 Se dormirà ....  
 Sta casa è un forno .....  
 Se levarà,  
 Perchè doman  
 Go un novo pian,  
 Go un disnar,  
 E un altro afar,  
 E po go,  
 E farò .... »  
 La parola  
 In sto mumento  
 De la gola  
 Resta drento;  
 Per l'azion  
 E per el caldo  
 El polmon  
 No sta più saldo;  
 Per el corso  
 Del discorso  
 Casca l' ughola zo infermà,  
 E le chiacole se ferma.  
 I ochi e i lavri  
 Parlava ancora,  
 Ma no la articolà  
 Più la, signora ....  
 E mi da barbaro  
 M'ò congedà.  
 Rauco un sior aseno,  
 Sento in falseto;  
 Rido, m'incotego  
 In t' un buseto;  
 Scrivo. Ve comoda ?  
 Eco l'istà.

## L' AUTUNO CAMPESTRE.

Fornio de pampani,  
 Col goto in man,  
 E fra sti vilici  
 Mezzo vilan,  
 Co la mia Nina  
 Che va cernindose  
 L'ua ne la tina,  
 Co sti putei  
 Che va sunandose  
 Suso i granei,  
 Tra cento cesti  
 De peri e sorbole,  
 De pomi e nespole,  
 Ti, ti, benefico  
 Autuno, canto;  
 Ti che dal misero  
 Ti scazzi el pianto  
 Co quel to netare  
 Paradisal.  
 Musa, te suplico,  
 Non ispirarme  
 Che canti i barbari  
 Gùsti de l' arme :  
 No far che celebri  
 L'renda cazza,  
 Dove se insanguena,  
 Dove se mazza;  
 Che ga l' origine  
 Da qualche ozioso  
 Sangue vogioso  
 Duro guerier,  
 Che morte e spasemi  
 Xe el so piacer!  
 Quel cervo timido  
 Che mai no veda  
 Fato dai omeni  
 Bersaglio e preda,  
 Tolto dal fianco  
 De la compagna  
 El sangue spanderme  
 Per la campagna,  
 Perder le viscere

Straco, moriente,  
 Da cento cani  
 Strazzà col dente,  
 Mezzo magnà  
 Spirar sul pra,  
 Fato spettacolo  
 De crudeltà !  
 Mai l'assassinio,  
 Nè i tradimenti  
 De quei volatili,  
 Tanto inocenti,  
 Dei oseleti  
 Che povareti  
 Co mile ingani  
 Va destruendone  
 Sti mostri umani,  
 No za per fame,  
 Ma per el barbaro  
 Piacer infame,  
 Che sù la tavola  
 D' un finanzier,  
 D' un usurer  
 Deventà nobile,  
 Deventà conte,  
 De sti cadaveri  
 Se veda un monte,  
 Quando za sàzio  
 Xe l' epulon  
 Senza magnarghene  
 Forsi un boccon !  
 No, no descazzime  
 Pur sti pensieri ,  
 Canto più semplice,  
 Benl più veri  
 Vien a ispirarme ;  
 E lassa ai barbari  
 La cazza e l' arme.  
 Oh delizioso autuno  
 Quanto no t' òi bramà ?  
 De primavera i fiori  
 T' aveva za anzunzià,  
 Che soto a le fogete  
 Brilanti, tenerete,  
 No ben ancora ferme  
 Se scoverziva el germe  
 De la fecondità.  
 Per chi, se no per ti,  
 La bela primavera

Sti fiori nascer fa ?  
 L'agricoltor alora  
 Se leva su col sol,  
 E za nol vede l' ora  
 D'esser in cima al col,  
 E in mezzo a la rosada,  
 Che la note à lassada,  
 Sorbindo mile odori  
 Dei albori floridi  
 El vede i fiori,  
 El benedisce el cielo  
 E dela primavera  
 El gode el belo,  
 E i fiori el conta.  
 Ma po la so speranza  
 Tuti sti gusti avanza,  
 Che ne la so belezza  
 Tuta la so ricchezza  
 El vede sconta.  
 Pien de vigor l' istà,  
 Per mezzo del so fogo  
 Sublima de la tera  
 I sali che la sera  
 In ogni logo :  
 E quei alora penetra  
 E tronchi e foge e fusti  
 In ogni parte :  
 E 'l principio dei gusti  
 El ghe comparte,  
 Per rinovar l' umor  
 Che l' eccessivo ardor  
 Fa che svapori.  
 Da quel ch' à vegetà  
 Per mezzo dei so denti  
 El va a sunar qua e là  
 Tuti i vapori ;  
 E dove è 'l ciel giazà  
 Fati frequenti,  
 Unidi e condensai,  
 • E in lori penetrai  
 E più pesanti,  
 Fra i toni fulminanti  
 E i lampi ardenti,  
 E fra mile portenti  
 El li rovina,  
 E 'l ne li fa cascar  
 La tera a rinfrescar  
 Ridoti in piovà.

Ma per chi mai l'istà  
 Taute gran cosse el fa ?  
 Perchè el to antecessor  
 Cola piova l'ardor  
 Va temperando ?  
 A chi, se non a ti,  
 Valo pensando ?  
 Pensa per ti l'inverno  
 Co 'l monte el fa imbiancar  
 Perchè po nel so interno  
 Se gabia da venar  
 Fontane e fiumi.  
 Quando el concentra i spiriti  
 De la tera nel sen:  
 E i sali el ghe mantien  
 Che no i consumi:  
 E co ne le so viscere  
 El fogo el tien a stento  
 Vinto dal, so rigor,  
 El fogo animator  
 Che xe el fermento.  
 Pare benefico,  
 Fecondo autuno,  
 No ghe xe un' anima,  
 No gh'è nissuno,  
 No gh'è persona  
 Che no te celebri  
 Co gran rason  
 Per la corona  
 De le stagion!  
 Gh'è di più placidi,  
 Gh'è di più bei,  
 Di più piacevoli,  
 Quanto xe quei,  
 Che 'l sol ne tempera,  
 Quanto ti è ti ?  
 I zefireti  
 I furianei,  
 Mile scherzeti,  
 Come i putei  
 Se fa tra lori,  
 I suna i odori,  
 Se core drio,  
 Fa mormorio  
 Atorno i albori,  
 Soto le pergole,  
 Sora i tinazzi:  
 E là stornindose,

Fati furbazzi,  
 Alza le cotole  
 De ste putele  
 Che l'ua se sgranola  
 Nele cestele,  
 Che vergognandose  
 Va sfadigandose  
 De sconder su ;  
 Per far che i omeni  
 Rida de più.  
 Per ti la pastorela,  
 No scampa più dal sol;  
 Al prà, a la valesela,  
 A la campàgna, al col  
 La va a cercarte.  
 Ti ti soridi, e i fruti  
 Ti doni a larga man,  
 E quella core ai puti,  
 Che la vede in lontan,  
 E la fa parte.  
 Senza arsirarve,  
 Senza giazzarve  
 Stè soto el cielo ;  
 Qua l'è ceruleo ,  
 De là el ga un velo,  
 De qua le nuvole  
 Forma un' armada,  
 De là un' istoria  
 Xe piturada ;  
 L'oro ve sfiamaga  
 Per ogni logo,  
 Quando che 'l sol  
 Sora del col  
 Xe drio a spuntar ;  
 El par un fogo  
 Col caşca in mar.  
 A miera a miera  
 Nasce le stele,  
 Tute za lucide,  
 Tute za bele ;  
 Secondo l' orbita,  
 Che le describe,  
 Queste più languide,  
 Quele più vive,  
 Questa scintila  
 Del proprio lume,  
 Quela el so lucido  
 Da un' altra assume,

Cambia el spettacolo,  
 E de la tera  
 El bel satelite  
 Ghe fa la guera,  
 Le va sfantandose  
 Per varie bande;  
 La lume candida  
 Quest' altro sponde,  
 E sola Venere  
 Sa contrastar.  
 Se i doni de natura  
 Al col, a la pianura,  
 Ve piase a contemplar,  
 Un di podè zirar  
 Senza suarve;  
 Una fila de vide  
 Piena de graspi ride;  
 Ve chiama un persegher,  
 Un perer, un pomer,  
 Vol invidarve.  
 Quei spogia l' alboro,  
 L' ua st' altri strucola  
 Nel tinazzon;  
 Qua i pesta canevo,  
 Là formenton.  
 De castagne, de rave e naoni  
 Se impenisce le zerle, i cestoni,  
 Qua a le bote i ghe prova le canole  
 E là el mosto i travasa in boton.  
 No più i vilani  
 Tuti suzzai,  
 E consumai,  
 Mostra cent' ani  
 Per le gran strussie  
 Fate l' istà.  
 Nè le so done  
 Tute infiapiè,  
 E desconie,  
 Par tante none,  
 Tante maranteghe;  
 Tuto è cambia.  
 Queli xe vegeti,  
 Xe fresche queste;  
 Tuti i so muscoli  
 De carne, i veste:  
 Queste i colori  
 Le torna bele,  
 Va el sangue a spanderse

Soto la pele,  
 Che 'l va a cercar,  
 Torna le machine  
 A vegetar.  
 De sti miracoli,  
 De tanti beni,  
 Provido autuno,  
 Ti ne fa pieni,  
 Nè gh'è nissuno,  
 Sia rico o povero,  
 Sia pelegrin,  
 Mercante, vilico,  
 O citadin,  
 Che no aplaudissa,  
 No benedissa  
 Tanto benefico  
 Pare sovràn!  
 E mi fra i pampani  
 Col goto in man,  
 Sorbindo netare  
 Paradisal,  
 Questo te dedico  
 Canto cordial.

#### L'AUTUNO CITADIN.

Spogia è la pergola,  
 L'ua vendemiada,  
 Finio xe 'l bagolo,  
 E la secada  
 De quele femene,  
 De quei putei,  
 Che va sporcandove  
 Co dei granei.  
 No più le strade  
 Xe semenade  
 Da miserabili  
 De contadini;  
 No più ve stomega  
 L' odor dei vini;  
 Ogni borgada  
 Xe frequentada  
 Da zente nobile  
 Ben educada.

Fra mezzo i albori  
 Xe trasportà  
 La vita e 'l spirito  
 De la cità.  
 Andemo a goderse,  
 Bela Nineta,  
 Vedistu, cocola,  
 La gondoleta?  
 La xe una scatola!  
 Se troveremo,  
 Proprio in t' un atimo,  
 Dove voremo.  
 Co fazzo un moto  
 Xe tacà soto.  
 Do cavai scapoli  
 Sbate la zampa,  
 Ti monti subito,  
 La tera scampa,  
 E più d' un mio  
 Za xe finio;  
 Le sedie, i mantesi,  
 Lassemo in drio,  
 E senza acorzerse  
 De caminar;  
 No par de moverse,  
 Ma da svoler.  
 Nineta amabile,  
 Per no stufarse  
 A Padoa a l' opera  
 Se pol fermarse,  
 E qualche circolo  
 Trovar de zente;  
 Veder chi è scapolo,  
 Chi ga el servente,  
 Chi xe ben messa;  
 Zogar in pressa  
 Co quei che capita  
 Una partia;  
 Magnar le lodole  
 In compagnia  
 De done amabili;  
 De chi xe in fregole  
 Senza contanti  
 Sentir l' istoria;  
 Dopo partir,  
 E in vila subito  
 Se va a dormir.  
 Oh! che delizia

Xe la campagna!  
 Cussi godendola  
 Se se sparagna  
 De veder zente  
 Mezza pezzente,  
 Rusteghi, stolidi,  
 E sempre sporchi,  
 Nè le so femene  
 Che par tanti orchì!  
 Goda i patetici  
 Sta bela vista:  
 Goda d' un eremo  
 El tristo oror  
 Chi no ga un' anima,  
 Chi no ga un cuor.  
 Te lo assicuro, Nina,  
 Che za te pararà  
 D'esser sempre in cità;  
 Che chi te adora  
 Apena desmissià  
 Verso del mezzodi,  
 O, se te piase a ti,  
 Più tardi ancora,  
 Ordinarà i cavai,  
 E in quel mio bel batar  
 Andaremo a trotar  
 Che svolaremo.  
 Se incontrarà per strada  
 Dese altri legni e più,  
 E qualchedun co nu  
 Convozeremo;  
 E zonti a la Batagia,  
 Dove el gran mondo gh'è;  
 Trovaremo el caffè  
 Zepo de zente.  
 Là molti dei to amici  
 Te se presenterà,  
 E za i te vegnarà  
 Tuti darente.  
 Là no passa un minuto secondo,  
 Che no arivi da novo del mondo:  
 Là se trova la zente de spirito,  
 Là svolazzà per tuto l' amor.  
 Trà le bave un amante geloso,  
 Se descola un galante smorfioso,  
 E se chiassa, se ride, se critica,  
 E chi è toco se vede in furor.  
 A stopa, a bazzega,

A panfileto,  
 A quel petegolo  
 De bel zoghetto,  
 Che tanto stuzzega.  
 Che impegna el cuor,  
 Se rischia i talari  
 De bon umor.  
 Ti po, stufandote,  
 Ti sunarà  
 Sete, oto, dodese,  
 Chi ti vorà,  
 Che cavalcando,  
 E galopando,  
 O pur in bagherle  
 O in sediolin,  
 O drento a un anglico  
 Bel carozzin,  
 Per seguitarte  
 E cortegiarte  
 Farà scapate,  
 Farà volate;  
 Tuti fumanti  
 Te andarà avanti,  
 Tornarà indrio;  
 Ti, saludandoli  
 Col più gran brio,  
 Come una Venere  
 Fra cento amori  
 Ti sarà l'arbitra  
 De tuti i cuori;  
 E senza acorzerte  
 De aver trotà  
 Ti sarà Venere  
 Sul tò sofà.  
 Ordinaremo in tavola;  
 Pronto sarà el disnar;  
 Ti ne farà sentar  
 Dove te agrada.  
 El salpicon coi brocoli,  
 Pernise col salmì,  
 (Quel che te piase a ti)  
 La caponada,  
 L'arteise  
 L'ostreghe,  
 E le tartufole,  
 La bona malega,  
 Quanto che fussimo  
 Nela cità,

Nineta amabile,  
 Ti trovarà.  
 Tuti insieme parlaremo,  
 Chiassaremo,  
 Ridaremo,  
 Senza mai saver perchè,  
 Sin a l'ora del caffè.  
 Dopo quello e'l rosolin  
 Ti te eclissi a pian pianin,  
 E ti va nel to retrè,  
 Dove gh'è  
 Le vicende de le bele  
 In più stampe baroncele;  
 E quel caro to sofà  
 Dal piacer imbalsemà,  
 Dove Venere e so fio,  
 Che sia tanto benedio,  
 Che invisibile ne ascolta,  
 S'à trovà più d' una volta.  
 Là pensando,  
 Pisolando,  
 Consultando  
 A la toleta  
 Co la brava to Liseta,  
 Ti starà circa un'oreta.  
 Nu fra le chiacole,  
 E 'l faraon,  
 Fra 'l torse bagolo  
 D' un stolidon,  
 Che a farne visita  
 Xe capità.  
 Sta oreta critica  
 Se passerà.  
 Nina bela za torna da basso,  
 De carozze se sente el fracasso;  
 Tuti lassa le carte e le chiacole,  
 E se torna da novo a trotar,  
 Za xe scuro, za el sol xe andà drento,  
 Ma i farali, ma i torzi da vento  
 El cortivo e la strada v'illumina,  
 Che podè tuti i sassi contar.  
 I cavali tol su la cariera,  
 E le rode ve brusa la tera,  
 In cità se se trova in t' un atimo,  
 E le scurie se sente a schioccar.  
 Al caffè de cavanela  
 Smontarè, Nineta Bela,  
 Ve saremo tuti arente,

Che bel scial, che bel turbante!  
 E 'l to modo, el to parlar,  
 Li farà tuti incantar.  
 • Se sbrufa l' altre done  
 No ti ghe pensarà,  
 E ti trionfarà  
 Del so rabiezzo.  
 Diese da novo atorno  
 Te se presenterà,  
 Che te regalarà  
 D'un qualche vezzo.  
 Ma se alzaremo,  
 Spassizzaremo,  
 E cambiaremo  
 Do o tre café,  
 E a l'ora solita,  
 Che va el bon ton,  
 Se andará a l'opera,  
 Dopo al veglion.  
 Se Nina amabile,  
 La bela Nina,  
 Ve bala el bolzere,  
 La manferina,  
 Le grazie a scondersi  
 Va in t' un canton,  
 Piemontesi, polache, alemane,  
 Savogiardi, fandanghi, furlane,  
 Contradanze, e i haleti de l' opera  
 Balaremo, e faremo balar.  
 Tuta infogada,  
 E scalmanada,  
 Come l' aurora  
 Co la vien fora  
 Nunzia del dì,  
 La bela Nina  
 Sarà cussì.  
 Po co stracandote  
 Ti finirà,  
 Un sito comodo  
 Ti trovarà,  
 E circondada  
 Da diese, dodese,  
 Co mi sentada  
 Ti torà, languida,  
 La limonada;  
 Qualche gelato  
 De bon cedrato,  
 E ogni altra bibita

*Racc. Poes. Ven.*

Te sarà pronta,  
 Ch'ecita i muscoli,  
 E li rimonta.  
 Ti balarà da novo  
 Ipsin ché nasce el dì,  
 E po in tel to scialh  
 Sconta, imbautada,  
 • E dal piacer sfina,  
 Ti montarà in batar,  
 Senza poder parlar  
 Tuta la strada.  
 Dirò che ti xe cara  
 Sin co te manca el fià;  
 Ti me ringrazierà,  
 Ma con un moto.  
 Te torò zo dal legno,  
 E ti anderà a dormir;  
 Ti me farà sentir  
 L' adio, ma roto.  
 Oh che delizia  
 Xe la campagna!  
 Cussi godendola  
 Se se sparagna  
 Qualunque incomodo,  
 Nè se presenta  
 La solitudine  
 Che ve spaventa.  
 Cussi ad ognuno  
 Piase l'autuno,  
 No per le pergole  
 D' ua tute piene,  
 ( Che goda i bamboli  
 Ste bele scene )  
 Ma perchè unito  
 Xe el più compito,  
 El più sociabile  
 Mondo pulito;  
 Le done amabili  
 De la cità,  
 El più bel spirito  
 Xe radunà.  
 Ma 'l dì de san Martin,  
 Nineta, xe vicino.  
 Zà xe deciso,  
 Che in novo carozzin  
 Sul corso de Trevisa  
 Quel dî figuremo;  
 E quatro bei cavai,

Bagio scuro, poma'!  
 Ghe tacaremo.  
 Do cochi ben montai,  
 Do stafieri, el zachè,  
 E quei d' arsan plachè  
 Bei fornimenti;  
 Fra tuti i pretendenti  
 Che al corso ghe sanà  
 Se ne distinguarà  
 Come intendenti.  
 Za la mattina,  
 Mia cara Nina,  
 Saremo stai,  
 Col batar solito,  
 E do cavai  
 O sin al rovere,  
 O a sant'Artien,  
 Dove che vien  
 El megio e 'l bon,  
 La zente nobile,  
 E'l più gran ton.

Semo in borgo, e su tuti i balconi  
 Ghe xe strati, damaschi e festoni,  
 E dei miera de done e de omeni,  
 Che no pol in carrozza trotar.  
 Soto i porteghi po a la refusa  
 Gh'è la zente più bassa confusa,  
 Che se spenze, che s' urta e formigola,  
 Per poder le carrozze vardar.  
 Tute quante le rozze da nolo,  
 Le veture da romperse el colo,  
 Xe missiae con i treni più nobili,  
 Che più beli li fa deventar.  
 Ma 'l fracasso la strada za stropa;  
 Cento legni se incontra, s' ingropa;  
 Se biastema dai cochi, e se strepita,  
 Che la pausa no i pol tolerar.

Fissaremo in sto mumento  
 Tuti i legni, e chi gh'è drento,  
 Osservando,  
 Criticando,  
 Ridachando  
 A più poder.  
 Nova spezie de piacer!  
 Ma roto el gropo,  
 Tolto l' intopo,  
 Vien fora i Ussari,  
 Che de cariera

Brusa la tera,  
 Co la so sciabola  
 Facendo segni,  
 Metendo in linea  
 Cavai e legni;  
 Se sente el mascolo,  
 Se mola i barbari,  
 Che come un fulmine  
 Vedè a passar,  
 E tuto el popolo  
 Sentì a cigar.  
 No serve de saver  
 Chi è stà che à guadagnà;  
 La zente bassa el sa,  
 Che in bota è sta cigà  
 La lista e i premi.  
 Nu, do tre ziri al più,  
 Ora zozo, ora su,  
 Cara, faremo,  
 E po desmontaremo  
 Dal gobo o da Bastian. (148)  
 Te vegnarà a dar man  
 Chi te conoscerà,  
 Che za ghe ne sarà  
 Set'oto almanco.  
 Sarò anca mi al to fianco,  
 Urtaro, spenzerò  
 Fra quella zente;  
 Farò anca l' insolente,  
 E tanto spenzerò  
 Sin che te trovarò  
 Carega o scagno.  
 Un gelato,  
 O maraschin;  
 O cedrato,  
 O mascarin,  
 Quel che in soma ti vorà,  
 Nina mia, ti gavarà.  
 Ma 'l pranzo ne aspetta,  
 Mia bela Nineta,  
 Quaranta e anca più  
 No aspetta che nu.  
 Mi no credo che ghe sia  
 Tanto cara compagnia  
 Quanto quella che gh'è là.  
 Se magnarà,  
 Se bevarà,  
 Se parlarà,



E faremo un cocodè  
Come in l' arca de Noè.  
Terminà che sia el disnar,  
Senza gnanca saludar,  
Co quei pochi che te piase,  
Andaremo in santa pase  
E al caffè, a la cavalchina,  
Se starà sin la matina.

Oh che delizia  
Xe la campagna!  
Cussì godendola  
Se se sparagna  
Qualunque incomodo,  
Nè se presenta  
La solitudine

Che ve spaventa.  
Ma za sparisce,  
Diminuisce  
El mondo nobile,  
La zente colta :  
Tuti ripatria,  
Tuti xe in volta :  
Anca Nineta  
No sta più quieta,  
Che 'l malinconico  
No la diletta ;  
E donca subito  
Se passerà  
A le delizie  
De la cità.





# SECOLO DECIMONONO.

## POESIE

DI

GIUSEPPE CARLO DOTT. CUMANO.

### DITIRAMBO.

#### I OSELETI.

Benedeto sia l'autunno,  
Benedeta sta stagion,  
No gh'è tempo più lodabile,  
Pìù pregiabile, pìù bon.  
Ghe xe molti, son sicuro,  
Che diria: gavè rason;  
Ma per cossa lo diravèli?  
Per un gusto macaron.  
I dirave perchè nasce  
Quel prezioso,  
Odoroso,  
Quel gran netare divin,  
Quel ambrosia, idest el vin.  
Mi 'l me piase, no lo nego,  
Ma lo bevo solamente  
Per parar  
Zo quel poco de magnar;  
Ma per altre a cossa far?

Xe lodabile l'autunno;  
Ma saveu mo el gran perchè? ...  
Perchè nasce la polenta?  
Cossa varla cussì sola?  
Eh voleu saver perchè?  
Perchè tempo no ghe xe,  
Che ne daga in più abbondanza  
La pistanza  
De quei cari, benedeti,  
Prelibati oseleti.  
No gh'è megio, v'assicuro,  
Velo zuro,  
No gh'è megio in tuto el mondo,  
A Berlin, Roma, Parigi,  
Sul danubio, sul tamigl,  
Sul mar-negro, sul .... ma gnente;  
Mi son sta da tanta zente,  
Da magnoni,  
Signoroni,  
O' magnà dei gran boconi,  
O' sentio de tante sorte  
E de torte e de pastiazi,

Lievri, cervi e porchi rizzi;  
 Dei dentali, astesi, toni,  
 Dei sturioni ....  
 Dei .... minchioni! ....  
 No ghe xe gnanca confronto,  
 No ghe dago, se i me prega,  
 Se i me prega in zenochion,  
 Gnanca un bocon ....  
 Cossa digo? no sseseno  
 No ghe dago a dirlo schieto  
 Gnanca un beco de oseleto.  
 No, ve digo, perchè 'l beco  
 No lo buto minga via;  
 Guai, per dial!  
 L'è un bocon  
 Tanto bon ....

Mi voria che me vedessi,  
 Quando magno i mi oseleti,  
 Come meto i so becheti  
 Tuti quanti separai  
 In t' un piato picinin,  
 Che me tegno da vicin,  
 E po dopo che ò finio  
 De magnarme sti oseleti,  
 O che 'l piato go impenio,  
 Me i destrigo tuti neti;  
 E che gusto, che i me da!  
 I me fa  
 Richiamar tuti a memoria,  
 Anzi digo sul palà,  
 I me chiama tuti i gusti  
 Dei oseleti ch'ò magnà.  
 O che gusto magior d' ogni gusto!  
 Se podesse goderlo in eterno!  
 Oh che gran felicità!  
 E pur tanti ghe xe stà,  
 Che lo ga fin disprezzà.

E ti, filosofo,  
 Ti xe Pitagora?  
 E dei Demagora  
 Ti trovarà,  
 Che le to legi,  
 Le to sempiagini,  
 Adotarà?  
 Mi ve digo che per sbrio,  
 El più scioco no gh'è stà;  
 Basta dir che l' à proibio,  
 Come el tipe d' ogni mal,

A tuti i omeni,  
 Ai vecchi, ai zoveni,  
 Fin a le femene,  
 Fin a le gravie  
 Magnar carne d' animal ....  
 Mi per far a l' incontrario  
 De quel testa de cocal  
 Voi magnarghen fin ché posso,  
 E co più no podarò  
 A la romana me tirarò  
 Duro duro  
 Arente un muro,  
 E co un deo zo per la gola  
 Darò un ordine pressante;  
 « Che qualunque viandante,  
 Che si trovi in quel distretto,  
 Sia nel ventre, sia nel petto,  
 Alla vista di quel dito  
 All' esofago salito,  
 Ex abrupto ceda il loco  
 Ai piattelli del mio cuoco .... »  
 Sior' Aneta benedeta  
 La m' à tanto consolà,  
 Co l' ò vista a vegnir qua,  
 Che nio so più cossa dir:  
 Ma podevela vegnir  
 Megio a tempo de cussi?  
 Proprio se vede che la me vol ben  
 Se la se degna de disnar co mi.  
 Qua, la sa, che xe bandi  
 El zambon, el salpicon,  
 L' alisson, el salsisson,  
 I rosbi coi zigot,  
 I rosbighi coi rolot,  
 Sia pur semplici, o farsi;  
 Xe bandidi anca i salmi  
 Xe bandidi anca i colà  
 No i me staga a nominar  
 Andoliè, anetrè, alafar.  
 Cossa far dei salpurè,  
 Dei cogliuf e dei purè,  
 Dei refredi e dei brulè,  
 Dei aloscè, dei antremè?  
 Mi no i voggio per i piè.  
 Maledeti quei gonfiè,  
 Quei sublanç, quei cotlet;  
 Maledeti quei gondiù  
 No li voggio sentir più:

Che i li faccia via de qua  
 Ma da mi no ghen sarà.  
 Mi no magno altro che osei,  
 Ma i xe quei,  
 Co i ghe piase .... Cossa òi dito?  
 Co i ghe piase? Che dimande! ....  
 Eco qua che i porta in tola;  
 Le se comodi, signori,  
 Le se senta tuti quanti,  
 Via, comare, feve avanti,  
 Là vicina al sior Zaneto.  
 Ela po, siora Mariana,  
 Me la vogio sempre arente ....  
 Oh la toga .... gnente, gnente,  
 No ghe bado, la li magna:  
 La li magna che i xe boni:  
 I xe quarti de frisoni,  
 Ben conzadi,  
 Cusinadi  
 In paela  
 Co garofolo e canela,  
 E co questi i ga conzà  
 Un bocon de pan.tagià.  
 Questa xe la mia manestra;  
 No gh'è risi, no gh'è bisi,  
 No gh'è vena, no gh'è lente,  
 No gh'è sope, nè polente,  
 Nè 'l panizzo, nè l'erbete,  
 Nè raffioi, nè lasagnete,  
 Cao-de-flori, macaroni,  
 Cussì boni.  
 Traria zo per le fenestre  
 Ste manestre,  
 Negre, rosse, latesine,  
 Zale, verde, e che soi mi?  
 Che a le tole più stimae  
 Vien portae,  
 Vien magnae,  
 Senza gnanca dimandar  
 Cossa diavolo le sia,  
 E chi sa, che porcaria,  
 Che potachi che le xe!  
 Se savessi quante volte,  
 Che go visto certi coghi  
 A burlar i so paroni  
 Dei boconi che i à magnà ....  
 Qua da mi no l'è cussì,  
 Magnè pur co libertà ....

Oh i xe qua co la fritura ...  
 Ma le senta mo un pocheto  
 Che gran sesta che go mi:  
 No go minga testa dura,  
 Mi me piase ben magnar;  
 Za le lo crede,  
 E po le vede,  
 Me so quasi destrighà  
 Tuta quella arcimanestra,  
 Che qua a tola i ga portà.  
 Onde tornando a bomba  
 (Dirave i fiorentini)  
 Mi che voria magnar ogni mumento  
 Me son pensà de tor medicamento.  
 Ma la xe una medicina  
 Che xe mia particular,  
 Che la serve a maravegia  
 Per farne vegnir voglia de magnar.  
 Se le andasse per Venezia  
 Ne la megio spiziaria  
 No le trova medicina  
 Più operosa de la mia ....  
 Vedeu là quella fritura?  
 Queli xe tuti montani,  
 Oseleti freschi e sani,  
 Che ga un certo saporeto  
 Amareto,  
 Che li fa medicinali;  
 E mi i me fa guarir da tuti i mali.  
 Ma ghe vol po la so dōsa,  
 Convien torli in quel tal modo,  
 E secondo i vari mali  
 I va coti in butiro, opur in brodo.  
 Per el mal d' inapetenza  
 I va coti in sta maniera,  
 Ma perchè po i faccia efeto  
 No saria gnente una dozena intiera,  
 Ghe ne vol almanco do:  
 Sì: vintiquatro osei,  
 Co no i xe più che bei,  
 Ogni poca de panza,  
 Che gabia quello che li vol magnar,  
 Per medicina i stenterà a operar.  
 Mi lo provo  
 Co me trovo  
 Co una panza cussì piena,  
 Che dal peso per portarla  
 La me fa doler la schena.

La me toca za sta cossa,  
 La me toca molto spesso.  
 Vardè adesso  
 Ghe saria certi minchioni,  
 Che ga in festa de le rane,  
 Che no magnaria gnanca do boconi :  
 Ma mi guente; giusto allora  
 Ghe ne magno assae de più,  
 · Perchè i fazza megio efeto.  
 S' à da dar mo per dispeto,  
 Che a magnarghene ogni zorno  
 Go el mio stomego avezzà.  
 Za le sa  
 Se se avezza anca al velen ;  
 Onde, amici, capì ben,  
 Che convien  
 Co ste cose  
 Ogni dì crescer la dose ...  
 Eco el lessò. Mi no uso  
 De far far certi antipasti :  
 Mi me basta de magnar  
 Diese piati per disnar ...  
 Comareta benedeta,  
 No ve piase i tordi lessi ?  
 Anca mi so come vu,  
 Co ghen magno vinti, trenta,  
 No ghen penso magnar più ....  
 Cossa gala, cossa è stà,  
 Cossa è stà siora Mariana ? ....  
 Gh'è andà un osso in tela gola ,  
 Gnente, gnente,  
 El rimedio xe qua lesto :  
 Presto presto  
 Sto bel tordo in t'un bocon  
 La lo ingiota tuto intiero ;  
 La guarisce sì da vero :  
 La lo ingiota .., no la è bona ?  
 Oh per baco, se pol dar ?  
 L' à 'l gargato molto stretto !  
 Mi lo magno anca per spasso ;  
 No ? la varda .... l' è andà a basso.  
 Ah via via,  
 La xe guaria.  
 La se toga de le quagie,  
 Che ga i ossi  
 Manco grossi ...  
 Cassi poche, vita mia ?  
 Cossa xe le vinti quagie ?

Le xe giusto un pan da un bezzo.  
 Anzi no, che un panetin,  
 Benchè el sia più picinin,  
 Mi el me sazia assae de più.  
 E po guente ; za la vede  
 Se ghen magno un boconcin,  
 Che de più no magnaria,  
 El xe giusto per far forestaria ....  
 Vien le lodole,  
 Vien le lodole,  
 Sì, care, sì,  
 Sì qua da mi.  
 Oh che bone !  
 Benedete !  
 Che stupende, che squisite !  
 Che gustose e saporite  
 Che le xe cussì caldeta !  
 Presto presto, tiotene ti,  
 Chè mi resto atento per mi.  
 Ah perchè no goi la boca  
 Granda come una fenestra ?  
 Che piacer che gavarìa !  
 Da una parte metaria  
 Un gran piatto de manestra,  
 E da st'altra el frito, e 'l lessò,  
 E 'l restante impèneria  
 De sto rostro cussì bon,  
 E faria tuto un bocon.  
 Ma perchè mo la natura  
 No ala visto i mii bisogni ?  
 Che ghe fusse almanco el caso  
 Per le rechie, per el naso,  
 Per i ochi, e che soi mi ....  
 Ma cussì,  
 Co una boca cussì sola,  
 Co un buseto in te la gola,  
 Come mai me sfogarò,  
 Come mai me saziarò ?  
 Mi no so ;  
 Co sta roba mi no posso ...  
 Deme qua quella polenta,  
 Che la prova, che la senta ....  
 Ma digo mi : xela po stada  
 Nela licarda ben cusinada ? ....  
 Sì ? va ben, donca de qua,  
 Che ghen magna a crepapanza ...  
 Bona, bona, la me piase.  
 M a, perdiana, cossa feu ?

Quanta mai me ne porteu ? ....  
 Ah ! convien che me giustifica ?  
 Sì, natura, femo pase,  
 Xe dover che me contenta  
 De sta boca che ti à fato,  
 Che la è bona per polenta ....  
 No voi altro, no voi altro;  
 Portè tuto via de qua,  
 Che ò magnò, che ò magnà ....  
 Ma cossa ghe xe là ?  
 Oh che diavolo, oseleti !  
 Xeli rosti ? Ah benedeti !  
 Voi cercar sti petirossi ;  
 Ma sarave un farghe torto  
 Lassar là quei codarossi.  
 Oh cospeto che fincheto !  
 Che caonagro, che ortolan ! ....  
 Voi magnarme quel montan ;  
 Anca st' altro .... anca sti do, ....  
 Ah ! sti quatro ; e lasso là ....  
 Maledeti sti montani  
 No cominçielì a operar !  
 Anca rosti i fa sto efeto ? ....  
 Sì, perdia, me xe tornada  
 La mia voglia de magnar.

Ah magnemoli,  
 Destrighemoli !  
 Qua sti finchi; qua sti finchi,  
 Sti frisoni,  
 Qua anca st' altri, che i xe boni.  
 Oh che otima missianza,  
 Che i farà ne la mia panza !

Ah magari ghe ne fusse  
 Da poder sin che go fia,  
 Sin che un angolo me avanza,  
 Impenirme ben la panza !  
 Che i sia celeghe o perussolo,  
 Che i sia pur subioti, o passare,  
 Che i sia pur quello che i vol :  
 Mi me basta che i sia osei ....

Ma, perdia, no xe pussibile :  
 No val bezzi, no val trapole  
 Per averghene e chiaparghene  
 Quanti mi voria magnarghene ....  
 A sta ora per comprarghene  
 Gavarò speso un milion,  
 Gavarò impenio de trapole  
 Quasi cento possession.

*Racc. Poes. Ven.*

Perchè mi go rede e trate,  
 Go dei rocoli a bizefe,  
 Go tordere, quagiarie,  
 Go passade, ciese, utie,  
 Go el diluvio, go paloni,  
 Gavarò mile falconi,  
 Altretanti cazzadori,  
 Altretanti oseladori :  
 E po dopo ghe son mi ;  
 Che son bravo più de lori ....  
 Sì dasseno, senza scherzi,  
 Che mi passo qualche ora  
 A quel rocolo là fora ....  
 Mi tra tante altre oselade  
 Me son scielto questa qua,  
 Perchè posso star sentà,  
 E ghen chiapo infinitissimi  
 De sti cocoli carissimi.  
 Ma no son po minga mi,  
 Che ghe buto la cestela ;  
 El xe l'omo che sta là.  
 Una volta go provà,  
 E me son porta benissimo,  
 Ma ò scoperto in mi un difeto.  
 Quando vedo un oseleto  
 Che xe squasi per chiaparse,  
 Me par proprio averlo in boca,  
 E sentì quel che me toca :  
 Son cussì fora de mi  
 Che no so cossa che fazzo,  
 Che no so quel che me digo,  
 Onde invece del cestelo  
 Trago un cigo, mandandoghe un baso  
 L'oseleto se la moca,  
 E mi resto co tanto de naso ....  
 Ma co ste minchionarie  
 Me scordava un bon bocon.  
 Qe porteme quel fiascon  
 Del friularo del stradon,  
 Che qua tuti se ga in mente :  
 Che quel vin cussì ecelente  
 Col so ardor arcigrandissimo  
 De le muse arciamicissimo  
 El farà che no sia priva  
 Sta nostra tola del so bravo eviva.  
 Oh 'l xe qua sto moroseto !  
 No avè invidia, cocoleti,  
 Che ghen bevo do sorseti,

E po torno da vù altri,  
 Benedeti de oseleti.  
 Ma via, friularo,  
 Da bravo agiutime  
 A far sto prindese,  
 Da bravo, caro ....  
 No ti vol? lo farò mi.  
 Viva donca sta nostra compagnia,  
 Ma viva anca la ruzza dei oseleti:  
 La sanità nostra compagnia sia,  
 Ma che i osei sempre sia cussi perfeti.  
 Primavera per nu sempre voria,  
 Ma sempre autuno per sti cocoleti.  
 Nu vorave che fussimo eternissimi,  
 Ma che lori po fusse infinitissimi.  
 Benedeto sto bon vin,  
 Che fa star zoso el magnar,  
 Che fa alegro el coresin.  
 Mi lo voi sempre lodar  
 Fin che 'l vien in gotesin,  
 Ma co andemo sui do goti  
 El scomenza andar in su,  
 Nè lo posso lodar più.  
 Maledeti sti imbrigoni,  
 Sti porconi,  
 Che ga sempre el got<sup>o</sup> in man,  
 No li posso tolerar:  
 No se pol gnanca parlar,  
 Che no i dise altro che vin,  
 Sia pur pezo de l' aseco.  
 Che per lori tuto è bon  
 Perchè i à perso la rason.  
 E po dopo sti imbrigoni,  
 Sti porconi,  
 Sti mastei da soto-spina,  
 Ste barile che camina,  
 Se ghe dessi un oseleto,  
 I ghe magna mezzo el peto,  
 E po i dise: oh! go magnà.  
 Eh che i vada .... ma no serve,  
 No me vogio altro inquietar.  
 Deme qua quel matrimonio ....  
 Quel pastizzo : .... maledeti :  
 No savè che la polenta  
 La xe sposa dei oseleti?  
 Mi me par che ve l'ò dito,  
 Che nol xe vero disnar  
 Se no gh'è la so polenta,

Quando oei s' à da magnar.  
 Ma polenta schieta .... oh giusto,  
 No ghe trovò nissun gusto ....  
 Questa è fata col butiro,  
 La ga drento mile sorte  
 De oseleti saporiti,  
 Parte rosti e parte fritti,  
 Che 'l mio cogo a lento fogo  
 Ga lassà che i se consuma  
 Tra le tartufole le più pregiade,  
 E tra i garofoli e le muscade;  
 Oh de questo mo ghen magnè,  
 Per saziarme un pochettin :  
 Anca vu, cara comare,  
 Anca ela, sior Tonin ...  
 Mi no so po cossa dir,  
 Quando che no le pol più  
 No le vogio altro sforzar.  
 Mi so che go gran voglia de magnar,  
 Oh bela, si dasseno!  
 Ve fe la maravegie ?  
 Questo vol dir che poco  
 Sui libri avè stracà le vostre cegie.  
 Mi mi ve dirò, mi  
 La so vera rason .  
 Diseme, aveu mai leto el sior Platon ?  
 Vedeu, lu dise, che gavemo tuti  
 Al nascer nostro una costelazion,  
 Anzi una stela, e questa fa che astuti  
 Alcuni sia, che un altro sia un minchion,  
 Che a chi ghe piasa i vovi, a chi i persuti,  
 A chi piase sentir criar oà,  
 A chi sentir sonar tarapatà.  
 Quello vorave andar sempre a cavallo,  
 Questo sempre in carrozza, e st' altro a piè,  
 A chi ghe piase molto el color zalo,  
 A chi ghe piase el bianco, a chi el tanè,  
 Chi vol brodo de vipera, o de galo;  
 Chi sorbeti, chi ponchi, e chi caffè,  
 E questo per l' influsso ne succede,  
 Che ga le stele che su nu presiede.  
 Oltre de questo el dise, che le fa  
 Più stele unite insieme una figura;  
 Altre d' un can la forma le ne dà,  
 Altre d' un porco, o pur d' una creatura,  
 Altre un gran asenon come che va,  
 Altre un beco, o una cavra, le figura ,  
 Altre un cavallo, una formiga, un' anza,



Altre una bela puta, altre una manza.  
 Cussi se dà che sempre nu se tremo  
 Un animal o l'altro a somegiar,  
 E con quel nome spesso nu chiamemo  
 Tuti quei che se vol rimproverar:  
 Ma lasseme che diga: no dovemo  
 Dir gnente nu su sto particular,  
 Perchè cossa ghe pol Sempronio o Tizio  
 Se 'l porta in lu de la so bestia el vizio?  
 Bisogna anca saver che tuti nu  
 Soto una sola stela semo nati,  
 E che za ghene vol molte de più  
 Per formar sti animai come i va fati;  
 Per questo molti e molti se tol su  
 D'arpie, de porchi, i titoli onorati,  
 Quantunque tra le stele no ghe sia  
 Altro che un solo porco, e che un' arpia.  
 Ma per tornar a quel che ve diseva,  
 Sapiè che in mezzo a tuti sti animai  
 Ghe xe anca el lovo; infati el ghe voleva.  
 Ghe xe anca osei, se no i ghe fusse, guai!  
 E mi nato sarò co se vedeva  
 I oseleti col lovo a star tacai,  
 E la voglia che al lovo ghe sarà  
 Venudo alora el m' à comunicà ....  
 Ma qua cossà se fa  
 Cussi senza magnar?  
 Me par che gh'è de l' altro da portar.  
 Oh el xe qua l' intingoletto  
 Tuto quanto becafighi:  
 Ah el gran ottimo oseleto! ....  
 Oh le magna po, che questo  
 El se fato qua per ele ....  
 No le vol? proprio mi resto  
 Che le gabia cussi presto  
 Impenio le so buеле,  
 Ma pazienza .... za sta roba  
 No andarà butada via,  
 Che ghe xe po finalmente  
 El rimedio in boca mia.  
 E vu altri, servitori,  
 Fin che magno i becafighi  
 Portè un piatto anca per lori ....  
 Ma vedo che nissun  
 Ga voglia de magnar.  
 Se i porta un altro piatto  
 Me lo magno mi solo,  
 E i altri sta a vardar;

Onde no voi sta cossa,  
 Voi che magnemo tuti  
 Donca porteme i fruti.  
 A benedeti!  
 No gh'è fruti più perfeti,  
 Più stupendi, più squisiti,  
 Più gustosi e saporiti.  
 Sento a dir de l' ananà  
 Che 'l xe un fruto arcistupendo,  
 (De sto fruto no m' intendo  
 Nè ghe n' ò gnanca magnà )  
 Ma, i me dise, che consiste  
 Sta stupenda rarità,  
 Perchè in lu sto fruto unisce  
 Vari gusti ch' altri ga ....  
 Ben .... i mii no ghe n' à vari,  
 No i ga quei dei fruti soli,  
 Ma quei tuti che provar  
 Pol chi à voglia de magnar,  
 Sì, signori, i ghe xe tuti.  
 Via, ve digo, portè i fruti ....  
 Oh, le diga, òi minchionà ?  
 Le ghen magna, che i xe tuti  
 Picolini,  
 Frescolini  
 Tondolini  
 I xe tuti lugarini ....  
 Quatro soli! oh cospeton!  
 Me faressi andar in colera ....  
 Se sti trenta no magnè,  
 Ricordeve, mi ve aviso,  
 No ve vardo più in tel viso ....  
 Anca vu, via, comareta,  
 Tolè zo trenta, quaranta.  
 Anca ela, sior' Aneta,  
 Za per mi ghe ne xe ancora  
 Qua de fora.  
 Questo è un piatto predileto,  
 Onde al cogo gh' ò ordinà,  
 Che 'l ghen meta dopo questi  
 Per mi solo una speada  
 Più del dopio de quei là ...  
 Ma no xelo un gran piaser  
 A magnar de sti cosseti?  
 Mi me par giusto d' aver  
 Un scartozzo de confeti ....  
 Cossa è stà ? chi xe venudo ?  
 Una letera ? dè qua ....

Oh cospeto! .... le perdona ....  
 A un disnar son invità ....  
 Me convien che vada subito;  
 Mi me dol lassarle qua,  
 Ma le vede la ocasion  
 Per ancuo porta cussì ....,  
 El xe pranzo che i lo fa  
 Nel casin de mio nevodo;  
 El me scrive che abondanza  
 De oseleti ghe sarà ....  
 Ah no posso ricusarli!  
 L'è un sconzuro troppo forte,  
 Perchè a mi i me piase massa!  
 Le permeta che le lassa,  
 Perchè presto i porta in tola ....  
 Ma no son minga un balordo,  
 Me ricordo, me ricordo ....  
 Oe porteme presto presto  
 Anca el resto :  
 Sì, anca st' altri lugarini ....  
 No i xe coti? Oh pofardia,  
 Che sfortuna xe la mia!  
 Ben, sentì : da qua do ore  
 Speraria d'aver disnà :  
 Tornarò subito qua ....  
 Se no i trovo coti in punto,  
 Se i xe fredi o brustolai  
 Ve farò pagar la pena  
 Ben de tuti sti pecai ....  
 Ma mi vado, che za so  
 Che sta cara compagnia  
 La xe tanto e tanto bona,  
 Che la perdona  
 Se la lasso cussì sola ....  
 Vado a tola, vado a tola.

## EL MATRIMONIO

STRAMBOTO

PER LE NOZZE

### BELLATI--DE MEZZAN.

Quel nonsocchè de vogia de mario,  
 Che drènto, done mie, sentì de aver,  
 La tendenza de unirse a una mugier,  
 Ala qual no volendo andemo drio,  
 No gh'è dubio, xe quela propension,  
 Che natura ha credudo necessaria  
 Perchè no vaga cole gambe in aria  
 El so sistema de propagazion.  
 Dela esistenza de sta gran tendenza  
 Sentimo in nu la piena conoscenza.  
 Quelo che ancora po par che se ignora  
 Xe'l modo che natura ha doparà  
 Co sta tal propension la n' à ispirà ;  
 Xe l' aparente material rason,  
 Che ne fa aver bisogno de sta union.  
 Dunque modo e rason, come le so,  
 Se degnè d' ascoltarne, ve dirò :  
 E per darve un' idea, che sia comun,  
 E no ghe sia nissun,  
 Che no ghe ariva, se no ancuo, diman,  
 Vardè el pistor col ve fa suso el pan.  
 El taglia la pasta  
 Infìn che la basta,  
 El doma, el la mena  
 A forza de schena :  
 Do tochi el ve forma,  
 Un toco per man :  
 Ghe dona la forma,  
 Che vol quel tal pan :  
 E co una strucada  
 A sti do pezzeti  
 Ghe da una tacada,  
 E vien i paneti.  
 Cussì la natura,

Divisa la pasta,  
 N' à fato a do a do:  
 N' à dà la figura,  
 La forma, e po basta:  
 Nè mi ve dirò  
 Qual sia la rason  
 Che l' à stralassà  
 De far quela union,  
 Che al pan i ghe fa.

L' è un fato per altro,  
 Nè gh'è chi se opona,  
 Che semo omo e dona  
 Formadi un per l' altro,  
 E ne fa credenza  
 La nostra tendenza.

Chi se imbate in quel pezzo de pasta,  
 Che natura gavea preparà  
 Per unirlo ala propria metà,  
 Che 'l se sposa, che gnente el contrasta.

Chi a l' incontro quel pezzo no trova,  
 Guai, se mai de sposarse el se prova:  
 L' è un bocon che nol pol digerir,  
 Nè gh'è medico per farlo guarir.

Tuto el studio che avemo da far,  
 Xè quel pezzo de pasta a trovar.  
 Pur gh'è molti, che gnanca ghe abada;  
 Qualchedun crede averla trovada,  
 Inganà da una turba de vizi,  
 Che sta in mascara atorno i novizi,  
 Perchè el tempo nemigo a natura,  
 Distrator de qualunque fatura,  
 Ghe li manda per sola rason,  
 Che i disturba la generazion.

Qualchedun se 'l ga el pezzo incontrà,  
 Che per lu gera sta destinà,  
 O ghe manca el favor de fortuna,  
 O l'è nato in mal punto de luna,  
 E se mete de mezzo i parenti,  
 Che vol far per l' età da prudenti,  
 E per forza ghe tol da le man  
 Quela pasta, che gera el so pan.  
 Cussì el mondo va sempre al roverso:  
 A mal fato se vede el ben perso.

Nela bela età del' oro,  
 Quando in tera stava i numi  
 A insegnarne i so costumi,  
 E la fede e la inocenza  
 Le faceva per prudenza

Sentinela dele spose,  
 Le caene del' imene  
 Gera rose,  
 Perchè i aveva serà via  
 In tel vaso de Pandora  
 La indifferenza cola gelosia,  
 E no se conosceva i vizi ancora.

O se incontrava allora  
 El so pezzo de pasta facilmente,  
 O se nol gera quello,  
 Coregeva el modelo  
 La virtù, che per tuto era presente.

Ma in adesso che 'l vaso è roversà,  
 Virtù imisantropia s' à ritirà,  
 Le caene de rose s' à frùà,  
 Tuti i fiori gh'è cascà,  
 Tanto che l'è giusto vogie:  
 No gh'è più che spini e fogie,  
 Xe el capricio e l' interesse,  
 Che s' à messo le braghese,  
 E comanda in tuti i toni  
 Sul destin dei matrimoni.

I pastori se accompagna  
 Per aver le pastorele,  
 Che a magnar per la campagna  
 Ghe conduga le so agnele.

Chi laora ne la tera  
 Una sposa va cercando  
 Per aver chi fa de bando  
 Co più cuor de la massera:

E sta zente guente bada  
 Se a trovar la pasta i fala;  
 I se sposa s' una ochiada:  
 Buona gamba e bela spala.  
 Ma in campagna, passa via,  
 No gh'è tanta carestia  
 Se ghen conta l' un per cento,  
 Che se sposa, e sia contento.

Inocenza, che tradia  
 S' à trovà ne le cità,  
 Sul momento xe partia,  
 La s' à in vila ritirà.  
 Qualche volta a quei che passa  
 La ghe fa la carità,  
 Un ricordo la ghe lassa  
 Per trovar la so metà.  
 Ma in cità se cercarè  
 Un per mile trovarè

Se principia un spòsalizio  
 A proporne per contrato,  
 De la sposa per servizio  
 Se ve mostra un bel ritrato.  
 Se 'l pitor gnanca l'à vista,  
 Purchè un poco el la descriva  
 Sul ritrato se l'acquista,  
 La xe ela proprio viva.  
 Za se sa, prima domanda,  
 Se contrata su la roba,  
 Se la fusse grossa e granda  
 Questa drezza anca la goba.  
 L'è un portento de talento,  
 La xe bela come 'l sol,  
 Se l'è un aseno d' arzentio;  
 Se l'è d' oro, chi ghe pol?  
 Del mario no se discore,  
 Sia pur orbo, gobo, zoto,  
 Basta aver cucà el merloto,  
 Tute in braccio le ghe core.  
 El contrato za xe fato,  
 Vien el zorno dele nozze  
 Scufie, abiti, e carozze,  
 Ogni artista xe impiegà.  
 Un mier de soneti  
 Ve stampa i poeti,  
 Un numero grando  
 De auguri, de lodi,  
 Se va prodigando  
 Sui vostri nevodi:  
 Il lustro degli avi ....  
 Che xe da lustrar,  
 Se i fusse anca travi  
 Avran da emular.  
 Alquanti scroconi  
 In mezzo ai boconi  
 Ve sbragia un eviva,  
 Che al cuor no ghe ariva.  
 Svodae le botiglie  
 Se fa el so baletto:  
 Se canta, se strepita,  
 I sposi va in leto.  
 Che i se leva mo aspetemo,  
 E chi sa .... che no i vedemo  
 Un pocheto imusonai ....  
 Che i xe mal accompagnai  
 Ghe par forsi de capir ....  
 Ma no se pol dir ....

In pressa .... cussì ....  
 Ghe vol do tre di.  
 I capita .... i passa ....  
 Pur troppo xe vero:  
 I ochiai xe calai,  
 Vedè senza vero.  
 I vizi .... xe massa,  
 Novizi .... bondi.  
 No xe più permesso  
 De far el barato,  
 El giogo xe messo,  
 El falo xe fato.  
 Voleu de le piere  
 O de le noghere  
 Le machie trovar?  
 Bisogna fregar.  
 Voleu veder chiara  
 Dei sposi la tara?  
 Bisogna sposar.  
 La toca de quello  
 Che compra un cavallo:  
 L'è bravo, l'è belo,  
 Nol mete pie in falo:  
 El ga sentimento,  
 El va come el vento,  
 E co l'è comprà  
 El par barata.  
 Ma no xe po minga esenti  
 Da sti tardi pentimenti  
 Gnanca certi matrimoni,  
 Che ipso facto ve par boni,  
 Perchè d' altro no i xe nati  
 Che da genio, che da amor,  
 E diressi che li à fati  
 Col compasso el tornidor,  
 Se no xe proprio incontrada  
 La pasta che natura ha preparada:  
 Quela rata anticipata  
 De prezioso sentimento  
 Fa svanir in t'un mumento  
 Tuto el ben che avè sperà.  
 Co sè drento  
 No trovè più novità,  
 Come i altri vedè chiaro,  
 Magnà el dolce, vien l' amaro,  
 E bondi felicità.  
 Oh! ale curte: fin che 'l vizio  
 Xe 'l tiran plenipotente

De la zente,  
 Matrimonio è un precipizio.  
 Più che l'omo se avvicina  
 A una dona,  
 Sia pur bona,  
 Sia pur bela,  
 Ma no quela,  
 Che natura ghe destina,  
 Xe l'union matrimonial  
 Un delirio universal.  
 Un tomo — xe l'omo,  
 Nol ga più giudizio:  
 La dona è un' union  
 De puro caprizio,  
 Che va proprio al paragon  
 De un orologio de ripetizion.  
 Ogni poco che se fracca  
 Sula cassa, o in te la susta,  
 El se maca, el se desgiusta:  
 El va ben tre zorni al' ano,  
 Ogni tanto el ga un malano,  
 E se mai per accidente  
 El xe bon, nol val più gnente  
 Se 'l va in man de un insolente.  
 Ma za no gh'è dubio:  
 Mugier e marii,  
 Che xe mal unii,,  
 Mai pace no i ga.  
 Se i xe zovenati  
 I fa in bota i mati,  
 Se 'l mato xe un solo  
 Madam zalusi  
 La capita a svolo,  
 E pase .... bondi.  
 Xei tuti do vecchi?  
 I ga el so da far  
 Cercando sui spechi  
 Rason de crier.  
 Xei forsi un per sorte?  
 Xe meglio la morte.  
 E po ghe xe 'l mal  
 Che a tuti preval.  
 Ghe xe quello che ve spende  
 Tuto in zoghi, o a le ostie,  
 Chi xe scioco, chi pretende,  
 Chi bastona e fa pazzie.  
 Gh'è 'l mario che mal contento,  
 El ve tien come in convento;

Gh'è l' avaro, che ve lassa  
 Andar nua, che tuto è massa.  
 Ghe 'l santon, che fa crepar,  
 El minchion fa vergognar.  
 Gh'è 'l superbo, l'arogante;  
 Gh'è la dona petulante,  
 Che nè a tavola, nè in leto,  
 La ve lassa mai star quieto.  
 Se ghe xe cugnae, madone,  
 Senti sempre l' eleissone;  
 Ghe xe quella che no porta  
 Che vestiario oltramontan,  
 Nè va fora de la porta  
 Senza scarpe de Milan:  
 Ghe xe quella che se gloria  
 De la dote per la boria,  
 E al mario se 'l parla un poco:  
 Tasè là, caro pitoco.  
 Come dise a l' incontrario,  
 Chi xe rico ale bazote,  
 Se le vol qualche vestiario;  
 Andè là, magnè la dote.  
 Guai l' aver mugier sapiente,  
 La scombussola la casa,  
 El mario no conta gnente,  
 La fa ela, e bia che 'l tasa.  
 Guai l' averla incocalia,  
 No l'averze boca mai  
 Senza dir 'aa sciocheria.  
 Tuti insoma ga la soa,  
 Nè rimedio a sti malani  
 Trovarè gnanca in cent' ani,  
 Se quel pezzo de pasta no incontrè  
 Preparada perchè ve accompagnè.  
 Ma credeu che questa sola  
 Sia la serie de' quei guai,  
 Che ga i mal accompagnai?  
 Mentirave per la gola,  
 Gnanca un quinto no v'ò dito ....  
 Se andarave al' infinito ....  
 Ma .... me par chè i salta fora  
 Che i me diga : ala malora,  
 La deu dunque disparada?  
 Mai più nozze a chi ve bada.  
 Eh pian, done, siè tranquile,  
 Che la union de ste metà  
 Tante volte s' à incontrà,  
 Ve l'ò dito, l' una in mile.

De le nozze el sacro nodo  
 Mi no intendo disprezzar :  
 Che no aprovo, che no lodo,  
 Xe 'l volersene abusar.  
 Seu po mossi a far sta union,  
 No da fini secondari,  
 Ma per tender ala pura  
 Intenzion - de la natura,  
 Per dar vita ai vostri pari,  
 E trovar quella metà,  
 Che per vu xe sta formà?  
 Ve lo zuro, no gh'è pregio,  
 Che del talamo sia meglio :  
 L'è un' union de paradiso  
 Che inocenza à incoronà :  
 Che quel ben, che xe diviso,  
 Ve presenta radopià.  
 Anzi tuti - pute e puti,  
 Seguitè co divozion  
 Quel' inata propension.  
 No se zoghelo anca al loto?  
 Provè pur, che ve lo adoto,  
 Provè pur se qualcheduno  
 Fra quei mille trova l' uno.

## I T R E M.

Un zorno tre letere  
 Del nostro alfabeto,  
 Urtade un pochetto  
 Per via de amor proprio,  
 Gavea bega insieme :  
 Le gera tre eme,  
 Magiuscola, piccola,  
 E granda corsiva.  
 Ognuna za ambiva  
 De aver magior merito,  
 De goder più stima,  
 E d' esser la prima  
 Che possa dir mi.  
 Ma senza del i  
 No basta za l' eme,  
 Ghe vol zonti insieme  
 I in a dir mi.

E adesso capì,  
 Che dela question  
 La risoluzion  
 La stava in tel i.  
 Sto i gera solo,  
 E forsi anca molo,  
 Nè questo ze un cognò,  
 Che suso per regerse  
 L' aveva bisogno  
 De un fia de puntin.  
 Tra elo e 'l so punto  
 Nol gera bastevole  
 A farghe l' agiunto  
 A tute ele tre.  
 Per questo de torselo  
 Za nata la gera,  
 Più manzi se dopara  
 Più avanti se para,  
 E ognuna i so meriti  
 Metendoghe in vista  
 Cercava esser l' unica  
 Nel far la conquista.  
 Mi, dise la piccola,  
 Son certa e sicura,  
 Che tute za suparo ;  
 Vardè la figura.  
 Se un' opera in picolo  
 Ze assae più elegante  
 Mi son la più pepola,  
 Vol dir più galante.  
 Se conto po i meriti,  
 Che go nel parlar,  
 A dirme primissima  
 No gh'è da pensar.  
 Chi parla in magiuscole?  
 Nissuno per dia;  
 In scritto se tolera,  
 Che alquante ghen sia,  
 Ma i casi è pochissimi,  
 E mi ogni mumento,  
 E ugnola e dopia,  
 Me trovo in cimento;  
 Nè conto tra l' ultime  
 Mie prerogative,  
 Che amor no se scrive  
 Se mi no ghe son.  
 Mo cara, ghe replica  
 La eme magior,

Se vu no dè 'l placito  
 No gh'è dunque amor?  
 E mi no son dopia?  
 No gh'entro l'istesso  
 In tei frontespizi?  
 E fè sto riflesso,  
 Che quei rimarcabili  
 Ze molti de più;  
 E in tei nomi propri  
 La prima seu vu?  
 Se i vol po far calcolo  
 In quanto a figura,  
 Per mi assae più provida  
 Ze stada natura.  
 Ze mai confrontabile  
 La mia gravità?  
 Presenza più nobile  
 No mostra un soldà.  
 Le forme ze erculee,  
 Le gambe slargae  
 Le par do colone  
 Le più compagnae.  
 Insoma ze inutile  
 Combater per l'i;  
 Za tuti ze al'ordine  
 Che 'l piega per mi.  
 Sarà, dise seria  
 La eme corsiva,  
 Pol darse che 'l riva  
 A upirse con vu;  
 Ma mi son più varia,  
 Mi son più de moda,  
 Mi son manco voda,  
 Più grazia mi go;  
 Co mi el ze più libero,  
 Co mi el ga più spesso  
 Un facile acceso  
 In gran società;  
 Perchè za mi domìno,  
 E scritta e stampada,  
 E son sempre usada,  
 Che tuti lo sa;  
 Ma st' altra magiuscola  
 Co quele so zampe  
 La ze per le stampe,  
 Ma in-scrito? sior no;  
 E se anca la piccola  
 Più spesso ghe entrasse  
*Racc. Poes. Ven.*

Saveu tossa nasce? ...  
 No i varda che mi.  
 Quel' altra, missiandose  
 Co letere eguali,  
 I so capitali  
 Finisce cussì;  
 E mi .... ma za un ipsilon,  
 Che in tel alfabeto  
 Del nostro dialeto  
 Sta sempre de bando,  
 El stava ascoltando,  
 E co brutto viso  
 Cussì l'ha deciso.  
 Beghè pur insieme,  
 Sarè sempre eme,  
 E l'eme trovandola  
 Senz' altra parola  
 Cussì sola - sola,  
 Scusè se 'l rispeto  
 Mi bia che ve perda,  
 Vol dir proprio merda;  
 Sichè fè benissimo  
 A torve un agiuto  
 Per comodar tuto,  
 Ma se credè a mi  
 El ze poco un i;  
 Ghe vol anca un o;  
 Toleve un i o,  
 Che questo adatabile  
 Prometo che 'l ze  
 Per farve 'l servizio  
 Quantunque siè in tre.  
 Opur tolè un ario,  
 E 'l conto è finio  
 Senz' altro lunario;  
 Sia granda, sia piccola,  
 Cussì combinae,  
 Corsiva, o magiuscola,  
 Sarè ricercae.

## EL MIRAGIO

VISTO DA UNA PASTORELA IN MENDIP VICIN  
A BRISTOL.

Pastorela no sorprenderte, (150)

Nè te sia d'augurio tristo,  
Se gran parte d'un esercito  
Su le nuvole ti à visto;

Nè te impona quel disordine  
De cavaï, de cavalieri,  
Quele spade alzade in aria,  
Quele lanze, quei cimieri.

No i ze segnò de disgrazie,  
No i predise malatie,  
No i ze spiriti, nè diavoli,  
Nè l'efeto de magie.

Ste aparenze ze l'immagine  
D'altri ogeti iluminai,  
Come in specchio su le nuvole  
Pituradi e tramandai.

Te sevien quel fonte limpido,  
Che te serve a consultar  
La metua del to vestiario  
Co ti vol innamorar?

Co ti meti tanto studio  
Per fornirte d'un bel fior,  
Che te possa donar grazia  
Per robar più presto un cuor?

I vapori su le nuvole  
Vien a far l'istesso efeto,  
Come l'acqua, che riverbera  
Quel to viso sul so leto.

La rason de sto riverbero  
In Germania s' à spiegà, (151)  
Perchè là quel di mèdesimo  
Gran cavali à manovrà.

Cussì, andà l'ultimo esercito (152)  
In Egitto da la Franza,  
L' à tremà vedendo a moverse  
Altro esercito in distanza;

E nol gera che quel unico  
Su le nuvole depento:  
Conossudo quel fenomeno  
A' finio tuto 'l spavento.

Anca a Regio vicin Napoli (153)  
Qualche volta nell'istà  
Se vedeva star in aria  
Colonami; archi e cità.

Tuto in soma ze la copia,  
E l'unione de varie viste,  
Concentrade al punto d'otica,  
Che ghe vol per esser viste.

Ma sto punto ze difficile  
A incontrarse da la zente,  
E per esser straordinario  
El riesce sorprendente.

Sta pur certa nol ze magico,  
Pastorela, sto portento;  
Che ze andada tuta in cenere  
La noghera a Benevento. (154)

La magia, che nò ze favola,  
E che sempre sarà sconta,  
Ze i to occhi, che vardapdone  
I ferisce senza ponta.

PER

## OCASION DEL MATRIMONIO

## BIANCO - BILESIMO

*Letera.*

Ancuo, che coi vincoli  
De sposa ti à streta,  
Mio caro Girolamo,  
La to Marieta,  
Per darte un indizio  
Del mio giubilar,  
Dei coniugi el codice  
Te vogio donar;  
Che dopo un decenio,  
Che fazzo el legal,  
Se monto anca in catedral  
Nol credo sto mal.  
So, sposi, che inutile  
Xe 'l darve un consegio,



Che senza sto codice  
 Pensè sempre al meglio :  
 Ma 'l xe un solo articolo,  
 Lezelo de volo,  
 L'è scritto in sti termini :  
 « Èsè un ochio solo. »  
 No stèssi a sorprenderve  
 L'è proprio cussi :  
 Voressi un interprete ?  
 Sì, sposi, qua mi.  
 Se con un sol ochio  
 Vardè tuti dò,  
 La cossa più frivola  
 Pol farve bon prò :  
 El belo za in genere  
 Savè nol se dà :  
 L'è afar de capricio,  
 Nel genio la stà :  
 Co un ochio medesimo  
 Se tuto vardè  
 Del belo la massima  
 Egnal ve formè.  
 Del ben lè delizie  
 Le xe relative ;  
 Chi l'acqua desidera,  
 Chi 'l pian, chi le rive ;  
 Chi cerca la chierega,  
 Chi vol el pandolo :  
 Ma tuto se comoda  
 Co l'ochio xe un solo.  
 Savè za la storia  
 De quel canochial,  
 Che gera un prodigio  
 Per far natural,  
 Che sina le machie,  
 Che gh'è in te là luna,  
 Rendea palpabili  
 A una per una ;  
 E un prete, osservandole  
 Con una signora,  
 Questioni gravissime  
 L'avea tirà fora,  
 Perchè, quel medesimo  
 Ogeto fissà,  
 Diverso spettacolo  
 Gavea presentà ;  
 Al prete de un tempio  
 Col so campaniel ;

A st' altra, filosofa,  
 Do amanti in tel miel.  
 Seguindo el mio codice  
 Ghe dava in tei ochi  
 O a lu la melagine,  
 O a ela i batochi.  
 Dirè mo, che equivoco,  
 Che no un ochio sol,  
 Ma diese, ma quindese,  
 Piu tòsto ghen vol.  
 Facendo sto calcolo,  
 Saressi in ingano ;  
 Se mai fè la guardia  
 Ve nasce el malano.  
 Giunon per el discolo  
 So Giove à trovà  
 Un Argo centochlo,  
 Epur no à giovà :  
 Oh guai ! co se dubita  
 De veder ghe massa ;  
 Un ochio solissimo  
 Avertò se lassa.  
 Studièla, zirevela,  
 Ma siè persquasi :  
 Prevede el mio codice  
 Tutissimi i casi.

NEL

## ZORNO DEL MATRIMONIO

## TONELLI E D'AGOSTINI

*Apologo.*

Per dirve, o sposi, un vero *me consolo*  
 O' pensà far òn svolo,  
 E andar lassù dove 'l gran libro stà,  
 Che decifra 'l destin dei matrimoni,  
 E fa saver se i sarà storti, o boni.  
 A redosso del Pegaso montà  
 In manco che l'ò dito  
 Ghe arivo, averzo 'l libro, e trovo scritto :  
 « Che la cancelaria xe trasportada  
 In cusina d'Imene, e che là vada. »  
 Ghe vado sul mumento,

E chi trovio là drento ?  
 Amor vicin al fogo  
 In falda, scalmanà, che 'l fava 'l cogo.  
 In vece de registri  
 Ghe gera cazzarole col viglieto  
 Del logo dove 'l piato era direto :  
 In vece de ministri  
 Moltissimi corieri,  
 Vestii da camarieri,  
 Stava 'l piato a aspetar,  
 Che per el mondo se dovea portar,  
 E conforme che 'l gera, o rosto o lesso,  
 Se tirava 'l preludio, o in ben o in mal,  
 Sul futuro successo  
 De quela tal union matrimonial.  
 Per esempio un pastizzo  
 Ai mii tempi per mi sarà stà fato ;  
 E per qualche altro mato  
 Una bona salseta,  
 Che almanco da novizzo  
 Gabia fato parer la goba dreta.  
 Ma mi me interessava  
 De saver le piananze che se usava,  
 E che più i consumava ;  
 E za ghe gera in vista  
 • A l'uso dei tratori la so lista.  
 Se vedeva disposti  
 Gran pastizzi, e gran rosti,  
 Gran piananze co l' agio, e gran limoni,  
 Alquanti macaroni,  
 Gelatine, gran salse colorate,  
 Dei fruti, pochi dolci, e gran salate.  
 « Cossa mai, digo allora,  
 Ghe sarà parecchià per sto imeneo ? »  
 Vardo, esamino, cerco, e salta fora  
 Un bel piato de cuor coto sul speo.  
 Mi 'l preludio ò capio,  
 E da de là partio  
 Vel vegno, o sposi, subito a schiarir :  
 « Co 'l cuor xe rosto no gh'è da che dir. »

NEL ZORNO DEL MATRIMONIO

## SANDI - MENGOTI

*Promemoria ai Sposi.*

Ochio, slesa e suboto, i xe tre modi,  
 Che ga in uso fra na l'agricoltor  
 Co 'l zonta insieme de do piante i nodi  
 Per darghe ai frutj qualità e saor :

Nè a l' orba no, ma coi principj sodi  
 Del so mistier, poloni de vigor  
 El va cernindo ; el va scartando i vodi ;  
 L'unisce quei, che à simpatia de umor.

Ancu in ste nozze xe previsto tuto ;  
 Vu, sposo, avè trovà la vera pola,  
 Che darà co l'incalmo otimo fruto :

Altro no resta, che la scielta sola  
 Del modo de incalmar co più costruto :  
 Vu se l'agricoltor .... savè la scuola.

## PER LA PRIMA MESSA

DEL SIGNOR

## FRANCESCO BERTAGNO

*Soneto.*

Tre xe i stati dei omeni a sto mondo,  
 Celibi, sacerdoti e maridat ;  
 Par el più belo el matrimonio, e in fondo  
 L'è giusto quel, che ga maggiori guai.

Celibato el credè forse el secondo,  
 Perchè con lu no ve trovè ligai :  
 Ma se un tantin nel navigar sè tondo  
 Libertà va a Patrasso, e sè negai.

El sacerdozio sì, che 'l xe 'l più san :  
 Lu ve procura el dolce dei do stati  
 Senza missiarghe drento anca el malan ;

Sposa che no ve fa deventar mati,  
 Che invece de magnar la ve dà 'l pan,  
 Fioi che no pesa, e paga apena nati.

# SESTINE IN LODE DEI CANI

DI

MARCO SPRANZI.

No comprendo perchè se chiami can  
L'omo che nutre un cuor fiero e cativo,  
Come el can fusse barbaro e inuman,  
E per proprio caratere nocivo;  
E trovo a parer mio assolutamente  
Sto epitetar ingiusto e inconveniente.

Stà bestia infati no la ze fornìa  
De mille virtuose qualità?  
E co più de rason no la saria  
Ne la imensa caena colocà  
Tra l'omo e i bruti, no per la struttura,  
Ma per la squasi umana so natura?

Quanti servizi a l'omo no la presta  
Coi so scherzetti, e col so alegro umor?  
Col far ai so paroni aceto e festa  
La se ghe insinua dolcemente in cuor,  
Servindoghe de amena distrazion  
In mezzo a le disgrazie, e a le afflizion.

E quei vaghi e graziosi cagnoletti,  
Delizia a le gentili signorine,  
Sofegai de bomboni e de baseti,  
No i merita le grazie e le moine  
In confronto e a dispetto anca de tanti  
Insipidi romantici galanti?

Oh quanto al cazzador un can no zelo  
De piacer, de solevo e utilità!  
I pési el ghe minora, e dreto e snelo,  
Fa che ghe sia la preda agevola,  
E più che al cazzador al can ze spesso  
Merito d'una cazza el bon successo.

E in forza del squisito so odorato  
A cercar le tartufole el ne giova,  
E co indefesso usmar e delicato  
L'indica a l'omo dove le se trova,  
Procurando del ghioto a l'apetito  
Un picante piatelo e favorito.

La utilità del can ze più preziosa  
Al grege de servir da difensor  
Su sto so-bulo vigile riposa  
Nel so cuzzo butà quieto el pastor,  
E el lovo impunemente no assalisce  
El grege dove el can lo garantisce.

E quante volte el can no ha preservà  
Dai ladri le ricchezze del paron?  
E quante ancora più nol ga salvà  
La vita combattendo da lion,  
Per fin restando ne la rissa opresso  
Vitima miserabile lu istesso?

Nè posso trascurar de far menzion  
De quei cani amorosi, che a salvar  
Dal rischio de negarse el so paron,  
I è sbalzai in acqua pronti, e col chiapar  
Coi denti un lampo del so vestimento  
I l'ha condoto vivo a salvamento.

E un omo scelerato, un omo tristo,  
Col titolo de can s'ha da chiamarlo?  
E sto titolo è giusto? N'ò mai visto,  
Per quanto m'abia messo a contemplarlo,  
Che sia l'indole soa tanto perversa,  
L'ò trovada anzi sempre assae diversa.

Chi ze del can più pronto e più ubidente,  
Se fin na ochiada, un moto a lu ghe basta?  
Arossissa quel spirito indolente,  
Che a far el so dover manca e contrasta,  
E specialmente le signore done  
Contradicienti tanto e testardone.

Chi pol vantar del can la mansuetudine?  
Forsi quei che maligni e intolleranti  
Se irita per sistema e consuetudine,  
O quei che in società sempre insultanti  
Senza satirizzar no i verze boca,  
E mile impertinenze in viso schioca?

Chi grato più d'un can, chi più de lu  
Riconoscente a chi ghe fa del ben?  
E pur vivendo sempre tra de nu  
Nol beve de l' esempio el rio velen,  
De malsesti pagando le atenzion,  
E i benefizi de persecuzion.

Omeni, l'amicizia che vantè  
Zela proprio sincera? ela invariabile  
Co un amico infelice abandonè?  
Quando co ipocrisia la più esecrabile  
A l'amigo insidiè borsa o l'onor,  
Aveu tolto tra i cani el precetor?

No i cani no dà minga ste lizion,  
I so afeti ze fermi, ze sinceri,  
E quando in vita i ga aprezzà el paron  
I difende el so corpo arditi e fieri,  
E fin su la so tomba i urla, i zeme,  
Squasi disendo: sepolime insieme.

No i cani, i fati parla, no abandona  
I so amici pasoni a la sventura;  
A Venezia ze nota a ogni persona  
La istoria de quel can che avea la cura  
Per el paron d'andar a pitocar,  
E agiuto fedelmente a lu portar.

O fedeltà del can superba e rara!  
Virtù che sora tute in lu se amira!  
Mile esempi la fama esalta e nara,  
E in ogni parte, dove Febo zira,  
De cani fedelissimi l'istoria  
A l'assà onoratissima memoria.

Donca el can per caratere ze bon,  
Mansueto, cordial, riconoscente,  
Vero amico, e compagno fedelon,  
Sichè sarà onorifico a la zente  
Sentirse dar del can da st'ora avanti,  
Can de qua, can de là, da tuti quanti.

E se alcun in progresso vien chiamà  
Fio d'un can, cuor da can, razza de can,  
De risponderghe grazie l'è obligà,  
Mentre in qualunque titolo de can  
I più squisiti elogi, e più aprezzai,  
Tuti, ma tuti afato, è concentraì:

Chiamemo pur i ladri, i traditori,  
Col titolo de gati, nominemo  
Pur volpi tuti i birbi inganatori,  
Ai crudeli de tigre el nome demo,  
De vipere ai rabiosi, e de suete  
A le nostre galanti marionete.

Disemo porchi pur ai parassiti,  
Aseni ai malagrazie malsestai,  
Marmote o talpe a tanti scimuniti,  
Scimiotti ai ganimedi strafantai,  
Puliere a le madame sfazzadone,  
E brespe a quasi tute le altre done;

Ma vardemose ben de nominar  
Le razze dei briconi e dei inumani,  
O quei che ga piacer quando i pol far  
Ai altri un mal, col titolo de cani,  
Che una enorme ingiustizia al can faressimo  
E un caratere inproprio ghe daressimo.

Se Cerbero è crudel, come vien scritto,  
 Sto Cerbero ze un can che sta a l' inferno,  
 E in quel brutto paese a lu è prescrito  
 De spapolarse l'anema in eterno,  
 Nè imputarghe xe lecito a peccato  
 Se 'l sodisfa el dover del proprio stato.

So ben che la canicola se acusa  
 Dei calori spietai che la ne manda,  
 Perchè i prodoti de le volte brusa;  
 Ma dal calor istesso, che tramanda,  
 La gran vegetazion diventa ativa,  
 E la total maturità deriva.

So che in Omero Achile indemonià  
 Contro d'Alcamenon, che gavea sconto  
 Briseide polpetina inzucarà,  
 Per far al rapitor un vivo affronto  
 Ogni qual volta che de lu el parlava,  
 Ochi da can co sprezzo el lo chiamava ;

Nè me ze ignoto che per indicar  
 La maledica rabia iniqua e fiera,  
 Che biastemando à fato un di crepar  
 La consorte de Priamo, Ecuba altiera,  
 Subito dopo morta la ze stada  
 In t'una brutta tagna trasformada ;

E so pur che Diogene la zente,  
 Per la mordacità dei so discorsi;  
 Lo intitolava can pubblicamente,  
 E dopo tanti secoli trascorsi,  
 Perchè maligni critici e mordaci,  
 De cinici ga el nome i so seguaci.

Ma so ancora che Osiride egizian  
 Prima d'Achile e d'Ecuba portava  
 Su le iusegne la imagine d'un can,  
 E co testa da can se venerava  
 Dal popolo d'Egitto come un dio  
 El successor d'Osiride e so fio.

Sta onorifica e pia predilezion  
 Val ben de più che titoli inventai  
 Da invidia, da calunia, e da passion,  
 Nè mai ze sta i strapazzi calcolai  
 Per verità inegabili e sicure,  
 Che in giudicar le serva de misure.

Se aborisce nel can l'idrofobia,  
 E l'oror che la infonde ze scusabile ;  
 Ma no l'è un vizio, l'è una malatia,  
 Nè a colpa mai del can la ze imputabile,  
 Anzi spesso da incuria la procede  
 De quei che ai so bisogni no provvede.

Zela colpa dei omeni se i ga  
 Tisi, variole, tifo petechial,  
 Che tanta strage sempre à fato e fa,  
 E insinuando el so velen fatal,  
 Quanto l'idrofobia, manda in campeto  
 Tanto quel che lo assiste che l'infeto ?

E in materia de umane malatie,  
 Quanto i omeni mai no s'in procura  
 A furor de imprudenze e strambarie,  
 O col sforzar continuu la natura  
 Co mille intemperanze e sbrodeghezzi!  
 Mentre i cani no fa sti bestializzi !

No me disè che el can pubblicamente  
 Co troppa libertà fazza a l'amor ;  
 Rispondo che 'l lo fa semplicemente,  
 Nè 'l se ne intende un aca de pudor,  
 E po se 'l ve fa rabia custodilo,  
 E deghe bon esempio, e compatilo.

Nè me disè che i sia fieri e crudeli  
 Perchè i assalta, i morsega, i spaventa ;  
 Chi ze quei che li arleva ; via chi zeli  
 Che li uzza, li stuzzega e violenta,  
 Che li amaestra a deventar baroni,  
 E a scordarse el caratere de boni ?

Nè me disè che in mezzo d'una cazza  
 A la bestia più utile che esista  
 Le rechie crudelmente i sbrega e strazza  
 Che sta bela virtù da l'omo i acquista,  
 Che no è mai visto un can contro un bo spinto  
 Le rechie a morsegar per proprio istinto.

Se del can ve lagnè perchè qualcuno  
 Contro l'omo s'è aventa a morsegar  
 El can se lagna perchè gh'è più d'uno  
 Che fieramente i trata a bastonar ;  
 E per la lege antica del talgion  
 I cani gavarave più rason.

Perchè el can ze educà dal'omo istesso  
 A so propria difesa el bulo a far,  
 E nol passa a far mal, che al punto messo  
 I maltrati de l'omo a rintuzzar,  
 E spesso drio i maltrati lu acarezza  
 Chi l'à tratà co crudeltà e fierezza.


Ze i cani insoma boni e mansueti  
 Con paroni pacifici e tranquili  
 Con quei che à bon umor i è sempre lieti,  
 Co le done e i putei dolci e gentili,  
 Nè i ze briconi che pèr coruzion  
 D'una trista e cativa educazion.

Quante volte ò sentio dir da la zente  
 No insolentè quel can, nol stuzzeghè,  
 Che lo fe deventar fiero, insolente;  
 E sto fato comprova, che no ze  
 El can per proprio istinto natural  
 Inclina a la fierezza, è a far del mal.

Sui talenti del can gnente dirò,  
 Che nele idee no i entra del mio assunto,  
 E po ze tanti i fati, che no so.  
 Come tratar un cussi esteso punto;  
 E se go comprovà che el can ze bon  
 Go afato sodisfà la mia intenzion.

No posso nonostante obliterar  
 De dir che ai nostri di s' à visto un can  
 A le carte coi omeni zogar  
 Usando i denti invece de le man,  
 E a scriver, e a far conti brevemente,  
 In fazza a moltitudine de zente.

Roseli, el mio lavoro ze compio;  
 Nè so se el ve sarà de agradimento,  
 Qualunque el sia, ve digo el parer mio,  
 Scolteme, amigo, ma scolteme atento:  
 La raccolta sarà completa e intiera  
 Se ghe stamparè drento sta cagnera.



## POESIE INEDITE

DI

# CARLO ZILLI.

### SORA LA FORTUNA DEI LETERATI.

Tuti, tuti sul fogo .

Sti libri maledeti,

Quanti che i ze, sbregai vogio che i svola,

E che sia el vin, el zogo,

Le femene, i pachieti,

Da qua avanti i mii maestri, e la mia scuola.

Quanto ze megio a tola

Passar l'ore coi amici in alegria,

O de una bela tosa in compagnia,

Che imarcir sora i libri, e vegnir smorti

Per saver quello che à pensà dei morti.

Cossa serve la testa

Romperse, e lambicarse

Al fin dei fini per saver quatro ache?

Zela mo'cosà questa,

Che merita strussiar,se,

E le palpiere aver dal sono strache?

Se al tirar de le slache

Diferenza de sorte no ghe ze

Tra chi no à mai savesto l'abece,

E quel che à leto vinti librerie,

Mo no zele studiar cogionarie?

Ve ingana chi ve dise

Che 'l studio solo è quello,

*Racc. Poes. Ven.*

Che i omeni distingue tra de lori,

Che lu ze la raise

De tuto el bon e 'l belo;

Una semenza che dà fruti e fiori;

Che lu la strada ai onori

Averze a chi ze nato su la pagia;

O gera perso tra la menuagia,

Che lu mete a l'impar del gran signor

El fio del scoacamin e del pastor.

Sì a un tempo cussì gera,

El raro e bon talento

Fora del so tugurio el se tirava;

El grandò bona ciera

Ghe faceva, e contento

De assisterlo, podendo, el se chiamava.

Onor soo el lo stimava

Slargar la man co l'omo leterato

Senza vardar come e da chi l'è nato;

Mecenate de Roma el più gran sior

Gera amico de Orazio e protetor.

Ma ancuo no più; una sola

Ochiada a dreta o zanca

Deve; cossa vedeu coi vostri ochi?

Osservare una fola

D'omeni che no manca

De fondo e de saver, e pur pitochi;

Vedarè che i peochi

Sui drapi ghe spassizza a prussission,  
 No i ga braghesse al culo, nè zipon,  
 Senza che 'l so saver, e el so aver leto  
 Sapia frutarghe un strazzo de paneto.

Bensi el castron cantante,

El bufo, el zarlatan  
 Covertò d'oro vedarè marchiar;  
 A l'arpia comediante  
 Onori a piene man,  
 E roba e bezzì, vedarè donar;  
 Un protetor trovar  
 Sta sorte de genia no fa fadiga,  
 Mentre l'omo de ingegno che sfadiga,  
 Fusselo un Salamon, ze sùl leame,  
 Sgangelisce dal fredo, e da la fame.

Perchè co son mi nato

Mio pare nol ga dito:  
 Ti musico voi farte o balarin!  
 Gerelo coto o mato  
 Co gh'è vegnu el prurito  
 El Limen de comprarme, e 'l Călepin?  
 Megio assae del latin,  
 Dei nomi, verbi, e mile strigarie,  
 Gera insegnarme a ben menar i pie,  
 O la solfa a cantar, i trili e i toni  
 A costo de privarme dei .....

Per pocò che riuscio

Fusse a far el bufon  
 Gavarave anca mi fato fortuna.  
 Da milord vestio  
 Co bordi e guarnizion  
 Marchià avaria in carrozza su la bruna.  
 No bataria la luna,  
 Come che fazzo, a guadagnarme el vito,  
 Pensier no me daria vestiario e fito;  
 Me sentirave a dar senza contese  
 De cavalier el nome, e de marchese.

Ma cossa dighio mai?

Ah! le bile ze quele  
 Che zo de carizzata me fa andar.  
 Che vegna pur portai  
 I bufoni a le stele,  
 La virtù benchè nua vorò stimar.  
 Oh! degni de onorar  
 Tacconi e sbregghi quando atorno sè  
 D'un virtuoso, e 'l covrì come podè;  
 Per mi ve stimo più de quei brilanti,  
 Che a tanti luse in deo birbi e furfanti.

De bile e de despeto

Ti vegnarà acusada,  
 La mia carà canzon, d'esser un sfogo.  
 Vero: me bogie in peto  
 De bile una stagnada,  
 Che me farave andar de posta in fogo,  
 Vedendo l'omo doto ancuo avilio,  
 E 'l bufon messo in cielo come un dio.

#### MADRIGAL.

Dal zorno che t'ò visto

Un certo che me sento,  
 Che me fa mesto, pensieroso e tristo  
 El sono ze andà via,  
 Go perso l'appetito,  
 No conosso che 'l nome de alegria.  
 Se stago fermo o ziro  
 De continuo sospiro,  
 Anzi senza de acorzerme ogni tanto  
 Me vien ai occhi d'improvviso el pianto.  
 Ah! chi mai me sa dir per carità  
 Che mal sia questo, che no ò più provà?  
 Epur no go più gnente  
 Subito che me trovo a ti darente.

#### MADRIGAL.

Un chiacolon, che ghe n'è tanti al mondo,

No la finiva mai  
 De dir su, de dir suso, e senza arisar.  
 Un orbo là vicin  
 Stufo de più ascoltar,  
 Credendo che 'l lezesse qualche libro,  
 In colera el g'à dito:  
 Oh! fenila una volta, che deboto  
 El cesto m'avè roto.  
 Quel maledeto libro che lezè  
 Per dio baco sbregghelo,  
 E forbiye el preterito co elo.



## LA DIVOTA.

Go qualche poca  
 De divozion,  
 No' sta a mi a dirlo,  
 Ma in zenochion  
 Sia di de festa,  
 O de laorar,  
 Sempre tre messe  
 Vago a ascoltar;  
 Perdoni, vespari,  
 Chiesa, confesso,  
 Come so solita,  
 Frequento spesso;  
 Senza rosario  
 Gnanca un di passo,  
 E se gh'è predica  
 Mai no la lasso.  
 De la mia nascita  
 No digo gnente,  
 Che in fondi el nascer  
 L'è un acidente;  
 Per altro solo  
 Che mi disesse  
 La mia casada,  
 Chi è che gavesse,  
 Fusselo ancora  
 Marchese o conte,  
 Tanta albasia  
 Da starne a fronte?  
 Co le mie azion  
 So de no dar,  
 Grazie al Signor,  
 Da far parlar.

Vita modesta  
 Più de la mia  
 No credo certo  
 Che la ghe sia.  
 Sguazzi e scialacqui  
 I me vien su:  
 El so bisogno,  
 Gnente de più.  
 Come el profonder  
 Lo disaprovo,  
 Cussì el sparagno  
 Me piase e aprovo.  
 In casa tuti  
 Soto li tegno,  
 Ch'altri comanda  
 Mi no me degno.  
 Vogia, o no vogia,  
 Fioli, mario,  
 E servitori,  
 Al genio mio,  
 Ai mii comandi,  
 S'è da adatar.  
 Guai se i tentasse  
 De contrastar!  
 In mi de tristo  
 Certo no vedo  
 Che ghe sia un ete;  
 Anzi mi credo  
 Che tra le femene,  
 Per quanto i prova,  
 Una compagna  
 De mi no i trova,  
 Che possa el prossimò  
 Rimproverar,  
 E dai so vizii  
 Zoso tirar.



# POESIE

DI

PIETRO BURATTI.

---

## L'AUTOR A LA MUSA.

Va pur là, de lode ingorda,  
Cerca un logo in sta racolta,  
No badarme, fa la sorda,  
Tiente al pezo, e cori in volta.  
Fra i do nomi da cartelo  
Toni e Checo (155) fa pur lega,  
Missia pur senza cervelo  
Qualche scarto de botega;  
El to rame no val bezzi  
Contro l'oro de zechin,  
Che impastà de cocolezzi  
Spende ancora el Vulcanin;  
Nè paura de rivali  
Ga più Griti a l'altro mondo  
Che, svodai de Franza i sali, (156)  
Trovaria chi vian secondo.  
Lo so ben che a to discolpa  
Ti rispondi: « No criarme;  
Tuta mia ne xe la colpa,  
Gh'è chi insiste, e vol stamparme;  
Go cazzà la prima volta  
Un de no proprio in tel muso;  
Ma son dona che se volta,  
De dir sì m'ò fato un uso.

No voi fama d'arogante,  
No me piase disgustar,  
Al sentir dirmene tanté  
M'ò lassada inzinganar. »  
No te credo una pataca,  
La xe gola del confeto,  
Le xe scuse che no taca;  
Mal assae, te lo ripeto.  
Cara mia, se conossemo;  
Tuti ga la so natura;  
E la toa, zà s'intendemo,  
Xe col calò, xe maura;  
Come vustu dé sta sia  
Cambiar mai la to tendèza,  
Rebaltar fisionomia,  
Darte un'aria de decenza?  
Vesta pur da gran signora  
Chi xe nata contadina;  
Presto el marzo ghe dà fora,  
E la dama xe in berlina.  
Cussì ti nel to strambezzo,  
Nel to far da piazzarola,  
Ti ga un certo demoniezzo  
Che sodisfa, che consola.  
Ma se mai per parer bon  
Ti te meti in gravità,  
Se capisce in bota un ton  
Spurio, incerto, faturà.

Ti to sa che son sincero  
 Sul to merito real,  
 Ma le grazie del mistero  
 No combina, col to sal.  
 Certi apologhi coverti  
 (Loghi xa fritti e rifritti)  
 I xe fiori per Lamberti,  
 I xe geme in man de Griti;  
 El to genere più vivo  
 Nei riguardi ga un intopo,  
 Senza un bel nominativo  
 Nol tol suso el so galopo.  
 Un vocabolo rotondo  
 Xe per ti'salsa da cogo;  
 E ti vol mostrarte al mondo  
 Senza el gusto de sto sfogo?  
 Chiare e bele te le sfico,  
 Te voi dir la verità,  
 No gh'è calcolo più scioco  
 De mostrarse per metà.  
 Canzonete per chitara,  
 Prindeseti per parenti,  
 Le xe cosse, musa cara,  
 Che stampae no xe portenti.  
 No ghe voi negar del bon,  
 Co 'l morbin xe messo in moto,  
 Ma cessada l'ocasion  
 No le pol cavar el goto.  
 I to pezzi più laorai,  
 I to pezzi da sessanta,  
 I xe tuti magagnai.  
 I ga el marzo in te la pianta,  
 No ti pol che dirli in rechia.  
 Ai rotoni, ai cortesani,  
 O presente qualche vechia  
 Carga almanco de otant'ani.  
 Ma za predico al deserto  
 Col mio don de profezia,  
 Fiasco grando, fiasco certo ....  
 Damigiana, musa mia.  
 E che gusto per quei grami  
 Che te ga tanto su i corni!  
 Oh che furia de epigrami,  
 Che bomò da certi storni!  
 Mi per ni za ghe la cato,  
 E me salvo in ogni caso;  
 Farò quel che n'ò più fato,  
 Dirò mal fin del Parnaso.

## LAMENTAZION

AL

## PREFETO DE VENEZIA

AL TEMPO DEL BLOCO DEL 1813. (157)

Co le lagreme su i occhi,  
 E col cuor tuto strazzà,  
 Puzo in tera i mii zenochi,  
 E domando a vu pietà.  
 Per la patria la domando,  
 Che xe in fregole ridota,  
 Che va in coro sospirando,  
 Che ghe manca la pagnota!  
 Per la patria che regina  
 Del so mar un dì xe stada,  
 Finchè un beco da rapina  
 Senza corno l'ha lassada:  
 De quel corno che valeva  
 Assae più d'una corona,  
 Che per tuto la rendeva  
 Rispetabile matrona.  
 Che dai ani cariolà,  
 Benchè re de tuti i corni,  
 Su l'altar de libertà  
 L'ha finio da porco i zorni.  
 Gran memorie, consegier,  
 Per chi à visto sto paese,  
 Sede un tempo del piacer,  
 Rovinà dal mal francese!  
 Per chi in mente ga la storia  
 De sto povero paluo,  
 Dopo secoli de gloria  
 E venduo e revenduo:  
 Per chi à visto el rosto infame  
 De la fezza democratica  
 Suparar l'ingorda fame  
 De la fezza aristocratica:  
 Per chi pensa a la burlada,  
 Che n'ha dà la Franza indegna,  
 Co za gera decretada  
 Ai todeschi la consegna:

Nel mumento che inzucai  
 Se balava el menueto  
 Per un palo infatuai (158)  
 Che à durà manco de un peto!  
 Mi no vogio su sti mali  
 Farve qua da Geremia,  
 I xe tropo universali  
 Per cantarve un'elegia;  
 I xe fioli inseparabili  
 D'una machina disciolta,  
 I xe mali ireparabili ....  
 Vien per tuti la so volta.\*  
 Come l'omo ogni governo  
 Ga piaceri, ga d'olor,  
 Gnente al mondo gh'è d'eterno;  
 Tuto nasce, vive e mor.  
 Vogio ben che i peruconi  
 Carghi i fusse de pecai,  
 No lo nego, ma co....  
 Tropo avanti semo andai!  
 Tropo meterne a le prove,  
 Per saldar quel so librazzo,  
 Vol da l'alto el padre Giove;  
 Tropo el fa de nu strapazzo.  
 Da l'inglese prepotente.  
 Xe in caena messo el mar,  
 Da la tera no vien zente,  
 No vien roba da magnar;  
 L'orbo, el zoto e l'impiagà,  
 Come prima va cercando,  
 La bandia mendicittà (159)  
 Torua fora, e sta de bando.  
 Su l'ancuzene el martelo  
 Più dal fravo no se pesta,  
 Ogni artista varda el cielo  
 Sfregolandose la testa.  
 El paron se avezza solo  
 A servirse come el pol,  
 Ai tregheti no fa nolo.  
 E biastema el barcariol.  
 Tase el foro, el magistrato,  
 E ghe resta drento in gola  
 Senza fruto a l'avvocato  
 El bel don de la parola.  
 Ogni zorno, pien de fufa,  
 El signor bate la lana,  
 Col Governo el fa barafa  
 Per salvar la so fortuna.

No xe i bezzi che un augurio  
 O d'imposta o de preson,  
 E tra i numi el dio Mercurio (160)  
 Spiega solo protezion.  
 Consegier, la strenze assae!  
 Consegier, per dio, che tremo  
 Che a ste misere palae  
 No ghe resta apena el remo!  
 Che in mancanza de biscoto,  
 Pezo ancora dei soldai,  
 No dobiemo de sto troto  
 Magnar sorzi scortegai.  
 Oh che quadro se ne toca  
 Sto gran calice ingiotir!  
 Perdonè se el pelo d'oca  
 Mi ve fazzo' ancuo veguir.  
 Se copà da tanti mali  
 El vernacolo mio-pletro  
 Se desmentega i so salì,  
 E ve intona un novo metro.  
 Lo so ben che al limbo semo,  
 Lo so ben che vita o morte  
 Aspetar nu qua dovemo  
 Dai capricci de la sorte:  
 Che ridoti senza un bezzo  
 (Purchè abiamo un di vitoria)  
 S'è da meterghe un gran prezzo  
 Nel vocabolo de gloria,  
 Che la lota xe astinada,  
 E che arbitrio no ghe avanza  
 A chi fede ga zurada  
 Al sovrano de la Franzza.  
 Ma so ancora che natura  
 Ga po in tuto la so dose,  
 Che in sta oribile tortura  
 La pol forsi alzar la ose.  
 Parlo a un omo de talenti,  
 Parlo chiarò, e son sicuro,  
 Che no passa i mii lamenti  
 I confini de sto mare,  
 Che bandia da tuto el mondo,  
 In sta tavola, in sto logo,  
 Co un filosofo de fondo  
 Verità pol farse logo.  
 Quel bel cuor fato de pasta  
 Spalanchelo, consegier,  
 Za lo so che 'l ve contrasta  
 Coi doveri del mistier!

Siene d'argine a l'urgenza  
 Del bisogno militar,  
 Qualche drama de clemenza  
 Nel dirito feghe entrar;  
 Che za presto in ciel mauro  
 Sto nembazzo sbrocarà,  
 E un pianeta manco scuro  
 Tanti mali sfantarà.

## CANZON A VENEZIA

RIGENERADA DALLA PRESENZA DEL SO BENEFICO  
 IMPERATOR E RE

## FRANCESCO PRIMO.

Bona vechia malmenada,  
 Suga i ochi e date cuor,  
 La to sorte xe cambiada,  
 Vol cussi l'Imperator.  
 Quel eroe te lo promete,  
 Che in virtù no ga el secondo,  
 Se in lu dorme le vendete  
 Dopo aver coreto el mondo.  
 Se per veder le to piaghe,  
 E contarle una per una,  
 Da le armigere so piaghe  
 L'è venudo in sta laguna.  
 Bona vechia, suga el pianto,  
 E co tuta libertà  
 Discoverzighe quel manto  
 Da le tarme rosegà;  
 Faghe veder la rovina  
 Del to stato da quel dì,  
 Che 'l bel nome de regina  
 Xe andà in fregole con ti.  
 Luse ancora nel to aspeto  
 Un avanzo de maestà,  
 Perché senta Augusto in peto  
 Parlar dolce la pietà.  
 Del to libero paese  
 Tropo chiàra xe la storia  
 Per dar vita a le to imprese,  
 Al to fasto, a la to gloria.

Lu sa ben in che maniera,  
 Pescaora nata in mar,  
 Fama illustre de gueriera  
 Ti à podesto merità.  
 Lu sa ben che fiofi toi  
 Tanti bravi peraconi  
 Egual vanto ga d'eroi  
 Coi Fabrizi e coi Scipioni;  
 Che a l'ardir del to lion  
 Tinto el mar xe sta de rosso,  
 Che de l'arme al paragon  
 Xe cascà più de un colosso:  
 Che del vinto grego a scorno,  
 Con stupor de tuti i popoli,  
 Un to dose, onor del corno,  
 A' chiapà Costantinopoli;  
 Che la spada Vendramina,  
 E la Trona e la Marcela,  
 A' tagià co lama fina  
 Spesso ai turchi la burela,  
 Che da Franza, Olanda e Spagna,  
 Su i to legni coridori  
 Te pioveva la cucagna  
 De ricchezze e de tesori,  
 Che mauro, che profondo,  
 Senza tara, e senza vizio,  
 De i to pari in tuto el mondo  
 Riputà gera el giudizio.  
 Sul to viso, sul to busto,  
 Sta gran lista antiga assae,  
 Za comosso leze Augusto,  
 Citadin de ste palae.  
 Leze Augusto, e solevando  
 Da la tera i to zenochi,  
 Za ghe vien de contrabando  
 Qualche lagrema su i ochi.  
 Bona vechia, spera ben,  
 Che la brutta leverà  
 Xe passada, e un bel seren  
 Spande Augusto su la tera.  
 Che distanza da quei tempi  
 De vergogna e de imbraghezzo,  
 Co de gloria novi esempi  
 Davà in arme el ladronezzo!  
 Co l'andar a le scarese  
 Gera massima invecchiada,  
 Co dei suditi la pele  
 Se ingagiava anticipada!

Co risorsa de finanza  
 Gesa ai publici ridotti  
 Pelar vivi co creanza  
 Tanti poveri merloti !  
 Co un eterno cogionelo  
 De sto mondo se faceva,  
 Sublimando squasi al cielo  
 Chi per fasto l'oprimeva !  
 Ma d' Augusto el cuor sincero  
 No ga impianti, e a quel soriso  
 Scampa el secolo de fero  
 Per dar logo al paradiso ;  
 Co l'olivo de la pase  
 Ga respiro tanti mali,  
 De la guera el nembro tase,  
 Cala in bota le prediali,  
 Spiega Cerere i so doni  
 Risparmiando el sangue uman,  
 Torna comodi i paroni,  
 Torna in vita l'artesan.  
 Col registro no va in aria  
 Per do terzi de rason,  
 Se anca el giudice contraria  
 No pronunzia l'opinion.  
 Come prima palpitante  
 Sul destin dei bastimenti  
 No xe adesso el negoziante  
 Che li manda in braccio ai venti ;  
 E l'inglese nostro amico,  
 No sta più col schiopo al muso  
 Per slongarghe da nemigo  
 In Quarner le sgrinfe suso.  
 Che bei zorni se parechia  
 Dei to mali per conforto !  
 Date pase, bona vechia,  
 Vol condurte Augusto in porto.  
 Per ti voti no sparagna,  
 Italiana come lu,  
 Del so leto la compagna,  
 Vero specchio de virtù  
 Che de un'anima celeste  
 Spiega in viso la bontà,  
 E che in mezzo a le to feste  
 Roba i euori per metà.  
 Copia santa, don de Giove !  
 Lu del cuor de Tito erede,  
 Ela in regie forme nove  
 Gentilezza e pura fede !

## EPISTOLA

DALLA CAMPAGNA

AL SIGNOR

GIUSEPPE ANCILLO.

Felice l'omo (à dito Orazio un zorno)  
 Che stimando la quiete un gran tesoro  
 De la cità no ghe ne importa un corno !  
 E su l'esempio de l'età de l'oro  
 De arar lu stesso in vila un podereto  
 Nol crede sconveniente al so decoro !  
 Va tuto ben ; ma quel levar dal leto  
 Prima che sponta el dì, quel andar drio  
 Come un vero paesan al so careto ;  
 Quel tosarghe a le piegore el d' drio,  
 Quel secarse a tegnirghe l'occhio suso  
 Co stufe de magnar le core al rio ;  
 Quel brustolarse al sol de luglio el muso,  
 L'è un certo godi ( cossa distu Ancilo ? )  
 Che andar no pol tra chi ga bezzi in uso.  
 Da qualche dì me trovo qua tranquilo,  
 E me piase soletto de goder  
 El zorno el russignol, la note el gilo ;  
 Ma, se dovessè un de quei gusti aver,  
 Che describe el poeta de Verosa,  
 M'entraria la campagna nel messer.  
 Pur tropo in una vale lagremosa  
 Condusemo la vita, e in mezzo ai guai  
 Rara ne sponta del piacer la rosa.  
 Pur tropo, conseguenza dei pecai,  
 El fior de zoventù presto va via  
 E semo da schinele rovinai !  
 Che ara pur el so campo qualche arpia,  
 Mi, nato Sibarita, in altro modo  
 Me piase coltivar filosofia.  
 Sior sì : son solo, e vado proprio in brodo ;  
 Son solo, e no go un'ora che me pesa ;  
 Son solo, e magno e bevo e me la godo.  
 Go la casa de bando, e poca spesa  
 Me basta per cavarme l'apetito  
 Nè de vestirme ben go qua pretesa.

« Dove xelo sto mato de romito ? »  
 ( M'interompe a sto passo el mio spizier,  
 Che de curiosità sente el prurito )  
 Lo vustu pròprio, Ancilo mio, saver ?  
 Ma no dirlo a niissun, gnanca al furlan, (161)  
 Che in sto mistero d'è messo el mio piacef.  
 Nela celebrè villa de Perlàn,  
 Che no pol un geografo ignorar,  
 Son in mezzo a la Gazera è Zegian.  
 E se go voglia mat de caminar,  
 Chirignago, Spinea, Mestre e Noal,  
 Posso co poca strada visitar.  
 Governante fedel, mia comensal,  
 Go una puta, che lava, e me tien neto :  
 Nè gh'è, te lo protesto, ombra de mal.  
 Un palazzo incantà me dà riceto ;  
 Digo incantà, perchè senz'esser mio  
 Ziro da l'alto al basso, e go un bon leto.  
 Co se levà le celeghe dal nio  
 De sentirle a cantar nò me ne importa,  
 Ma stago nel mio cuzzò impoltronio,  
 Finchè la puta un bon caffè me porta,  
 Che vero dè levante, e fatto ben,  
 Me svegia sul mumento e me conforta.  
 Domandò se xe nuvolo o seren,  
 Nè de levarme su no trovo el quia  
 Se a fedosso le nove nò me vien.  
 Chiamò allora la puta, è digo : « Fia,  
 Me sento pien de quor, qua le zavate,  
 Parechime el frontin, chiù la tachia. »  
 Dago l'ultima occhiada a le beate  
 Coltre, che per nov' ore m'à coverto,  
 E porto fora a stento le culate.  
 Ma prima de andar zoà a cielo averto,  
 Spalanco de la camera un balcon,  
 E de l'aria che fa cussì me acerto.  
 Nè xe vana, alafè, sta precauzion,  
 Che dopo che son qua no passa zorno,  
 Che no se meta el tempo in convulsion.  
 Calo in zardin de bei fioreti adorno,  
 Ghe meto el naso su, li togo in man,  
 E ziro per salute un'ora intorno.  
 Parlo col contadin, zogo col can,  
 Che me mena la coa, che me fa festa,  
 Per bruscà qualche fregola de pan.  
 Ma dove dal piacer perdo la testa  
 Xe co vardo l'insegnò sorprendente  
 Che de l'ave el governo manifesta.

Racc. Poes. Ven.

E digo fra de mi secretamente :  
 « Nol ga un'ora de ben sto bravo inseto,  
 E mi, che un omo son, no voi fargente ? »  
 Ghe xe in banda del bozzolo un spechieto,  
 E cento volte al dì, come un putelo,  
 Torno sul buso e tiro de ochiaieto.  
 Ma el sol xe squasi a la metà del cielo,  
 E sentindo che i vovì me se scota  
 Meto a casa al coverto el mio cervelo ;  
 Tiro fora el violin, e su la nota  
 Sono per esercizio quotidian  
 De Coreli una giga o una gavota ;  
 E in prova che no go d'Orfeo la man  
 Sti tronchi dal sa logo no fa moto,  
 Ma scampa i contadini un mio lontan.  
 Lezò dopo un' oretta, e don Chissiotò,  
 Gil-Blas, o Robinson de Crosuè,  
 Me svegia l'estro, e lo fa andar de troto.  
 Passo da la carega al canapè,  
 E co tarda la rima al mio comando  
 El naso me impenisso de rapè.  
 Orazio, povareto, sta de bando, (162)  
 Che libero son nato, e go diritto  
 D'averlo proprio in cul de quando in quando.  
 Intanto fra ste buzzare nel sito  
 Destinà per disnar la puta zira,  
 Come gata che sente l'apetito,  
 E la voria torme de man la lira,  
 Co ghe digo istizzà : « Lassime, aspetta,  
 Che bisogna ubidir co l'estro tira. »  
 Ma scordandome po d'esser poeta  
 Me parechio al cimento, e magnò riso,  
 Vedelo, colombin, carne perfeta.  
 Gh'è sparesi, gh'è fragole, gh'è biò,  
 Bon via, bon pan, latuga, radichieto ;  
 In soma l'è sto logo un paradiso !  
 Fazzo dopo disnar el mio soneto,  
 E a le cinque svegià me javo el muso,  
 E de mezza conquista in ton me meto.  
 Benchè de parar via no gafa l'uso,  
 De un cavalo aprofito e de una sedia,  
 E co un omo da drio ghe monto suso.  
 La xe, te l'assicuro, una comedia ;  
 Mi lo tiro a levante, e lu a ponente ....  
 Basta che no la termina in tragedia !  
 In sti contorni un tempo alegramente  
 O' passà d'innocenza i più bei ani  
 Co gera Chirignago pien de zente.

Che tempesta a Spinea de cortesani!  
 Che flusso de carozze e de cavali!  
 Adesso no se vede che vilani.  
 Mi peraltro no bado a tanti mali,  
 E troto per sti loghi abandonai  
 Senza parlar de imposte e de prediali;  
 Che pur tropo a far tera da bocai  
 Dovemo tuti andar co xe el mumento,  
 E ga l'istesso fin richi e spiantai.  
 Ma la note vien zo dal firmamento,  
 El grilo fa cri cri, la rana canta,  
 E de tornar in drio voglia me sento.  
 Per sigilar sta vita più che santa  
 A le dièse do mocollise impizza,  
 E de tressete una partia se impianta.  
 Gh'è la puta, el gastaldo e la novizza,  
 Orbi tuti che fa le bastonae,  
 Se zoga de do soldi, e se se istizza.  
 Cussi vive lontan da ste palae,  
 Quel gran persecutor de Bortoleto,  
 Che farà le so solite bulae  
 Credendose un bray'omo a mio dispeto.

## LA BARCHETA

## CANZONETA PER MUSICA.

La note xe bela,  
 Fa presto, Nineta,  
 Andemo in barcheta  
 I freschi a chiapar.  
 Che gusto contarsela  
 Soleti in laguna,  
 E al chiaro de luna  
 Sentirse a vogar!  
 A Toni go dito,  
 Che 'l felze el ne cava  
 Per goder sta bava,  
 Che supia dal mar.  
 Ti pol de la ventola  
 Far senza, mia cara,  
 Che i zefiri a gara  
 Te vol sventolar!  
 Se gh'è tra de lori  
 Chi tropo indiscreto

Volesse dal peto  
 El velo strapar,  
 O chi sul zenocchio,  
 Le alete formando,  
 Magior contrabando  
 Volesse tentar,  
 No bada a ste frotole,  
 Soleti nu semo,  
 E Toni el so remo  
 L'è atento a menar.  
 Nol varda, nol sente,  
 L'è un omo de stuco,  
 Da gonzo, da euco,  
 A tempo el sa far.

## CANZONETA

## PER LA NINA VIGANO

MANDANDOGHE A BOLOGNA QUELA PER  
 MUSICA SU LA BARCHETA.

Sta mia canzoneta,  
 Che in copia ve mando,  
 L'ò fata, Nineta,  
 L'ò fata per vu.  
 Vu sè quella Nina,  
 Che pol col so inzegno  
 De un omo de legno  
 Svegiar la virtù.  
 Meteghe pur drento  
 Quei bei cocolezzi,  
 Quei cari strambezzì,  
 Che amor v'ha insegnà.  
 Piatanze da cogo  
 Ghe vol, cara Nina,  
 Per chi ga in rovina  
 Ridoto el palà!  
 Da brava imparela,  
 E presto in laguna  
 Al chiaro de luna  
 Vegnila a cantar.  
 Dal di che l'ò fata  
 Nè Cate, nè Beta,



Xe stade in barcheta  
 I freschi a chiapar.  
 El nome de Nina  
 Ga fin la mia gondola,  
 Nissuna me dondola  
 Se vu no tornè.  
 E Toni, quel gonzo,  
 Che sa la mia pena,  
 El remo no mena  
 Se Nina no gh'è.

## EL MAGIO

CANZONETA PER MUSICA.

Caro sto magio !  
 Senti Nineta  
 Che bavesela !  
 Varda che erbeta !  
 Varda, putela,  
 Che bei colori  
 Sporze sti fiori !  
 No par che i diga,  
 Sentite qua ?  
 Donca sentemose,  
 E qua soleti,  
 Come do fioli,  
 Tutti i secreti  
 Dei russignoli  
 Ziti ascoltemo,  
 Che impararemo  
 Cosse che el mondo  
 Certo no sa !  
 Nina, indovina  
 Quel che i ne dise ?  
 Che l'amor vero  
 Col fa raise  
 In cuor sincero  
 No l'è beato  
 Co solo afato  
 Nol se riduse  
 Con chi el vol lu.  
 Donca, adio mondo,  
 Bela Nineta,  
 Tra sti pastori

Femo caseta,  
 Sunemo i fiori,  
 Stemo qua soli  
 Coi russignoli,  
 Che i la sa longa  
 Megio de nu.

## CANZONETA

PER MUSICA.

Ti lo vedi, Cate mia,  
 Se son degno de pietà !  
 Tiro i ochi, e paro proprio  
 Da le strighe supegà ;  
 I zenochi me fa giacomò,  
 So ridoto un bacalà !  
 M'astu tolto per quel Ercole,  
 Che gaveva tanto fià ?  
 Te ricordistù, Catina,  
 Quando a ti me son tacà ?  
 « Aborrisso, ti m'à dito,  
 Quel che xe bestialità ;  
 Mi son tuta sentimento,  
 Vogio un cuor per mi formà,  
 Lo voi puro come un specchio,  
 Da l'amor diviuizà :  
 Vogio prove, no voi chiacole,  
 Ma le voi de fedeltà ;  
 Gnanca un baso a tradimento  
 Nissun omo m'à scrocà ;  
 Sarò toa, te lo prometo,  
 Ma te vogio ben provà .... »  
 Cate mia, t'intendo adesso  
 De che prove ti à parlà.

## CANZONETA

PER MUSICA.

Che no parla? mi no parlo;  
 Co le done son discreto,  
 El mio forte xe el secreto,  
 Nina mia, no dubitar.  
 Ma l'amor, co l'è de quelo,  
 E co l'anima l'à ponto,  
 Assicurate che sconto,  
 Cara Nina, nol pol star.  
 Basta un moto per tràdine,  
 Una languida ochiadina,  
 Una mezza tocadina,  
 Che te daga de scampon.  
 Posso ben per qualche volta  
 Far el bravo, e disafento,  
 Ma po capita el mumento,  
 Che me squagio da minchion.  
 Per esempio, co te vedo  
 Qualchedun tropo vicin,  
 Mi me sento un bruseghin,  
 Che me inquieta e me fa mal;  
 E xe allora che me missio,  
 Cambio ciera, levo suso,  
 E te fazzo brutto muso  
 Per paura de un rival.  
 Che no parla? mi no parlo,  
 Saria proprio un omo indegno,  
 Ma che tasa, no me impegno,  
 O le man, o i ochi, o el cuor.  
 Tropo, cara, ti me piasì,  
 Tropo inquieto son per ti  
 Per esiger che ogni dì  
 Staga sconto el nostro amor.

## CANZONETA

PER MUSICA.

Mi lo go per un zogatolo,  
 Nina mia, sto sentimento,  
 Discoremola un mumento ....  
 El sentir no xelo amar?  
 Se l'è amar, l'è proprio un vovo  
 El bandir sto bel vocabolo  
 Per valersene d'un novo,  
 Che dà tanto da pensar.  
 Co ti à dito: « el sentimento  
 Me sublima dal creà,  
 E un amor divinizà  
 Me conduse, Toni, a ti! »  
 Sto linguaggio me confonde,  
 El me ga del malinconico;  
 Più sugoso, più laconico,  
 Nina cara, lo voi mi.  
 Di più schieto: « Toni mio,  
 Per ti spaseмо d'amor,  
 Per ti sento che 'l me bulega,  
 Che 'l me palpita sto cuor;  
 Se no presto me despero,  
 Che sto rosto metafisico  
 Per chi tende un poco al fisico  
 Nol ga gnente de saor.

## CANZONETA

## A LA COPIA CORALLY

CHE BALAVA NEL TEATRO DE LA FENICE.

Copia bela, che ti stuzzeghi  
 Tanti inzegni del Parnaso,  
 De sti versi al son vernacolo  
 Storzerastu forsi el naso?  
 Inalzarme al grado lirico  
 Perchè mai vorogio ancuo?  
 Perchè mai levarme el merito  
 De poeta de paluo?  
 Se sol dir che fazzo fritole  
 Chi xe nato fritoler,

Guai per chi se mete in gringola  
 De cambiar el so mistier !  
 Tropo noti, tropo celebri  
 Xe quei cigni che à cantà  
 De quei do gargati armonici  
 La rival melifuità. (163)  
 Provocai da un dolce stimolo  
 Sublimar i so pensieri  
 In sto incontro, che miracolo !  
 S'è fin visto i boteghieri.  
 S'è fin visto i primogeniti,  
 Zovenoti senza pelo,  
 Anunziarse co sto titolo  
 Per poeti da cartelo.  
 Contrastar co sti bei spiriti  
 Mi no voggio la corona,  
 Son oselo de sti grebani,  
 Fazzo versi a la carlona.  
 No me tace a nomi rancidi  
 Per lodar sta balarina,  
 Me desmentego Tersicore,  
 La batizzo per divina.  
 Me desmentego de zefiro  
 Co lo veggio lodar lu :  
 Digo el bala come un anzolo,  
 E me par de dir de più.  
 Trovo in ela un certo morbido,  
 Che xe novo su ste scene,  
 E capisso co la esamino  
 La rason de ste gran piene,  
 Bela, cara, inativabile,  
 Co in elmeto la vedè,  
 Co la mostra a tuto el publico  
 In camisa el so bombè.  
 Se slongar podesse l'indice  
 Pagaria mezzo milion ....  
 Ve l'ò dito, no son lirico,  
 Perdoneme sta espression.  
 Ogni sera mando al diavolo  
 Quele brute damigele,  
 Che ga pressa de coverzerghe  
 Forme a l'ochio cussi bele;  
 Quante grazie co magnifica  
 La fa pompa de beltà,  
 Superand la so imagine,  
 Che la imita e perde el fia. (164)  
 Ma co in mezzo al palco scenico  
 La vien fora co quel scial,

Tiro i occhi, vado in estasi,  
 Stago là come un cocal.  
 Quela gara vicendevole  
 Me colpisce, me inamora,  
 De sta vita lo considero  
 El più caro quarto d'ora.  
 Se mi fusse primogenito  
 Voria farghe un bel soneto,  
 Ma de casa nato l'ultimo  
 A sto azzardo no me meto.

A I

## CONIUGI GIOVIO

NEL ATO DE PARTIR PER MILAN

## CANZON.

*Pindarum quisque studet emulari.*

ORAZ.

Dito à un zorno Orazio Flaco :  
 « No pol esser che un macaco  
 Chi vol Pindaro emular :  
 Del dedaleo zovenoto  
 El destin a tuti noto  
 L'è sicuro de incontrar. »  
 Ma del morto con permesso,  
 No go cuor de dir l'istesso,  
 Mio Casteli, in fazza a ti, (165)  
 Dopo l'ode spiritosa,  
 Che al poeta de Venosa  
 Gavaria costà dei di.  
 Xe Casteli un mongibelo  
 Col se sente nel cervelo  
 I so vovi sbazzegar :  
 Co l'è in moto, co l'è in balo,  
 Per lu poco xe un cavallo ;  
 Co do pegasi el va su.  
 I puledri buta bava,  
 Ma de ambrosia co la fava  
 Sempre alegri el li mantien,  
 Nè pericolo gh'è mai,  
 Che corendo desparai  
 I ghe toga e man e fren.

A l' adriaco Automedonte  
 Deve ognun sbassar la fronte,  
 Che un più bravo no se dà.  
 Sul to Ino, o Teresina,  
 Anca i posterì divina  
 E imortal te adorarà,  
 Ma se al merito sublime  
 Aspirar no pol le rime  
 D'un poeta dozzinal,  
 Devio mo cazzarme in rio  
 Senza darghe un qualche adio  
 A la copia coniugal?  
 Za per Giovio, onor de Pindo,  
 El fantastico Labindo (166)  
 Novi serti ga in cantier.  
 Vetoreto, pien de fiori, (167)  
 Co patetici colori  
 Darà prove de mistier.  
 Dai so longhi e cari afani  
 L'avocato Mantovani  
 Vedaremo respirar ;  
 Anca el nostro farmacopola (168)  
 Al mistier darà una scopola  
 Per Teresa celebrar,  
 Chi à descrito el ponte roto (169)  
 Spogiarà quel so coroto  
 Per le rose de l'amor ;  
 E l'eroe, che vien dal fredo, (170)  
 Ai trionfi de Gofredo  
 Unirà quei de cantor ;  
 Le minacie d'un mal cronico  
 Col favor de qualche tonico  
 Streffi intanto sfantarà ;  
 E su quel che sarà in moda  
 La vernacola mia broda  
 Noye buzzare dirà.

PER

## LA RICUPERATA SALUTE

DE LA N. D.

## MARINA BENZON.

Fra tanti mazzeti  
 Che ancuo da ogni banda  
 Famosi poeti  
 A gara te manda,  
 No far che 'l to naso,  
 Marina, se scanza  
 Se 'l mio del Parnaso  
 No ga la fragranza.  
 Apolo lunatico  
 Più volte m'à dito :  
 « A un bogia mal pratico  
 No averzo sto sito ;  
 El mio zardinetto  
 No xe per colori,  
 Che in basso dialeto  
 Me tossegga i fiori. »  
 Ma in barba del mato,  
 Che mola ste slàpe,  
 Dei fiori mi cato  
 Fra i granzi e le cape,  
 E tanto l'azzardo  
 Curioso me par,  
 Che 'l mazzo bastardo  
 Go cuor de donar.  
 Via donca de no  
 No dirme, se ancuo.  
 Te fazzo un cadò,  
 Che sa da paluo :  
 No cerco de un vaso,  
 Marina, l'onor ;  
 Più assae che al to naso  
 Voi zonzerte al cuor.  
 Voi dirte che 'l mio,  
 No so quanti di,  
 Xe sta ingritolio,  
 Mia cara, per ti ;

Che un boto el me dava  
De tenero afeto,  
Se mai me incontrava  
Col to Vetoreto ;  
Che salti qua drento  
Adesso el me fa,  
Che vedo contento  
El nembo sfantà.

## PER LA RICUPERATA SALUTE

DEL SIGNOR

SALVADOR MARCONI

*Canzon.*

Dal gran gusto mezzo mato,  
Del nov'ano el quarto di  
Un bel toco de avvocato (171)  
Corso in pressa xe da mi,  
Esclamando : caro amico,  
Vegno a dartè un sogeton,  
Che se mai ti chiami intrigo  
Mi te pèdo l'opinion.  
De lodar qua no se trata  
Una munega professa,  
Un dottor de fresca data,  
Un pretin che canta messa.  
No voi prove del to inzegno  
Per do sposi che va in leto ;  
Per un paroco no vegno  
A pregartè de un soneto.  
Nobilissimo argomento  
Go per man da farte onor.  
Via sti libri ; sul mumento  
Ubidissi, e parla al cuor.  
— La se quieta, gh'ò risposto,  
El mio caro Ciceron,  
Sto preambolo xe un rosto,  
L'è un impianto bello e bon.  
Dopo aver per compiacenza  
Varie volte fiascheggià,  
Ghe lo digo in confidenza,  
Mi no fazzo più mezzà ;

Vogio dir, no aceto più  
Comission da chi che sia,  
Che ogni idea de schiavitù  
Xe fatal per la poesia.  
— Ubidissi, e tiente in bon,  
L'avvocato à replicà,  
Che più bela comission  
No s'à dà, nè se darà.  
Una perla, un omo raro,  
Un legal de prima sfera,  
Generoso, a tuti caro,  
Xe andà quasi soto tera.  
De tre fiole, povarete,  
Che pareva tre Marie,  
Viste go le lagremete,  
E go zonto anca le mie ;  
Ma el dottor che xe a la cura,  
Omo in arte consumà,  
In sto ponto me assicura  
Che Marconi vivarà.  
— Sì, ch'el viva, gh'ò risposto,  
Da sto nome sbalordio  
No l'è rosto, no l'è rosto,  
Supia Apolo a modo mio.  
E là in bota, licenziando  
Co un baso l'avvocato,  
So andà un pezzo ruminando  
Tra de mi cossa avria fato.  
Un soneto? no, che tremo  
De restar co tanti a mazzo,  
Nè vogarghe voi sul-remo  
Al poeta de palazzo.  
Tropo curto xe el soneto  
Per dir su quel che se coa,  
Nè gh'è in lirico el licheto  
De slongarghe un fià de coa,  
Donca un'ode, ma de quele,  
Che sbusando e muri e copi  
Tra i pianeti e tra le stele  
Vada suso senza intopi,  
O piuttosto una gran selva  
Da zirar dei zorni drento,  
Se no sponta qualche belva,  
Che me magna a tradimento.  
Me farò vegnir davanti  
Quela vechia ischeletria,  
Che ne lassa qua i furfanti,  
E i bonomeni scoa via.

Ghe dirò : « Bruta carogna,  
 Meti a monte le bulae,  
 De morir nol se la sogna,  
 L'amalà sta megio assae. »  
 Più veloce de un oselo,  
 A pietà mossa de lu,  
 Vedarè piombar dal cielo -  
 Tra le parche la Virtù ;  
 E tratandole da aloche  
 ( Quadro degno de un Tizian ! )  
 El so fuso e le so roche  
 Torghe a forza da le man.  
 Ma se mai cascasse a basso  
 Sul più belo del mio volo ?  
 Ghe saria chi faria chiasso  
 De vederme roto el colo.  
 Contrastà da sta paura,  
 No stè a torlo per strapazzo,  
 Omo egregio, se a natura  
 El poeta se dà in braccio ;  
 Se de Pindo l'oro fin,  
 Vanto raro al di de ancuo,  
 Ve lo buto per morbin  
 In monea de sto paluo ;  
 Che za in fondo la se spende  
 Co l' intrinseco xe bon,  
 E xe tuto, per chi intende,  
 Un afar de convenzion.  
 Sanità, che ingiusto scialo  
 Ti fa sempre dei to doni,  
 Regalando ai bravi el zalo,  
 E le rose ai lasagnoni:  
 Manco zizza a dei fachini,  
 Che no ga che un bon gargato,  
 Più salute a inzegni fini  
 Come a l'omo a nu rinato,  
 Cala in bota! che acorada  
 In sti zorni de marea  
 Gigar mata per la strada  
 S'a sentio madama Astrea,  
 « Per sigilo dei mli guai  
 Donca xe deciso in cielo,  
 Che a far.tera da bocai  
 Vada presto el mio modelo ?  
 Donca Marte vol quel omo,  
 Che nel so mistier profondo  
 Sa del codice el gran tomo  
 Misurar da capo a fondo ?

Che no xe per fame d'oro  
 De l'ingiusto difensor,  
 Che a interesse, dio del foro,  
 Tien stropà sempre el so cuor ?  
 Che del dopio cressaria  
 El so stato se pagada  
 Fusse un di la litania,  
 Che 'l ga in filza registrada ? ( 172 )  
 Che fadiga no sparagna,  
 A ogni spasso indifferente,  
 Che per l' opera no magna  
 El consulto al so cliente ?  
 Che de caldo amor paterno  
 Xe in famegia un tesoreto,  
 Sempre alegro con quel terno  
 Caro fruto del so leto ?  
 Che principii de suismo  
 No conosce, e crede indegno  
 De vestir de pedantismo  
 El so doto e franco inzegno ?  
 Che discreto in pien col mondo  
 Rigoroso xe con lu,  
 Qualità che prova el fondo  
 De l' imensa so virtù ?  
 Che ... » ma basta co sta lista,  
 Che se fazzo qua un poema  
 Podaria el Protagonista  
 Dir : de lezer no go flemma.

P E R

## LE NOZZE VALMARANA

## DIALOGO

*Tra Bortoleto e 'l Poeta.*

P. A sta ora ? che bon vento !  
 Comodeve Bortoleto,  
 Seu cascà forsi dal'eto ?  
 Sona terza in sto mumento ;  
 Cossa mai voleu da mi ?  
 B. Bezzi no; meteye in pase,  
 Se sa ben che la poesia  
 Ga coi bezzi antipatia :

Vegno in cerca d'altre base,  
 Ma voi prima. *P.* Cossa? *B.* un sì.  
*P.* Digo ben che l'è un bel pato,  
 Ah i ve sbazzega a sto dio!  
 El mio sì lo tegno indrio.  
*B.* Ma lo vogio. *P.* vu se mato.  
*B.* Donca cossa? *P.* donca no.  
*B.* Oh che luna! che zornada!  
*P.* Mo sicuro, son poeta.  
*B.* Qua ve vogio. *P.* oh dio che feta!  
*B.* Sè poeta, e de portada.  
*P.* Donca cossa? *B.* versi. *P.* oibò.  
*B.* A un amigo, a Bortoleto?  
*P.* No, ve digo, e lo mantegno.  
*B.* Ma se trata .... *P.* vado a segno;  
 De do sposi. *B.* benedeto!  
 Bravo fin da indovinar!  
*P.* Grazie tanto! *B.* donca sì.  
*P.* Donca no, che sti argomenti  
 I me liga proprio i denti,  
 E no i ga nè ti nè mi,  
 Nè me vogio imbalegar.  
 Figurarse! amor, la benda,  
 Imeneo, che i cuorì strenze,  
 Fiacoleta, rose. *B.* schienze!  
 Ghe vol tuta sta legenda?  
*P.* Oh finila! via de qua.  
*B.* Co sto tiro? a mi bulae?  
 Vardè ben che ve strapazzo;  
 No i xe minga sposi a sguazzo;  
 Le xe in fondo do casae,  
 E de vechia nobiltà.  
*P.* Do casae? *B.* Ma de che peta!  
 Visentina e veneziana,  
 Tute do finisce in ana:  
 Vastu ak-dao? *P.* me par; aspeta ...  
 Valmarana. *B.* Che omenon!  
*P.* Manco scherzi, sior amigo.  
*B.* Mi no scherzo, ma go gusto  
 De sentirte a colpìr giusto:  
 Le xe nozze, te lo digo,  
 Da no star da drio al machion.  
*P.* Te l'acordo, i xe pianeti  
 Da sgionfar la musa. *B.* e come!  
*P.* De la sposa sasta el nome?  
*B.* No lo so, ma za i poeti  
 Le batizza a so piacer.  
*P.* E de lu? *B.* manco che manco.

*Racc. Poes. Ven.*

*P.* Donca intanto, primo ponto,  
 Tegnaremo el nome sconto.  
 De la Sposa dime almanco  
 Se gh'è cosse da saver?  
*B.* La xe dègna de la pianta,  
 La xe amabile, sincera,  
 La xe un fior de primavera,  
 La xe un pezzo da sessanta  
 Con un cuor de marzapan.  
*P.* Ghe xe ancora? *B.* zentildona,  
 Fumi in testa no la ga,  
 La xe un anzolo incarnà,  
 Brava in casa, e la ve sona  
 Co grazietta el fortepian.  
*P.* Go capio. Fin qua la vida;  
 Vien a l'olmo. *B.* l'è un gran sposo,  
 Pien de fogo, spiritoso,  
 L'è de quei che proprio sfida  
 A duelo el biondo amor.  
 Figurin, de corpo suto,  
 Butà là, d'umor laconico,  
 Anca lu' xe filarmomico,  
 Bravo in balo, in soma un putò  
 Da scaldar de fondo un cuor.  
*P.* E de l'alboro? *B.* oh minchioni!  
 Qua po sì che gh'è paneto.  
*P.* Dì pur suso, Bortoleto!  
*B.* Basta dir che i so vechioni  
 Ga co Mario parentò.  
*P.* Quel de Roma? *B.* proprio lu;  
 E la cossa xe provada,  
 Che ne l'arma de casada  
 Sete scachi ghe xe su;  
*P.* Oh no digo più de no.  
*B.* Sete scachi, per memoria,  
 (Vienli gnanca da gran zente!)  
 Che quel celebre parente  
 Sete volte (e la xe storia)  
 L'è sta console a i so dì.  
 E gh'è un feudo memorando, ...  
*P.* Basta, basta, che ò capio.  
 Mario .... scachi .... va con Dio;  
 Sarà fato. *B.* ma per quando?  
*P.* Vien doman. *B.* oh che bel sì!

## BRINDISI

## PER NOZZE.

A l' ora dei prindesi  
Do versì ghe volk  
Me sento za in gringola,  
Me tegna chi pol;  
Son tuto in furor  
Per causa de amor.

Amor che xe l' anima  
De tuto el creh,  
Amor che i filosofi  
Ga sempre burlà,  
De Baco amigon,  
E gran compagnon.

Intorno sta camara  
Vardè come el zira!  
Vardèlo sto piccolo,  
Che ancora el ghe tira  
Do dardi amorosi

In cuor de sti sposi!  
Ma i xe de quei lucidi  
Che 'l scieghe costù,  
Che in nodo strettissimo  
El liga virtù.  
I val un tesoro,  
I xe tuti d'oro.

Le smorfie, le smanie  
Da questi no vien;  
No i sparge per l' anima  
Col gusto el velen;  
No i tol l' appetito  
Co i move el prurito.

Un senso piacevole  
In peto i ve desta,  
Che senza pericolo  
Ve impizza la testa;  
El cuor no se stanca,  
La fiamma no manca.

E in tanto dal tepido  
Vien fora i bambini ....  
Vardè che bei cocoli!  
Che bei fantolini!

Che brio! che graziete!  
I xe più de sete,  
Nè mi no v' esagero  
Per farve la corte,  
Che ai vati fatidici  
Se averze le porte  
Del tardo lontan  
Co i ga el goto in man.  
Ridemo, chiassemo,  
Amici, in sto dì;  
D' accordo bevemo,  
Ma el primo sia mi,  
De Baco divoto,  
A darve del moto.

## BRINDISI

## RECITA' A LA TOLA

DEL

## MAGIOR CORNOLDI

NEL SO LOGO DE DELIZIE A LA ZUECA

*Per onorare la signora Erminia Fenzi celebre  
cantante buffa; essendovi commensali due altre  
donnette assai graziose.*

Rovinà da certa zente,  
Che se chiama del bon ton;  
De poeta maldicente  
Go in-paese l' opinion.  
Squasi che me sia proibio  
Da le muse de cantar,  
Se no posso a modo mio  
Qualche pełe saortegar!  
Lo confesso che 'l viziato  
Proprio in sangue me xe andà;  
Che ghe trovo un gran licheto  
De dir mal co libertà.  
Ma in sto lògo, in sto mumento,  
Novo-stil me ispira Apolo,  
E da lu proprio me sento  
Baratar la cetra al' colo.



Magior caro, che magia!  
 Che eleganza in sto palazzo!  
 Che graziosa compagna!  
 Che bel ordipe! che sgu azzo  
 La iscrizion che gh'è de fora (173)  
 Col de drento se combina.  
 De tre done che inamora  
 Oh che scielta pelegrina!  
 L'unir qua co tanto gusto  
 De tre rose un bel mazzeto  
 Prova ben che tato giusto  
 Gavè ancora, el mio vecchieto.  
 Le ga tute nel so genere  
 Tanta grazia, tanto brio,  
 Che de darghe el pomo a Venere  
 Intrigà saria per dio.  
 Nè mi solo, ma indeciso  
 Fin quel bravo cortesan,  
 Che per una s'è deciso,  
 Restaria col pomo in man..  
 Bela Erminia! no xe novo  
 Su ste scene el vostro incanto,  
 Piene ancora come un vovo  
 Le s'è visto al vostro canto.  
 Ma de l'arte zonta adesso  
 Vu sè a l'ultimo confin,  
 Cara a l'uno e a l'altro sesso,  
 E più cara al mascolin.  
 Nè xe l'organo che solo  
 Sia paron de l'armonia,  
 Spiega l'anima el so volo  
 Co mirabile maestria.  
 La natura e l'arte unita  
 Coleganza in vu le à fato,  
 Ne dè proprio nova vita;  
 Benedeto quel gargato!  
 Quanta grazia co parlè  
 Col todesco vostro amante (174)  
 E rabiosa ghe disè:  
 « Te conosco sì birbante. »  
 De Pandolfo che paura!  
 Che modestia! che passion!  
 Del gran libro de natura  
 Che profonda cognizion!  
 No gavemo più bisogno  
 De viagià fin a Parigi,  
 Xe ridoti adesso un sogno  
 I so comici prodigi.

Esclusivo al cielo galico  
 No xe più del soeo el vanto,  
 Ma esclusiva al cielo italico  
 Sarà ben l'arte del canto.  
 A sguarolar pezo de i gati  
 Xe i francesi condanai;  
 Per cantar nu semo nati,  
 Anca in tochi e rovinai.  
 Doppio aloro preparemo  
 A sta brava filarmonica,  
 El so nome celebremo  
 Noto più de la betonica;  
 E più lirico de mi  
 El poeta pagador (175)  
 Fazza plauso in sto bel di  
 Al bon gusto del Magior.

## BRINDISI

A L A T O L A

DEL

N. U. TOMASO SORANZO.

Sarà vero, lo vol tuti,  
 Ma ingiotirla mi no posso:  
 Chi pol mai lodar un osso  
 Che no ga nè ti, nè mi?  
 Quela bela età de l'oro  
 Dai poeti decantada  
 Tuti vol che la sia stada,  
 Ma nissun sa dir per chi.  
 I vien fora con Astrea,  
 I vien fora co Saturno,  
 E sto rosto va po in turno  
 Dai antichi fin a nu.  
 I se cocola sta idea,  
 I ne indora la fiabeta,  
 Senza un fià de camiseta  
 I depenze la virtù.  
 I ne dise che un gran gusto  
 Gera alora el star sentai  
 Tuto el zorno sora i prai,  
 A far cossa? no se sa.

No sentir passion de sorte,  
 No aver lune per i bezzi,  
 No conoscer smorosezzi,  
 Mode, onori, vanità;  
 No aver abiti da festa,  
 E robarghe a la natura,  
 Tut' al più in età maura,  
 Una fogia de figher;  
 No slongarghe mai per chiasso  
 Gnanca el colo a una galina,  
 E magnar sera e matina  
 Erbe crue senza fogher.  
 Mi per mi, go gusto assae,  
 Che Saturno rimbambio  
 Sia andà a spasso, e che so fio  
 Gabia tolto un di la man;  
 Altrimenti, se durava  
 Quel vechiazzo sul so, trono,  
 Se perdeva nel gran sono  
 De virtù l' inzegno uman.  
 Grazie donca al padre Giove,  
 Che più alegro assae de fondo,  
 Ga dà moto a sto bel mondo  
 Per no farlo indormenzar.  
 Che impastando beni e mali  
 Con acorta missianseta,  
 In palazzo la caseta  
 N' à permesso de cambiar:  
 Che n' à fato amar el lusso  
 Megio assae che 'l star de bando,  
 In sempiezzi consumando  
 L' uso belo de rason.  
 Che galante fin lu stesso  
 Dei so amori co la lista  
 Dele dñe la conquista  
 N' à ridoto a profession.  
 Senza Giove ancora ignota  
 Saria l' arte d' armonia,  
 Nè Veluti pararia  
 Su le scene un rissignol.  
 No saria paron Canova  
 Co do bote de scarpelo  
 A natura, so modelo,  
 De rapirghe quel che 'l vol.  
 Per lu solo in sta tempesta  
 De pensieri e de bisogni,  
 Inganandola de sogni,  
 Xe rinata umanità;

Che rompendo le montagne,  
 Spaventae dal tibidoi,  
 Coi so marmi ai nostri eroi  
 Archi e loge ga inalzà.  
 Lu xe sta che à messo in voga  
 Versi curti, versi longhi;  
 Nati alora come i fonghi  
 Xe i poeti de mistier.  
 Lu ga dà la cetra d' oro;  
 Bezzi no, ma verdi alori,  
 Che val più de gran tesori,  
 E xe Apolo dispensier.  
 Coi poeti qualche volta  
 Xe venudi i mecenati  
 De boconi prelibati  
 I poeti a regalar,  
 E se ancora quel de Roma  
 Dura in-voga e vive eterno,  
 Ga un gran merito el Falerno,  
 Episodio del disnar.  
 Un' idea liga co l' altra:  
 E xe in fondo un don de Giove  
 Se me mete ancuo a le prove  
 Sto benigno cavalier:  
 Se qua vedo amalgamada  
 La coltura e la dotrina  
 Co la grazia feminina,  
 Salsa prima del piacer:  
 Se in ste dame, fior del sesso,  
 Ride el fior de gentilezza,  
 Se la nascita e l' altezza  
 Zonta pregi a la virtù.  
 Ma cospeto! ghe vol altro!  
 L' argomento xe sublime!  
 Le vernacole mie rime  
 No pol tanto andar in su.  
 Strenzo i pani per prudenza,  
 E ve chiamo tuti in coro  
 A lodar, che in fero l' oro  
 Sia da secoli cambià:  
 Toco el goto, fazzo un prindese,  
 E per coa de tante prove  
 Co Soranzo unisso Giove,  
 Sto disnar, sta società.

## BRINDISI

GIUSEPPINA FABRÈ

CELEBRE VIRTUOSA DE CANTO.

*Fingendo el poeta de improvisar.*

Epur me sento in gringola,  
 Me sento el sangue in moto!  
 Bepina fa miracoli  
 Co quel so bel musoto!  
 Improvisar un zovene  
 Pol ben sera e matina  
 Se un pochettin lo stuzzega  
 El muso de Bepina;  
 Ma, oh dio, co le quareseme,  
 Che porto su la schena,  
 L'è far assae de moverme  
 Qua su do pie la vena!  
 Poeta estemporaneo  
 Apolo no m' à fato;  
 Ghe vol per sti miracoli,  
 Ghe vol un muso mato.  
 Zito, che vegno al merito;  
 Ascoltime co flemma,  
 Che za sarò laconico,  
 Benchè me piasa el tema.  
 Da quele forme angeliche,  
 Bepina, che grazieta  
 Co ti le sfogi al publico  
 Vestia da polacheta!  
 Che ton co in manto regio  
 Duchessa de Spoleto,  
 Gran cosse in cuor ti maseni  
 Piena del to sogeto!  
 Che vose! che bel metodo!  
 Che verità de canto!  
 Senza quei geroglifici  
 Vero de l'arte impianto!  
 No vogio co i to emoli,  
 No vogio far confronto;

So che ti xe un prodigio,  
 So che ogni cuor xe ponto;  
 So che le muse vechie,  
 Che pur xe fie de Giove,  
 Per farme'estemporaneo  
 No basta in tute nove;  
 So che sta grazia insolita,  
 La devo a ti, carina,  
 So che per musa decima  
 Onoro ancno Bepina.

## BRINDISI

PER LE NOZZE DE LA SIGNORA

GIULIA GREGIUOLI

COL SIGNOR

PIETRO SALA

CUGINO DE L'AUTOR.

Se volè sentir un prindese  
 Permeteme de tocar.  
 Senza qualche tocadina  
 Mi no posso improvisar.  
 Ma intendemose, sposina,  
 E m'intenda anca Pierin,  
 Voi tocar per darne spirito  
 Gotesin co gotesin.  
 Che ai poeti favorevole  
 Sempre Baco s' à mostrà,  
 E nel bombo i gran filosofi  
 A' cercà la verità.  
 Sposa mia, più che ve esamino  
 Mi la trovo tuta in vu,  
 Trovo grazia, trovo spirito,  
 Gentilezza e zoventù.  
 Vu sè un bocolo de magio  
 Sè una rosa de zardin;  
 No ve adulo, ma sè proprio  
 Un capeto soprafin.

No sè grandà, no sè picola,  
 Ma sè quello che convien ;  
 Da quei ochi luse l' anima,  
 E traspira un cuor seren.  
 Sè una cossa delicata.  
 Fortunà quel mio zerman !  
 Tardi sì, ma ti l' à fata,  
 Piero mio, da cortesan.  
 Per ti amor l' à fato grazia,  
 E la benda el s' à levà,  
 Ma gh'è in mezzo una disgrazia  
 Che la musica nol sa. (176)  
 Povareto! solo in questo  
 Me destè la compassion ;  
 Piero bravo in tuto el resto  
 L'è mo nato campanon!  
 Note e zorno vu podè  
 Su quel cembalo pestar,  
 Che mai certo arivarè  
 In quel marmo a penetrar.  
 Se dal ton de l'alafà  
 Vu trè un salto in elami  
 Lu quel salto aprovarà,  
 Che nol sa più de cussi !  
 Oh misteri impenetrabili !  
 De spiegarli chi xe bon ?  
 Con un cuor tanto sensibile  
 L' à da nascer campanon!  
 Ma in sto zorno d' alegria  
 No lo voi mortificar ;  
 L' è po un fiol de tanto merito,  
 Che ghe posso perdonar.  
 Za po in fondo senza musica  
 Se pol far el so dover,  
 Nè se pensa al clavicembalo  
 Nei momenti de piacer.  
 Sul putin che nassarà  
 Mi no so mo cossa dir,  
 Che se mai so cogionà  
 Me despiase de mentir.  
 In sti tempi malinconici  
 Semo zogo del destin,  
 L' omo probo va in desmentega,  
 E dà suso el berechin.  
 Donca a monte i vaticinj ;  
 El sarà quel che 'l sarà,  
 Certo bon se el ghe somegia  
 A la mama e al so papà.

Viva intanto el matrimonio,  
 Viva pur sto lieto di,  
 E a l' onor de ste bel' anime  
 Bevè tuti al par de mi.

## BRINDISI

PER LE NOZZE DE LA SIGNORA

V I T T O R I A G A G G I O

NIPOTE DE L' AUTORE

*col signor*

AVVOCATO GASPARI.

Tuti porta la so crose  
 In sto mondo pièn de guai  
 Per purgarse dai pecai  
 E la gloria meritar.  
 Ga la crose chi ga bezzì,  
 Ma più granda chi xe senza,  
 Penitenza, penitenza,  
 In sto mondo s' à da far.  
 Cussì in chiesa tante volte  
 O' sentio cigar dai preti,  
 Che del cielo i gran secreti  
 I ve spiega, e tuto i sa.  
 Ma xe varie po le strade,  
 Che conduse i viaggiatori,  
 ( Vogio dir i peccatori )  
 A goder l' eternità.  
 Ghe ne xe de strete strete,  
 Tute spine, tute stenti,  
 No l'è pan per tutti i denti,  
 Nol saria certo per mi.  
 Ghe ne xe de assae più comode  
 Col so trozo, el so fioreto,  
 Ghe ne xe co l' oseleto,  
 Che saluda el novo di.  
 Tropo serio xe el preambolo  
 In un zorno de alerezza,

No xe vero, cara nezza ?  
 Ma senti l'aplicazion.  
 Benedete pur quel' anime,  
 Che sta sempre là sarae!  
 Ma vu in mezzo a le pelae (177)  
 Me facevi compassion.  
 Povareta, cussì spisima  
 Levar su col fredo incalza,  
 Senza un fià de sotocalza,  
 Co la lana sul martin!  
 Levar su co i altri dorme,  
 Co xe tuto el mondo scuro,  
 Levar su da un leto duro  
 Per cantar el matutin!  
 Sia lodato Gesù Cristo  
 Se ve sè disinganada,  
 Se ve sè desmunegada  
 Senza farve sugizion!  
 Se v'à piasso el matrimonio,  
 Sacramento cussì grandio!  
 Megio assae che star de bando  
 Tuto el zorno in orazion.  
 Questa xe la strada bela  
 Co le rose e coi fioreti,  
 Anca in questa gh'hè i so eleti,  
 Co più gusto se va su.  
 Nè gh'hè gnente che s'opona  
 A la vose de natura;  
 Co una fiamma tuta pura  
 Se alimenta zoventù.  
 Se se vede presto intorno  
 Dei graziosi fantolini,  
 E se conta coi putini  
 El principio de l'amor.  
 L'è un gran ben se i nasce boni,  
 L'è un gran ben se i xe ben fati,  
 L'è un gran mal se i nasce mati;  
 Ma gh'hè in tuto el so dolor.  
 Gavè un omo che ve adora,  
 Gavè un omo che ve piase,  
 E a dispetto de ste base  
 Podè el cielo meritare.  
 Viva donca el matrimonio,  
 E sta mezza munegheta,  
 Che à savesto da furbeta  
 Sto bon omo interessar!  
 No l'è minga de quei zoveni  
 Co le mode da Milan

Che in bottega da Florian  
 Se dà el ton conquistator,  
 Che vol far da spiritosi  
 Perchè i mastega el francese,  
 Che xe pieni de pretese,  
 Che voria per forza impor.  
 Ma l'è un omo de proposito,  
 De bon senso, de bon cuor,  
 Che nel foro se fa onor  
 Che xe assae considerà.  
 Che se mostra galantomo  
 Nela so fisionomia,  
 Che xe pien de cortesia  
 Che xe al fior dela so' età.  
 Viva donca el matrimonio,  
 Viva pur sta mia nezzeta!  
 Fortunada Vitorietta  
 Diga ognun col goto in man!  
 Vedè come al nostro giubilo  
 Quel bon vechio se raviva!  
 Su bevemo, e i nostri eviva  
 Gabia primo sior Bastian (178)

## BRINDISI

*FILII TUI SICUT NOVELLAE OLIVARUM  
 IN CIRCUITO MENSÆ TUAE. (179)*

Aver in tavola,  
 Dise el Salmista,  
 De fioli amabili  
 Una gran lista,  
 Che vada unanimi,  
 Che sia ben fati,  
 Che sia piacevoli  
 Senz'esser mati,  
 Prova certissima  
 La xe che Dio  
 Protege e premia  
 Quel bon mario,  
 Che in casa el semena  
 Tuto el so amor,  
 Nè mai ghe palpita  
 De fora el cuor

Sto mio preambolo  
 Sacro, divin,  
 Che loda el merito  
 De sior Tonin, (180)  
 Ometo energico  
 Per el passà,  
 Benchè de spisima  
 L'aspeto el ga,  
 Co magior titolo  
 Andando in su  
 Del primo stipite  
 A la virtù  
 El fa l'elogio  
 De sior Bastian,  
 Vechieto intrepido  
 Robusto e san,  
 Che a la so tavola  
 Fiorenti e vive  
 L' à visto crescerse  
 Ste care olive.  
 E nei difficili  
 Tempi d'adesso,  
 Che manca i omeni  
 Per el bel sesso,  
 E che depositi  
 In ste palae  
 Le pute invecchia  
 Mortifcae,  
 Lu co bel ordine  
 In braccio el mete  
 De galantomeni  
 Ste mie nezzete,  
 E inesauribile  
 El so casnà  
 A tute prodiga  
 Felicità.  
 « Nono tarissimo,  
 (Da la colina  
 Ghe scrive tenera  
 Margaritina ) (181)  
 Per el mio Calice  
 Go pago el cuor,  
 Per i mii picoli  
 Son tuta amor. »  
 La Vitorietà, (182)  
 Che s' à pentio  
 In lege streta  
 De star con Dio,

Che unita a celebre  
 Campion del foro  
 Gode pacifica  
 El so tesoro,  
 La sa che 'l merito  
 De tanto ben  
 Per prima origine  
 Dal nono vien.  
 Marieta (183) palpita  
 Per lu d' afeto  
 E za la masena  
 Gran cosse in peto,  
 Ancno che Potimo  
 Sior Amadeo  
 Gh' à messo tenero  
 L'anelo in deo,  
 E che con questo  
 Libero el pol,  
 Paron del resto,  
 Far quel che 'l vol.  
 Misteri amabili,  
 Marieta cara,  
 Per chi ga un anima  
 Che presto imparà!  
 Scienza sicura  
 Che mai no varia,  
 Che xe in natura  
 Ereditaria,  
 Che se perpetua  
 Da Adamo in qua,  
 Che fecondissima  
 In vu sarà,  
 Se el don profetico  
 No me cogiona,  
 Che ai so preseliti  
 In Elicona  
 Quel dio xe solito  
 De regalar  
 Co i ga la gloriar  
 De ben poetar.  
 Via fora el malega,  
 Fora el maderò,  
 A ste botiglie  
 Fè bona ciera,  
 Tochè festevoli  
 I vostri goti  
 Del barba unindove  
 Ai caldi voti;

E presto ancora.  
 Egual fortuna  
 O drento o fora  
 De sta laguna,  
 Tocar ghe possa  
 A quella putà (r84)  
 Che ascolta rossa,  
 E a boca suta,  
 I versi lepidi  
 D' un barba mato  
 Che per dir buzzase  
 L'è proprio nato.

## BRINDISI

## PER UN NUOVO PAROCO.

Amici che caldo!  
 No posso star saldo,  
 Go invasa la testa:  
 Sto zorno de festa  
 Poeta me vol ....  
 Me tègna chi pol!  
 Cifì sa che no! sia  
 Efeto del vin?  
 Ma se l'alegria,  
 Se sto gotesin  
 Me fa improvisar  
 M'oi da vergognar?  
 Col goto a la mar,  
 Da bon cortesan,  
 Orazio cantava,  
 E sèmpre el chiuchiava,  
 Del vin navegà  
 Per darse del fà.  
 Amante del goto  
 Xè sfa Anacreonte,  
 E a tuti xe noto.  
 Che rose a la fronte,  
 Za fato vechion,  
 Amor gh'à dà in don,  
 Noè s' a imbriga  
 E Lot anca lu;

Racc. Poes. Ven.

Chi torto ghe dà  
 No sa la virtù  
 Chè ga sto liquor,  
 Sto gran sedutor.  
 L'è un ben, l'è un tesoro  
 Per omeni e puti,  
 Dei vechi ristoro,  
 Un balsemo a tutti,  
 L'è un vero cordial  
 Che vince ogni mal.  
 E un bravo piovàn  
 No l'è del mistier,  
 Nol sa el so dover  
 Se un bon caratelo  
 De vin, che sia quello;  
 Nol tien sempre a man.  
 Gh'è sta un arciprete (185)  
 Da tuti adorà  
 Che ne la so caneya  
 Per meterse in quiete  
 I padri più celebri  
 L'aveva logà.  
 Vedei ogni arnaso  
 Col so boletìn.  
 Quel gera Tomaso,  
 Quel altro Agustin;  
 Ma el capo più bon  
 San Paulo in canton.  
 No gh'entra la favola,  
 La xe verità.  
 A mi sto teologo,  
 A mi l'ha tocà.  
 Amici ridè ....  
 Pancrazio, imparè.

## SCHERZO

RECITATO ALLA TAVOLA

DELLA

CONTESSA MANGILLI

PER LE NOZZE VALMARANA.

Mia mare Vitoria,  
 Che Dio l'abia in gloria!  
 (L'è un pezzo de storia  
 Piatosto vechieto,  
 Ma pur l'è boneto;  
 Andava in sacheto  
 Col mio tabarielo;  
 In soma putelo,  
 Su i dodese al più.

Tenudo a le strete  
 Apena do orete,  
 El zioba col prete  
 In piazza baucava,  
 O in chiesa a la Fava:  
 E dopo tornava  
 In casa, e de là  
 No gera molà  
 Che dopo oto di.)

Fin qua tra parentesi,  
 E torno a la storia.  
 Mia mare Vitoria  
 El di de domenega  
 In gala, ben messa,  
 Voleva che a messa  
 Andasse al so fianco,  
 Pregando sul banco  
 Co gran divozion;

E dopo sto bagolo  
 (Xe longa la storia)  
 Mia mare Vitoria  
 Diseva: « Fio mio,  
 Andemo con Dio;  
 In gondola a un remo

Za presto ghe semo,  
 In Volta podemo  
 De longo sbrissar. »  
 E beli in candela  
 La vechia putela,  
 Alora una stela,  
 (So quel che ve digo)  
 La gran Mocenigo  
 Muger del Teston,  
 Che da quela volta  
 Ancora xe in Volta, (186)  
 Se andava a inchinar.  
 E strada facendo,  
 Mia mare Vitoria,  
 Che Diò l'abia in gloria!  
 Me andava disendo:  
 « Rifleti, Pierin,  
 Che là in quel casin  
 No gh'è che celenze;  
 No farne indecenze  
 E stame vicin. »  
 Colpio da la predica  
 Pareva un modelo  
 Cascà zo dal cielo,  
 Ma el cuor me tremava:  
 « Che caro putelo,  
 La dama cigava,  
 Che muso da bon!  
 Meteve al balcon,  
 No abiè sugizion. »  
 Co un poca de boria  
 Mia mare Vitoria  
 Tra quei zentilomeni,  
 Che in fondo xe omeni,  
 Vedeva so fio,  
 Un poco ispaurio  
 Dar segni imauri  
 Dei fruti mauri  
 Che dopo à sbrocà.  
 Finio sto spasseto,  
 Mi sempre in sacheto  
 Da gran cortesan  
 Davanti a mia mare,  
 Mia mare Vitoria,  
 (So al fin de la storia)  
 Persone più care,  
 Perché più a la man,  
 Andava a troyar.



No voggio a sto passo  
 Descriver per chiasso  
 Le vode parole  
 De certe cariole,  
 Per altro lustrissime,  
 Medagie antighissime  
 Andae tute in cenere,  
 Che alora assae tenere  
 Butava con mi.  
 Go ben a memoria,  
 Gran forza del'belo!  
 E gera putelo!  
 Che se qualche festa  
 Mia mare Vitoria  
 Più umana de testa  
 Da vu me portava, (187)  
 Oh Dio! respirava,  
 Contessa, el mio cuor.  
 Nè certo da gnoco!  
 Che geri un bel toco,  
 Nè iperbole gh'è;  
 E ancora gavè,  
 Contessa, quel che ....  
 Ma torno a la storia:  
 Mia mare Vitoria,  
 El come no so,  
 Che dati no go,  
 S'aveva piantà  
 In testa, e fissà  
 Che de parentà  
 Ghe xe tra de nu  
 Un grado, ma in su.  
 Lo credo ... sarà ....  
 Ma el fio d'un banchier  
 L'agiuto de l'alboro  
 In casa no ga.  
 So ben che piacer  
 Me da sto pensier.  
 E ancora, suposto  
 Che 'l fusse un gran roste,  
 Me godo, me cocolo  
 Sto grado nascosto;  
 E de la so gloria  
 Mia mare Vitoria  
 Ringrazio de cuor;  
 Che senza sto titolo  
 Nè bse in capitolo,  
 Nè logo in sto sito

Ancuo gavarìa  
 Per farghe in poesia  
 Un prindese ai sposi,  
 Che freschi e amorosi  
 No i ga che 'l delito  
 De andarne lontan.  
 D'amor l'inclemenza  
 Li vol a Vicenza:  
 Che dura sentenza!  
 Ma posto che al termine  
 Mi son de la storia  
 Finisso, pregando  
 Mia mare Vitoria  
 D'un estro più grandò  
 Co nasce un putin.

## CAPRICCIO

PER LE NOZZE

MANTOVANI-GALLETTI

DI BERTIOLO.

Per tor la cossa *ab ovo*:  
 Co 'l mondo gera novo;  
 Vogio dir, co nasceva per i prat  
 Senza esser semenai,  
 Nè manco coltival,  
 Fruteri d'ogni sorte,  
 E ve cascava in boca  
 Più boni dei confeti  
 Pometi, persegheiti,  
 Sarlese, marinele, baracocoli,  
 E peri col botiro e peri gnocchi;  
 Co nissun gera in tochi  
 Perchè tuti godeva la cucagna  
 D'una bela campagna,  
 Nè se chiamava ladro  
 Chi in mezzo a sta abbondanza  
 Se impeniva la panza;  
 Amor, quel briconcelo,  
 Fio bastardo de Venere e de Marte  
 Se no fala le carte,  
 Per comando de Giove el gera quello

Che se toleva spasso,  
 E in aria da putelo  
 El faceva alto e basso;  
 Un per de alete in spala,  
 Una binda su i occhi e un arco in man  
 Gera tuto l'arnese  
 De sta bardassa figurin francese:  
 Più svelto de un oselo  
 El coreva di e note  
 Per le poste del cielo:  
 Ancuo, fè conto, al Dolo,  
 E doman dove? gnente manco, al polo;  
 E po, senza far tapa,  
 Doman l'altro de peso  
 Tra le fumane del Monomotapa;  
 E cussi de sto troto  
 Da levante a ponente  
 Zirando giornalmente  
 Sto bravissimo puto  
 Gaveva l'occhio a tuto,  
 E a la bona de Dio  
 Con chi ghè dava l'estro  
 Ghe faceva far nio  
 A tuta sta famegia de viveuti  
 Senza formalità, nè complimenti.  
 Giove serava un occhio; e per esempio  
 El cielo avertò gera albra el tempio  
 De le nozze de tuti.  
 Missiai pute co puti  
 I balava, i cantava,  
 E co Amor decretava  
 Co un mezzo sospireto i se vardava,  
 E in bota i diventava,  
 Senza darse la man, mario e muger.  
 Allora, oh che piacer!  
 No ghe gera bisogno  
 De domandarghe al pare,  
 Molto manco a la mare,  
 No se faceva scielta del compare.  
 No ghe gera contrato,  
 Nè dote preparada,  
 Che xe una gran secada,  
 Ma tuto gera fato,  
 Come se sol dir, dal dito al fato.  
 E per questo quel secolo,  
 Che xe sta veramente un gran tesoro,  
 I poeti lo chiama quel de l'oro.  
 Ma come po a la longa su sta tera

O no regna la pase,  
 O de tuto fa i omeni cagnera,  
 Da sta facilità de dir de sì  
 E de darse del ti  
 Xe nati dei disordini reali,  
 Che à messo in confusion tuti i mortali.  
 Apena deslatai,  
 In libertà lassai,  
 Gera i puteli a l'incirca tratai,  
 Come che trata i gati i so gattini,  
 O i gali i pulesini.  
 El mario dopo un ano el se stufava,  
 E a up' altra el se tacava;  
 Qualcheduna rugnava,  
 Ma dopo un per de di la baratava,  
 E la se consolava,  
 E cussi de sta sia,  
 La vose de natura sepelia  
 Da quel birbo de Amor,  
 No ghe gera più cuor,  
 Molto manco pudor,  
 E i poveri puteli,  
 Ridoti un ospel de bastardeli,  
 No i pronunciava più,  
 Come che tuti fa,  
 El nome de la mama e del papà.  
 « Alto là, alto là,  
 Giove un zorno ismarà  
 A' cigà da l'Olimpo: sta bubana  
 Xe un poco troppo per la razza umana.  
 Mercurio a ti: va zo de mala pressa,  
 Cerca de Amor, dighe che l'è un birpante,  
 E che buta le have el gran Tonante:  
 Che son stufo de lu, che tiro indrio  
 El mio vecchio decreto, e che ghe intimo  
 Un aresto in Citera, e de star sconto  
 Fin che se me presenta un rendiconto. »  
 Più veloce de un fulmine  
 Cala Mercurio in tera;  
 E come un malfator  
 Condoto xe in Citera,  
 Ligà l'ale e le man,  
 Sto bravo cortesan,  
 Che comandava prima da tiran.  
 Cazzà cussi in preson  
 El capo del bon ton  
 Giove se metè a spassizzar le stele;  
 E in mezzo a le più bele

El trova dona Urania,  
 Che sul far de la note  
 Gera per tacar soto  
 El caro de Boote.  
 « Ferma, el ghe dise: Amor, quel zisoloto  
 Co le so bardassae m' à proprio roto ....  
 Urania ti m' intendi : el birbo xe in castigo ;  
 Ghe vol un altro che meginstà el mondo ;  
 E che vada seconde  
 A riparar el marzo che à lassà  
 Quel puto disgrazià :  
 Go butà l'ochio za  
 Sul to unico fio : (188)  
 L'è zovene, ma so che l'è un ometo,  
 Lo voi governor, eco el decreto. »  
 Da quel mumento Imene  
 Senza el fogo de Amor, ma co più sal,  
 Scarabochiando un codice formal,  
 El s' à messo a portada  
 De dar a tanti mali una netada.  
 In compagnia de lu  
 Xe calada Virtù,  
 E i omeni, che più  
 No se sognava de vardar in su,  
 A' capio che vardando sempre in zo  
 Diferenza no gh'è da lori al bo.  
 La puta vergogrosa  
 A' butà fora del pudor la rosa ;  
 No la ga scielto a mazzo  
 Per sola voglia de ubidir Natura,  
 Ma co una fiamma pura,  
 Per opera d' Imene,  
 La ga divinizzà le so caene.  
 S' à stabilio d'acordo  
 Che 'l lazzo d'Imeneo sia un lazzo forte,  
 Che no possa spezzar altro che morte ;  
 Nè se credeva allora  
 Che, intrigando le togne,  
 Podesse l' avvocato  
 Ridur manco del zero sto contrato.  
 S' à cocolà i putei,  
 Anca nati zemei,  
 No i s' à lassà più soli  
 Come tanti pandoli ;  
 In soma in poco tempo  
 Imene, bravo muso,  
 El mondo l' à refuso,  
 E da la confusion

Del zizola imbrogion  
 S' à visto saltar fora,  
 Come dal primo caos, la nova aurora.  
 Imene da quel zorno  
 (Scartando i sposi che no val un corno)  
 A' sempre cantuzzà  
 Co nozze ghe xe sta :  
 E se vien fora spesso dei soneti  
 Alquanto brodoseti  
 Vol dir, che i so concetti  
 Per l' organo passando dei poeti  
 I chiapa el mal del legno :  
 Ma se la xe cussi, sarogio degno  
 De ripeterve ancuo  
 Sul chitaron za frusto de paluo  
 La nova canzoncina,  
 Che a la mia rechia fina  
 Me porta un zefireto de matina ?  
 No ghe meto del mio,  
 Quel che parla xe el Dio.  
 Interpretè de lu, Sposi, ascolteme  
 E se facesse fiasco perdonème.

## CANTO D' IMENE.

Margarita,  
 Dreta in vita,  
 Svelta più de una cerveta  
 Dal to sposo benedeta,  
 Che te mör coi ochi suso  
 Incantà de quel bel muso,  
 Via a la presta  
 Da la testa  
 Cava i aghi e le forchete  
 Che te tien le drezze strete,  
 E più liberi e più bei  
 Vada zoso i to cavei.

Abastanza  
 Per creanza  
 Tuto el zorno ti xe stada  
 Nei to abiti ligada,  
 Mastegando complimenti  
 Ai to amici, ai to parenti ;  
 Zo i diamanti,  
 Zo i brillanti,  
 Zo i strighezzi parigini,

Fiori, nastri e merli fini;  
A sta ora basta un velo  
Che te sconda apena el belo.

Tuto tase,  
E per le case  
Da la note semenai  
Cala i sogni, e indormenzai  
I marii de data vechia  
I xe duri assae de rechia.

Ma per quei  
Che xe novei  
I papaveri no cala,  
Impazienti el cuor ghe bala,  
E sensibili ai mii doni  
I spalanca un per de ochiopi.

Coragiosa,  
Bela sposa,  
Cori in braccio a chi te adora,  
La mia fiacola tra un' ora  
Scaldarà pronuba i feri  
Nei dolcissimi misteri.

Per un nodo  
Tanto sodo  
Chiaparà, te lo prometo,  
La to patria più conceto,  
E ignorar che gh'è Bertioło  
Sarà un segno de pandolo.

Che bei fruti!  
Che bei puti!  
Nassa el primo senza borja,  
Companizzite la gloria,  
Che impegnar no te voi tanto  
De l'amor nel primo vanto.

Ma fecondo  
Del secondo  
Co sarà, sposa, el to grembo,  
No del Tasso, no del Bembo,  
Ma de un cigno più vicin  
Cerca in casa l'oro fin.

Vastu a segno  
Col to inzegno?  
Vogio dir da Giacometo (189)  
De le muse predileto,  
E de Pindaro fradelo,  
Cerca un pezzo da cartelo.  
Solo un pezzo? ...  
Che sempiezzo!  
Roba tuto el scartafazzo

Dove gh'è belezze a sguazzo,  
E tamisa zorno e note  
Le pindariche so bote:

Ispirà  
Da to cugnà  
El bambin cussì sarà,  
Che secondo nassarà,  
E co i altri dise oà  
Qualche verso el te farà.

A le porte  
No pol morte  
Bater più se gh'è un aloro:  
El poeta xe un tesoro  
Che pol dir, bezzì no go,  
Ma crepar? oh questo no.

## IN MORTE

DE

PETRONIO BURATTI

EXO DE L' AUTOR.

### LAMENTO.

Providenza, Providenza! (190)  
Gh' estu in fatò, b xestu un zero?  
El negarte xe insolenza,  
L' acordarte xe un mistero.

De ti parla el pra vestio  
In april de bei colori,  
L' oseleto che fa 'l nio,  
El zardin che buta fiori.

L' ava inquieta e facendiera,  
Che dal bozzolo se mola,  
Co a l' odor de primavera  
Tuto el mondo se consola.

De ti parla l' alboreto  
Che da nuo che 'l gera prima  
Ubidente al to decreto  
Se fa verde in banda e in cima,

Ogni gran, che superando  
 L' inernal stagion nemiga,  
 Va in secreto preparando  
 El portento d' una spiga,

Ogni vida, che bambina  
 Segna el graspo, se fa bela,  
 E rival de la vicina  
 Spiegà in pompa la tirela.

De ti parla ogni semenza  
 Che se càmbia in fruto o in pianta,  
 De ti parla, Providenza, ..  
 Là natura tuta quanta .

No gh'è un cuor che sordo sia  
 Co 'l se mete a contemplar  
 La magnifica armonia  
 Che ga cielo, t era e mar.

Ma perchè ( l'ardir perdona  
 Del mio dubio material )  
 Perchè mai se ti xe bona  
 Te compiasistu del mal ?

Perchè vustu che col ben  
 El sia tanto amalgamà,  
 Che ogni gusto de yelen  
 Gabia almanco la metà ?

Perchè spesso co nu armada,  
 Providenza; de rigor  
 Dastu al mal libera strada  
 E rafinistu el dolor ?

No poteva donca el mondo,  
 Tanto a l' omo sorprendente,  
 Senza el mal che 'l ga per fondo .  
 Vegnir fora dal so gneute ?

No poteva quieta quieta  
 Co se brusa la campagna  
 Mandar zo la nuvoleta  
 El rjstoro che la bagna ?

Ghè voleva donca el lampo,  
 Ghe voleva donca el ton,  
 Nè ghe gera donca scampo  
 Da la strage del sion ?

No doveva la speranza  
 Del raccolto za vicin  
 Mai prometerghe abondanza  
 Al suor del contadin ?

Gera donca lege dara  
 Che tradisse la so festa  
 Improvisa cegiaura.  
 Gravia el fianco de tempesta ?

Che dovesse el puro azzardo,  
 Senza un' ombra de vendeta,  
 Imprestar de morte el dardo  
 Al furor de la saeta ?

Che ripari, ingegno e mente,  
 Fusse inutile bariera  
 A la rabia del torete,  
 Che vien zo come una fiera ?

Che la croda trasformasse  
 Le so gole in mongibelo,  
 Che la tera scantinasse,  
 E che averta sul più belo

Cità intiere, che xe stae  
 Dei so popoli ornamento,  
 Fusse in cenere cambiae  
 E sparisse in t' un mumento ?

Providenza, Providenza !  
 Gh'estu in fato o xestu un zero ?  
 El negarte xe insolenza,  
 L' acordarte xe un mistero.

Fio de scioca presunzion  
 Forsi un omo egual a mi  
 Podaria trovar sto ton;  
 Ma se parlo, parlo a ti.

Parlo a ti come creatura,  
 Che davanti al so creator  
 Sfoga i moti de natura  
 Sfoga l' impeto del cuor.

Parlo a ti perchè ò sentio,  
 Che sto ragio de la mente  
 Ragio xe che vien da Dio,  
 Come un' acqua da sorgente,

E che in logo de feral  
El xe sta concesso a na  
Per convincerne del mal  
De l' istinto asae de più,

Parlo a ti perchè da quando  
L' alfabeto combinava  
Nele rechie tontonando  
Ose tremola me andava,

Che 'l dolor per ti a le prove  
Xe qua sempre col piacer,  
E che fogia no se move  
Senza espresso to voler ;

Ma sarastu ti in dirito  
De impedir che in fazza a morte  
Nò se acuora un pare afflito,  
No 'l se lagna de la sorte.

Pol ben l'omo ai to castighi  
Rassegnà piegar el colo,  
Ma tegnirise in peto i cighi  
Xe de un Giobe 'esempio solo.

Forsi ariva el nostro inzegno  
A capir per che destin  
De penar sia tanto degno  
El corpeto de un bambin ?

Forsi el povero inocente  
Co nol gera in vita ancora  
Domandavelo impaziente  
De gustar de vita un'ora ?

Ligai forse co l' anelo  
De l' imenso to crea  
Xe i tormenti d' un putelo  
Senza machia de pecà ?

O gh'è lege in ciel tremenda  
Che se 'l pare va impunio  
De le colpe soe l' emenda  
Se scaena adosso al fi ?

Providenza ! qua me ingropo.  
El mio cuor se spezza in do,  
Me confonde el prima e 'l dopo ;  
Trovar bussola no so.

Ma so ben che se contrabò  
Me fa l'umile fortuna  
De marmorea tomba al fasto  
Nela patria mia lagana,

Se una piera, un' iscrizion  
No distingue la so fossa  
Da la trista confusion  
Che in quel isola se ingrossa, (191)

Se negà me xe 'l conforto,  
El piacer sentimentàl,  
De una lagrema sul porto  
Del naufragio universal,

Vogio almanco un novo genere  
De poesia per lu tentar,  
Vogio almanco la so cenere  
Col mio pianto apostrofar :

E chi sa che no se scuota  
Piu de un' anima restia  
Al dolor de qualche nota  
Da l'afeto sugeria.

#### APOSTROFE AL BAMBIN.

Ah ! per cossa, Petronieto,  
No me xe conforto al cuor  
El silenzio d' un boschetto  
Segretario del dolor.

Perchè vederlo me toca  
Dai mii campi sul confin  
Ralegrar d' un' ombra scioca  
L' ozio rico d' un vicin ? (192)

Forsi i grandi xeli fati  
Per gustar el vero ben ;  
Xeli forse mai beati  
De tranquila pase in sen ?

Le gran suste de natura  
Se conossele da chi  
Soto el manto d' impostura  
Le tradisse tuti i di ?

Sali mai col proprio inzegno  
 Quietì quieti conversar,  
 E inalzarse a novo regno  
 Col profondo meditar?

Sali mai che più del riso  
 Ga una lagrema saor,  
 Che fortuita bagna el viso,  
 E che drete vien dal cuor?

Ah! se fusse mio quel sito  
 Frequentà dal russignol,  
 Quela cèla da romito  
 Dove mai no luse 'l sol,

Quel' amabile colina  
 Che sul fianco la tien su,  
 Quel' acqueta che vicina  
 Forma un lago, e mor in lu,

Eco l' ino che voria  
 Del mio pianto consacrà  
 Co la trista avemaria  
 Segna l' ora del pregar.

Gabia pase, Petronieto, (193)  
 Ne la muta eternità  
 Questo povero corpeto  
 Da le piaghe maltratà;

Gabia pase quei dolori  
 Scomensai par troppo in ti  
 Co se averze a pochi fiori  
 De sta vita el breve di;

Co ralegra l' inocenza  
 Una mosca, un calalin,  
 Co del mal de providenza  
 Salta libero el bambin.

Forsi adesso ogeto amaro  
 Xe per ti de compassion  
 Chi vorave veder chiaro  
 Col soccorso de rason.

Chi sdegnando el denso velo,  
 Che se cala a l' ochio uman,  
 El linguaggio de fradelo  
 Se permite col sovràn.  
*Racc. Poes. Ven.*

Ma l' ufizio de avvocato  
 Fame pur caro con lu  
 Se 'l mio inzegno no xe nato  
 Per tradir la so virtù.

Semo carne su sta tera,  
 E la carne ciga oimè  
 Co nel cuor de primavera  
 Un bel fior rapio ne xe.

Primògenita esultanza  
 Del mio nodo coniugal  
 Fior ti geri de fragranza  
 Dopiamènte a mi genial ;

Co strenzendote al mio peto,  
 No col lavro, ma col cuor,  
 Te diseva, Petronieto,  
 Per ti caro xe 'l mio amor.

Per ti sacra la caena  
 Che me unisce a la fedè,  
 Troppo oh Dio lassada in pena  
 De rimorso el più crudel.

Finchè intanto, e benedete (194)  
 Da le man che tuto fa,  
 De le forme rotondete  
 Cocolava la beltà ;

Che de grazie delicate  
 Confrontandole ogni dì  
 L' ambizion toleva al late  
 D' esser bianco più de ti.

Roseo pomo gera el viso  
 I caveli d' oro fin,  
 Ralegrà da ingenuo riso  
 El to lavro porporin.

De la testa la biondezza  
 Contrastava l' ochio brun  
 Scintillante de vivezza  
 Tanto fora del comun.

Che za spesso mi profeta  
 De chimeriche ilusion  
 Te lezeva de poeta  
 Lusinghiera ispirazion.

Nè delusa profezia  
 Gera certo dal supor  
 Che l'incanto d'armonia  
 Te parlasse vivo al cuor,

Co in teatro de quatr' ani  
 Te s'è visto a palpar  
 De motivi Rossiniani  
 Al rimbombo militar;

E i più dolci t'ò sentior  
 Portar via col to sestin,  
 Che pareva sconto un dio  
 Nel gargato picinin.

Ah! speranze nostre umane  
 Fabricae su l'avenir;  
 Le aparenze le più sane  
 Porle un' ora garantir?

Fior ti geri ancuo ridente,  
 E colpìo diman ti è stà  
 Da un velen che esternamente  
 Belo ancora t' à lassà;

Ma che a mezzo interrompendo (195)  
 I to sogni nel dolor  
 T' à svegià co un cigo orendo  
 Dei to mali precursor,

Da quel zorno ogni contento  
 Xe spario da ti lontan,  
 E de morte el sorso lento  
 Xe sta sorso quotidian.

Da quel zorno, Petronieto,  
 La to limpida rason  
 No à servio che a farte ogeto  
 De più amara compassion.

De tristezza un denso velo  
 S' à calà per tuti nu,  
 Invocando primà el cielo,  
 Po la medica virtù.

Ma se el primo no tol parte,  
 Nè se scuote al nostro mal,  
 Cossa pol de l'omo l' arte  
 Per quel povero mortal?

Cossa pol sentenze dote,  
 De chi s' arma del latin  
 Per no dir che oscura note  
 Sconde a l' omo el so destin?

La to schena drento un mese  
 Tra i dolori s' à piegà,  
 Nè le mediche pretese  
 A drezzartela à bastà;

Nel segreto portentoso,  
 Che mantien sto nostro fral,  
 Spassizzava misterioso  
 Sto velen per ti fatal.

E variando stravagante  
 El so ataco giornalier  
 L' idea 'l dava d' un bibrante  
 Che del mal se fa un piacer.

Ma d' un raggio sempre amabile  
 Confortava el nostro cuor  
 Quel to spirito indomabile  
 Da le angustie e dal dolor,

Cussì che se dona forte (196)  
 La mia dona se pol dir  
 Da ti scuola contro morte  
 La gaveva nel sofrir.

Un to riso, un to scherzeto,  
 Gera balsemo del ciel,  
 Gera stimolo a l' afeto,  
 Gera zucaro nel fiell.

De le greche la memoria  
 No vegnirme a celebrar;  
 No gh' è mare ne la storia  
 Che se possa confrontar.

Pontelava in ela el senso  
 De natura e de pietà  
 El perpetuo quadro imenso  
 De la to infelicità;

I durissimi so stenti  
 Radopiava de di in di,  
 Ma calmai gera i tormenti  
 Dal dividerli con ti.



Un comerci spaventevole  
 De bisogni e de passion  
 Xe sta nodo vicendevołe  
 A set' ahi de preson,

Inaspria matina e sera  
 Da l' ufizio disuman  
 De prestarte alegra in ciera  
 La chirùrgica so map.

Basta, basta, Petronieto,  
 Sul mio lavro el canto mor,  
 Perchè scampa dal to leto  
 La compagna del dolor..

Perchè vala in altro sito  
 Le so lagreme a sfogar?  
 Perchè più no xe delito  
 La to cùna abandonar?

Ah! pur tropo le so angosce  
 Parla chiaro e diè oimè,  
 Più so mare nol conosce,  
 Più speranze no ghe xe.

Varie volte inutilmente  
 Go el mio nome replicà;  
 El mio nome indifferente  
 Più miracoli nol fa.

Pol qualunque in sti mument  
 Ose, nome, amor, mentir;  
 L'è za al fin dei so tormenti,  
 No ghe resta che morir.

E ti è morto, e certo a Dio  
 Co quel baso ti à svolà,  
 Che l'ardente afeto mio  
 Fredo ancora t' à lassà.



# POESIE

D I

## G I A M B A T I S T A B A D A.

### EL RITRATO DE L' AUTOR.

Nè piccolo, nè grandò, ma scarmeto,  
 Fronte avertò, ochi mori e barba folta,  
 Bela coa de' cavei, siben incolta,  
 Longa oto quarte, e de color bruneto;

Che in vènezian sa far qualche soneto,  
 Ma de quei da dozzèna e da racolta;  
 Che à composto el Baracola una volta,  
 E tre o quatro poemi in sto dialeto;

D' umor alegro, azzante del chiassar,  
 Colerico a le volte, ma co gnente  
 Facile da poderse mo voltar;

Pien de sincerità, che stoicamente  
 De viver po ghe piase e de tratar,  
 Sora tute le cosse indifferente.

Del soneto presente

Questo, siori, è l' autor. Deghe un' ochiada,  
 Che l' è deposta Zambatista Bada.

### L'ADIO.

Za che, per bontà vostra, son costreto  
 De doverve lassar, anima mia,  
 Permeteme un adio co sto soneto  
 Che l' ultimo vorè forsi che 'l sia.

Sapiè peraltro che tranquilo e lieto,  
 Cara, dal vostro fianco vago via;  
 Che se ò da dir el vero mi in efeto  
 Gera stufo de starve in compagnia.

Nè ve aspetessi mai, che con impianti  
 Ve vegnisse a zurar d' aver gran pena  
 Nel doverve lassar, come fa tanti;

Perchè amor m' à ligà d' una caena  
 De quele che in tragedia i comedianti  
 Adopara de lata in su la scena.

## LE DISGRAZIE.

Se vago per trovar un amalà,  
L'è andà fora de casa, el xe guario;  
Se, piovento, d' ombrela soq munio  
Porto un intrigo, che bon tempo fa;

Se col caldo vestì me voi da istà  
Fa fredo un' ora dopo, e m'ò sfredio;  
E se de star in quiete ò stabilio  
Son da diese persone tormentà;

Se vago in piazza perdo el fazzoletò,  
Ogni cossa che compro i me la sprezza,  
Machio el tabaro el primo di che 'l meto;

Son fortunà in amor co.l' oridezza,  
E se vogio frezzar un bel viseto,  
Cupido no à per mi nissuna frezza.

## NATURA DE AMOR.

Se credesse col tempo d' arivar  
A posseder quel cuor che m' inamora,  
Ghe vorave el mio afeto tributar,  
E assae felice mi sarave allora.

Ma come no me posso lusingar  
D'aver mai tanto ben da una signora  
Che se vede da molti a cortegiar,  
Cussì a sto mio pensier dago un dessora.

Me sento, se volemo, del brusor,  
Ma spéro che nol fazzo in mi magagna  
Pensando ai tanti che ghe fa l' amor.

Perchè la dona infati xe compagna  
Del fogo, che perdendo va el calor  
Quando in picole bronse i lo sparpagna.

## LA CORISPONDENZA.

Un fogio t'ò mandà, Betina cara,  
Nel qual mi te parlava de l' amor,  
Che porto al to museto, e de l' ardor  
Che m' à impizzà la to belezza rara;

Ma ti, cagnazza, a la mia pena amara,  
Mentre che mi tuto te dago el cuor,  
D'una letera toa darne l' onor  
Gnanca ti vol? Oh ti xe pur avara!

Un fogio too lo pagaria un zechin,  
E lo conservarave, tel protesto,  
Come una zogia sempre nel borsin;

Se contentar no ti me vol in questo,  
Tornime donca el mio, che, poverin,  
Farò ch' el serva per forbirme el cesto.

## INVOCAZION.

« O musà, tu che di caduchi allori  
Non circondi la fronte in Elicona, »  
Ma che sempre ti è stada mia parona  
Impartindome spesso i to favori;

« Le donne, i cavalier, l' armi, gli amori, »  
Per acquistar d' aloro una corona  
Mi no vogio cantar, hensi a la bona  
Un soneto accozzar senza suori.

Dame donca el to agiuto sta matina  
Acìò possa sortir da l' imbarazzo,  
Che in sacco mi no go tanta farina.

Perchè ti à da saver che conto fazzo  
De lodar sior Girolamo Sorina,  
Nè se sa cossa dir d' un vis.....

## I. CANZONETA.

Me sento una smania,  
 Me sento un brusor  
 Nel cuor, ne le viscere,  
 A darne dolor.  
 Procuro l'origine  
 Saver de sto mal,  
 Nè arivo a comprender  
 La causa fatal.  
 Che 'l fio mai de-Venere  
 M'avesse ferio?  
 I dise che perfido  
 Xe in fati quel dio;  
 Che 'l solo so studio  
 Xe tesser ingani  
 Per veder i omeni  
 In pianti, in afani.  
 O' visto una femena  
 Un di d' accidente  
 A un logo che pratico  
 Sentarmese arente;  
 Con tuta modestia  
 Discorso ò con ela,  
 E ò visto con genio  
 Che assae l'era bela.  
 M' à piasso l' amabile  
 Grazioso so far,  
 M' à piasso el melifluo  
 So dolce parlar.  
 Ah sì! senza dubio,  
 Cupido xe questo  
 El qual con insidia  
 Colpir m' à volesto.  
 Epur gera solito  
 Vantarme che Amor  
 No à mai possù iluder  
 El sciolto mio cuor.  
 Aimè! tropo incauto  
 Vantava sto ben;  
 E lu, tuto invidia,  
 M' à dà sto velen;  
 Velen che ne l' anima  
 Me dà gran tormento,

E sempre più a crescer,  
 Meschin, me lo sento,  
 Con ela trovandome  
 El sangue m' impizzo,  
 Patisso a no vederla,  
 Me irabio, me istizzo;  
 Oh Dio! se la barbara  
 No sente pietà,  
 De mi miserabile  
 Mai cossa sarà?  
 Se mai per disgrazia  
 Quel cuor xe ritroso  
 Finio go de viver;  
 Mi moro rabioso.

## II. CANZONETA.

Amor, Nina, me stuzzega  
 Perchè continua a amarte,  
 Ma el to contegno, o barbara,  
 Me stimola a lassarte.  
 El to viseto amabile  
 Per mi xe una magia,  
 Ma quel to cuor volubile  
 Xe pien de tirania.  
 Incauta el tò gran spirito,  
 Le paroline e i vezzi;  
 Ma chi pol mai resister  
 Ai tanti to disprezzi?  
 Per ti d' amor savario,  
 Ma senza compassion  
 Ti tuto a l' incontrario  
 De mi ti fa sbolzon.  
 Ti fa de mi un ridicolo,  
 Che tropo xe indiscreto,  
 Epur senza dolermene  
 Sofrirlo me assogeto.  
 Me bastaria sensibile  
 Trovarte al mio dolor,  
 Ma co tut' altri prodiga,  
 Che a mi, ti xe d' amor.  
 A Nane, a Checo, a Momolo  
 Ti fa tanto de ciera,  
 E mi, più che te cocolo,  
 Più ti me trati altiera.

No gavarò quei metiti  
 Che ga forsi sti siqri,  
 Ma in sen-go un cuor che spas ema  
 Per ti più assae de lori.  
 Ghe cedo anca in politica,  
 Che l'adular detesto,  
 Ma in fedeltà li suparo,  
 Ch'è più de tuto el resto.  
 E se no son un zovene  
 De quei de primo pelo,  
 No so po guanca un vechio  
 Da farghene bordelo.  
 Varda chi donca merita  
 Da ti la preferenza,  
 Se quei che xe più zoveni,  
 O quel che à più prudenza.  
 Ah, Nina mia, rissolvite,  
 No farne più penar,  
 E no ridurme al merito  
 D'averte da lassar.

## III. CANZONETA.

Nineta, el cuor me bagola  
 Da l'alegrezza estrema,  
 E tanto son estatico,  
 Che d'inisoniarme ò tema,  
 Me par quasi impossibile  
 D'esserte al fianco ancora,  
 Dopo d'averte, incanto,  
 Lassà per mia malora.  
 No gera mai credibile  
 Che dopo un abandon  
 De tanto tempo, a dirtelà,  
 Trovasse compassion;  
 Epur, Nineta amabile,  
 Scordando el mio traviar,  
 Ti ga pietà d'un misero,  
 E ti lo torni a amar.  
 Pazienza, se contrario  
 Me gera prima Amor,  
 Se tanto ancuo propizio  
 Lo trovo a mio favor.  
 Za no pòdeva vederme  
 Al fianco de nissuna,

• El che xe sta preludio  
 De tanta mia fortuna.  
 • Ma xe fortuna instabile,  
 Nè dura sempre el ben,  
 E no voria che 'l netare ]  
 Cambiasse po in velen.  
 Temo che ancora l'anima,  
 Cara Nineta mia,  
 Come ti vanti, libera  
 Del tuto, oimè! no sia;  
 Temo un amor residuo  
 De quel che ancuo ti abori,  
 Perchè a parlar ti esageri.  
 Co d'elo ti discori.  
 Nineta, no te ofender  
 De sto mio gran sospeto,  
 Perchè el timor de perderte  
 Xe prova del mio afeto;  
 E quel amor conservime  
 Che ti me mostri adesso,  
 Che mi, cara mia cocola,  
 Co ti farò l'istesso.

## IV. CANZONETA.

Nina, intendessimo  
 Senza far scene.  
 Per ti più viver  
 No vogio in pene.  
 Zozo dei bazari  
 Me va l'amor;  
 Me costa el perderte,  
 Maghe vol cuor.  
 • Quel sempre in colera,  
 Sempre in barufa  
 Pol chiaro esprimer:  
 « De ti son stufa. »  
 • Vedo benissimo  
 Che un altro egeto  
 T'ocupa l'anima,  
 Lo vedo schieto.  
 Mi no go meriti  
 Per impeguarte,  
 No son melifluo  
 Per cocolarte;

Son omo ingenuo  
 Nel mio tratar,  
 No go politica  
 Per adular.  
 Ti pol, yolendolo,  
 Conoscer ben  
 Se un cuor sensibile  
 Mi gabia in sen,  
 Ma a certe smorfie  
 D'adulazion,  
 Per mia disgrazia,  
 No, no son bon.  
 Fazzo el possibile  
 Per darte prove  
 D'amor, ma è inutile,  
 Gnente te move.  
 Donca lassessimo.  
 'Senza sussuri,  
 Senza altre colere,  
 Nè musi duri.  
 Questo sia l'ultimo  
 Dei mii lamenti,  
 Sia questo 'l termine  
 Dei mii tormenti.  
 A quello tachite  
 Che più te piase,  
 E Tita lassilo  
 Almanco in pase,  
 Ma senti, barbara,  
 Vegnarà un dì  
 Che ti à da pianzer  
 Forsi per mi;  
 Ti à da conoscer,  
 Crudel, e presto  
 Cossa sia perder  
 Un omo onesto.

## V. CANZONETA.

Mai più no voggio femene  
 Tratar in avegnir;  
 Le ò conossue per pratica,  
 E tropo delirante  
 O' avudo da sofrir  
 Straniezze tante.  
 Vedo in ancuo benissimo  
 Come in amor fortuna  
 Ghe vol, più assae che meriti;  
 E i poveri poeti  
 Mai no ghe n' à nissuna,  
 I xe negleti.  
 O' fato ogni possibile  
 Per cativarne el cuor  
 De qualche dona amabile,  
 Ma sempre fiasco ò fato.  
 Ergo per far l'amor  
 Mi no son nato.  
 Per quanto che m'esamina  
 No so d'aver peccai.  
 Sempre costante e ingenuo  
 O' conservà el mio afeto,  
 Nè in gnente à mancà mai  
 El mio rispetto.  
 Aver de l'antipatico  
 No credo certamente:  
 No son un omo vecchio,  
 E in qualche congiuntura  
 Posso discretamente  
 Far figura.  
 No son tanto melifluo,  
 Lo acordo, nel parlar,  
 Ma se me vede l'anima,  
 Ma se me leze in cuor,  
 Che so anca mi gustar  
 Un vero amor.  
 No son el sior Cristofolo,  
 Che manierete afeta,  
 Ma so anca mi benissimo,  
 E senza esser secante,  
 Dir qualche paroleta  
 Insinuante.

Ma gnanca esser un etico  
 No bramaria per questo ;  
 Go sanità perfeta,  
 E vaga el resto.  
 Teresa mo me tacia  
 Che peco in gelosia,  
 Ma come xe pussibile  
 Che un omo voglia ben,  
 E indifferente 'l sia  
 A quel che vien ?  
 El far da secondario,  
 El far da stropabuso,  
 Mai no m' à piasso, a dirvela ;  
 Son facile e indulgente,  
 Ma questo lo ricuso :  
 O solo, o gnente.  
 Dise la siora Malgara :  
 No se comanda al cuor,  
 Ma xe le sole bestie,  
 Che senza riflessione  
 Seconda, più che amor,  
 La so passion.  
 La Nina xe insensibile  
 Al mio sincero afeto.  
 A letere da scatola,  
 Perchè no resta iluso,  
 La me l' à dito schieto  
 In sul mio muso.  
 Dirò : che no me merita  
 Chi donca no me vol,  
 E cercarò passarmela  
 Co qualche bon amigo,  
 Ma un pochetin me dol,  
 Sincero el digo.

## VI. CANZONETA.

Che Berta filava  
 El tempo è passà.  
 Nineta, t'amava,  
 Che ben ti lo sa.  
 Mia sola ti geri  
 Sovrana del cuor,  
 E voti sinceri  
 Te offriva de amor,  
*Racc. Poes. Ven.*

Ma mai ti à volesto  
 L'oferta gradir  
 D'un cuor fido e onesto,  
 Nè afeto sentir.  
 Ripulse e disprezzi  
 Gaveva da ti.  
 Adesso i to vezzi  
 Fa fiasco co mi.  
 Felice e contento  
 Adesso mi son ;  
 Per ti più no sento  
 Nissuna passion.  
 Ti è cara, ti è bela,  
 Nol posso negar,  
 Ma più no ti è quella  
 Da farne inzucar.  
 Confesso, che amiro  
 Quel vago visin,  
 Ma più no sospiro  
 De starte vicin.  
 Cupido m'aveva  
 Ferio col so stral,  
 Ma po che me greva  
 De lu saria mal ;  
 Vedendote tropo  
 Tirana co mi,  
 Savesto l' à dopo  
 Ferir anca ti ;  
 E mentre ferio  
 L' à aponto el to cuor,  
 Mai più no ò sentio  
 Nel sen quel brusor.  
 Adesso son duro,  
 Ressisto a ogni stral ;  
 Go el peto ch' è un muro  
 D' un antemural.  
 I vezzi, mia Nina,  
 E' ochiae, l' espression,  
 Sparagna, carina ;  
 Per ti più no son.

## VIL. CANZONETA.

Poveri omeni !  
 Sè fido amor  
 Sperè da femene  
 Sè in gran eror.  
 Tato el so studio  
 Xe d' inzucarve,  
 E tórsel el bagolo  
 Po de burlarve.  
 Le xe bisbetiche  
 Nel so pensier ;  
 Con ele el merito  
 No serve aver.  
 Sol per capriccio  
 Le ve carezza,  
 E senza causa  
 Le ve disprezza.  
 Mile le esagera  
 Promesse avanti  
 D' amor ecetera  
 Coi so galanti ;  
 E po, stufandose  
 De la persona,  
 Senza demeriti  
 Le ve abandona.  
 No è tanto istabile  
 Fortuna e mar  
 Come la femena  
 Nel so variar.  
 I sacrificii  
 No serve a gnente,  
 Nè mai d'un misero  
 Pietà le sente.  
 L' ardito, el stolido  
 Xe preferio,  
 E l' omo docile  
 Vien avilio.  
 E mi per pratica  
 Lo posso dir,  
 Nineta barbara,  
 Senza mentir.  
 Ma con ti inutili  
 Xe i mii lamenti ;

Anzi ti giubili  
 Dei mii tormenti,  
 E ti vol vederme  
 Un zerno o l' altro  
 Morir da rabia,  
 Crudel, senz' altro.

## VIII. CANZONETA.

Pentio d' aver incanto  
 Abandonà el to amor,  
 Mi me sentiva a struzer  
 Da smania, da dolor ;  
 E me credea; tornandote  
 El cuor a tributar,  
 D' aver la quiete a l' anima  
 Ancora da tornar,  
 Ma invece son più misero  
 De quel che gera prima ;  
 Più no me posso iluder :  
 De mi no ti fa stima ;  
 No trovo quel sensibile  
 Che pur ti vanti in ti,  
 El mio servir xe inutile,  
 Ne gh'è pietà per mi;  
 E sol ti godi a vederme  
 Cascà come un cocal,  
 A sospirar, a pianzer  
 El mio destin fatal.  
 D'un cuor che pur xe docile,  
 Volesto ti à trionfar,  
 E renderlo ridicolo  
 Del proprio so penar.  
 Ti me vol dar da intendere  
 Che no ti ga altri amanti,  
 Ma no so mato a crederte,  
 Come che gera avanti.  
 Ti ga, cussì no fussela,  
 El caro to Tonin,  
 Che tute l'ore assiduo  
 Te sta sempre vicin.  
 Lo vedo ch'el te cocola,  
 Che ti ghe porti afeto ,  
 Mi mai te vago a genio,  
 Trata son per dispeto;



No posso star un atimo  
 Con ti da solo a sola,  
 Nè senza testimonio  
 Te posso dir parola.  
 Per elo no testimola  
 Inutili riguardi;  
 Per mi è delito massimo  
 Se apena ti me vardi!  
 Ah Nina, no so semplice,  
 Capisso chiaramente:  
 Tonin xe el to bel idolo,  
 Mi son un biltri, un gnente.

## NOVELETE.

### L'OSSESSA.

Una fia d'un vilan, che no gaveva  
 Che disdoto vint'ani, alquanto bela,  
 Ma un pochettin sempietta,  
 Le convulsion pativa, e povereta  
 Co ghe vegniva el mal ela faceva  
 Dei moti convulsivi e stravaganti,  
 Che meteva paura ai circostanti.  
 In un dì del so mal, disea sti tai:  
 Questi è moti da veri indemoniai:  
 Oh povera putela!  
 La fa peccà: vardela  
 Se no l'è spiritada?  
 Senz'altro xe sta tosa indemoniada.  
 Oh come la se frà  
 Meschina qua e de là!  
 Come la ciga forte!  
 La ga le carne morte,  
 Ossessa l'è sicuro;  
 La dà la testa al muro,  
 La fa mile sberlefi:  
 Oh Dio, che bruti cefi!  
 Sentì .... la se lamenta:  
 Un diavolo sicuro la tormenta.

Essendo allora in settimana santa,  
 Quela zente à deciso tuta quanta,  
 Che a Venèzia la fusse da menar  
 Per farla el zoba santo sconzurar.  
 Eco donca che in bota  
 Qua a Venezia i l'è condota.  
 Apena in chiesa de san Marco intrada  
 Sta povera suposta spiritada,  
 Per delirio fatal,  
 Ghe xe vegnù el so mal,  
 E a cigar la s'è messa;  
 Cussichè tutti l'è credesta ossessa.  
 Uno che sapia sconzurar ghe vol,  
 Et eco Piero Samo barcarìol,  
 Che a forza de cigar  
 Se pretendeva i diavoli scazzar.  
 Avicinà elo donca a la ragazza,  
 Ga dito: Poverazza!  
 Questa xe, no gh'è dubio, spiritada:  
 E fandoghe la crose el l'ha segnada,  
 Disendo: Fora, fora  
 Da la parte de Dio  
 « Scelerato demonio iniquo e rio. »  
 Ma sta ragazza ancora  
 La urlava, la cigava,  
 Che compassion la fava,  
 E sempre el barcarìol co santo zelo  
 Cigava: Fora, fora  
 In to tanta malora  
 « Scelerato demonio iniquo e felo; »  
 E andava via tocando  
 La putà qua e de là de quando in quando.  
 E per qualche mumento  
 L'è andata in svanimento:  
 El che la fava creder liberada,  
 Ma ga dà l'esorcista una vardada,  
 Disendò: no xe vero,  
 La lo ga in corpo tuto quanto intiero.  
 E parlando a quel diavolo co sdegno  
 Ga dito: Vogio un segno;  
 Ti me vol cogionar ma no te credo:  
 No son minchion, e vedo  
 Che in sto corpo ti è ancora:  
 Onde, presto va fora,  
 E dame avanti un segno  
 « Scelerato demonio iniquo e indegno: »  
 In quello dal sopor  
 La s'è come svegiada, ma in furor,

Dando un pugno a sto tal tanto potente,  
 Che ga fato saltar de boca un dente;  
 E co sto segno allora  
 No 'l diavolo, ma el dente è vegnù fora.  
 El creder a sti ossessi veramente  
 No xe degno del secolo corente,  
 Ma un' ignoranza crassa  
 Ancora resta ne la zente bassa.

### EL TUTOR.

Un tutor gavea le intrae  
 Del pupilo consumae.  
 In giudizio a render conto  
 L'è chiamà circa sto ponto.  
 El pupilo, che à cità  
 Sto tutor, cussì à parlà:  
 Mio sior pare m' à lassada  
 Una bela e grossa intrada;  
 El tutor, ch' è qua presente;  
 M' à ridoto senza gnente,  
 Fazzo istanza acì me sia  
 La mia roba risarcia.  
 El sior giudice ( parlando  
 Col tutor ) dise: comando  
 Presentar vu al mio ministro  
 Ogni libro, ogni registro  
 De la spesa, e de l' intrada;  
 Che ogni cossa sia incontrada  
 Per poder co fondamento  
 Dar giudizio in sto argomento.  
 Tuto inteso dal tutor,  
 Trando a parte ogni rossor,  
 El s' à messo in zenochion  
 Dimandando compassion  
 Con el dirghe: ve protesto  
 Che altro libro no ò che questo  
 Che ve mostro: ecolo quà,  
 E la boca el ga mostrà,  
 Soggiungendo, che l' intrada  
 Per de là gera passada;  
 Po, voltandoghe 'l dadrio,  
 Per de qua tuto è sortiq,  
 E se vede dal bilanzo,

Che no gh'è gnente d' avanzo.  
 Mal apena che l' avesse  
 Elo infati le braghesse  
 Per el capo soo più bon;  
 Tanto el gera crapulon!  
 Quando tuto è consumà,  
 Adio conti: xe saldà.

### EL PORCO.

A Mestre un benestante  
 Un bellissimo porco avea arlevà,  
 Che gera de grandezza esorbitante.  
 Un certo so vicin, che avea osservà  
 Sto famoso animal,  
 Ga dito un dì a sto tal:  
 Compare, avè un porcelo  
 Che xe una maravegia, grasso e belo.  
 Ma l' altro ga risposto: amigo mio,  
 Cossa serve che belo e grasso el sia  
 Se quando lo avarò distribuio,  
 La manco parte la sarà la mia?  
 A mie sorele munegehe  
 Ghe ne vol una parte, un' altra al medico;  
 Un' altra a sior piovàn,  
 Un' altra a mio zerman,  
 Un' altra a mia cugnada;  
 E po roba salada  
 Da dar a questo a quello,  
 Cussichè posso dir: adio porcelo.  
 Se savesse trovar qualche pretesto  
 Per scansarme da tuti; oh ve protesto  
 Che molto volentiera lo faria,  
 E tuto quanto mi lo magnaria.  
 L' amigo ga soggiunto: donca mi  
 V' insegnarò el secreto; fè cussì;  
 Via da de qua mandelo,  
 E a chi domanda: dov' è andà el porcelo?  
 Diseghe: el me xe stà  
 L' altra note robà,  
 E cussì sarè esente  
 D' averghe da dar gnente.  
 Bravo! sior sì; pulito,  
 ( Quello dal porco à dito )

Me piase l' invenzion.  
 E darò a sto ricordo esecuzion.  
 Ma ne la note drio da la so zente  
 L' amigo del consulto bravamente  
 Ghe lo à fato robar,  
 E in un paese più lontan mandar.  
 Co la matina è stada,  
 I s' à incontrà uno e l' altro su la strada,  
 E quello dal porcelo  
 Ga dito a l' altro : no savè, fradelo,  
 Che i m' à robà dasseno el temporal?  
 Co la boca ridente  
 Ga l' amigo risposto : tal e qual  
 Gavè da far aponto co la zente.  
 El primo mo zurava e sperzurava  
 Che 'l temporal, pur troppo, ghe mancava.  
 Stralassè de zurar,  
 Ga replicà el secondo, che l' afar  
 So anca mi come l' è, che, amigo mio,  
 Son quel ch' el stratagema à sugerio ;  
 Peraltro questo è 'l modo  
 De far parer che vu parlè sul sodo.  
 Ga tornà da recaò quel dal porcelo  
 A replicar : credelo,  
 No la xe un' invenzion, la è tropo vera,  
 I m' à robà el porcelo geri sera.  
 E l' altro à replicà medemamente :  
 Bravo, amigo, ma bravo veramente,  
 Seguitè pur cussì, che ve protesto  
 Per vero el caso vegnarà credesto.  
 Tornava el primo a protestar zurando,  
 Ma st' altro allora è corso via ridando.  
 Pol la fiaba avertir,  
 « Non ti fidar che non sarai gabbato, »  
 Ma la pol anca dir :  
 « Chi cerca d'ingannar resta ingannato. »

## I DO ORBI.

Xe passà un morbinoso verso sera  
 Per san Filippo-Giacomo,  
 E sul ponte ghe gera  
 Do orbi che cercava la limosina.  
 El xe andà arente a quei,  
 Disendoghe : fradei,  
 Tolé sto mezzo talaro,  
 In pase dividevelo,  
 E recitè el rosario  
 Col Deus in adiutorio  
 Per l'anime del santo purgatorio.  
 Ga dito l' un e l' altro : Dio ghe 'l merita.  
 E dite ste orazion i s' è pensai  
 D' andar a l' osteria, e presto i xe passai  
 A quella del Salvadego,  
 E i s' à fato portar  
 Da beber e magnar.  
 I xe vegnni po al ponto,  
 Che più interessa, de pagar el conto :  
 E questo à dito a quello :  
 Vu, che avè el mezzo talaro, paghelo :  
 Ma l' altro allora ga risposto : vu  
 Paghelo, che sè quello che l' à bù.  
 Ga replicà el secondo : mi no posso  
 Pagar, quando sè vu quel che l' à scosso.  
 Mi no go scosso gnente,  
 Ga tornà a dir el primo francamente.  
 E st' altro allora à dito : sè un bricon  
 Che me yoria truffar. Vu, se un ladron,  
 Ga soggiunto quel' altro, ma no mi.  
 La va dita cussì,  
 Ga tornà questo a quello a replicar,  
 E a forza de incalzàr  
 Ingiurie sora ingiurie i xe arlvai  
 Che i se xe bastonai.  
 Per meterghe de mezzo è corso l' osto,  
 E infati el gh' è riussio, ma a proprio costo :  
 Che anca a lu gh' è tocae  
 Oto o diese legnae.  
 I orbi à capio dopo  
 Come quel tal li avea burlai pur tropo,

Onde a l'osto i ga dito: pagaremo  
 El primo di che nu se vedaremo,  
 E l'osto, omo discreto,  
 Ga ridesto a sta cossa, e à tirà dreto.  
 Mi no aprovo quel scherzo,  
 Che in dano a ridondar vegna del terzo.

## EL PODESTA'.

Terminà el regimento, a un podestà  
 Ga fato da un ragazzo la cità  
 Recitar in latin un'orazion:  
 Ma lu gera un c....  
 Che no capia el latin:  
 L'avea però vicin  
 El cancelier che molto lo intendea,  
 E a lu l'è dimandà, cossa che avea-  
 Dito el ragazzo in pien  
 Co quella so orazion.  
 Risposto à el cancelier, che in conclusion  
 Le lode la contien  
 De la so casa. Infatti  
 Per casa elo intendeva i so antenati,  
 Ma el podestà à capio tuto a roverso,  
 E credea viceverso  
 Che l'intendesse del palazzo dir,  
 Fato da lu da novo costruir.  
 Fenia po l'orazion, dal podestà,  
 Per basarghe la man, el putò è andà,  
 E a questo lu ga dito:  
 Amigo, ve ringrazio che pulito  
 Gavè d'è de le lode a casa mia,  
 Ma bisognà avaria  
 Che visti avessi tuti i mii mezzai,  
 Che ò da novo adobai,  
 Mentre sicuro vu  
 Gaveressi podesto dir de più.  
 E questi gera quei  
 Che andava a governar cità e castei.

## EL PAPAGA'.

Gaveva un papagà  
 Una dona comprà,  
 E questo ghe servia  
 De distrazion qualche ora e compagnia.  
 Col tempo gera bon  
 La lo tegnìa al balcon,  
 E ripeter la ghe fava  
 Quele parole che la ghe insegnava.  
 Un medico passava  
 In quello che insegnava  
 Al piccolo animal  
 Parole, giusto el solito, sta tal.  
*Ti è beco*, ghe disea  
 La dona; e ripetea,  
*Ti è beco*, el papagà;  
 E 'l medico a sentirlo s'è fermà,  
 Vedendo ela el dottor  
 Fermà, videva de cuor,  
 Pensando che 'l credesse,  
 Che a lu el so papagà, *beco* disesse.  
 El medico mo acorto,  
 De questo s'è inacorto,  
 E co le quiete allora  
 Ga dito francamente a la signora;  
 Parona, vu ridè,  
 Ma no savè 'l perchè  
*Beco* el me diga; ond'eco  
 A dirve mi perchè 'l me chiama *beco*;  
 El tien elo in pensier  
 Che vu siè mia muger.  
 Co sta so bizzaria  
 L'è tratada el dottor da buzevia.  
 Qualche volta è pungente  
 Anca el scherzo innocente.

## L'ASENO.

Un contadin da un so compare è andà  
 A ricercarghe in prestio el so somaro  
 Per andar al marcà ;  
 E l'altro dito ga : compare caro,  
 Mi volentiera ve faria el piacer,  
 Ma con mio dispiacer  
 No ve posso servir, cha a un mio vicin  
 L'ò dovudo imprestar  
 Per andar al molin.  
 In sto mentre mo l' aseno a ragiar  
 S' à messo a una maniera  
 Che à fatto ben capir che in stala el gera.  
 Come ò da creder mai, compare mio,  
 El primo à replicà, co l' à sentio  
 Mo l' aseno a ragiar, che veramente  
 Lo abiè imprestà a nissun, quando el se sente  
 Anzi adesso a ragiar ? L' altro à sogionto :  
 O la sarave bela che in confronto  
 De l' aseno, compare, me metessi,  
 E che piuttosto a lu che a mi credessi !  
 No ocore replicar  
 A l' omo che servizio no vol far.

## EL GARZON FURLAN.

Tre zoveni bizzari avea osservà  
 Che un furlan per garzon a un' osteria  
 Da pochi zorni gera stà impiegà,  
 E in testa gh' è vegnù sta bizzaria,  
 D' aspetar che 'l paron fusse lontan  
 Per far una burlata a sto furlan.  
 Entrai ne l' osteria donca al garzon  
 I à dito, de voler lori disnar ;  
 E lu li à ben servii con atenzion,  
 Perchè i avesse contenti da restar.  
 Infati à magnà questi a crepapanza  
 Senza, per cussì dir, che roba avanza.  
 Portà po el conto, uno de lori à dito,  
 (Siben che 'l conto fusse assae indiscretto)  
 A sto garzon : ti n' à servio pulito,  
 E se vede de più che ti è discreto,

Donca è dover pagarte' intieramente,  
 Anzi la bonaman donarte arente.  
 E tolta in man la borsa à fato veder  
 Che l' avea dei zechini e dei ducati,  
 Disendo : amici, no vorè recreder  
 Che mi paga per tuti, perchè infati  
 Toca pagar a mi, mentre a disuar  
 L' altro zorno son stà senza pagar.  
 Sior no, el secondo à dito, no convien,  
 Nè mai permetarò che vu paghè,  
 Gavè pagà altre volte, e no va ben  
 Che sempre a l' osteria ne superchiè.  
 El terzo francamente à po sogionto :  
 A mi toca a pagar, amici, el conto ;  
 O' magnà a vostre spese i di passai,  
 E dopo tante volte toca a mi.  
 El primo rispondea : no sarà mai ;  
 E questionando i andava via cussì.  
 Infìn quel altro à dito : la question  
 Decida donca, amici, sto garzon.  
 E voltandose a lu : caro fradelo,  
 Fenissi ti sto afar ; te bindaremo  
 Col fazzoletto i ochi, aciò, che quello  
 Che ti ti chiaparà, mentre saremo  
 Intanto qua aspetando quieti e muti.  
 Abia elo solo da pagar per tuti.  
 Persuasò el garzon, senza rifleter  
 A quel che pòdea nascer, e ch' è nato,  
 S' à lassà ai ochi el fazzoletto meter,  
 E mentre ch' elo andava via de fato  
 Cercando qua e de là chiapar qualcun,  
 Da l' osteria bel belo è scampà ognun.  
 Xe arivà in quel mumento el so paron,  
 Che gnente no saveva de sto afar,  
 Urtando senza acorzerse el garzon,  
 El qual mo supponendo de chiapar  
 Un de quei tre, ga chiapà aponto lu,  
 Disendoghe : pagar ve toça a vu.  
 O pofardio ! credarò ben de sì,  
 Informà de la cossa, à dito l' osto,  
 Che pagar, sior miuchion, me toça a mi.  
 Vostro dano, mi gavarìa risposto :  
 No bisogna fidarse dei garzoni,  
 Ai negozi à da tender i paroni.

## EL MEDICO.

Se trovava in Bassan

Un omo morbinoso e cortesan  
Che aveva el naso estremamente grandò,  
Che a quanti lo vedea  
Maravegia grandissima el facea.

Un dì, che caminando

L' andava per cità  
Un dottor l' à incontrà  
A caval d' una mula, che fermada  
In mezzo de la strada  
No volea caminar  
Per quanto' che 'l dottor tentasse far.  
Onde, cussì scherzando,  
Ga dito el morbinoso ( recordandose  
De aver el naso grandò )  
Seu vu, dottor, o xe la mula, a caso,  
Che se fizza paura del mio naso ?

El dottor gera anch' elo

De bizzaro cervelo,  
E risposto imediate el ga cussì :  
Credo infati esser mi  
Quelo che s' à ispaurio,  
Che me sento un prurito in tel da drio.  
L' omo che vol scherzar  
Anca lu deve el scherzo tolerar.

## EL VENTO.

In un certo casin de compagnia

Una ventosità bela e sonor a  
Ga trato una signora.  
E sicome diversi l' à sentia,  
Ghe xe vegnù, ch' è natural, sul viso  
Do rossi a l' improvviso ;  
Ma supponendo de poder far creder  
Che fusse stà el strissar del careghin,  
Che la gera sentada, e no el martin  
Chè à sonà la trombata,

La andava via movendose,  
Strissando el careghin, malizioseta.  
Ma morbinoso el cavalier servente,  
Che ghe gera d' arente,  
Ga dito : la pol far  
Cussì quanto ghe par,  
Ma mai la arivarà  
A far come che prima fato l' à,  
E à savesto la cossa in sta maniera  
Anca quei che inacorti no se gera.  
Per voler ocultar certe cossete  
Più in vista le se mete.

## LA COA TAGIADA.

Un zovene una volta se trovava

In palazzo a san Marco, dove i fava  
El placito d' un tal che avea scanada  
Un' infelice dona sfortunada ,  
E come ne la calca de la zente  
Se trova anca dei ladri, da prudente  
L' à assicurà i relogi, avendo messe  
Le do caene drento in le braghese ;  
E stando co le mau ne le scarsele  
De la velada, custodiva in quele  
Do fazzoleti, un bianco, un de color,  
E ascoltava tranquilo l' orator.

Un putazzo, che a lu gera vicino,

Ga dito verso un altro: saveu quanti  
In sta sala birbanti  
Vien per robar i fazzoleti, e fin  
Anca i relogi; e stassela pur là,  
L' altro risposto ga :  
Ma tanti anca ghe xe che vien a far  
Baronae d' altro andar :  
A un signor, giusto geri,  
No so se vu ghe geri;  
I ga tagià la coa  
Longa sie bone quarte, e tuta soa,  
Che no ve digo gnente  
Quanto l' era furente!

El zovene, sentio sto tal racconto,

Chè anch' elo avea una coa de qualche conto,  
Per poderse salvar anca da questo,

Da la scarsela à tirà fora presto  
 Una man, e s' à messo  
 La coa davanti, e nel mumento istesso  
 L'è tornà co la man ne la scarsela.  
 No l' à trovà più in quella  
 El fazzoletto che ghe gera avanti,  
 Che robà ghe l'aveva quei do birbanti.  
 Sorpreso l' è restà, ma l' à ridesto,  
 Perchè infati da rider caso è questo.  
 Gh' è certe baronae  
 Che andaria, son per dir, squasi premiae.

## EL CONTADIN E L'ASENO.

Andava un contadin con un so fio  
 Una volta al marcà,  
 Un aseno menando co eli drio.  
 Alcuni che per strada li à incontrai  
 Ghe disea : mo che alochi se dà mai ?  
 Mentre un aseno i ga  
 Da poderge a cavallo su montar,  
 I se sfadiga invece a caminar.  
 El vechio, sentio questo,  
 De l'aseno a cavallo è montà presto ;  
 Ma strada po facendo  
 Ghe andava de le femene disendo :  
 Oh che vechio indiscreto!  
 Lassar che quel ragazzo, povareto,  
 A pie ghe cora drio :  
 E lu desmonta e fa montar so fio.  
 Ma fati cento passi malàpeña  
 Dei vechi ghe tentena,  
 Come gera vergogna che un putazzo,  
 Che bone gambe avea per caminar,  
 Se facesse da l'aseno portar,  
 E che 'l vechio gramazzo  
 Andasse a pie. El vechio donca anch' elo  
 A caval xe montà del somarelo ;  
 E alora tuti scomenzava a dir :  
 Povera bestia ! i la vol far morir ;  
 Nè savea, poverin,  
 Come più regolarsse el contadin.  
 Da l' altra parte ghe premea che l'aseno  
 Fresco al marcà arivasse, onde el se imagina

*Racc. Poes. Ven.*

De ligarghe le gambe, e a picolon  
 Portarlo, pare e fio, con el baston.  
 A sta scena ridicola  
 Lo fischjava la zente,  
 Disendo : bel agnelo veramente  
 Da portar col baston ! e disparà.  
 Gæ dito el contadin : no ghe sarà  
 Maniera donca de poder far taser  
 Le male lengue ? co la xe cussi  
 Sarà megio che mi  
 Fazza come che vogio a modo mio,  
 E che i me tetà pur in tel da drio :  
 Onde l'aseno alora desligà  
 Caminar come prima el l' à lassà,  
 Senza più mai badar  
 De la zente molesta el chiacolar.  
 No badar a maligni nè a ignoranti,  
 Fa ben, e lassa dir a tuti quanti.

## EL POSTIGLION.

Una munega in vila questuando  
 Andava qua e de là col somarelo,  
 Formento e sorgoturco dimandando  
 Per el proprio convento a questo a quello.  
 Ga dà la bestia un forte scapuzzon  
 E xe cascada in tera a tombolon.  
 La madre reverenda,  
 Che gera imbarazzada a sta facenda,  
 Compassionava el povero animal  
 Col dir : meschin te xestu fato mal ?  
 « Levite suso via,  
 Povera bestia mia. »  
 Nè l'aseno levava  
 E la munega ancora replicava :  
 « Levite suso via,  
 Povera bestia mia ; »  
 Ma manco quella bestia se moveva,  
 E la madre da novo ripeteva :  
 « Levite suso via,  
 Povera bestia mia ;  
 Levite su, » la ghe diseva ancora,  
 Ma no levava l'aseno gnancora.  
 Xe passà in quel mumento un postiglion,

E la munega vista in sta funzion  
 Ga dito: madre, la me lassa far  
 A mi che suso lo farò levar;  
 La osserva el bel secreto,  
 Che deve far l'efeto.  
 E tolto alora in man un baston grosso  
 Ga dà diese legnae zo per el dosso,  
 Biastemando a la solita so usanza  
 E l'aseno po alora co creanza  
 In pressa è levà suso,  
 Da gentilezza tal tropo confuso,  
 E persuaso apien  
 Che a retorica tal ceder conven:  
 Se vince col baston,  
 Se le bone no val, l'ustinazion.

#### EL ZARLATAN.

Ghe gera un zarlatan che nel contar  
 Istorie dei so viaggi avea el difeto  
 De falope grandissime sbarar,  
 Che gnanca no se trova in Riciardeto;

L'è pensà de volerse moderar,  
 Ordinando al so servo per sto ogeto,  
 Che quando el lo sentisse a esagerar  
 Ghe tirasse el gaban; onde in efeto

Disendo un dì d'aver trovà un lion  
 Che gaveva una coa longa tre mia,  
 El servitor ga dà presto un tiron;

E lu à calà d'un mio, e andando via  
 Un tirando, un calando, in conclusion,  
 Che l'era senza coa ghe sovegnia.  
 Ste tiron ghe voria,  
 Amigo, anca per vu quando parlè,  
 Perchè altro mai che slape no contè.

#### LA FORMIGOLA.

Un pare coregeva el proprio fio,  
 El qual a altro atento, che badar  
 A le paterne voci, gera drio  
 Le formigole in tera a numerar.

Cossa pensistu, à dito el pare, mai?  
 Vedendolo aplicà coi ochi a tera;  
 Te vergognistu sì dei to pecai?  
 E ga risposto el fiol, ilare in ciera:

Stava, signor pare mio, pensando suso,  
 Che una sola formigola, che drento  
 Fusse entrata co l'altre là in quel buso,  
 La vegniva a formar le cinquecento.

Ben da questo se pol la deduzion  
 Formar, quanto che i pari sia ascoltai  
 Dai fioi, quando i ghe fa la corezion,  
 Dal paterno so amor infervorai.





# POESIE

DI

BENEDETTO GIOVANELLI.

---

AL CONTE

ALESSANDRO PEPOLI

FAMOSO AURIGA.

Se 'l povero Fetonte fusse stà  
Capace come vu nel parar via,  
I sturioni del Po no gavarìa  
L'ingorda fame a spale sòe sazià.

Mi mo, che vanto sèmpe verità,  
E che adular nissun mai podaria,  
Sentì per mia opinion quel che diria  
Su la vostra famosa abilità.

Diria donca, che credo fermamente  
Che quello de Fetonte, no sicuro,  
Ma succedeva un altro inconveniente ;

Che a forza de scuriar e tegnir duro,  
Come ve vedo far presentemente,  
Ne fevi star quatr'ore prima a scuro.

CONTRO UN OMO

DE TESTA MOLTO GROSSA E TONDA.

*El sogno.*

Sogno curioso, ti xe tanto belo  
Che te voi far saver a tuto el mondo!  
No gh'è poeta, no ghe xe penelo  
Che scriva, o che depenza, el to secondo!

Quel che ne passa el dì per el cervelo  
De ben, de mal, de tristo e de giocondo,  
Se lo sognemo che nol par più quello,  
Ma co 'l se cerca el se ghe trova in fondo.

Sentime, e capirè dal sogno mio  
Gera Vicenzo avanti, e mi da drio;  
Se so andà arente al vero, o se lontan.

Coro, lo avanzo, e po dopo pian pian  
Lo chiapo per el muso; el ciga, oh dio!  
Me desmissio, e me trovo el culo in man.

PER

## LA CELEBRE CANTATRICE TODI.

Se a perder mai ti fussi un di costreto  
 (Un amigo mio caro me domanda)  
 O la vista o l'udito, da che banda  
 Scielgeressistu el mal, caro Beneto?

Senza pensarghe su gnanca un pochetto:  
 La vista, digo, xe una cossa granda,  
 Perchè l'è quella che ogni tanto manda  
 Nove delizie al cuor, novo diletto.

Merita pur l'udito esser stimà,  
 Ch'anca per quello el cuor dei gusti sente,  
 Ma l'occhio xe da tuti più apprezzà.

Go risposto cassi bonariamente;  
 Ma adesso che la Todi m'ha cantà  
 Stimo l'udito più infinitamente.

## LA MISERA CONDIZION

DE L'OMO.

Chi podesse pesar su la balanza  
 Tutti i afeti umani e le passion,  
 E tegnir una esata anotazion  
 Dei gradi de dolor e d'esultanza,

Vedarave che sempre i primi avanza  
 In peso, in forza e in continuazion;  
 E che pesa del mal più l'opinion  
 De quello che ogni ben pesa in sostanza.

Se, per esempio, ve sovrasta un dano,  
 Che realizzà ve ridurave a morte,  
 Ma che se sfanta è rende el timor vano,

L'è un gran piacer, xe vero, una gran sorte,  
 Ma col confronto del soferto afano  
 No gli'è comparazion, xe el mal più forte.

## CONTRO LA TRAGEDIA.

Voleu saver come se fa a tradir?  
 Bramaressi mazzar vostro sior pare?  
 Odiar voressi vostra siora mare  
 Senza che mai v'avessi da pentir?

Veder voleu come se fa a morir  
 Per no più soportar vicende amare?  
 Inclinaressi a far che da le bare  
 L'ombre le so razon vegnisse a dir?

Amaressi formar una congiura  
 Contro uno al qual gavessi obligazion?  
 Ve insegnarò la strada più sicura:

A la tragedia andè. Tutta sta union  
 De cosse che fa fremer la natura  
 La xe d'ogni tragedia e 'l belo e 'l bon.

## CONTRO CERTO SIMON

MAL VISTO DAL POETA.

Se el Rabi da chi studia xe stimà  
 Per dir in cento modi una parola,  
 Xe certo che assae più meritarà  
 Chi ghe ne dise cento in una sola;

E se chi studia a quello xe obligà,  
 Sta scienza nova ga da far più gola,  
 Perchè con questa certo el troverà  
 La brevità che piase e che consola.

Se per esempio volè dir Simon  
 Grasso, gregugna, grossolan, astuto,  
 Superbo, mato, traditor, bufon,

Bevagno, crapulon, bestia da struto,  
 Dotor busiaro, putanier, poltron,  
 Disè Simon che avarè dito tuto.

## PROPONIMENTO DE L' AUTOR.

Penso de no voler mai più pensar  
A cosse che me daga dispiacer,  
E fermo penso de mai più voler,  
Per quanto mal suceda, disparar.

Voi divertirme, beber e magnar,  
Voi sempre rider, sempre voi goder,  
Nè in altro doparar vogio el pensier  
Che in cercar gusti novi d' imparar.

Cassì son certo de mai più sentir  
Nissunissima sorte de dolor  
Su quel che nasce e quel che pol vegnir ....

Ma rifletendo ben su sto tenor;  
Podarogio in sta impresa riuscir?  
Dubito se no cambio e testa e cuor.

PER L' INCENDIO NATO

NE LA CONTRADA DE S. MARCUOLA.

SONETO

*estemporaneo a rime date.*

|                                |        |
|--------------------------------|--------|
| Dove trovar qua zo in sta tera | Pase?  |
| Cossa vol dir son bon, a tuti  | Piaso, |
| Go campagne, go fabriche, go   | Case,  |
| Ancuo vesto vigogna, e doman   | Raso?  |

|                                    |       |
|------------------------------------|-------|
| Se quando manco penso, e che in mi | Tase  |
| El sospeto, el timor, oh dio, che  | Caso! |
| Vedo con mio dolor a tera          | Rase  |
| Cinquanta case in t' un supiar de  | Naso. |

|                               |         |
|-------------------------------|---------|
| El fogo a san Marcuola xe     | Vegnuo, |
| E fa che tanti gramì no       | Vorave  |
| Esser al mondo certo al dì d' | Ancuo.  |

|                                |         |
|--------------------------------|---------|
| Se gavesse da dir, per mi      | Dirave, |
| Che no vorave gnanca esser     | Nassuo, |
| O se nato, esser pomi o peri o | Rave.   |



# POESIE

D I

PIETRO SALA.

## ARGOMENTO

SE SIA PIÙ PREGIEVOLE LA MEMORIA

O LA FANTASIA.

*Patres conscripti* .... volea dir, compagni,  
So qua anca mi per dirve su la mia  
Senza andar a tor volta a tanti piagni.  
Sta question donca se vol definia :  
*Quaeritur an* .... lassemo da una banda ....  
Se vagia più memoria o fantasia ?  
Senti .... Mercurio zo d' Olimpo manda  
Un certo enciclopedico giornal,  
Un zechineto a l' ano a chi 'l comanda.  
In st' opera pienissima de sal  
Una cossa a proposito go leto,  
Cavada da un articolo moral.  
Scrive un autor (che 'l nome no ghe meto)  
Che fra la dea Minerva e 'l biondo Apollo  
Un dì gh'è stà un contrasto maledeto.  
I se n' à dito a rotazza de colo  
Per sta istessa istessissima question ;  
Che deboto i volea tirarse el colo !  
I avea principià a dir la so opinion ;  
Da l' opinion i xe passai ai strapazzi,  
Come fa i frati ne le conclusion.

Apolo, che xe el re dei omenazzi,  
Porta la fantasia ; e la memoria  
Minerva la sostien coi piè, coi brazzi ;  
Ma Giove dise : « cossa xe sta istoria ?  
Quieteve che doman nel tribunal  
Vogio decider mi de la vittoria. »  
Alora co un eviva universal  
Tuti ga fato aplauso a sto bel dèto,  
Fina Marte quel dio tanto bestial !  
Come in stecato al salto del toreto  
Se aspeta la sentenza tra do càh,  
Che ai paroni ghe bate el cuor in peto,  
Cussi a sti dei ; ma sin che vien doman  
Tuti do se prepara a la difesa  
Con Bartolo, con Baldo e Giustinian.  
Dei numi tuto el resto in sta contesa  
Chi tien da questo e chi da quel partio,  
Secondo che la cossa vien intesa.  
Venere a spada trata porta el dio,  
Che l'è omo, l'è belo, l'è poeta ;  
E po per far dispeto a so mario.  
Marte, che no ghen dà una maledeta,  
El pare de le muse el porta anch'elo  
Per do parole de la moroseta.  
Diana a rason sostenta so fradelo ;  
Cerere e Teti porta el dio del zorno,  
Insieme con Cupido el bon putelo.  
Saturno co la gota e 'l capo storno,  
Pluton, che no sa gnanca l' A B C  
I dise : a mi no me n' importa un corno.

Mercurio de le birbe par el re,  
 El fa 'l belin a tuti, e 'l li minchiona,  
 Che solo per chi vince lu ghe xe.  
 Ma Giunon, la superba b.....a,  
 Se ben la se ricorda de quel pomo,  
 Pur a Minerva protezion la dona.  
 Baco, el zoto Vulcan, Netuno e Momo  
 Da la nemiga i tien del matrimonio ;  
 Saveu perchè? perchè no la xe un omo.  
 Ma sentì se quel zoto xe un demonio :  
 El ga tirà la diva in t'un canton  
 Per ricordarghe el fato d'Eritonio.  
 L'Aurora intanto vien verso el balcon  
 E la se mete su una cotoleta,  
 Lassando in leto so mario Titon ;  
 Quando sior Ganimede in freta in freta  
 Le porte averze del real palazzo  
 Ai litiganti che xe là che aspetta.  
 Minerva vien co i so sapienti a mazzo,  
 Vergine onesta, alquanto muso duro,  
 Co l'asta in man e col so scudo al braccio.  
 Platon in fra i filosofi figuro,  
 Pitagora l'amigo de le fave,  
 Che caza via l'incredulo Epicuro ;  
 Aristotele vien pensoso e grave,  
 Socrate va spuando la cicuta,  
 E una mugier più docile vorave.  
 La razza filosofica gh'è tuta,  
 Ma vedo in quella certe teste mate,  
 Che no sta gnente ben co quella puta.  
 Vien po fra le persone leterate  
 Quel Ciceron che i ga tagià la testa,  
 Quel Plinio che ga perso le zavate.  
 Quel, ih ih ! .... ma tanti a nominarghe resta  
 Che no se conta tante stele in cielo,  
 Nè l'istà tanti grani de tempesta !  
 Intanto xe qua Apolo, e vien con elo  
 I poeti e le muse, e una genia,  
 Che a Omero faria perder el cervelo ;  
 E giusto l'orbo Omero eco vien via,  
 Pindaro a dreta, a manca Anacreonte,  
 E Lin e Orfeo che i ghe fa compagnia.  
 Vegnia el cavalo de Belerofonte,  
 Ma perchè el gera zoto un pie davanti  
 L'è restà a far la guardia al sacro monte.  
 Virgilio fra i latini vien davanti,  
 E Orazio favorito de un monarca,  
 E Ovidio doto maestro de amanti ;

E quel toscan che con Virgilio in barca  
 Le bolge de l'inferno el sta zirando,  
 E monsignor canonico Petrarca.  
 El gran cigno del Po cantor d'Orlando  
 Xe arente al malinconico Torquato,  
 Che forse el mondo no ga bu el più grande.  
 Largo, largo. Eco Alcide, eco qua el mato,  
 Che precede el vegnir del gran tonante:  
 Che largo in un mumento che i ga fato !  
 Come quando che 'l sol sponta in levante,  
 Portando a l'universo el so splendor,  
 Le stele ghe dà logo tute quante ;  
 Cussì anca a Giove ; no gh'è dio minor ;  
 Che no ghe fizza riverenze e inchini,  
 E no pieghi el zenochio a farghe onor ;  
 E lu con modi afabili e divini  
 Va a sentarse sul trono ; e tuti lori  
 Se ghe senta per ordine vicini.  
 Po voltà ai litiganti, el dise : « siori,  
 Son qua per pronunziar la mia sentenza,  
 Via vegni qua, za so che sè dotori. »  
 Apolo, che xe pien de convenienza,  
 Fa noto a Pala che la se presenti.  
 Ela principia co una riverenza :  
 « Padre e signor de le increate menti  
 Se mai .... » ma Giove ghe risponde : « mata,  
 Animo presto e senza complimenti.  
 — Donca, la dise, padre qua se trata  
 Che decidè per vostra e per mia gloria  
 D'una question che la me par spacata.  
 Tolè pur per le man tuta l'istoria,  
 E vedarè che no gh'è arte o scienza  
 Che no abia relazion co la memoria.  
 Se a l'anima mancasse sta potenza,  
 Cossa ghe giova el so discernimento ?  
 Caveghene po vu la conseguenza.  
 Ergo xe chiaro in forza d'argomento,  
 Che solo in sta fedel depositaria  
 L'inteleto ga tuto el fondamento.  
 La memoria xe tanto necessaria  
 Al nume, a l'omo, e fin al bruto istesso  
 Quanto l'acqua, la tera, el fogo e l'aria.  
 Mi no ve vogio andar secando adesso  
 Col farvene a puntin la notomia  
 Per no abusar del termine permesso ;  
 Infìn po cossa xe sta fantasia ?  
 Sta fantasia, che ancuo co mi contrasta,  
 Xe sorela carnal de la pazzia.

A ela nei so svoli tanto vasta,  
 A ela no ghe xe gnente de scuro,  
 E i limiti prescritti no ghe basta.  
 El presente e 'l passà missia al futuro,  
 E tanto la confonde l' inteletto  
 Che a volte a giudicar no l' è sicuro ;  
 Donca le mie rason in vu rimeto ;  
 So che son fia del vostro gran cervelo,  
 Padre e signor, la gran sentenza aspeto. »  
 Ma Apolo salta su : « siora, bel belo,  
 El dise, no stè a farne el brutto muso ;  
 Forsi credeu d' aver catà un putelo ?  
 Forsi credeu che sia restà confuso ?  
 O penseu forsi de cazzarme in sacco ?  
 Comare, a ste marende ghe son uso,  
 E sul vostro parlar giusto me tacco, »  
 Qua el fa un inchin ai numi e al somo Giove ;  
 E po el scomenza a dir : « sangue de baco,  
 Domando mi, quando un ogeto move  
 Un qualche senso esterno a contemplarlo,  
 Lo porta el senso in fantasia, o pur dove ?  
 Toca a la fantasia l'imaginarlo,  
 Ela xe che 'l depenze a l' inteletto,  
 E toca a la memoria el conservarlo.  
 Donca me sembra de mostrarve schieto,  
 Che se mancasse mai la fantasia,  
 Sta vostra gran memoria va in broeto.  
 E cossa serve che me vegni via  
 Col dir che no gh'è scienzia o arte al mondo,  
 Che parto de memoria no la sia ?  
 E mi, comare cara, ve rispondo,  
 Ch' anzi la fantasia xe giusto quela ;  
 E vel mostro co un fato neto e tondo.  
 Disè, per carità, cara sorela,  
 In t' un quadro de Paolo o de Tizian  
 Ga el merito el pitor o pur la tela ?  
 No basta ; ma anca st' altra vien drio man :  
 Quando sentì un concerto de violin  
 Ga merito la corda o pur la man ?  
 Che se col dirme, no la ga confin,  
 Avè preteso de vituperarla,  
 Rispondo, che 'l xe un pregio anzi divin.  
 Vu la memoria sè intrigà a provarla

A l' omo necessaria, al nume, al brutto,  
 Perchè el senso comun contrario parla  
 Se ai numi eterni gh'è presente tuto,  
 Se per lori no gh'è tempo passà,  
 Donca dove fondeu sto vostro agiuto ?  
 Se el brutto da l'istinto xe guidà,  
 Dove fondeu sto vostro beneficio ?  
 Dove fondeu sta gran necessità ?  
 Se l' omo xe un composto d' ogni vizio,  
 Se la memoria serve de ricordo,  
 Lu ve ne indorme de sto bel servizio.  
 Su questo basta ; adesso volto bordo,  
 E fin col vostro dir ve voi provare  
 Che vu istessa co mi za andè d' accordo.  
 El somo Giove no elo vostro pare ?  
 La fantasia xe la so essenza prima,  
 Donca la fantasia xe vostra mare ;  
 Ma cossa serve che 'l cervel me lima  
 A provar una rason tanto evidente,  
 Che a contrastarla vu perdè la stima ? »  
 Minerva, che becada la se sente,  
 E che la gera un tautineto stufa,  
 Una brespa no ga da che far gnente !  
 La strenze i denti, la biastema e sbufa ;  
 Ma Giove che a la larga el se n' à incorto,  
 El dise : « Oe, seu vegnui per far barufa ?  
 Fia, el so, le done mai vol aver torto ;  
 E ti, che per parlar ti è un capo d' opera,  
 Ti vol rason o per dreto o per storto.  
 Apolo, che ti è un omo in verbo ed opera,  
 Fa a mio modo, sta volta daghe el vanto ;  
 Che se sol dir: chi à più giudizio el dopera. »  
 Tuti se quieta, e comparisce intanto  
 Ganimede con goti e gotesini  
 De ambrosia, che la gera mo un incanto !  
 Le dee con quei so amabili bochini  
 Andava sorsegiandola a bel belo,  
 E le sfocava prindesi divini.  
 Baco ghe n' à bevù più d' un mastelo,  
 E fin Minerva, che del vin xe astemia,  
 Col goto che ga sporto el dio de Delo  
 Un prindese l' à fato a st' academia.

# POESIE

D I.

## PIRRO TEOZZI.

### EL ZARLATAN

#### NOVELA.

In Nankin, gran cità,  
Un dì xe stà tacà  
Sto manifesto,  
Scrito in arcicruschevole toscan,  
Ma che mi lo tradugo in Venezian.  
Presso a poco el contegniva questo :

« El famoso Tita Furta,  
Arlevà da Gambacarta,  
El xe stà de qua e de là  
Dei so simili per ben,  
E in Nankin adesso el vien  
A portar la sanità,  
Nè se trova malatia  
Che nol sapia mandar via.  
El fa impiastri, el fa saroti,  
Per guarir da tuti i mali,  
L'ogio el ga per i ossi roti,  
El saroto per i cali,  
El guarisce le buganze  
Col siropo de naranze,  
Per le sterili el sa far  
Certe pilole famose,  
Che le fa presto ingrossar,

*Racc. Poes. Ven.*

Tanto vechie quanto tose,  
E a quel' altre che paura  
Le se sente a partorir  
Co un ordegno el le assicura  
De saverle isterilir.  
A quei mali che fa spizza  
In tre zorni el ghe la schizza  
Con el late de capon,  
Che a guarir sti mali è bon.  
Co un specifico famoso  
Da la gota lu guarisce;  
L'ulceroso, el cancrenoso,  
Soto lu in do di sparisce ;  
Co l'elastico el fa cinti,  
Cava denti a l'uso inglese,  
E 'l li mete a chi vol finti,  
Ma bei, forti, a la francese;  
I orbi vegna, i sordi, i muti,  
Quei che sofre el bruto mal,  
Vegna tuto un ospeal,  
Lu guarir s' impegna tuti.  
Ma per altro sti secreti,  
Benchè i sia certi e perfeti,  
El li calcola pocheto  
Se 'l li vol paragonar  
A un mirabile secreto  
Che farà traseccolar.  
Questo è un' acqua sorprendente,  
Acquavita veramente,  
Chi con quella un morto spruzza

Va via subito la spuzza,  
 Po del moto se ghe suscita ;  
 Curte; el morto ghe ressuscita.  
 De mil' omeni e anca più  
 I atestati el ga con lu,  
 De so man tuti segnai  
 Dopo ch' i è ressuscitai.  
 E per prova evidentissima  
 Che la cossa sia verissima  
 Drento un mese el verzirà  
 Sepulture e monumenti,  
 E in Nankin se vedarà  
 Uno no, cento portenti.  
 E i signori del paese,  
 S' anca xe dei ani assai  
 Ch' i sia morti, drento el mese  
 I sarà ressuscitai.  
 El stà in fazza la crosera  
 A l'albergo *la Massera.* »

Sto aviso a andar atorno à scomenzà,  
 E i siori Nankinesi,  
 Come tant' altri in tanti altri paesi,  
 Che crede le fandonie verità,  
 Xe corsi a casa de sto professor  
 Per saver se 'l sia un aseno o un dotor,  
 E i ga dito: signor, la diga, è vero  
 Ch' ela la cava i morti d' ani tanti  
 Fora del cimitero  
 Forti e robusti come i gera avanti?  
 Lu à risposto: le leza qua e le veda,  
 E a mi no le me creda,  
 Le creda a sti atestati  
 De quei che mi go ressuscitai,  
 E che de proprio pugno i me li à fati  
 Essendome obligai.  
 Le osserva pur, cussì le vedarà  
 Se busie mi ghe diga o verità.  
 Eco, le leza qua :  
 « Io marchese - di Roca Fiorita  
 La mia vita - la debbo all' uom dotto,  
 Che di sotto - alla tomba l' uom toglie,  
 Senza doglie - esser sano m' avvidi,  
 Era morto - risorto - mi vidi. »  
 Eco un altro .... « Io duchessa dal Prato,  
 Dallo stato - letale di morte,  
 Dove sorte - crudele cacciommi,  
 Liberommi - il grand' uom che gli spenti

Fa viventi - e mi vidi risorta.  
 Dopo morta - da diecidott' anni  
 Pei malanni - che un tal mi donò,  
 Ma giuliva - io son viva - ed ei no. »  
 Eco un terzo del principe de Alton ....  
 E no serve, i risponde, no paron,  
 S' à visto quanto basta.  
 E a la so abilità nissun contrasta.  
 I va via incocalii,  
 Sorpresi, sbalordii,  
 E i principali, apena che fa scuro,  
 Per esser al sicuro  
 Se racolge in secreto quanti i xe  
 In un ritiratissimo cafe.  
 Che fracasso de zente !  
 D' ogni età, d' ogni sesso,  
 In trenta i vol parlar, nissun se sente  
 In quel tamulquosissimo consesso.  
 Uno cria in t' un canton :  
 Cospeto de Pluton,  
 Stago ben se ressuscita mio barba,  
*Recipe* mesatina,  
 E baso de la man sera e matina.  
 Sta visita, per sbrio, no la me garba.  
 Un altro sbragia: mi son consolà!  
 Povero gramo, mi ch' ò eredità  
 Dal missier che xe morto a l' improvviso,  
 Che mai me dava un traro  
 Quel tegna, quel' avaro.  
 Eh ch' el resta a l' inferno ... o in paradiso....  
 Un terzo estatico  
 Al ciel voltandose  
 Dise : carissima  
 Mnger vechissima,  
 Ti favi stomego,  
 Pur i to talari  
 I m' à incantà ;  
 Quei m' à dà stimolo,  
 Quei m' à inzucà,  
 Quei rason unica  
 Che t' ò sposà.  
 No, no ressuscita,  
 Resta pur là,  
 Lassime vedoo  
 Per carità.  
 Va un altro da so posta brontolando :  
 Corpo de baco, ancuo son ofizial.  
 Se i morti va costu ressuscitando



Torno sargente e forsi caporal;  
 E che la stagà là, perchè sicuro  
 Se va avanti sto afar torno tambaro.  
 Trenta se fa sentir,  
 Squasi nissun capir.  
 Diese se sente dir: e mi, e mi,  
 Che l'è cussì, e cussì.  
 Altri vintì a sbragiar: senti, ascolte  
 De mi come la xe.  
 Co una vose da toro alfin un cria:  
 Via tasè, pofardia!  
 E un drio l'altro parlemo  
 Se volè che qualcossa decidemo.  
 Sta sbragiada improvisa de sto tal  
 Xe seguita da un silenzio universal.  
 Allora el dise la tranquillamente:  
 Qua semè in tanta zeute  
 Chiamai da la paura,  
 Che qualche morto tornà in carne e in pele,  
 Sortindo vivo da la sepoltura  
 El ne vegna a secar le tavarnele;  
 Ma pur in tanti e tanti  
 Chi d'un tal morto, e chi d'un altro teme,  
 Perchè avemo motivi in fondo oposti.  
 Se andar volemo avanti,  
 (Posto che semo tuti quanti insieme)  
 Separemos quieti in tanti posti,  
 E cercando chi à simile rason  
 Coi compagni se unissa in t' un canton,  
 E co sta division fata gavè,  
 E che ogni causa la sarà raccolta  
 Da ogni circolo, alor quanti volè  
 Deputè de parlar uno a la volta.  
 A tuti la ga piasso sta opinion,  
 E i l' à adotada per acclamazion;  
 E per mostrar che ben l' avea disposto  
 I va un drio l' altro a scielgerse el so posto.  
 In t' un circolo i ricchi va e i signori,  
 Che trema che ghe torna i compatroni;  
 Va in t' un altro le cariche e i priori,  
 Che perder no vorave i sedioloni.  
 Qua poeti moderni e professori,  
 Che ga paura de parer minchioni;  
 De là ghe xe fin qualche camarier,  
 Che ga el spaghetto de tornar stafier.  
 Là un circolo ghe xe de vedovele,  
 Che à fufa che resusciti el mario:  
 Quà un bozzolo se fa de tose bele,

Che se torna so mare le à finio;  
 Là fradei che no brama le sorele,  
 Qua tutori che à fato el ben de dio;  
 Gh'è fin dei trufaldini e dei tartaglia  
 Che a menzionar Sachi e Fiorili i ragia.  
 Xe'l preopinante fato presidente  
 De tuta quella zente,  
 E un camarier novelo,  
 Stafier do mesi avanti, e là bidelo  
 Interinal, el cria:  
 Se qua tra tanti e tanti  
 Omo o dona ghe sia,  
 Chè possa consegnar, se fazza avanti.  
 Certo prior, no so se negro o bianco,  
 S'alza su dal so banco,  
 L' ochio su tuti maestoso el zira,  
 Po a l' uditorio fa una riverenza,  
 E movendose a susta,  
 La bareta e la tonega el se giusta,  
 Un fazzoletto neto fora el tira  
 El se suga, el se raschia, e po el scomenza:  
 « Quod Deus conjunxit non separet homo.  
 Onnipossente tu, tu quel c'hai fisso  
 A esistenza un confin, che torni l' uomo  
 Donde sortì, alla polve, il tuo prefisso  
 Sovvertirà un mortal? Chi giace estinto  
 Sposo è di morte, ed il connubio atroce  
 L' orrido laccio, cui l' ha morte avvinto,  
 Spezzato esser non può che da tua voce.  
 Quale orror se ciò nasce! Io capo scelto  
 Di mia sacra famiglia, onor, decoro,  
 Possanza, da un prior già morto svelto  
 Vedrommi? tornerò frate da coro?  
 Si corra al tempio, e nel fatal periglio  
 Voti e preci sciogliamo. Ecco il consiglio. »  
 Co l' à finio una certa vedovela  
 Ancora fresca e bela,  
 Che per el morto sposo  
 No la vorave perder el moroso,  
 La dise: reverenda, la perdona,  
 Xe vero, l' orazion xe santa e bona,  
 Ma quando che 'l percolo sovraста  
 Forza e destrezza in opera se meta,  
 Che l' orazion, caro el mio ben, no basta,  
 Co 'l percolo gh'è quel che l' aspeta  
 Armà de torzi, salmi, e prussion,  
 Deventa oselo anca s' el xe un lion.  
 Eco el mio sentimento;

Le done in sto mumento  
 Xe quele che à da far la gran difesa,  
 Ma no minga co spade o co pistole,  
 Ma sibén co le nostre arme da ofesa,  
 Vezzi, lusinghe, ochiae, grazie, parghe.  
 Qualche bela doneta de bon sesto  
 Fazza del professor la conoscenza,  
 E coi nostri secreti presto presto  
 La lo inamori in barba a la sapienza,  
 E quando come un musso l'è inzucà  
 De lu quel che voremo se farà.  
 Ga apròv stà opinion un'orfanela,  
 Fiola de do gramazzi poveromeni,  
 Che per esser graziosa fresca e bela,  
 E proteta da certi galantomeni,  
 Sempre più el so stato se migliora  
 Col mistier onorato de la siora.  
 Mi go interesse, dise stà ragazza,  
 Che sto dottor el vaga via scornà,  
 Che assuefata a magnar pan e spazzza  
 Co xe morta mia mare o respirà;  
 Ancuo mi me divertó zorno e note  
 Alora avemarie, polenta e bote.  
 Amici cari, mi el mistier conosso,  
 Fideve pur in mi che me esibisso,  
 Che i pani i so tagiar sora ogni dosso,  
 E in tre di sto dottor lo inasenisso;  
 Giusto sti doti al solo odor de un cotolo  
 La testa i perde, e i zira come un trotolo.  
 Mi ò studià per principii l'arte mia  
 E so le suste che tocar bisogna,  
 Coi boni doparar l'ipocrisia,  
 L'umiliazion coi ricchi, la vergogna  
 Coi regazzi mostrar e la passion,  
 E coi sapienti far le adulazion;  
 Ma mi farò .... « Che farai tu, cerasta  
 Di società? vil donna  
 Ludibrio della gonna »  
 Dise un poeta, al qual sempre contrasta  
 La cena col disnar, perchè el viveva  
 Tirandola a la megio che 'l poteva  
 Co dediche e soneti,  
 Co qualche traduzion,  
 Che fava compassion,  
 E scrivendo a impressari dei libreti,  
 « E che, el dise fra lu coi cavei dreti,  
 Se torna redivivo  
 O Ariosto, o Tasso, o Metastasio, o Zeno

Non solo io più non scrivo  
 Ma non desino, oh diò! ma oh ciel! non  
 Che farai tu, rifiuto della rocca, (ceno.  
 Vivi a' malvagi, che a te no, a me tocca,  
 A me figlio di Apollo  
 Quell'anima piegar: pianger vedrollo,  
 E il trarrà a forza a' desiderii miei  
 La magica armonia della mia cetra  
 S'avesse il cor di pietra,  
 Se contra congiurassero gli dei.  
 E qual la polve ardente  
 Dall'eneq tubo lunge il piombo scaglia,  
 Così l'uomo di vaglia  
 Fuggir ratto farò da questo lito,  
 Il sovrumano risorgitor valente,  
 Comosso, stupefatto, sbalordito.  
 Alla grand'opra io volo,  
 Se il morto fia mio sol, fia di me solo  
 Il vostro premio. Amici miei coi carmi  
 Di tal vate, tal' uomo si disarmi. »  
 Lu tore via a compor la so cantata  
 E nol sente cussi una gran risata  
 Al grotesco pensier de mandar via  
 El professor a colpi de poesia,  
 Alora salta suso  
 Un certo sior Ilario;  
 (Gesumaria che muso!)  
 El gera stà sicafo,  
 E po fato ispetor,  
 E diventà un signor.  
 El dise: corpo .... e via;  
 Sta buscara me seca;  
 L'impiego perdaria  
 Restando a lioca seca,  
 Che sto ressuscitar  
 Perdia me fa tremar,  
 Che l'ispetor ch'è morto  
 Ocuparia el mio posto.  
 Se ancuo son quieto in porto  
 Mi perdo el lessò e 'l rosto.  
 Perdia torno sassìn  
 Se nasce stò tantin.  
 Sarave persuaso  
 Cavarselo dal cesto;  
 Mi solo fazzo e taso,  
 E me destrigo presto,  
 Se fussi in opinion,  
 Co un colpo de piston.

Risponde: che sproposito!

( Un omo de proposito  
Bravissimo tutor  
D'un certo puteleto,  
E che ghe brusaria più d' un pocheto  
Se tornasse a sto mondo el testafor )  
Ilario mio, se solo vu el mazzè  
Qua semo in tropi, e solo nol savè ;  
E la sarave sporca,  
Perchè restasse i morti in sepoltura  
Che dovessimo andar nu su la forca.  
Fradei cari, senti,  
Mi pensaria cussì,  
Che la me par sicura:  
Mi farave un magnifico regalo  
Al professor, a' condizion ch'el vada  
Per quel' istessa strada  
Che l' è venudo ; e l' andarà, no falo.  
Sta idea ga piasso ; e infatti lu à sunà  
Una sumeta non indifferente  
Fra quei che gera là,  
E fra quel' altra-zente  
Che de veder gaveva troppa angossa  
A saltar su i so morti da la fossa ;  
E po el ghe l' à portada al sior dotor,  
Disendo con altura  
Per meterghe paura :  
La senta, professor,  
Sti bezzi no xe pochi, e i se ghe dona  
Col pato, la perdona,  
Che da Nankin la vaga via al più presto.  
Tita, che nol voleva altro che questo,  
Al deputà l' à subito promesso  
De partir quel dì istesso ;  
E poco dopo in fato,  
Per no mancar al pato,  
L' è andà via, ringraziando  
El ciel de quando in quando, ma de cuor,  
Che l' avesse concesso ai Nankinesi,  
Come se vede in tanti altri paesi,  
Per i propri antenati tanto amor.

## I DEBITI

### CAPRICCIO

PER LE NOZZE DE LA N. D. CAMILLA SAGREDO

COL NOB. SIG. FRANCESCO RASPI.

Camileta - benedèta,  
Dei di nostri amirazon,  
Messa drento - in t' un convento  
Là ti à avudo educazion.  
Mile cose - vantagiose  
Là s' impara: chi nol sa?  
Solamente - no se sente  
A parlar de società.  
Ti xe bela - ma putela ;  
Le putele à da imparar.  
Via te degna - che te insegna  
Quel che al mondo s' à da far.  
Ma cospeto! - se me meto  
Tuto a dir quel che se pol,  
La capisso - no finisso,  
Perchè un'opera ghe vol ;  
Ma a to pare - ma a to mare  
Dir el resto lassarò,  
Che mi, sposa, - d' una cosa  
Sola e curta parlarò.  
Se stimada - sempre e amada  
I to di ti vol passar,  
Da ti stessa - date pressa  
I to debiti a pagar.  
Le persone - che xe bone  
Le xe atente a sto dover ;  
Xe inonesto - a ognun molesto  
Chi no paga chi à da aver.  
Ti sbufoni? - ti minchioni  
Chi per ben t' à consègià?  
Pur l' è vera! - su la tera  
Vari debiti se dà.  
No te ofendo - che no intendo  
Bezzi o zogo ricordar.  
Quei, oimei! - xe mo de quei  
Che mi sì me fa zurlar.

Ma ti dona - ti parona,  
 Ti un dì mare, e ancuo muger,  
 Quai doveri ! - quanto seri  
 Ai to zorni ti à da aver !  
 Dona e dama ? - aquista fama  
 De bon cuor, de urbanità  
 Co un contegno - de ti degno  
 Senza asprezza o vanità.  
 Ti parona ? - siime bona  
 Con chi serve note e dì,  
 Che anca lori - i servitori  
 Xe de carne come ti.  
 La to mama ? - tuti l'ama,  
 Tuti loda el so bon cuor.  
 Se la imiti - ti à i so driti  
 Su la lode e su l'amor.  
 Mare un zorno ? - i fioli atorno  
 Te starà con afezion.  
 Camileta - da ti i aspeta  
 La so prima educasion.  
 Ti consorte ? - la to sorte  
 Da Chechin dipendarà ;  
 Sii ubidente - compiacente,  
 E lu sempre t'amarà :  
 Se un maleto - el tien in leto,  
 Se un pensier mal lo fa star,  
 Co premura - ti procura  
 El to sposo consolar.

Chi ben ama - la so fiamma  
 Sempre viva ga nel sen :  
 Sia el to sposo - el to moroso,  
 El to amigo, e andarà ben.  
 L' astu intesa ? - t'ogio ofesa ?  
 Songio un stolido, un minchion ?  
 Gogio torto ? - pensio storto ?  
 O piuttosto goi rason ?  
 Ma sposeta - benedeta,  
 Go mo torto, e rason ti ;  
 Che sta storia - ti a memoria  
 Ti la sa megio de mi.  
 Ti à talento, - e se 'l convento  
 Sta lizion no t' à insegnà,  
 Ti lezendò - e riflettendo  
 Da to posta ti la sa.  
 Sì perdia, - mi sbregaria  
 Quel che d' scritto ... e allora po ?  
 Sta zornada - xe cantada  
 Da tant' altri ; e tassarò ?  
 No, no vogio ; - e po no sogio  
 Quanto bona ti xe ti ?  
 Ti xe bona - e ben, perdona  
 Se d' mal dito a dir cussì ;  
 Anzi aceta - Camileta,  
 Anca el voto del miq cuor.  
 Che i to an - senza afani  
 Scora in braccio de l'amor !



# POESIE

D 7

PIETRO ANTONIO NOVELLI.

---

## INVETTIVA

### CONTRO UNA VECCHIA

SONETTO CO LA COA.

Vechia chietina, via de qua, corbame  
Scampà da sant'Arian, bruta figura.  
Mumia, diavolo, can che fa paura,  
Spuzzolente de vermi bulegame,

Asma, lievra, cataro, peste infame,  
Bruta evacuada de Pluton pastura,  
Reo sp ragazo e sberlefo de natura,  
Parca che de la vita taglia el stame,

Carogna, striga, anima danada,  
Feral che piola, e che ga el talco sporco,  
Otomia co la pele roversada,

Mozza in sconsuasso, e un di nena de l'orco,  
Morta vampira con un corno infiaa  
Dei spiriti foleti dal più sporco.  
Le Gree fiole de Forco,

Che una co l'altra un ochio se imprestava,  
Gera megio de ti, che ti à la bava.

Arcibisdebisava

Ti par, co quella to ciera inumana,  
Picada e vegnuva verde in tramontana ;

L'avarizia te scana

Efige de la morte e de l'invidia,  
Che ti ga proprio el cefo de l'acidia.

No gh'è ne la Numidia

Fiera più spaventosa, e no gh'è drago,  
Basilisco, simioto, arpia nè mago,

Nè de Stige sul lago

No ga Caronte quel color da mostro  
Tra 'l fiel e tra 'l calizene e l'ingiostro ;

Va via dal confin nostro,

Va a star co quei che tien el colo storto,  
Che a ochi bassi no i te farà torto

De vardarte quel porto

De tute le disgrazie ; bruto muso,  
Dispetoso, ingrugnà, scarnà, otuso,

Quel to vardar astruso,

Losco, incantà, che 'l sangue fa giazzar,  
Che fa l'anima in corpo scantinar ;

E quel gran scricolar,

Che te fa i ossi, e quella to osazza,  
Che par el subio de una carbonazza,

Le xe cosse che cazza

Via la pazienza, e se se imbila e stufa  
Sentindo quel fetor che ti à da mufa.

Coi zoveni in barufa  
Grima, zotega, spia, nona del bogia,  
Goba, sdentada, secagine, incrogia.  
Chi vedesse despogia

Sta idea de lazareto e de ospeal,  
Piena de fezza come un orinal,

Vedaria un' infernal  
Furia, el porton de casa de colù ....  
El pecà .... me vien mal .... no posso più.



# AUTORI VIVENTI

## POESIE

DI

PIETRO BUSSOLIN.

### ODE IX, LIBRO III.

*Donec gratus eram tibi  
Nec quisquam potior trachia candidae.*

### UN DUETTIN AMOROSO

TRA ORAZIO E LIVIA PER FAR FASE.

O. Fin che caro a ti so stà,  
Nè sui brazzi d'altri amanti  
La to testa ti à puzà,  
No podeva andarme avanti  
De la Persia gnanca el re.

L. Quando coto inamorà  
Lidia sola te piaseva,  
Nè de Cloe ti à mai parlà,  
D'esser Ilja me pareva,  
E qualcosa anca de più.

O. Ma! .... la Cloe me gà incantà  
Coi so versi e l'armonia,  
E so tanto trasportà,  
Che a morir no temaria  
Per salvarla dal morir.

*Racc. Poes. Ven.*

L. Calai sempre sviscerà,  
Quanto mi, me xe stà fido,  
E do volte ( se se dà )  
Moriria, zuro a Cupido,  
Purchè vivo el stasse lu.

O. Ma se ancora rinovà  
La dea Venere bramasse  
Sto amor vechio, e più ligà?  
E Cloe bionda la scartasse  
Per far Lidia trionfar,

Cossa allora nassaria?  
Me lo pustu, cara, dir?

L. Ah! .... quantunque tuti sa  
Quanto belo Calai sia,  
E che ti ti è sempre stà  
Più lizier d' una scarpia,  
Burascoso più del mar,  
Nonostante, sì, voria,  
Co ti viver e morir.

## ODE XII. LIBRO IV.

*Audivere, Lyce, dii mea vota, dii  
Audivere, Lyce, fis anus, et tamen.*

## A LICE

OSSIA A UNA SO VECCHIA MOROSA, MA RIDOTA  
IN SCONQUASSO, E CHE NO VOL ESSER VECCHIA.

Ah ! respiro .... la mia suplica  
Tuti i numi l' à ascoltada;  
Lice, alfin xe diventada  
Vecchia grima co fa un can;  
Ma, sior sì, che anca decrepita  
La se crede d' esser bela,  
E chiassando da putela  
La trà su col gotesin.  
Cantuzzando in trili tremoli  
La vorave, credo, ancora ....  
Eh ! .... stralassa in to malora,  
Za l' amor no 'l te vol più.  
Sastu in dove el ga ricapito?  
Da la Chia, brava cantante,  
Bela, zovene e galante,  
Bocoleto damaschin;  
Perchè amor no stà sui roveri  
Che no dà fiori, nè guente,  
Ma ghe piase star darente  
A le piante de zardin;  
E ti invece ti lo stomeghi  
Co quei negri to dentoni,  
Co quei bianchi speluconi,  
E le rape che ti ga.  
No val più per ti le porpore,  
Nè le perle, nè i diamanti,  
Tute fiabe, tuti impianti,  
Via sparii co la to età!  
Voria dir; mà me contamino.  
Dove xe la to belezza?  
Dove i sguardi e la freschezza,  
E quei moti e quel andar?  
Dove xe la Lice amabile,  
Dove xela quella Lice,

Che m' à fato un di felice .  
( Via de Cinara ) in amor?  
Ma la povara mia Cinara  
Cruda morte l' à robada,  
E ti qua ti xe restada  
Dio sa quando per morir!  
Ma capisso, e me l' imagino  
Che 'l destin te ga volesto  
Lassar viva anca sto resto  
Sol per farte sbufonar ,  
Acìò che per strada i zoveni  
Co i te vede in chiasso, i diga:  
« Vardè là la vechia striga,  
La gran Venere de un di!  
Povareta! la to fiacola  
No la pol star più impizzata,  
L' è deposta diventada  
Come un stizzo consumà.

## ODE IV. LIBRO II.

*Ne sit ancillae ubi amor pudori  
Xantia Phoeu prius insolentem.*

## AL SO BON AMIGO FOCEO

DANDOGHE CORAGIO A SPOSAR LA SO SERVETA FILIDE,  
SU L'ESEMPIO DE MOLTI OMENI CHE A' FATO L'ISTESSO.

Foceo caro, amico mio,  
Fate pur, fate mario  
De quel bocolo de Filide,  
È no starte a vergognar.  
Cossa importa che la sia  
D'una mare schiava fia?  
Quanti gh'è, ma che fior d' omeni!  
Che cussì à volèsto far.  
Per esempio, una schiaveta  
( La Briseide benedeta! )  
Per la prima, Achile indomito  
A' savesto desgrezar.  
Un Aiace ghe vien drio  
Per Tecmessa sgangolio,



Altra schiava, ma bellissima,  
 Che l' à fato ben zurlar.  
 Coto ancora, anzi stracoto,  
 Xe sta visto, com' è noto  
 Fra i so fasti, un Agamenone  
 Da una puta su sto far;  
 Vogio dir, Cassandra bela,  
 Distintissima putela,  
 Che, quantunque fia de Priamo,  
 Tra le schiave ga da star.  
 Ma chi sa! che la biondina,  
 La to cara cocolina  
 No provegna da un'origine  
 Che te possa consolar?  
 Certo xe, che la s' à visto  
 De color piuttosto tristo  
 Tante volte, co le lagreme,  
 Re parenti a minzonar.  
 Ah! perdia, che sta ragazza  
 No la xe de la plebazza,  
 E chi l' oro no predomina,  
 E chi sa tanto el tratar,  
 No pol star, che sia mai fia  
 D' una razza buzevia;  
 Ma d' un sangue proprio nobile  
 ( Cosse za che se pol dar );  
 Donca Zantia alegramente  
 Tiente Filide darente,  
 E quei brazzi e quele pupole  
 De basar no te stufar;  
 Nè te vegna mai sospeto,  
 Che 'l to Orazio predileto  
 Co sto scherzo, un tantin lubrico,  
 Gelosia te voglia dar;  
 Perchè un omò, a dirse el vero,  
 Co quarant' ani sul bero,  
 Come mi, no xe pussibile  
 Che 'l te possa ingelosir.

## ODE XXVI. LIBRO III.

*Vixi puellis nuper idoneus,  
 Et militavi non sine gloria.*

## RINUNZIA VOLONTARIA

DE ORAZIO AI VEBSI AMOROSI, E COME SARIA A DIR,  
 A LE PUTELAE DE LA ZOVENTU'.

Anca mi eo le putele  
 Go vivesto da ragazzo,  
 E m' ò fato un onorazzo  
 Ne le guere de l' amor;  
 Ma in ancuo, che so vecchioto,  
 E che sempre più ghe vedo,  
 Vogio aver el mio congedo,  
 E a ste cosse rinunciar;  
 Donca a Venere in te 'l tempio,  
 Sul mureto, a banda zanca,  
 Tute unite in t' una branca  
 Le mie insegne tacarò;  
 Scomenzando da la lira,  
 Che à cantà le mie prodezze,  
 Che à lodà tante belezze,  
 E i piaceri de l' amor;  
 E po el torzo ( quel da vento )  
 Che se dopara de note,  
 Per trovar certe putota  
 Senz' aver da savariar;  
 E le leve fate a posta  
 Per sforzar, batendo el caso,  
 Qualche porta, e dar de naso  
 Anca dove no se pol,  
 A la barba dei custodi,  
 Che voria far resistenza,  
 Ma che dopo co prudenza  
 I se cava, e i lassa far.  
 Tuto là tacar bisogna;  
 Ma de manco far no posso,  
 Benchè vecchio e un poco flosso,  
 De pregar la dea per mi:  
 « Sì, gran dea, che in Menfi e in Cipro  
 Da regina ti è tratada,

E da tuti venerada,  
 Scolta Orazio, quel che 'l vol :  
 Tira fora la scurieta,  
 E in quel modo che ti credi,  
 A la Cloe, co ti la vedi,  
 Quatro bote daghe zo;  
 Acìò che quela ustinada,  
 Tanto dura e insuperbia,  
 La podesse ( andemo .... via.... )  
 Più ladina deventar. »

## EPODO III.

*Parentis olim si quis impia manu  
 Senile guttur fregerit.*

## A MECENATE

## IN ODIO DE L' AGIO.

A chi dà la morte al pare,  
 A sto inquo delinquente,  
 A sto mostro giustamente  
 La cicuta se ghe dà ;  
 Ma mi credo che sia megio,  
 Perchè 'l gabia più travaglio,  
 Farghe tor piuttosto l' agio  
 Come un tossegio più fin.  
 Come fai quei contadini  
 Che lo magna ? come fali ?  
 Mo che stomeghi mai gali  
 Per poderlo digerir ?  
 Mi, che un fià ghe n' ò in la panza,  
 No so dir cossa go drento.  
 Bisse e vipare mè sento  
 Suzo e zoso a rosegar ;  
 Su quel far de quei pastizzi,  
 Che Canidia, infame vechia,  
 Qualche volta me parechia  
 Per strigarme e farne zo.  
 So sicuro che a Medea  
 Co de l' agio puramente  
 Gh'è riussio felicemente  
 De agintar el so Giason,

Col fregarlo da per tuto  
 Perchè 'l riessa a far domabili  
 Quei do tori formidabili,  
 E col zogo farli andar ;  
 E co l' agio istessamente  
 La rival soa tossegada,  
 Per timor l' è po scampada  
 Coi so draghi in carrozzin.  
 No ghe xe vapori in Puglia,  
 Benchè tera cussì ardente,  
 Che al confronto no sia un gnente  
 De quei tanti che go mi ;  
 Anzi credo, e no me ingano,  
 Che 'l bogior d' Ercole istesso,  
 Per la vesta de quel Nesso,  
 No sia stà mai quel che go.  
 Senti ben : se un'altra volta,  
 Morbinoso Mecenate,  
 Ti me fa ste improvvisate,  
 Prego el ciel de tuto cuor,  
 Che per pena del to gusto,  
 Quando in leto ti te trovi,  
 Co la bela, e ti te provi  
 Per basarghe el so bochin,  
 Co la man messa al to viso  
 La te diga : fate indrio ;  
 E zirandote el dadrio,  
 Che la dorma in t' un canton.

## EPODO X. LIBRO V.

*Mala soluta navis exit alite  
 Ferens olentem Maevium.*

## A MEVIO POETA

DESIDERANDO CHE EL SE NEGA PER VIAZO.

Co gran mal augurio,  
 Cargà su una nave,  
 Quel Mevio poeta,  
 Che spuzza che infeta,  
 L' è là per partir.

Ti donca, te supico,  
 Gran ostro tremendo,  
 Da far che in le sponde,  
 Quel legno da l'oude  
 Sia ben sculazzà;  
 E ch'Euro te seguita,  
 Sbregando, slanzando,  
 E gomene e cai,  
 E remi e costrai  
 A torzio sul mar;  
 Nè bora teribile  
 (Che spianta noghere)  
 No 'l staga debando,  
 Ma el vada supiendo  
 Fin quanto che 'l pol;  
 Nè mai stele lucide  
 Che staga a far chiaro;  
 Ma sempre che dura  
 L'orenda negrura  
 Che porta zo Orion;  
 In soma desidero,  
 Che ti abi quel viazo,  
 Quel orido vento,  
 Quel mar, quel spavento,  
 Che Ajace à provà  
 (Per via de quel ordine,  
 Co siora Cassandra  
 Sucesso in tel tempio,  
 Co pessimo esempio ...  
 Lassemola là ....  
 Che za' po da Palade,  
 E lu, e i so compagni  
 Da Troja scampai,  
 In mar consolai  
 I è stai come va!)

Oh come che i strussia  
 Quei to marineri!  
 E ti, se no fallo,  
 Ti tremi, e ti è zalo  
 Co fa el zafaran;  
 Che cighi da femena,  
 Che preghi mai fastu?  
 Za Giove sta volta  
 Per gnente te ascolta.  
 Contrario el te xe.  
 El mar ruza e strepita,  
 El scogio te aspeta,  
 Barufa fa i venti,  
 La nave a mumenti  
 L'è là per andar.  
 Ah! quando certissimo  
 Sarò, che sul lido,  
 (Facendo cucagna)  
 I smerghi te magna,  
 Dirò: beato mi!  
 E al dio sora i turbini  
 Farò la mia oferta,  
 Za che a mio giudizio  
 L'è stà un gran servizio  
 De farte negar!  
 Darò in sacrificio,  
 Unito a un'agnela,  
 El più lussurioso  
 Cavron sozzoloso,  
 Che possa trovar.



# POESIE

D I

MARC' ANTONIO CAVANIS.

## IN LODE DE LA ZUCA

### DITIRAMBO.

Quanto è vario 'l pensar ! Chi se inamora  
De un dolce che po in fondo 'xe velen,  
Chi de un bel fiasco pien,  
Altri, per so malora,  
Spasema per i bezzi;  
Chi se faria squartar in cento pezzi  
Per arivar su qualche caregon,  
Chi fa l'amor a un qualche medagion;  
A chi ghe piasarave un abitin  
Curioso, galantin,  
Ben fato, sveltolin,  
Da goder el morbin;  
Chi se diletta de un bel chitarin,  
E chi de un cagnolin;  
E per vegnir al fin  
In t'una sechia-un sior s' à inamorà,  
E in so lode un bel libro el ga stampà.  
Mo donca no bisogna  
Che me vergogna  
A dir che mi me sento inamorà,  
Brusà,  
Invasà,  
Copà,

Piuchè insatanassà  
Per la zuca che indora le baise,  
E che vedel da Chioa ancuo se dise.  
Za me lo vedo qualche bel umor,  
Che senz' alcun rossor  
Me sbufona sul viso, e che me fizza  
Co un muso da lirazza  
Do tresento sbarlefi da smorfioso ....  
Via rognoso,  
Via tegnoso,  
Stomegoso,  
Schizzignoso,  
Via de là de carognoso,  
Via, fate in là che se me salta un lampo  
Co mezza suca mi te cavo el stampo,  
E po fazzo una statua co un cartelo  
Acìo che tuti te conossa a pelo,  
E i sapia che ti xe colù che abomina  
La zuca che dà vita a tanto popolo.  
Alora vardite,  
Varda che i fulmina  
I sassi e i ravani,  
E i pomi a fregole  
Tra i fischi oribili  
De un mar de popolo,  
Che te considera  
Quel omo stupido  
Che no ga  
Nè palà,  
Nè un fià

De onestà  
 Per un pasto gentil da tuti amà.  
 Sì, la zuca, la zuca, la zuca,  
 Sia santa o sia baruca,  
 O sia zucoi col manego,  
 O zuche anca salvadeghe,  
 L'è un magnar da strupiai che fa bon pro;  
 Fa tanto de panzon, purga i cocò,  
 Fa belo el viso, ve dà forza ai pi,  
 E consola el baelo per tre di.  
 « Oh! l'è un magnar da porchi in la mastela. »  
 Che stolidà bardela!  
 Mo gran lingue! gran teste! gran scioconi!  
 Mo no vedè come co quei boconi  
 Giusto i porcei ve vien come tordeti,  
 Grassi, dolci, tondeti,  
 De un gusto prelibato e soprafin,  
 Che ve consola proprie el coresin.  
 Del porcelo xe bon anca el zampin,  
 Xe un balsemo el coin,  
 Xe un botiro el sgrugneto,  
 Un late xe el panzeto;  
 Del porco i fa luganega,  
 Del porto i fa le brombole,  
 Del porco i fa i boldoni:  
 Se magna el pel, le zate e i sporteloni.  
 L'è bon rosto in speo,  
 L'è bon a scotafleo,  
 E grasso e insenetio,  
 E bogente e indurio,  
 E dopo digerio.  
 E pur l'è tuto, e struca struca,  
 Tuto sugo de zuca  
 Quel che ga fato el chilo,  
 Quel che ga fato el grasso,  
 Quel che l'è messo in filo,  
 E che 'l fa deventar stupendonasso.  
 Mj che no diga ben? sì che ò da dir,  
 Che la zuca xe quanto un elisir  
 Che dà la vita ai morti, e fa morir  
 Tuti i cancri,  
 Tute le fistole,  
 Tute le racole  
 Dei mali che vien fora  
 Dal vaso de Pandora.  
 Co me vedo in t'un campo semenà  
 De zuche ben zalone in quantità,  
 Za se me averze el cuor, perchè me par

Proprio de caminar  
 In spizieria de ogni fedel cristian,  
 Dove chi xe amalà se trova san.  
 Trè zo quel servizial,  
 Che a chi ga le mōroide el ghe fa mál;  
 Se ve volè purgar tolè sto toco  
 De zuca rosta che andarè de oco,  
 Magari le buele,  
 Che za salvè la pele.  
 Gaveu la roгна, le variole, el gosso?  
 Tuto calor che za ve buta in fosso.  
 Via, no tolè potachi!  
 Cremor de tartaro,  
 Mana potabile,  
 Mercurio fervido,  
 Negro riobarbaro,  
 Cassia che stomega,  
 China che tossegga;  
 Zuca tolè, che la indolcisse el sangue,  
 Tolè zuca per pan, per companadego,  
 Zuca, zūconi, e sarà tolto el radego;  
 Frita, lessa, rostia, che proprio altiu  
 El sangue ve farè da colombin.  
 Ve fa pecà i spizieri  
 E ve impeni de scoazze  
 Per darghe le lirazze?  
 Oh mati vivi e veri!  
 Fideve pur dei medici,  
 Credeghe a le so massime,  
 Cerchè pur le so visite,  
 Struzeve pur le viscere;  
 Ma fè pati col nonzolo,  
 Che presto el dotoron  
 Ve buta a tombolon.  
 Mi certo no me tegno,  
 Perchè go tanto inzegno  
 Da capir el gran ben che fa la zuca:  
 Nissun no me imbarluca,  
 Ma salto co fa un mato,  
 Sbrisso co fa un bisato,  
 Tiro fora la lengua, e cigo al turio  
 Finchè me bagno el beco co quel balsemo.  
 Coss'è, coss'è? sento cigar Tonina....  
 Fermi là .... zito .... tasi, caro ti,  
 Lassa che senta .... xela polentina? ....  
 Oh co bona! oh co rara! ... ah! .... so qua mi,  
 Mi no me tegno .... zuca schieta e neta  
 La zuca benedeta ....

Largo, fè largo .... fate in là furbazzo ....  
 E ti budeladazzo  
 Vustu una slepa, o vustu una peada?  
 Xe andà el tabaro, resta la velada ....  
 Oe, da la zuca, presto corè qua,  
 Abiè carità,  
 No go altro fià,  
 Me son sfadigà,  
 Me son scalmanà,  
 Perchè no andè in là:  
 Oimè! me consolo  
 Ghe so arivà a svolò;  
 So qua, me sbabazzo;  
 No co la man, voi meterghe el mustazzo.  
 Sì, coi deolini  
 Se magna i confetini,  
 Col pironcin se slimega,  
 Col sculierin se becola,  
 Ma co piase no gh'è tanta pazienza  
 Da magnar a batua come un celenza.  
 Qua un trareto, do trari, una lirazza,  
 Tolè i bezzi, la borsa e le scarsele;  
 Ma lasseme slapar che me sbabazza,  
 Perchè se me consola le buele.  
 Qua una zuca, do zuche, tre zuche  
 De sante e de baruche,  
 Qua che beva sta broda,  
 Che sorba sta papa,  
 Che tuta la slapa,  
 Che tuto me goda.  
 Via presto scaldeme,  
 Via presto sazieme,  
 Via presto indoreme,  
 Via presto imbalseme ....  
 Oh che papa! che broda! che gusto!  
 Bona per nu, che no portemo el busto ....  
 Ma go sto comesseto,  
 Che me strenze un pocheto ....  
 Acqua, me ingosso,  
 Deboto me strangolo  
 E par no gh'è osso ....  
 Me vien ....  
 Me vien ....  
 To dano: te l'ò dito che tel pùso;  
 Va là porco, va là, lavite el muso.  
 Ma intanto, e cussi  
 Gh'è zuca per mi?  
 Oimè! l'è finia

Gh'è apena la tola;  
 No gh'è scalcaria,  
 Chi mai me consola?  
 Oime! no go spirito,  
 I ochi me bagola,  
 Le gambe fa-giacomo  
 El cuor se me sbrodega,  
 Perchè de sto oro  
 Me manca 'l ristoro.  
 Se me volè vivo no me fe aspettar  
 Un burchio de zuche vegnime a portar.  
 Vegni, vegni presto,  
 Tonina ve aspetto:  
 Ghen fazzo in broeto,  
 Ghen fazzo col pesto,  
 De frite co l'ogio,  
 De frite col struto,  
 Ghe meto el ceffogio,  
 Ghe 'l meto da puto  
 S' un toco de lessa:  
 Ghen brustolo in forno  
 Un quarto, ma in pressa,  
 Po subito torno  
 A frizerla in techia,  
 Intanto coro a casa che i parechia.  
 Oli, desmissiete,  
 Todero, averzime;  
 Fora le piadene,  
 Via presto fregghime  
 Caldere, e lustrime  
 Farsore e techie,  
 E i piati indorime,  
 Che à da vègnir la zuca a far bancheto,  
 E tuto ga da esser lustro e neto.  
 Fa presto, fa fogo,  
 Ghe vol quatro bronze:  
 Ti, gato, da logo ....  
 Mi voggio ben conze  
 Le zuche in desfrito,  
 E ben brustolada  
 La rosta pulito,  
 Ga da esser panada  
 La lessa, ti sa:  
 A le curte a pontin come che va.  
 O che godi! son proprio un paladin  
 Co me imbalsemo el cuor co sto broetin.  
 Che risi! che carname! che caponi!  
 Tolè risi; i me par quei pignoleti,

Che ve pusa sti mestri manestroni :  
 Burlela, siora Dora ? oh ! i so manzeti  
 So che i ghe piasarave, e i so castrai,  
 Ma sieli pur frustai,  
 Solamente i xe boni per i cossi,  
 Voi dir per i becheri ; mezzi bezzi  
 I xe butai in canal ; che diavolezzi !  
 I ve dà mezza polpa e mezzi ossi,  
 E po che polpa ? o la xe dura, un leguo,  
 O la xe papa a segno  
 Che la par digerìa,  
 O la xe insenetia,  
 O la xe tuta grasso,  
 O sempia come un sasso,  
 O la spuzza da lispio ; e po in tinelo  
 Ga d' aver anca el gato el so piatelo,  
 Perchè co sti bei lardi anca i ve zonta  
 Un toco de slambrichio sempre in zonta.  
 Via la risponda, siora Dora amabile :  
 Cossa serve i sbarlefi ? i me fa stomego.  
 La diga pur, se la ga fià, la squaquara ....  
 Voriela dir : me piase i caponcini ?  
 Cari quei bei bochini !  
 Tolè un capon, mezzo ducato el val ;  
 Curelo, governelo, l' è un feral.  
 Che 'l sia anca bon : tope ve 'l magna mezzo  
 El gato, el can ; caveghe le buele,  
 Batè el corbame, curè ben la pele,  
 Oh se qua andemo pur de mal in pezzo !  
 Metè da banda i ossi : cossa resta ?  
 Vu fè dezun, e 'l cagnolin la festa.  
 Vardè che baronae !  
 Vardè che matitae !  
 Tanto darghe a le bestie quanto ai omeni !  
 La zuca no che no fa sti spropositi :  
 Spendo un traro, e sto traro è tuto mio ;  
 Spendo un ducato, e 'l magno tuto mi ;  
 So quel che compro, e co la xe cussì  
 Dopo che go comprà no pago el fio.  
 La zuca no ga ossi e no ga spini,  
 No la xe dura, no la xe panada,  
 No la xe seca, nè destemparada,  
 No la spuzza da lispio ; al fin dei fini  
 La ga el color de l' oro, e tanto basta.  
 Mo che gran bona pasta !  
 Perchè no nassistu  
 Solo in America ?  
 Che sior Vespucio

*Racc. Poes. Ven.*

Su più de un codice  
 Te faria celebre,  
 E vedaressimo  
 Sora l' oceano  
 Drio del to merito  
 Corer intrepide  
 Nave e trabacoli  
 Del turco barbaro,  
 Del gentil veneto,  
 De la gran aquila,  
 E de ogni popolo ;  
 E sentiressimo  
 Venderte a fregole  
 A dame e a nobili,  
 E ai più gran prencipi.  
 Allora ti saressi rarità,  
 Ma per mi ti fa megio a nascer qua.  
 Che providenza !  
 Sta bona droga venze tuti i intopi,  
 La nasce in tuti i campi, e sta semenza  
 Se rampega su i muri e va su i copi,  
 La regna in tei piteri, e squasi squasi  
 La ve nasce in pignata ;  
 Qua la mia cara tata,  
 Vienme qua, che te daga cento basi.  
 Oe ? cossa vedio, el burchio xe a la riva ....  
 Oh ! za me la sentiva,  
 Proprio el cuor lo disea, e proprio el naso  
 Se me strupiaa per l' odor soavissimo,  
 Che quel fiascon de zucaro,  
 Che quel balon de netare,  
 Che quel peaton de balsemo,  
 Manda per l' aria : oh ! certo mi no taso ....  
 Presto Tonin e Gasparo,  
 Piero, Martin e Prospero,  
 Polo, Chechin, Agapito,  
 Vegni zo a tombolon ;  
 Strupieve che n' importa,  
 Vegni zo in prussion,ion,  
 Trè zoso anca la porta,  
 Saltè zo del balcon,  
 Rompè pur anca el muro,  
 Trè zoso anca la casa,  
 Ma se vole che tasa  
 Vegni a tor sto tesoro ;  
 Metemelo al sicuro,  
 Ma presto presto presto,  
 Se no mi qua ve moro.

Oh bravi! me console  
 A vederve qua tuti;  
 Bravo Tonin: co alesto!  
 Oe varda ti, che ti ghe storzi el coto ....  
 E ti? cossa ghe vol? tirila in tera ....  
 Cossa fastu, baron? xela una piera,  
 Che ti ghe sapi su co quei stalfoni? ....  
 Oh bravi, bravi puti,  
 So contenton: mo proprio sè omenoni.  
 El magazen  
 Xe tuto pien;  
 Adesso manca el megio, che xe ora  
 De impenir la pignata e la caldiera,  
 La techia e la farsora,  
 La grela, l'antiano e la tortiera;  
 Far che la zuca bogia,  
 Far che la zuca frisa,  
 Far che la zira in speo,  
 Che la salta in pignata,  
 Che in techia la se cata,  
 E che la crostolisa,  
 E che se mostra a deo  
 Tuto sto logo ben fodrà de zuca.  
 Via, testa mamaluca,  
 No te gratar la rognà,  
 Qua xe da bulegar, laorar bisogna.  
 Vogio dar una bona spapolada,  
 E far de zuche sole una disnada.  
 Toghene una, e fala in bocconcini,  
 Che faremo manestra stupendona,  
 Un'altra a quarti fichila in caldiera;  
 Quela cussì zalona  
 Metila in forno tuta quanta intiera;  
 E questa in fregolini  
 Metila in techia, che cussì pulito  
 Ghe xe manestra, lessò, rosto e frito.  
 Oh che consolazion!  
 No gh'è megio bocon.  
 Che coghi a la francese?  
 Che piati in desossè?  
 Fè tute ste gran spese,  
 E tossego comprè.

I polastrei ve fa vegnir la gota;  
 Spendè bezz in carname,  
 E po ve vien mal putrido;  
 I brui ve lassa fame;  
 La roba dolce in bota  
 Ve fa nascer i vermi; un altro plate  
 Ve fa vegnir el flato;  
 Vardei sti crapuloni,  
 Gnanca de star in pie ne i xe più boni,  
 Vardeli i è lazzareti; si vardelt;  
 El so tropo magnar li magna eli.  
 La zuca no che no la fa malani;  
 No la fa gota, no la fa sunansa,  
 La imbalsema la panza,  
 La fa far bela copa,  
 La fa papote grasse,  
 La ve prolunga i ani,  
 E al più zoso a le basse  
 La cava qualche stopa  
 Produsendove un po de zanzarela;  
 Che al fin dei fini purga la buela.  
 Oh benedeta! la manestra è cota,  
 Xe a l'ordine la lessa, e anca la rosta;  
 Ga tuta la so crosta  
 Quela che i à messo in techia a volta rota;  
 Donca coremo,  
 Magnemo,  
 Sguazzemo,  
 Slapemo,  
 Crepemo.  
 Mi la magno co i occhi e co la boca,  
 In panza la me sfioa,  
 E proprio se me indora le bule.  
 Co cara! co bona!  
 Co dolce, delicata e stupendona!  
 Me luse infin la pele,  
 Me bulega de drento el coresia.  
 Quante cosse in to lode voria dir,  
 Ma no posso tocarlo sto cantin,  
 Perché dal gran sorbir  
 Sta bona papa, el corpo s'è sgionfà,  
 E me sento un tamburo, e no go fià.



# POESIE

DI

ALVISE CICOGNA.

---

## A CUPIDO

PERCHÈ EL VEGNA A BELUN.

### ANACREONTICA.

Dà fogo a la regia,  
Che in Gnido ti ga,  
Amor, e po scampa,  
E piantite qua.  
Adesso i corsari  
Infesta quel mar :  
Ti istesso i to popoli  
Ti stenti a salvar.  
Ecidio, discordia,  
Ga sparso el velen :  
Ti à perso la pase,  
No ti ga più ben.  
Vien qua, no fermate :  
Mi temo de ti ;  
Pol far i ribeli  
Più tristi i to di.  
Qua in mezo sta vale  
Sicuro ti xe ;

Sta zente xe pronta  
A farte so re.  
Un fiume i tributi  
Ai pie portarà  
Dei monti, che mare  
Al regno sarà.  
Le amene delizie  
No ga qua confin :  
Sta vale te 'l zuro  
L'è un vero giardin.  
Qua el campo, qua el bosco,  
Qua el pogio, qua el pra,  
Qua el fonte, el torènte,  
Qua tuto ti ga.  
Ma chi de la vale  
Po forma l' onor,  
L'è un popolo colto,  
Gentil, e de cuor,  
E mile, e più ninfa,  
Invidia del ciel,  
Che in viso le rose,  
Sui lavri ga el miel :  
De ninfe, che a Palada  
No cede, e a Giunon  
E forsi anca a Venere ....  
Ma zito ! perdon ! ....

So ben chi te sia  
 La dea del piacer :  
 No fazzo confronti,  
 Che possa doler.  
 Amor, gastu inteso ?  
 Ascoltime mi;  
 Vien qua, e più contenti  
 Ti condurà i dā.

## ARIVO DE CUPIDO

A BELUN.

ANACREONTICA.

Ecolo ! ecolo !  
 Viva Cupido !  
 Scampà da Gnido,  
 Ecolo qua !  
 Su un salta nuvole  
 D' oro e d' arzento,  
 Portà da un vento,  
 L' è capità.  
 Psiche gh' è a latere,  
 La so diletta,  
 Co la lumeta,  
 Cot calalin.  
 El desiderio  
 Vestio de fogo  
 Ga el terzo logo  
 Nel carrozzin  
 Ecolo, ecolo !  
 In Campedelo  
 El Furianelo  
 L' à messo zo.  
 Sorpreso el popolo  
 Nume lo chiama,  
 Re lo proclama  
 In prostinò.  
 Presto a l' omagio,  
 Zoveni eleti,  
 Divoti e lieti  
 Ofrighe el cuor.

Fremitti, e palpiti  
 No ve xe ignoti :  
 Savè che moti  
 Dolci ga amor !  
 Se el ferma stabile  
 Qua el so soggiorno  
 Sarà ogni zorno  
 Chiaro e seren ;  
 El clima rigido  
 Muarà natura :  
 Fiori, e verdura  
 Darà el teren.  
 Ninfe bellissime,  
 Ninfe vezzose,  
 No siè ritrose,  
 No abiè timor :  
 Canteghe un cantico,  
 Meteve in festa :  
 Che tra nu resta  
 El dio d' Amor.

## L' O R O .

Dal momento che Pandora  
 In tel muso de la tera  
 La pignata à sfracassà,  
 Fra i malani saltai fora  
 Contra i omeni a far guera  
 L' oro el primo s' à mirà.  
 No gh' è esempi de barbarie,  
 Tradimenti, felonie,  
 Che no 'l gabia cagionà :  
 Per lu ai popoli le angarie,  
 Per lu ingiuste prigionie,  
 Per lu el sacco a le cità.  
 E sortida la licenza,  
 Fia carnal del tropo lusso,  
 Tuto el mondo s' à infetà :  
 Adio onor, adio innocenza !  
 Al pestifero so influo  
 La s' à in fango trasformà.  
 Pare e fio, tacai in barufa,  
 Tante volte i xe arivai

L' arme inique a doparar :  
 La giustizia, tuta fufa,  
 A veder tanti pecai,  
 La s'è andata a soterar,  
 Questi, e mile, che 'l ribrezzo  
 Me tratien de far parola,  
 I xe i fruti del metal,  
 Che mi vardo co disprezzo,  
 Benchè a tuti el fazza gola,  
 Come balsemo vital.  
 Ma, me pento ; cossa digo ?  
 No 'l credè, no è minga l'oro  
 Dei disordini rason :  
 L'è dei boni bon amigo,  
 L'è el più nobile laoro,  
 Che natura fa in scondon ;  
 Che se contro ogni diritto  
 A eseguir cosse mostruose  
 El se lassa doparar :  
 No per questo contradito  
 L'è a chi in opere pietose  
 L'è volesto consumar.  
 Per mandarghe a le contrade  
 Tuto quello, che ghe manca,  
 Qua el tragheta l' alto mar :  
 Là minuto per le strade  
 El va in ziro a drita, e a zanca  
 L' industrioso a compensar.  
 Qua el s' inalta in monumenti  
 De real munificenza  
 Ogni infermo a medicar :  
 Dai pericoli, e dai stenti  
 La miseria, e l' inocenza  
 Là l'è pronto a rancurar ;  
 È foresta, vale, e monte,  
 Campo, pra, fiume, colina  
 Conta assae sul so favor.  
 L'oro l'è el camaleonte,  
 Che dai corpi che 'l vicina,  
 Perde, acquista, mua color

## PENSIERETO.

L' ombre se rampega  
 Su per el monte :  
 Fronte - ma debole  
 El sol ghe fa.  
 Le avanza, e rapide :  
 Lu se ritira ;  
 E el mira - languido  
 Chi l'è scazzà.  
 Guera periodica :  
 Doman bon ora,  
 Fora - le tenebre,  
 El regna lu.  
 Secoli, e secoli  
 Cussi rovina ;  
 Regina - immobile  
 Resta virtù.

## LA PRIMAVERA.

## ANACREONTICA.

Giacinti, e violete  
 Fa in tera baossete :  
 Che gusto ! che giubilo !  
 L' inverno è scampà.  
 La neve è svania,  
 La brina è finia,  
 Xe tepida l' aria,  
 El sol chiapa fìa.  
 Sgualdina, Anzoleto,  
 Col so cesteleto,  
 Salata, e radichio  
 I va a sgarugiar.  
 Vardè la sisila,  
 La canta, la trila ;  
 El nio la se fabrica,  
 Tornada dal mar.

Le piegore salta,  
 S' ingropa, e rebalta ....  
 Che stala? ... sì al pascòlo  
 Co tuti i bebè:  
 Le guida Tognoto,  
 Sonando el subioto;  
 No ocore più l' elera:  
 Erbeta ghe n' è.  
 Amici! fè ciera  
 Xe qua primavera:  
 Mè 'l dise quel nuvolo ....  
 Sentì! .... senti el ton!  
 Ohimè! che sta idea  
 El cuor me ricrea,  
 E tuto desmentego  
 Quel fredo baron.  
 Ancora un meseto,  
 E 'l russignoleto  
 Col canto ne sgiozzola  
 Su l'anima el miel.  
 Stagion deliziosa!  
 Ti vien co la rossa,  
 Ti parti col giglio,  
 Fior degno del ciel.

## A U N A B E L A.

## ANACREONTICA.

Se ti credessi, viscere,  
 Co quele to ochiadine,  
 Co tante paroline  
 De averme inzinganà:  
 Mi te lo zuro cocola,  
 Ti t' à proprio inganà.  
 So che ste istesse grazie  
 Ti le dispensi a cento;  
 Ma senza sentimento ....  
 Cussì .... *pour badinè*:  
 E questo el modo, nonola,  
 Da sogiogar no l' è.  
 Vogio anca confessartelo,  
 Me piase i to scherzeti;

Ma scherzi senza afeti  
 No pol tocarme el cuor:  
 Ne la to testa imprimate,  
 L' è amor, che chiama amor.  
 El brio l' è bon, conservilo;  
 Ma via la legerezza,  
 E de la to belezza:  
 Schiavo sarò anca mi:  
 Bela vechieta, intendistu?  
 Bisogna far cussi.

## EL FIORETO REGALA'.

## ANACREONTICA.

Verzo el fogio, e da un biglieto  
 El più grato, el più gentil,  
 Compagnà me xe un fioreto,  
 Che saria l' onor d' avril.  
 No so el nome .... no fa gnente,  
 Ma ghe vedo in lu scolpia  
 De natura onipotente  
 Tuta quanta la magia.  
 Me lo volto, me lo ziro,  
 Lo vaghegio co piacer:  
 Me lo lodo, me lo amiro ....  
 El me anima el pensier.  
 Sciocchi d' atei, che no crede,  
 Qua che i vegna, se i ga cuor:  
 Voi chiamarli mi a la fede  
 Solamente co sto fior.

## PER NOZZE

## CANZONETA.

Le celeghe se becola,  
 El nio fa el lugarin:  
 Chi xelo, che li stuzzega?  
 Amor .... lo sa un babin.  
 Amor fa in toni flebili  
 Languir el russignol;  
 E per amor la lodola  
 S' alza, cantando, al sol.  
 Che amor mo? Amor volubile,  
 Amor che vien, che va.  
 Che scherza, che zogatola,  
 Che passa co l'istà.  
 Ma quel' amor che vincola  
 A do sposeti el cuor,  
 L'è amor, che no ga limiti,  
 El xe costante amor;  
 El xe un amor mirabile,  
 Che amar la zoventù  
 Fa per i doni intrinsechi  
 De nobile virtù;  
 El xe un amor de spirito,  
 Che, co l'intiva in bon,  
 Bisega fin ne l'anima,  
 Tien dièta la rason;  
 Un savio amor, che stabile  
 Vol pase mantegnir,  
 Che a tempo avisa, tolera,  
 Corege, sa blandir;  
 L'è quel' amor, che zovene,  
 Che fresco. ben piantà,  
 Col tempo se fortifica,  
 Ridendo de l'età.  
 Va là, canzon, presentite  
 Ai sposi, e dighe: che  
 Amor el più pregiabile  
 Al mondo no ghe xe.

## LA SALUTE

## IN OCCASION DEL RIPRISTINO DE UN AMIGO.

Brunota, ben tarchiada, colorida,  
 Co do occhi brillanti, ma tranquilli,  
 De passo franco, portamento grando,  
 Aspetto vigoroso; ativa sempre,  
 Serena in fronte, e el bel bochin ridente ....  
 Vardila, Neno, questa è la salute.  
 Vardila, e tiente arente. La xe questa.  
 Che 'l piacer conza, slegierisce i pesi,  
 Fa belo el mondo. Co una ochiada sola  
 La raviva, la svegia, la sicura,  
 Voltela via? .... languori, afani, dogie,  
 Spasemi, convulsion, la morte istessa ....  
 Ti, Neno, ti lo sa quanti xe i mali,  
 Che xe pronti a assaltarne se la scanpa.  
 Ringrazia el ciel; la t'è tornada in braccio,  
 Ogni mal xe svanio. Famegia, amici  
 Tuti esulta al to ben. Godila, e vivi.  
 Godi de sto tesoro,  
 E sapilo apprezzar:  
 Le tere, i onori, l'oro,  
 Lo porli compensar?  
 L'è un don de paradiso,  
 Che a gratis ne vien dà,  
 Senza vardar in viso  
 A chi più in alto sta.  
 Vedistu quel palazzo?  
 Trovime ti l'egual:  
 Là ghe ricchezze a sguazzo;  
 Ma ghe anca a sguazzo el mal;  
 E mentre là, fra el susto,  
 Geme amala el signor;  
 Povero, ma robusto,  
 Va per el prà 'l pastor.  
 Do xe le zogie pure  
 Concesse in tera al bon,  
 Per rider de le cure.  
 E sofegar passion:  
 Salute, e pase; questa  
 Fa l'altra assaporar.  
 Che tute do te resta  
 In vita a consolar!

## LA LODOLETA

## CANZONETA.

Oh che bel zorno! .... Vardilo!  
 Tuto seren xe el cielo:  
 No gh'è una nuvola,  
 No ghe xe un velo,  
 Che ghe fizza ombra al sol.  
 L'aria xe quieta placida  
 Le fogie no se move;  
 E fina zefiro  
 Xe sconto .... dove?  
 A la so Flora in sen.  
 Mile fioreti, e bocoli  
 Spiega la nova erbetta:  
 Fra lori limpida  
 Score l'acqueta,  
 Che imorbidisce el pra.  
 La lodoleta semplice  
 S'alza, cantando, a svolo,  
 Ohimè! che amabile!  
 Senti che a solo!  
 Chi è che la sa imitar?  
 « Da la gioia, che me sgiozzola  
 Qua sul cuor la vaga pompa  
 Dei to ragi, caro sol,  
 Sol sublime! me destemparo,  
 No gh'è gnente che te crompa,  
 Tuto ti è, tuto ti pol.  
 Ti pol tuto, ti xe l'organo  
 D'ogni ben, che godo al mondo:  
 Ti è la mia felicità:  
 Se ti manchi, se un spernachio  
 Te coverze, me confondo,  
 Trista, afitta resto là.  
 Per ti solo me despigolo  
 I graneti, per i campi  
 Svolazzando tuto el di:  
 La to luse è che dà l'anima,  
 Sfaviandogheue i lampi,  
 Sul so nido, ai mii pipi .... »  
 Ringrazia el sol benefico

Cussi la lodoleta.  
 Mi vado in estasi ...  
 Sieu benedeta!  
 Ti, e chi te fa cantar!

## L' ARCO CELESTE.

Tramonta el sol, e de fazzada intanto  
 Un gentil vaporeto fa cascar  
 Fina fina dal cielo una pioveta;  
 E fra i so fili trasparisce i monti,  
 Che l'orizzonte a scala slonga, e sera.  
 Peta, e se franze ne le giozze i ragi,  
 E come sora un velo tuti sete  
 Se depenze i colori de la luse  
 I se depenze in arco, e l'arco pusa  
 A dreta, e a zanca in cima de do vete,  
 Dove se imbosca sempre verdi i pezzi.  
 Per soto a l'arco, come soto a un ponte  
 Se vede campi, prai, boschetti, coli,  
 E un valon sbregà in fondo da un torente;  
 Ma perchè gnente manchi: a pie d'un monte,  
 E a cavaloto d'un secondo, sponta  
 Vago un paeseto, che fa scontro a l'arco  
 Co 'l bianco, e el fumegà de le so case.  
 De sta sorte de spettacoli  
 Dona a l'occhio la natura!  
 Vegna qua chi la trascura:  
 Se pol mai bramar de più?  
 Vegna, e veda come supera  
 I so semplici diletì,  
 In confronto dei bancheti,  
 E dei bali de cità!  
 Qua se gode, e no se tacola  
 El candor de l'innocenza:  
 Quel, che mostra l'apparenza,  
 La sostanza ve mantien.  
 De natura vardè l'opere:  
 Scrutinele tute quante:  
 Fra le crode, fra le piante  
 Vedè l'Ente Creator.  
 Fin le cosse, che par picole,  
 Le xe grande portentose:  
 Chi è, che sguarde fa le rose?  
 Chi fa bianco el zensamin?

Un fioreto ancora in bocolo,  
 Un' acqueta, che zappila,  
 Una lodola, che trila,  
 Te magnifica el pensier.  
 Vado in estasi a pensarmelo :  
 La natura xe un tesoro ;  
 Nè val zoge, nè val oro,  
 Se i metemo al paragon.

## LA MODA.

## SOGNO.

Sta matina bonoreta,  
 Tolta suso la pipeta,  
 Se arivà .... cussì .... bel belo  
 Qua in tel bosco del Montelo.  
 Russignoi ? no i xe gnancora  
 Capitai : che no xe l' ora ;  
 Ma se sente non ostante  
 In maniere tante, e tante  
 Varie sorte d' oseleti  
 Solfegiar dei bei trileti.  
 Le parussole, i cainegri  
 Sempre in festa, sempre alegri ;  
 Qualche merlo innamorà  
 Da la sposa sbandonà ;  
 Finchi, tordi, roveghini,  
 Petirossi, gardellini,  
 Va d' accordo tuti quanti,  
 Chi coi subi, chi coi canti,  
 In onor de la boschiva  
 Libertà facèndo eviva.  
 I pensieri poco lieti,  
 Che a le volte anca ai poeti,  
 Come al resto dei mortali,  
 Porta in cuor tristezze e mali,  
 M' à lassà per un pocheto  
 Ste delizie a goder quieto,  
 Favèrio da la stagion  
 Soto l' ombra d' un machion.  
 Qua la mata fantasia,  
 Che ghe piase saltar via,  
 Come i osei de palo in frasca  
 Mile idee la me tambasca.  
 Quando ariva in quel mamento,  
 Portà là forsi dal vento,  
 O invidà da la verdura,

*Racc. Poes. Ven.*

El nemigo d' ogni cura :  
 El me passa proprio a lai,  
 Senza tachi sui stival.  
 L' alza su la bachelina ....  
 El me dà una tocadina ....  
 Casco zo .... fazzo un soneto  
 Co la zonta d' un sogneto.  
 Eco el sogno : in alto mar  
 Me pareva navigar  
 In t' un piccolo batelo ....  
 Gera el dì tranquilo, e belo ;  
 E una fresca bavesela,  
 Che supiava in te la vela,  
 M' à butà .... dove ? no so ;  
 Ma in sto mondo certo no.  
 Me son visto in t' una rada  
 Da montagne circondada.  
 Buto l' ochio su la riva :  
 No ghe gera anima viva.  
 No so cossa abia da far ;  
 Pur me rischio de smontar.  
 Vardo in alto, vardo abasso :  
 No gh'è crode, no gh'è un sasso,  
 No gh'è un alboro, un cason,  
 No gh'è tera, nè sabion.  
 Tuto el lio xe tapezzà  
 De scarlato, de brocà,  
 Pani, tele, sede, rasi,  
 Scorze d' albori, bombasi,  
 Stofe, merli, galaneti,  
 Trine, scufie, conciereti ....  
 Figureve co incantà  
 Che a sta vista so restà.  
 Vado avanti un pochetin  
 Verso el monte più vicin ....  
 Altro aspeto, ma in complesso  
 El me par tuto l' istesso ;  
 Gera el monte una catasta  
 De strighessi d' ogni pasta :  
 Vere, aneli, brazzaleti,  
 Cadenele, relogieti,  
 Aghi, stuchi, perle, zogie :  
 Qua in colane, là in rechini,  
 Qua in diademi, là in manini ,  
 E per darghe magior lume  
 Sventolava un mier de piume  
 Su dei bossoli impiantao,  
 Che pareva de pomae,

Profumae de tuti i odori,  
 D' ogni sorte de colori.  
 Sbalordio, senza pensarme  
 Che nissun staga a vardarme,  
 Per un moto de stupor,  
 Che no so tegnir in cuor,  
 Cigo alora ; pofarsbrio !  
 Chi ga fato mai sto lio ?  
 Chi sti monti à fabricà ?  
 Chi sa dirme chi ghe stà ? ,...  
 Dito apena da un valon  
 Sponta su una prussission ....  
 Scampar via ? .... no gh' è più caso :  
 Stago atento, vardo, e taso.  
 Precedeva picoleti  
 Una lista de genieti,  
 Che no so se i caminasse,  
 O su l' ale i se girasse.  
 Parte in testa, parte in man,  
 Chi una scufia, chi un galan,  
 Chi una ventola, o un' ombrela,  
 O qualche altra bagatela,  
 Tuti quanti el so fardelo,  
 Poco o troppo, avea con elo.  
 Vegnia drio una quantità  
 De persone d' ogni età,  
 D' ogni sesso, e condizion,  
 E de tute le nazon.  
 Là Persiani; là Chinesi,  
 Là Spagnoli, là Francesi,  
 Piemontesi, Veneziani,  
 Russi, Turchi, Americani ....  
 In t' un atimo la rada  
 Un marcà l' è diventada.  
 Gnente ancora .... drio de lori  
 Segue l' arti : qua sartori,  
 Sartorele, chincaglieri,  
 Colarine, peruchieri,  
 Zogelieri, petenete,  
 Calegheri, ventolete ;  
 E cent' altri, che podè  
 Figurarve, se volè.  
 Co à finio sta comitiva  
 Eco zonzer su la riva,  
 Tra un eviva general  
 Un gran caro trionfal.  
 Una dona de figura  
 Gigantesca .... guardadura

Civetina .... ma che avea  
 Le sembianze de una dea  
 Stava in cima. Le so veste  
 Gera semplici, modeste :  
 I oruamenti gera strani,  
 Ma no i gera sovrumani :  
 Bensi tuto cussì fato,  
 Che cambiava trato trato  
 Stampo, tinta, qualità,  
 Senza moverse de là ....  
 Come ? .... chi lo pol saver ?  
 Come el lampo del pensier.  
 Daya logò el capelin  
 A un elmeto sveltolin,  
 I caveli inanelai  
 Ai raccolti ingirlandai ;  
 Ora un abito perfeto,  
 Ora cotola, e corpeto,  
 Presto strascino ; po no ;  
 Po pelizza, o dominò ...  
 Curte .... in soma variazion  
 Da far mato Ciceron.  
 La se ferma .... l' alza i occhi ....  
 ( Mi me tremola i zenochi )  
 Tuti tase .... « I vostri voti,  
 Fidi popoli devoti,  
 Mi compiacchio d'esaudir.  
 Ecco qui quanto il desir  
 Suggestire a voi potea  
 ( Za capi, parla la dea )  
 Qui raccolto lo vedete.  
 Soddisfatevi, prendete  
 Tutto quello, che vi aggrada ... »  
 Stago a veder che spianada !  
 Quela zente come 'l vento  
 Se disperde in t' un mumento.  
 Chi tol questo, chi tol quello,  
 Tuti cerca el meglio, el belo ;  
 Ma ( prodigio ! ) quel che i cata  
 Nele man se ghe barata :  
 Buta zo .... tol su da novo ....  
 Gnente ... istesso .... semo *ab ovo* ...  
 Tum .... me svegio .... coss' è stà ?  
 Cazzadori che à sbarà.  
 Torno a casa : caminando  
 Vado el sogno via studiando ....  
 I galanti che i se goda !  
 So sta al regno de la moda.



# SONETTO

D I

EMMANUELE CICOGNA.

---

A NOME DEI PARROCHIANI

PER LA ELEZIONE

DI DON GIOVANNI CAO

*a Piovano di san Zaccaria di Venezia.*

Eleto xe piovàn don Zuanne Cao  
Anagrama purissimo de coa:  
E infati de nu tuti lu xe cao,  
Che drio ghe andemo come sgnèle in coa.

Poco à mancà che un altro fusse cao  
E Cao dasseno diventasse coa:  
Tanto gera el concorso da ogni cao  
De chi voleva meterghe la coa.

Ma no i à podesto vegnirghene a cao:  
I à fato fiasco; i ga sbassà la coa,  
E no ghe resta che tornar da cao.

Cussi, à volesto chi xe Cao e Coa;  
Quel Dio che umilia chi va tropo in cao,  
Quel Dio che esalta ehi se mete in coa.

# POESIE

D 1

VINCENZO FOSCARINI.

---

## SONETI.

I.

Scrivo su tuto per passarla via,  
Per inganar la nogia de la vita,  
Ma dovarave ogni scrittura mia  
Sbregar, brusar, subito dopo scritta.

Cussi a l' autor vergogna no faria  
Tanti spegazzj de una pena ardita,  
Che fa torto a la santa poesia,  
E va a fenir fra le scarpe in sofita ;

Ma oimè che semo tuti quanti eguali,  
E dal nostro amor proprio inzinganai  
Se credemo colone, e semo pali !

Torto per questo no se demo mai,  
Per questo femo al mondo dei regali,  
Che sconti staria ben come i pecai.

II.

Da nissun mi no voggio copiar gnente,  
Che za senza volerlo copiarò,  
E de le cosse in rima ve dirò,  
In versi, o in prosa, scrite da altra zente.

Tanta roba se stampa al di corente,  
E tantè vechie carte visto go,  
E lete, e meditae, che mi no so  
Se nove idee possa vegnir in mente.

Libri novi se dà, gh'è autori novi,  
Ma da novo pensieri no ghe xe,  
Se ti, o Giove, dal ciel no ti li piovi ;

Dunque, cari letori, perdonè,  
Se quando in testa se me rompe i vovi,  
De quel gusto dei altri li trovè.

## III.

El mio can, el mio gato, el mio ponaro,  
 I mii ritrati, la mia libreria,  
 I mii scriti in vernaoola poesia,  
 De la vita me fa dolce l'amaro.

De amici un grumo assae me tegno caro,  
 Che vien spesso a trovarme a casa mia,  
 Che mi trato a la bona, e in cortesia  
 Tanto se i ga la spada, che el tabaro.

Cussì da sempio, come che i me crede,  
 Passo i mii zorni sempre alegramente  
 Da cristian mantegnindo la mia fede,

E qualche rara volta fra la zente  
 Vestio da festa, o in arme, se me vede  
 A rider dei sapienti, e a no dir gnente.

## IV.

No star a darghe libertà a bardasse  
 Se no ti vol tor su qualche insolenza,  
 Da dover soportar co gran pazienza,  
 Perchè ognun ga da star co la so classe.

Se nobile ti xe, persone basse  
 No permeter che chiassa in to presenza,  
 Nè lassar che se ofenda la decenza  
 Co moti sporchi, o con parole grasse;

Co l'ignorante no contender mai,  
 Stando col rico no pianzer el morto,  
 Che lu no vol saverghene de guai.

Trascura la finzion del colo storto,  
 Rispeta i grandi, i mati, e i animai,  
 Perchè co questi se ga sempre torto.

## V.

No ghe xe omo che a sto mondo vegna  
 Co la saviezza in testa e col saver,  
 Senza l'esempio l'ignoranza regna,  
 Senza la scuola no se sa mistier.

De imitar la virtù chi no se degna  
 Imita el vizio, e manca al so dover,  
 Chi no studia, e no cerca chi ghe insègna,  
 Chiaro no pol esponer un pensier;

Che xe la longa pratica, xe i ani  
 Che l'omo rende savio, e che lo fa  
 Tegnir se ai beni, e star lontan dai dani.

Savio diventa l'omo co l'età,  
 Che vede col favor dei disingani  
 Le matae de l'umana società.

## VI.

De done ghe xe quatro qualità  
 Che ai relogi se pol paragonar:  
 Relogio d'oro xe la *puta*, e par  
 Che a tegnirlo in borsin ben se farà.

La *maridada* in sen la vegnarà  
 El relologio de piazza a presentar,  
 Su sto relologio tuti pol vardar,  
 El decoro lu xe de la cità.

E relologio la *vedoa* xe da sol,  
 Che unicamente col bel tempo val,  
 E che servir de note no ne pol.

De sabion xe relologio dozenal,  
 Da usar per ogni verso che se vol,  
 La *squadrina*, che a tanti fa del mal.

## VII.

Cossa v' à fato, o done veneziane,  
 Quel vostro bianco povero faziol,  
 Che in testa nicolote, e castelane,  
 Ve metevi in leon co gera el sol?

E perchè invece ancùo porta le lane  
 Le muger e le fie del barcarìol,  
 Come le dame, come le sultane,  
 Che va in pompa cussì perchè le pol?

Spiegheme sta rason de cambiamento,  
 O de Venezia mia bele donete,  
 Che muar ve fa stato e portamento.

Credeu che i possa dirve muneghete  
 Col bavareto in testa, o che spavento  
 Le done possa far modeste e nete?

## VIII.

Sì, donete, meteve el capelin  
 Picolo, o grandò come vol la moda,  
 Adateve i polseti, el ventolin  
 Manizè pur, ma con grazieta soda.

Longo o curto abìe pur el tabarin,  
 Compiaseve se l' abito-i ve loda,  
 Co bela scarpolina el bel penin  
 Lassè che in balo onesto se la goda;

Che s' à usà sempre, e sempre se usarà  
 Che le done inclinae sia a deliziar  
 L' omo che al vostro sesso xe inclinà.

Ma tuto quel che no convien mostrar  
 No mostrè a tuti, perchè tuti sa,  
 Che co se espone incanto se vol far.

## IX.

De zoventù go qualche indizio ancora  
 Nel caminar, ne l' esser svelto e franco,  
 Spesso in parlar senza pensarghe sora,  
 Nel no poder de rider far de manco;

Tuto el resto xe andà squasi in malora,  
 Nè se me vede più de done a fianco,  
 Nè de la note ço xe tarda l' ora  
 Fra i amici nissun me cata in branco.

Dunque son là cussì come in balanza,  
 Siben canuo casco in sempiezzi, e casço  
 Perchè vincer no so la mala usanza.

Oh! va adasiato, no far tanto el vasco,  
 Sii prudente, e se mai morbin te avanza,  
 Ridi del vechio destinà a far fiasco.

## X.

Ghe xe qualche persona che me acusa  
 De scriver tropo spesso in poesia,  
 De far tropo bordelo de la musa  
 Tropo scialaquo de la fantasia.

Xe vero, in tuto chi assae usa abusa,  
 Ma se no so far altro, se la mia  
 Fortuna ogni risorsa me ricusa  
 Goi da morir da la malinconia?

Mi scrivo per mi solo, e per mi spendo  
 Quela monea che go, nè go pretesa  
 De lezer, de stampar quel che no vendo.

Xe questa la mia unica difesa,  
 Se i altri no la intende, mi la intendo,  
 Vivo del mio, xe tuta mia la spesa.

## XI.

Studiè l' istoria de la vostra zente,  
De quel paese che v' à dà la cuna,  
Che v' à tegnuo arlevà paternamente,  
Che v' à dà pan, e stabilio in fortuna.

Piutosto che imparar cosse da gnente,  
O assae per no saverghene nissuna,  
Finindola per viver miscredente,  
O più che *Dio* per venerar la luna.

Quel citadin, che de la patria tera  
L' istoria no conosce, xe quel fio,  
Che sconta ga l' origine soa vera ;

Che infin xe mulo, e no pol dir xe mio  
Quel nome che i m' à messo, o xe una sfera  
De un relogio che core, o che stà indrio.

## XII.

Queli che ghe vol ben al mio paese  
Li considero come mii fradei,  
E no podendo ch' esserghe cortese  
Li trato in confidenza, e senza el *Lei*

Li voria veder trenta volte al mese,  
E come un pare ch' ania i so putei  
Li stimo se i xe zoveni, e le spese  
Ghe faria del mio pan de semolei.

Se po i xe vecchi co tuto el rispeto  
Voria servirli, e procurar voria  
Che i gavesse ogni sorte de diletto,

Ma se nemici de la patria mia  
Voria spogiarli, torgher el pan, el leto,  
E vorave mandarli in picardia.

## XIII.

La nostra gondoleta veneziana  
Dei bambini de Venere xe cuna,  
Xe 'l coo dove le grazie va a far nana,  
De tuti xe la cocoleta bruna.

Con nu la incontra ogni vicenda umana  
Sul canalazzo, in rio, su la laguna,  
La xe con nu dolente, e mata, e vana,  
Al sol, al fresco, al raggio de la luna.

Del citadin amiga, e del foresto,  
Ela mantien del barcarior la razza,  
La xe del solazier scherzeto onesto.

La xe lanza a un guerier senza corazza,  
La ispira el canto, e xe Torquato el testo,  
Co l'acqua alta ela scorsizza in piazza.

## XIV.

La compassion de le miserie umane  
Xe come la stagion de primavera,  
Che coi fiori, e l' umor de le fontane,  
Consola, e dona el gaudio su la tera.

La povertà che sperimenta vane  
Spesso le umiliazion de la preghiera,  
Che da ela se vede andar lontane  
Le persone de rica e de alta sfera ;

Oh ! quanto, oh ! come, se gode e conforta  
Co la pietà ghe fa un sorriso, e sente  
Qualcheduno che bate a la so porta !

E co la trova in mezzo a tanta zente  
Un' anima cristiana che ghe porta  
La carità che ga negà el potentè.

## XV.

L' ore prime del di me piase assae,  
 Perchè tuto me mostra atività,  
 Vigor de vita, bona volontà,  
 L'industria che spassizza le contrae.

No vedo le boteghe popolae  
 Da tanta zente oziosa che sta là,  
 Come scolari de Università,  
 A imparar fiabe a rechie spalancae.

No sento come a l' ore de la sera  
 L' urlo del popolazzo imbragion,  
 O i canti de sirena lusinghiera :

No vedo omeni e done a sbordelon,  
 Ma invece qualchedun con fede vera  
 Che se fa el segno de la Redenzion.

## CANZONETE.

## LA VICINANZA.

Co son qualche volta  
 Vicin de culia,  
 Che mi chiamo mia,  
 Che el cuor m' à robà,  
 Me par d' esser fora  
 De tuti i mi guai,  
 Nè d'esser stà mai  
 Me par sfortunà.  
 La vardo, e me incanto,  
 Ghe parlo, e me godo,  
 Nè invidio sul sodo  
 L' onor de un sovràn.  
 Ma po se ghe strenzo  
 La man in secreto,  
 Me par un dileto  
 De aver più che uman.

## EL RICORDO.

Sin benedeto el zorno  
 Che mi t' ò visto, o Nina,  
 E che de mi vicina  
 Cara ti t' à sentà.  
 Me lo ricordo ancora,  
 Sempre me par, ben mio,  
 Che no sia mai spario  
 Quel benedeto di.  
 Ti geri ben vestia,  
 Vestia come da festa,  
 E ti gavevi in testa  
 Un bocolo d' amor ;  
 Ma in sen come sul trono  
 Te stava quel fioreto,  
 Che simbolo xe schieto  
 De la semplicità.  
 Quel zensamin, Nineta,  
 Vardandolo m' à dito :  
 No stago qua in sto sito  
 Senza el mio gran perchè.  
 La Nina m' à prescielto  
 Fra mile e mile fiori,  
 Perchè mi più de lori  
 Somegio al so bel cuor.

## CONCLUSION.

Vedeu sto omeneto  
 Grassoto, tarmà,  
 Canuo, franco, schieto ?  
 L' è un vechio soldà.  
 Vedeu qua sto tomo,  
 Che fa el cortesan ?  
 Lu xe un zentilomo,  
 L' è un bon venezian.  
 Vedeu sta persona  
 De tanto morbin,  
 Che vive a la bona,  
 Maturlo un tantin ?  
 Vedeu sto celenza  
 Poeta ogni di ?  
 Con vostra licenza,  
 Paroni, son mi.

# POESIE

DI

LUIGI MARTIGNON.

---

## LA PRIMAVERA.

Sto mazzo de fiori  
De vari colori,  
Ti no te l'immagini  
Chi a mi me la dà?  
L'afar xe inocente,  
L'è un puro accidente,  
Adesso a contartelo  
Sincero son quà.

Modesta putela,  
Che semplice e bela,  
Passava sti grebani  
Sul nascer del dì,  
Per puro accidente,  
Per caso inocente,  
M'è dito vedendome ....  
M'è dito bondì.

Bondì xe un saludo  
Da mi conossudo,  
Fra l'anime semplici  
Saludo cordial,  
E se l'accidente,  
Se 'l caso inocente,  
M'è fato ripeterlo,  
No xe gnente mal.

*Racc. Poes. Ven.*

Quel dì al complimento  
No zonto un acento:  
No posso più vederla  
Per tre quatro dì;  
Ma el caso inocente,  
El puro accidente,  
La porta in sti grebani ....  
Ghe digo bondì.

La ga in t'un cestelo  
Qualcosa de belo;  
Che viole, che anemoli,  
Che sorte de odor!  
Per puro accidente,  
Per caso inocente,  
Ghe digo regalime,  
Putela, d'un fior.

Tra quella avenenza  
Mo quanta inocenza!  
No tarda d'un atimo  
A dirme de sì!  
Cüssi d' accidente,  
Per genio inocente  
Amor ricercandote  
Diressistu ti?

58

De fiori un mazzeto,  
 La forma perfeto,  
 E mentre per tormelo  
 Slongava la man,  
 Sta puta inocente  
 Vegnindome arente  
 Me dise: quel zovene  
 Ve prego andè apian.

Sti fiori odorosi,  
 Che ancuo xe preziosi,  
 Credeu che raccolti  
 Li gabia per vu?  
 Putela avenente,  
 Che a vu ve xe arente,  
 Sincera, credemelo,  
 Me preme de più.

Ve dago el mazzeto,  
 Ma a pato che in peto  
 De quella sti bocoli  
 I vaga a morir;  
 Nè caso inocente,  
 Nè puro accidente,  
 Sta cossa, che v' ordino,  
 Ve portir a tradir.

Volea ringraziarla,  
 Volea saldarla,  
 Ma pronta qual fulmine  
 L'è corsa da là.  
 Restando dolente  
 De no saver gnente  
 Chi gera la zovene  
 Che m' à regalà,

Nasando el mazzeto  
 M'è nato un sospeto,  
 Lo vardo, lo esamino,  
 Lo torno a vardar;  
 Sior sì l'acidente,  
 El caso inocente,  
 Me fa quasi subito  
 De tuto acertar.

Gavea sta putela  
 Minià la cordela;  
 In modi assae semplici

Ghe gera notà:  
 « Che a ti Primavera,  
 Per stima sincera  
 Un baso mandandote,  
 Quei fiori te dà. »

Contento e beato  
 Sto caso m' à fato;  
 Ghe penso, e pensandoghe  
 Me tegno più in bon;  
 Sodisfo al preceto  
 Mandando el mazzeto;  
 Tesoro, ricevilo,  
 Te 'l dà la stagion.

### L' I S T A'.

#### CAMPESTRE E CITADIN.

Dala cima d' un vecchio carober  
 Co un'ose che ve seca i ..... me capì,  
 Publica la cigala a più poder  
 Che dell' istà tornai xe i boni dì,  
 La rana dal paltan dise l' istesso,  
 Dele bestie cussì tuto el complesso.

Strepita pur cigala inanemada,  
 Canta pur racoleta spiritosa,  
 Finchè dando una o l'altra una crepada,  
 No sentirò sta musica penosa,  
 Ma mi che stego ben tanto in cità,  
 Pensa se vegno via perchè xe istà!

Se 'l zorno qua no vedo a vegnir fora,  
 E a depenzerse 'l ciel co più colori,  
 Se osei no ascolto a saludar l' aurora,  
 Che alegra a l' aparir l' erbete, e i fiori,  
 Se 'l matutin baritono no sento  
 D' un aseno che canta, o dell' armento;

Cossa m' importa a mi, se facilmente  
 Posso trovar pienissimi compensi,  
 E ste belezze che no stimo gnente,  
 Ghe n' ò che le sorpassa in tuti i sensi,  
 E a l' alba, e a mezzo zorno, e su la sera,  
 Godo dei passatempi a centenera.



Xe la delizia de chi sta in campagna  
 L' insidiarghe la vita a l' inocente  
 Passaroto cordial, che la compagna  
 Cerca trovarse no temendo gnente,  
 E per questi va a l'apice el solazzo  
 Quando casca el meschin drento del lazzo.

Qua invece l' oselac xe d' altra sorte,  
 E i merloti, che casca in quella rede,  
 Barbaramente no vien trati a morte,  
 E invece a tripudiar qua se li vede,  
 Perchè quando le pene i ha ben lassà  
 Se averze 'l lazzo, e i resta in libertà.

Co tuto l' entusiasmo a decantar  
 Sento le passegiae sentimentali,  
 Che proteti dall' ombra se va a far  
 Quando più scalda el sol da certi tali,  
 E ascoltandoli lori i par decisi  
 A no sperar quei gusti ai campi elisi.

E da nu no ghe xe forse altrettanto  
 Per el studioso, e l' omo inamora,  
 Ombrosi siti, e solitari tanto?  
 No gavemo anca nu fora, e in città,  
 E no se vede forse andar vaganti  
 Sapienti, disperai, mami, e galanti?

Quando Fetonte la quadriga smonta,  
 E precede la note un zefireto,  
 Qualche onesta Napea se vede pronta  
 Sortir al fianco de l' amato ogeto.  
 E sti passegi, e l' ombre ha tal virtù,  
 Che quel par un parente, e no l' è lu.

Longo la riva d' un tranquilo fiume  
 Se sente a stirachiar crome galanti  
 Quel fervido amator che ga el costume  
 De starghe a chi el vol ben sie passi avanti;  
 E l' acqua, e l' aria, e quel beato sito,  
 Par che risponda: « sior macaco zito. »

Uniti a congiurar contro el bon senso  
 In remote campagne altri vedè,  
 Dandoghe ai so secreti un peso imenso,  
 Secreti che saver presto podè,  
 E a sti dialoghi l' eco e la campagna  
 Dise a chi più ragiona « Oh ! che lasagna ».

Contro l' anor platonico labra  
 Intento el peruchier via de paron;  
 E tanto el pol quanto più scura è l' ora,  
 E i platonici, messi in convulsion,  
 Drio ghe corè, e trovando un vago viso,  
 Platon ga in bota poro gramo un sfriso.

Se 'l monotono son d' agreste legno  
 Chiama nei prai le piegore abandae,  
 Se ai pigri tori el fa cambiar contegno,  
 Che diventa più alegri, e svelti assae;  
 Se scherza el beco, e salta la vedela,  
 Credo sta scena interessante e bela;

Ma no per questo convegnir mi devo  
 Co chi le glorie de la vila spande,  
 Che analogia de gusti, e de solievo,  
 No gabiamo anca nu qua da ste bande,  
 Anzi risponderò che ancora in questo  
 Semo copiai come za in tuto el resto.

Foriera del riposo apena l' ombra  
 Cala apianin dai tetti citadini,  
 Che vasta piazza in t' un mumento ingombra  
 Se vede d: galanti, e da zerbini,  
 Che aletai da un sonar ben regola  
 Spenze per arivarghe, e i ghe xe là.

Fin che d' Euterpe dedicadi al culto  
 Spande el fià da per tuto i so seguaci,  
 Mercurio no ghe bada, e fa l' insulto  
 De mandar dei so puti i più capaci,  
 E mentre Euterpe ve desmissia afeti  
 Roba sti spiritosi i fazzoleti.

Venere sempre mata, e capriciosa,  
 Ne le sudite soe svegia el morbin,  
 Nè distinguendo vedova da sposa,  
 Tenta meterle tute a quel confin,  
 E se la trova qualche reinitenza,  
 Pur de spantarla adio siora prudenza.

Amor, so fio, che ghe xe sempre a lai,  
 Tira colpi da mato ogni mumento,  
 Interesse, e capricio, accompagnaì,  
 Fa doni a larga man d' un certo unguento  
 Che da quei svelti chimici è chiamà,  
 « Secreto per mostrar cordialità. »

E se vedessi che bocon de fracà  
 Per poder otegnir la scatoleta! ....  
 Nè xe la vista d'acquistarla a maca,  
 Che 'l genio più scozzona, e più diletta,  
 Ma più che 'l costo, i calcola l'efeto  
 De sto veneratissimo secreto.

Ghen pretende a ogni pato in dopia dose  
 Chi ga pension per dirse inamoraè,  
 Lo vol diverse sfortunate spose  
 Co dei vecchi marii sacrificae,  
 Ghen vol la dama, o 'l cavalier servente,  
 Che finge un gusto de trovarse arente.

Strepita per averlo el licardin,  
 Che co le vecchie fa da inamoraè,  
 Che mentisce un amor tanto più fin,  
 Quanto ogni dì de più l'è compensà ....  
 Curte xe tanti, e tanti i concorrenti,  
 Che 'l va via tuto in piccoli mumentì.

Anca la compassion vestia da vecchia,  
 Mal ferma in pie s' interna tra la fola,  
 E bloccando qualch' una, in t'una rechia  
 Insinuante spende una parola,  
 E ghe dise mostrando un tal da drio,  
 « Movite a carità, varda quel fio !

A cavalo d'un zefiro lisier  
 FAVOR svolazza da sta parte in quella,  
 Invidia lo persegue a più poter,  
 E gelosia tastandose in scarsèla,  
 Ustinada d' aver visto el sicuro,  
 Trova tuto puntivo, e tuto duro.

A tanti colpi de diverso peso  
 Le ferie se spalanca in t'un istante,  
 E se 'l cuor per fortuna el resta ileso,  
 Almanco la rason xe vacillante;  
 Vulcan intanto se conforta lu,  
 Disendo, nela scuola eco un de più.

Qua gh'è teatri, e in vila no ghe n'è  
 Qua continui foresti, e là nissun,  
 Da novo gnente mai no sentirè.  
 E un politico là resta a desun,  
 Qua almanco grazie a Dio matina e sera,  
 O se teme, o se crede, opur se spera.

L'oro e l'ariento per le strade trato,  
 Se gh'augura el bon viazzo incassetà;  
 E no avendolo almanco ne xe grato  
 De saver quanto l'è, dove che 'l va,  
 E tati gode dir podendo, oh dio  
 Tra quel'oro ghe n'entra anca del mio !

Insonia cossa strazio el tempo adesso  
 In tanti, e tanti inutili confronti !  
 A strussiarne cussì no xe l'istesso,  
 Che vaga a provocar chi sarà pronti  
 A favorir de l'aseno in risposta,  
 Monea cuniada per ste cosse apostà !

No no, chi vol se la diverta fora,  
 Tra Satiri e Napee fin che ghe piase,  
 E de la vila soa che i la discora,  
 Come megio i la vol, che i lasso in pase,  
 Za mi ho deciso, e da de qua no sorto,  
 Se non quando ingrassar dovrò l'orto.

## L'AUTUNO CITADIN.

I benefici influssi alla campagna  
 Chiama della stagion la magior parte,  
 La vila più, che la città guadagna,  
 Parte le bele, i cavalieri parte,  
 E qua no resta che chi ga el dispetto  
 De no aver qualche campo, e un tugurieto.

Scalzo l'autunno, e imbrodolà dal mosto,  
 Fa i complimenti, e lu se va a incontrar;  
 Chi in mezzo alle campagne al fin d'agosto  
 Solazzosi se porta a prindesar,  
 Ai capi de famegia intanto un corno  
 L'abondanza ghe prepara ogni zorno.

Per questo i zerbinoti in desossè  
 Passegia in malumor per ste contrae,  
 Perché la tenerissima moatiè  
 Resta lontana oh dio! per più zornae,  
 E d'andarla a trovar nol trova el conto,  
 Nè i soldi sempre, o l'equipaggio pronto.

Lavera i sapa fango in sta stagion,  
 Per portar le risposte, o le ambassae,  
 Se mete anca l'amigo in compassion,  
 Se 'l va presso a ste tali in ste zornae,  
 E con forme cordiali el teryo tien....  
 Oe disè, Gaspareto, òi dito ben ?

Mentre fra le delizie e l'alegria  
 Mena diversi vita pastoral,  
 Qua se la fa melensa, e dessavia,  
 In t'una noia che no gh'è l'egual,  
 Stando ai caffè, che no ga mai nissuno,  
 O pochi nel' istà, manco in autuno.

Se consulta una insipida gazzeta  
 Per inganar se ghe xe caso un'ora,  
 Ma verità no gh'è che ve diletta,  
 O quele poche le ve seca, e acuora,  
 E de queste el parlar no porta un fruto...  
 « Ghe xe el petegolon che conta tuto.

Sempre più prosperoso, e più ridente,  
 El comercio osservar spesso ve fa  
 Quel boteghier, che no facendo gnente,  
 Tuti chi passa esaminando stà,  
 Vedè l'artista che se grata in testa,  
 Che sbadagia da sono, e che fa festa.

Camina a fronte bassa el progetista,  
 Che nei progetti no ga più speranza,  
 Gnente al santer se ghe presenta in vista  
 Da poder migliorar la circostanza,  
 El borsariol perfin vedè dolente,  
 Perché nol trova da robar più gnente.

Ma in mezzo a un mal'umor de sta natura,  
 Che trasforma in deserto ogni soggiorno,  
 Del teatro la prossima apertura,  
 Che a eseguir la se va de zorno in zorno,  
 Raviva almanco, se alegria no dona,  
 E de questa ghen parla ogni persona.

Tornarà su ste scene, uno ve conta,  
 Monsieur, no me ricordo, el balarin,  
 Del qual la fama veritiera e pronta,  
 Ga portà el nome all'ultimo confin;  
 Qua i l'ha chiamà co una scrittura in bianco...  
 Cospetazzo ( i risponde ) ah gnente manco ?

Madama, no so dir, bufa famosa,  
 Dela qual ghe ne parla ogni giornal,  
 Benchè con una paga assae vistosa  
 Vien per farghe una grazia al conte tal,  
 Senza de lu no i la poteva aver ....  
 Grazie a madama de sto gran piacer.

A farne palpitare da gelosia  
 Qualche novo mario vien un teuor,  
 Che farà desmissiar sta frenesia  
 Anca a Parigi al numero maggior,  
 E si là le muger manca d'espri,  
 No cambiando el galante ogni do di,

Da poco assae vegnù da l'Inghiltera  
 Per nostra sorte el s'è trovà a Venezia,  
 Dove un rico influente ha avù maniera  
 De condurnelo qua per un'inezia :  
 Siecento scudi, una serata, e i viagi ;  
 Se l'ha podesto aver co dei vantaggi !

Madama ( dirò el nome un altro zorno )  
 D'una ecelente qualità dotada,  
 E che fa da l'Olanda ancuo ritorno,  
 Vien, se pol dir, per far la campagnada,  
 E grazia imensa la se pol chiamar,  
 Che la vegna in sto logo ancuo a balar.

I bufi i è quei che l'apertura ha fato  
 De diversi teatri i più stimai,  
 Ai quali molti re ga fissà un piato,  
 Che infin che i ghe lo dà nol manca mai,  
 I è bufi in scena, e in corte i xe bufoni,  
 E qua i fa grazia de veguir : minchioni !

Xe de prima quadriglia i figuranti,  
 I à balà nel Prometeo un dì a Milan,  
 Celebri se pol dirghe a tuti quanti,  
 Nele prime cità lori ga pan,  
 La mandra, insoma, o sia corpo de bali,  
 La xe insigne per fato, e per giornali.

De l'autor più aplaudio, che mai ghe sia,  
 Xe la musica, squasi afato nova ;  
 D'ecelente scrittor la poesia,  
 E l'una e l'altra s'ha gustà a la prova ; ...  
 Curte l'impresa ha scomenzà co chiasso,  
 E promete i spettacoli fracasso.

Ma un terzo che à sentio senza parlar  
Tuta sta longa imensa filastroca,  
Ragionevole trova el domandar  
Cossa de spender veramente toca;  
Se quei dai palchi el consueto esborsa,  
Se gavaremo in s. Martin la corsa. (197)

Forma de varie discussion sogeto  
La prima de le do proposizion,  
Chi pretende che i daga el consueto,  
Molti le trova fora de rason,  
De quei, che afita i palchi, i fa la lista,  
E se sa tuti i nomi a prima vista.

Fra questi el corvo de le male nove  
Profetizza rovina a l' impresario,  
Chi smanioso se apossima a le prove,  
E vol che invece vaga a l' incontrario,  
Se fomenta prestissimo el partio,  
E se va per sti afari avanti e indrio.

La sera che 'l spettacolo va in scena,  
Che bacan, che fracasso, e che concorso!  
I spentoni xe a miera in quella piena,  
Vario in boca d'ognun nasce el discorso,  
E la bigonza monta i Ciceroni  
Del teatro, per piazza, e nei cantoni.

Per quanto grato, che riuscido el sia,  
La terza sera xe ristreto el mondo,  
Quei che pol frequentar fa la partia,  
E quei che resta xe pocheti in fondo;  
Ma se no xe l'abonamento basso  
Gnanca i signori no se tol sto spasso.

E si, se posso dir quello che penso.  
El lassar el teatro in abandon,  
Fa prova che no gh'è molto bon senso,  
Cativissimo gusto, e direzion,  
E chi no xe un misantropo deciso  
Sarà in questo co mi spero d'aviso.

Al teatro concorre 'l negoziante,  
El possidente senza dubio va,  
L' impiegato, l'artier, le classi tante,  
In teatro se unisce in società,  
L'omo d'affari de i so afari parla,  
E sta chi ga la bela a ninfegiarla.

Per questo dai palchetti ogni mumento  
Sporze la bela timorosa el colo,  
E co un ochio infiamà dal sentimento,  
Cerca del so pensier l'idolo solo,  
E un geloso mario, che tuto teme,  
Varda dove ela varda, e intanto freme.

Per questo i sciali butai mezzi fora,  
Da telegrafi serve al moroseto,  
Che a segni intende co le fissa l'ora  
Co una man eloquente al parapeto,  
Per questo de parlar no fa de mauco  
La ventoleta. o el fazzoletto bianco.

L'è un ricapito certo al forestier,  
Dele facende soe parla chi vol,  
Fra l'armonia combina l'usurer,  
Nela so profession quanto che 'l vol,  
E se pol dirghe armonico a quel stoco,  
Che qua più d'uno va a ridur pitoco.

Per questo dunque stabilir me giova,  
Che un caratere spiega antisocial  
Chi passatempo grato no lo trova,  
Come tuti lo trova in general,  
Se 'l teatro benissimo chiamar  
Lo podè co rason porto de mar.

Ma quei che ga la bela a la verdura,  
Che mal respira per no averla arente,  
De sti gusti sprezzar pol la natura,  
Nè mi per questo li condano gnente:  
Conosso amor, so cossa sia la bela,  
E che gusto xe 'l far da sentinela.

Questi stralassi pur, fin che la torni,  
E fedeli i se mostri in sta maniera,  
Ma se avien che la vegna in pochi zorni,  
Guai se al teatro no i sarà una sera:  
Quele ventolette, i sciali, e i fazzoletti,  
Soministra al Corrier spesso sogeti. (198)

Finio l'autano vedarò lo spero  
Cloe diventada simbolo d'amor,  
E Nerina che chiama el mondo intiero  
A dirghe cara, e dedicarghe el cuor,  
E numerando quei che gh'è d'atorno,  
Cantarò le so glorie un altro zorno.

De quele vile intanto invidio el ben,  
 Che rancura in sti dì tanti tesori,  
 Stufo de no cantar come convien,  
 « E donne, e fiaschi, e cavalieri, e amori,  
 Stando rabioso in aspetar qualcuno,  
 Seco del viver citadin d'autuno.

## L' INVERNO

### CITADIN E CAMPESTRE.

Torna a la noia citadina ancora  
 Chi de la vila dedicà a la cura  
 Solito gera prevegnir l'aurora,  
 E avezzo in quiete a vaghegiar natura,  
 Mentre aquilon molà da la caena,  
 Malinconici al mondo i zorni mena.

Le volpi moscovite, e le africane,  
 Guadagno porta a chi ghe dà la morte,  
 Per le peli che passa a le nostrane,  
 Che soto a un altro ciel ga un'altra sorte,  
 E le nostre cazzade in dopia scorza,  
 Sfida del fredo l'impeto e la forza.

Fato d'ogni caffè l'ozio portier,  
 Stà ognun che ariva esaminando atento,  
 E adempindo solecito al dover  
 Verze e sera la porta ogni mumento,  
 E fra i so prediletti, a quel più bon  
 Topico el ghe destina el so canton.

Svelta curiosità xe sempre in moto,  
 E sporze la gazzeta a quello, e a questo,  
 Stupidità moltiplica el ridoto  
 De quei che vien chiamai zente de sesto,  
 Cussi col meditar su le gazzete,  
 Se divide a capriccio i statì a fete.

Vizio, primo garzon de sti ridoti  
 Sti dialoghi per lu bandii voria,  
 Co. bele forme i docili divoti  
 Facilmente l'induse a far partia,  
 E quando che 'l li ha spinti a tor le carte,  
 Novi suditi el cerca in altra parte.

Seconda la stagion tuti i progeti,  
 Che da novo ogni dì vien meditai,  
 Pranzi, conversazion, cene, baleti,  
 Inevasi no lassa i memoriali,  
 Che d'Amor vien prodoti al tribunal,  
 O da un sesso, o da l'altro, in carneval.

Mentre nele cità se passa i zorni  
 In sta forsi monotona maniera,  
 Facendo anca i più sodi i capi storni  
 Da la punta del dì fin a la sera,  
 A la campagna qualche ochiada demo,  
 E quel viver ristreto esaminemo.

Quercia mal ferma, rustega caseta,  
 Copiosa razza de meschin colono,  
 Che ranichiada drento a una stalleta  
 Tenta ogni mezzo d'inganar el sono,  
 E chi messo a un laorier, chi a l'altro dà,  
 Possibilmente mai sorte da là.

Dona Cassandra che per vender late  
 Nela bona stagion cambia paese,  
 Conta le so aventure a dona Cate,  
 Che le resta ascoltando a rechie stese,  
 E un uso citadin mete in canzon,  
 Se uol ghe par a ela uso el più bon.

Parla de qualche vechio inasento,  
 Che de prima matina a passo tardo,  
 La se l'ha visto caminar da drio  
 Co un per d'ochi infuriei da gato pardo,  
 Freme de quel zerbin, che temerario  
 Spesso se mostra a l'onestà contrario.

La dise, e assae de più dir la voria,  
 Se imaginando el fin de sto discorso,  
 L'ex professa in amor dona Maria,  
 Savia abastanza no troncasce el corso,  
 Sostituindo de le fiabe in scena,  
 Che a le volte ai putei serve da cena.

Alegramente intanto in t'un canton  
 Ronfa Tognoto a fianco de la bela,  
 Canta paron Martin de le canzon  
 Mentre i manzi el carezza, o una vedela,  
 A la porta sta i fioi spetando el pasto,  
 Per gentilizia avidità in contrasto.

Molta polenta a squasi gnente unia,  
 E un'acqua tenta per cazzarla a segno,  
 Xe quel poco, del qual vien imbandia  
 Sta parca mensa de no molto impegno,  
 E ringraziando el ciel tuto à incontrà,  
 Che in t'un ave maria xe parecchià.

Ma el malamor che nei bancheti spesso  
 Cambia in cativo el piato el più condio  
 Là d'introdur no ghe xe mai permesso,  
 E che sia pur mal coto, o dessavio,  
 Fame, e salute, e un'alegria preziosa,  
 Ogni vivanda fa grata e gustosa.

Perchè la digestion sia regular,  
 Bibite no se cerca oltre le usae,  
 Nè se vede d'Alepo a brustolar  
 L'amaro gran, che nu stimemo assae,  
 E là per questo no farà mai mal,  
 El sistema aborio continental.

In bonissimo umor spesso la vila  
 Mete contadinesco un noviziado,  
 Se unisce a Elpin la tenera Lucila,  
 Quando de unirli Amor li trova in grado,  
 E quel sì, che li liga eternamente,  
 La boca el dise, e l'anima lo sente

Nè manco i sposi fortunadi i xe,  
 Se una musa balzana in sta ocasion,  
 Agindo col so massimo perchè,  
 Scrive qualche sguazzeto, o una canzon,  
 E se fodrae no vien le balconae,  
 Da fandonie poetiche stampae.

Cussì no xe la verità insultada,  
 In sto modo no vien Febo secà,  
 E nei gusti i più veri una zornada  
 Passa chi no xe sposi, e chi à sposà,  
 Nè amari fruti a maturar se vede  
 Fin dal dì primo de la data fede.

Musa vame lontan, za te capisso,  
 Che trar ti me voressi a dei confronti,  
 No stuzzegarme, caro ben, che sbrisso;  
 I matrimoni da cità tien sconti,  
 No ghe ne voi saver, te lo ripeto,  
 Bardassona va via, lassime quieto.

Co quella bizzaria toa natural  
 Piutosto sugerissime qualcosa,  
 Che senza farghe a chi se sia del mal,  
 Ridur brillanti le mie inezie possa ....  
 Sia toa la cura de tegnirme a segno ....  
 Ah ti ridi furbazza? .... adesso vegno.

## I BAGNI DE ABANO.

La Libia a spalancà le so doane,  
 E neto de gabele el caldo vien,  
 Za la stagion sentir fa le fumane  
 E a nu tropo vicin Febo se tien,  
 Voi dir co tuta quanta sta secada  
 Che la stagion d'istà xe capitada.

Tropo desfortunai sentimentali  
 Eco el tempo de far cure perfete,  
 E nele onipotenti acque termali  
 De trovar alafin salute e quiete;  
 Chi ga dogie, e camina o strupio o xoto,  
 Fazza dunque per Abano fagoto.

Oltre a la sanità che vien promessa  
 Da un rimedio de lusso, predicà  
 Bon per tuti i malani, in quella istessa  
 Dimora felicissima se ga  
 Mile e mile aventure ogni qual trato,  
 Che fa belo quel logo, o manco ingrato.

E mi che tuto ò conossù l'impianto  
 De un paese del qual son citadin,  
 Perchè in quello a la longa ho speso, e spanjo  
 Senza trovarghe ai mali mii confin,  
 Libero posso dir la mia opinion,  
 E de tuto formar la descrizione.

Gh'è batteria de spuzze, e de vapori,  
 Che tien opresso eternamente el fià,  
 Gh'è fonteghi de reumi, e de dolori,  
 D'erpeti, e de magagne in quantità,  
 E va zirando altiero in quel paese  
 L'ancuo cosmopolita umor francese.

E xe per lu ogni zorno carneval  
 Mentre in mascara el corre ogni mumento,  
 Ora el diventa dogia accidental,  
 Vertigine, o fumana, o svanimento,  
 O gentillio insulto, o mal contratto  
 Da l' aria, da un patema, o da un contato.

Ma nol cambia sostanza, e un ben acorto  
 Medico mai no cambia medicina,  
 E la raise americana a torto  
 Squasi mai per combaterlo el destina,  
 Che sussidiarla ben dai fanghi, e bagni,  
 Certi la fa su quel umor guadagni.

Nè i mali solf in mascara se mete,  
 Ma chi xe da sti mali oppressi ancora,  
 E giusto un passatempo el se ripete  
 Dai foresti che ariva ogni mezz'ora,  
 E che apena lassadi i so paesi  
 Là a intitolarse i vien conti, e marchesi.

Xe quello el logo dove impunemente  
 Pol darse ton qualunque figuroto,  
 Dove che per mario passa el parente,  
 Dove rico se crede anca el più roto,  
 Dove la mantegnua passa per dama,  
 Dove contessa una massera i chiama.

Xe là dove se spende a larga man  
 I titoli de conte, e de celenza;  
 Conte xe el gato, xe celenza el can,  
 Nissuno insoma va restar mai senza,  
 E se ghe xe un sogeto anca abietissimo  
 Tol su, savendo far, de l'illustrissimo.

Oh quanti credo per aver sto ben,  
 Per esser patentai da un camarier,  
 O i riva aposta, o molto i se tratien!  
 E oh quante pur maestre nel mistier,  
 De sconder chi le sia sinceramente,  
 Trapola svelte l'inesperta zente!

A proposito qua capita un caso,  
 Che a un sedicente svelto è nato un di,  
 E del qual no saria sta persuaso  
 Se no ghe fusse in parte entrà anca mi,  
 Caso che molto ben tende a provar  
 Quel che fin quà m' à piasso de contar.

*Racc. Poes. Ven.*

Gavèa condoto a divertirse un-toco  
 Comi una dogia che ò sposà da puto,  
 Dogia che per averla ho speso poco,  
 Ma che presto poteva costar tuto,  
 Se per ridurla un fià manco insolente  
 In Abano no andava, e prestamente.

Là contentada in ogni so caprizio  
 Carezzar la facea pien de premura.  
 Là tisane, là bagni a precipizio,  
 Là saroti, là fanghi, e là ogni cura,  
 E credè pur, che frotole no scrivo,  
 Go dà fin per quietarla armento vivo.

Ma dei mli sforzi mai ben sodisfada,  
 Anzi più ingrata quanto più faceva,  
 L'avaria mile volte abandonada.  
 Ma el lassarla da mi no dipendeva,  
 E intanto fra st'insulti, e sta insolenza  
 Me predicava el sior dottor pazienza.

Mentre co sta mia barbara compagna  
 Parte facea d'una conversazion,  
 Dove sempre qualcun gh'è che se lagna,  
 Nè se canta de guai che la canzon,  
 Un pocheto de spasso me procura,  
 Una seconda mia nova aventura.

Da fresco ai bagni capitada gera  
 Una tal, co una vecchia, e un zovenoto,  
 E tuti tre che per la sola ciera  
 S' avaria lucrà molto a far casoto,  
 E la zovene mi za a prima vista  
 L'ò stabilida una venal conquista.

Da falsi, e boni aurei ornamenti opressa  
 Più carne che vestiario espone in vista,  
 Industre pompa che 'l mistier confessa  
 De far de cuchi subito provista;  
 La tira in rede co un saludo, e par  
 Che la voglia l'amor ben trafegar.

E questa vol el pien de la locanda  
 Che de quel puto la consorte sia:  
 Lodato Dio lassemola da banda,  
 Za più tardi farò l'ispezion mia;  
 Intanto so che per mario la 'l chiama,  
 E che la vecchia par che sia la mama.

Descriverò la mama : alta, e grassota  
 Drento a un negro andrì tuta ravolta,  
 Un viso longo, un viso da marmota,  
 Ma che pur mostra de l' astuzia, e molta,  
 Sacerdotessa favorìa de baco,  
 E corsara da soldi, e da tabaco.

No passa minga quatro dì che un puto,  
 Liga co tuti tre gran conoscenza ;  
 Beato de sta cossa el xe per tuto,  
 E i se trata co tanta confidenza,  
 Che i pareva strettissimi parenti,  
 O da un secolo almanco conoscenti.

L' amico sempre più se scalda i ferì,  
 E quel' altro a mostrar va gelosia ;  
 La signora sospira, e in gran pensieri  
 Chi ghe stasse a badar la credaria,  
 E a la mama el dolor pesa cussì,  
 Che no la disna che do volte al dì.

Za el nostro gazzetin de la locanda  
 Profetizzava una formal rotura,  
 Za stava tuti co una smania granda  
 De conoscer el fin de l' aventura,  
 Quando se sente dir che 'l sior mario  
 Partir deve per Bressa el zorno drio.

I amalai a sta nova i se strassina  
 Da una camera a l' altra, e i fa comploto,  
 Tanto più, quando i sa che madamina  
 De no moverse gnanca la dà moto,  
 E che 'l mario, de la so mama in cura,  
 Lassa per qualche dì quella creatura.

Felice viazo, xe quel sior partio  
 Dopo d'aver pregà per la so testa :  
 Bacante d'alegrezza el puto mio  
 Vede per lu che l' indoman xe festa,  
 Se nol ga spini, e se la vechia in sacò  
 A conzegnarla val vin e tabaco.

Za la note che in Abano aparisce  
 Un' ora e mezza almanco avanti sera,  
 Se la luse se perde, e se smarisce  
 Dala pesante opressa atmosfera,  
 Chiama, e rancura in t' un istesso sito  
 Quel de carogne numero infinito.

E za anca tuti a riposar s' à messo,  
 Che mi in sfesa a la porta, e in sentinela  
 Stago a vardar se 'l transito, permesso  
 Da una camera a l' altra, abia la bela,  
 E quando el xe verificà me meto,  
 Tuto a osservar da un provide buseto.

Musa con una toa cotola strazza  
 Quel che ti credi più scondi prudente,  
 E lassa el quadro che a vardar me fazza  
 Nela parte che sia più concludente,  
 Mentre za el resto per quel fià de mondo,  
 Che m' ò acquistà, mi lo conosso a fondo.

Ma l' afar va longheto, e ben comprendo  
 Che la visita i aspetta de l' aurora,  
 Co la qual securissimo facendo  
 Marenda in prima, e sie parole ancora,  
 Se mi stago a aspetar che sia finio  
 Resto là duro fin al zorno drio.

Su la fronte del zovene amoroso  
 A l' indoman xe scritta la vitoria,  
 La bela nel penar trova riposo,  
 Xe la mama modesta in tanta gloria,  
 La borsa, i cuori, e 'l conto d' ostarìa,  
 Pretende amor che in uno unidi i sia.

Le cosse andava ben d' una maniera,  
 Che megio andar no le podea sicuro,  
 Quel' altro el se atendea da ancuo a stasera,  
 E a nu veder premea quel muso duro,  
 Quandochè in logo soo vien per espresso  
 Un fogio a nome del mio amico istesso.

Eco parola più, parola manco  
 Quello che nel fatal fogio ghe giera :  
 « Amico mio t .... di posseder già stanco  
 La bella, che passò per mia mogliera,  
 E smorbato assai più d' una mamaccia  
 D' umbo un regalo è giusto che vi faccia.

Godetele buon uomo in santa pace,  
 Che volentieri a voi tutte le dono,  
 E se il tenerle troppo vi dispiace,  
 Lasciatele partir, che a vèzze sono  
 A ramingar da scaltre, e tal che in fondo  
 Le si ponno chiamar donne di mondo. »



Chi podarà mai dir la confusion  
 De quele do castissime matrone,  
 Chi la rabia, e 'l dolor del nostro adon,  
 Che in presenza de trenta e più persone  
 Guadagna del macaco a crepa panza,  
 E infin da l'osto che una suma avanza.

Ma l'amara ingiotir pilola toca,  
 E quel conto saldar ch'à unido amor;  
 El ga fogo ne l'ochio, e fogo in boca,  
 El morsega, el biastema, el va in furor,  
 Tanto più che per farlo capucin  
 Gh'è de la mama un contesel de vin.

Fato fagoto ecolo in posta presto,  
 E direto no so per qual paese,  
 Nè quele do colombe l'à volesto  
 Dolente tropo dele fate spese,  
 E madame vegnue con tanto lusso,  
 Credo a caval le sia partie d'un musso.

Da quella volta in qua se me vien fato  
 De trovarme in sti loghi assae sospeti,  
 Sempre avendo in memoria el caso nato  
 Squadro nel viso ben tuti i sogeti,  
 Naso se mai del vin sento l'odor,  
 Giusto fra i titoladi, e fra l'onor.



# POESIE

D I

C A M I L L O N A L I N.

---

## EL REGNO IMAGINARIO.

Sin da quando quel pomo benedeto  
Adamo ga ingiotio per tradimento  
Ze sta segnà el teribile decreto  
Che nissuno a sto mondo sia contento,  
Che sia pochi i mumenti de diletto,  
Che tantissimi sia quei de tormento,  
Infati che campemo su sta tera  
Vitime de un destin che ne fa guera;

Chi la polenta a stento se guadagna,  
O altrimenti da fame bia che 'l mora ;  
Chi vive da Epulon nela cucagna,  
Ma ga mile rason che lo adolora ;  
Chi ga adosso perpetua la magagna,  
Nè un balsemo ghe ze che lo ristora ;  
Chi el cuor povaro diavolo ghe dona  
Per estremo dei mali a ingrata dona.

Uno zoga da onesto, e vien barà ;  
St'altro casca sul piano, e se fa mal ;  
Uno de tuto el soo fa carità,  
E termina mendico a l'ospeal,  
St'altro a mercantizzar s' à dedicà,  
E perde per disgrazia el capital ;  
Uno va in chiesa a recitar l'ufizio,  
E intanto so muger .... baron de vizio.

Se vede palmarmente che nu semo  
Messi drento sta vale per penar,  
E che senza costruto procuremo  
Da le sgrinfe del fato scapolar ;  
Anzi se ben la cossa analisemo  
Se deve fortunà considerar  
Quelo che tuto intiero no ga letop  
De le disgrazie el tomo maledeto.

Ze 'l mondo un mar d'ingani e de tormenti,  
E nu semo quei legni destinai  
A navegar fra le tempeste e i venti,  
Nè un porto de salvezza a trovar mai ;  
L'è una fornasa de carboni ardenti  
Indove tuti quanti vien scotai,  
L'è un trabochelo sconto, el ze una trapola  
Da la qual se pol dir nissun ghe scapola.

Chi ze da l'avarizia tormentà,  
Chi opresso dai rimorsi se bastona,  
Chi ze da fiera invidia dominà;  
Chi prova una superbia budelona,  
Chi ze da la lusuria supegà,  
Chi a l'odio, chi a la rabia, se abandona,  
E quei che a esaminarli par contenti  
I ze forsi sogeti a più tormenti.

Quelo che ga bon cuor nasce pitoco,  
 E quello che ga soldi a bataglion  
 Al povaro afamà ghe nega el toco ;  
 La forza ghe n'indorme a la rason,  
 El bon cristian vien batizzà per gnoco,  
 L'omo onesto no trova protezion,  
 El leterato crepa da la fame,  
 E l' aseno ze stufo de polame.

Se stima coragioso el prepotente ;  
 La baldanza se reputa franchezza ;  
 Se batizza galante el malvivente ;  
 Al bon cuor se ghe dise debolezza ;  
 Al vil se ghe dà el nome de prudente :  
 L' ambizion se considera grandezza ;  
 Omo d' inzegno vien chiamà el busiaro,  
 E se giudica economo l' avaro.

Oh! mondo porco, mondo detestabile,  
 De disgrazie sorgente inesauribile,  
 Oh! condizion de l' omo miserabile,  
 Che spesso l' esistenza fa aboribile ;  
 Oh! teatro d' oror, che a scena stabile  
 El quadro ne presenta el più teribile ;  
 Oh! labirinto dove grandò e picolo  
 De perderse per sempre ze a periculo.

Tuti po diferente ga el cervelo,  
 E in conseguenza el modo de pensar :  
 Chi vede belo el brutto, e brutto el belo,  
 Chi la magagna in tuto vol trovar ;  
 Chi soto la peruca ga el capelo,  
 E ritien de non esser singolar ;  
 Chi ga tanto de goba, e se supone  
 Dreto de comparirghe a le persone.

Chi pensa ai fati d' altri, e scorda i soi ;  
 Chi se radopia el capital col fruto ;  
 Chi prega per aver, chi dise voi ;  
 Chi è intolerante, e chi soporta tuto ;  
 Chi ze lasagne in mascara da eroi ;  
 Chi vol che interoga risponda el muto ;  
 Chi chiama matrimonio penitenza ;  
 E chi de la muger no pol star senza.

Uno spargna tuto, un tuto spende,  
 Uno brontola tropo, un tropo tase,  
 Un sempre acquista, un altro sempre vende,  
 Uno cerca la guera, uno la pase,  
 Uno sta in ozio, un altro ze in facende,  
 Un ghe piase i palazzi, uno le case,  
 Uno ga sempre pressa, uno ga flemma,  
 Uno dise orazion, st' altro biastema.

Chi in tuto vol trovarghe el so perchè,  
 Chi pretende saludi e prostinò,  
 Chi vol acqua co in pozzo no ghe n' è,  
 Chi sempre dise sì, chi invece no,  
 Chi ze fante, e vorave far da re,  
 Chi studia de drezzarghe i corni al bo,  
 Chi mete in dubio quel che ze sicuro,  
 E chi el tempo passà chiama futuro.

Chi parla de milioni, e ze un spiantà ;  
 Chi tenta de balar senza aver pì ;  
 Chi vien dal fango, e vanta nobiltà ;  
 Chi sta suso la note, e dorme el dì,  
 Chi vol far conti, e l' abaco nol sa ;  
 Chi crede dindio quel che ze pipì ;  
 Chi ze ignorante, e voria far da oracolo ;  
 Chi belo se supone, e ze un spettacolo.

Tizio ze trasportà per el cavalo,  
 Ze bravo per la scherma, e cazzador ;  
 Cajo sona el violin, coltiva el balo,  
 E ghe trova el so conto a far l' amor ;  
 Sempronio che a vardarlo el par un palo  
 Aspira in medicina a esser dotor,  
 E fra el numero imenso dei viventi  
 Ga tuti quanti gusti differenti.

Uno voria parlar sempre latin ;  
 Un mastega el francese, uno el todesco ;  
 Uno ze serio, un altro ga morbin ;  
 Uno in epico scrive, uno in bernesco ;  
 Un beve sempre acqua, e un altro vin ;  
 Uno vol el pan duro, uno el pan fresco ;  
 Un vive come i rospi, uno baraca ;  
 Uno fuma di e note, uno tabaca.

Uno poltron se gode a star sentà ;  
 Uno zira el paese, e no se stanca ;  
 Uno va in leto caldo, uno giazà ;  
 Un dopara la dreta, uno la zanca ;  
 Un voria sempre inverno, un altro istà ;  
 Un ghe piase la mora, uno la bianca,  
 E se vede cussì chiaro evidente  
 Che tuti pensa qua diversamente.

E fra tanti cervelli stravaganti  
 Un numero ghe n'è, Dio mel perdona,  
 Dal criterio comun cussì distanti,  
 Che no i ghe ne possede una de bona,  
 De quei ghe ne ze cussì ignoranti  
 Da insultar la rason quando i ragiona ;  
 Ma el mio sempre sconvolto, e sempre strano  
 L'avea fissà de diventar sultano.

Gera su sto pensier cussì scaldà,  
 Che quanto più la cossa esaminava,  
 E tanto più de diventar maestà  
 Facilissimamente contemplava,  
 Ma adesso che quel velo ze cascà,  
 Che i occhi a negra note me stropava,  
 Se me presenta un numero de ostacoli,  
 Che vincer no se pol senza miracoli.

Vedo che za bisognerà che resta  
 Quel povaro spiantà come che gera,  
 Che co mille pensieri per la testa  
 Dovarò sfadigar mattina e sera  
 Tanto el zorno ferial, quanto la festa  
 Comandandoghe apena a la massera ;  
 Vedo le cosse ancuo chiare a tal segno,  
 Che posso dir : no gh'è per mi più regno.

Ma se me scampa el scetro da le man,  
 Quando che fermamente suponeva  
 De poder diventar presto sultan ;  
 Se son costreto a far quel che faceva  
 Per magnar quatro risi e un fià de pan ;  
 Se dopo le speranze, che gaveva  
 De portar el turbante, sul più belo  
 Torno a meterme in testa el mio capelo,

Al rigor de la sorte impertinente  
 Anca sta volta rassegnà me adato,  
 E me ze posso dirlo indifferente  
 Invece de sultano esser privato.  
 Ma quel che me despiase estremamente,  
 E che me sforza a maledir el fato,  
 Ze 'l no poder tranquillo sta mia vita  
 Finirla in t'un deserto da eremita.

No no posso per quella gran rason,  
 Che in te la croda no se fica 'l chiodo,  
 Che quel che serve no ze mai paron,  
 Che sbarar no se pol col schiopo vodo,  
 Che senza l'aria no se infia el balon,  
 Che in tel tamiso no sta drento el brodo,  
 E che in sto mondo porco e sarlatan  
 No pol dir voi chi se guadagna el pan,

Ma za che adesso afato segrega  
 Da l' amano consorsio e dai sussuri  
 Le ore che me avanza retrà  
 Vivo co un libro in man fra quatro muri,  
 De sto mondo galieto stomegà  
 Dove star poco e mal se ze sicuri,  
 Vogio per distrazion meter in verso  
 Le imense idee sul regno che go perso.

Nè le rechie dei povari pazienti  
 Volendo da indiscreto importunar  
 Co le cosse comuni o inconcludenti  
 Per sentir chi me ascolta a sbadagiar  
 Parlarò solo sui provvedimenti,  
 Che ga del novo afato e singolar.  
 Butandoli zo in carta a la refusa  
 L' estro per secondar de la mia musa.

Gran palazzo imperial che ariva ai cieli  
 Da dover osservar col canochial  
 I sotostanti suditi fedeli ;  
 Gran pali de giustizia tuti azzal  
 Da impirar i preteriti ribeli ;  
 Gran sentenze de morte a chi ga mal,  
 E premi esorbitanti a quel che in tera  
 Treva de viver sempre la maniera.

Gran trono d'oro tempestà in brillanti  
 Alto dodesemile e più scadinì;  
 Gran confisca de beni a tuti quanti;  
 Gran fabriche de perle e de rubini;  
 Guera con chi ga soldi, o ze birbanti;  
 Aleanza perpetua coi zechinì;  
 E tasse a chi se grata, a chi stranna,  
 A quei che sbadagia, a quei che spua.

Gran guardie mamaluche sui portoni,  
 Nei giardini, in cortivo, e su le scale,  
 Co la michia impissada e coi canoni;  
 Gran guardie in tei graneri e in te le stale,  
 In cusina, sui copi, e sui balconi,  
 Nele camere interne, e nele sale,  
 E guardie in ritirata co la spada,  
 E un quinterno de carta strapazzada.

Gran manti d'ogni forma e qualità  
 Tuti quauti in avolio ricamai  
 Da coverser le spale a so maestà  
 Nei zorni a le sedute destinai;  
 Gran manizze de pelo de castrà  
 Coi riporti de suro inbrochetai,  
 E gran turbante in ordine simetrico,  
 Che gabia in cima el condutor elettrico.

Saragio de oto mia tuto su un piano  
 Con trentamila done le più bele  
 Sempre pronte ai comandi del sultano;  
 Specole d'arivar sina a le stele;  
 Sete muger da baratarse ogn'auo  
 Senza gnanca un sgrafon su la so pele,  
 E un infinito numero de tose,  
 Che le sua co ze caldo, e sia graziose.

Casini de campagna almanco cento  
 Fodrai de cassia in cana e carta a fiori,  
 Coi scuri de magiolica, e de drento  
 Coi lastroni de intagio a più colori,  
 Con gotici trofei sul pavimento,  
 Con quadri antichi dei più gran pitori  
 Mostranti fati d'arme a chiaro e scuro  
 Tanto ben che 'l canon fassa sassuro.

Vasi de tera oriana del Giapon,  
 Zoghi de campanele col sordiu,  
 Specchiere da veder sin l'intenzion,  
 Cabarè da tegnir sora el taolin  
 Coi maneghi de zucaro panon,  
 Coltrine tate d'oro cantarin,  
 Stampe inglesi che in modi più gentili  
 Le descriva l'istoria de Mastrili.

Gran stramazzi imperiali petenai  
 Col so petene fisso ogni matina;  
 Gran pagiazzo impenio de buzzolai,  
 Gran nizioli de ponghe de galina,  
 Coverte e covertori imbalsemai,  
 Zenzeliera de azzal co la coltrina,  
 Bidè de coco, e comode a cassela  
 Che ghe ne staga drento una barela.

Vestaglie co le maneghe de tola,  
 Baretine da note de zendà,  
 Mudande col traverso a cighignola,  
 Perché quando ghe scampa a so maestà  
 In t' un bater de ochio le se mola,  
 Ligambi col lucheto a papagà,  
 Pipe de fragoler mezzo vascelo,  
 Tute col so bochin fato a cavielo.

Mobili d'oro a punta de diamante,  
 E un'imensa caterva de cuscini,  
 Che fracai dal preterito regnante  
 Sona le sinfonie del gran Rossini;  
 Racolta copiosissima de piante,  
 Museo de osei, quadrupedi, e marini,  
 Passegiate de sparesi coverte,  
 E cazza riservata de luserte.

Selve, parchi, giardini, scudarie,  
 Pesca de toui in tute le stagion;  
 Stivali co le rode sote i pie  
 Da far quaranta mia con un spenton;  
 Cavali da star suso in cinque sie,  
 E vasche de rosada e zavagion  
 A comun beneficio sempre pronte  
 Tute de un pezzo de crestal de monte.

Gran fontane de marino o de metal  
 Che buta fora vovi e pomi coti ;  
 Vulkani artificiali el carneval,  
 Che a l'improvviso gomita biscoti,  
 Gran peochi de quei de l'arsenal,  
 Grau spee de polastri e de dindioti,  
 Gran tinazzi de cipro e vin de scopolo,  
 Dove vardar ghe sia permesso al popolo.

Piramidi a vapor, archi trionfali  
 Secondo i gran sistemi de Maometo ;  
 Mausolei co le statue colossali  
 Armae d'elmo, de spada, e de sacheto ;  
 Cioche da diesemile e più farali,  
 Compagni afato a quei d'Epiteto ;  
 Loghi comuni tuti quanti specchi  
 D'andarse a solear zoveni e vecchi.

Carozze da tacar trenta ronzi ;  
 Bagni d'acqua de bogio sempre pronti  
 Da poderse lavar ben i stalfini,  
 E da cavar le machie a chi ze onti,  
 Vintimile acquedoti in tei giardini,  
 Strade de madreperla e ardit ponti  
 De metal de Corinto co un secreto  
 Che i ghe sona a chi passa el menueto.

Slite d'ariento vivo e porcelana,  
 Cervi ben arlevai che le strascina,  
 Passeggi solitarj a l'africana  
 A comodo d'ognun sera e mattina,  
 Dove a le done un dì per settimana  
 Se ghe fizza balar la marmotina,  
 E dove anca in genaro chi volesse  
 Sia paron spassizzar senza braghese.

Ogni dopo disnar festa de tori,  
 E quei zorni che onora so maestà  
 A tacarse a la rechia andà i mori ;  
 Ogni sera teatro illuminà,  
 Dove una compagnia de bravi atori  
 In vinti trenta ati produrà  
 Tragedie sanguinose, ma col pato  
 Che i scomenza a mazzarse al primo ato.

Trapolini d'andar più assae del vento  
 Che slanza ün omo a Strà co un salto solo,  
 Paracadute tuti quanti ariento  
 Da poder garantir l'osso del colo,  
 Una stua per l'inverno, che de drento  
 Ghe staga mile roveri, e un gran folo  
 De pele de caviaro co un ordugno  
 Da ventilar l'istà tuto el mio regno.

Bigliardi otangolari col tolon  
 Tuto quanto de azzal calamità  
 Co le sponde e le stecche de carton,  
 E le bale de fero descolà ;  
 Gran zoghi de burele su un stradon  
 Dise mia longo, e largo la metà,  
 E partie de balon sempre a cavalo  
 Co la pena de morte a chi fa un falo.

Gran concerti de scurie, gran piombè,  
 Gran religi da muro col cucù,  
 Che i risponda se i vol l'ora che ze,  
 Biscoli che tre mia ve manda in su,  
 Un numero infinito de lachè  
 Fati vegnir apostà dal Perù,  
 Che i cora a precipizio note e di  
 Doparando le man megio dei pi.

Tremile coghi tuti da cartelo  
 Un più bravo de l'altro, e che a puntin  
 Sapia rostir un toco de vedelo,  
 E gratar el formagio piasentin ;  
 Do mia longa la sala del tinelo  
 De mandole stucada e de strachin,  
 E un salvaroba che ghe staga drento,  
 Tra rosolio e tra rum, bote dusento.

Servitori bordai de ganzo d'oro  
 Co tute le livree de mussolina,  
 Cochj famosi da tigr el toro  
 Vestii de verde antico e scarlatina ;  
 Damigele coi cotoli a traforo,  
 E co un abito novo ogni mattina,  
 E quatro cinquecento batistrada,  
 Che sapia dar a tempo una scalzada.

Nonantatre bravissime comare,  
 Che in tel vovo a trovar ghe vâga el pelo,  
 Che gabia sora i parti le idee chiare,  
 Che dall' utero estrar sapia un putelo,  
 Che conossa l'efeto de la mare,  
 El modo de far crescer el cavielo,  
 E che capissa al gusto de l'orina  
 Quando ze la gravianza masculina.

Quaranta bele nene co gran peto,  
 Tute da maridar, tute onorate,  
 Le quali co el sultan ze ancora in leto  
 Le vaga una a la volta a darghe late;  
 Dusento professori che adasieto  
 Ghe taglia a so maestà le pele mate,  
 Che i sapia desgossar ben i canali,  
 E col tirabosson ghe cava i cali,

Otanta peruchieri dotorai,  
 Ch' abia fato i so studi a san Malò  
 Che i staga sempre pronti e parecchiai  
 Co la manteca, polvere, e rolò;  
 Nonanta cavadenti patentai  
 Co le bolete che i rilassa al po,  
 E trentasie barbieri, che a la grega  
 I sapia far la barba co la siega.

Cento mestri da balo del Tocai,  
 Famosi per el salto del molton;  
 Siemile sonadori incaricai  
 De sonar note e zorno campanon,  
 E otantanove musici arlevai  
 Nei gran conservatori a san Bruson,  
 I quali a so maestà sul far del dì  
 I ghe canta in bemol chichirichi.

Un mier de papagai dei lidi australi,  
 Chiapai nele risere al Canadà,  
 Co le creste a pavelo e i denti ochiali,  
 E che su la gramatica imparà  
 I gabia tuti i dialoghi orientali,  
 Perchè se mai se degna so maestà  
 Per so clemenza de parlar con l'ori  
 I ghe possa risponder da dotori.

*Pacc. Poes. Ven.*

Più de mille quagioti batarèli,  
 Bravi la note e 'l zorno de cantar;  
 Duzento gazze, e otantatre stornèli  
 Che megio dei visir sapia parlar;  
 Sie milioni de grili, e de altri oseli,  
 E cento simie del Madagascar,  
 Le quali el dopo pranzo tute quante  
 A momola le zoga col regnante.

A corte gran velae coi sguazzaroni,  
 Gran cascade de ambra e porcelana,  
 Gran veste, gran talè, gran veladoni,  
 Co le so bele fodre de persiana,  
 Gran fiocchi, gran galani, e gran botoni,  
 Gran bochete de raso a la spartana,  
 Gran penachi, colane, e colarini,  
 Tuti pontai coi aghi damaschini.

Sciarpe de ganzo d'oro galonae,  
 Turbanti co le brombole a pendon,  
 Papuzze de buele salmistrae,  
 Guanti de radeselo de sturion,  
 Tirache a vida, calze vernisae,  
 Speroni co la susta a rampegon,  
 E mustachi da gala col sonagio  
 Onti ben da botiro e da formagio.

Gran tabari de zesso a lustro fin,  
 De felpa, de veludo, e calancà;  
 Tapei fati de corde de violin,  
 Gran dame, gran visiri, gran bassà;  
 Ai omeni rinfresco de broetin,  
 E a le done el so brodo ben tirà,  
 Confeture, conserve, pezzi in giazzo  
 Salai co l'agio, e castradina a sguazzo.

Per cercar po del regno la durata,  
 Perchè no casca el trono a tombolon,  
 Gaveva stabilio la grand' armata,  
 Gera preventivà la munizion,  
 E ai suditi per farghe cossa grata  
 Dopo maturi esami e riflession  
 Gaveva concertà con cuor paterno  
 Le basi principali del governo.

60

Siecento trentamile e più panduri  
 Tutti armai de atagani e de ganzar  
 Coi mustachi a bisato e i musci duri  
 Per farse dai nemici rispetar,  
 I quali a l'ocasion se sia sicuri  
 Che per la patria i se faria sbusar,  
 E che dotai de militar talento  
 I sa mazzar la zente a tradimento,

Ai confini del regno un gran cordon,  
 Gran fosse, controfosse, e gran fortezza,  
 Che tira zorno e note de canou,  
 Gran ponti che co un colpo i se scavezza,  
 E gran mura de seme de melon  
 Tute de mezzo mio circa de altezza,  
 Aciò la trupa che vien là mandada  
 Beva invece de vin sempre semada,

Sie ministri severi de giustisia,  
 Che tegna sempre in man la so balanza;  
 Tre generali in capo a la milizia  
 Coi so spacacucchie e salta in pauza  
 Fati vegnir apostà da Gorizia;  
 Trentasete ministri de finanza,  
 Dei quali trentasie per introitar,  
 E uno, co el ga voglia, per pagar.

Arsenal co tresento e più cantieri  
 Per costruzion de burchi e de batei;  
 Sala d' arme con trentamile armeri  
 Tutti pieni de forle, e de cortei,  
 Sortimenti de scudi e de cimieri,  
 Aste, alabarde, armigeri trofei,  
 Sie milioni de scurie e de speroni,  
 E cento zare piene de canoni.

Otanta zeche a l' uso de Livorno  
 Piene de gamauti e manganeli,  
 De machine che sole vaga atorno,  
 De tanagie, de ancuseni, e scarpeli,  
 Dove cuniar se deva note e zorno  
 Soto i colpi sonori dei marteli  
 Zechini a bataglion per so maestà,  
 E per pagar le spese dei parà.

Ventitre stamperie che in tuto l' ano  
 No le se impiega in altro che a  
 El codice bellissimo otomano,  
 Che deve in tuto el regno circolar;  
 Altre trenta che imprima l' alcorano,  
 Perchè se possa i suditi salvar,  
 Con carta drento e fora inarzentada,  
 E con una parola ogni fassada.

Sie ben organizzai stabilimenti  
 Co un centener e più de castragati,  
 Co subie, co tanagie, e co strumenti,  
 Co leti de bombaso tuti fati,  
 Co balsemi, saroti, e con unguenti,  
 Co pilole, co taste, e con estrati,  
 Tutti co le so camere de stuchi  
 Dove sarà le fabbriche d' eunuchi.

Moschee fate de legno san Bastian,  
 Che ispiri riverenza e divozion,  
 Indove ogni bon audito otoman  
 El possa andar a dir le so orazion,  
 Tegnindo zonti i pi come le man,  
 E dei so fali domandar perdon  
 A la famosa cassa del profeta  
 Fabricada dai maghi a la Fosseta,

Ludri per la cità sempre impissai  
 Aciò che tuti veda i fati soi,  
 Nè i peta el muso drento i giustiziai,  
 Che deve star esposti coi carioi  
 Insina che dai corvi i vien magnai;  
 Colegi militari per i eroi,  
 Indove in sempiterno sia bandie,  
 Per no farli distrar, le librerie.

Là se darà lizion de bastonae,  
 E suso le torà chi no vol dar;  
 Là ghe sarà academie de pierae  
 Cercando l' avversario de copar;  
 Se farà tati i di le cortelae  
 Studiando la maniera de mazzar,  
 E qualunque esperienza più azzardosa  
 Per arlevar la zente coragiosa,



Quando ch   so maest   ze a far riposo  
 I suditi per tuto   da osservar  
 Un profondo silenzio rigoroso  
 Per no doverghe i soni disturbar,  
 E se qualcuno poco rispettoso  
 Gavesse mai coragio de parlar  
 El sar  condan  per quarant' ani  
 De star col musariol come sta i cani.

Quel che volesse aver privata udi  za,  
 Sia femena, sia maschio, d'ogni et ,  
 Coi ochi bassi in ton de riverenza  
 Tre mesi d' anticamera el far  ;  
 E a quello che gavesse l' imprudenza  
 De domandarghe soldi a so maest    
 Ghe sar  d  ogni zorno da un zigante  
 Un fraco de leguae vita durante.

Le cariche, la trupa, e 'l ministero  
 Tanto in tempo de guera che de pase  
 Ad onorem servir deve l' impero  
 Anca se sto sistema no ghe piase ;  
 El militar co l' ordine severo  
 De andar a far la spia drento le case,  
 El ministero po voglia o no voglia  
 Con dignit   ghe toca a far da bogia.

Le sentenze de morte tute quante,  
 Nissunissimo caso ecet  ,  
 Segnae da la clemenza del regnante  
 A carateri d' oro le sar ,  
 Per impedir che tante volte e tante  
 No se eserciti ben la carit  ,  
 E lu dover  sempre proferir  
 Da che morte che 'l reo ga da morir.

Decreti scriti in carta bergamina  
 Co le pene de struzzo, o de paon,  
 Che ordina sia fata la farina  
 O de formento, opp  de formenton,  
 Che no acorda a l' eunuco concubina,  
 Perch  no cressa la popolazion,  
 E che lassa se paghi ne l' impero  
 Col dato che de terzi sia un intiero.

Che no sia mai festivo el di ferial ;  
 Che ognun cerca de viver pi  che 'l pol ;  
 Che se possa vardar col canochial,  
 Che sia peimesso pianzer co se vol ;  
 Che tuti sia paroni farse mal,  
 Ma senza cigar oi quando ghe dol ;  
 E che per quei al palo condanai  
 I cambi volontari sia acetai.

Che dopo i nonant' ani sia concesso  
 Anca senza mario de partorir ;  
 Che subito form  ghe sia processo  
 A quelle che se azzarda de abondir ;  
 Che senza distinzion d' et  e de sesso  
 Nissuno se permetta de morir  
 Da volon'aria o da improvvisa morte  
 Se nol ga la licenza da la corte.

Carcere duro a quel che ze busiaro,  
 Bando perpetuo ai omeni malfati,  
 Suplizio ai ladri se anca i roba un traro,  
 Lavativi de piombo a chi se ingrati,  
 Pugni sul muso a quei che ga el cataro,  
 Bote de fo o a chi patisce i flat, i  
 E coconi de corno, opur de osso,  
 A tuti quel che se caga adosso.

I zoti fusilai fra carne e pele,  
 I sordi bastonai sin che i ghe sente,  
 I orbi brustolai come sardele,  
 I gobi manganai precariamente,  
 Ai sempi baratarghe le cervelle,  
 La sponza fritta a chi ghe dol un dente,  
 E condanai quel che ga el balon  
 A fermar una bala de canon.

Che legi sacrosante e ben intese !  
 Ch' equit  de principii, e co limai !  
 Che risorsa evidente a ogni paese !  
 Che suditi felici e fortunai !  
 Che lusso, che tripudio nele spese !  
 Che progetti da omeni educai !  
 Son certe che in sto modo dai mii popoli  
 No sarave invidi  Constantinopoli.

# POESIE

DEL

## NOBIL UOMO NICOLÒ PRIULI.

### EL BOUQUET O SIA MAZZETO

PRESENTA' AI NOBILI CONIUGI CONTI GIOVIO DE MILAN NEL ZORNO AVANTI DE LA SO PARTENZA

DA VENEZIA NEL MESE DE ZUGNO 1817.

Za che avè fissà de andar,  
E volè doman lassar  
De Venezia le contrae  
( Che pur tanto ve ze stae  
De conforto e de alegria  
Ne la vostra ipocondria ) (199)  
Voi lassarve almanco un pegno,  
De vu altri e de nu degno,  
E per darve cosa rara  
De Venezia, tanto avara  
A produr erbete e fiori,  
Voi donarve pien de odori,  
Perchè in mente ne gabìè,  
Un simbolico bouquet.  
Quel Gasteli ehe mai straeo (200),  
Altro Pindaro, altro Fluco,  
Pien de lena, senza stento,  
Tanto el core in un mumento  
Che 'l va squasi in braccio al sol,  
Sarà un aureo girasol.  
El beliger Mengaldo (201)  
Fato duro, fato saldo,  
Ai furori de Gradivo  
Ve presenta un semprevivo.  
El bel dir de l'avvocato (202)  
Puro sempre e delicato,

In un giglio trovarè  
Messo in mezzo del bouquet.  
Quel Ancilo farmacista (203)  
No sia messo tanto in vista.  
Malinconico mistier  
Sora ogni altro ze el spizier ;  
Ma sicome co bravura  
È'erbe el studia e la natura,  
Per dar farmaco a ogni mal,  
El sia un fior medicinal.  
E quel nostro Nicoletto (204)  
Che ne dà tanto diletto  
Quando el canto a l'improvviso  
L'acompagna fin col viso,  
Pien de ingegno, pien de sal,  
Col palor sentimentale,  
Che 'l ve par apena vivo,  
Lo gavè nel sensitivo.  
La fraganza più odorosa  
Spande a l'aria bela rosa;  
Abiè ochio nel tocarla,  
Contenteve de vardarla.  
No s'è visto mai zardin  
A dar rosa senza spin.  
Compatisci, son sincero,  
Ma sta rosa ti è ti Piero: (205)

E l'amabile dotor, (206)  
 Che del tragico dolor  
 Tanto apreza el mesto canto,  
 Lo gavè ne l' amaranto  
 Un poeton de prima sfera, (207)  
 Che ze nato in altra tera,  
 Che pol star ardito a fronte  
 Fin dei Mazza e Pindemonte,  
 Sarà un fior, ma dei più rari.

A le bele tanto cari,  
 Se spogiarse el podarà  
 De la solita umiltà.  
 Bombardini onor del Brenta,  
 Un' ortensia ve presenta.  
 Ma sti fiori adesso colti  
 Mal starave cussi sciolti,  
 Donca el mazzo ligarò,  
 E cordela mi sarò.



# POESIE

DI

## GIOVANNI TONELLI.

### DITIRAMBO SU LA UA.

Bel' autuno, felice stagion,  
Gera tanto che mi te aspetava,  
Go per ti la gran mata passion ;  
Mi per ti sospirava, smanjava,  
Se più longo durava l'istà,  
Senza ti mi sarave crepà !  
Tuto quel che in vaghissimo aspeto  
Ne produse le piante e 'l teren,  
Tuto quel che dà lucro e diletto,  
Bel' autuno, per ti ne provien :  
Ne provien per ti l'ua, sto gran fruto  
El mio pasto, el mio sangue, el mio tuto.  
Cari amici, che trasporto  
Per sto fruto che mi go!  
Più che 'l porco per la gianda  
Mi per l'ua son spanto morto ;  
La passion ze tanto granda,  
Che spiegarvela no so.  
Malapena sponta i bampoli  
Mi no trovo più riposo,  
E devento fastidioso  
Come un toso inamorà ;  
Più no magno, più no bevo,  
Prima ancora - de l'aurora  
Presto - lesto mi me levo  
Mi me vesto,

E po dopo per campagne,  
Per coline, per montagne,  
Fazzo intorno un longo ziro  
Visitando le piantae,  
Tanto d'ochiami ghe tiro,  
Me le magno co le ochiae,  
Ma per quanto che le miro  
Mi no vedo altro che fogia ;  
E l'uetà ancora in fior  
La me fa crepar de voglia  
Al sentirghene l'odor :  
Ma che odor  
Consolator !  
Che fraganza che inamora,  
Che de tuto va 'l dessora,  
Che ristora - naso e cuor !  
Che camamo, che calamo,  
Che ladano, che galbano,  
Che crocino, che telino,  
Che nardino, che melino !  
Vegna pur el cardamomo,  
Vegna el gran panatenaico,  
El famoso cirenaico,  
L'amoricino, el costo, el gizir,  
L'ogio arabico, el nardo, el mazir.  
No no gh'è balsemo

Fra tanti e tanti,  
 Che vaga avanti  
 De questo quà.

Quanti sesti che fazzo in quel ato,  
 Trasportà da la forte passion!  
 Se dirave « Zaneto ze mato  
 Povareto! el me fa compassion. »

Spasemà, spirità, desparà,  
 Senza forza, nè ose, nè fià,  
 Togo in man quei fioreti, e li naso,  
 E li struco, li lico, e li baso;  
 Da l'angossa me par de morir.

Ueta viscere, caro el mio ben,  
 Perchè mai no far ti come 'l figo  
 Che do volte in t'un ano el ne vien!  
 Ma no zela una mezza vergogna,  
 Che ti tiri a vegnir tanto in longo.  
 To l'esempio e la norma dal fongo,  
 Che per questo aspetar no bisogna;  
 Co do giozze de piova che fa  
 Soto i occhi el ne sponta a l'istà,  
 Ma ti, cagna, ti fa la preziosa,  
 La superba, la bela e ritrosa,  
 Ti conosci la propria bellezza,  
 E, tirana, ti ga la vaghezza  
 De vederme a bramar, a patir,

Mi no credo che gnanca quel Tantalo,  
 Crudelissimo pare perverso,  
 Che ze stà condanà da Mercurio  
 A la sè. e a la fame in eterno,  
 E che sin al barbuzzo el ze immerso  
 In t'un lago de l'orido inferno,  
 Dove arente de lu ghe sta un alboro,  
 Tuto cargo de fruti belissimi,  
 Che lo fa de continuo languir,  
 Senza mai che ghe possa riuscir  
 La so boca de meterge su,  
 Mi no credo che gnanca colù,  
 Sempre in voglia restando cussì,  
 Più la voglia el patissa de mi  
 Mentre stago aspetandote ti.

E guai che intanto,  
 Per bon impianto,  
 La providenza  
 Col mandarme la luliaga  
 No sanasse la mia piaga,  
 Vegnindo a lusingar la mia pazienza.

Quando che sta luliaga la scomenza

A bel belo a varesar  
 Me tiro solo  
 Soto la pergola,  
 Che go in tel brolo,  
 E becolando  
 Qua e là pian pian,  
 E zacolando  
 De man in man  
 Che maturando  
 L'ua se me va,  
 Mi, de sto passo  
 Andando avanti  
 Sempre cussì,  
 I graspi miseri  
 In pochi dì  
 Spogi ghe lasso  
 Là tuti quanti  
 Dal primo a l'ultimo  
 Che i fa pietà;  
 E 'l ze un miracolo,  
 Proprio de quei,  
 Se fin el pecolo  
 Mi no ghe becolo  
 Mi no ghe zacolo  
 Quando i graneli  
 Go terminà.

Ma grazie a Dio  
 Za ze finio  
 El gran suplizio  
 De l'aspetar,

Anima mia consolite,  
 Nissun te lo contrasta,  
 Ti ga aspetà che basta,  
 Ze tempo de goder.

Za son uel cimento:  
 Che angossa, che smanìa,  
 Che spezie de insania,  
 Che gusto che sento,  
 Che novo piacer!

Son in campagna;  
 Che bel aspeto,  
 Che gran cucagna  
 Per ti Zaneto!

Mora, dora, oseleta, biancheta  
 Marzemina, refosco, corbina,  
 Moscatela, gropela, forcela,  
 Sbrindolona, biancona, rossa,  
 Malvasia, picolit, e madera,

Paradisa, vison, cogionera,  
 Peverela, rabiosa, verdise,  
 Gata, schiava, calabria, pignola,  
 Passa, nazia, zibibo, rubola,  
 Dove dove me chiama la gola ?  
 Dove prima òi da meter el dente ?  
 « Via scomenza da quella più arente,  
 El me dise un graspeto vicin,  
 « E po dopo continua pian pian  
 Divorandone tute drioman,  
 Che za questo ze 'l nostro destin. »

Caro graspeto,  
 L'invido aceto,  
 In furia subito  
 Son qua da ti.  
 Mo caro, mo belo,  
 Te vedo, ti è quello;  
 Lo so, mo gh'è dubio,  
 Ti è fato per mi.

Paradisa i te chiama, mi ritegno  
 Perchè un gusto ti ga paradisal,  
 Gusto che a quel del netare equival,  
 Vin che se beve nel celeste regno;  
 E za che ti ti ga la prima el vauto  
 Col to mosto prezioso  
 De bagnar el gargato a sto goloso,  
 Vogio de ti dir tanto  
 De meterte a l'imparo  
 Del gran friularo,  
 In versi, in rime,  
 In stil sublime,  
 Per ogni parte  
 Fruto divin,  
 Vogio onorarte  
 Senza confin,  
 E note e dì  
 Sempre cussi.  
 Vogio .... ma zito,  
 Cara gropela,  
 E peverela,  
 E moscatela,  
 Zelo un delito  
 Se una sorela  
 Ve voi lodar ?  
 Coss'è sta invidia,  
 E sto sbragiar ?  
 Za tute quante  
 Ve vegno subito

A visitar.  
 Caro zibibo,  
 Gustoso cibo.  
 No ze possibile  
 Che mi me sapia  
 De ti scordar.  
 No malvasia,  
 Anima mia,  
 No vago via ?  
 Guanca in coscienza  
 No posso andar.  
 Tasi, rossona,  
 Abi pazienza;  
 Via sbrindolona,  
 E ti, biancona,  
 No strepitar.  
 Sì, cara mora,  
 Sì, bela dora,  
 Son vivo ancora  
 La marzemina,  
 La secondina,  
 E la corbina,  
 Lassarò indrio ?  
 Ah! no per bio  
 E l'oseleta,  
 E la bianchetta  
 Vol far vendeta ?  
 No, vegno in freta,  
 So qua, son qua.  
 E ti, rubola,  
 E ti pignola,  
 Coss'è mai sta ?  
 El gran sconzuro  
 Per la mia gola !  
 No fè sussuro  
 Per carità.  
 Cara calabria,  
 Refosco e nazia,  
 Chi de vu altre,  
 Chi mai se sazia ?  
 Chi, bona passa,  
 Chi mai te lassa  
 In abandon ? ....  
 Mi son parzial ?  
 No star a crederlo,  
 I dise mal,  
 Che mi no tolero  
 Sta distinzion.

So qua vido ;  
 Oe cog'onera,  
 Oe de madera,  
 Cara verdise,  
 Ochio pernisse,  
 Schiava, moscata,  
 Proseco, gala,  
 Via perdonè;  
 Za se no moro  
 Di tute coro,  
 Ma no criè.  
 Cossa mai fazzo ?  
 Boca ! alto là ;  
 Coss'è sto sguazzo !  
 Agiuto stomego,  
 Agiuto panza,  
 L'è stà un strapazzo,  
 L'è stà un disordine,  
 D' intemperanza  
 L'è stà un pecà.  
 Dopo aver divorà de sta misura  
 Trentado graspi in manco de mezz' ora,  
 Alzo la boca alfin da la pastura,  
 Stanco za de magnar, no sazio ancora.  
 Sobrietà la me dise « va via »  
 Che ghe resta la gola voria,  
 E me fermo indeciso, incantà,  
 Tra la gola e la sobrietà.  
 Cussi stupido, immobile, muto  
 Resto incerto per qualche minuto,  
 Nè go tanto de forza che rega,  
 Za 'l gargato da capo go suto,  
 Sento 'l stomego che quasi se sbrega:  
 D'ansietà paralitico tuto  
 La so voglia el me dise, el me spiega,  
 E la vida el se chiama in agiuto,  
 E de darghene un graso el la prega ;  
 Co la gola, pecà cussi bruto,  
 No gh'è caso ch'è possa far lega  
 La virtù de la sobrietà.  
 Cara, son qua ;  
 Per ben saver.  
 Per ben capir,  
 Per amirar,  
 Quanto sto fruto prezioso el sia  
 S' à da veder,  
 S' à da sentir,  
 S' à da gustar,

*Racc. Poes. Ven.*

Un graso de proseco o malvasia.  
 L'è cussi belo,  
 Cussi badial,  
 Sto caro fruto,  
 Che in bellezza e bontà tuto l' avanza,  
 Anzi, credelo,  
 Che lu ze tal,  
 Che 'l ga in lu tuto  
 D'ogn' altro el belo, el bon e la sostanza.  
 Che naranze, che limoni,  
 Che castagne, che maroni,  
 E che angurie, che meloni,  
 Che susini, che armellini,  
 Che verdassi, che biancassi,  
 E che brombola, e veriola,  
 Che pometi lazzarioli,  
 Che marasche, che sarese,  
 Che botiro, che francese ;  
 Che nosele, che nespole e cornole.  
 Che figheti, che perseggi e zizole,  
 E che framboe, che giasene e fragole!  
 Tuta roba che porta la freve,  
 Tuta roba che fa stomegana,  
 Che falsifica el sangue, che scaua,  
 Che la vita precipita in breve.  
 Se fra i denti me struco un granelo  
 De sta cara proseco gentil  
 Torno zovene, torno putelo,  
 De l'età sento ancora l' april,  
 Me par proprio chiuchiar el cavielo  
 De mia mare che tete me dà.  
 E de fato se prova e se vede,  
 Che slatando i puteli la nena  
 La ghe dà de sto fruto, e in sta fede  
 Che de late la boca sia piena  
 Chiuchiar late i puteli se crede  
 Quando mosto chiuchiando i se va.  
 O fruto amabile,  
 Fruto godibile,  
 No ze spiegabile,  
 No ze dicibile,  
 El piacer novo,  
 Che gusto e provo,  
 Che 'l cuor me toca  
 Co te go in boca !  
 Se go sconvolto el stomego,  
 Se sento in moto el gomito,  
 Mi no ricoro al medico,

La spizieria no incomodo,  
No fazzo spese inutili,  
Che ti ti ze 'l rimedio  
Più natural, più facile,  
Che cava dal pericolo,  
Che dà conforto a l' anima,  
Che svegia, che resuscita,  
Che comoda el ventricolo,  
Che tien el corpo lubrico,  
Che l' appetito stuzzega,  
Che neta zo le viscere.

Come bogindo s' alza a pian pianin,  
El mormora, el fa spiuma, el ciga, el cria  
Fina che resta in tel tinazzo el vin,  
E le sarpe ghe vien dessoravia,  
Cussì de l' ua l' estrato marzemìn  
Me boge in panza co una sinfonia  
De brontoloni, che me fa sogeto  
A provar presto un salutar efeto.  
E dopo sto contrasto, e sta bogh, <sup>8</sup>  
El putrido, che gera a mezza strada,  
Vedendo che per la la ze fenìa,  
E che darne nol pol la schiopetada,  
Rabioso el volta bordo, e in cerca el va  
De chi co l' ua no s' abia resentà.

L' ua ze un' antica insigne medicina,  
Che à fato guarigion miracolose,  
E dovarave tutti a la mattina  
Magnar ua co l' aguazzo in bona dose ;  
La porta più vantagio de la china,  
De la tintura de viole e de rose,  
E tanto se l' è fresca come fiapa  
La fa quel che farave la gialapa.  
Se l' autuno durasse eternamente,  
E se ghe fasse l' ua sempre maura,  
I medici, i spizieri, e certa zente,  
Che vive in società co l' impostura,  
Mandandoghene tanti impunemente,  
Piuttosto de guarirli, in sepoltura,  
I andarave a finir tutti in rovina  
Co la chimica e co la medicina.

Ma che scioco, che da gnente !

In principii filosofici

Mi me perdo inutilmente,  
No ghe abado a la rabiosa,  
Che me chiama là darente,  
Che me vol, che me ingolosa  
Oh ! co zala, co mostosa !

Cussì sconta tra le foge  
Ti me fa vegnir le voge ;  
Cussì bela, cussì fata,  
Come mai lassarte intata ?  
Mi resister no so più,  
E le man te meto su,  
Per sta cagna, per custia,  
Cari amici, in cortesia  
Senti la mia passion quanto l' è viva,  
E insin dove l' ariva.  
Geri Tita, el mio putelo,  
Malapena a casa el vien  
Me presenta el so cestelo  
De ua gresta tuto pien,  
Me lo tiro da vicin,  
E co ben me l' ò basà,  
Ghe domando : chi Titin  
T' à sta roba regalà ?  
« Mio sior santolo à volesto  
Che ghe fazzo sto servizio,  
Che là meta drento in cesto »  
Mo che testa ! che giudizio !  
Ga quel omo, allora esclamo,  
Tita mio, son squasi gramo  
D' avertè ancuo dal santolo mandà  
E lu dise « per cossa mai papà ?  
Perchè 'l te dà sta roba che fa mal.  
Che bestia ! ma no ze pecà mortat  
A torla zoso cussì crua.  
« No, papà, la ze fata sì sta ua. »  
\* Senti un granelo,  
Senti anca ti ....  
Caro putelo  
Nol basta a mi.  
Va, natura, va via da sto cuor,  
Che son pare no me ricordar ;  
Debolezza d' un tenero amor,  
Go per l' ua tanta smania e passion  
Che se 'l fio me vien l' ua a contrastar,  
Più no sento che pare ghe son.  
Con ansieta  
Da disparà  
Me tacco là  
Nè tiro el fià.  
Ma el putelo tira i occhi,  
El me salta sui zepochj,  
E 'l me dise adolorà  
« Papà mio da quel che vedo



No la ze minga cussi :  
 Che la fazza mai no credo  
 No la magnistu anca ti ?  
 Ti me ga  
 Minchionà  
 Ti papà. »

No ; go 'l stomego agravà,  
 E per chi no ga alcuna sunauza  
 L'ua, tel zuro, no pol farghe ben,  
 La produse dolori de panza,  
 La ze un tossego, un vero velen.

Co sta sorte de storië,  
 Co le bone, co le bele,  
 El putelo infenochiando,  
 Mi ghe vago destrigando,  
 Da la gola strassinà,  
 Tuta l'ua che i ga donà,  
 Tanto che quel inocente,  
 Che me stava sempre arente,  
 Testimonio con dolor  
 Del mio genio distruter,  
 Co l'è visto vodo el cesto  
 Più frenar nol s'è podesto,  
 E lagnandose, e pianzendo,  
 El me andava via disendo :  
 Tuta l'ua ti m'è magnà  
 Sior cativo de papà;  
 Al so pianto sul momento  
 Improviso el pentimepto  
 Tropo tardi me ze nato,  
 E dè capio che per quel fato  
 Son un pare snaturato,  
 Pezo assae del primo omo,  
 Che coi fiocchi n'è servio,  
 Perchè la magnando el pomo  
 No à magnà gnente a so fio.  
 Per l'ua mi son deboto  
 Un stupido ridoto,  
 So pezo d' un putelo,  
 Perchè co vado in leto  
 Do graspi me ne meto  
 Sul scabelo,  
 E apena che son soto,  
 Da la gola sedoto,  
 Cussi de quando in quando  
 La vago becolando  
 E la matina alzà,  
 Go el gusto sul palà.

I sogni che mi fazzo,  
 Altro che d'ua no i ze ;  
 Sogna bulae el regazzo,  
 Sogna corone el re,  
 Sogno anca mi cussi,  
 La note indormenzà,  
 Quel'ua che tuto el dì  
 Me tien svegià.  
 E co sorto dal mio leto  
 Co del mosto mi me lavo.  
 Che soave, che dolce, che grato  
 Che balsamico, puro, odoreto !  
 El cuor dal giubilo  
 Me salta in peto ;  
 Chi più beato  
 Ghe ze de mi ?  
 Vogio lavarme  
 Sempre cussi.

Chi se lava, chi se bagna,  
 Co sto mosto ghe guadagna,  
 El se neta ogni magagna,  
 E i so soldi lu sparagna,  
 Che in unguenti adesso el magna,  
 O nel'acqua de Cologna  
 Bona d'onzerse la rognà,  
 E da far dolor de testa,  
 Co una spuzza da carogna,  
 Che tre mia lontan ve impesta,  
 Sin che via scampar bisogna.  
 Da mi no nissun no scampa,  
 Che sul muso se me stampa  
 La vernise e 'l tacaizzo  
 De quel'ua che struco e schizzo,  
 E lo zuro, sì per bio,  
 Sin le mosche me vien drio.

O via altre superbone,  
 Galantone,  
 De matrone,  
 Capriciose,  
 Mate fisiche furenzi  
 Per aromi e per unguenti,  
 Per le lagreme odorose,  
 Che per tuto profumade,  
 Peto, naso, bosa, denti,  
 Mande fora per le strade  
 Odorazzi i più fetenti,  
 Vegni qua, vardeme mi,  
 E po tute fè cussi.

Care mie vegnì pur qua,  
 Osserveme,  
 Esamineme,  
 Come magno de sto fruto,  
 Che per mi va sora tuto.  
 Za da l'alba, e co l'aguazzo,  
 Divorando, sin a sera  
 Ghe ne fazzo - tanto sguazzo,  
 Che impenir fra bianca e nera  
 Podarave un gran tinazzo.  
 Ah ! perchè l'insaziabile stomego  
 No go mi de Rompini e Zucheti,  
 De costori che pol senza incomodo  
 Divorarse dusento oseleti  
 La matina per far colazione.

Come cento òli magna, e i ze in do,  
 I ga tripe da vache, e da bo,  
 E nualtri coi nostri panzini,  
 In confronto se ze mossolini.

Ma za me supero,  
 Sazio za son,  
 Alfin ricupero  
 La mia rason.

Tre graspi miseri,  
 E po no più ;  
 Ze ben el vincerse  
 La gran virtù.  
 Parto, no te irabiar,  
 Vigneta mia, da ti,  
 La gola a moderar  
 Te torno a visitar  
 Doman avanti di,  
 Ma intanto abandonar  
 Te devo, o cara.

Oe sentì quel che ve par:  
 Se anca son cussì menuo  
 Se no conto gnanca un spuo,  
 Se pur fusse militar,  
 E che a chi se distinguesse  
 El sovrano permettesse  
 De donar un campo d' ua,  
 Voria far le gran prodezze,  
 Superar le gran fortezze;  
 Andarave a panza nua  
 Su la boca del canon;  
 Che l' idea de quel gran premio,  
 Descazzando la paura,  
 Col portarme via la mente

Col cambiar viltà in bravura,  
 Me farave el più valente  
 El più bravo soldadon.  
 Oe poeti, Petrarca, e ti Dante,  
 Che contè de le buzzare tante  
 De le vostre do care, do bele  
 Solevandole sora le stele  
 E lodando el so naso, i so ochi  
 I so brazzi, le gambe, i zenochi  
 Quanto più gavaressi aquistà,  
 Se l'ua sola gavessi cantà,  
 Le so doti, le so qualità.  
 La belezza de Laura e Beatrice  
 Tuti sa che ga avudo confin ;  
 La ga buo quela sorte, quel fin  
 Che ga sempre qualunque beltà ;  
 E questa in tele done ze una cossa  
 Che se logora e passa in t' un mumento,  
 Che arente de la cuna ga la fossa,  
 Un fior la ze che se tien suso a stento  
 E che durar no pol,  
 Che teme un fià de vento,  
 Che teme un fià de sol.

Vardè là do ganasette  
 Bele, lucide, rossete,  
 Fresche, morbide, grasette  
 Morbinose, boriosete,  
 Deventae le ze custie  
 Brute, palide, sconie ;  
 A mumenti le desmete  
 La so boria, el so morbin ;  
 Le se vede presto presto  
 Andar tute zo de sesto,  
 E le pianze el so destin.

Questo xe 'l pregio  
 De la beltà,  
 El vanto egregio  
 Che la se dà.  
 La miserabile  
 Beltà ze questa,  
 Che porta triboli  
 A più d' un cuor,  
 E che a la presta  
 Squasi in t' un atimo  
 La casca languida  
 Come ogni fior,  
 Vegnì pur qua poeti,  
 Vegnì pur qua minchioni

Troveghe a l'ua difeti,  
 Da bravi se se boni.  
 L'ua no sente 'l rigor de l' età  
 Bela l' ua sempre più la se fa ;  
 E più gusto e diletto la dà  
 Quanto più su la vida la stà.  
 Co la ze in fior,  
 Co la ze verde,  
 L'ua ga 'l so odor,  
 Fata maura  
 Gnente la perde,  
 Anzi l'augmenta  
 Del so decoro,  
 La rapresenta,  
 La vince l'oro  
 Col so color.  
 Oh ! capo d' opera  
 Del gran lavoro  
 De la natura ;  
 Ti ze un ristoro,  
 Che sempre dura ;  
 Ti ze un tesoro  
 Ti ze un stupor.  
 Quel che de ti go in boca  
 Tanto no pol spiegar  
 Che possa parègiar  
 Quel che go in cuor.

Dovaressi oramai disinganarve,  
 Cari poeti ; el pegaso, el parnaso,  
 L'ipocrene, le muse, el bus.....  
 Dei quali vualtri fè sempre gran caso  
 I ze sempiezzi tuti, e sogni e larve.  
 Che senza anca de quei son persuaso  
 Capace de far versi che ognun sia  
 Quando el ga in boca un gran de malvasia.  
 Per mi la trovo che la fa sto efeto,  
 E se volessi averghene una prova  
 In bota ve la dago in t' un soneto.

Ua, cossa zestu mai ? l'agricoltor  
 Dise che 'l so conforto ti ti ze,  
 Un ben che dà compenso al so suor,  
 Che seuzza tante strussie vien da se.  
 Un elisir, un balsemo del cuor,  
 Vero bocon da principi, da re,  
 Che nasce da la vigna del signor,  
 Piantada da le man del bon Noè.  
 El pasto dei putei, l' anima mia,  
 Un fruto raro, celestial, divin,  
 Che a tuti i fruti ghe la porta via.  
 Ua cossa zestu mai ? ti è quella infin,  
 Che abastanza lodar no podaria  
 Disendote che ti è mare del vin.



# POESIE

DI

L U I G I Z A N E T T I.

## EL MIO RITRATO.

Ti me dimandi dunque 'l mio ritrato,  
Ma un ritrato de fisico, e moral? ....  
Co se ghe pensa ben l'è un gran contato,  
Voler che un omo diga tal e qual,  
Senza usarse un tantin mai d' indulgensa,  
Quel che 'l ze, quel che 'l sente, e quel che 'l  
( pensa.

Col sistema del secolo d' ancuo,  
Che per forza dei lumi, e del progresso,  
Se calcola indecenza el mostrar nuo  
Oltre che 'l corpo, fina el cuor istesso,  
E che ze le parole per lo più  
Pensieri rebaltai de soto in su,

Cara Nana, la prova che ti esigi  
Tortura quel tantin de vanità ....  
Ma per ti vada tuto ; el to Luvigi  
Quelo che xe sta in lu t' à sempre dà ....  
Me vado dunque a meter a taolin  
Col spechio in fassa, e 'l confessor vicin.

Altoto de statura, un fià scarmeto,  
Co un viso largo, e ciera languissan  
Cavei biondi, ubidenti al peteneto,  
Spartii come che vol la renessan,  
E che vien zo con gran disinvoltura  
A sconder de le rechie la misura,

Fronte largo e spazioso, ochi celesti  
Che per veder no dopera l' ochial,  
Naso che cala un gran .... come ! ti resti ?  
Se ti vedessi, Nana, el capital,  
Che me va de tabaco ogni zornada —  
Un quarto, e forse più, de la mia intrada.

Boca ordinaria co trentadò denti;  
Tuti trentado boni e senza neo,  
Che odia a certe ore i complimenti,  
E mastegaria fero a scotadeo ....  
Ma una boca per altro, no temer,  
Che sa far anca in resto el so dover. —

Del color de le cegie, e dei cavei  
Me lasso quatro peli sul barbuzzo,  
Qualcun la voria moda da putei ....  
Ma mi, che mai per mode m' ingaluzzo,  
La tegno, se ti vol che te la diga,  
Per risparmiar saon, tempo, e fadiga.

Questa qua ze in complesso la mia testa,  
Tacada a un corpo che no ga difeto ;  
Come 'l di da laorar vesto la festa,  
E cerco sempre, e in tuto, d'esser neto ;  
Ventiset' ani ò terminà sto magio,  
E godo una salute che fa agio.

Ma, per passar dal fisico al moral,  
 Confesso, un poco intrigadin me trovo ...  
 Gh'è anca in questo el so ben, ghe ze 'l so mal;  
 Ma el pelo no vardar tanto nel vovo;  
 Prima de giudicar pondera, e pesa,  
 E confronta l' introito co la spesa.

Se pol paragonar l' omo a un batelo,  
 Che se trova in borasca in alto mar;  
 Remi, vele, timon ze 'l so cervelo,  
 E 'l cuor ze 'l mariner che a da guidar,  
 I scogi le passion, che 'l trova in lu,  
 El mar la vita, e 'l porto la virtù.

Natura dunque, a dir la verità,  
 Per quello che ze cuor m' à favorio:  
 Vedo che assae de pezo se ne dū,  
 Se, come se sol dir, me volto indrio.  
 Ma .... che intorbia le aque ..., cara Nana.  
 Gh'è del guasto pur troppo, e l' è in altana.

Se, per esempio, del passà parlemo:  
 Co un cervelo de ancuo più assae lisier,  
 Per ogni novità portà a l'estremo,  
 Cambiava ogni mumento de pensier,  
 E come le farfale ai fiori in mezo,  
 So andà spesso anca mi de mal in pezo.

El bigliardo, le carte, le burele,  
 El nuar, el vogar in bateleto,  
 Le lingue tute, mare, fie, sorele,  
 El balar la manfrina, el minneto,  
 El disegno, la scherma, e la poesia  
 M' à a vicenda scaldà la fantasia.

Ma quello che m' à fato andar in oca,  
 E più de tuto m' à voltà el cervelo,  
 Xe sta el canto .... e in adesso po me toca ....  
 Proprio de suto no ghe n' ò più pelo! ....  
 Ma! .... l'è fata oramai .... Nana che testa! ....  
 Olà! .... dirò d'aver provà anca questa.

No gh' è disgusto, nè divertimento,  
 Che o poco o assae no l' abia za provà.  
 Arti e scienze? sicuro in più de cento  
 Tre di m'ò messo, e 'l quarto ò stralassà;  
 Insoma bon, cativo, belo e brutto,  
 Tuto m' à piasso, e m' ò stufa de tuto.

In sta maniera ò conossudo in pratica  
 Che l' omo xe a sto mondo un miserabile,  
 E che per quanto el fassa no 'l ga tatica  
 De deventar felice in pianta stabile;  
 Sichè m'ò dito: no gh' è più problema,  
 Xe arivà el tempo de cambiar sistema.

Co vedo infati cossa che so adesso  
 E cossa che son sta nei tempi andai,  
 No me pargnanca d'esser quello istesso;  
 Tendenze, gusti, metodi cambiai;  
 De l' ilusion me ze cascà el parecchio,  
 E sento in tante cosse d' esser vecchio.

Go ancora forsi un qualche difetin,  
 Son stravagante ancora el mio bisogno,  
 Ancuo go malumor, doman morbin,  
 De farne rico ancora me la sogno,  
 Ma resto co me svegio, e grazia granda!  
 Candioto più de quel che Dio comanda.

Del resto so un ometo che fa voglia,  
 So quello che se dise un marzapan;  
 Bandisso in compagnia pensieri e nogia  
 In quantum possum fasso el cortesan;  
 E co le done po? .... te l' assicuro,  
 Alta tegno la testa, e bato duro.

Eco dunque dipinti a la carlona  
 Vizi, difeti, meriti, e virtù ....  
 Col mio penelo solito a la bona  
 T'ò mostrà tuto, e no so far de più ....  
 No ti ghe trovi drento un certo sal?  
 Lassa el ritrato, e tol l' original.

## LA SCIELTA.

De tanti che spasema,  
 Che pianze per mi,  
 Nissuno finora  
 Ga avudo un de sì. —

D' altronde se esito,  
 Se penso, se aspeto,  
 Do e mezzo ze i ichese,  
 Me resta el paletto. —

Tonin ze volabile,  
 Carleto ze mato,  
 Luvigi ze un stolido,  
 Ze Tita mal fato,

Zaneto ze zovene,  
 L'è san come un pesce,  
 Co afari in comercio,  
 Che sempre ghe cresce.

A monte ogni scrapolo,  
 Più avanti no aspetò,  
 Fra tuti me comoda  
 El solo Zaneto. —

•

•

—

## LA MASSIMA FALSA.

Co me penso i tanti spasemi,  
 Che provava un ano fa,  
 Vogio dir, co de ti, Nonola,  
 Gera belo e cusinà,  
 Me se iuchiava i denti in boca,  
 Me vien come 'l pelo d'oca,  
 Ma po digo, e me consolo,  
 Una sola ne inamora.  
 Dunque mi ghe ne son fora,  
 El pericolo ò passà.  
 Se se dasse de trovarme  
 Co una tosa a chiacolar,  
 Posso adesso cimentarme,  
 Posso rider, e scherzar;  
 S'anca vado in sentimento ...  
 Amoreti del mumento!  
 Ze impossibile scaldarme,  
 No ghe penso gnanca sora,  
 Una sola ne inamora,  
 El pericolo ò passà.  
 Confidando in ste mie massime,  
 Da la sera a la matina,  
 De Marieta me desmentego,  
 Son fanatico per Nina,  
 Ma con ti, Teresa mia,  
 Son per perder la partia,  
 E pur tropo meto in dubio,  
 Se una sola ne inamora ...  
 Ah! in pericolo so ancora,  
 Son da novo inamorà. —

—

## L E T E R A

## A UN AMIGO CHE VORIA MARIDARSE.

Da quello che ò sentio  
 Ti à dunque stabilio  
 De far quello che fa la magior parte,  
 Voi dir, de maridarte.  
 Ben lontan dal pensar,  
 Che ti fazzi una roba da no far,  
 Te averto, che l'è un passo bon e belo,  
 Per chi nel farlo dopera cervelo;  
 Ma che sorgente el ze de mile guai  
 Per quei che se marida a occhi serai,  
 Senza calcolar prima,  
 Se per idee, per gusti, e inclinazion  
 Co la dona che i sposa i fazza rima.  
 Forse ti me dirà:  
 « Ti no ti è maridà;  
 Come vustu mo dunque giudicar  
 De quello che ti à ancora da provar? »  
 Quantunque dir podesse,  
 Che se vede ogni dì le robe istesse  
 Fra poveri e signori,  
 Radeghi, mal'umori,  
 Separazion de leto,  
 Fioi nati per dispeto,  
 E senza educazion,  
 Lassadi in abandon,  
 Lusso, divertimenti,  
 Disgrazie, e falimenti,  
 E altre conseguenze de sto genere,  
 Che tante case à za ridoto in cenere;  
 Pur co la mia opinion  
 No voi darte lizion;  
 Solamente me preparo a contarte,  
 Perchè ti possi megio regolarte,  
 El caso d'un mio amigo,  
 Che dopo maridà  
 S'ha visto desparà.  
 Un certo Toni Figo,

*Racc. Poes. Ven.*

Zovene, san e belo,  
 Circa quatr'ani fa,  
 Per una tosa s'ha scaldà el cervelo;  
 E quantunque el capiva,  
 Che a lu sta dona no ghe convegniva,  
 Perchè la ghe portava,  
 Co una gran dote de casteli in aria,  
 Un lusso, un'anda, e un ton da milionaria,  
 Inzinganà, scaldà,  
 Dopo d'aver sie mesi smorosa,  
 Fra mille idee tute color de rosa,  
 L'ha fato so muger sta so morosa.  
 Sto certo Toni Figo,  
 Che apunto ze mio amigo,  
 Oltre sie lire al dì come impiegato,  
 El possedeva, in forza de un legato  
 De so nona Mariana,  
 Dusento e trenta campi in Trevisana;  
 Come dunque ti vedi, a sufficienza  
 El gaveva per viver co decenza,  
 E 'l podega contar  
 De trovarse ogni zorno da disnar,  
 No gran piati da cogo,  
 Ma la so carne al fogo,  
 El so rosto, el so frito, el so bon vin,  
 El brusco, el marzemin;  
 No diese servitori,  
 Come sti gran signori,  
 Ma una massera e un omo,  
 Come che ga qualunque galantomo;  
 No gondola, teatri, società,  
 Ma le sere d'istà  
 La so mezz'ora a spazzo,  
 E po el so pezzo in giazzo,  
 E le sere d'inverno in compagnia  
 A tombola, o a tresete, la partia;  
 Per finirla, da povera creatura,  
 El sperava de far bona figura:  
 I primi mesi del so novo stato,  
 Interogà, come che 'l se trovava,  
 El rispondeva a tuti: son beato.  
 Infati so muger  
 No gaveva mai fato un dispiacer;  
 Afetuosa, ubidente,  
 Docile, bona, amabile,  
 La fava in tuto el so Toni invidiabile.  
 Mi per combinazion d'alora in qua,  
 Sto certo Toni Figo,

No l'aveva più visto;  
 Lo incontro zorni fa  
 Malinconico, tristo,  
 Coi ochi stralunal,  
 Coi cavei sgrendenal,  
 Sbriso, sbriso, patio,  
 Che 'l pareva un falio,  
 Lo fermo, e « schiao, ghè digo,  
 Cossa ze mai de ti mio caro amigo,  
 Te trovo assae cambià ....  
 Dime estu sta amalà ?  
 No so guente de ti che ze tre ani ....  
 A casa zeli sani ? ....  
 Quanti puteli gastu ? ....  
 Com'ela ? .... cossa fastu ? ....  
 Lu me risponde fredo:  
 « Ze vero, ze un pezzon che no te vedo ....  
 Se ti savessi .... ma ! ....  
 Tuto per mi à cambià,  
 E la causa, la sola, unica causa  
 D'ogni disgrazia e d'ogni dispiacer,  
 Ze stada mia muger ....  
 Cossa ? te zela morta ?  
 Eh ! se Dio la volesse,  
 E che 'l se la tolesse,  
 Sarave ben contento :  
 Ma la vive pur tropo a mio tormento !  
 Ah ! .... ze megio che tasa ....  
 A revederse .... addio .... saluda a casa. »  
 Mi resto là impiantà,  
 Fora de mi, pensando  
 Che quanto aveva visto  
 No fusse che la pura verità.  
 Curioso de saver per le so drete  
 Le triste metamorfosi de Toni  
 Vado da Tita Adoni,  
 Che me le conta tute schiete e nete.  
 Eco quel che ò sentido in conclusion,  
 Eco qua sta lizion. —  
 Dopo un aneto al più,  
 Che sto bon omo aveva in so muger  
 Quel che 'l voleva lu,  
 L'à perso el soravento.  
 Ela spiegando el so temperamento  
 L'à fato del mario in t'un mese e mezo  
 Un schiavo, un babuin, per no dir pezo,  
 Lu à provà prima bon, dopo cativo;  
 Ma, inutile qualunque tentativo,

Nol ga trovà più ben ;  
 Ela non à buo più fren ;  
 La s' àtrato al bon ton,  
 Come che se sol dir, a corpo morto,  
 L' à principià a tegnir conversazion,  
 A far parlar la zente,  
 Metendo suso cavalier servente,  
 A dar dei sontuosissimi soarè,  
 Feste de balo, pranzi, *desunè* :  
 La ga speso no so quanti luvigl  
 In t'un cembalo a coa fato a Parigi ;  
 Gran archivio de musica,  
 Gran terzeti e quarteti de Rossini,  
 Gran pezzi concertai de Mercadante,  
 Finali de Vacai, rondò de Nini,  
 Polize de sartore e de modiste,  
 Me lo diseva Adoni che l' à viste,  
 Da meterse le man in tei cavei ;  
 Insomma a butar via soldi a capei.  
 El povero mario,  
 No podendo star drio  
 A sto scielaquò, à scomenzà a far stochi,  
 E in pochi mesi s' à ridoto in tochi.  
 Ela però no conosce rason,  
 E la continua sempre de quel ton.  
 La matina la sta in leto  
 Per lo più sin mezzodi,  
 La se alza, la va al specchio,  
 La sta un' ora là cussì. —  
 Vien de musica el maestro,  
 La va a tor la so lizion,  
 Che consiste nel passarghe  
 Qualche pezzo de passion —  
 — « No ghe par? per el mio organo  
 Ze sto assolo un poco altoto ....  
 — Gnente gnente, se 'l ghe incomoda,  
 Se pol meterlo un fià soto.  
 El la loda, el ghe dà anima,  
 — « Benedeta, forte, apian,  
 Son contento, o che bel metodo ....  
 A revederse doman. —  
 La va a far la so taoleta,  
 La se mete, che no so !  
 Ale tre capita Checo,  
 I va fora tuti do.  
 A le cinque i torna a casa,  
 Eco in tola, i va a disnar,  
 Ma el mario no magna insieme?



Lu per lu no ga da intrar.  
 Dopo pranzo la fa un chilo  
 Col so Checo sul sofà,  
 A le oto i se desmissia,  
 El caffè ze travasà.  
 A le nove i va a teatro,  
 El so palco ze a pepian,  
 La dispensa da per tuto  
 Ochiadine, e baciaman.  
 Se va a cena a mezzanote  
 Al salvadego, o al vapor ....  
 Oto, diese, figureve!  
 Che alegria! che bon umor!  
 Dopo cena tuti insieme  
 I va a beber el caffè,  
 E po in frota verso casa  
 I se invia; sona le tre. —  
 A la porta i se congeda,  
 Ma Chechin se ferma là,  
 Co la scusa verso i altri,  
 Che qualcosa el s' à scordà. —

I va drento. — A farghe lume  
 Pronto capita Martin,  
 I va in camera .... ma el resto  
 Dimandeghelo a Chechin —  
 Questa ze la vita solita  
 Che conduse sta signora,  
 E 'l mario ze in pianta stabile  
 Per sta cocola in malora. —  
 No 'l ga un' ora mai de libera,  
 L' è de soldi sempre a steco,  
 El combate, el suda, e 'l strussia:  
 E 'l compenso? lo sa Checo. —

Che sto anedoto dunque a l' ocalon  
 Te serva, caro Piero, de lizion.  
 No aver tante premure,  
 Tol ben le to misure,  
 Cerchite una muger  
 Co tuto quello che la ga da aver,  
 E varda ben, che se ti te minchioni,  
 No ti è più un Piero, ti deventi un Toni.


## SALUTAZIONE A VENEZIA

DI

AUTORE IGNOTO.

*Il chiarissimo Bartolommeo Gamba compiendo la sua raccolta diede luogo a questi versi composti con parole che sono ad un tempo italiane e latine.*

Te saluto, alma dea, dea generosa.  
 O gloria nostra, o veneta regina!  
 In procelloso turbine funesto  
 Tu regnasti sicura; millemembra  
 Intrepida prostrasti in pugna acerba.  
 Per te miser non fui, per te non gemo;  
 Vivo in pace per te. Regna, o beata,  
 Regna in prospera sorte, in alta pompa;  
 In augusto splendore, in aurea sede.  
 Tu serena, tu placida, tu pia,  
 Tu, benigna, tu salva, ama, conserva.



# V O C A B O L A R I O

## VENETO - TOSCANO.


|                      |  |                  |  |
|----------------------|--|------------------|--|
| Acanà                | Intento indefessamente ad un lavoro  | Boro (un)        | Un soldo   |
| Aguazzo              | Rugiada notturna   | Bota (in) e      | } Subito, immediatamente   |
| Albeo                | Abete  | Bota salda (in)  |  |
| Alega                | Alga   | Boti             | Ore  |
| Amia                 | Zia  | Botizzar         | Suonar a martello  |
| Ancuo                | Oggi   | Botonada         | <i>Dicesi</i> di motto pungente  |
| Anara                | Anitra   | Bovolo           | Lumaca   |
| Andar zo dei bazzari | Prorompere in una collera trattenuta   | Braghier         | <i>Dicesi</i> aver molti braghieri per aver molte faccende   |
| Arente               | Dapresso, vicino   | Brancada (una)   | Un pugno di roba   |
| Arsirà               | Che à sete   | Brusa-camisa (a) | All' improvviso  |
| Arsirarse            | Assetarsi  | Brusar           | Bruciare   |
| Asola                | Fermaglio  | Bruseghin        | Specie di rabbia, che si soffre tacendo  |
| Babao                | <i>Dicesi</i> per demonio  | Bubana           | Abbondanza   |
| Bacara               | Gozzoviglia  | Busilis          | Difficile  |
| Badial               | Squisito   | Buzzara          | Inezia, <i>dicesi</i> anche di cosa non vera   |
| Bagherle             | Piccolo calesse  | Busteto          | Bustino  |
| Bagolar              | Tremolar   | Caco             | Semplice, stolido  |
| Bagolo               | Trastullo ; <i>farse bagolo</i> , prendersi gioco d'alcuno                         | Cao (in)         | In fondo, <i>Cao trezzo</i> , uomo tristo  |
| Balon                | <i>Per</i> testa confusa   | Cagnera          | Cosa qualunque nel suo genere cattiva. <i>Dicesi</i> a chi nelle occasioni si mostra poco generoso |
| Bampa                | Fiamma che fa il fuoco   | Cagnera (far)    | Far chiasso di qualche cosa  |
| Bao-sete (far)       | Far bau bau, o baco baco   | Cain             | Catino   |
| Baucar               | Caminare sbadatamente  | Campanato        | Addiettivo di sordo, <i>vale a dire</i> sordo quanto mai   |
| Barafusola           | Trambusto improvviso   | Canasbusa        | <i>Per</i> poco di buono   |
| Baraonda             | Movimento impetuoso  | Caponera         | Capponaia a custodia dei polli   |
| Barba                | Zio  | Capoto           | Mantello da marinaio   |
| Barbuzzo             | Mento  | Capurion         | Capo, fautore e guida  |
| Bardela              | Lingua che cinguetta; <i>dicesi</i> nelle donne aver bardela per essere parlatrici | Caregoni         | Seggionoli, <i>tirar caregoni</i> , pensar sul serio ad una cosa                                   |
| Baron                | Cattivo  | Cargo            | Carico   |
| Baronae              | Bricconate   | Carioi           | Tarli  |
| Bataor               | Il battente alla porta   | Cariolà          | Tarlato  |
| Becher               | Macellaio  | Caro colà        | Espressione di trasporto in vario senso  |
| Bevarin              | Liquore avvelenato ; dare il bevarin ad alcuno significa avvelenarlo               | Carobera         | <i>Dicesi</i> di persona vecchia o di cosa   |
| Bisegar              | Cercare una cosa, o stuzzicare   | Carpeta          | Gonnella   |
| Biseghin             | Chi attende con ingegno a molte faccende   | Cassafati        | Chi dà importanza ed esalta le proprie brighe  |
| Bissa                | Biscia   | Cavar bala d'oro | Esser fortunato in una cosa  |
| Boger                | Bollire  | Ceole            | Cipolle  |
| Bogior               | Bollore  | Cerner           | Cernere  |
| Boazza               | Sterco di bue  |                  |  |
| Boba                 | Marciume   |                  |  |
| Bodai                | Uomo piccolo e panciuto  |                  |  |
| Borezzo              | Allegria   |                  |  |

|                       |   |             |  |
|-----------------------|---|-------------|--|
| Chiapar               | Prendere  | Gongolar    | Rimbellare, adescare   |
| Chichirichi           | Il canto del gallo; <i>dicesi anche per capriccioso ornamento del capo</i>  | Gorghizzar  | Gorgheggiare   |
|                       |   | Goto        | Bicchiere  |
| Chietin               | Bacchettona   | Gran ton    | Grande sfoggio di vesti; il gran mondo   |
| Cigar                 | Gridare   | Graspo      | Grappo   |
| Cochio                | Cocchiere   | Gringola    | Allegria   |
| Cocodè (far)          | <i>Dicesi il discorso di molte femmine unite</i>                            | Grinta      | Collera  |
|                       |   | Grizzolo    | Brivido, <i>dicesi anche per capriccio</i>                                     |
| Cocola                | Cara  |             | Mucchio  |
| Cocolar               | Accarezzare   | Grumo       | Arrabbiarsi  |
| Cocolezzi             | Carezze   | Imbilarse   | Inzupparsi   |
| Conzar                | Condire   | Imbombarse  | Immobile, <i>insensibile come un palo</i>                                      |
| Coroto (far)          | Prender il bruno  | Impalà      | Empiersi   |
| Copi                  | Tegole  | Impenirse   | Pretesto, <i>finzione maliziosa</i>  |
| Corbame               | Ossatura del ventre, <i>dicesi per persona assai magra</i>                  | Impianto    | Accendere, attizzare   |
|                       |   | Impizzar    | Arso, secco; <i>ed anche uomo senza denari</i>                                 |
| Cotego                | Misantropo, ritirato  | Incandio    |  |
| Criar                 | Gridare   |             | Incantato  |
| Dadrio                | Deretano, e di dietro   | Incocalio   | Rintanarsi   |
| Dao                   | Dado  | Incotegarse | Floscio  |
| Datoli                | Datteri   | Infapio     | Frettoloso   |
| Deboto                | A momenti, fra poco   | Infugà      | Preso dal sonno  |
| Deo                   | Dito  | Insochio    | Facile   |
| Depenzer              | Dipingere   | Ladin       | Seccatura, e chi ripete una cosa o una cantilena                               |
| Descolarse            | Liquefarsi  | Lapio       | Ottone   |
| Desconio              | Dimagrato   |             | Labbro   |
| Desmissià             | Svegliato   | Laton       | Donnaiuolo, <i>che volteggia attorno alle donne</i>                            |
| Despogio              | Spogliato, ignudo   | Lavro       | Egli   |
| Destracarse           | Riposarsi   | Licardin    | Il cielo volesse!  |
| Dretton               | Scaltro   |             | Mangiaioia, <i>anche facetamente per bocca</i>                                 |
| Dressagno             | Furbo   | Lu          | Manica; <i>largo de manega, facile</i>   |
| Falopa                | Bugia   | Magari      | Mannaia; <i>tagià co la manera, grossolano</i>                                 |
| Far cuzzo             | Accosciarsi, <i>dicesi propriamente delle bestie domestiche</i>             | Magnaora    | Brutta vecchia   |
|                       |   |             | Deretano   |
| Far dezan             | Digiunare   | Manega      | Austero, burbero; e far marubio <i>vale far tempo cattivo</i>                  |
| Far pecà              | Far compassione   | Manera      | Di poco spirito  |
| Far pele              | Unir persone per uno scopo  |             | Percuotere molto, malmenare  |
| Fia                   | Fiato   | Marantega   | Migliaia   |
| Fiaca                 | Stanchezza  | Martin      | Miglio   |
| Fio, Fioi             | Figlio, figli   | Marubio     | Gesti e parole lusinghiere   |
| Fogia                 | Foglia  |             | Mescolare, confondere  |
| Fraca                 | Calca, folla di gente   | Marzoco     | Forbito  |
| Fregola               | Bricciola; <i>esser in fregole, non aver un quattrino</i>                   | Mastruzzar  | Sciogliere; <i>molarlhe, decampar dalla propria opinione, dallo stabilito</i>  |
|                       |   | Miera       | Zanzare  |
| Fritola               | Fritella  | Mio         | Moglie   |
| Fufa                  | Timore  | Mignognole  | Avola  |
| Fufigna               | Matassa, Scappatella, intrigo amoroso                                       | Missiar     | Fanciulla vezzosa, carina  |
|                       |   | Molesin     | Becchino, <i>servente di chiesa</i>  |
| Fugazza               | Focaccia  | Molar       | Nuotare; <i>lassarse trovar a nuar lasciarsi cogliere in qualche imbroglio</i> |
| Furegar               | Frugare   |             | Ignudo   |
| Furlana               | Sorta di ballo popolare   | Mossati     | Voce   |
| Garbo, e omo de garbo | Agro, acerbo, uomo di merito  | Muger       |  |
| Giazza                | Gelato, <i>anche senza soldi</i>  | Nona        |  |
| Giozza                | Goccia  | Nonola      |  |
| Gnanca                | Nemmeno   | Nonzolo     |  |
| Gnancora              | Non ancora  | Nuar        |  |
| Gnoco                 | Sciocco, <i>ed anche la subitanea prominenza che deriva da una percossa</i> |             |  |
| Gnuca                 | Cervello, talento   | Nuo         |  |
|                       |   | Ose         |  |

Oselar Uccellare  
Paca Percossa  
Pagiazzo Pagliericcio, *dicesi anche per balordo*  
Pair Pagare il fio  
Paluo Palude  
Pampano Scioccone, *allegoricamente*  
Panchiane Invenzioni, bugie  
Pandolo Giuoco di fanciulli, *dicesi anche per minchione*  
Parar Spingere  
Peada Calcio  
Pegio Guardatura brusca  
Penariol Agoraiol  
Peochio Pidocchio  
Pergolo Poggiuolo  
Permalin Chi se n'ha a male facilmente  
Petegolo Chiaccheron; e che riporta gli altrui fatti  
Pezzente Pitocco  
Pisolar Dormigliare  
Piturar Pitturare  
Pitima Stucchevole; seccatura  
Poco su poco zo A un di presso  
Polegana Flemma, lentezza  
Porcole Busse  
Potachieto V. *Fuffigna*  
Pusarse Appoggiarsi  
Quindese (un da) Quindici soldi  
Radego Differenza, divario  
Rambar Portar via con rapidità  
Rantego Rantolo  
Rasador Rasoio  
Rassar Raschiare  
Regata Gara di barche  
Repetarse Rimettersi  
Ridada Risata  
Rosegar Rosicare, *dicesi anche per rim-brottare*  
Ruspio Ruvido, *dicesi anche per vecchio veneto; e per uomo di cattive maniere*  
Ruzene Ruggine, rugginoso  
Rumegar Ruminare, ed il masticare dei vecchi sdentati  
Salampa Donna imbarazzata nei propri fatti  
Salgher Salcio o salice; e uomo rozzo  
Sbalà Uomo senza denari  
Sbecotarse Bezzicarsi  
Sbregarre Squarciarsi, lacerarsi  
Sbrissare Sdruciolare  
Sbrufar Spruzzare, e si dice sbrufar da rider  
Scalmanà Scarmenato, riscaldato  
Scampà Fuggito  
Scapolo *Dicesi per uomo giovine libero*  
Schiappo Branco  
Sbafarà Spettorato  
Scantinar Mancar di fermezza, anche nelle cose  
Scapuzzar Intoppare co' piedi

Schiaio Addio  
Schinele Malanni  
Sconto Nascosto  
Scorlar Scuotere  
Scorsizzar L'andar su e giù per diletto con una barca  
Scotà Aver dal fatto acquistata esperienza in qualche cosa, *esser sta scotà*  
Scrayazzo Scroscio di pioggia che dura poco  
Sculier Cucchiaio  
Scuria Scuriada, *frusta da cavallo*  
Sempio Semplice, scempiato  
Sentarse Sedere  
Sestiu Vezzo, smorfia, buona grazia  
Sesto Scherzo, *alcuna volta garbo, grazia*  
Setà Serrato alla vita  
Sfantarse Dileguarsi  
Sfiamegar Fiammeggiare  
Sgalmare Zoccoli  
Sgrinfe *Dicesi per le zampe del gatto, ed anche per unghie*  
Sguatarar Diguazzare  
Sior sì Sì signore  
Slaca Coscia  
Snombolarse Slombarsi  
Sofegasso Gran caldo  
Spassizzar Passeggiare  
Spencer Spignere  
Spegazzar Cancellare  
Spesseggar Fare in fretta  
Spiferar Dichiarar apertamente  
Squaglia Scoperto, dir cosa che si poteva tacere  
Squaquarar Ciarlare  
Stizzo Legno mezzo abbruciato, e uo-  
no assai magro  
Stomegoso Stomachevole; smorfioso  
Storno Stordito  
Strazza-mestieri Guasta-mestieri  
Strenzer Strignere  
Stroparse Otturare  
Strucar Esser oppresso, affollato dalla calca  
Strucolar Abbracciarsi, spremere i linoui, l' uva  
Strussia Fatica  
Stuar in bota Ammorzar sull' istante  
Stufarse Annoiarsi, stancarsi  
Suar Sudare  
Sul far Alla foggia, sul principio  
Sul far del dì All' alba del giorno  
Sunar Raccogliere  
Supiar Soffiare  
Suporto Interesse di capitale a mutuo  
Sussidio Soccorso  
Sustar Magagna  
Tacola Lamentarsi  
Tananai Strepito  
Tandan Uomo screanzato

|              |   |                    |   |
|--------------|---|--------------------|---|
| Tarmà        | Tarlato   | Vida               | Vite  |
| Tavanà       | Molestato   | Vogar              | Remigare  |
| Tibidoi      | Strepito  | Vovi               | Ovi   |
| Tofoloto     | Uomo piccolo e grassotto                          | Zago               | Chierico  |
| Toleta       | <i>Toelette</i>                                   | Zamberlucò         | Soprabito lungo   |
| Tolè, Tolè   | Prendete, prendete                                | Zendaletto         | <i>Zendado, specie di velo che usavano le veneziane</i> |
| Tombole      | Istanti, <i>allegoricamente</i>                   | Zate               | Zampe   |
| Tomo         | Stravagante                                       | Zavariarse         | Sviarsi, delirare, vaneggiare                           |
| Tonizzar     | Tuonare   | Zentaglia          | Gentaglia   |
| Toso         | Ragazzo   | Zerman             | Germano   |
| Totano       | Minchione   | Zizole             | Giugiole, <i>ed anche per giovani discoli</i>           |
| Trafeghin    | Destro nel disimpegno di piccoli affari           | Zogar              | Giuocare  |
| Trotola      | Fanciulla vezzosa, tenera                         | Zontar             | Giuntare  |
| Trotolar     | Camminar in fretta con grazia                     | Zozo o zo          | Andar zoso delle scale <i>vale</i> discendere           |
| Trotolo (un) | Una mica  | Zoto               | Zoppo   |
| Trombon      | Millantatore                                      | Zucon              | Balordo   |
| Usma         | Odore; <i>aver usma</i> , aver buon discernimento | Zuf, zafe cervello | Dar tutta la mente ad una cosa                          |
| Usmada       | Fiuto, occhiata                                   | Zunar              | Digiunare   |
| Vedelo       | Vitelo  | Zurlar             | Delirare  |
| Vegniu?      | Venite? <i>interrogativo</i>                      |                    |   |
| Ventola      | Ventaglio   |                    |   |
| Veta (una)   | Un filo   |                    |   |



# ANNOTAZIONI.

(1) *Ver*, lo stesso che vedere.

(2) Questo verso dal primo editore leggevasi errato così:

*me fortin noriga e passe*

Dallo stesso editore sonosi aggiunte le parole che leggonsi fra parentesi, le quali, come ragionevoli, sonosi conservate anche nell'edizione presente. Si ommisero bensì alcuni versi, evidentemente appiccatti, sul fine.

(3) Il senso di questo verso è il seguente: *che troppo lontana mi è la festa*. Luitan per lontanau leggesi anche nel verso decimosettimo.

(4) L'altra edizione leggeva erroneamente *farò*.

(5) *Oldi*, lo stesso che *udi*, per *udirono*. Scorrerazione grammaticale, non infrequente in siffatto genere di poesie, specialmente di sì vecchia data.

(6) Nell'altra edizione leggesi *filiate* in luogo di *fè liate*.

(7) Anche questo verso è alquanto scorretto nell'edizione anteriore.

(8) L'altra edizione ha *vose*, erroneamente come ognun vede. *Volse* leggesi anche otto versi dopo.

(9) *Guia*, forse vale lo stesso che guida.

(10) Parla di Venezia, ossia della repubblica veneta.

(11) *Sezo*, seggio.

(12) *Resenze*, raggiunge.

(13) *Zia*, già.

(14) *Ziti*, giti; *maxone*, magione.

(15) *Ian*, essi hanno.

(16) *Lo lida de zata*, gli dà di zampa,

(17) *Lo la bata*, prende la fuga.

(18) *La folgia*, la foggia, il modo.

(19) *Lusta*, voce toscana, che nell'odierno dialetto veneziano equivale ad *usma*.

(20) *Dezo*, adesso, ora.

(21) *Varga*, varca, da varcare.

(22) *Pizola*, piccola.

Racc. Poes. Ven.

(13) *Raina*, regina.

(24) *Pe*, piede. La descrizione del veneto leone è conforme alle pitture antiche che abbiamo di esso.

(25) *Saferra*, si afferra.

(26) *Vargo*, varco.

(27) *Voio*, voglio.

(28) *Possa*, poscia.

(29) *Zinti*, ciuti.

(30) *Anomo*, nomino. *Revolui al naspo*, posti all'intorno; è detto allegoricamente.

(31) *Pago* con *Arbe*, due paesi della Dalmazia.

(32) *Laura fiana*, orifiamma, famosa bandiera degli imperatori antichi.

(33) *El balsa*, si ritiene certo per Bascià.

(34) *Zera*, cera.

(35) *Seda*, seta. Da questo verso rilevasi, che in Corfu si raccoglieva a quell'epoca molta seta, o per lo meno se ne faceva grande commercio.

(36) *Prova*, prora.

(37) *Lixole de crede*, l'isola di Creta.

(38) *Retemo Lachania*, Retimo e Canea.

(39) *Zento mia*, cento miglia.

(40) *Grana e gotoni*, grana, insetti, che si adoperano per tingere in rosso. Gotoni, cotonici. Questo prova, che in Candia si coltivava a quell'epoca abbondantemente il cotone.

(41) *Chaxi*, forse cassia.

(42) *Ochi me fizi*, cioè, ho fissato gli occhi.

(43) *Ape*, a piede, appresso.

(44) *Nonne soto el terreste*, non è sotto il terreste.

(45) L'autore coi seguenti versi ricorda i luoghi, che i veneziani hanno conquistato coll'armi, o che si son dedicati ad essi volontariamente. Descrive la battaglia data alle genti del re d'Ungheria, e l'altra per cui si ebbe tutto il Friuli. Le imprese venete in quella provincia durarono dal 1411 al 1413, come scrive il Sanuto nelle vite dei dogi.

- (46) *Elze*, egli è.
- (47) *Ramella*, ramicelli.
- (48) *Madassa*, matassa.
- (49) *Iaze*, giace.
- (50) *Axlo*, Asolo.
- (51) *Paziza*, errore dell'originale, si legga *patisa* cioè *pateggia*.
- (52) *Trepa*, in vernacolo *trepo*, che significa unione, e talvolta inganno.
- (53) *Vermochane*, vermoeane, parola toscana.
- (54) *Fradi*, fratello; *chiala*, guarda, da *chialar*, guardare; parole friulane.
- (55) *Nissum non li va suto*, nessuno va esente.
- (56) *Pagi el schoto*, pagar lo scoto, modo di dire toscano.
- (57) *Chodier*, codiere, quello che va in coda, ultimo. Voce, che si potrebbe aggiugnere al vocabolario della crusca del Cesari, ove trovasi solo *codiatore*.
- (58) *Rexe*, rese, rendette.
- (59) *Miore*, migliore.
- (60) *Priexia*, fretta; in pressa nell'odierno dialetto veneziano.
- (61) *Landriano mare*, il mare Adriatico.
- (62) *Puixi*, *Griegi*, *Ceziliani*, pugliesi, greci, siciliani.
- (63) *E de Tuschana*. Questo verso conferma ciò che altri scrittori affermano, che i toscani portano in Venezia l'arte di far drappi di seta; specialmente i lucchesi qui la recarono. Vedi le *Inscrizioni veneziane* del Cicogna vol. I, ove parla della chiesa di S. M. dei Servi.
- (64) *Chatellani*, catalani. Da questo verso rilevasi, come nel 1420 Venezia ritraeva il grano anche dalla Spagna, che ora da qui ne ritira.
- (65) *Rimano*, *Fam e Zexena*, Rimini, Fano e Cesena.
- (66) *Ribuole*, ribole, vino eccellente, così forse detto perchè bolle due volte.
- (67) *Puone*, ne può.
- (68) *Formai*, formaggio.
- (69) *Bixi*, piselli.
- (70) *Verle*, verle è nome volgare indicante una varietà di ciliege.
- (71) *Le fige fresche darbe*, i fichi freschi d'Arbe in Dalmazia.
- (72) *Ostrege desboba*, ostriche di Sdoba. La Sdoba è un ramo dell'Isonzo, che mette in mare poco lungi da Aquileja.
- (73) *Boba*, boga, pesce di mare del genere degli spari.
- (74) *Oxele*, uccelli.
- (75) *Leffete*, l'effetto.
- (76) *Che Dio mixerere*; modo di dire toscano.
- (77) Parla l'autore delle galee veneziane mercantili, che si mandavano nelle Fiandre, a Barutti, ed in Alessandria.
- (78) *Bucharini*, bagarini, voce che in vernacolo suona fanciulli, e così l'autore chiama i marinai.
- (79) *Si la conventa*, così la conventa; così la raduna nella galera. Nel vocabolario del Cesari vi è *conventare* nel senso di ascrivere nell'adunanza de' dottori; e qui è posto in senso più esteso, che è quello di *unire* una cosa in un luogo.
- (80) *Zoe de spizaria*, cioè spezieria. Qui l'autore fa la enumerazione delle diverse droghe, che si comperavano nel Levante.
- (81) Questi due versi confermano che all'epoca del 1400 si coltivava, e fabbricavasi in Sicilia lo zucchero; notizia anche da altri autori riportata.
- (82) *Verso Valenza*. I tessitori veneti di drappi di lana andavano a provvedersi in Ispagna delle migliori lane, conosciute ora sotto il nome di *merinos*.
- (83) *Si schriza*, si scherza.
- (84) *Raine de gran continare*, regine nate di gran corti.
- (85) *Antixi*, antichi.
- (86) *Bixi*, qui una tal voce vuolsi intendere per *bissi* panni-lini nobilissimi.
- (87) Nell'anno 1420 al 22 maggio alle ore 12 dice l'autore d'aver compiuto questo suo lavoro.
- (88) *Galie*, qui si intende per guapcie, ma è voce anche in vernacolo fuori d'uso.
- (89) *Dalaora*, sorte di mannaia, stromento noto fra gli operai dell'arsenale.
- (90) Signoria, intendesi qui la repubblica di Venezia.
- (91) La regata, *gara di barche*; spettacolo popolare in Venezia, che invita il concorso di nazionali e forestieri, e che mercè le provide cure del Municipio rinnovasi ora annualmente.
- (92) Il testo dice *guerra vostra*, che si stimò più relativo di cambiare in *gloria vostra*.
- A pag. 92, Sonetto IV. *Angelo Querini* patrizio veneto, figliuolo di Lauro, nel 1761-62 era Avvocato del Comune quando sopra ricorso di una



dama veneziana di casa Cappello diede improvvisamente lo sfratto dallo Stato ad una donna di professione *Concia-teste*, la quale da Brescia era passata a Venezia per impiegarsi nel servizio di una casa patrizia. Ma la donna, avendo esibite prove della onesta sua fama, e di essere a torto aggravata, fece giungere i suoi reclami al tribunale degli inquisitori di Stato, dolendosi gravemente che l'Avvogadore Querini oltrepassati i limiti della sua competenza, e della giustizia, la avesse così vilipesa e scacciata. Il tribunale tentò prima con destre e private informazioni di far rimuovere l'Avvogadore; ma trovatolo fermo nel passo fatto, restituì coll' autorità propria la donna alla primitiva libertà. Da questa causa nacquerò i primi disgusti, che poi degenerarono in palese inimicizia tra il Querini Avvogadore, e Giovanni Donato della casa detta dalle Torreselle, uno degli Inquisitori di Stato, e prima suo grande amico. Resa pubblica la cosa cominciarono i partiti privati. Sosteneva il Querini di avere usato della podestà legittima concessagli dalle leggi; diceva che l'atto del tribunale degli Inquisitori fu una manifesta violenza al magistrato primario della repubblica, e che se l'Avvogadore commise un fallo in ufficio, non è sottoposto ad altra censura che a quella del Senato, e del Consiglio di X e di XL, mentre l' eguale non può aver comando sopra l' eguale. All'incontro il Donato uomo di robusto ingegno, e pratico degli affari politici, rispondeva che l'Avvogadore non solo aveva ecceduto nella sua facoltà, ma di essa commesso un enorme abuso, perchè se l'ebbe arrogata in pregiudizio di una persona innocente senza serbare ordine alcuno, e introducendo così un esempio ferace di gravissime conseguenze allo stato quieto della repubblica, se con prestezza non fosse represso dagli inquisitori, ai quali apparteneva la custodia della tranquillità comune. Altri fatti succedettero dipoi, i quali sempre più suscitavano l'animo del Donato, già divenuto Capo dei X, contro il Querini: imperocchè sembrava a' più accorti senatori di vedere che il Querini e i suoi colleghi Avvogadori tentassero di abbassare la dignità del Consiglio dei X, e di diffinire la forza di quel tribunale; il perchè gl' inquisitori risolsero di sverellare il male dalla radice, e rinchiudere il Querini nel Castello di san Felice di Verona. Ciò avvenne nel 12 agosto del detto anno 1761 in cui

dopo avere egli passata la sera allegramente in compagnia del cavaliere Girolamo Ascanio Giustiniani, eletto ambasciatore a Roma, suo grande amico, e di Giulietta Preato moglie di Francesco Uccelli notaio straordinario nella ducale cancellaria, e dopo essere già ito a letto, un fante del Tribunale Supremo gl' intimò di dover immediatamente in abito di campagna partire con lui. Questo ordine non isbigottì punto il Querini, il quale, scritti alcuni viglietti, montò col fante in un burciello, e custodito da quattro soldati di cavalleria passò a Padova, indi a Vicenza, e a Verona. La relegazione del Querini suscitò maggiormente gli animi, e li divise in due partiti, per la qual cosa fu necessario istituire quella che si dice *Correzione* composta di cinque senatori, i quali avessero a rivedere i capitolarî di tutti i Consigli, e Collegi, e avessero a proporre al maggior Consiglio quelle regolazioni, moderazioni, alterazioni ec., che paressero loro necessarie al pubblico servizio, e alla perfetta esecuzione delle deliberazioni del maggior Consiglio. Malgrado però che più d'una volta si sia tentato di far richiamare il Querini dal bando, e che i suoi parziali ed amici si sieno maneggiati per fare che uno dei correttori fosse eletto nella persona stessa di lui, gli sforzi furono vani, e la relegazione durò fino a che terminati furono tutti cotesti dissidii.

(93 pag. 93) Nel 1766 avendo i Tripolini rotti i patti stabiliti colla repubblica colla depredazione di legni e persone venete, il Senato dopo varie discussioni decretò nel maggio di quell' anno di spedire il capitano in golfo *Jacopo Nani*, il quale tanto bene seppe dirigersi che furono restituiti i depredati legni, e poste in libertà le persone; il perchè n'ebbe in premio il cavalierato della stola d'oro, e retribuzione decorosa il console veneto in Tripoli. Veggasi il *Sandi* (Storia civile, lib. IV. suppl. p. 237).

(93 pag. 106) Pietro Franceschi, seg.; Antonio Paolo Ricci, computista.

(94) Il Franceschi fece l'enumerazione delle leggi dall' anno 1200 sino al 1767; comprendendovi anche i decreti del Senato.

(95) La Parte 24 settembre 1333, e la Parte 31 dicembre 1526.

(96) Il decreto 26 marzo 1603.

(97) Il Montegnacco.

(98) Decreto del Senato 1605 24 settembre, non mai approvato dal maggior Consiglio.

(99) Scrittura del segretario Franceschi.

(100) Decreto del 10 settembre 1767.

(101) Approvato dal maggior Consiglio nel dì 20 dicembre 1767, dove fu portato senz'altra informazione.

(102) Intendesi l'artificio di non isvelare al maggior Consiglio l'autorità usurpata ad esso dal Senato col decreto 24 settembre 1603, che non fu mai approvato dal detto M. C.

(103) Qui si intende l'ordine da tenersi nel leggere le carte; cioè 1.º le scritture *Franceschi*; 2.º la parte del maggior Consiglio 1333; 3.º l'altra 1536, e il decreto del senato 1605, e finalmente la parte di esso M. C. 1767.

(104) Le scritture *Franceschi*.

(105) Per il perno della massima o ragion di Stato si intenda la religione.

(106) Sono le parole della scrittura *Franceschi*

(107) Due estremi diametralmente opposti, in conseguenza di quello che vuol provare, sono la riforma e la soppressione.

(108) Qui alludesi alla storia di Paolo V, che scagliò l'interdetto contro la repubblica, ed alle altre del canonico Zabarella, e del Ravagnin.

(109) Quella del 1333, e l'altra del 1536, dalle quali derivano tutte le altre.

(110) Lettura della parte del maggior Consiglio 1333. Con questa introduzione si mostra l'inabilità colla quale *Franceschi* ha compiuto la sua scrittura mediante una enumerazione di leggi dal 1200 al 1764, quando le posteriori alle due 1333 e 1536 sono tutte esecutive e regolative delle medesime, e niente servivano quelle prime al caso presente.

(111) Cioè le leggi del maggior Consiglio 1333 e 1336.

(112) Si allude alla Parte del maggior Consiglio 1333.

(113) Si allude alla controversia colla corte di Roma in tempo di Paolo V, che mandò l'interdetto contro la repubblica per motivo del presente decreto del Senato.

(114) *Seniores*, il magistrato dei X Savi. *In dignitate*, la deputazione alle Mani-Morte; i più *Sapiienti*, i Savi-grandi; il *Primate* non si nomina per riguardo.

(115) Il monastero di san Nicolò di Lido dispensava giornalmente elemosine alla povera popolazione, la quale cadde poi dopo la soppressione di detto monastero nella maggior indigenza, perchè abbandonata da qualunque soccorso.

(116) Alvise Emo, Alvise Zen, Pietro Barbarigo, Lodovico Flangini e Gerolamo Zulian, cinque correttori delle leggi.

(117) Giacomo Mazzolà esercitava la medicina.

(118) Valoroso pittore veneziano.

(119) La testè riferita *Epistola a Lidia* fu stampata per la prima volta in Vicenza nella stamperia di Gio. Battista Vendramini Mosca nel 1793 in 8.º senza nome di autore, e col titolo *Sul Problema della felicità, Canzone*. Venne ristampata a pag. 194 col titolo: *Discorso morale ossia Epistola a Lidia* nel libro: *Ore solitarie ossia Raccolta di novelle, racconti ed aneddoti*, Verona per Valentino Crescini 1837, in 12.º, ed anche qui manca il nome dell'autore. Per quanto si dice ne fu autore *Gian-giacomo Mazzolà* padovano.

Siccome poi tanto nell'edizione 1793, quanto nella ristampa 1837 si riscontrano parecchie diversità di lezione, così si è procurato di combinare la migliore. Osserveremo che le desinenze, *ridere, credere, nascere* ec., non sono proprie veramente del dialetto veneziano, che usa tali desinenze tronche; ma la bellezza di questo breve componimento ci persuase a darvi luogo anche in questa collezione, sebbene il dialetto non possa dirsi puro veneziano.

(120) Vino nero squisito, che si raccoglie in Bagnoli, villa del territorio padovano, dove la illustre famiglia Widmann ha molta parte delle sue rendite.

(121) Era negoziante di vini forestieri in Venezia.

(122) Pezzo di terreno così nominato dalla sua figura, che produce il *friulano* dell'ultima perfezione.

(123) La N. D. Elisabetta Duodo Contessa Widmann.

(124) Voce che nel dialetto veneziano dinota il ceto medio.

(125) Il popolo di Venezia soleva nei tempi repubblicani dividersi in due corpi, cioè quello dei *Castellani*, abitanti del sestier di Castello, e l'altro dei *Nicolotti* abitanti del sestier di san Nicolò.

(126) Il dottor Giuseppe Menegazzi fu amico dell'autore; quì si allude al suo ditirambo *il Bacco in mare*.

(127) S' intende la riviera del fiume Brenta, che offre un amenissimo tragitto da Padova alla laguna veneta, e villeggiature deliziosissime.

(128) Comune lungo il fiume Brenta, dove esiste la deliziosa villa reale.

(129) *El pra de la vale*. Vastissima piazza in Padova, luogo fangoso un tempo ed impraticabile; disegnato poi e ridotto magnifico ed ameno.

(130) Ad Andrea Memmo, patrizio veneto, deve si la idea prima dell' attuale costruzione del Prato della Valle.

(131) Le molte aggiunte e varianti fatte alle poesie dei Gritti furono tolte da un manoscritto che possiede il sig. Pietro Oliva dal Turco, di Aviano, che venne da lui arricchito di giudiziosissime annotazioni, cortesemente favorito agli editori della presente Raccolta.

(132) Nelle anteriori edizioni questi due versi erano malamente compendiali nel solo errato:

*Ti per altro ti è più zovene de mi.*

(133) Usava il Gritti scrivere le parole francesi come si pronunziano.

(134) In alcun mss. questo apologo ha il titolo seguente: *El senator barnaboto*; ed in altro *Biasoto e Balan*.

(135 pag. 210) Si sottintende, coltello.

(135 pag. 277) Valente incisore in argento.

(136) L' abate Vezzi fu fabbricatore in Venezia di superbe porcellane.

(137) L' autore intende per case grandi *i teatri*.

(138) L' autore contempla la disorganizzazione fisica del corpo animale.

(139) La *Baleca* era famosa fabbricatrice di fritelle, *fritole*, in Venezia.

(140) La *pevarada* è sinonimo di *sbirraglia*.

(141 pag. 297) Uomo di condizione inferiore all'ordine patrizio.

(141 pag. 332) Antichissima osteria vicina alla piazza di san Marco.

(142) *Delai* fu celebre suonatore di oboe.

(143) Era notissimo caffettiere in piazza di san Marco.

(144) Famosissimo caffè in piazza di san Marco.

(145) Caffè in calle larga a san Marco.

(146) Altro caffè in calle larga.

(147) Erano ridotti di conversazione.

(148) Furono notissimi caffettieri in Treviso; la bottega del secondo sussiste ancora.

(150) Il fenomeno di ottica, detto *Fata Morgana*, o meglio miragio, che fu visibile nel 20 settembre 1835 agli abitanti dei colli di Mendip presso Bristol in Inghilterra, venne letto in Feltre sulla gazzetta di Venezia nel tempo in cui era quella città onorata dalla presenza della principessa di Galitzin, nata principessa di Souwaroff. Invitato l' autore a scrivere nel dialetto veneziano dettò questi versi, che furono alla principessa presentati.

(151) Le gazzette di Germania annunziarono che nel 20 settembre 1835, furonvi nelle stesse piane di Kalisch continue manovre di cavalleria, cioè nel giorno stesso del miragio veduto a Mendip.

(152) Le truppe di Napoleone Buonaparte, quando si avvicinarono all' Egitto, avendo veduto un esercito di fronte lo credettero di nemici, ed era invece l'ottica illusione del miragio, che le raddoppiava.

(153) Appariscenze indicate dal p. Kircher, dal Moreri, e da madama di Genlis.

(154) A tutti è nota la famosa Noce di Benevento, pretesa sede degli stregoni e delle magie.

(155) Antonio Lamberti, e Francesco Gritti, il primo nato a Mel, comune del distretto di Feltre, l' altro patrizio veneto.

(156) Gritti stesso confessava, che le sue grazie vernacole erano nodellate sulle poesie brillanti di Florian, autore francese.

(157) Il poeta colse amarissimo frutto da questa composizione, che fu letta alla tavola del Prefetto. Seras, governatore di Venezia, lo fece arrestare, e condur prigione.

(158) L'albero della libertà piantato sulla piazza di san Marco all' epoca della invasione delle provincie italiane fatta dai francesi.

(159) La mendicizia fu bandita sotto il governo italico, ed i poveri chiedenti elemosina per le vie vennero raccolti in un luogo apposito sussistente anche oggidì sotto la denominazione di Casa di Ricovero.

(160) In compenso delle imposte forzose durante il blocco di Venezia si davano in ipoteca ai contribuenti partite di argento vivo.

(161) Il dott. Mantovani, amico di comune conoscenza nativo di Udine.

(162) L'autore aveva sospesa in campagna la sua traduzione di alcune odi di Orazio.

(163) La Malanotti contralto, la Manfredini soprano.

(164) La Corally si vestiva ad uno specchio simulato, ed un'altra dietro il velo, che figurava lo specchio, ripeteva gli stessi movimenti mantenendo così l'illusione.

(165) Spiridion Castelli, che in tale occasione si distinse con una bellissima ode.

(166) Nome pindarico dello stesso Castelli.

(167) Il n. u. Vittore Benzon.

(168) Giuseppe Aucillo, chimico farmacista, e buon poeta vernacolo.

(169) Giuseppe Bombardini, nome alle muse carissimo, che descrisse mirabilmente l'incendio del ponte di Bassano sua patria.

(170) Il cav. Mengaldo seguace ad un tempo di Marte e di Apollo.

(171) L'avvocato Astori, che amicissimo del Marconi, bravo ed onesto legale, si rivolse col maggiore entusiasmo al poeta domandando una composizione.

(172) L'autore allude ai molti suoi crediti.

(173) *Honestae voluptati sacrum* è la iscrizione, che stava al di fuori, e che l'Autore assicura che combinava col *de drento*.

(174) Situazione comica difficilissima sostenuta dalla Fenzi colla maggior bravura nel celebre terzetto della farsa intitolata, *il matrimonio per concorso*.

(175) Carlo Zanoli allora pagatore della regia marina.

(176) Viene rimarcata questa circostanza come una vera disgrazia per la sposa, che era brava filarmonica.

(177) È da sapersi, che la sposa era stata prima nel convento delle cappuccine conferma intenzione di consacrarsi a Dio, ma esile di natura non potè resistere al rigore di quella vita.

(178) Il signor Sebastiano Gaggio avo della sposa.

(179) Il poeta, avendo sempre in vista il religioso contegno del signor Sebastiano Gaggio avo della terza nipote che festeggia in questo brindisi in occasione delle sue nozze col sig. Amadeo Mori di Rovigo, fa precedere questo passo di un

salmo, e prende con ciò argomento di encomiare la fecondità della sposa come visibile segno della benedizione celeste.

(180) Antonio Gaggio, padre della sposa.

(181) Prima delle nipoti maritata in Buttacaliche di Belluno.

(182) Quella maritata nell'avvocato Gaspari, come dal brindisi precedente.

(183) Nome della sposa.

(184) Quarta nipote dell'autore.

(185) Un paroco bolognese, che fu personalmente conosciuto dall'autore, aveva convertita la propria cantina in biblioteca di santi padri, e quindi ogni cartello portava all'esterno il nome di taluno di questi, e così vedevansi le opere di san Basilio convertite in un barileto di cipro, e quelle di sant'Agostino in un altro di madera, o di malaga.

(186) Casino sotto le procuratie vecchie della dama accennata.

(187) Apostrofe alla contessa Mangilli conosciuta dal poeta quando era sposa.

(188) Imene, secondo alcuni, figlio di Apollo e di Calliope, e secondo altri di Urania.

(189) Jacopo Mantovani, che fra gli aridi misteri di Astrea sa coltivare le muse con buon successo, onde distinguesi per la vigoria delle sue canzoni pindariche.

(190) *Nota l'Autore* « de vardar sta composizion » come una prova. El vernacolo spoglio del punte-  
» lo bernesco, o del satirico, difficilmente se tira su  
» col solo agiuto de la poesia per la grandissima  
» rason, che l'altezza de le idee fa i pugni co  
» l'umiltà del linguaggio. Non ostante penetrà  
» come gera dalla perdita del mio primogenito  
» de nome Petronio, vittima d'una malattia de  
» le più lunghe e crudeli, ho volesto provarme  
» de sfogar el mio dolor in do piccoli canti, l'uno  
» rivolto a la Providenza, l'altro al putelo. El  
» primo dovaria esser filosofico, el secondo pate-  
» tico. Adesso che savè tutto giudichè soto sta  
» vista. »

(191) L'isola di san Cristoforo, unita a quella di s. Michele, forma il cimitero comunale.

(192) L'autore scrisse dalla campagna, in un luogo sul Terraglio, abbellito da una semplice pergola, onde invidia qui un giardino inglese con boschetto, capanna rustica ec., di proprietà d'un illustre suo vicino.

(193) La malattia del fanciullo, detta dai medici *Cifosi*, è quella che attacca l'osso della schiena, lo fa crescere fuor di modo, e ne consuma la interna midolla. Terminò quindi la vita per consunzione, coperto di piaghe, dopo sette anni di sofferenze crudeli.

(194) Allude alle belle forme del bambino prima della malattia.

(195) La malattia del puttello ebbe principio nell'età di 3 anni con dolori acutissimi alla spina dorsale, che lo svegliavan la notte. Nelle antecedenti quartine l'autore allude ai doni, che al proprio figlio avea prodigato natura; specialmente la musica lo faceva divenir convulso.

(196) Bisognava curargli le piaghe tre volte al giorno, e tale operazione si faceva da sua madre con tutto l'eroismo d'un'anima amorosissima. Due ore sole prima ch'ei muoia la madre si allontanò dal suo letto.

(197) Alludesi all'antico uso di eseguire in Treviso corse di cavalli sciolti e montati nel giorno di san Martino con apertura del teatro.

(198) Il Martignion fu autore per alquanti anni d'un almanacco intitolato *El Corier senza una gamba*, ridondante di novелlette locali presentati con molto spirito.

(199) Qui si allude alla perdita fatta dai coniugi Giovio di un figlio unico, onde cercarono una distrazione nel soggiorno di Venezia.

(200) Spiridion Castelli.

(201) Il cav. Angelo Mengaldo fu dei pochissimi italiani, che ritornarono dalla famosa campagna di Mosca.

(202) Jacopo Mantovani, seguace di Astrea e delle muse.

(203) Giuseppe Ancillo, farmacista chimico, e buon poeta vernacolo.

(204) Nicolò Strefi gentile poeta bernesco.

(205) Pietro Buratti, scrittore di poesie classiche nel dialetto veneziano, nella maggior parte però delle quali la licenza va unita alla satira.

(206) N. U. Vittore Benzon.

(207) Giuseppe Bombardini di Bassano.



## CORREZIONI E GIUNTE

TRATTE DA UN CODICE DEL SECOLO XIV ALLE QUARTINE  
IN LODE DI VENEZIA.

- Pag. 4. tra la nota 30, e 31. *Muglia e Parenzo* ( invece di *Parenzo Puola* ).  
 — tra la nota 38 e 39. *Vini formenti e grassa* ivi si *atrova* ( invece di *vino e oglio assai* ).  
*Devizia* (corr.) *Di ciò*.  
 Pag. 5 tra la nota 48 e 49. *Samassa* (correggi) *famosa*.  
*zuste* (correggi) *dolze*.  
*possa* (correggi) *posto*  
*tore tante* (correggi) *terre tante*  
*sopra el monte* (correggi) *verso la fronte*.  
 — tra la nota 49 e 50. *Quero e Castelnovo*  
 — tra la nota 50 e 51. *Diavolo fradi mo chiar baron*.  
 Pag. 6. alla nota 54. *Loredò appresso el suo* (correggi) *Io vedo appresso el Po*.  
 — tra la nota 59 e 60. *Saraxini* (correggi) *Suriani*.  
 — tra la nota 62 e 63. Invece del verso : *De grano e grassa e Murlachi ancora*  
 Pag. 7 tra la nota 67 e 68. si legga : *Di caxo e grassa e vedo Puglia ancora*  
*ponte* (correggi) *ponto*.  
 — tra la nota 68 e 69. *e go da late* (correggi) *e goate*  
 — tra la nota 71 e 72. *Trovi luzi e tenche e moleche e chiepe*.  
 — ivi *Costoro de grano* (leggi) *questi e de lana*  
 Pag. 8 tra la nota 77 e 78. *munizione* (leggi) *condizione*  
 — ivi *Beledi Mechin* (leggi) *meledi e mechi*.  
 — tra la nota 80 e l' 81. *Lombardischi* (leggi) *Franceschi*  
 Pag. 9. tra la nota 82 e l' 83. *e Todischi* (leggi) *Todeschi*.  
 — tra la nota 83 e l' 84. *vero* (correggi) *chiaro*.  
 — ivi *el povero* (leggi) *el popolo*  
 — alla nota 86. *el ne recaduto i Bixi* (leggi) *che chiamii e Bixi*  
 Pag. 10. tra la nota 86 e l' 87. *El re de Franza* ec. Nel Codice si legge invece .  
     *El re Iughilterra con lo re di Castilia*  
     *Non e za meraviglia*  
     *El re di Navara e quel di Portogallo*  
     *El re di Franza za niun fa più stalo*  
     *E quel di Spagna ancora quel di Polana*  
     *E con la mente sana . . . ,*  
 — ivi dopo il verso : *Dogni Cita che regna in Cristianesimo*,  
 — ivi alla nota 87. vi si aggiunga l' altro : *In el santo batesmo*.  
 Si legge nel Codice così :  
     *Mille corando adi sedexe mazo*  
     *Con ani quattrozento e ventisette aprovo*  
     *Io Michaelae atovo*  
     *Compito questo cantare novo*.  
     FINIS.

# NOTIZIE

INTORNO

AGLI AUTORI COMPRESI IN QUESTA RACCOLTA.





## GIOVANNI BATT. BADA.

*Giovanni Battista Bada*, che ritrasse se stesso effettivamente nel sonetto a pag. 404 merita distinto posto fra gli scrittori nel dialetto veneziano.

Fu autore di componimenti moltissimi, di varii poemi, fra quali gode il primato *lo Scaramuzza*, e di annui pronostici conosciuti più propriamente sotto il titolo del *Schieson del Bada*, che furono sempre avidamente letti in Venezia dove nacque, e morì.

## GIORGIO BAFFO.

*Giorgio Baffo*, patrizio veneto, figlio di Giannandrea q. Giorgio nacque nel 1694 agli 11 di agosto da Chiara Querini q. Alvise q. Giorgio. Del 1737 si ammogliò in Cecilia Sagredo q. Gerardo q. Francesco. Ebbe varii magistrati, e ultimamente fu delle Quarantie. Morì del 1768; le sue poesie molto licenziose furono pubblicate in Venezia colla falsa data di Cosmopoli nel 1789 in quattro volumi in 8.°, e comprendono per lo più canzoni, sonetti, madrigali. Molte altre inedite di lui si conservavano presso l'ora defunto Teodoro Correr patrizio veneto. Non si può negare che il Baffo mostri molta originalità poetica, molta eleganza e naturalezza nello stile, ossia nel dialetto venezia-

no, frammischiato però, come usavasi allora, di parecchie parole italiane. Non sono peraltro tutti laidi gli argomenti dal Baffo trattati, e a noi parrebbe assai sconveniente se nel riprodurre la *Collezione de' Poeti in dialetto veneziano*, ommettessimo alcune cose del Baffo, le quali non offendono minimamente le pure e caste orecchie de' nostri leggitori. E siamo ben persuasi che se il chiarissimo Gamba si fosse data la pena di scorrere attentamente i detti quattro volumi delle *Opere del Baffo*, non avrebbe asserito (p. 154. *Dialetto Veneziano*) che non v'ha scritto di Giorgio Baffo che non sia licenzioso; e avrebbe forse dato luogo anche a qualche cosa di questo poeta nella collezione 1817 Tip. Alvisopoli, vol. 14 in 16.°, del qual Baffo lo stesso Gamba dice: *cui non mancano le doti di valente ed ispirato poeta* (pag. 141 *Dialetto*). Del Baffo leggasi l'articolo nella Biogr. universale stesso da Guinguenè, colle opportune osservazioni a difesa de' veneziani costumi dettate da S. C-I (Spiridione Castelli).

## ANGELO MARIA BARBARO.

Quest'uomo di strano umore ebbe i natali il dì 9 febbrajo 1726 in Portogruaro da Bernardo Barbaro, patrizio veneto, ch'ivi era allora Podestà, e da donna non nobile. Non potendo per le patrie costituzioni ve-

nir ammesso al maggior Consiglio egli indossò le vesti del sacerdozio, al cui stato forse non avea la miglior propensione. Educato alle lettere, e sortito avendo dalla natura un vivacissimo ingegno, si adoprò, e riuscì a migliorarsi i mezzi di sussistenza con uffizi affidatigli dal Governo, spendendo poi le ore di ozio tra le muse, che gli prestavano spontaneamente i salì, e le grazie, del patrio dialetto. Ogni novelluzza narrata a un caffè, che di buon grado egli frequentava, ogni avvenimento cittadino, aizzavano il suo prurito alla satira, e ne fan prova parecchie centinaia di madrigali stizzosi da esso indirizzati al suo caro amico Francesco Liarca segretario del Senato, i quali si conservano, con altre sue poesie, nella doviziosissima collezione di patrie lantiezze fatta dall'egregio patrizio sig. Teodoro Correr. È famoso in Venezia un dramma del nostro Barbaro, intitolato *Anna Erizzo in Costantinopoli*, scritto nel dialetto veneto con rarissima leggiadria, ma che non dovrà mai publicarsi, campeggiandovi troppo per entro la satira e l'indecenza. Lo stesso dire si può di altri suoi componimenti, fra quali a fatica si sono scelti dal Gamba que' pochi inseriti in questo volume. Erano all'autore familiari le mordaci risposte, ed i frizzi, ma sfuggitigli appena di bocca ne sentiva egli stesso vivissimo dispiacere; e parendogli d'essere per questa causa venuto in ira a' suoi concittadini non si fidava di camminare solitario durante la notte, e teneasi sempre a lato un fido e ben armato domestico, per lo che non di rado gli avvenne d'essere arrestato e maltrattato dalla sbirraglia. Sul finire della sua mortale carriera egli diventò sordo talmente da non poter introdurre all'orecchio il suono della

voce che per un tubo. Gracile e trascurato nei metodi di un buon regime non visse che anni 53, e mancò in patria nel dì 23 marzo 1779.

## BARTOLAMMEO BOCCHINI.

*Bartolammeo Bocchini*, fu scrittore bolognese, e fiorì verso il 1650. Si ricordano di lui i componimenti poetici coi seguenti titoli: *Miscuglio delle rime Zannesche*; *La corona macaronica*; *La piva dissonante*, la sola composizione dettata in lingua italiana; ed *il Trionfo di Scapino*, da cui fu tolta la canzonetta inserita a pag. 61.

## PAOLO BRITI.

*Paolo Briti* era comunemente chiamato il Cicco da Venezia. Molte sue canzoni popolari si trovano separatamente impresse, nè poche son quelle che si conservano nella Marciana, pubblicate dal 1620 al 1625. Fu fatto prigioniero verso il 1621, non si sa per quale sua inimicizia, ma venne poi liberato. Così scrisse il Gamba di questo poeta nella sua Serie degli scritti in dialetto veneziano.

## PIETRO BURATTI.

*Pietro Buratti*, nato a Venezia di famiglia bolognese, morì nel 20 ottobre 1832 in un suo poderetto a Mogliano, sulla strada, che conduce da Mestre a Treviso. Lo sfogo malinconico per la morte del suo primogenito fu impresso nel giornale di Milano, l'*Eco* Num. 85, Luglio 1830. Sarebbe onorevole pel dialetto veneziano, che tutti fossero raccolti i di lui scritti, e facendone rara scelta

si pubblicassero que' lavori, ai quali da qualche tempo attendeva, e vogliam dire specialmente alcune odi di Orazio, ed alcune satire di Giovenale.

## PIETRO BUSSOLIN.

È scrittore diligente nel dialetto veneziano, e le cose di lui, che si hanno alle stampe, chiaramente il dimostrano. Tale si appalesa il suo amore a questo dialetto, che nelle fatte pubblicazioni volle sempre accentata ogni parola, onde forse non si cadesse mai in equivoco di pronunzia, avvertenza questa non però usata da alcuno degli scrittori passati e presenti.

## IL PADRE CACIA.

Molte satire del P. Cacia ci sono venute alle mani, dice il chiar. Gamba, come non meno altre di Gio. Francesco Businello, del prete Giambattista Grotto, di un Mocenigo, di un Badoer, e di altri scrittori della metà del XVII, e del principio del XVIII secolo. Quantunque non manchino di buone immagini, di sali, e di acute riflessioni, nulladimeno non istanno a martello co' componimenti de' più colti e più moderni nostri scrittori. La sola satira dell' *Ipocrisia*, scritta da un uomo, di cui non si conosce altro che il nome, parve che possa esser letta volentieri, come la sola, che imbrattata non sia di molte sozzure.

## LA CARAVANA.

La raccolta da cui furono tolte le presenti

rime è intitolata : *Rime Piacevoli di diversi Autori, raccolte da Mess. Modesto Pino, et intitolate, la Caravana. In Venetia, appresso Sigismondo Bordogna, 1573 in 8.º edizione poi replicatasi, ivi appresso Allobello Salicato, 1580 in 12.º, ed inoltre in Trevigi, appresso Angelo Reghettini, 1612 in 12.º* Tutte queste edizioni sono oggidì divenute assai rare, e contengono componimenti innocui e gentili, ed altri non pochi imbrattati di oscenità. Resta ignoto l'autore, e quantunque dal frontispizio del libro apparisca che più d' uno v' abbia avuto parte, ciò non ostante si crede che le varie poesie appartengano ad un ingegno unico e solo; eccezione fatta al *Primo canto dell' Orlando Furioso nuovamente trasmutao*, ch'ivi si legge; lavoro di tenue importanza.

## MARC' ANT. AB. CAVANIS.

Uno dei due fratelli sacerdoti, che fondarono il benefico stabilimento delle scuole della Carità, e che ora si occupano alla riedificazione della chiesa di s. Agnese. Il ditirambico la *Zucca* fu sempre letto con piacere, e non dovrebbe essere la sola composizione vernacola di questo autore.

## EMMANUELE CICOGNA.

Un sonetto solo, ma grazioso, di questo illustre scrittore della grandiosa opera delle *Inscrizioni Veneziane*, abbiamo potuto inserire nella presente raccolta, quello stesso dal Gamba nella sua collezione inserito. Forse la eccessiva modestia dell' autore non ha mai permesso di più.

**ALVISE CICOGNA.**

Da una raccolta di varie cose dal Cicogna stampate abbiamo scelto le poche quì inserite senza per questo togliere il merito reale a quelle che furono da noi ommesse.

Gentile nei suoi dettati, e brioso, sarà sempre a desiderarsi ch'egli continui a rendersi caro alle muse, onde avere un posto distinto fra i poeti vernacoli.

**GIUSEPPE CUMANO.**

*Giuseppe Cumano* vide i natali in Feltre, dove esercitò con distinzione, e con onoratezza, l'avvocatura, e dove morì. Dai molti manoscritti, che il co. Giovanni Zanneteli ha potuto favorirci, quelli abbiain scelto, che ci parvero i migliori. Scrisse non poco il Cumano, e, comechè scrittore di molto spirito, è a dolersi che non siasi occupato in dettare cose di maggior rilievo per accrescere lustro al parnaso veneziano.

**LAZZARO CRUSOLA.**

*Lazzaro Crusola*, o da Curzola. Da un opuscolo senza data in 8.º intitolato; *Frottole nuove de Lazzaro da Curzola*, venne tratta quella quì inserita alla pag. 11. Il lettore non immagini di trovar la poesia delle scuole; i canti popolari, dice il Gamba, non sono che la espressione di naturali sentimenti, che non tralasciano per questo di essere oggetto di studio e di osservazione.

**JACOPO VINCENZO FOSCARINI.**

È il *Foscarini* un autore assai benemerito del patrio dialetto; che scrisse molto, e scrive tuttora; i suoi sonetti, al qual genere, piucchè ad altro, sembra inclinato, sono piacevoli, cospersi qua e là di sali, onde si tengono in pregio.

**BENEDETTO GIOVANELLI.**

*Benedetto Giovanelli* scrisse più cose in lingua italiana, di quello sia nel dialetto veneziano, epper ciò si dovette limitare a dar luogo in questa raccolta al buono, che scelse il Gamba pella sua collezione.

**CARLO GOLDONI.**

Dopo la raccolta delle di lui opere pubblicate in Venezia nel 1761 a cura di G. Batt. Pasquali, il libraio Zatta ne fece la ristampa adorna di figure, e dietro la nuova distribuzione dei componimenti suggeritagli dall'autore da Parigi. Fu questa la ventesima edizione data in luce, e ne vennero in seguito altre non poche fatte con economia, con eleganza, ed anche con lusso.

« Alle commedie in dialetto veneziano » scritte dal Goldoni devesi quella più unita » versale intelligenza, in cui questo dialetto » è venuto in Italia. Dipingendo l'autore in » tale linguaggio carezzevole le scene più vere, seppe produrre una illusione drammatica così, che sembra di essere presenti a » quei suoi dialoghi familiari, a quelle sue

» casalinghe peripezie. Anche oggidì, se va-  
 » lenti attori rimettano in iscena qualche  
 » commedia del Goldoni, non si lascia il tea-  
 » tro senza un vivo sentimento di riverenza  
 » pel di lui nome. Nelle due, *La buona mo-*  
 » *glie* ed *i Rusteghi*, stanno principalmente  
 » le veneri del veneziano dialetto. *Le morbi-*  
 » *nose*, e *Chi la fa l'aspetta* furono dall'  
 » autore stesso ridotte a lezione italiana, e  
 » quelle son che si leggono, la prima col ti-  
 » tolo *Le donne di buon umore*, e l'altra  
 » con quello *La burla retrocessa nel con-*  
 » *traccambio*. » Così nella Serie degli scrit-  
 ti nel dialetto veneziano del chiaris. Gamba

## FRANCESCO GRITTI.

*Francesco Gritti* nacque in Venezia il dì  
 12 novembre dell'anno 1740 da Giannan-  
 tonio Gritti, e da Cornelia Barbaro, donna  
 di molto spirito, non istraniera alle muse, e  
 non discara a' poeti più conti di quella sta-  
 gione, quali un Bettinelli, un Frugoni. L'as-  
 se paterno era di assai limitato, e perciò  
 Francesco ebbe nell'Accademia della Giu-  
 decca quella educazione, che la pubblica mu-  
 nificenza accordava a'men doviziosi fra gli  
 ottimati. Il P. d. Stanislao Balbi lo istituì  
 nelle lettere amene, e il P. d. Luigi Fabris  
 nella filosofia. Fu ammiratore ed amico di  
 entrambi, ma l'accigliata Sofia non istrinse  
 grande amistà con un giovane nato per salire  
 in parnaso. Compito il suo tirocinio in-  
 dossò la toga patrizia, e giunto ai trent'anni,  
 età dalle leggi prescritta, con larga maggio-  
 ranza di voti venne eletto a giudice ne' con-  
 sigli de' Quaranta. L'integrità e il senno, con  
 cui amministrava la giustizia, avrebbongli a-

perto il campo a una carriera più luminosa,  
 s'egli, d'altronde grato ai favori de'suoi cit-  
 tadini, non se ne fosse schermito. In fatti non  
 cessò da quell'uffizio che col cessare della re-  
 pubblica; e tranne pochi mesi di una desti-  
 nazione, ch'ei per celia assomigliava a una  
 farsa, la morte politica della sua patria se-  
 gnò l'epoca di una vita onninamente conse-  
 crata a quella poesia, ch'era stata il suo ido-  
 lo anche in seno alle pubbliche cure, e lo fu  
 sino all'estremo respiro.

» Così dolcemente intrattenendosi menò  
 una vita lieta e tranquilla sino al dì 16 ge-  
 naio del 1811, in cui da repentina morte  
 colpito pagò l'inevitabil tributo. Contava l'  
 anno settantesimo primo; ma la freschezza  
 de' lineamenti, l'energia dello spirito, l'atti-  
 tudine di tutte le sue facoltà, lusingavano  
 che non dovesse essere così vicina una per-  
 dita tanto increscevole. » Intal modo scriveva  
 di Francesco Gritti l'ab. Antonio Meneghel-  
 li nella vita posta in fronte alla edizione della  
 tipografia di Alvisopoli dell'anno 1824.

## GUERRA DEI CASTELLANI E NICOLOTTI.

Monumento curioso di storia nazionale è  
 un componimento in cui al vivo, con leggiera-  
 dia, e di quando in quando colle voci mede-  
 sime di attori, che vivevano da trecent'anni  
 addietro, si trovi descritto un trattenimento  
 popolare celebratissimo. Pertale si riconosce-  
 rà quello, che qui si pubblica, e col quale si  
 descrive una guerra tra due celebri fazioni della  
 città di Venezia, i *Castellani* e i *Nicolotti*,  
 seguita nel giorno di san Simeone dell'anno  
 1521. La stizza e la gelosia de' partiti, gli

accidenti del giuoco, il calor delle pugne, la bella imparzialità del cantore, tutto piace e rallegra; e se siecettui una qualche voce oggidì messa fuori di uso, ma di cui è facile indovinare il significato, il vernacolo usato riesce pienamente intelligibile a fronte della sua antichità. Ebbe il chiar. Gamba per esemplare, nella edizione delle migliori poesie in dialetto veneziano, un' assai rara, e poco nota, stampa fatta in *Venezia per Giacomo Vincenti*, 1603 in 12.<sup>o</sup> per opera di un meschino uomo, il quale si è nascosto sotto il nome di *Comogolo di Stentai Mazorbian*. Questi nella dedicatoria scrive di aver potuto carpire dalla bottega di un pizzicaruolo l'originale, ch'egli ha reso pubblico nella sua *Lengua antiga Venetiana dopo di avelo fatto esaminare da uomini giudiziosi et eccellenti che lo hanno innalzato tutti a trombe e a piffari, e celebrato più che nose fa el Morgante Maggiore, el Petrarca, e Olimpio da Sassoferato* ec. Senza bisogno delle ampollosità di questo secentista è certo che fu fatta buona accoglienza al poemetto, che con molta fatica venne dal Gamba ridotto ad una buona e chiara lezione.

### ANGELO INGEGNERI.

Nacque in Venezia, ma visse ramingo ora in Francia, or per l'Italia, finchè dopo varie e curiose vicende compì il suo corso verso l'anno 1613. Tra le opere, che gli procacciarono maggiore stima, sono da ricordarsi le sue critiche al celebre *Pastor Fido*, un *Discorso della Poesia rappresentativa*, *Ferrara* 1598 in 8.<sup>o</sup>, e l'operetta intitolata *Del Buon Segretario*, *Libri III*, *Roma* 1594 in

4.<sup>o</sup>, assai lodata da Apostolo Zeno, e più volte venuta a luce. Maggiori notizie intorno alla sua vita e alle sue opere possono averci nella storia della *Letteratura Italiana* del Cav. Tiraboschi, nella *Vita del Cav. Marliani* del P. Affò, e nella *Vita di Torquato Tasso* dell' Ab. Serassi.

### ANGELO M. LABIA.

Ebbe i natali in Venezia nel dì 6 aprile 1709 da Gio. Francesco Labia senatore, e dalla nobilissima dama Maria Civran. Per vivere in una filosofica oscurità, e dedicarsi agli studi, ed alle amene lettere latine e italiane, evitò di prendere posto negli affari della sua repubblica, e vestì collare di abate, il che non gl'impedì punto d'incontrare nozze legittime con una sposa di rango al suo inferiore. Che fosse uomo di calda fantasia, di prontezza d'ingegno, e di cuore repubblicano, lo dimostrano i pochi, ma leggiadri, sonetti qui inseriti. Che fosse di rettitudine religiosa e di tenace proposito nelle sue opinioni lo dimostra la bella *Arringa al Senato*, mirabile per la naturalezza con cui è dettata, facendo sì che appena possa il lettore accorgersi d'essere essa legata alla terza rima. Si pubblicarono i *Sonetti* e l' *Arringa* per la prima volta nell' edizione del Gamba, che fu assai grato al dottissimo mons. Giambattista Rossi can. arciprete della cattedrale di Treviso, il quale, secondando le istanze dell' egregio sig. Petronio Maria Canali, cedette a graziosa prestanza un manoscritto dall'autore medesimo postillato. L' *Arringa* non è mai stata condotta a compimento, e dopo l'ultimo verso si legge: *L'autore di più non*

*serisse*; e ciò di suo proprio pugno. Meriterebbero pubblica luce altresì molti suoi componimenti satirici dettati nella lingua del Lazio.

Compì Angelo Maria Labia la sua mortale carriera nel dì 7 di settembre 1775 in età di 66 anni.

## ANTONIO LAMBERTI.

Nella raccolta delle poesie veneziane, fatta a cura del ch. Gamba, furono pubblicate per la prima volta queste del Lamberti. Chiunque ama le amene fantasie di Anacreonte, i vivi saldi di Esopo, le tenere pitture di Mosco e di Teocrito; e chiunque ha vaghezza di vedere al vivo dipinte e costumi, e passioni, e caratteri, e la più amabile giovialità, avrà di che soddisfarsi colla lettura delle inimitabili *canzonette*, degli *apologhi*, e degl' *idilli*, delle *stagioni cittadinesche* e *campestri*. L'autore si è occupato in opere di maggior polso, che se fossero tolte all'oscurità nella quale si trovano, arricchirebbero di sempre nuovi e preziosi tesori il veneziano dialetto, così nato fatto per l'armonia da meritarsi il sorriso più puro delle Grazie sotto il cielo italiano. Morì in Belluno nel 28 settembre 1832.

## LUIGI MARTIGNON.

*Luigi Antonio Martignon* nacque in Treviso nel giorno 15 Aprile 1791, e cessò ivi di vivere nel 4 gennaio 1837. Fu il primo di cinque fratelli. Ebbe educazione nel collegio del fu can. Cricco in Fossalunga; di là passò in quello di Castelfranco, e da ulti-

*Racc. Poes. Ven.*

mo nel patrio seminario sino all'anno 1809, alla qual'epoca il padre di lui volle iniziarlo negli affari, e quindi dovette egli interrompere i propri studi.

Mancatogli però il genitore nel 1813, e volte in malè le faccende familiari, si occupò a vicenda negli impieghi municipali, e nelle speculazioni librarie, e fu ultimamente cancellista presso la regia finanza in Treviso.

Era il Martignon di svegliatissimo ingegno, tendente piuttosto alla satira, ma la semente gettata in buon terreno diede qualch'ottimo frutto. Si intendeva discretamente di belle lettere, delle scienze naturali alcun poco, ed alla interrotta educazione supplì colla lettura, sebbene non sempre scelta, nè determinata. Il suo genio per la poesia nel dialetto nostro tardì gli si svegliò, nulla meno molto scrisse, ed in varie occasioni stampò, ma una gran parte dei suoi dettati rimase incedita, che meriterebbero d'essere pubblicati.

## GIAN GIACOMO MAZZOLA'.

*Gian Giacomo Mazzola*, padovano, fu medico di professione, e terminò in patria i suoi giorni nel 1804. Sappiamo che in lode della treccia di Nina aveva dettati nulla meno che cinquecento sonetti. L'ab. Pier Antonio Meneghelli, da non molto mancato ai vivi, compatriota ed amico del Mazzola, ne scelse i *Cento*, che ora si pubblicano di nuovo dopo la stampa da esso fattane in Padova sin dall'anno 1785. Piacquero di maniera che se ne ripeterono l'edizioni. Questa da noi intrapresa è certamente più nitida, più corretta, e più delle altre esatta nella ortografia del dialetto, non restandoci che il

desiderio di ottenere il manoscritto degli altri 400 sonetti per farne buon uso nè possiamo per questo che pregar vivamente chi li possede.

### CAMILLO NALIN.

Dalla nostra tipografia uscirono testè in un volume raccolti i *Pronostici* di questo autore, che hanno ottenuto encomio dal chiarissimo Tommaseo, ed onorevole menzione da alcuni giornali.

Ora pubblichiamo le altre di lui produzioni, ch'egli stesso volle, come quelli, rivedere e correggere, ed inseriamo nella presente raccolta il *Regno immaginario*, quale saggio della sua singolar fantasia.

### PIER ANTONIO NOVELLI.

*Pier Antonio Novelli*, pittore, nacque in Venezia del 1729 a' 7 settembre. Ognuno conosce la sua valentia nell'arte della pittura, e noi avevamo desiderio di presentare al lettore della presente raccolta assai più che un di lui sonetto, ma non abbiamo nostro mal grado potuto farlo. Morì in patria a' 13 gennaio 1802. È stampata la vita scritta da lui stesso.

### LODOVICO PASTO'.

La vita medica, travagliosa, e avvolta fra melanconiche idee, tien uopo de' suoi sollievi. Siccome ebbe fatto il medico Mazzolà, così pur fece l'altro medico Lodovico Pastò; che tutti e due si ricrearono con la poesia nel dialetto veneziano. E certamente che se la

musa del Mazzolà era festevolissima, non lo fu meno quella del Pastò. Era questi di Venezia, ove nacque l'anno 1746; aveva studiato alle scuole de' gesuiti, apparò l'arte della medicina teorico-pratica a Roma, ed a Padova, e la esercitò a Bagnoli di Conselve dall'anno 1774 sino all'anno 1806, nel quale vi è morto nel mese di giugno. Il Pastò fece la sua prima comparsa col ditirambo *El Friularo de Bagnoli*, il quale piacque di maniera che ne furono fatte parecchie edizioni. Egli non voleva pubblicare altra cosa, ma cambiò di tenore per le incommode sollecitazioni degli altri; nulla per altro diede più fuori, che ben ricordasse l'autore del *Friularo*. Un volumetto di sue *Poesie*, che cominciò a stamparsi dall'autore sarebbe rimasto imperfetto per la morte, che a mezzo lo colse, venne da un suo fratello portato al compimento. Da questo libro si tolsero le poche cose migliori; già riserbato al ditirambo del *Friularo* il primato.

### GIOVANNI POZZOBON.

*Giovanni Pozzobon* nacque da onesta gente in Trevigi a' 10 di agosto 1713. Fu collocato da giovanetto nella stamperia Conzatti di Padova, da dove si restituì in patria nell'anno 1744. Obbligato ivi a procurarsi i mezzi di sussistenza si dedicò all'arte libraria, senza però abbandonare la cultura dello spirito, e soprattutto la poesia, cui era dalla natura inclinato. Pubblicò il suo primo pronostico col nome del *Schieson Trevisan* nell'anno 1744, e continuò poi sin ch'ebbe vita a darlo annualmente a luce. Tanto piacque questo popolare libretto che ne vennero im-



pressi da 40 sino a 80 mila esemplari per anno. Il Pozzobon prese moglie all'età di 53 anni, e n'ebbe tre figliuoli. Cessò di vivere a' 10 di luglio dell'anno 1785.

Era di serio contegno, ma nel tempo stesso lieto e gioviale. Dilettavasi di pittura e di nummaria, ed era riuscito a formarsi una serie di medaglie, sì romane che del medio evo. Dopo la sua morte furono raccolte tutte le sue poesie, e stampate in *Padova per Carlo Conzatti*, senz'anno, ma nel 1788, e segg. in 5 volumi in 8°. Da questa faraginoso raccolta si sono tolte le poche cose inserite nella presente edizione, come fece il Gamba, in attestato di riverenza ad un nome benemerito del dialetto veneziano.

### NICOLO' PRIULI.

Dalla spontaneità del componimento il *Bouquet* si vorrebbe francamente asserire, che il N. U. Nicolò Priuli, amante del dialetto della sua patria, ne coltivi con effetto felice la musa, e che abbia dettato altre cose di maggior conto, le quali si meriterebbero la stampa.

### GIOVANNI QUERINI.

*Giovanni Querini* qu. Vincenzo fu un fertile scrittore di poesie in dialetto veneziano, ed il Gamba ci ricordò, che in un codice della Marciana se ne contengono molte, che meriterebbero di essere pubblicate.

### TATI REMITA.

*Tati Remita* è nome anagrammatico di *Ti-ta Merati*, e l'autore di questi sonetti fu don

Giambattista Merati veneziano, che fiorì poco dopo la metà del secolo scorso, e che visse riputatissimo abate della sua religione de' monaci benedettini di s. Giorgio. Abbiamo di lui alle stampe i *Saggi Metrici. In Venezia per il Deregni*, 1763 in 8°, i quali formano un'ampia raccolta di sonetti nel dialetto veneziano, di argomenti per la maggior parte filosofici e morali, e somiglianti ai caratteri di Teofrasto, cioè diretti a regolare i sociali costumi. Ottima è stata l'intenzione dell'autore, ma le sue poesie mancano affatto di gusto e di spirito, nè si possono commendare che per molta facilità. I pochi sonetti qui inseriti sono tratti dall'opera sopracennata.

### PIETRO SALA.

*Pietro Sala*, che esercitava la avvocatura, ha meritato che il chiar. Gamba offerisse un saggio del suo valore poetico nella collezione delle migliori opere scritte nel dialetto veneziano. Da questo saggio potrebbe dedursi, che d'altre cose sia stato autore, le quali però non ci fu dato di possedere,

### MARCO SPRANZI.

*Marco Spranzi* nacque in Vicenza nel 29 Aprile 1762, ed ivi cessò di vivere nel 18 Febbraio 1832. Fu buon poeta vernacolo, come lo dimostra l'elogio dei cani, che per la prima volta viene inserito in questa nostra raccolta di poesie veneziane, e come potrebbero dimostrarlo altri componimenti da lui non pubblicati. Qualche leggier cambiamento è occorso nella lezione per adattare possi-

bilmente alcune espressioni dell' autore al vero nostro dialetto.

### PIRRO TEOZZI.

Abbiamo voluto anche noi conservare il nome anagrammatico di Pirro Teozzi, segnato dal Gamba nella sua collezione di poesie veneziane, e ripeteremo egualmente con lui il desiderio, che tant'altri componimenti di questo autore, Pietro Zorzi, vedessero la pubblica luce, per lo che facciamo opportunamente eccitamento a queglii cui toccò in sorte di possederne i mss., e bramiamo di non farlo in vano.

### GIOVANNI TONELLI.

Eravamo al compimento della presente raccolta quando a mezzo del sig. Nicolò dall'Armi di Feltre ci venne alle mani il ditirambo *sull'uva*, che non sarà certo il solo componimento dall'autore dettato. Nacque il Tonelli in Feltre, e cessò di vivere in Venezia impiegato nel giudiziario.

### MAFFEO VENIERO.

*Maffeo Veniero*, patrizio veneziano, nacque nel dì 6 giugno 1550 da Lorenzo Veniero, e da Maria Michieli, e fu nipote di Domenico Veniero, uno de' famigerati poeti del cinquecento. Appena uscito di educazione in luogo di dedicarsi alle cure del patrio Governo intraprese frequenti viaggi, e visse qua e colà nelle corti de' principi, e specialmente in Roma nel pontificato di Sisto V, ed in Toscana favoreggiato molto dal gran duca Francesco. Essendo ancora in età giovanile otten-

ne per i singolari suoi meriti l'arcivescovato di Corfù, e a maggiori gradi sarebbe salito se avesse potuto godere di lunga vita. Ignorasi se sia mai stato ad amministrare la sua chiesa, ma sussiste una lettera scrittagli per congratulazione da Giambattista Leoni suo amico (1), da cui apparisce, che la dignità ecclesiastica poco dovea essere confacente al suo umore: *Non mi posso intieramente accomodare* (gli scriveva il Leoni) *nel vedervi con questo obbligo tanto repugnante alla natura e alla libertà del vostro vivacissimo ingegno. La dignità è bella, desiderabile, l'avete avuta con condizioni onorevolissime, e ne vengono in conseguenza, per quello che s'è conosciuto, ne' patroni mille argomenti di speranze nobilissime; tuttavia io, che non so tutto quello che è Corte, e quello che si voglia dire arcivescovato, e che conosco il sig. Maffeo, vorrei piuttosto vedervi luogotenente del primo nobile, e ogni altra cosa maggiore, che sentirvi contra al vostro genio volger catechismi, pensar a cura d'anime, a ministeri de' sacramenti, a visite di diocesi, a prediche, e ad altre così fatte obbligazioni necessarie all'offizio e carico vostro. Una pittura poi del suo ingegno l'abbiamo in altro brano di lettera da Giuliano Gosellini indirizzata al suo zio Domenico (2): *Il sig. Maffeo venne a vedermi per moltiplicarmi i favori. Trovavo di presenza, di creanza, e di maniere amabilissimo oltramodo; di poesia poi e di**

(1) *Lettere familiari. Ven. Gio. Battista Ciotti 1592 in 4.º pag. 1.* La lettera porta la data 3 maggio 1583.

(2) Sta in fronte alle *Poesie dei Venieri*, ediz. di Bergamo, Lanzellotti, 1751 in 8.º.

*erudizione, sebbene in me non n' è tanta che possa in altrui giudicarla, tale, che era più atto ad insegnarmi, che punto bisognoso di alcun mio ricordo. Mi fece grazia, quel poco tempo che stemo insieme, di recitarmi i suoi sonetti toscani, oltre a qualch'uno nella propria favella, tutti figurati e maravigliosi; ond'io mi credo mostrar giudizio dicendo, che lo pongo in fin da ora nel numero di quei pochi che meglio hanno scritto. Durò per poco tempo al Veniero quest'onorifico posto assegnatogli dal Guselini poichè, viaggiando egli da Roma a Firenze, venne per istrada fatalmente colto dalla morte nell'età freschissima di anni trentasei; e ciò seguì nel 1586 per le notizie trattesi da un necrologio manoscritto, che serbasi nella Marciana.*

Tra i componimenti lasciati da questo scrittore è famigerata una sua tragedia l'*Idalba*, che l'Ammirato lodò moltissimo nei suoi *Discorsi*. Alquante sue poesie toscane furono raccolte e pubblicate dal Serassi in Bergamo (1). La canzone la *Strazzosa* è una delle più leggiadre poesie ch'abbia il nostro dialetto. La castigatezza non è per vero dire sempre sostenuta allo scrupolo, e perciò l'editore Inzegneri raccomanda nella sua prefazione; che *se ghe fusse qualche parola che no avesse cussì bon saor, e che fusse contra le creanze, o che zenerasse fastidio in la fede, i se contenta de creder che queste xe cosse fatte da boni cristiani obediienti al santo Papa; ma che qualche volta se dise de le bagatele non troppo sal-*

*de per accomodarse a la rima.* Dopo di che a difendere il Venier dall'accusa, datagli da varj oltramontani, d'esser egli stato autore di un nefando capitolo intitolato *la Zafetuz*, basti il dire che questo vide la luce nell'anno 1531, prima quindi della nascita di Maffeo, e fu poi ristampato di là da' monti nell'anno 1651.

## LUIGI ZANETTI.

Abbiamo fatto scelta delle poche cose di questo nuovo scrittore poeta vernacolo da una raccolta non à guari pubblicata in Venezia.

Riscontrandosi nell'autore una fantasia non comune, e molta spontaneità, a noi non resta se non se il desiderio di vederlo costante coltivatore della veneziana sua musa, e salire a quel grado di fama, cui arrivaron tant'altri, che non paventarono le erte cime del nostro parnaso.

## CARLO ZILLI.

*Carlo Zilli* prete veneziano nato nella parrocchia di s. Pietro di Castello, già addetto a quella di san Vitale, fu precettore dell'illustre abate Antonio Bonicelli nella custodia della celebre biblioteca Pisani a santo Stefano. Dovette lasciare quest'onorevole incarico quando dalla famiglia stessa venne nel 1783 eletto a rettore della chiesa di s. Maria di Boara Pisana, diocesi di Padova, della quale assunse il governo nel 29 giugno di quell'anno. E prima e dopo occupossi sempre nello studio, e nella erudizione storico letteraria; e tanto nei ca-

(1) *Rime di Domenico Veniero, con altre di Maffeo e di Luigi nipoti dell'autore. Bergamo, per il Lancellotti, 1751 in 8.º.*

tecismi, che nelle spiegazioni del vangelo usava il dialetto veneziano, che adattandosi alla intelligenza de' suoi popolani riusciva più gradito. In questo dialetto poi con assai facilità scriveva poesie fino dal 1770; e dalle molte abbiamo creduto scegliere le poche, che in questa raccolta diamo per saggio; ommesse assai di quelle, che fatte per alcuna circostanza pubblica o privata de' suoi tempi, ora non avrebbero avuto più interesse. Morì colpito d'apoplezia nella sua residenza di Boara l'anno 1819 il dì 29 novembre. Non consta che vivente abbia egli stampato cosa alcuna col suo nome; e solo sospettiamo che abbia avuto parte in una raccolta intitolata le *Muse Veneziane* per le nozze del nobile uomo *Alvise Pisani* colla nobildonna *Giustiniana Pisani* (Venezia, senz'anno o luogo, o stampatore, in 8.<sup>o</sup>); nella quale alcune delle poesie ponno ragionevolmente essere state da lui dettate. Dobbiamo alcune di queste notizie biografiche al reverendo don Giuseppe Scarso rettore della Boara Pisana; e le poesie alla gentilezza del signor Giuseppe Passquali, in cui potere pervennero alcuni manoscritti dello Zilli.

### MARC' ANTONIO ZORZI.

*Marc' Antonio Zorzi*, patrizio veneto, nacque da Lorenzo Zorzi e da Regina Conatarini nel dì 26 febbrajo 1703. Educato alle ottime discipline, come lo furono gl' illustri suoi contemporanei concittadini, i Farsetti, gli Algarotti, i Foscarini, i Gozzi, i Goldoni,

e tant' altri, prese egli singolare affetto alla giurisprudenza, e all' oratoria, e salì in così alta fama nel suo Governo da essere in qualche crisi della repubblica onorato di delicatissimi ufficii. Si mantenne giudice incontaminato ne' consigli di Quaranta per oltre 44 anni, ed ivi per lunga epoca coprì eziandio l' ufficio di contraddittore, che vale a quello di procuratore regio. Le più intricate quistioni del foro erangli argomento di private esercitazioni, e lasciò vari scritti, ne quali si veggono svolte e rischiarate quelle idee del giusto ch' erano per le venete costituzioni il Codice de' magistrati. Agli studi ameni dedicava gl' istanti di suo riposo, e restano presso i suoi eredi molte operette di varia letteratura, ed alcune versioni dal latino e dal francese di componimenti teatrali. Appassionato il Zorzi per il patrio dialetto trasportò in questo alquante orazioni di Cicerone, che tuttavia restano inedite, e moltissime poesie dettò, alcune delle quali peraltro con troppo libera penna, siccome fatte per rallegrare le società, nelle quali egli era sempre desideratissimo. Le pochissime quì inserite sono forse per gentilezza di pensiero, e per felicità e candore di sposizione, tra le più gaie della nostra raccolta. Visse assai lungamente, e morì nel dì 29 febbrajo 1787. Era di statura piuttosto alta, di leggiadro aspetto, di occhi vivaci, assai dignitoso del portamento, e a malgrado degli oltraggi della vecchiaia conservò sempre quella vivacità di spirito, e quell' attività giovanile, che a pochi il Ciel largo dispensa.

FINE.







